


Esuquidistu Chuiquin
Tantiamete



New Testament in Matsés (PE:mf:Matsés)

Esuquidistu Chuiquin Tantiamete

New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022
446da786-5bd1-5ffa-85e2-9eff4052cf8b

Contents

Mateyon Dada uaid	1
Madcosën Dada uaid	55
Ducasën Dada uaid	87
Uanën Dada uaid	139
Esus Chuibenequidon Naid	178
Doma yacnocquidon Iste	224
Codinto yacnocquidon Iste 1	249
Codinto yacnocquidon Iste 2	270
Cadasia yacnocquidon Iste	283
Epeso yacnocquidon Iste	292
Pítipos yacnocquidon Iste	300
Codosas yacnocquidon Iste	306
Tesadonica yacnocquidon Iste 1	312
Tesadonica yacnocquidon Iste 2	317
Timoteyon Iste 1	320
Timoteyon Iste 2	327
Titon Iste	332
Pidemonën Iste	335
Ebedeyon Isadaidbon Iste	337
Santiacon Dada uaid	352
Petedon Dada uaid 1	358
Petedon Dada uaid 2	365
Uanën Dada uaidëmpi 1	369
Uanën Dada uaidëmpi 2	375
Uanën Dada uaidëmpi 3	376
Udasën Dada uaid	377
Esusën Uan Ismiaid	379

MATEYON DADA UAID

Esuquidistu tsusedpabotedi chiaid (Duc 3.23-38)

¹ Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

² Abadauanquibi bedanquin chuinu. Abadauanën mado Isac cuëmêdpampic. Isaquën madobic Acobo cuëmêdquid. Acobon mado dadpen icpampic. Abentsëc Uda cuëmêdnuc aton buchiado utsi-utsiec cuëmêdpampic. ³ Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmpampic. Padesën mado Eston cuëmêdpampic. Estonën madobic Adan cuëmêdquid. ⁴ Adanën madobic Aminidad cuëmêdquid. Aminidadën madobic Nason cuëmêdquid. Nasonën madobic Sadmon cuëmêdquid icpampic. ⁵ Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmêdquid icpampic. ⁶ Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udias caid cuesunetanquin aton chido bedshun aton mado Sadomon tishmepampic.

⁷ Sadomonën mado Doboan nepampic. Doboanën madobic Abias cuëmêdquid. Abiasën madobic Asa cuëmêdquid. ⁸ Asan madobic Osapad cuëmêdquid. Osapadën madobic Odan cuëmêdquid. Odanën madobic Usias cuëmêdquid. ⁹ Usiasën madobic Otan cuëmêdquid. Otanën madobic Acas cuëmêdquid. Acasën madobic Esequias cuëmêdquid. ¹⁰ Esequiasën madobic Manases cuëmêdquid. Manasesën madobic Amon cuëmêdquid. Amonën madobic Osias cuëmêdquid. ¹¹ Osiasën madobic Eonias cuëmêdquid. Aid Eonias caid aton masesadobëdtabi yuanuen Babidonia yacnocquidon aton nidaidën buampampic.

¹² Buanac shubu dadpen icquid Babidonia caid yacnoshon Eoniasën aton mado Sاداتiedën tishmepampic. Sاداتiedën mado Sodobabed cuëmêdpampic. ¹³ Sodobabedën madobic Abiud cuëmêdquid. Abiudën madobic Ediaquin cuëmêdquid. Ediaquinën madobic Asod cuëmêdquid. ¹⁴ Asodën madobic Sadoc cuëmêdquid. Sadoquën madobic Aquin cuëmêdquid. Aquinën madobic Ediud cuëmêdquid. ¹⁵ Ediudën madobic Ediasad cuëmêdquid. Ediasadën madobic Matan cuëmêdquid. Matanën madobic Acobo cuëmêdquid. ¹⁶ Acobon madobic Ose cuëmêdpac caondash. Aidquo Madian bënë nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec matses bëdambo icmequidquo nec. Isadaidbon cainaidquo nec.

¹⁷ Aidedti Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuioaquin padpiden bedanquin aidën matses 14tedbidi chuiquin Eonias aton matsesbëdta buanaid ënquin chiombi. Adoshombic Eonias ënquin chuiboed chuioaquin padpiden bedanquin aton matses 14tedbidi chuiquin Esusquibi ënquin chiombi.

Esuquidistu tishaid (Duc 2.1-7)

¹⁸ Nëbi aid tishaidquo chuinu. Esus tishabi yec aton tita Madia icpac caondash. Abi inuequidën Osen bedabi icshobi Nuquin Papan Mayanën bacuë usundomepac caondash. ¹⁹ Usundoacsho isun abi inuequidën Osen dada utsin chudaid danec: —“Nëbi mibi bedtiapimbo iquebi,” quequin bedenquo icnuen dada uashun Madia menenu —queuidpac caondash. Nuquin Papan chiacpadquo bëdambo icquid icquin naden chiambo icpac caondash. —Bedabi bacuë usundoaque. Cuidquimbien ictiad —quequin aton matses chienquo yequi: —Bedenquo icnuen dada uaid menenu —queuidpac caondash.

²⁰ Adnubien Nuquin Papan abi yacnoshon uaidën mayan bëdan Ose ushquin ismepac caondash. —Dabid yampidën tsyuecquid icsho mibi chuinu, Ose. Tantia. Chudenquo icquin Nuquin Papan Mayanën Madia bacuë usundomiaye. Dacuëdenda. Dacuëdenquo icquin Madia min shubuno buanta. ²¹ Adoshombic dada bacuë tishacsho Esus cuënta. “Matses icsaid bedshunquin Nuquin Papa aton matses cuidmenquo iquendac,” quequin Esus cuënta —quequin mayan bëdan Ose ushquin ismepac caondash.

²² Aden mayan bëdan Esus tishte chiacpadomboen Nuquin Papan ambi chiaid naden dada uamepampic.

²³ “Dadan inacmaidëmbi bacuë usundoshon dada bacuë tishendac. Aidi Imanued cuënendac.

'Nuquin Papapadquidquiobidi matsesbëd tabadnuec choash nec,' quequin Imanued cuënendac,"

quequin Esus tishte Nuquin Papan dada uamepampic.

²⁴ Aden mayan bëdan chiac isucunshumbien aidën chiacpadomboen Osen aton shubuno Madia buampac caondash. ²⁵ Buanshun Osen chudenquo icnubi dada bacuë tishpac caondash. Tishacsho Esus cuëmpac caondash.

2

Uispa isquido Esus isec choaid

¹ Nidaid Udeya caid yacno tabadquin shubu daëdpactsëcquid Beden caid yacnoshon Esus tishpac caondash. Adnubien shubu dadpen icquid Edusaden caid yacno isadaidbo matses ancaquid Edodes cuëmëdquid icpac caondash. Aid icnubi matses utsibo uispa isquido Esus isnuec ushë choacmiuësh chopac caondash. Edusaden yacno choquin ² anocquido chuituidpac caondash. —Min matses isadaidbo chuiquid dapa ictequidquo nëbi tishsaidëmpi çmidambo icctseqe? Isnu. Aid tishaid tantiamete uispa isombique. çMitsimbo icctseqe? Isnu. "Chuiquid dapa bëdamboshë ictequid nec," quiaish aid isnuec chopobi —quetuidpac caondash.

³ Adsho tantiash dachuëdcuededpac caondash abitedimbo. —Padtec. çMidapadquid bacuë nependabac? —quecuededpac caondash Edodes isadaidbo ancaquid ambi ancaidobëdi.

⁴ Adshumbien Edodesën abi yacno tsusiobo cho-chomepac caondash. —çMitsicquid caique? Tiantianu —qeshun abi yacno Moisesën dada uampid chuibanquido abi chuiquid dapabobëdta cho-chomepac caondash. Cho-chomeshumbic: —çMitsishunquo Nuquin Papan chomiaid min matses chuiquid dapa ictequid tishpash? çAda Nuquin Papan chiaid isbanquin tantio? —caquien: ⁵ —Ai, tantiemi. "Nidaid Udeya caid yacno tabadquin shubu daëdpactsëcquid Beden caid yacnoshon aid bacuë tishendac," quiampicpadembi tantiemi. Nuquin Papan ambi chiaid nuquin tsusedpa dada uamepampic naden. ⁶ Shubu daëdpactsëcquid Beden caid yacnoquido chiec:

"Beden yacno tabadec nidaid Udeya caidën tabadquido mibi nec.

'Chuiquid dapa nibëdnuc icsambo iquendac,' quedenedi mibi yacnoshon chuiquid dapa ictequid tishendac.

Aidëmbi isadaidbo matses chuiquid dapa icquin bëdamboen tabadmendac,"

—quequin Nuquin Papan Esus tishte chiaid chuipac caondash tsusiobon Edodes caid chuiquin.

⁷ Adoaquien Edodesën ambi ancaido isadaidbo ismenquo icquin matses utsibo uispa isquido chomeshun chuimepac caondash. —çNëbida tishaid tantiamete uispa isquin tauao? çNëid inchëshën ushëmbida isbeno? çËndenda isbenonda? En chui. Tiantianu —cac chuisho ⁸ tantiashun: —Beden yacno istan. Ano nidshun mimbi chiacpadquid bacuë istan. Aid bacuë istanec cuenquin ëbi chuibenta. Èmbitsen istanu. "Nuquin Papan chomiaid chuiquid dapa ictequid bëdambo iquec," quequin ëmbitsen istanu —capac caondash Edodesën muaquimbi. —Cuesunenu —quequimbi adopac caondash.

⁹ Adoaquien ushë choacmiuësh bed-bedquesho ambi isbëquin tsibambëboedi uispa tsibanec Beden yacno nidpac caondash. Adec nidnubien uispa shubu ismec nidtuidpac caondash: —Bacuë ictsaid shubu nëid iquec —quec. ¹⁰ Adsho isashien cuishonquepac caondash uispa isquido. ¹¹ Adash shubun puduedshun isquien aton tita Madiabëd bacuë icctsec. Aid isashic: —Matses chuiquid dapa ictequid nec. Matses bëdambo icmetequid nec —quequin aton matsesën nacpadomboen ismequin danëshën sebudpac caondash. Adshumbic ambi bëboed aton na bëdambo icquid chïcshun menepac caondash nëidtedi. Nëidic shocosh piu. Nëidic bëdambo nuadnuc tauitequid. Nëidic bëdambo noadec danosh-quete. Aidtedi menepac caondash. Adoash ushtopac caondash. ¹² Adec ushtoacsho Nuquin Papan ushquin ismepac caondash. —Isadaidbo ancaquid Edodes chuibidanenda —quequin ushquin ismiac isucunanec abi choboedën nidenquo yec podqued utsin nidpac caondash aton shubuno nidec.

Equipito yacno Osen buanaid

¹³ Esus isuanquido nidambien Nuquin Papan abi yacnoshon uaidën mayan bëdan Ose ushquin ismepac caondash. —Isucunanec cuenta. Bacuëmpi aton titabëdta buanec nidaid utsi Equipito caid yacno cuenta. Èmbi chiabi choenda. Anobi tabadta. Edodesën: "Bacuëmpibo cuesun siatanta," cac cho-choeque. Cuenta —quequin Ose ushquin ismepac caondash mayan bëdan.

¹⁴ Aden ushquin ismiac isucuntantsequi inchëshëmbi puduanec aton bacuë anibëdta buanec nidaid utsi Equipito caid yacno Ose nidpac caondash. ¹⁵ Equipito yacno nidash ambobi tabadpac caondash. Isadaidbo ancaquid Edodes unëshabi icnuc Equipito yacno tabadpac caondash. Esus tishabi icnubi ëndenquimboshë Nuquin Papan tantiamiac ambi chiaid chuibanquidën Esus Equipito yacno buante chuiquin dada uapampic naden chuiquin. "Equipito yacno nidash tabadsho: 'Auëshquio cho, Mado, caindami,' quiosh Nuquin Papa," quequin Nuquin Papan chiaid dada uapampic.

Bacuëbo dadpen cuesun siatanaid

¹⁶ Adnubien isadaidbo ancaquid Edodes: —Uispa isquidon cacuidposhi —quiash comapenec nëishun aton yuabo sondado chuipac caondash. —Uispa isquidon chuibocpadtsëccquid comapenec onquecuenabi ictsëccquidotedi dada bacuëmpibotedi cuesun siatan. Beden yacnocquidon bacuëbobëdtabi uano pauequidon bacuëbotsen cuesun siatan —cac cuesun siatampac caondash. ¹⁷ Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

¹⁸ "Abi yacnuësh aton bacuëbo nibëdandsho isash isadaidbon chidobo sedenqueuedenedac.

Unëshaid tantiec baded ënëdenquoio yec sedenquebudnendac,"

quequin chiampicpadomboen aton bacuëbo nibëdamepac caondash.

¹⁹ Yuecquio ictaniashic isadaidbo ancaquid Edodes caid unëshpac caondash. Adambic nidaid utsi Equipito caid yacno tabadsho Nuquin Papan abi yacnoshon uaidën mayan bëdan Ose ushquin ismepac caondash. ²⁰ —"Bacuëbo cuesun siatan," quiondaid unëshaccoshe. Min chido min bacuëbëdta buanec min nidaid Isadaid caidën nidoata —caquien ²¹ isucunanec aidën chuibocno buanec nidpac caondash.

²² Aton nidaidën nidshun aton matsesën chiaid tantiapac caondash. —¿Ada tantio? Udeya yacnocquido ancadened unëshaidën mado Adquedayo caid ancanquidquibidien nechitec —quesho tantiashien dacuëdtampac caondash Ose. Adshobien Nuquin Papan Ose ushquin ismeoapac caondash. —Cuesunenushë. Min nidaid Udeya caidën nidenda —quequin ushquin ismiac isucunanec aid nidaid Isadaid caidëmbidi nidec aid nidaid cuëshë utsi Cadidia caidën nidpac caondash. Udeya caidën nidenquoio yec uquëmbo nidpac caondash. ²³ Uquëmbo nidec shubu dadpen icquid Nasaded caid yacno choash ambo tabadtuidpac caondash. "Nasaded yacnocquid nendac," quequin Nuquin Papan chiaid dada uampicpadec anobi tabadpac caondash. Auëshquio canipac caondash Esus.

3

Uan acten mentoanquidën chuibeniaid

(*Mad 1.1-8; Duc 3.1-9, 15-17; Uan 1.19-28*)

¹ Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibëdacno capucuenequin Nuquin Papan chiaid chuibenequid nepac caondash. ² Adquid icquid Esus chote chuibampac caondash naden. —Mibi icsaid ënash bëdamboec tabadta. Nuquin Icbombo choeque —quequin chuipac caondash. ³ Aden Uanën chuite chuiquin Nuquin Papan isadaidbo tsusedpa Isayas cuëmëdquid dada uamepampic naden.

"Masiuidpambo yacno shubu nibëdacno capuquin ëcac matses chosho chuibenendac.

'Chuiquid dapa choeque. Podqued andëdbanshunta,' quiacbimboen:

'Nuquin Icbombo choeque.

Icsaid ënash bëdamboec tabadta,' quequin chuibenendac,"

quequin Isayasën Uanën chuite chuipampic.

⁴ Nadquid Uan icpondash. Aton dashcute nëish yua dapa cameyo caidën bu daëdcaid dasuidpondash. Tshipantebic nidaidën capuquid yua bitsi nacnenaid tsiupondash. Aton pete bacumbëd shioshbimboecquid icpondash. ⁵ Aidën Nuquin Papan chiaid chuibenesho tantianuec nëidtedi matses cho-chopac caondash. Nëidic shubu dadpen icquid Edusaden caid yacnocquido. Nëidic nidaid Udeya caid yacnocquido. Nëidic acte Odan caid cuëman tabadquido. Aidtedi cho-chopac caondash. ⁶ Cho-choshon Uanën chuisho tantias: —Nuquin Papan chiaid niac-niaquec icsapobi. Icsaboedi aid tantiec bëdamboec tabadti-adquio iquebi —quesho: —"Nëid Nuquin Papa tantianu," quequid nec —quequin acte Odan caidën mentopac caondash Uanën.

⁷ Adnubien padiseyobobëd saduseyobo Uan isec cho-chopac caondash. Padiseyobo isadaidbo tsusedpabon chiaid namequido nec. Saduseyobobic: —Matses unëshaid uincuenenquoio iquendac —quequido nec. Aido cho-chosho isun Uanën: —Nisibimboecquido mibi nec. Adquidën icsa uacbimboen matses icsa uaquido mibi nec. Bëdambo icquid damianquieq mibi iquec. "Nuquin Papan mibi cuidnushë. Tantiatan," quequin çtsuntsin

chiac cho? ⁸ Mentomete bunec Nuquin Papan chiaid niac-niacboedi ënash bédamboec tabadta. ⁹ “Ëbipadquid Abadauanën tsyuecquiduidtsëqui Nuquin Papan bédamboen isec,” quequin tantienda. ¿Adquidta Nuquin Papan bédamboen ispec? Abadauampadquid abi tantiaquidien Nuquin Papan bédamboen isec. Mimbi bédamboen tantiatiapimbo icsho isun nëid cuënotebi matses uashun Nuquin Papan Abadauampadquid abi tantiaquidombo icmetsiash icnushe. Nuquin Papambo tantiata. ¹⁰ “Icsambo icquid nec,” qeshun ambi nitsinaid cuëte bacuësa dëdshun nëdëncacimboen ambi chiacpadomboen naisa Nuquin Papan cuidendac –quepac caondash Uan padiseyobo saduseyobobëdta chieç.

¹¹ Adshumbic padpiden chuiquin Esusën nate chuipac caondash. –Nuquin Papa tantianuequid acten mentobanquin chuibanquid nebi. Padnuen con tsyuecquid choshon aidëntsen chuibanendac. Ëbi bëdiactëc tantiaquid ictsëcnuc aidquien comapenen tantiaquidquio yec bédamboshë iquendac. “Aidquio bédamboshë icquid icnuc ¿atotsieshun icsaquidquibi: ‘Aid choec,’ quequin chuiquidquio Nuquin Papan ëbi icmeposh?” quec tsadebi. Ëmbi chuiboed choshon: “Ëbi tantiaquid nec,” qeshun aton Mayan menequin bédamboec tabadte mibi tantiamendac. Abi tantiesaboen cuidendac. ¹² Piacbo choesashun putu bushcaquin secacimboen abi tantiesabo chian anëdënquiacno nësecaindac. Adshumbic abi tantiaquido abëdi tabadmendac –quepac caondash Uan acten mentoanquid.

Uanën Esus mentoaid

(*Mad 1.9-11; Duc 3.21-22; Uan 1.32-34*)

¹³ Acte Odan caidën matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuësh tauamboen matses ismenuec choec: –Ëbitsen mento –quetuidpac caondash. ¹⁴ Adshobien Uanën: –Padenquio iquembi. Nuquin Papan chomiaid icquin mimibi ëbi naquien bédambo ictsiash. ¿Atotsieshun ëbi aden chie? Padi –qeshobien: ¹⁵ –En na. Bédambo iquec. Ëbi mentoquin mimbi Nuquin Papan chiacpadomboen natsiaque. Ëbi acten mento –qesho tantiashun Esus acten mentopac caondash Uanën.

¹⁶ Adoac Esus pudundonobien canchedacimboec abu shëcuë yampac caondash. Adsho isaquien aid shëcuë yacnuëshquio dëbimbimboec budec Nuquin Papan Mayan Esusquio matsadtopac caondash abëd icnuec. ¹⁷ Adnubien abucuëshquio Nuquin Papa onquiampac caondash. –Nëid ëmbi tantiaidquio con Mado nec. Ëmbi chiacpadomboen nasho isash bédambo iquebi –quepac caondash Esus caic.

4

Satanasën Esus icsamenuequin tanuidaïd

(*Mad 1.12-13; Duc 4.1-13*)

¹ Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. –Ma Nuquin Papa chieshënnquid Satanasën Esus icsamenuequin ma tanu –quequin ambo nidmepac caondash.

² Adoquien buna mëmunquin penquio yec Esus tsadpac caondash. Inchëshën ushë abentsëc nidmiash utsi tashquecuntëcnuc 40tedec ushquin penquio yec comapenec bumpac caondash. ³ Bunec tsadshobien Satanasën istuidpac caondash. Istuidtanquimbien: –¿Nuquin Papan Madombobida mibi neque? Aidën Madombo icquin nëid cuënote cain: “Pete icta,” cata –caquien ⁴ Esus: –Padi. Nuquin Papan chiaid dada uapampid nad iquec. “¿Petuëidi tantiecta matses bédamboec tabadpec? Nuquin Papan chiacpadomboenuidi naiquien matses bédamboec tabadtsiash,” quequin dada uapampid iquec –quepac caondash Esus.

⁵ Adsho tantiashumbien shubu dadpen icquid Edusaden caid yacno buanshun Nuquin Papa tabadte shubu uashunaid macano Satanasën Esus manidtomepac caondash abucquio. ⁶ Adotanquimbien padpiden chuiquin: –¿Nuquin Papa caidën Madombobida mibi neque? Aidën Mado yec nëuëshquio pudunta. Nuquin Papan mibi paëdmenquio ictsiashe. Nadentsen Nuquin Papan chiaid dada uapampic.

“‘Uidën uata,’ quequin ambi abi yacnoshon uaido mayan bédabo Nuquin Papan chiac mibi uidën uaindac paëdenquio icnuc.

‘Cuënoten tadquëdnushe,’ qeshun adoendac,”

quequin Nuquin Papan chiaid dada uapampique. Pudunta –caquien ⁷ Esus: –Padi. Nuquin Papan chiaid dada uapampid nad iquec. “¿Icsamboen tantiaquin ëmbembi nashodabi Nuquin Papan cuidpatsiashe? Tanu,’ quenda,” quequin dada uapampique. Padi –quepac caondash Esus.

⁸ Adoaquien Satanasën padpiden buanquin macuësh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobëd icquido ismequinc aidon dayun uaidtedi ismequinc capac caondash. ⁹ Adoshombic: —Nëidtedi mibi menetsiambique. Èbi con icbo cata. Èbi aden chuiquin ismenuen danëshën sebudta. Adsho isun ëmbi ismiactedi mibi menembi. Aidën icbo mibi icmembi —caquien ¹⁰ Esusën: —Padi. Baded cuenta. Nuquin Papan chiaidquio chuiquin naden dada uapampique. “Nuquin Papa abentsëcquiobi mimbi tantiaiduidtsëqui min Icbombo neque. Aidën namiaidquio icta,” quequin dada uapampique. Cuenta —capac caondash Esusën. ¹¹ Adoaquien Satanas cuempac caondash. Cuenubien Nuquin Papan abi yacnoshon uaido mayan bédabo choshon abëdi tabadquin Esus bédambo icmepac caondash.

Cadidia yacnoshon Esusën chuibeniaid
(Mad 1.14-15; Duc 4.14-15)

¹² Adashic aton nidaid Cadidia caidën Esus nidpac caondash. —Mibi acten mentondaid Uan bedshun quënën nauedac caosh —quesho tantiash nidpac caondash. ¹³ Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic. ¹⁴ Esus ambo tabadte chuiquin Nuquin Papan con tsusedpa Isayas cuëmëdquid dada uamiampicadec ambo tabadpac caondash Esus. Naden dada uapampic.

¹⁵ “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëman tabadquidon.

Nëidic isadaidpembo dadpen tabadacno Cadidia caidën tabadquidon.

¹⁶ Aidtedishun Nuquin Papan chomiaid tantiendac.

Pabiate cuënëdacimboec icsamboec tabadquin Nuquin Papa tantienquio icboedombi tantibenendac.

Nuquin Papa tantiamenuen chuibansho tantiashun matsesën paposhquiacimboen Nuquin Papa tantibenendac.

Abi tantienquio icsho Nuquin Papan cuidtsenaidombi Nuquin Papa tantibenendac ushash isucunacimboen,”

quequin Isayas Esus choash tabadte dada uamepampic Nuquin Papan.

¹⁷ Ashunquiobi Nuquin Papan chiaid chuiquin tauamboen Esusën matses abitedimbo chuibenepac caondash. —Icsaid ënash Nuquin Papa tantiec ambi chiacpadec bédamboec tabadta. Nëbi Nuquin Papan abëd tabadtequido icmequin matses bédamboen tabadmendac —quepac caondash Esus ambibi naid chiequi.

Nuëcquid bedquido Esusën: Cho, caid
(Mad 1.16-20; Duc 5.1-11)

¹⁸ Aden chuibenec chian dapa Cadidia caid cuëman nidquin isquien dadan aton ut-sibëdtambi nëshaid dapambo acte nënepec. Aid Simombidi Petedo capec. Aton utsi Andedes nec. Aid daëdshun nuëcquid bedquidombo icquin aton nëshaid acte nënesho istuidpac caondash Esusën. ¹⁹ Adshumbien Esusën: —Nuquibi icnu. Cho. Nuëcquid bedquid icboedi nëbi ëbi chuibanquid mibi icmenu ²⁰ —caquien aton nëshaid nianec nidquimbi Esus tsibanampac caondash.

²¹ Udictsëc nidquin isquien dada daëd cano antabëdpec. Acobo aton utsi Uambëd icpac caondash. Aton papa Sebedeyo caidbëdi cano antabëdquin nuëcquid bednun aton nëshaid dapa nacnempac caondash. Adsho istuidshun Esusën: —Nuquibi icnu. Cho —caquien ²² aton papabëdta cano nianec Esusbëd icnuec nidpac caondash.

Matses dadpen Esusën chuibeniaid
(Duc 6.17-19)

²³ Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquieac pudueduenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bédamboen iste matses chuibeniatic caondash. Adshumbic daicsaidotedi bédamebampac caondash. ²⁴ Adosho istanquin: —Bédamequidquio nec —quequin isboedon Esusën naid chuibenepac caondash. Ènapen nidec nidaid utsi Sidia caidën nidshun chuibeniatic caondash. Aden chiac daicsaidotedi bë-bëpac caondash. Dada paëmshë icquido yec podobitsi icsa dapuduedaido yec unësanequido yec dada shëquëquenquio icquido yec quenuc bë-bëacsho aidtedi bédamepac caondash Esusën.

²⁵ Aden: —Bëdamiash —quequin chiac isec cho-choash dadpenquoio tsucus-tsucustsëcquio yec tsidadash niqianquin Esus tsibanampac caondash. Nëidtedshun tsibananac caondash. Nëidic nidaid Cadidia caidën tabadquidon. Nëidic shubu dadpen icquid Decapodis caid yacno tabadquidon. Nëidic shubu dadpen icquid Edusaden caid yacnoquidon. Nëidic nidaid Udeya caidën tabadquidon. Nëidic acte Odan caid uquë cuëma utsiuc tabadquidon. Aidedtedshun Esus tsibanampac caondash.

5

Nadquido bëdambo iquendac, quequin Esusën chiaid (Duc 6.20-23)

¹ Matses dadpeshun tsibananac macuësh dapa cuëte nibëdpamboecquid pudundoc poctsebi Esus tsaduidpondash. Abi tsibananash matses dadpen abi datsidadnubien abëd icquido Esusën dayunquoio tabadpondash. ² Adshobien Nuquin Papan matses bëdamboen isquin bëdambo icmete Esusën matses abitedi chuibampondash.

³ —¿Mitsipadquid Nuquin Papan bëdambo icmepec? Nadquid caimbique. Tantia. Mibitedi chuinu. “Èbemi bëdamboec tabadtiapimbo iquebi. Bëdapenquoio iquebi. Nuquin Papan bëdamboen tabadmiaquini bëdamboec tabadtsiac,” quequid Nuquin Papan: “Èbëd tabadtequid nec,” quequin bëdambo icmendac.

⁴ “Matses abitedi icsamboec tabadnuc ëbitsen icsamboec tabadquid nebi,” quec shu- buquimbi abi tantiansho Nuquin Papan bëdamboen isquin bëdambo icmendac.

⁵ Aton nauidi tantienquoio icquin Nuquin Papa tantiaquin utsibotsen tantiaquid Nuquin Papan bëdambo icmendac. Yuecshun ambi nidaid chuca uaidën tabadmendac.

⁶ Pete bunacimboec ambi chiacpadec bëdamboec tabadte bunquid Nuquin Papan bëdamboen tabadmendac.

⁷ Abi chieshënquidi chieshënenquoio icquin bëdamboen isquid Nuquin Papan bëdamboen isendac.

⁸ Ambi chiacpadomboenuidi nate bunquid Nuquin Papan bëdambo icmequin abibi bëismendac.

⁹ Aton matses chieshënanasho isash: “Padi. Chën. Bëdamboequien tabadtiad,” quequid Nuquin Papan bëdambo icmequin con mado caindac. Adquidbidi ademibidi con champi caindac.

¹⁰ Nuquin Papa tantiec bëdamboec tabadsho utsin chieshënaid Nuquin Papan bëdambo icmequin unësacsho abëdi tabadmendac. ¹¹ “Esus tantiaquid nec,” qeshun utsin mibi chieshënuin chiacsho Nuquin Papan abëd tabadmenuen mibi bëdambo icmendac. Mibi cueso ademibidi mibi bëdambo icmendac. Ademibidi mibi muauasho Nuquin Papan mibi bëdambo icmendac. ¹² Aden utsibon: “Esus tantiaquid nec,” qeshun chieshënaqui cuisshonqueta. “Ènden tsusedpabon Nuquin Papan chiaid chuisho chieshënuin cuesunepampic. Adoacsho Nuquin Papan bëdamboen isquin abëdi tabadmec. Ademibidi utsibon chieshënacsho ëbi bëdamboen isquin unësacsho abëdi tabadmendac,” quiaish cuisshonqueta —quequin chuipondash Esusën.

Abi tantiaquido bëdamboec tabadte chiaid (Mad 9.50; Duc 14.34-35)

¹³ Abi macuësh dapa poctse tsadquin Esusën chuibampondash. —“Ma utsibotsen Nuquin Papa tantianu,” quec sa pambid casecac batambo yec petiadquio yacimboec icta. Aden Nuquin Papan chiacpadec bëdamboec tabadquin mimbi utsibo bëdamboec tabadte bumetsiac. Sa batambo icquid bëdambo iquec. Sa batambo icboedi batapenquoio yec icsasho ¿mitsipadentsi batambo icmeoapec? Adotiapimbo iquec. Sa icsambo yacasho penquoio icquin secatequid nec. Ademibidi matses bëdamboec tabadenquoio yec icsambo icsho Nuquin Papan chian anëdënquiacno nësecatequid nendac —quepondash Esus.

¹⁴ Adashic padpidec onquec: —Nuquin Papan chiacpadec bëdamboec tabadte utsibo tantiamequido mibi neque. Aden tantiamenuc bëdamboec tabadta. ¿Nuntanshunda ëapadic? Padenquoio. Umanuschumbien ma tantianueshun ëaquid. Ademibidi: “Ma Nuquin Papan chiacpadec tabadte tantianu,” quiaish ënëdenquoio yec bëdamboec tabadquin ismeta. Adsho isash: “Nuquin Papa tantiec bëdamboec tabadquid nec,” quetsiash utsibo. ¹⁵ ¿Utsibo chuinu- uecta abentsëqui uano icpadic? Padenquoio. “Ma nëidën tantianu,” quec aïdbëdi bëdamboec tabadquin chuibanquid. ¹⁶ Ademibidi ëbi tantiesabobëd tabadquin: “Ma Nuquin Papa tantianu,” quequin ënenquoio icquin Nuquin Papan chiacpadomboen nata. “Nuquin Papa bëdambo iquec,’ ma utsibotsen quenu,” qeshun adota —quequin Esusën chuipondash.

Nuquin Papan Moises chuimiai chiaid

¹⁷ Nadentsen Esusën chuipondash. —Ëmbi chuibansho tantiashun: “Nuquin Papan chiaidquio chienquio iquec,” quequin tantienda. “Nuquin Papan Moises dada uamiampidbêdta con tsusedpabo utsibo dada uamiampid chienquio icquin utsi uapec,” mimi ãbi capec. Mambi utsi uainquio yoc. Nuquin Papan chiaid utsi uainquio icquin ambi chiactedimbo namenuc nebiq. ¹⁸ Abimbo chuinu. Tantia. Abubêdta nidaid nibêdamiabi icnuc Nuquin Papan chiaid bñndutiapimbo iquendac. Ambi chiactedimbo naquin Nuquin Papan nainendac.

¹⁹ Padnubic Nuquin Papan: “Nadomboen nata,” quequin chiaid abentsêqui niacquin aid chiaidbidi adomboembidi niacmequid Nuquin Papan: “Bêdambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bêdamboec tabadnuna,” quequid abi yacno nidacsho Nuquin Papan: “Bêdamboshê icquid nec,” caindac. ²⁰ Moisesën dada uampid chuibanquido padiseyobobêd Nuquin Papa yacno puduedtequidoen mimi dampec. Aido bêdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bêdamboec tabadquidien puduedtsiash —quequin chuipondash Esusën.

*Chieshêmênquido nêish bêdante chiaid
(Duc 12.57-59)*

²¹ Adshumbic Esusën padpiden chuioapondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiacpadomboen matses cuidte chuiquidên cuesunemequin cuidquid,” quequin chuipampid mimi tantiec. ²² “Nadquidotsen cuidtequido nec,” quequin chuinu. Tantia. Aton matses nêishênash aton nêish bêdanenquio icsho Nuquin Papan cuidtequido nendac. Utsibic chieshêmênec icsamboec cuêmênquido isadaidbo tsusiobon cuidacsho isun: “Bêdamboe naic,” catsiambi. Nêidic aton matses chieshênquin shêpiaquid Nuquin Papan icsano nêsecaquin cuidtequido nendac. ²³ “Chieshêmênquid Nuquin Papan cuidtequid nendac,” quequin ãmbi chuisho tantiashun bêdamboen nata. Nuquin Papa tabadte shubu uashunaidên puduedash: “Ambi chiacpadomboen musuc menenu,” mibi quepec. Aden musuc menenumbi mimi naid tantiata. “¿Ada ãbi chieshênquid icpec? ¿Ëmbi chieshêmêboedta icpec?” quequin tantiata. ²⁴ Adshun: “Ai, ãmbi chieshêmêboed iquec,” qeshun Nuquin Papa tantiaquin mimi bêboed meniabi mibêd chieshênamboed yacno nidash aidbêd bêdamboec onqueta. Adec bêdamboec onquiash padpidec choashun Nuquin Papa tantiaquin meneta. Adec mibêd chieshênamboebêdi bêdamboec onqueta.

²⁵ Mibêd chieshênamboed utsimbic: “Nêid cuidmenuen cuidte chuiquid yacno buanchitembimi iquec,” qeshun: “Baded nid,” cac podquedên nidec aidbêd bêdamboec onquenidta: “Ma nêish bêdanu,” quiash. “Matses cuidte chuiquidên cuidchitoshe,” quiash badedquido mibêd chieshênamboebêd bêdamboec isnanta. Abi yacno buanacsho cuidte chuiquidên: “Icsambo iqueque. Quênên nauedta. Ëmbi chiacted piucquid ãmbi bedabi icnuc ma tsadpanu,” mibi catsiash. Quênên nauedshun ²⁶ ambi chiacted piucquid nibêdnuc mibi cuemenguio ictsiashe. Mibêd chieshênamboebêdi bêdamboec onqueta. “Nuquin Papan adembidi cuidnushe,” quiash adta —quequin Esusën chuipondash.

Icsaquin chudaid chiaid

²⁷ Adshumbic naden Esusën chuipondash. —Chiaid utsitsen mimi tantiec. “Min chidopenquio chudenda. Min bñênpenquio chudmenda. Aben uequid chudenda. Aben uequidên dada chudmenda,” quequin Nuquin Papan chiaid nuquin tsusedpan dada uapampic. ²⁸ Aden chiaid niac-niaquec icsambo icquid icnubi nadquid icsambo icoaic. Aton chidopenquio isec: “Aidquio chudtiadquio icchitebi,” quequin otacquo tantiequi matses icsap. ²⁹ Eshên isec mibi min chidopenquio bunec icsaic. Eshê chichshuniachimboec icsainquio yec ênêdash mibi bêdambo ictsiaic. Icsaid ênenquio icquid Nuquin Papan chian anêdênquiacno nêsecaquin cuidendac. ³⁰ Min chidopenquio chudte bunquin mêmec mibi icsaic. Mêteshuniac bedtiapimbo yachimboen mibi icsaid ênta. Ênenquio icquid Nuquin Papan cuidendac —quequin Esusën chuipondash.

*Aton chidobêd cuêshêdte chiaid
(Mat 19.3-9; Mad 10.11-12; Duc 16.18)*

³¹ Nadentsen Esusën chuipondash. —Nuquin Papan Moises chuimiaid utsitsen mimi tantiec. “Aton chido bunenquio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic. ³² Utsitsen chuinu. Aton chidon bñênpenquio chudmesho istuidshun Moisesën chiacpadomboen nac bêdambo ictsiashe. Aton chido dada utsi chudmesa icshobi

dadan ambembi dada uaid menequin nidmiac icsambo ictsiash. Aden nidmequin chido icsametsiash. Chido nidmiacso bedquidtsen icsatsiash —quepondash Esus.

Abimbo chiacimboen chienda, quequin Esusèn chiaid

³³ Adshumbic Esusèn padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “Nuquin Papa utsi uatiapimbo yacimboen abimbo caimbi,” quequin chiaid niactemaid nec. Niachso Nuquin Papan cuidendac,” quequin Moisesèn chuiampic. ³⁴⁻³⁶ Aidèn chiacpacdec muainquo ictiadquidi mimbi abimbo chiacimboen utsi uain icsamboen chiec. “Abi cuëmédquid cuënec muasho ëbi cuidtsiash. Nuquin Papa cuëmédquid cuënenquo yec muasho Nuquin Papan ëbi cuidenquo ictsiash,” qeshun mimbi utsi chiec. “Abu utsi uatiapimbo yacimboen ëmbi chiacpadomboen naimbi. Muainquo iquebi,” mibi quepec. Adecbidi: “Nidaid utsi uatiapimbo yacimboen ëmbi chiacpadomboen naimbi,” mibi queoapec. Adembidi chiec mibi Edusaden queoapec. Adembidi con mapi quequin mimbi chieque. Aden abimbo chiacimboen chienda. “Nuquin Papa cuëmédquid cuënenquo iccombi,” mibi quenubi abu abi tabadaid icnuc ashunquo Nuquin Papan abitedi namendac. Nidaid Nuquin Papan tincate nec. Edusaden yacnoshombic Nuquin Papan chomiaidèn bédamboen namendac yuecshun. ¿Min mapin icboda mibi nedi? Padenquo. ¿Mimbida min mapi masedcamed? Padenquo. Aton Icbombien Nuquin Papan naique. Abimbo chiacimboen icsamboen chienda. ³⁷ Adec muainquo icquin abimbo chuita. “Ai, adembi naimbi,” quequin mimbi chiacpadomboen nata muainquo icquin. Adembidi: “Padi. Natiapimbo iquebi,” qeshun mimbi chiacpadomboen nainda. Utsi uaic matses icsamequidèn Satanasèn tantiamiacpacdec mibi muapeque. Adenda —quepondash Esus.

Chieshënc cuidnanenda, quiaid

(Duc 6.29-30)

³⁸ Adashic padpidec Esus onquec: —Nuquin Papan Moises chuiquin dada uamiampid mimbi tantiaobod nad iquec. “Chieshëncin ëshë ansiac adecbidi cuidnanec ëshë anenanquid. Chieshëncin sècsiac adecbidi cuidnanec sècsenanquid,” quequin chiaid icnuc ³⁹ utsitsen chuinu. Tantia. Mibi cuesquid cuidenda. Chieshënaquin cuidnanenquo icquin adembi bédamboen ista. ⁴⁰ Min matses: “Èbi cuidquin mimbi ëbi meniampo iqueque. Min dashcute beccho,” qesho mimbi menenquo icsho isun: “Cuidte chuiquid yacno buanshun dashcute dachicmechitomane,” qesho aid dashcute meneshumbic min dashcute utsitsen chicshun meneta. Adec bédamboec tabadta. ⁴¹ Utsibic: “Nëbi nidtuidquin con na buanec nid,” quequin ancabadac nèbi nidtuidenquo icquin udimbo buanshunta. ⁴² Aton na nibédquid: “Mitsana beccho,” qesho meneta. Utsibic: “Mitsana buanshun bëuaindami,” qesho: “Padi,” cainda. Meneta. Aden bédamboen nata —quepondash Esus.

Chieshëncquidobi bédamboen iste chiaid

(Duc 6.27-28, 32-36)

⁴³ Adshumbic abi macuësh dapa poctse tsadquin bédamboec tabadte Esusèn chuipondash. Nuquin Papan Moises chuiquin dada uamiampid mimbi tantiaobod nad iquec. “Mibi tantiaquidombo tantiaquin mibi chieshëncquido chieshënta,” quequin chuiampic. ⁴⁴ Utsi mibi chuinu. Tantia. Mibi chieshëncquidobi bédamboen isquin tantiaata. Chieshëntaquin: “Èbi chieshëncquid bédamboen ista, Papa,” quequin Nuquin Papa chianeta. ⁴⁵ Aden chianec Nuquin Papabimboec mibi ictsiac. Mibi utsibo bédamboen nashunquid ictsiac. ¿Bédambo icquido yacnouidida Nuquin Papan ushë chëncamepadic? Padenquo. Icsaido yacnotsen ushë chëncamec. ¿Bédambo icquido yacnouidida ue chomepadic? Padenquo. Icsaido yacnotsen ue chomec. Bédambo icquidobëdtabi icsambo icquido Nuquin Papan bédamboen nashunec. ⁴⁶ ¿Mibéd tantiananquido min shubun icquiduidi mimbi bédamboen nashunso isunda Nuquin Papan mibi: “Bédambo iquec,” capec? Padenquo. Mimbi icsambo iquec caidontsen ambi tantiaido nashuntsiash. Aidombien piucquid bedshumëncquido icquimbi aton shubun icquiduidi nashuntsiashe. Aden nainda. Utsibotsen bédamboen nashunta. ⁴⁷ ¿Min shubun icquidobëduidida mibi onquec tabadpe? Nuquin Papa tantiesaboen adpec. Utsibotsen bédamboen ista. ⁴⁸ Nuquin Papabimboec icta. Bédambo icquid icta. Bédambo icquidobëdta icsambo icquidobi Nuquin Papan bédamboen tantiacpadomboen utsibotsen bédamboen tantiaata —quepondash Esus.

6

Utsibo bédamboen nashunte chiaid

¹ Adshumbic abi macuësh dapa poctse tsadquin Esusèn chuipondash. —Nadquid icsambo iquec. Nuquin Papa tantienquo icquimbi aton matses ismenuenuidi naic icsambo iquec. Adquid Nuquin Papan bédamboen istiapimbo iqueque. “Utsibo nashunu,” quequin

utsibo ismenquo icquin nata. ² “Aton na nibêdquido menenu,” qeshun utsibo ismequin menenda. Ismenquo icquin meniac bédambo ictsiash. “Nuquin Papa tantiaquid nebi,” quec muaquidên nacpaden nainda. Nuquin Papa tantiaquid damenuembien muaquidên matses dadpen yacnoshonuidi menedenepec. Adosho isun aton matsesênuidi bédamboen isnubi Nuquin Papan bédamboen istiapimbo iquec. ³ Aton na nibêdquido menequin utsibo ismenda. Meneshun: “Menebanombi,” quequin utsibo chienda. ⁴ Adsho isun mimbi utsibo ismenquo icquin naid tantiaquid icquin Nuquin Papan bédamboen isquin abêdi mibi tabadmendac –quequin Esusên chuipondash.

Nuquin Papa chianete Esusên chiaid
(Duc 11.2-4)

⁵ Adshumbic Nuquin Papa chianetetsen Esusên chuipondash naden. –Bédambo icquid damianquidên nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidi nidtoshon comapenec onquequin Nuquin Papa chianepec. Adash umanuc puduenshun matses dadpen ismenuenuidi padpiden adembidi chianec. Adquid aton matsesên: “Bédambo iquec,” canubi Nuquin Papan padenquo iquec. Bédamboen istiapimbo iquendac. ⁶ Mibi adenda. Utsibo ismenuenuidi nainquo icquin matsesên isacmaidquo Nuquin Papambo tantiaquiquin chianeta. Aden chianequid mibi icsho Nuquin Papan mimbi utsibo ismenquo icquin naidtedi tantiaquid icquin mibi bédamboen isquin abêdi tabadmendac.

⁷ Nuquin Papa chuiquin bédamboen chianeta. Nuquin Papa tantiesabon ambi tantiaid chuibudacimboen Nuquin Papa chuibudenda. “Yuenquo chuibudac nuqui tantiaboedên nuqui nashuntsiash. Padenquo icac nuqui nashunquo ictsiash,” qeshun Nuquin Papa tantiesabon yuen chuibudacimboen nainda. ⁸ Adoenquo icquin Nuquin Papa chianeta. Mimbi chiabi: “Adopashuni. Aid nibêdnuc unêsebi. Utsi icnuc bédambo ictsiabi,” quequin mimbi otacquo tantiaid Nuquin Papan tantieque. ⁹ Naden Nuquin Papa chuita. “Bédamboshê icquid icsho matses abitedishunquo mibi tantiapashun, Papa.

¹⁰ Matses abitedishunquo mibi con Icho capashun. Mibi yacnoshon mimbi uaido mayan bédabon mimbi chiacpadomboenuidi naic.

Adomboembidi mimbi chiacpadomboen matses abitedishunquo napashun.

¹¹ Bumianenda, Papa. Badiadquidên badiadquidênquien con pete icmeta.

¹² Utsibon chieshênauqi ëbi cuidnanenquo icsho isun ëbi icsashobi cuidenquo icquin ëbi bédamboen ista, Papa.

¹³ Mimbi chiaid ëbi niacmenda, Papa.

‘Icsamenushe,’ qeshun Satanás ëbi yuamenda, Papa.

Abitedishun Icbombo yec abitedimbo namequidquo mibi nec, Papa.

Ëmbi mibi chuisho tantiaata, Papa.

Ënenquo icquin abitedishunquo: ‘Bédambo iquec,’ mibi capashun. Padi,” quequin Nuquin Papa chianeta –quequin Esusên chuipondash.

¹⁴ Adashic nadpondash: –Utsibo bédamboen ista. Cuidnanec chieshênanenda. Cuidnanec chieshênanenquo icsho isun Nuquin Papan mibi cuidenquo icquin bédamboen istsiash.

¹⁵ Cuidnanec chieshênansho isun Nuquin Papan mibi bédamboen istiapimbo ictsiash –uequin Esusên chuipondash.

Buna mêmunte chiaid

¹⁶ Adshumbic utsibo ismenquo icte utsi Esusên naden chuipondash. –Tantia. Nuquin Papauidi tantianuequin buna mêmunquid chuinu. Muaquidên nacimboen ismenda. Muaquido: “Buna mêmunquid nec,” aton matses camenuec abibi maniumédash nênuquidbitsêcquieq mamênenuquo iquec. Adec buna mêmunquid tanec muaic. Adsho isun matsesên bédambo icquid danubi Nuquin Papan: “Icsambo icquid nec,” qeshun bédamboen istiapimbo iquec. ¹⁷ “Nuquin Papauidi tantiaquin nêidtedec ushquin buna mêmunu,” qeshun Nuquin Papambo tantiaquin nata. “Utsibon tantianushe,” qeshun bédamboen min manêdaid shueshcata. Adash bédamboec mamênta. Aden utsibo ismenuenuidi nainda. ¹⁸ Aden bédamboen manêdaid shueshcata isun: “Buna mêmunec nec,” cainquo ictsiash utsibon mibi chuiquin. Nuquin Papambien: “Ëbiuidtsêqui tantianuen naic,” quequin tantiasiash. Adshun mimbi utsibo ismenquo icquin naidtedi tantiaquid icquin abêdi mibi tabadmendac –quequin chuipondash Esusên.

Nuquin Papa yacno tabadte bunta, quiaid
(Duc 12.34)

¹⁹ Adshumbic padpiden Esusên chuipondash. –Ëmbi chuiboedquo tantiasun mimbi dayun uatequiduidi tantienda. Dayun uatequid nadquo iquec. Chodquetequid yec shocosh chiuidtequid yec matsesên ampeshuntequid yec quec icsabudtequid

nec. Adquiduidi tantienda. ²⁰ Icsabudesambo tantiata. Nuquin Papambo tantiec aidbêd tabadte bunquin ambi chiacpadomboen nata. Chodquetiapimbo icquid yec shë nibudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquio tantiata. ²¹ Mibi bunaidquio ênenquo icquin tantiec mibi tabadtsiac. Nuquin Papabêd tabadte bunquin aid tantiata —quepondash Esus.

Pabiate shëcuë cuembo icquid chiaid

(Duc 11.34-36)

²² Adshumbic abi macuësh dapa poctse tsadquin utsitsen Esusên chuipondash. — Pabiate shëcuë cuembo icquin Nuquin Papa tantiaquiec mitsanauidi tantienquo yec mibi bédamboec tabadtsiac. ²³ Pabiate cuênêdabimboec yec Nuquin Papa tantienquo yec mitsanauidi tantiec ÷bédamboecta tabadtsia? Padenquo. Adec mibi icsamboec tabadtsiaque. Adenda —quequin chuipondash Esusên.

Bedteuidi tantienda, quiaid

(Duc 16.13)

²⁴ Adshumbic naden Esusên chuipondash. —Mitsanauidi tantiec mibi icsamboec tabadtsiac. ÷“Naic cho,” quequin daêdshun chiacta aid daëdi mimbi nashumpatsia? Padenquo mimbic nashunc. ²⁵ Pabiate cuênêdabimboec yec Nuquin Papa tantienquo yec mitsanauidi tantiec ÷bédamboecta tabadtsia? Padenquo. Adec mibi icsamboec tabadtsiaque. Adenda —quequin chuipondash Esusên.

Nuquin Papan abi tantiaquido dayun uaid

(Duc 12.22-31)

²⁵ Adshumbic Esusên padpiden chuipondash. —Ëmbi aden chuisho tantiash dacuêdenda. “¿Atotsimbi pepe? ¿Atotsimbi acpe? ¿Atotsimbi dasiuidpe?” quec dacuêdenda. Nuquin Papan nac unêsabi mibi tabadeque. Aidêmbien petebêdta dasiuidte icmeque. “Con na nibêdtsias,” quiaish dacuêdec tabadenda. ²⁶ ÷Uicchunênda ambibi cuête êshê siac bacuêcsho chepadic? Padenquo. Adecbidi ambi pete dayun uatequid shubumpi nibêdec. Adquid icsho Nuquin Papan aton pete bedmec. Uicchun abipadquidpenquo icshobi aton pete Nuquin Papan bedmec. ÷Ad icnu ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuêdenda. ²⁷ ÷“Unêstiapimbo iquebi. Dacuêdebi,” quequidta unêsenuquo icpadic? Adequi dacuêdquid unêstiashe. Unêsteuidi dacuêdênenda.

²⁸ “¿Atotsimbi dasiuidpeba?” ÷quecta mibi dacuêdec tabadpe? Tania. Chuinu. “Cuête bacuêc bédamboshê isadtsec,” quepec nuquin matses. ¿Aton sedquidi shoyontsêchun abi dasiuidte daêdcash dasiuidtsashta bédamboshê isadpadic? Padenquo. Nuquin Papan uacpadquiobi iquec. ²⁹ ÷Cuête bacuêc bédamboshê isadquidbimboecta nuquin tsusedpa chuiquid dapa Sadomon cuêmêdquidên dashcute icpampic? Padenquo. Adpenquien icpampic. ³⁰ Cuête bacuêc bédamboshê isadboed abadiadtsêcshumbi isac ênden chodquiac. Aid badedquo chodquequid nec. Ad icnu ÷abipadquid Nuquin Papan uaido mibi icsho mibi dasiuidte bedmenquioda icpadic? Padenquo. Mibi dasiuidte icmeque. Dacuêdenda. Mitsana nibêdquido icte dacuêdênquimbi mimbi Nuquin Papa bédiactêc tantiatseque. ³¹ Dacuêdec tabadenda. “¿Atotsimbi pepe? ¿Atotsimbi acpe? ¿Atotsimbi dasiuidpe?” quec dacuêdenda. ³² Nuquin Papa tantiesaboen adquid bedteuidi bunqueque. Adenda. Mitsana nibêdsho isun Nuquin Papan mitsana icmetsiashe. Abi tantiaquido yec dacuêdec tabadenda. ³³ Adenquo yec: “Con Icho mibi nec, Papa,” quequin ambi tantiapadec bédamboec tabadte bunta. Adec tabadec: “Aid nibêdnuc unêsebi,” quequin mimbi tantiaidtedi Nuquin Papan mitsana icmetsiashe. ³⁴ Èbi adsho tantiash badiad utsi caic: “Aid badiadên ¿atotsimbi nape?” quec dacuêdenda. Aid badiadên Nuquin Papan ambi tantiapadomboen mibi nametsiashe. Nêid ushêmbi: “Naden naimbi,” quequin tantiec tabadnuna dacuêdenquo yec —quequin chuipondash Esusên.

7

Utsibo icsaid chienda, quiaid

(Duc 6.37-38, 41-42)

¹ Naden Esusên Nuquin Papan chiacpadec tabadte chuipondash. —Mibi icsaid ucudambobi utsibo icsaiduidi chienda. Adembidi Nuquin Papan: “Icsambo iquec,” mibi canushe. ² “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda. ³⁻⁴ ÷Abi bêtsiadaid bêchish nua bêuquid bēbedadabi icquidênda: “Mibi bêtsiadaque. Bēbednu,” capatsiashe utsi chuiquin? Padenquo. ⁵ Abi bêtsiadaid abia bēbedadashien: “Mibitsen

bēbednu,” quetsiash. Adembidi mimbia mibi icsaid ēnshun: “Icsaid ēnash bēdamboequien tabadtiaid,” quequin utsibo bēdamboen chuita. Bēdambo icquid damianquidēn abi icsaid ēnabi: “Aid icsambo iquec,” quequin utsibo icsaid chuibanec. Adquid tanenda. ⁶ Mimbī bēdamboen chiaqui tantienquio icsho chuidonenda. Nuquin Papan chiaid chuibudaqui tantiatiapimbo icquin niac-niacsho isun adenuidi chuidonenda. Opa icsan abi pemequid piacimboen mibi chieshēntsiashē. Chanchon ichon dashcute nebudshun bēchish uaquin tin-tincacimboen Nuquin Papan chiaid niac-niactsiashē. Adquid chuidonenda – quepondash Esus.

Ēnenquio icquin Nuquin Papa chianete chiaid
(Duc 11.9-13)

⁷⁻⁸ Nadembidi Esusēn chuipondash. –Nuquin Papa ēnenquio icquin chuidoneta. Bacuēbon: “En na,” cadoniacimboen chuidoniac Nuquin Papan mibi tantiatsiashe. Adembidi: “Ēbi bēdamboen name, Papa,” mimbī capadomboen bēdamboen mibi nametsiashe. Adembidi: “Ēbi nashunquin ēbi bēdambo icmeta, Papa,” quequin chuidoniac Nuquin Papan mibi bēdambo icmendac.

⁹ Icsambo icquidta Nuquin Papa icpadic? Padenquio. Bēdambo icquidquio nec. Bacuēmpi: “Bundobique. Penu. Beccho, papa,” ¿queshoda amēn cudasēnquin cuēnotēbi menepadic? Padenquio. ¹⁰ Adembidi aton bacuēn: “Nuēcquid chenu. Beccho, papa,” cacta cudasquin nisimbo menepadic? Padenquio. ¹¹ Matses yec icsaquido icquimbi min bacuēbo abimbo mimbī menenubien Nuquin Papan ambi uaido matses: “Ēbi nashunta, Papa,” qesho tantiaashun bēdamboen nashuntsiashe. Nuquin Papa chianeta.

(Duc 6.31)

¹² Nuquin Papan tantiaido icquin utsibo bēdamboen isquin bēdamboen nashunta. Utsibo caic: “Aidon nashumpashuni,” quequin mimbī otacquio tantiacpadomboembidi utsibotsen nashunta. Aden Nuquin Papan chiaid Moisesbēdtan nuquin tsusedpabo utsibonada uaquin chiampicpadomboen mimbī natsiaque. Aden utsibo nashunta –quequin chuipondash Esusēn.

Daēdpactsēcshun Esus tantiabente chiaid
(Duc 13.24)

¹³⁻¹⁴ Adshumbic Esusēn naden chuipondash. –Nuquin Papabēd tabadnuec aid tantiec bēdamboec tabadta. Shēcūē aniambo icquidēn matses abentse-abentsec puduedacimboec abentse-abentsec Nuquin Papa yacno puduednuec aid tantiec bēdamboec tabadec. Padnuen antied dapan abī maisi nidacimboec matses dadpenquio abi tantiesabo yec Nuquin Papan icsaido nēsecacno nidendac –quepondash Esus.

Icsambo icquid nec, quequin tantiate chiaid
(Duc 6.43-44)

¹⁵ Abi macuēsh dapa poctse tsadquin naden Esusēn chuipondash. –Utsibo: “Nuquin Papan chiaidquio chuiquid nebi,” quec bēdambo icquid damianquid iquendac. Adquid choshon Nuquin Papan chiaid niac-niacmequin icsamendac. Bēdi dapa nēish yua pete bunquiabimboec mibi icsamete bunquieque. Adquidēn chuisho tantienda. ¹⁶ “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbī tantiatsiac. Adembidi Nuquin Papan chiaidquio chienquio icsho tantiaashun: “Utsi uain chiec,” mimbī catsiac. Chetequid isun cuēte dada matsesēn tantiec. Aden tantiec nisanquidēn bacuē bēsho isash: “Dadainēn bacuē nec,” quesa matses nec. Adecbidi echo bacuē bēsho isash: “Bata nec,” quesa matses noaic. ¹⁷ Cuēte bēdan bacuē adquiobidi bacuēec. Cuēte icsan bacuē adquiobidi bacuēoaic. ¹⁸ ¿Cuēte bēdan bacuē chetemaidta nepec? Padenquio. ¿Cuēte icsan bacuē chetequidta icpec? Padenquio. ¹⁹⁻²⁰ Chetemaidbimboec muaquid bēdambo ictiapimbo iquec. Nuquin Papan chiaid niacniacquec icsamboec tabadsho isun: “Muaquid nec,” quequin mimbī tantiatsiac. Adembidi Nuquin Papan chiaidquio chienquio icsho: “Muaquid nec,” quequimbidi mimbī tantiat-siaque. Adquidēn chuisho tantienda. Cuēte bacuēesa dēdshun nēdēncacimboen: “Nuquin Papan chiaid chiembi,” quec muaquid Nuquin Papan icsaido cuidacno nēsecaindac – quepondash Esus.

Nuquin Papa yacno puduednu, queuidte chiaid
(Duc 13.25-27)

²¹ Utsitsen Esusēn chuipondash. –Ēbi caic: “Con Icbo mibi nec. Mibi tantiebique. Mibi yacno ēbi puduedme,” ¿quequidtedida Nuquin Papa yacno puduedpatsiashe? Padenquio. Nuquin Papan chiapadomboen naquidquien abi yacno puduedtsiashe. ²² Nuquin Papa yacno ēmbi yuedte ushēn matses dadpenshun ēbi chuuiidendac. “Con Icbo mibi nec. Mibi

caic: ‘Aidën namiaidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuedaido cuemequinc compenen tantiaquin ismequinc caombique. Nuquin Papa yacno ëbi puduedme,”²³ qesho ëbimbo tantiec Nuquin Papan chiapadec bédamboec tabadabi icsho: “Ëmbi tantiacmaidquo mibi neque. Baded cuenta. Icsamboec tabadquid mibi neque,” caindambi. Ëbi adsho tantiash muainquo yec bédamboec tabadta –quepondash Esus.

*Shubu uaquidbimboecquid chiaid
(Duc 6.47-49)*

²⁴ Adshumbic Esusën padpiden chuipondash naden chuiquin. –Ëmbi chiapadomboen nata. Aden mimbi bédamboen natsiaque. Shubu uaquin bédamboen tantiaquidbimboec mibi ictsiaque. Tanta. Chuinu. Bédamboen tantiaquidën mananënquo shubu uaquin buintad nitsinquid.²⁵ Aden shubu uan ue dapa conquequidbëdi chonoc shubu chimeshadenquo icquid. Shubu nuntan anchiuidenquo icquid.²⁶ Aden ëmbi chiapadomboen naquid icnubi utsibo ëbi tantiesa iquendac. Aido shubu uaquin tantienquo icquidbimboec iquec. Tantienuo icquidën nadoquid. Acte cuidi cuëmanquobi shubu uaquin badedi unëstsëcquidquo cueste nitsinquid.²⁷ Adquid nitsinaid ue dapabéd conquequid choquin shubu chimeshquid. Adecbidi acte cubudtoquidën shubu nuntan mauanquid. Aden tantesa uatsëcquidbimboec ëbi tantiesa iquec. Adquid Nuquin Papan cuidtequido neque. Ëbi tantiata –quequin chuipondash Esusën.

(Mad 1.22)

²⁸⁻²⁹ Adsho tantiash: –Ma compenen tantiaquidquo Esus neyoc. Nuquin matses tsusiobon Moisesën chiampid bëdiactsëc tantiatsëcquin chuitsëccosh. Padnuen Esusënquo compenen tantiaquin chuiposh –quecuededpondash matses dadpenquo.

8

*Esusën daicsaid bédamiaid
(Mad 1.40-45; Duc 5.12-16)*

¹ Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpenshun tsibanampondash.

² Adnubien dada ushumbo yec daicsaidquo choshon Esus ismenuen danëshën sebudpondash. –Ëbi bédamete bunquin mimbi ëbi bédametsiaque. Ëbi bédame, Icho –caquien Esus:³ –Ai, mibi bédamete bunebi. Mibi bédanendac –quequin mishtemaidquobi mishnubi badedquo bédampondash daicsaid nibëdquiec.⁴ Adsho Esusën: –Utsibo chienquo yec nëish yua abided unës uaquido ismenuec nidta. Mibi isash: “Bédamiaid nec.” quequin ma aidon tantianu. Moisesën chuipampicpadomboen nanuen: “Nuquin Papan bédamioshi,” quequin Nuquin Papa menetequid buanquin ismec nidta –quequin Esusën chuipondash. Adtanec shubu dadpen icquid Capednaun caid yacno chopondash Esus.

*Sondado chuiquid dapan yua Esusën bédamiaid
(Duc 7.1-10)*

⁵ Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash.⁶ –Tanta. Chuinu, Icho. Con shubun icquid con yua shëquëquenquo iccosh. Natiambo yec unëstiadsëcquo iccosh. Bédameta⁷ –qesho tantiashun: –Ai, bédamec nidnu. Nid –caquien:⁸ –Padi. Mibi bédamboshë icquidquo nec. Ëbibi icsactsëcquid icquin mibi con shubun puduedmetiapimbo iquebique. Nëshunquobi bédameta. Nidenquo icquin nëshunquobi mimbi: “Bédanta,” cac con yua bédantsiashe. Mimbi tantiacpadomboen namequidquo mibi nec.⁹ Ëbibi chuiquid dapan namiac sondado utsibo namequid nebi. Ëmbi: “Nid,” cac badedi nidec. Ëmbi: “Baded cho,” cac badedquo choec. Con yuan ëmbi: “Nata,” cac ëmbi chiapadomboen naic. Mibi adquidquobidi neque. Con yua bédameta –quepondash sondado chuiquid dapa.

¹⁰ Adsho tantiashun Esusën abi tsibambëquido chuipondash. –Bédamboen nëidën chuipe. “Comapenen tantiaquin chuiquinuidi con yua bédametsiashe,” quequin ëbi bédamboen tantiaquid nec. Isadaidbo adquid nibëdec. Isadaidbon ëbi bëdiactsëc tantiabedtedsec.¹¹ Tanta. Chuinu. Matses utsi icquimbi sondado chuiquid dapan ëbi bédamboen tantiec. Adec nidaid utsi-utsiec yacnocquido isadaidpemo ëbi tantiaquido yanash Nuquin Papa yacno puduedendac. Ambo puduedash isadaidbo tsusedpabobéd tabadendac. Abadauan caid yec Acobo caid yec Isac caid yec quequidobéd tabadendac.¹² Padnuen Nuquin Papan con matses caido isadaidbo dadpenquo Nuquin Papa yacno puduedenquo iquendac. Abi tantiesabo icsho Nuquin Papan cacumequin icsaido nësecacno mibi nidmendac. Adoac mibi tënquebudquendac –quequin abi tsibambëquido isadaidbo chuipondash

Esusën. ¹³ Adshumbic sondado chuiquid dapa chuiquin: —Nidec nid. Mimbi tantiacpadecc min yua bédaneque —cac nidshun isquien bédanac Esusën chuibocpadequi.

Petedon nachi Esusën bédamiaid
(Mad 1.29-31; Duc 4.38-39)

¹⁴ Adash yuec-yuecpectséc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec. ¹⁵ Uesho istuidshun mëdinquin Esusën bédamepondash. Aden bédamiac Esus pemepondash.

Esusën matses dadpen bédamiaid
(Mad 1.32-34; Duc 4.40-41)

¹⁶ Petedon nachi bédamiaid inchëshbudtsëqui Esus ismenuequin matses daicsaido dadpen bē-bēpondash. Bē-bëshobien podobitsi icsa dapuduedaido comapenec cuëdquin cuemeshumbic daicsaidotsen Esusën bédamebampondash. ¹⁷ “Nuqui icsaid ucquin nuqui daicsaidobi bédamiac,” quequin êndenquio Nuquin Papan Esusën nate Isayas dada uamepampicpadomboen nanuen adopondash Esusën.

Abëd icte bunquido Esusën chiaid
(Duc 9.57-62)

¹⁸ Adashic abi isnuec matses dadpenquio datsidadsho isash abëd icquido chiec: —Chian potec nidnu. Nid —quianec chian yacno nidec puduampondash Esus. ¹⁹ Puduanec nidaneshobien Moisesën dada uampid chuibanquidën Esus chinuntuidpondash. —Con Icho mibi caindambi. Mibëd nidendabi —caquien: ²⁰ —Ëbëdta nide? Tantia. Mibi chuinu. Bëdi chëshê shëcuën ushquid. Uicchun shubu uash abuc ushquid. Padnueni con shubu nibëdnuc Nuquin Papan matsesmiaid yec quenenueno yec capucuenec. ¿Ada mibi adpatsia? —capondash Esusën Moisesën chiampid chuibanquid chuiquin.

²¹ Adnubien abëd capucueno utsin: —Chiata, Icho. Con pa unësoshe. Chococatam-bono —caquien: ²² —Padi. Cho. Ma unësaidën tantienquio yacimboen ëbi tantienquio icquidon ma papa chococanu. Èbëdtan bédamboen naic cho —capondash Esusën amë unësaid chuiquin. Adobidanec nidanepondash chian yacno.

Natiambo cunquenec acte tèccuasquiaid Esusën ênëdmiaid
(Mad 4.35-41; Duc 8.22-25)

²³ Chian budash Esus chedo cano antabëdtopondash. Adashic potenuc puduampondash. ²⁴ Aden potenubi nēnantanquio icnuc cunquetuidpondash. Adnubien acte comapenec tèccuasquampondash. Adec acte tèccuasquenuc cano acte ancushad-ancushadquiec yampondash cano mentoadtiadtsëcquio yec. Adsho isun abëd icquidon: —Dacuëdampambo iquec —quetanquin isquien Esus ushpec.

²⁵ Adshobien tinquin: —Nuqui mentoadeque. Isucun, Icho. Baded ëbi nashun —caquien: ²⁶ —¿Atotsi quish dacuëde? Èbi bëdiactséc tantiatsec dacuëdquidquo mibi neque. Istac —quetanec nidtoshon actebëdtabi cunquequid chuipondash. —Padi. Ènëdta —caquien natiambo cunqueboedi badedquio ênëdpondash cano mentoadtsenquionobi. Actetsen tèccuasquenquio yampondash. ²⁷ Adsho isashien: —¿Mitsipadquidënquio actebëdta cunquequid ênëdmepashba? —quecuededpondash Esusbëd icquido.

Dada daëd dapuduedaido podobitsi icsabo Esusën cuemiaid
(Mad 5.1-20; Duc 8.26-39)

²⁸ Aden chian potiaish pudundonobien Cadada yacnocquid podobitsi icsa dadpen dapuduedaid dada daëd choshon Esus chuituidpondash. Aid daëd unësaido chococaid shëcuëmbi tabadpondash. Matses cuesunete bunquiec dacuëdampambo icsho isash aid yacno matses nidenquio icpondash. ²⁹ Aidon podobitsi icsabon oncamiacpadomboen comapenec cuëdquin Esus chuituidpondash. —¿Nuquin Papa caidën Madombo icquin ëbi natiamequin cuidnuecta cho? ¿Nuquin Papan cuidte ushë choabi icnubida ëbi cuide? —capondash dada daëdshun abi oncamequidën chiaid chuiquin.

³⁰ Uano chancho dadpenshun natiacquin udquin pebededpondash. ³¹ Adnubien podobitsi icsabon aid dada daëd oncameoac: —Èbitedi cuemiac chancho icho-ichoecc dapuduedtsiabi —quecuededpondash podobitsi icsabo. ³² Adsho tantiashun Esusën: —Ai, mimbi tantiacpadecc nid —cac nidash chancho icho-ichoecc dapuduednubi chancho abitedi macuësh budec acte nēsebudec mentoadbudnepondash nibëdquiec yec. Adec podobitsi icsabo dapuduenanec nidnubi dada daëd bédambo yampondash.

³³ Adsho istanequien chancho pemequido aton matses chiec niquianec shubu dadpen yacno nidanepondash. Chancho mentoadbudneboedëdta podobitsi icsabo dapudueboed uesquin chuituidpac caondash. —Nuqui dacuëdëmboedobi bédambo yanosh —quequin ³⁴ chuituidaquien anocquido abitedi Esus isec cho-chopondash. Adec cho-choshobien:

—Dacuëdampambo mibi iqueque. Èbi yacno choenda. Nidec nid —cabededpondash. Adoac Esus nidpondash.

9

Shëquëquenquo icquid Esusën bëdamiaid
(Mad 2.1-12; Duc 5.17-26)

¹—Nid —cac nidanec chian budash cano antabëdtoshon chian potiaash abi iccondacnobidi Esus choapondash. ² Adnubien utsibon dada shëquëquenquo icquid Esus ismenuen aton uetechobi bëpondash. Bësho isumbien Esusën: —Èbi caic: “Aidën bëdametsiash,” qeshun bëac —quequin daicsaid chuipondash naden. —Dacuëndenda, madosio. Ambi chiaid niac-niaquec icsaboedi cuidmenquo icquin Nuquin Papa mibi bëdamboen ismembique —capondash Esusën.

³ Adsho tantiash aid datsidadash tabadquido Moisesën dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iquec. Icsambo chiec —quecuededpac caondash Esus caic.

⁴ Uanuësh adsho ambembi tantiashumbien Esusën aido chuipondash. —¿Atotsi quequin mimbi èbi chieshëmpe? ⁵ Ambi namiaid icquin èmbi: “Nuquin Papa cuidmenquo icquin mibi bëdamboen ismemb” cac Nuquin Papan nëid cuidenquo iquendac. Adembidi ambi namiaid icquin èmbi: “Caputa,” cac nëid capuendac. ⁶ Istac. Mibi ismembique. “Nuquin Papan chomiaid nec. Icsaidobi Nuquin Papa bëdamboen ismequid nec,” mabi canu,” qeshun naimbique. Istac —quetanquin dada shëquëquenquo icquid chuiquin: —Caputa —capondash Esusën. ⁷ Adoac bëdanash aton shubuno nidpondash. ⁸ Adsho isashien: —Adquidshenda nepec. Nuquin Papan namiaid icquimbien adochitec. Abi namequid Nuquin Papa bëdambo iquec —quecuededpondash isquido.

Èbëd iquec cho, quequin Esusën Mateyo chiaid
(Mad 2.13-17; Duc 5.27-32)

⁹ Adnubini con matses aton piucquid bedshunuec podqued cuëman tsadquid shubumpin tsadpondac. Con matses yuaquid ancaquid dapan: —Min matsesën na èmbi chiacledi piucquid bedshun èbi meneta —cac niondabi. Ambo tsadshobini Esusën istuidpondash. Istuidshumbini Esusën: —Nuquibi icnu. Cho —capondash. Adoac badedi tsibananec ¹⁰ nidequi con shubun Esusbëd puduedpondabi.

Adec puduedsho isashien matses dadpen pudued-puduedpondash. Esusbëd pec tabadnuec èbëdtan piucquid bedshunquidobëdi con matsesën: “Icsaido nec,” caidombo pudued-puduedpondash. ¹¹ Adsho isumbien Esus chieshënquido Padiseyobo caidon Esusbëd icquido chuituidpondash. —¿Atotsi quiaash mibi chuiquid Esus caid icsaquidobëdi pec tabadpec? Icsambo iquec —capondash Esus chieshënquidon.

¹² Adsho tantiash Esus nadpondash. —¿Bëdambo icquidta dauëchoquidën dauë menepadic? Padenquo. Ma daicsaidi dauëchoquidën menepaid yoc. Adembidi icsaidobi abi icsaid ucquin bëdambo icmenuec nebi. ¹³ Nuquin Papan naden dada uamiampid pausudshun bëdamboen naic nid. “Èmbi chiapadomboen abentse-abentsen mimbi naic. Adoquimbi èmbi chiaid utsi niaquec mimbi icsaido caido mimbi bëdamboen istiapimbo iquec. Adsho isun: ‘Mibi bëdambo iquec,’ catiapimbo iquebi” quequin Nuquin Papan dada uamiampid pausudta. Èbibi matses bëdamboen ismequid nebi. Muaquido: “Bëdambo icquid nebi,” qesho bëdambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” qesho: “Icsainquo yec ènëdta,” canuec nebi —quepondash Esus abi chieshënquido chiec.

Esusën buna mëmunquido chiaid
(Mad 2.18-22; Duc 5.33-39)

¹⁴ Adnubien Uan acten mentoanquidbëd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mëmunquidquido nebi. Padiseyobo adembidi naquidquo nec. ¿Atotsieshun mibëd icquidon aden nainquo icpec? ¿Natiapimboda iquec? —caquien ¹⁵ Esus nadpondash. —¿Icbon: “Pec cho,” cacta aid tantiec sedenquecuededquin buna mëmumpadic? Padenquo. Adquidbëdtan pec cuishon-quec tabadquid. Icho nibëdanan sedenquecuededquin buna mëmunquid. Èbi nibëdanan èbëd icquidon èbiuidi tantianuen buna mëmunendac —quepondash Esus.

¹⁶ Adshumbic Esusën naden chuipondash. —Dashcute chuca cuëshun dashcute shëni nedesquiaidbëdta tuscaisa. Aden tuscashun panac shëni badedquido nedesquequid. ¹⁷ —¿“Machi sandono,” qeshun tsitsan shënimbida sandopadic? Padenquo. “Machi sebud-nushe,” qeshun tsitsan shënin sandoenquo icquid. Tsitsan chuca daëdcashumbien machi sandoquid —quepondash Esus. —Adembidi tsusedpabon: “Naden nata,” quequin chiaid

chienquo icquin ambi bédamboen iste chuiquin Nuquin Papan chiaid utsi chiec nebi – quequin tantiec adpondash Esus Uan acten mentoanquidbéd icquido chiec.

Champi uincuemiaidbédta chido bédamiaid
(Mad 5.21-43; Duc 8.40-56)

¹⁸ Aden chuishobien Nuquin Papan chiaid chuibante shubun tabadsho isquid dapan chuituidpondash. –Con champi unéstiadtsécquo iccoshe. Mishec cho. Mimbi mishac bédantsiashe –capondash. –Mibi con Icho canu –quequin danëshên sebudquin ismepondash. ¹⁹ Adoaquien Esus aidbédi nidpondash.

²⁰⁻²¹ Nidnubien chido intac budted-budtedec seta 12tedi matamec bédanenquo yec nacchoadbudquidên Esusên cachotsêqui choquin: –Bédamianquidên dashcute mishec bédampatsiash imcanendac –qeshun ismenquo icquin dashcute cuêmano mishtsac caondash. ²² Adoaquien bidiadquin isun Esusên chuipondash. –Dacuêdenda. Mibi: “Aidên nac bédantsiabi,” quiacpadec mibi bédanendac –Esus quenubi bédampondash.

²³ Aid bédamebidanec nidequi chuibante shubun tabadsho isquidên shubun puduedshun isquien matses dadpen tabadec. Champi unêsacsho isash shonquecuededec tabadec. Nêdic matses unêsan con matsesên nacpadomboen shoncate sênaquido. Nêdic comapenec sedenquecuededquido dadpen. Aidedi icpondash. ²⁴ Adshobien Esusên abitedi chuiquin: –Baded umanuc niecun. Champi unêsabi iqueque –capondash. Adoac: –“Champi unêsabi iquec,” quepequien iquec –qeshun Esus mamênshumbededpondash. ²⁵ Niecunan Esusên champi uiacno quênên puduedtanquin mēdinac champi uincuenash bédambo yec capupondash. ²⁶ Adsho isun champi unêsaid uincuemiaid chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniac caondash.

Bêshuaid daéd Esusên bédamiaid
(Duc 18.35-43)

²⁷ Auêshquo puduanec nidshobien bêshuaid daédshun chinunshun comapenec cuédquin Esus chuituidpondash. –Dabidên tsyuecquid Nuquin Papan chomiaid icquin bédamboen isquin ëbi bédame –quebud-quebudpondash. ²⁸ Shubu utsin puduedash abédi tabadshobien Esusên: –“Ëbi bédametsiash,” ¿caindabi ique? –caquien: –Ai, adebi –quepondash.

²⁹ Adshobien aid daédi bēmishquin: –Mimbi tantiacpadec bédanta –cac ³⁰ bédampondash. Adsho isun Esusên: –“Bédamiohi,” quequin utsibo chienda –capondash. ³¹ Adoboqui anocquidotedi chuiben-chuibempac caondash.

Esusên onquesa bédamiaid

³² Bêshuaid bédamiaid puduenubien podobitsi icsa dapuduedaid onquesa dada Esus ismenuen bēpondash. ³³ Bēacsho isun Esusên podobitsi icsa dapuduemiad bédanash onquiampondash. Aden bédamesho isash: –Nuquin nidaid Isadaid caidênshun adoén ictenec –quecuededpondash isquido.

³⁴ Adnubien Esus chieshênquido Padiseyobo: –Podobitsi icsan icbon namiaid icquin podobitsi icsa cuemequidien nechitec –quecuededpondash Esus caic.

Esusên matses tantiaquiaid

³⁵ Aden onquesa bédamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaido bédamboen iste chuipondash. Adshumbic anocquido daicsaidotedi bédamebampondash. Adenuidi shubu dadpen yacno-yacnomboen chuibanquimbi matses bédamebampondash. ³⁶ Abi tantienquo icquido dadpen cho-chosho isash unêsquo icnuc shubiantiadquo icpondash Esus. –Abi isquid nibédnuc bacuêbo icsamboec tabadacimboc icsambo iquec. Nuquin Papa bédamboen ismete chiabi yac tantienquo yec natia chieshêmêne bédamboec tabadtiapimbo iquec –quiash shubiantiadquo icpondash Esus.

³⁷ Adshumbic abéd icquido chuipondash. –Pete dadpen nitsinaid caniacsho bedtanenquo icnuc sinash chodquebudnequid. Adecbidi Nuquin Papan chiaid chuibanquid nibédnuc matses icsamboec tabadec. Aden chuibanquid nuqipadquid daédpactsécquo iqueque. ³⁸ Nuquin Papa chianeta. “Matses dadpenshunquo mimbi bédamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta –quequin chuipondash Esusên abéd icquido chuiquin.

10

Esusbéd icquido 12tedi chiaid
(Mad 3.13-19; Duc 6.12-16)

¹ Adshumbic Esusèn abèd icquido 12tedi chuipondash. —Èmbi naid chuibeneta. Èmbi namiaid icquin èmbi nabocpadomboen podobitsi icsa matses dapuedaid mimbi cuemendac. Adembidi daicsaido abitedi mimbi bédamendac —quequin chuipondashi nèidtedi. ² Nèidic Petedo caidbidi Simon cuëmédquid. Nèidic abèdta tishaid Andedes cuëmédquid. Nèidic Sebedeyon mado abi daèdi. Abentsèc Acobo icnuc utsi Uan icpondash. ³ Nèidic Uedipe. Nèidic Badtodome cuëmédquid. Nèidic Tomas. Nèidic èbibi Mateyo con matses piucquid bedshunenedi. Nèidic Acobo cuëmédquid utsi Adpeon mado. Nèidic Debeyo caidbidi Tadeyo cuëmédquid. ⁴ Nèidic Simon cuëmédquid utsi con matses yuaquido cuemete bunquid. Nèidic Iscadiote caidbidi Udas cuëmédquid abi chieshènquido Esus bedmequid. Aidedi abèd icquido icsho chuipondashi.

*Abèd icquido: Chuibeneta, caid
(Mad 6.7-13; Duc 9.1-6)*

⁵ Adshumbic: —Èmbi chiacpadomboen chuibenenuc nidshun isadaidpembo chienda. Aido yacno nidenda. Nidaid cuèshè Samadia caid yacnocquidon shubu datambidanta. ⁶ Nuquin matses isadaidboudi chuibeneta. Bènudshun podqueq tantienquo yacimbom nuquin matsèsèn Nuquin Papano puduedshun. ⁷ “Mibi icsaid ènash bédamboec tabadta. Nèbi abèd tabadtequido icmequin Nuquin Papan matses bédamboen tabadmendac,” quequin chuibeneta. ⁸ Adembidi daicsaido bédamequinc unèsaido uincumequinc dada ushumbo yec daicsaido bédamequinc podobitsi icsa dapuedaido cuemeshunquinc cabeneta. Adoshon: “Piucquid becho,” cainda. Èmbi nabocpadomboembidi mibi namembique. “Piucquid becho,” quequin nainquo iccombique. Adembidi nashubanta. ⁹ Aden chuibenec nidquin min piucquid buanenda. ¹⁰ Adembidi pete sandoaid buanenda. Dashcute utsibèdta tapucudte utsi sandoshon buanenda. Mibi tidinquette cueste abentsèqui buanta. Adec mèdadauidquo chosho isun mimbi bédamiaidon: “Mibi bédambo iquec. Èbi yacno ushec cho,” mibi cac bédambo ictsiash. Adembidi: “Mitsana nibèdsho isun mibi menenu,” mibi cac bédambo ictsiash.

¹¹ Aden chuibenec shubu dadpen icquid yacno nidshun bédambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiasch aidèn shubun ushta. Auèshquo nidabi yec aidèn shubunuidi ushta. ¹² Aidèn shubun puduedshun: “Mibi isnuec chopobi,” cata. Adoshombic: “Nèid shubun icquido Nuquin Papan bédambo icmepashun,” quequin aido bédamboen ista. ¹³ Adoac anocquidon mibi bédamboen iso: “Nuquin Papan bédambo icmepashun,” mimbi canubi Nuquin Papan aido bédambo icmendac. Anocquidon mibi chieshènsho Nuquin Papan aido bédamboen istiapimbo iquec. ¹⁴ Shubu dadpen icquid utsi yacno mibi nidacsho anocquidon cuemiach naden ismeta. Auèshquo puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaipen putu tasequeta. ¹⁵ Mimbi adosho isun matses cuidte ushèmbi Nuquin Papan aido comapenen cuidendac. Èndenquimbo shubu dadpen yacnocquidotedi cuidquin Nuquin Papan uesquin unès uapampic. Aid shubu dadpen icquid abentsèc Sodoma canubi shubu dadpen icquid utsi Comoda capampic. Aid daèd yacnocquido bèdiactès cuidshun mimbi chiaid tantienquo icquido comapenen cuidendac —quepondash Esus abèd icquido chiec.

Esus tantiaquido chieshènt chiaid

¹⁶ Adashic padpiden chiuoac: —Èmbi naid chuibenequido icsho utsin-utsinquien mibi chieshènendac. Bèdi nèish yua acte bunacimboec chieshèmènquido mibi cueste bunendac. Aidobèd chieshènanenda. “¿Mitsipadomboen chiac Nuquin Papan chiaid tantiabempatsiash?” qeshun bédamboen tantiaquin bédamboen chuiita. ¹⁷ Mibi chieshènquin cuesuneti-adquo iquendac. Mibi bedshun: “Cuesmenu,” qeshun abi chuiquido mibi cuidmenen Nuquin Papan chiaid chuibante shubono mibi buanendac. Ashunquo mibi cueshcaten cueshcaindac. ¹⁸ Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma èbi chuiquidon chuiquid dabèdta isadaidpembo èmbi naid chuibanu,” èbi quenuc mibi aden buanendac. ¹⁹ Adoac dacuèdenda. “Chuiquid dapa yacnoshon ¿atotsimbi chuipatsiaba? ¿Adambi bédamboen chuipatsiaba?” quec dacuèdenda. Chuiquid dapa mimbi bèisnubi Nuquin Papan ambi tantiacpadomboen mibi oncamendac. ²⁰ Aden aton Mayanèn ambi tantiacpadomboen mibi oncamendac —quepondash Esus.

²¹ Adashic padpidec onquec: —Èbi chieshènquidon èbi tantiaquidotsen comapenen chieshènendac. “Esus tantiaquid nec,” qeshun aton buchimbi aton utsi cuesunemendac. Amèmbi ambi tishmiaid cuesunemendac. Aton dacuèbombi chieshtoshon anibèdta amè cuesunemendac. ²² “Esus tantiaquid nec,” qeshun matses dadpenshun aden chieshènaqui chieshtoenquo icquin èbi tantiascho Nuquin Papan abi yacno mibi puduedmendac.

²³ Shubu dadpen yacno nidacsho chieshēnac shubu dadpen icquid utsi yacno cuenta. Anoshontsen ěmbi naid chuisho chieshēnoac shubu dadpen icquid utsi yacnotsen cuenoata. Adecuidi cuendeneta. Nēid nidaid Isadaid caidēn shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuēsh choaindabi.

²⁴ Mibi tantiamequid nebi. Ěmbi tantiamiaido icsho ěbi icbocpadomboembidi mibi chieshēnendac. Abi chuiquid dapa chieshēnacpadembidi ambi namiaidotsen chieshēnquid. Icho chieshēnquimbi yuabotsen chieshēnquid. ²⁵ Adembidi ěmbi chiacpadomboen natiadquo icsho mibitsen chieshēnendac. Nuquin Papa yacno puduedmianquid icsho: “Ma podobitsi icsan icbo Betsibu caid neyoc,” ¿cainquiodabi ictiōsh? Adembidi mibi Nuquin Papa yacno puduedtequido icsho mibitsen chieshēnendac —quequin chuipondash Esusēn abēd icquido chuiquin.

Dacuēdenquo icquin chui, quequin chiaid
(Duc 12.2-7)

²⁶ Adshumbic padpiden chuiquin: —Mibi chieshēnquido dacuēdēnenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsēcquin chiaid Nuquin Papan utsibo tantiamendac. Adembidi mimbi bēdamboen naidtedi Nuquin Papan utsibo tantiamendac. ²⁷ Nēbi ěmbi mibitedictsēcqui chuiboed dacuēdenquo icquin utsibo chuibeneta. ²⁸ Chuibenesho min dadauidtsēcqui cuesunetequid dacuēdēnenda. Min tantiate unēstiapimbo icquid icsho nibēdametiapimbo iquec. Min dada unēsān min tantiate abi icsho cuidnuequin chian anēdēnquequid nēsecanquid tantiate. Adquid Nuquin Papa icsho dacuēdēnta.

²⁹ Utsibon chieshēnaqui dacuēdēnenda. Nuquin Papan mibi tantieque. ¿Padichucu cuesaid isashta unēsquo icti? Padenquo. Padnuen ambi tantiacpadomboembi padichucu dadpen icquid abentsēc cuesac paēdsho Nuquin Papan tantiec. ³⁰ Adembidi min manēdaid Nuquin Papan tambanaidquo nec. Aden min manēdaid abentsēc paēdsho aidēn tantiec. ³¹ Aden min manēdaid tambanquid icquin padichucu bēdiactsēc tantiatstsēcquin mibien comapenen tantieque. Mibi chieshēnquido dacuēdēnenda —quequin chuipondashi Esusēn.

Esus con Icho nec, quequido chiaid
(Duc 12.8-9)

³² Adshumbic padpiden chuiquin: —Utsibo chuiquin: “Con Icho Esus nec. Nuquin Papa yacno ěbi puduedmequid nec,” quequin chianequid Nuquin Papa yacno chosho isun: “Nēid ěbi tantiaquid neque. Puduedmeta, Papa,” quequin Nuquin Papambo chiendambi. ³³ Padnuen utsibo chieshec: “Con icbo Esus catiapimbo iquebi. Tantiapimbo iquebi,” quequid bēdamboen istiapimbo iquebi. “Nuquin Papa yacno puduednu,” qesho: “Padi. Ěbi tantiaquidpenquo neque. Puduedmenda,” quequin Nuquin Papa chiendambi —quequin Esusēn chuipondashi.

Esus tantiaquidobēdi cuēshēdte chiaid
(Duc 12.51-53; 14.26-27)

³⁴ Adshumbic padpiden chuiquin: —Ěmbi chuiboed tantiashun: “Nuquin Papa yacnuēsh choquid icquin abitedimbo bēdamboen tabadmetsiash,” ¿caquindabi ique? Padenquo ictsiambi. Ěbi tantiaquidobēd ěbi tantiesabo cuēshēdenquo icte danenda. Ěbi tantiaquidobēdi ěbi tantiesabo cuēshēdendac. ³⁵ Amēbēd aton mado cuēshēdendac. Adecbidi anibēd aton champi cuēshēdendac. Adecbidi aton chayabēd aton babanēn cuēshēdendac. ³⁶ Aden aton shubun icquidombi ěbi tantiaquid chieshēnendac.

³⁷ Padnubic aton matsesuidi tantiaquidēn ěbi bēdiactsēc tantiatstsēctsiash. Aton tita tantiaquinc aton papa tantiaquinc cain aidēn chiacpadomboenuidtsēcqui naquidēn ěbi bēdiactsēc tantiatstsēcquin ěmbi chiacpadomboen natiapimbo ictsiash. Adembidi aton mado tantiaquinc aton champi tantiaquinc cain aid bēdambo icmeteuiddtsēcqui bunquin ěbi bēdiactsēc tantiatstsēcquin ěmbi chiacpadomboen natiapimbo ictsiash. Adquido bēdamboen istiapimbo iquebi. Ěbi tantiesabo nec. ³⁸ Utsibon chieshēnac ěbi tantiatstsēcboedi badedi chieshtoshon ěmbi chiacpadomboen natiapimbo yantsiash. Adquidotsen ěbi tantiaquidpenquo iquendac. ³⁹ Matses ambi naiduidi naquid Nuquin Papa yacno puduedtiapimbo iquendac. Padnuen ěbi tantiaquin ěmbi chiacpadomboen naquid Nuquin Papa yacno puduedendac. Adquid chieshēnaqui chieshtoenquo ictsiash —quequin Esusēn chuipondashi.

Nuquin Papan bēdambo icmete chiaid
(Mad 9.41)

⁴⁰ Adshumbic Esusēn ěbi chedo padpiden chuipondash. —Mibi chieshēnquido icnubi mibi bēdamboen isquid iquendac. Ěmbi naid mimbi chuisho tantiash: “Ai, abimbo caic,”

queshun ëbi tantiabenquin ëbi chomequidtsen tantiabenendac. ⁴¹ “Naden naindambi,” quequin ambi chiaid chuibenequid Nuquin Papan bédamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque. Bédamboen chuisho tantianu,” quequid icsho Nuquin Papan bédamboen isendac. Adembidi abi tantiec ambi chiacpadec bédamboec tabadquid Nuquin Papan bédamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” quesahun bédamboen isquidotsen Nuquin Papan bédamboen isendac. ⁴² Adembidi ëbi tantiaquid yec acte bundoacsho acte menequid Nuquin Papan cuidnanquin bédambo icmendac. Adembidi utsibon Esus tantiaquido bédamboen nashunsho Nuquin Papan bédambo icmendac –quequin Esusën chuipondashi. Adshun: –Chuibenetan –cac nidshumbimbi chuibenepondac.

11

Uan acten mentoanquidën chuimiaid (Duc 7.18-23)

¹ Adusën: –Chuibenetan –cac abéd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeniad caondash. Aid nidaid cuëshë Cadidia caidën capucuenequin adoac caondash. Adnubini yuec-yuecpambo ictanec Esusbéd icoaic cho-chopondac.

² Adnubien Uanën Esus acten mentondaidëmbi quënën nauedaid icquin Esusën naid tantiapac caondash. Adshumbic abéd icquido chuiquin: –¿Nuquin Papan chomiaid nuqui cainaidta nepec? Esus chuitan –cac choshon Uambéd icquidon Esus chuituidpondash. ³ –Uanën: “Chuitan,” cac chobi. ¿Ëmbi cainaid Nuquin Papan chomiaidquioda mibi nepe? Mibi adquidpenquo icnuc ¿ada utsi chopatsiash? –caquien ⁴ Esusën: –Ëmbi nadati-ambo icquin nabamboebédta ëmbi chuiboed Uan chiec nid. ⁵ “Bëshuacboedën isbenosh. Canite icsaidi capucuenosh. Daushumbo icquid nami mishadenquo icquid bédanosh. Pashuacboedën tantiabenosh. Adoshombic unësaidi uincuemiosh. Adoshombic Nuquin Papa tantienquo icquido Nuquin Papan bédamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaidquo nec,” quequin ëbi tantiendac. ⁶ Adshumbic nadentsen chuita. “Muambo nec, ëbi cainquo icquin: Ambi chiacpadquid Nuquin Papan chomiaidien nec, quequin ëbi tantiaquid Nuquin Papan bédambo icmendac,’ quiosh,” quequin chiec nid –cac nidanepondash Uambéd icquido.

Uan acten mentoanquid chiaid (Duc 7.24-35)

⁷ Aido nidanebon Esusën Uan acten mentoanquid chuiquin abi datsidadquido naden chuipondash. –Mates nibédacno ¿atotsi quenuc nidonda? ¿Cunquequidën ishcunaid isnuecta nidtionda? Padenquo. ⁸ ¿Dashcute bédaidquo dasiuidaid isnuecta nidtionda? Padenquo. Icsactsëcquid Uan dasiuidpondash. Dashcute bédamboshë icquid dasiuidquido ancanquidën shubu dapan tabadquido nec. ⁹ Ad icnuc ¿atotsi quenuc nidonda? “Naden naindambi,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncamiaidquo Uan nec. ¹⁰ Uanën abia choshon chuite chuiquin Nuquin Papan naden dada uamepampic. “Mibi chote chuiquidba chomembi, Mado.

Aid: ‘Bédambo icquid choeque. Icsainquo yec ënëdta,’ quequin mibi chote chiendac, Mado,” quequin Nuquin Papan ambi chiaid dada uamepampic. ¹¹ “Nuquin Papan chomiaidquo choec,” quequin chuiquid Uanpadquid utsi nibédec. Adquid yequi: “Abi choec,” quequin ambi chuiboedën ëmbi nabansho isabi yequi bédapabi Uan icsect. Padnuen ëmbi Nuquin Papan chiacpadomboen nabansho isash ëbi tantiaquido bédamboshë iquendac. ¹² Uanën chuisho Nuquin Papa tantiabenacpadomboen ëmbitsen Nuquin Papan bédamboen iste chuisho tantiashun adembidi abi icsaidi ënshun icsaboedon dadpeshun Nuquin Papa tantiendac. ¹³ Nèbi Uanën: “Nuquin Papan abi yacnoshon bédambo icquid chomendac,” quequin chuipondash. ¿Ambiada adopondash? Padenquo. Ëndenquimboshë tauamboen nuquin tsusedpa Moisesën chuibempampic. Adshumbic utsintsen. Adshumbic utsintsen. Aden Nuquin Papan ambi bédambo icquid chomete chuiquin dada uamianepampic. ¹⁴ Adembidi Uan chote chuiquin dada uamepampic. “Nuquin Papan ambi tantiacpadomboen oncamiaidquo Edias cuëmédquid choendac,” quequin Ediasbimboecquid Uan chote chuipampic. Bédamboen tantiaquin: “Nuquin tsusedpa Ediasbimboecquid Uan nec,” mimbi catsiac. ¹⁵ Bédamboen tantiaquidën adembidi tantiatsiash –quepondash Esus abi datsidadquido chiec.

¹⁶ Aden chuisho tantiash chieshtoshobien Esusèn chuipondash naden. —Nuquin Papan chiaid tantienquo icquido yec nèmbo icquido ¿midapadquidoen nec? Bacuëbo nêishnanabictsëcquieq mibi iquec. Bacuëbo: “Ëmbi chiacpadomboen nanuna,” queuidash ambi chiacpadomboen aton utsibon nainquo icsho isash nêishash chushcananquid. ¹⁷ “‘Cuëdênuna,’ queuidbosh ëbi cuëdênubi ma mibi cuëdênenuqo icboc. ‘Sedenquenuna,’ queuidbosh ëbi sedenquenubi ma mibi sedenquenquo icboc,” quetsash bacuëbo nêishnanabictsëcquieq ma mibi iqueyoc. Adec nêishëmênquido yec icsambo ma mibi iqueyoc. ¹⁸ Uan pete utsi-utsien pesa iccosh. Adecbidi acte paëmbo icquid aquesambo niosh. Adquid icsho isash nêishash: “Ëmbi nacpadomboen naisa nec. Podobitsi icsa dapuedashien nechitec,” mibi quepondac. ¹⁹ Ëbien nuquin matsesën piacbimboen pequid nec. Adembidi actequid acquid nebi. Adsho isash nêishun ëbitsen icsamboen chuishunquin: “Peteuidi tantiaquin nua pequid nec. Tantiadenuen acte paëmbo icquid acquid nec. Adecbidi nuquin matses piucquid bedshunquidobêd onquec icsambo icquid caidobêd onquec quequid ma aidobêdi icsambo icquid nepayoc,” mimi ëbi capec. Padnuen bédamboen tantiaquidên Nuquin Papan chiacpadomboen nasho isun Uambêda ëbi: “Bédambo iquec,” caindac — quepondash Esus abi chieshênquido chieq.

Shubu dadpen icquidên tabadquido cuidte chiaid
(Duc 10.13-15)

²⁰ Adshumbic Esusèn padpiden chuipondash. —Nêbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bédamboec tabadtiadquio iquebi,” quetiadquidi chieshec adenquio iquec —qeshun Esusèn naden chushcapondash. ²¹ —Shubu dadpen icquid Codasin caid yacnocquidobêdi shubu dadpen icquid utsi Betsaida caid yacnocquido Nuquin Papan cuidtequido nec. Ëmbi aido ismebocpadomboen ismiac isadaidpembo cuidadenquio ictsempampic. Aden ismiaqui: “Ai, icsapobi,” qiash shubibudequi icsainquio yec ênêdtsempampic. Shubu dadpen icquid Tido caid yacnocquidobêdi shubu dadpen icquid utsi Sidon caid yacnocquido adtsempampic. ²² Nuquin Papan matses abitedi cuidte ushên: “Nadatiambo icquin nabanquin ismiacmaido nec,” qeshun Tido caid yacnocquido Sidon caid yacnocquidobêda bēdiactsëc cuidendac. Adoshombic: “Comapenen tantiaquin ismiaqui tantienquo icquido nec,” qeshun Codasin caid yacnocquidobêda Betsaida caid yacnocquido comapenec sidquenec cuidendac. ²³ Adembidi nèmbo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquo yec Nuquin Papa chieshênquido cuidacno nidmetequido ma mibi nepayoc. Êdenquimboshê yampido shubu dadpen icquid Sodoma caid yacnocquido cuidquin Nuquin Papan nibêdamepampic. Ëmbi mibi ismebocpadomboen ismiac aidon abi icsaid êntsempampic. Abi icsaid ênsho Nuquin Papan cuidenquo ictsempampic. Cuidenquo yac nêbi aton matses abi ictsiash. ²⁴ Nuquin Papan matses abitedi cuidte ushên: “Comapenen tantiaquin ismiacmaido nec,” qeshun Sodoma caid yacnocquido bēdiactsëc cuidendac. Nuquin Papan chomiaid icquin ëmbi ismeboedo Capednaun caid yacnocquidoen comapenec sidquenec cuidendac —quequin abi tantiesabo Esusèn chushcapondash.

Esusèn dayacquiobimboecnuq icmete chiaid
(Duc 10.21-22)

²⁵ Adshumbic Esusèn Nuquin Papa chuipondash. —Mibi bédamboshê iquec, Papa. Mibi yacnocquidotedishun Icbombo yec nidaidên tabadquidotedishun Icbobidi mibi nec. Mimi tantiamiabi: “Dadpen tantiaquid nebi,” quequidombi ëbi tantiami iquec. Mimi tantiamiac nêidon ëbi tantiec. Aden mimi bédamboen naic. ²⁶ Mimi tantiacpadomboen mimi bédamboen naic. Mibi bédamboshê iquec, Papa —quequin Esusèn Nuquin Papa chuipondash.

²⁷ Adshumbic abi datsidadquido chuipondash. —Nuquin Papan ambi tantiaidtedi ëbi chuimec. Ëmbi naboedbêda ëmbi nate abitedi con Pan ambentsëqui tantiec utsibon tantienquo icnuc. Adembidi Nuquin Papan natebêda ambi naboed abitedi ëmbentsëqui tantiembi. Aden Nuquin Papa tantiaquin: “Nêidtedi matses bédamboen tantiamembi,” qeshun: “Nuquin Papa nadquio iquec,” quequin tantiamembi. ²⁸ Ëbi tantia. Dayacquio yachimboecnuq mibi bédambo icmembique. “¿Mitsipadequiibi Nuquin Papa yacno puduedpe?” quec ¿uimambo yachimboecta mibi icpe? Adquidên ëbi tantiasho Nuquin Papa yacno puduedtequid mibi icmembique. Ëbi tantia. ²⁹ Con Icho ëbi cata. Con yuambo icquin ëmbi chiacpadomboen nasho mibi bédamboen isquin dayacquio yachimboecnuq mibi bédambo icmembique. Ancanesambo yec bédambo icquidini neque. Con Icho ëbi cata.

Adsho mibi bēdambo icmembique. ³⁰ Mibi ancainquio icquin dayacquio yacimbocneuc bēdamboen mibi tabadmembique. Con Icbo ēbi cata —quequin chuipondash Esusēn.

12

Esusbēd icquidon petsēcsho istuidshun chushcaid
(*Mad 2.23-28; Duc 6.1-5*)

¹ Adshumbic chonoadtemaid ushēn Esusbēd capucuenequin tied matanquin bun-dotsēcshun tiedēn caniquid ēshchicshun petempi petsēccondambi. ² Pesho istuidshumbini con tsusedpabon chiampid namequido padiseyobon: —Is. Mibēd icquido chonoadtemaid ushēmbi chonoadeque —capondash Esus chuiquin.

³ Adoquien Esus: —Ma icsapenquio icpayoc. ¿Nuquin tsusedpa Dabidēn bundoshon ambi petemaidquio pepampid chuiquin dada uapampid isamboda ictio? ⁴ Aidēn Nuquin Papa tabadte shubu uashunaid abi puduedtemaidēn puduedshun ambi petemaid pan sanaid istuidpampic. Aid panēmpi nēish yua abided unēs uaquidon petequid nepampic. Aid panēmpi bedshun abēd icquidobēdan Dabidēn pepampic. Aden nuqui bēdambo icquid caidēn ambi natemaidi napampic. ⁵ Adembi chonoadtemaid ushēn natemaid chiaid niacquimbi nēish yua abided unēs uaquidon aid ushēmbi Nuquin Papa tabadte shubu uashunaidēn puduedshun nacnendenepec. Nuquin Papan chiacpadomboen naiqui icsainquio icpec. ⁶ Nuquin Papa tabadte shubu uashunaid tantiaquin adopec. Aid shubu bēdapabi icnuc bēdamboshē icquid nebi. ⁷ Nuquin Papan naden chiaid mimbi bēdamboen tantienquio iquec.

“Ēmbi chiacpadomboen abentse-abentsen mimbi naic.

Adoquimbi ēmbi chiaid utsi niaquec mimbi icsaido caido mimbi bēdamboen istiapimbo iquec.

Adsho isun: ‘Mibi bēdambo iquec,’ catiapimbo iquebi.”

quequin Nuquin Papan chiaid bēdamboen tantiaquid ushēmbi bēdamboen nasho mimbi chushcainquio ictsenoc. ⁸ Tantia. Nuquin Papan chomiaid icquin chonoadtemaid ushēmbi chiampid icnuc ēmbi tantiacpadomboen aid ushēmbi ēbi tantiaquido namembique —quepondash Esus ēmbi petsēcsho istuidquido chiech.

Mēicsatsaid bēdamiaid
(*Mad 3.1-6; Duc 6.6-11*)

⁹ Adanec nidec Nuquin Papan chiaid chuibante shubun puduedshun ¹⁰ isaquien mēicsatsaid icpondash. Adnubien padiseyobon: —Chonoadtemaid ushēmbi bēdamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Icsambo mibi iquec,” canuna —queshun Esus chuituidpondash. —¿Nadquid chonoadtemaid ushēmbi matses bēdamequinda Nuquin Papan chiaid niacpec? —caquien ¹¹ Esusēn: —¿Ada min nēish yua obeca caid icpec? Adquid chonoadtemaid ushēn shēcuē uquēd ampaēdacsho istuidshun ¿chiquenquioda mimbi icpatsia? Ai, mimbi chictsiac. Chonoadtemaid ushēmbi mimbi chonoadquin chicpatsiac. ¹² Aden min obeca bēdiactsec tantiec mibi bēdapabi icnuc matses tantiaquiquin nashunquid bēdamboshē ictsiash. Nadquid chonoadtemaid ushēmbi matses aden bēdamboen nashunquidēn Nuquin Papan chiaid niaquenquio ictsiash —quequin Esusēn abi icsamenu caquido chuipondash.

¹³ Adotanquimbien Esusēn mēicsatsaid chuiquin: —Mēcueta —cac mēcuēc bēdampondash aton mēdante abiuc daēdi bēdambo yec. ¹⁴ Adsho isashien abi chieshēnquido padiseyobo nēishquipac caondash. Adec nēishanec nidash aton matses utsibobēd: —Cuesunequimbien Esus ictiad —quecuededpac caondash.

Esusēn nate ēndenquimboshē chiampid

¹⁵ Adnubien Esus: —Ēbi cuesunetiadquio iquec —quianec auēshquiobi puduanec nidpondash. Nidsho isumbien matses dadpeshun tsibanampondash. Adshumbic aidon bēaid daicsaidotedi bēdamebampondash. ¹⁶ Adshumbic ambi bēdamiaido chuiquin: —“Bēdamioshi,” quenda —quequin chuipondash Esusēn: —Ēbi abi chuiquid dapa icmenushe —quiash adpondash Esus. ¹⁷ Aden Esusēn nate chuiquin Nuquin Papan isadaidbo tsusedpa Isayas dada uamepampic naden chuiquin.

¹⁸ “Ēmbi chomiaid ēmbi chiacpadomboen naquidquio nec.

Aid tantiaquiech bēdambo iquebi.

Con Mayan bēdambo icquid abēdi tabadmembic.

Adoac ēmbi bēdamboen iste isadaidbobēda matses utsibo abitedi bēdamboen chiendac.

¹⁹ Chushcanante bunenquio yec ancanenquio iquendac.

Chuiquid dapa ictiapimbo iquendac.

²⁰ Icsambo icquido yec shubiquido yec natiaic tabadquido yec daicsaido yec quequidon abi bēdiactsēc tantiabentsēcsho bēdamboen isquin bēdamboen tantiamendac.

Nuquin Papan chiacpadec cuidte ushē choabi icnuc adoendac.

²¹ ‘Nuquin Papan tantiacpadomboen matses bēdamboen namendac,’ queshun nidaid utsi-
utsiec yancocquidon matses dadpeshun aidi tantiendac,’
quequin Esusēn bēdamboen nate chuipampic Isayasēn.

Podobitsi icsan namiaidi Esus nec, quiaid
(*Mad 3.20-30; Duc 11.14-23; 12.10*)

²² Adnubien Esus ismēnueen daicsaid bēpondash. Dapuduedshun podobitsi icsan bēshu uain eme uaidi onquesa nepondash. Isenquio yec onquenuio icshobien Esusēn bēdamepondash. Adoac isbenequi onquiampondash. ²³ Adsho isashien Esus datsidadquido: –Is. Comapēnen tantiaquin nabanquidquio nēid neque. ¿Nuquin tsusedpa Dabidēn tsyuecquidta nepec? Adquid yec nuqui cainaidquio Nuquin Papan chomiaidien nechitec –quecuededpondash.

²⁴ Adsho tantiaish Esus chieshēnquido padiseyobo: –¿Aidta nedic? Ma aidpenquio neyoc. Betsibu caidēn podobitsi icsan icbon namiaid icquimbien Esusēn podobitsi icsa cuemehitec –quequin otacquo tantiaipanēdash.

²⁵ Adshobien Esusēn aidon otacquo tantiaid ambembi tantiaishun naden chuipondash. –¿Adquidēnda aton yuabi cuemepatsiash? Padenquio. Chuiquid dapan aton yuabo nēishtanquin chushcac cuēsh-cuēshēdec aton yuabo uesadec nietsiash. Aido nibēdnuc chuiquid dapa ictiapimbo ictsias. Adecbidi shubu dadpen icquidēn tabadquido chush-cananash cuēsh-cuēshēdec niuquin shubu dadpen icchoedi daēdpactsēc yanec. ²⁶ ‘Betsibu caidbidi Satanas caidēmbi namiaquien podobitsi icsa cuemehitec,’ mimbi ēbi capoc. ¿Ambi naid nashobida Satanasēn aton yuabo podobitsi icsabo cuemepatsiash? Padenquio ictsias. Satanasēn cuemiac aibēdi aton yuabo cuēsh-cuēshēdtsias. Adnuc Satanas aton icbopenquio yantsias. ²⁷ Mibēd icquidon podobitsi icsa dapudēdaid cuemiac caosh. ¿Cuemesho isun mimbi ēbi chiacpadomboen: ‘Betsibu caidēn namiaquien nachitec,’ cainda ictio? Ma mimbi padenquio icpaboc. Mimbi adoac: ‘Mimbi icsamboen chiec,’ quetsenosh podobitsi icsa dapudēdaid cuemequido mibēd icquido. ²⁸ Nuquin Papan Mayanēn namiaquimbi podobitsi icsa cuemioc. Ēmbi adoshō isash: ‘Nēbi matsesbēd icquin Nuquin Papan namiaidēn naosh,’ quetiadquidi mibi nec –quepondash Esus.

²⁹ Adashic abi onquec: –Tantia. Mibi chuinu. Ampenuesho icbon istuidac ampequidēn icbo uidēn uabi ampeshuntiapimbo iquec. Icho uidēnquio icquid bucun cataneshun ampeshunquid. Adecbidi Satanas bēdiactsēc tantiaquid icnuc ēbien comapēnen tanti-aquidquio nec. Uidēn uachimboen nadatiambo icquin nabanquid aton yua cuemepombi. ³⁰ Ēbi con icbo cainquio icquido Satanasēn yuabo nec. Adquid icquin ēbi chieshēnquin ēbi tantiatsēcquido cuēshēdmendac. Adquidbidi mibi nec –quequin Esusēn abi chieshēnquido chuipondash.

³¹ Adshumbic nadentsen chuipondash. –Nuquin Papan chiaid niac-niacboedēmbi ēnacsho Nuquin Papan bēdamboen isec. Nuquin Papan icsamboen chuishunquidēmbi abi icsaid ēnacsho Nuquin Papan bēdamboen isec. Aton Mayanēn namiacsho isash: ‘Icsambo iquec,’ quequin bēdamboen tantienquio icsho Nuquin Papan bēdamboen istiapimbo iquec. ³² Ēbi chieshēnquin icsamboen chuishunquidēmbi ēnacsho Nuquin Papan bēdamboen isec. Aton Mayanēn namiacsho isash: ‘Icsambo iquec,’ quequin icsamboen tantiaisho Nuquin Papan bēdamboen istiapimbo iquec. Aden ēnenquio icquin icsamboen tantiaisho adem-bidi ēnenquio icquin bēdamboen istiapimbo iquendac –quequin abi chieshēnquido Esusēn chuipondash.

Bēdambo icquid nec, quequin tantiate chiaid
(*Mat 7.15-20; Duc 6.43-45*)

³³ Adshumbic naden bēdamboec tabadte Esusēn chuipondash. –Cuēte bēdan bacuē bēdambo iquec. Cuēte icsan bacuē icsambo iquec. Chetequid isun cuēte dada matsesēn tantiec. Adembidi matses bēdambo icquid bēdamboec onquec bēdamboec tabadsho isun: ‘Aid bēdambo icquid nec,’ quequin matsesēn tantiatsias. ³⁴ Ma mibi adquidpenquio neyoc. Nisibimboec icsa uanquido mibi nec. ¿Icsambo icquinda mimbi bēdamboen chuidio? Ma mimbi padenquio icboc. Mimbi icsamboen tantiaid ma mimbi utsibo icsamboen chuiboc. ³⁵ Bēdambo icquidēn ambi bēdamboen tantiaid bēdamboen chuitsias. Icsambo icquidēmbien ambi icsamboen tantiaid icsamboen chuitsias. Aden mimbi icsamboen chuipoc. ³⁶ Ambi cuidte ushēn Nuquin Papan: ‘¿Ada bēdamboen tantiaquin chuidenio?’ quequin matses abitedi chuimendac. ³⁷ Adoac abimbo chiec: ‘Ai, bēdamboen nadeniombi,’

quesho icsano nidmenquo iquec. Padnuen utsi: “Padenquo. Icsamboembimbi chuidenechitoc,” quesho icsano nidmequin cuideque. Icsamboec onqueboedi ênêdta —quequin Esusên abi chieshênquido chuipondash.

Padiseyobon: Êbi isme, quequin Esus chiaid
(Mad 8.12; Duc 11.29-32)

³⁸ Aden chuisho tantiashumbien abi chieshênquido utsibon Esus chuituidpondash. —“Nuquin Papan chomiaidini nec,” quequin êbi ismequin nadatiambo icquin nabanta. Isnu —quepondash padiseyobo Moisesên dada uapampid chuiبانquidobêdi.

³⁹ Adoquien Esus: —Padi. Nuquin Papan chiaid niac-niaquec mibi icsamboshê iquec. Êbi tantiate bunenquo icquimbi mimbi: “Êbi isme,” êbi capec. Adsho nêbi mibi ismenquo iquembi. Yuecshumbimbi mibi ismendac. ¿Ada nuquin tsusedpa Onas caidên nampid tantie? Aid yampicpaden naindambi. ⁴⁰ Chishcambieccquid dapan chebudac aidên pucun uec daêdec ushacso ucbudac Onas padpidec nidpampic. Adecbidi unêsacso chococac Onas yampicpadec daêdec ushacso uincuenendabi. Aden ismendambi. ⁴¹ Êbi tantienquo yec mibi icsambo iquec. Padnuen Nuquin Papan chiaid Onasên chuiبانac shubu dadpenquo icquid Ninibe caid yacnocquido badedi icsainquo yec ênêdpampic. Nuquin Papan chiaid chuiبانquid Onas bêdambo icpampic. Êbien bêdamboshê icquidquo nec. Adquid icquin nadatiambo icquin dadpen ismiaqui mimbi êbi tantienquo iquec. Aden êbi tantienquo icquido icsho Nuquin Papan matses abitedi cuidte ushên Ninibe caid yacnocquidon: “Icsambo iquec,” mibi caindac. ⁴² Adquid cuidte ushêmibi matses utsi Sud yacnocquido ancaquidên nuquin tsusedpa Sadomonên chuisho tantie chopampidêntsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuêmêdquid dadpen tantiaquid nec,” quequin chuituidac Sadomonên chuisho tantianuec nidshun aid chidon tantiatuidpampic. Adash: “Nuquin Papan tantiamidênquo Sadomonên bêdamboen chuipec,” quepampic. Êmbien abitedi tantiaquid icquin nadatiambo icquin ismeuidpoc. Adoqui mimbi tantienquo icpec —quepondash Esus abi chieshênquido chieç.

Abi nianaïd podobitsi icsa dapuedoaid
(Duc 11.24-26)

⁴³ Adshumbic naden Esusên chuipondash. —Icsaquido mibi nec. Podobitsi icsa dapuedaidbimboecquid mibi nec. Tantia. Mibi chuinu. Abi dapuedaid matses nianashi podobitsi icsa abi dapuedtequid nibêdacno yuec capucuen-capucuenec. Adtanequi: “Êbi icbocnobi dapuedoic nidebi,” quianec choec. ⁴⁴ Chonobi ambi niamboed matses: “Êbi dapuedaid podobitsi icsa nibêdnuc bêdambo iquebi. Adquid chomeoatiapimbo iquebi. Êmbimbo naic bêdamboec tabadquidquo nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuedtequidquo nêid nec,” quianec ⁴⁵ abipadquid utsi bedec nidoaic. Nidshumbic 7tedi icsamboshê icquido istuidshun bêash aidobêdi dapuedec. Adnuc podobitsi icsa abentsêc dapuedaid yec ênden icsambo ichoedi aido dadpen dapuedaid yec buêdanquieç aid matses icsamboshê yanec. Adquo mibi iquec. “Bêdambo iquebi,” queboedi nêbi mibi icsamboshê yanec —quequin Esusên chuipondash.

Anibêdi Esusên utsibo choaid
(Mad 3.31-35; Duc 8.19-21)

⁴⁶ Adanec shubun puduedshun Esusên abêd puduedquido dadpen chuinubi aton utsibo aton titabêdi Esus isnuç chopac caondash. Umanuc tabadnubi ⁴⁷ utsin puduedshun Esus chuituidpondash. —Mibi isec tita min utsibobêdi choacchos. Umanuc tabadec —caquien badedi nidenquo yec ⁴⁸ Esus: —Utsitsen con ta caimbi. Adembidi utsitsen con utsi caimbi —quetanquin ⁴⁹ abêd icquido mêdquin ismepondash. —Nêid êbêd icquido con utsibo caimbi. ⁵⁰ Nuquin Papan chiacpadomboen naquidquo icsho con matses caimbi. Con utsi caquinc con chibi caquinc con ta caquinc caimbi —quepondash Esus.

13

Piacbo êshê siaid chiaid
(Mad 4.1-9; Duc 8.4-8)

¹ Adtanec nidec chian budash cuêmano tabadtuidpondash. ² Tabadtuidsho isash matses dadpenquo cho-choash tsucus-tsucustsêcquio yec Esus datsidadpondash. Adsho istanec cano dapa antabêdtoash cuêmano anoentsêc canon nuadquin Esusên chuipondash cuêmano tabadquidon tantianubi.

³ Adshumbic abi tantiate chuinuen naden ompoachimboen chuipondash. —Piacbo êshê siaid utsi-utsiec bédamboec caniec. Utsi-utsiec padenquoio. ⁴ “Abitedi ansecanu,” caidi utsi-utsiec shêcuê nibêdacno paêdec. Paêdacsho paêdaid uicchunên chequid. ⁵ Êshê utsibic nidaid tsasimbo yacno siac badedi dêyucuidash ⁶ aton tapun nidaidên puduedenquoio icnuc ushê chênquequidên badedi unêsquid. ⁷ Êshê utsibic nisanquid diadacno siaid dêyucash caniduidtsêcsho nisanquidên dayunac unêsquid. ⁸ Padnuen êshê utsi-utsiec nidaid bédanquoio siac dêyucash caniash dadpenquoio êshêquid. Utsi-utsiec 100ted êshêquid icnubi utsi-utsiec 60ted êshêquid icnuc utsi-utsiec 30ted êshêquid —quepondash Esus.

⁹ Adashic: —¿Min pabiate shêcuê nibêdquieta iquec? Êmbi chuiboed bédamboec pausudta —quepondash Esus.

Ompoachimboen chiec nebi, quiaid
(Mad 4.10-12; Duc 8.9-10)

¹⁰ Adsho tantiaishun abêd icquidon Esus chuipondash. —¿Atotsieshun ompoachimboen nêid matses dadpen chie? —caquien ¹¹ Esus nadpondash. —Utsibo tantiamenquoio icquin Nuquin Papabêd tabadte chuiquin nêbi mibiuidtsêqui tantiamembi. ¹² Nuquin Papa tantiatiaidquoio icquidên êbi tantiaisho bédamboen tantiamendambi. Nuquin Papa tantiauidtsêcquidên êbi tantienquoio icsho êmbi ompoachimboen chiac tantienquoio ictsiash. ¹³ Ompoachimboen aido dadpen chuibanembi. Êmbi naid isun êbi tantienquoio iquec. Êmbi chuisho pamumêdacimboen tantienquoio iquec. Adsho aidon tantiatiapimbo icnuc chiembi. ¹⁴ Nêidon tantienquoio icte chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquoio iquendac.

Ismiac isquioboshombi: ‘Ai, aidi nec,’ cainquoio iquendac.

¹⁵ Ai, êmbi chiaid tantiatiapimbo iquec.

Ushacimboen tantienquoio yec pamumêdacimboec chieshêmênquidombo iquec.

Êbi tantiate bunenquoio iquec.

Êmbi chiaid tantiaquidombien paposhquiachimboen bédamboen tantiabentsiash.

Pausunachimboen tantiaishun êmbi chiacpadomboen natiadquoio yansho aton chiesh bédametsiambi. Aton chiesh bédamete bunenquoio iquec,”

quequin Nuquin Papan dada uamepampic —quepondash Esus abêd icquido chiec.

¹⁶ Adashic aidobidi chiec: —Isayasên chiacpadomboen utsibon êbi tantienquoio icnubi mimbien êbi tantiec. Êbi isec mibi tabadec. Êmbi chuibansho tantiaish: “Ai, abimbo caic,” quec mibi bédambo iquec. ¹⁷ Êbi chote chuipampidobêd tan bédamboec tabadquido dadpeshun mimbi êbi isacpadomboen êbi iste bunequi êbi isambobi unêspampic. Mimbi êmbi chuisho tantiacpadomboen tantiatiaidquoio yequi tantiambobi unêspampic —quepondash Esus.

Piacbo siaid sebadênquoio chiaid
(Mad 4.13-20; Duc 8.11-15)

¹⁸ Adashic abi onquec: —Tantia. Êmbi piacbo êshê siaid quequin chuiboed sebadênquoio mibi chuinu. ¹⁹ Nuquin Papabêd tabadte chiaid piacbo êshê siaidbimboecquid nec. Nuquin Papan chiaid chiaqui tantiaidenquoio icsho Satanasên nac badedi bêshumpec. Uicchunên piacbo êshê paêdaid badedi chiacimboen adopec. ²⁰ Utsibic Nuquin Papan chiaid chiaqui bêdiactêsêc tantiauidtsash: “Bédambo iquec,” quec cuishonqueuidtsec. ²¹ Adsho: “Nuquin Papan chiaid tantiaquid nec,” queshun utsibon chieshênac badedi chieshtoshon tantienquoio yanendac. Piacbo êshê tapunuidtsash unêsacimboen adoendac. ²² Utsibic Nuquin Papan chiaid tantiaatsashi ambi dacuêdquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquoio icpec. Isitodon dayunac unêsacimboen adoendac. ²³ Padnuen utsibon tantiate nidaid bédan siaidbimboecquid nec. Nuquin Papan chiaid chuisho tantiaquioshon ambi tantiaid bènuainquio icquin tantiabudec bédamboec tabadec. Adshun aidên chiac utsi dadpenquioshê êbi tantiaquid yanendac. Utsin chiac dadpen adecbidi êbi tantiaquid yanendac. Utsin chiac daêdpectsêc adquidbidi yanendac —quequin abi tantiate chuipondash Esusên.

Êshê icsambo icquid seuanaid chiaid

²⁴ Adshumbic Esusên naden chuipondash. —Tantia. Nuquin Papan namiaid tantiamenuen utsi chiacimboen chuinu. Tiedên caniquid pete adosbiecquid ichon siac caondash. ²⁵ Adanec nidambic inchêshêmbi choshon chieshêmênquidên êshê icsambo icquidtsen daêd uain seuanac caondash. ²⁶ Adoac adosbiecquid canidotsêcnubi abêdi tancandaêdpamboec icsambo icquid canidotsac caondash. ²⁷ Adsho istanquin yuabon aton icbo chuituidpac caondash. “¿Pete êshêda sio?” cac: “Ai,” quesho tantiaish: “Icsambo

icquidbèd tancandaèdec canidopacboec. ¿Mitsipaden sio?” quequin yuabon icbo chuipac caondash. ²⁸ Adoaquien: “Chieshèmènquidèmbien seuanchitash,” cac: “¿Chichshunetanquindambi icpe?” yua qesho: ²⁹ “Padi. Petebèdi chiquidtsiash. ³⁰ Aidbèdi ma canipanuna. Èshèacsho tacuesquimbi teshun sianun nanuna. Adoshombic icsambo icquid tsindoban-shun nèdèncanun nanuna. Icsambo icquid nèdèncatanquimbic pete bedshun sandoshon shubun dectandonon nanuna,” quepac caondash tied icbo –quequin Esusèn chuipondash.

Esus tantiaquido dadpen yante chiaid
(Mad 4.30-32; Duc 13.18-19)

³¹ Adshumbic abi tantiaquido dadpen yante tantiamenuen Esusèn naden chuipondash. –Cuète bacuè èshèmpi ³² pistsècquidi nuamboshè caniec. Aid cuète cuidin uicchun dadpen tabadtonec. Adecbidi èbi tantiaquid abentsècshun bèdamboec tabadquin ismiac èbi tantiaquid dadpenquo yanendac –quepondash Esus.

Abi bèdamboen tantiate Esusèn chiaid
(Mad 4.33-34; Duc 13.20-21)

³³ Adshumbic Esusèn abi bèdamboen tantiate chuipondash. –¿Mitsipad nami uaid icpec? Aniactèsèc nami uashun utsibèdta daèd uain cabiunac abichobi batambo yanec. Adembidi èbi bèdiactèsèc tantiatèsècboedi èmbi chiaid tantiash èbi bèdamboen tantiaquid yanendac ³⁴ –quequin Esusèn chuipondash. Sebadènquo chienquo icquin ompoacbimboenuidi Esusèn chuipondash. ³⁵ Aden Esusèn chuite chuiquin Nuquin Papan dada uamepampicpadom-boen nanuen adopondash. Nuquin Papan dada uamepampid nad iquec. “Sebadènquo chienquo icquin ompoacbimboenuidi chuibanendambi. Èndenquimboshè matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec. Nèbimbi chuibanendac.” quequin nuquin tsusedpan Esusèn chuite dada uapampic.

Èshè icsambo icquid seuanaid sebadènquo chiaid

³⁶ Adashic matses dadpen tabadacuèsh nidec Esus shubun puduedondash. Pudued-shobien abèd icquidon chuipondash. –“Chieshèmènquidèn èshè icsambo icquid siaid nec,” quequin mimbi chuiboed en sebadènquo chui, Icbo. Tantianu. ¿Atotsi chuitiadquo icquin aden chio? ³⁷ –caquien Esusèn chuipondash naden. –Tantia. Mibi chuinu. Pete èshè bèdambo icquid sequidbimboecquid nebi. Nuquin Papan chiaidquo tantiamequin matses bèdambo icmequid nebi. ³⁸ Padnuc tied dapabimboecquid nidaidèn tabadquidtedi nec. Padnuc pete èshèbimboecquid èbi tantiaquid nec. Nidaid utsi-utsiec yacno tabadquido utsi-utsien èbi tantiaquid icmendambi. Padnuc èbi chieshènquid Satanasèn yuaido icsambo icquid siaidbimboecquid nec. ³⁹ Padnuc èshè icsambo icquid sequidbimboecquid Satanas nec. Aidèn yuaido matses icsambo icquidon èbi tantiaquidobèd tabadquin icsametiadquo iquec. Adsho badedi cuidenquo icquin Nuquin Papan cuidte ushè choabi icnuc matses icsambo icquidobèd bèdambo icquido tabadmendambi. Padnuen ambi chiacpadèn Nuquin Papan abi yacnoshon uaido mayan bèdabon èmbi chiacpadomboen naindac. ⁴⁰ Icsambo icquid tsindoshon nèdèncacimboen Nuquin Papan cuidte ushèmbi icsambo icquido cuiden-dac. ⁴¹ Èmbimboen mayan bèdabo namendac. “Icsamianquidobèdta icsaidotedi bedshun chian anèdènquiacno nèseca,” quequin èmbi chiac ⁴² bedshun chian anèdènquiacno nèsecaindac. Adoac natiaic mèyadbudèc sidquequiendac. ⁴³ Padnuen èbi tantiec bèdamboec tabadquido Nuquin Papa yacno nidash icsatiapimbo icquid iquendac. Èmbi aden chuiboed tantiashun èmbi chiacpadomboen nata –quepondash Esus.

Nuquin Papabèd tabadte bunquiota, quiaid

⁴⁴ Adshumbic padpiden Esusèn chuipondash. –Tantia. Matses ambi istuidaid bedte comapenec bunquiaid mibi chuinu. Utsin tied nantan nidshun dadan èndenquimbo ompoampid piucquid dadpenquo icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nèbi con tied nec,” qeshun piucquid ompoampid bedpac caondash. Adomboen matsesèn Nuquin Papabèd tabadte bunquin aton nauidi nainquo icquin Nuquin Papan chiacpadomboenuidi nac bèdambo ictsiash.

⁴⁵ Tantia. Casèdu bèdaidquo bunaidtsen mibi chuinu. Dadan casèdu bèdaidquo bunquin bednuen nibèbenepac caondash. ⁴⁶ Adshun bèdaidquo istuidash: “Nadquid utsi nibèdec,” quiaish comapenec bunquiaic caondash. Adshun aton na abitedimbo menequin piucquid bedshun casèdu icbo menequin aid casèdu bedac caondash. Adomboen Nuquin Papabèd tabadte bunquin matsesèn èbi tantiaquiaic bèdambo ictsiash –quepondash Esus.

Nuquin Papan cuidte ushè Esusèn chiaid

⁴⁷ Adshumbic Esusën naden chuipondash. —Tantia. Mibi chuinu. Nuëcquid nibedacimboen naindambi. Isadaidbon nuëcquid dadpenquo bedte nëshaid dapa acte nënequin ⁴⁸ nëshaid cubu-cubuctsëcquio icnuc nuëcquid bedshun acte cuëman tabadquin nuëcquid nibedquid. Nuacquid sandobanquin pistsëcquid acte nësecaquid. Aden Isadaidbon nuëcquid bedquid. ⁴⁹ Adomboembidi namendambi. Nuquin Papan cuidte ushë chonoc ambi abi yacnoshon uaido mayan bédabo namendambi. Adoac choshon nibedacimboen matses bédambo icquido Nuquin Papa yacno nidmequimbi ⁵⁰ icsambo icquido chian anëdënquiacno nësecaindac. Adoac natiaic shubiquiendac —quequin Esusën Nuquin Papan cuidte chuipondash.

⁵¹ Adshumbic: —¿Ada ëmbi chuiboedtedi tantie? —caquini: —Ai, tantiembi —quepondac. ⁵² Adsho tantiashun Esusën chuipondashi. —Nuquin Papan chiaid chuibanquid mibi iquendac. Matsesën aton na ëndenquimbo dayun uanëdaidbédta aton na chuca ismequin chiacimboen mimbi naindac. Nuquin Papan chiaid ëndenquimbo dada uampidbédtabi Nuquin Papan chiaid utsi ëmbi chuiboedquio mimbi chiendac —quepondash Esus.

Nasaded yacno Esus nidaid
(*Mad 6.1-6; Duc 4.16-30; Uan 4.44*)

⁵³ Adanec auëshquiobi nidequi ⁵⁴ abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoquien: —¿Mitsipaden comapenen tantiabtempash neba? ¿Mitsipadec comapenen tantiaquin bédamequid yampash? ⁵⁵ ¿Nuqui isacmaidta nedic? Ma aton papa cuëte nacnenquid nepaboc. Ma aton tita Madia nepayoc. Aton utsibo nëidtedi iccosh. Nëidic Acobo. Nëidic Ose. Nëidic Simon. Nëidic Udas. Aidtedi aton utsibo iccosh. ⁵⁶ Aido nëmbo tabadosh. Aton chibichedotsen nëmbo tabadosh. ¿Comapenen tantiaquidta nedic? Ma adquidpenquo neyoc —quequin ⁵⁷ Esus chieshëquin tantienquo icpondash.

Adsho tantiashun Esusën nadopondash: —Nuquin Papan: “Èmbi tantiamiacpden chuibanta,” caidën chiac utsibon tantiaquid. Adquidën abi caniacnoshon chuibancho tantienquo icquid —quepondash Esus. ⁵⁸ Adshun nadatiambo icquin nabanquin daëdpactsëc ismetsëcondash: —“Nuquin Papan chomiaidquio nec,” quetiapimbo iquéc —qeshun.

14

Uan acten mentoanquid

unës uaid
(*Mad 6.14-29; Duc 9.7-9*)

¹ Adnubien ancaquidën Edodes caidën Esusën comapenen tantiaquin nabanaid chuisho tantiapac caondash. ² Adshumbic aton yuabo chuipac caondash. —Uan pado acten mentoandened nepash icnui. Èmbi mapi butemiondaidi uincuempash icnui. Adquid icquin comapenen tantiaquin nabampash icnui —quepac caondash Edodes.

³⁻⁴ Edodesën Uan cuesuniac caondaid chuinu. Tantia. Uanën: —Mimbi bedaid Edodias caid min chidopenquo nec. Min utsi Uedipe caidën chido bedshun Nuquin Papan chiaid mimbi niaquéc —cadoniaquien Edodesën chieshtoshon uidën uameshun Uan quënën nauedmpac caondash.

⁵ Adshumbic Uan cuesunetiadquio icquimbi aton matses: —Nuquin Papan chiaid chuibanquidquio nec —qesho tantiashun aido dacuëdënquin Uan badedi cuesunenquo icpac caondash.

⁶ Adshumbic Edodesën: —Èbi tishaid ushë nec —qeshun matses dadpen aton shubun puduedmeshun pemepac caondash. Adnubien ambi inaidën champin Edodesën pemiaido baidaquin ismpac caondash. Adsho isumbic Edodesën: —Bédamboenshë mimbi naic —qeshun ⁷ naden chuipac caondash. —Tantia, champi. ¿Atotsi buneque? Mibi bunaidquio mibi menenu. “Nuquin Papan cuidnushe,” quiash muatiapimbo iquebique. En ëbi chui —capac caondash Edodesën. ⁸ Adoquien champin aton tita chuitampac caondash. Chuitanec choshon anin chiaid chuituidpac caondash. —Uan acten mentoanquidën mapi butetanquin pada-padaid dapan ananshun baded ëbi mene —capac caondash champin Edodes chuiquin. Uanën —Min bënë nianshun utsi bedmec mibi icsaic —cac champin tita Uan cuesunemetete bumpac caondash.

⁹ Adoquien Edodesën: —¿Atotsi quepequini ado? ¿Adoenquo ictiadtsimbi icpoba? —quequin ambi chuiboed niactiadquio icpac caondash. —Èbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

¹⁰ Adoac quënën tsadacnobi Uan mapi buteshun ¹¹ mapi pada-padaid ananshun buanshun champi menepac caondash yuabon. Adoquien champin ani menenun buampac caondash.

¹² Adnubien Uanbéd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

Comapenen tantiaquin 5000tedi pemiaid
(Mad 6.30-44; Duc 9.10-17; Uan 6.1-14)

¹³ Nidshumbic: —Mibi acten mentondaid mapi butiaccosh —catuidpondash. Adsho tantianec cano antabédtochon chian potiaash pudundoanec matses nibédacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dèquiadec podqued nidquidën nidanepac caondash.

¹⁴ Adnubien Esus matses nibédacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquio icquin daicsaidotedi bédamebampondash.

¹⁵ Ushè budambi Esusbéd icquidon: —Inchèsheque. Pete nibédacno nuqui tabadeque. Nidaneme, Icho. Shubu dadpen icquid utsi-utsiec yacno nidshun ma piucquid menequin ma pete bednu —caquien ¹⁶ Esusën: —Padi. Ma tabadnu. Mimbibi peme —capondashi.

¹⁷ Adoquini: —Ma panèmpi 5tedpactsèc icpayoc. Nuècquidèmpi daèdquioi ictsec —quepondac. ¹⁸ Adsho: —Aidtedtsèqui beccho —cac meniondambi.

¹⁹ Adoquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bédambo iquec, Papa —quetanquin panèmpi cuèsh-cuèshun abéd icquido menebanac aidontsen matses abitedi menebampondash. Adembidi nuècquidèmpi bushtebantsècshun menebampondash.

²⁰ Adoquien nua cubudcuededquin pebededpondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa 12tedi cubucubuctsècquio iquec pete cuèsh-cuèshaid napi uaid. ²¹ Aden matses dadpenquio pemebampondash. Aido dadatedi tambanac 5000tedi icpondash. Aton chido aton bacuèbòbèdta tambanambo iccondambi.

Acte bèntse Esus choaid
(Mad 6.45-52; Uan 6.16-21)

²² Adshumbic Esusën abéd icquido chuiquin: —Chian potec nidta —capondash. Adoac cano antabédtoanec potec nidnubi Esusën abi datsidadquidotsen: —Nidanec nid —cac nidanepac caondash. ²³ Adec nidanebon Nuquin Papa chinuuec macuèsh dectatoash abentsèqui Esus inchèshpac caondash.

²⁴ Adnubien chian dapa potequi abéd icquidotsen inchèshpondash. Chian nënantanquio yanubi cunquetuidpondash. Adnuc acte comapenec tèccuasquiampondash uncadenquio yec. Comapenec acte ishucdnuc cano mentoadtiadpambo icpondash.

²⁵ Adnubien badiade anoentsèqui acte bèntse Esus chopondash. ²⁶ Acte bèntse chosho isashini: —Podobitsi nec —quiash dacuèdtanec sidquecuededpondac. ²⁷ Adshobini Esusën: —Èbien neque. Dacuèdenda —capondash. ²⁸ Adoquien Petedon: —¿Con Icbombobida ne? Con Icho icquin: “Acte bèntse cho,” èbi ca —capondash.

²⁹ Adsho tantiaashun Esusën: —En cho —caquien Petedo canonoèsh budanec acte bèntse Esus bèquedbanec niduidtsèccondash. ³⁰ Esusuidi isec bédamboec niduidtsequi acte comapenec tèccuasquesho isash dacuèdtanec acte bèntse niduidtsècboedi mentoadtsempondash. —Èbi bed, Icho. Mentoadebique —caquien ³¹ Esusën badedquio bedtanquin indopondash. Aden indoequi: —“Con ichon èbi bédamboen nametsiash,” queboedi ¿atotsi quiaish dacuèdtano? Èbi bèdiactsèc tantiatsècquid mibi nec —quepondash Esus Petedo caic.

³² Adanec Petedobèdi cano antsadtonobien cunqueboedi cunquenquio yampondash. Actetsen tèccuasquenquio yanondash. ³³ Adsho isun cano antabédquidon: —Mibi bédamboshè iquec. Comapenen tantiaquidquio yec Nuquin Papan Madombo mibi nec —quequin Esus tantiabededpondash.

Quenesaded yacnoshon Esusën bédamiaid
(Mad 6.53-56)

³⁴ Adashic chian potiaash Quenesaded yacno pudundopondash. ³⁵ Pudundoshon isun anocquidon: —Esus chosh —quequin uanocquido abitedi chuibeniac daicsaido abitedi bè-bèpondash. ³⁶ Bè-bèshumbic: —Dashcuteuidtsèqui mishashi bédantsiash —queshun Esus chuituidquin: —Min dashcute cuèmano daicsaido mishme —cac mishmiaqui bédampondash abitedi.

15

*Padiseyobo icsaid Esusën chiaid**(Mad 7.1-13)*

¹ Adnubien padiseyobo Moisesën dada uampid chuibanquidobèdi shubu dadpen icquid Edusaden caid yacnuësh cho-choquin Esus istuidpondash. ² Istuidashic: —¿Atotsieshun mibèd icquidon nuquin tsusedpabon chiaid niac-niacposh? Penush mëpamèdenquo icquin nuquin tsusedpabon chiaid ma niac-niacpaboc —quepondash Esus chieshênquido.

³ Adsho tantiashun Esusën: —Ma mimbi. ¿Atotsieshun Nuquin Papan chiaidquo niac-niaque? Nuquin tsusedpabon chiacpadomboen naquin ma mimbi Nuquin Papan chiaidquo niac-niacpayoc. ⁴ Tantia. Mibi chuinu. “Titabèdta papa chieshênenquo icquin bédamboen tantiata,” quequin Nuquin Papan chiampidquo ma mimbi niacpaboc. Adembidi: “‘Con pa unèsashun,’ quec chieshêmênquid icsho unès uaquid. Adembidi ani icsamboen chuishunsho unès uaquid,” quequin Nuquin Papan chiampid utsi mimbi niacpec. ⁵ Aid niacquin nuquin tsusedpabon ambembi chiaidien mimbi chieq. “Anibèdta amè naden cudasênac bédambo ictsiash,” mibi quepec. “‘Nuquin Papa menetequid nêidit con piucquid iquec. Mitsana nibêdsho menetiadquidi mibi menenquo iquemb. Nuquin Papa menetequid nec,’ quequidên ⁶ cudasênac bédambo ictsiash,” mibi quepec. Aden nuquin matsesën chiaid naquin Nuquin Papan chiaidquo ma mimbi niac-niacpayoc. ⁷ “Nuquin Papa tantiacquidquo nebi,” quec muaquid mibi nec. Èdenquimboshê Nuquin Papan chuimiatic nuquin tsusedpa Isayas caidên mimbi icsamboen tantiate chuiquin dada uapampic naden.

⁸ “Isadaidbo: ‘Nuquin Papambo tantiembi,’ quepec.

Adboedèmbi èmbi chiaid niacquin èbi tantienquo iquec.

⁹ “Ma Nuquin Papan èbi bédamboen isnu,” queboedèmbi èbi bédamboen tantienquo iquec.

Èmbi chiaidquo namenquo icquin aton matsesën chiaiduidi namepec.”

quequin Isayasën Nuquin Papan chiaid dada uapampic —quequin Esusën abi chieshênquido chushcapondash.

*Ana shêcuènuësh choaid chiaid**(Mad 7.14-23)*

¹⁰ Adshumbic abi isec datsidadquido ompoachimboen chuipondash. —Tantia. Mibitedi chuinu. ¹¹ Ana shêcuèn puduedaidên matses icsaten mimbi dampec. ¿Adquidênda matses icsapeq? Padenquo. Ana shêcuènuësh choaidèmbien matses icsatsiash —quequin Esusën chuipondash. ¹² Adnubien abèd icquidon: —Mimbi aden chuiboed tantiashun padiseyobon mibi chieshênosh, Icho —caquien; ¹³ —Dacuèdenda. Icsa bescatanquin tsindoshon nêdêncacimboen ambi tantiamiabi yaido ambembi chuiquido Nuquin Papan cuideque. ¹⁴ Dacuèdenda. Padiseyobo bëshuaidbimboec icquido neque. Bëshuaidên aton matses bëshuaid utsi bédamboen buantiapimbo iquec. Buanuec abi shêcuè ampaèdtsiash. Adembidi Nuquin Papan chiaidpenquo namequin aton matses bédamboen tantiametiapimbo iquec —quepondash Esus abèd icquido chieq.

¹⁵ Adshobien Petedon: —Mimbi ana shêcuènuësh choaid quequin chuiboed tantiambo iccombique. Aid seabèdenquo chui. Tantianu, Icho —caquien: ¹⁶ —¿Tantiamboda icco? ¹⁷ Chuinu. Tantia. Ana shêcuèn puduedaid mimbi peboed min pucun uedoash chimute shêcuènuësh choec. Adquidên Nuquin Papan chiaid niacmenquo iquec. ¹⁸ Matses onquaidimbi ana shêcuènuësh choaid caoc. Abibi uquèducuësh onquec: “Adoembi,” quequin otacquo tantiaquin naic matses icsatsiash. ¹⁹ Icsambo icquido yec: “‘Ai, adoembi,’” quequin otacquo tantiashun Nuquin Papan chiaid niactsiash nadquidên. Nêidic unès uanquid. Nêidic aton chidopenquo chudquid. Nêidic aton bènèpenquo chudmequid. Nêidic aben uequid. Nêidic ampequid. Nêidic muaquid. Nêidic icsamboec chuishumênquid. ²⁰ Adquidtedi: “‘Ai, adote bunebi,’” quequin otacquo tantiash icsaquid nec. Padnuen penush mëpamèdenquo icquin Nuquin Papan chiaid niaquenquo ictsiash —quepondash Esus abèd icquido chieq.

*Isadaidpembo chidon Esus tantiaid**(Mad 7.24-30)*

²¹ Adanec auëshquiobi Esus nidpondash. Shubu dadpen icquid Tido caid anoentsèqui datambidanec choec shubu dadpen icquid utsi Sidon caid anoentsèqui chopondash.

²² Adnubien anocquid cananeyabo chidon Esus cuèntuidpondash. —Tsusedpa Dabidên tsyuecquid Nuquin Papan namiaid icquin èbi bédamboen ista. Con champi podobitsi icsa dapuduedaid yec natiambo iqueque. Con champi bédameta —caquien ²³ Esusën ècbedenquo icpondash. Ècbedenquo yaqui chidon tsibanbanquin cuènbampondash. Adsho tantiashun Esusbèd icquidon: —Chieshanquieq cuèdpeque. Cuemepa —caquien ²⁴ Esusën cuemenquo

icquimbi aid chuiquin: —Nuquin Papan chiacpaden Isadaidbo matsesba Nuquin Papa bédamboen ismete tantiamenuc nebi. Bēnudac bimboec icquin Nuquin Papa tantienquo icsho aidoba tantiamenuc nebi —quepondash Esus.

²⁵ Adsho tantiash nidenquo yec chido cuēdboed Esus ismequin danēshēn sebudtsec: —Ēbi nashunta, Icho. Con champi bēdameta —queshobien Esusēn; ²⁶ —¿Aton bacuēbo pemequin icquimbi aton opa pemiacta bēdambo icpatsiash? Padenquo. Adembidi Nuquin Papan con matses caidotedi tantamiabi utsibo ěmbi nashunac icsambo ictsiash. Isadaidboba tantiamenuc nebi —quepondash Esus.

²⁷ Adsho tantiashun chidon: —Ai, abimbo mimbi caic. Padnuen bacuēbon pequin paēdmiaid opashēmpin petsēcquid. Adembidi mimbi comapenen tantiaquin nabanaquin isadaidbo dadpen bēdanubi isadaidpemo abentsēc tantiaquid icsho ěbi nashunquin con champi bēdameta ²⁸ —caquien Esusēn: —Ai. Ēbi tantiaquidquo mibi nec. Mimbi chiacpade min champi bēdanendac —quesho tantianec aton shubuno nidshun isquien aton champi bēdanac Esusēn chuinubi.

Daicsaido dadpen Esusēn bēdamiaid

²⁹ Adanec auēshquiobi nidec chian dapa Cadidia caid cuēman nidquid podquedēn nidanepondash. Adashic macuēsh dapa dectatoec poctsebi tabadtuidpondash.

³⁰ Tabadtuidsho isun matses dadpenquo cho-choquin daicsaido dadpen Esus ismenuen bē-bēpondash. Tidinequido yec bēshuaido yec shēquēquenquo icquido yec onquesabo yec daicsaido utsibotedi yec quenuc bē-bēpondash. Adsho Esusēn bēdamebampondash. ³¹ Bēdamiaic onquenquo ichoedi onquianondash. Bēshuacboedēmbi isbenondash. Capuenquo ichoedi capucuenondash. Daicsaido utsibo adecbidi bēdanondash. Adsho isquido nadpondash. —¿Adquidta ictenec? Nuquin matses isadaidbon tantiaidēn Nuquin Papan namiaid icquin bēdamepash icnui. Nuquin Papa bēdambo iquec —quepondash Esusēn bēdamiaid tantiash.

Matses 4000tedi pemiaid

(Mad 8.1-10)

³² Adec tabadsho isashien Esus: —Nēido tantiac unēsquo iquec. Ēmbi nabansho isnuec choash 3tedec ushquin piac ambi bēboed pete naimēdaccosh. Ēmbi: “Nid,” cac nidnuequi bunambi padishtsiash. Pemiabi nidmetiapimbo iquebi —quepondash. ³³ Adsho tantiashun abēd icquidon: —¿Midambo pete bedtiapimbo iquec? Pemetiapimbo matses dadpen iquec —capondash.

³⁴ Adoaquien Esusēn: —¿Tedsit panēmpi iquec? —cac: —Sieteted ictsec. Nuēcquidēmpi daēdpactsēc ictsec —quesho ³⁵ tantiashumbien abi datsidadquido chuiquin: —Nēmbo tabadbud —capondash. Adoa tabadbudpondash abitedi.

³⁶ Adshumbic panēmpibēda nuēcquidēmpi bedshun Nuquin Papa chuipondash. —Nēid mimbi uaid bēdambo iquec, Papa —queshun pete cuēsh-cuēshbantsēcshun abēd icquido menebampondash: —Pemeban —quequin. Adoa abitedimbo pemebampondash. ³⁷ Aden pemiact abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsēcquo icnuc sandobampondambi. ³⁸ Esusēn pemiaido dadpenquo icpondash. Tambanac 4000tedi dada icpondash. Chido bacuēbōbēda tambanambo iccondambi. ³⁹ Adashic: —Nidanec nid —quepondash Esus ambi pemeboedo caic. Aido nidanenubi chian budash cano antabēdtoshon Esusēn chian potepondash. Chian potiash nidaid Mactada caid yacno pudundopondash.

16

Saduseyobon: Ēbi isme, quiaid

(Mad 8.11-13; Duc 12.54-56)

¹ Pudundoanec nidshobi anocquidon abi chieshēnquidon Esus chuituidpondash. —“Nuquin Papan chomiaid nebi,” quequin comapenen tantiaquin nabanquin ěbi isme —cabededpondash padiseyobobēdtan saduseyobon.

² Adshobien Esusēn: —Nuquin matsesēn chiaid mimbi tantiec. “Inchēshbudtsēqui abu piumbo icsho isash: ‘Tanunquo badiadec,’ quequid. ³ Badiadnubi abu inchēshpambo icsho isash: ‘Ue dapa choec,’ quequid,” quequin nuquin matsesēn chiaid mimbi tantiec. Aden chiaid tantiacimboen bēdamboen tantiatiaquid Nuquin Papan nēbimbobi naid mimbi tantienquo iquec. ⁴ Icsambo icquid icquimbi mimbi: “Ēbi isme,” cadednepec. Nēbi mibi ismenquo iquembi. Nuquin Papan nuquin tsusedpa Onas chishcambiecquid dapan chebudacsho daēdec ushun ucbudmiac bimboec unēs uacsho chococac daēdec ushsh uincuenendabi. Aden ěbi tantiesabo ismendambi —quianec nidpondash Esus.

Padiseyobon chiaid tantienda, quiaid
(Mad 8.14-21)

⁵ Adanec nidec chian budash cano antabëdtoshon chian poteoapondash. Chian potequien Esusbëd icquido: –Pete nianchitombi. Bëtiadquidi nepobi –quepondash. ⁶ Adshobien Esusën abëd icquido chuiquin: –Padiseyobëdtan saduseyobon naid pan bidiscametebimboecquid iqueque. Ista –caquien ⁷ tantienuo yec abëd icquido naded onquecuededpondash. –Nuqui niamboed pete chiequi nepanui –quepondash. ⁸ Adsho ambembi tantiash Esus: –Ëbi bëdiactsec tantiatsëcquid mibi nec. ⁹ ¹⁰ ¹¹ ¹² ¹³ ¹⁴ ¹⁵ ¹⁶ ¹⁷ ¹⁸ ¹⁹ ²⁰ ²¹ ²² ²³ ²⁴ ²⁵ ²⁶ ²⁷ ²⁸ ²⁹ ³⁰ ³¹ ³² ³³ ³⁴ ³⁵ ³⁶ ³⁷ ³⁸ ³⁹ ⁴⁰ ⁴¹ ⁴² ⁴³ ⁴⁴ ⁴⁵ ⁴⁶ ⁴⁷ ⁴⁸ ⁴⁹ ⁵⁰ ⁵¹ ⁵² ⁵³ ⁵⁴ ⁵⁵ ⁵⁶ ⁵⁷ ⁵⁸ ⁵⁹ ⁶⁰ ⁶¹ ⁶² ⁶³ ⁶⁴ ⁶⁵ ⁶⁶ ⁶⁷ ⁶⁸ ⁶⁹ ⁷⁰ ⁷¹ ⁷² ⁷³ ⁷⁴ ⁷⁵ ⁷⁶ ⁷⁷ ⁷⁸ ⁷⁹ ⁸⁰ ⁸¹ ⁸² ⁸³ ⁸⁴ ⁸⁵ ⁸⁶ ⁸⁷ ⁸⁸ ⁸⁹ ⁹⁰ ⁹¹ ⁹² ⁹³ ⁹⁴ ⁹⁵ ⁹⁶ ⁹⁷ ⁹⁸ ⁹⁹ ¹⁰⁰ ¹⁰¹ ¹⁰² ¹⁰³ ¹⁰⁴ ¹⁰⁵ ¹⁰⁶ ¹⁰⁷ ¹⁰⁸ ¹⁰⁹ ¹¹⁰ ¹¹¹ ¹¹² ¹¹³ ¹¹⁴ ¹¹⁵ ¹¹⁶ ¹¹⁷ ¹¹⁸ ¹¹⁹ ¹²⁰ ¹²¹ ¹²² ¹²³ ¹²⁴ ¹²⁵ ¹²⁶ ¹²⁷ ¹²⁸ ¹²⁹ ¹³⁰ ¹³¹ ¹³² ¹³³ ¹³⁴ ¹³⁵ ¹³⁶ ¹³⁷ ¹³⁸ ¹³⁹ ¹⁴⁰ ¹⁴¹ ¹⁴² ¹⁴³ ¹⁴⁴ ¹⁴⁵ ¹⁴⁶ ¹⁴⁷ ¹⁴⁸ ¹⁴⁹ ¹⁵⁰ ¹⁵¹ ¹⁵² ¹⁵³ ¹⁵⁴ ¹⁵⁵ ¹⁵⁶ ¹⁵⁷ ¹⁵⁸ ¹⁵⁹ ¹⁶⁰ ¹⁶¹ ¹⁶² ¹⁶³ ¹⁶⁴ ¹⁶⁵ ¹⁶⁶ ¹⁶⁷ ¹⁶⁸ ¹⁶⁹ ¹⁷⁰ ¹⁷¹ ¹⁷² ¹⁷³ ¹⁷⁴ ¹⁷⁵ ¹⁷⁶ ¹⁷⁷ ¹⁷⁸ ¹⁷⁹ ¹⁸⁰ ¹⁸¹ ¹⁸² ¹⁸³ ¹⁸⁴ ¹⁸⁵ ¹⁸⁶ ¹⁸⁷ ¹⁸⁸ ¹⁸⁹ ¹⁹⁰ ¹⁹¹ ¹⁹² ¹⁹³ ¹⁹⁴ ¹⁹⁵ ¹⁹⁶ ¹⁹⁷ ¹⁹⁸ ¹⁹⁹ ²⁰⁰ ²⁰¹ ²⁰² ²⁰³ ²⁰⁴ ²⁰⁵ ²⁰⁶ ²⁰⁷ ²⁰⁸ ²⁰⁹ ²¹⁰ ²¹¹ ²¹² ²¹³ ²¹⁴ ²¹⁵ ²¹⁶ ²¹⁷ ²¹⁸ ²¹⁹ ²²⁰ ²²¹ ²²² ²²³ ²²⁴ ²²⁵ ²²⁶ ²²⁷ ²²⁸ ²²⁹ ²³⁰ ²³¹ ²³² ²³³ ²³⁴ ²³⁵ ²³⁶ ²³⁷ ²³⁸ ²³⁹ ²⁴⁰ ²⁴¹ ²⁴² ²⁴³ ²⁴⁴ ²⁴⁵ ²⁴⁶ ²⁴⁷ ²⁴⁸ ²⁴⁹ ²⁵⁰ ²⁵¹ ²⁵² ²⁵³ ²⁵⁴ ²⁵⁵ ²⁵⁶ ²⁵⁷ ²⁵⁸ ²⁵⁹ ²⁶⁰ ²⁶¹ ²⁶² ²⁶³ ²⁶⁴ ²⁶⁵ ²⁶⁶ ²⁶⁷ ²⁶⁸ ²⁶⁹ ²⁷⁰ ²⁷¹ ²⁷² ²⁷³ ²⁷⁴ ²⁷⁵ ²⁷⁶ ²⁷⁷ ²⁷⁸ ²⁷⁹ ²⁸⁰ ²⁸¹ ²⁸² ²⁸³ ²⁸⁴ ²⁸⁵ ²⁸⁶ ²⁸⁷ ²⁸⁸ ²⁸⁹ ²⁹⁰ ²⁹¹ ²⁹² ²⁹³ ²⁹⁴ ²⁹⁵ ²⁹⁶ ²⁹⁷ ²⁹⁸ ²⁹⁹ ³⁰⁰ ³⁰¹ ³⁰² ³⁰³ ³⁰⁴ ³⁰⁵ ³⁰⁶ ³⁰⁷ ³⁰⁸ ³⁰⁹ ³¹⁰ ³¹¹ ³¹² ³¹³ ³¹⁴ ³¹⁵ ³¹⁶ ³¹⁷ ³¹⁸ ³¹⁹ ³²⁰ ³²¹ ³²² ³²³ ³²⁴ ³²⁵ ³²⁶ ³²⁷ ³²⁸ ³²⁹ ³³⁰ ³³¹ ³³² ³³³ ³³⁴ ³³⁵ ³³⁶ ³³⁷ ³³⁸ ³³⁹ ³⁴⁰ ³⁴¹ ³⁴² ³⁴³ ³⁴⁴ ³⁴⁵ ³⁴⁶ ³⁴⁷ ³⁴⁸ ³⁴⁹ ³⁵⁰ ³⁵¹ ³⁵² ³⁵³ ³⁵⁴ ³⁵⁵ ³⁵⁶ ³⁵⁷ ³⁵⁸ ³⁵⁹ ³⁶⁰ ³⁶¹ ³⁶² ³⁶³ ³⁶⁴ ³⁶⁵ ³⁶⁶ ³⁶⁷ ³⁶⁸ ³⁶⁹ ³⁷⁰ ³⁷¹ ³⁷² ³⁷³ ³⁷⁴ ³⁷⁵ ³⁷⁶ ³⁷⁷ ³⁷⁸ ³⁷⁹ ³⁸⁰ ³⁸¹ ³⁸² ³⁸³ ³⁸⁴ ³⁸⁵ ³⁸⁶ ³⁸⁷ ³⁸⁸ ³⁸⁹ ³⁹⁰ ³⁹¹ ³⁹² ³⁹³ ³⁹⁴ ³⁹⁵ ³⁹⁶ ³⁹⁷ ³⁹⁸ ³⁹⁹ ⁴⁰⁰ ⁴⁰¹ ⁴⁰² ⁴⁰³ ⁴⁰⁴ ⁴⁰⁵ ⁴⁰⁶ ⁴⁰⁷ ⁴⁰⁸ ⁴⁰⁹ ⁴¹⁰ ⁴¹¹ ⁴¹² ⁴¹³ ⁴¹⁴ ⁴¹⁵ ⁴¹⁶ ⁴¹⁷ ⁴¹⁸ ⁴¹⁹ ⁴²⁰ ⁴²¹ ⁴²² ⁴²³ ⁴²⁴ ⁴²⁵ ⁴²⁶ ⁴²⁷ ⁴²⁸ ⁴²⁹ ⁴³⁰ ⁴³¹ ⁴³² ⁴³³ ⁴³⁴ ⁴³⁵ ⁴³⁶ ⁴³⁷ ⁴³⁸ ⁴³⁹ ⁴⁴⁰ ⁴⁴¹ ⁴⁴² ⁴⁴³ ⁴⁴⁴ ⁴⁴⁵ ⁴⁴⁶ ⁴⁴⁷ ⁴⁴⁸ ⁴⁴⁹ ⁴⁵⁰ ⁴⁵¹ ⁴⁵² ⁴⁵³ ⁴⁵⁴ ⁴⁵⁵ ⁴⁵⁶ ⁴⁵⁷ ⁴⁵⁸ ⁴⁵⁹ ⁴⁶⁰ ⁴⁶¹ ⁴⁶² ⁴⁶³ ⁴⁶⁴ ⁴⁶⁵ ⁴⁶⁶ ⁴⁶⁷ ⁴⁶⁸ ⁴⁶⁹ ⁴⁷⁰ ⁴⁷¹ ⁴⁷² ⁴⁷³ ⁴⁷⁴ ⁴⁷⁵ ⁴⁷⁶ ⁴⁷⁷ ⁴⁷⁸ ⁴⁷⁹ ⁴⁸⁰ ⁴⁸¹ ⁴⁸² ⁴⁸³ ⁴⁸⁴ ⁴⁸⁵ ⁴⁸⁶ ⁴⁸⁷ ⁴⁸⁸ ⁴⁸⁹ ⁴⁹⁰ ⁴⁹¹ ⁴⁹² ⁴⁹³ ⁴⁹⁴ ⁴⁹⁵ ⁴⁹⁶ ⁴⁹⁷ ⁴⁹⁸ ⁴⁹⁹ ⁵⁰⁰ ⁵⁰¹ ⁵⁰² ⁵⁰³ ⁵⁰⁴ ⁵⁰⁵ ⁵⁰⁶ ⁵⁰⁷ ⁵⁰⁸ ⁵⁰⁹ ⁵¹⁰ ⁵¹¹ ⁵¹² ⁵¹³ ⁵¹⁴ ⁵¹⁵ ⁵¹⁶ ⁵¹⁷ ⁵¹⁸ ⁵¹⁹ ⁵²⁰ ⁵²¹ ⁵²² ⁵²³ ⁵²⁴ ⁵²⁵ ⁵²⁶ ⁵²⁷ ⁵²⁸ ⁵²⁹ ⁵³⁰ ⁵³¹ ⁵³² ⁵³³ ⁵³⁴ ⁵³⁵ ⁵³⁶ ⁵³⁷ ⁵³⁸ ⁵³⁹ ⁵⁴⁰ ⁵⁴¹ ⁵⁴² ⁵⁴³ ⁵⁴⁴ ⁵⁴⁵ ⁵⁴⁶ ⁵⁴⁷ ⁵⁴⁸ ⁵⁴⁹ ⁵⁵⁰ ⁵⁵¹ ⁵⁵² ⁵⁵³ ⁵⁵⁴ ⁵⁵⁵ ⁵⁵⁶ ⁵⁵⁷ ⁵⁵⁸ ⁵⁵⁹ ⁵⁶⁰ ⁵⁶¹ ⁵⁶² ⁵⁶³ ⁵⁶⁴ ⁵⁶⁵ ⁵⁶⁶ ⁵⁶⁷ ⁵⁶⁸ ⁵⁶⁹ ⁵⁷⁰ ⁵⁷¹ ⁵⁷² ⁵⁷³ ⁵⁷⁴ ⁵⁷⁵ ⁵⁷⁶ ⁵⁷⁷ ⁵⁷⁸ ⁵⁷⁹ ⁵⁸⁰ ⁵⁸¹ ⁵⁸² ⁵⁸³ ⁵⁸⁴ ⁵⁸⁵ ⁵⁸⁶ ⁵⁸⁷ ⁵⁸⁸ ⁵⁸⁹ ⁵⁹⁰ ⁵⁹¹ ⁵⁹² ⁵⁹³ ⁵⁹⁴ ⁵⁹⁵ ⁵⁹⁶ ⁵⁹⁷ ⁵⁹⁸ ⁵⁹⁹ ⁶⁰⁰ ⁶⁰¹ ⁶⁰² ⁶⁰³ ⁶⁰⁴ ⁶⁰⁵ ⁶⁰⁶ ⁶⁰⁷ ⁶⁰⁸ ⁶⁰⁹ ⁶¹⁰ ⁶¹¹ ⁶¹² ⁶¹³ ⁶¹⁴ ⁶¹⁵ ⁶¹⁶ ⁶¹⁷ ⁶¹⁸ ⁶¹⁹ ⁶²⁰ ⁶²¹ ⁶²² ⁶²³ ⁶²⁴ ⁶²⁵ ⁶²⁶ ⁶²⁷ ⁶²⁸ ⁶²⁹ ⁶³⁰ ⁶³¹ ⁶³² ⁶³³ ⁶³⁴ ⁶³⁵ ⁶³⁶ ⁶³⁷ ⁶³⁸ ⁶³⁹ ⁶⁴⁰ ⁶⁴¹ ⁶⁴² ⁶⁴³ ⁶⁴⁴ ⁶⁴⁵ ⁶⁴⁶ ⁶⁴⁷ ⁶⁴⁸ ⁶⁴⁹ ⁶⁵⁰ ⁶⁵¹ ⁶⁵² ⁶⁵³ ⁶⁵⁴ ⁶⁵⁵ ⁶⁵⁶ ⁶⁵⁷ ⁶⁵⁸ ⁶⁵⁹ ⁶⁶⁰ ⁶⁶¹ ⁶⁶² ⁶⁶³ ⁶⁶⁴ ⁶⁶⁵ ⁶⁶⁶ ⁶⁶⁷ ⁶⁶⁸ ⁶⁶⁹ ⁶⁷⁰ ⁶⁷¹ ⁶⁷² ⁶⁷³ ⁶⁷⁴ ⁶⁷⁵ ⁶⁷⁶ ⁶⁷⁷ ⁶⁷⁸ ⁶⁷⁹ ⁶⁸⁰ ⁶⁸¹ ⁶⁸² ⁶⁸³ ⁶⁸⁴ ⁶⁸⁵ ⁶⁸⁶ ⁶⁸⁷ ⁶⁸⁸ ⁶⁸⁹ ⁶⁹⁰ ⁶⁹¹ ⁶⁹² ⁶⁹³ ⁶⁹⁴ ⁶⁹⁵ ⁶⁹⁶ ⁶⁹⁷ ⁶⁹⁸ ⁶⁹⁹ ⁷⁰⁰ ⁷⁰¹ ⁷⁰² ⁷⁰³ ⁷⁰⁴ ⁷⁰⁵ ⁷⁰⁶ ⁷⁰⁷ ⁷⁰⁸ ⁷⁰⁹ ⁷¹⁰ ⁷¹¹ ⁷¹² ⁷¹³ ⁷¹⁴ ⁷¹⁵ ⁷¹⁶ ⁷¹⁷ ⁷¹⁸ ⁷¹⁹ ⁷²⁰ ⁷²¹ ⁷²² ⁷²³ ⁷²⁴ ⁷²⁵ ⁷²⁶ ⁷²⁷ ⁷²⁸ ⁷²⁹ ⁷³⁰ ⁷³¹ ⁷³² ⁷³³ ⁷³⁴ ⁷³⁵ ⁷³⁶ ⁷³⁷ ⁷³⁸ ⁷³⁹ ⁷⁴⁰ ⁷⁴¹ ⁷⁴² ⁷⁴³ ⁷⁴⁴ ⁷⁴⁵ ⁷⁴⁶ ⁷⁴⁷ ⁷⁴⁸ ⁷⁴⁹ ⁷⁵⁰ ⁷⁵¹ ⁷⁵² ⁷⁵³ ⁷⁵⁴ ⁷⁵⁵ ⁷⁵⁶ ⁷⁵⁷ ⁷⁵⁸ ⁷⁵⁹ ⁷⁶⁰ ⁷⁶¹ ⁷⁶² ⁷⁶³ ⁷⁶⁴ ⁷⁶⁵ ⁷⁶⁶ ⁷⁶⁷ ⁷⁶⁸ ⁷⁶⁹ ⁷⁷⁰ ⁷⁷¹ ⁷⁷² ⁷⁷³ ⁷⁷⁴ ⁷⁷⁵ ⁷⁷⁶ ⁷⁷⁷ ⁷⁷⁸ ⁷⁷⁹ ⁷⁸⁰ ⁷⁸¹ ⁷⁸² ⁷⁸³ ⁷⁸⁴ ⁷⁸⁵ ⁷⁸⁶ ⁷⁸⁷ ⁷⁸⁸ ⁷⁸⁹ ⁷⁹⁰ ⁷⁹¹ ⁷⁹² ⁷⁹³ ⁷⁹⁴ ⁷⁹⁵ ⁷⁹⁶ ⁷⁹⁷ ⁷⁹⁸ ⁷⁹⁹ ⁸⁰⁰ ⁸⁰¹ ⁸⁰² ⁸⁰³ ⁸⁰⁴ ⁸⁰⁵ ⁸⁰⁶ ⁸⁰⁷ ⁸⁰⁸ ⁸⁰⁹ ⁸¹⁰ ⁸¹¹ ⁸¹² ⁸¹³ ⁸¹⁴ ⁸¹⁵ ⁸¹⁶ ⁸¹⁷ ⁸¹⁸ ⁸¹⁹ ⁸²⁰ ⁸²¹ ⁸²² ⁸²³ ⁸²⁴ ⁸²⁵ ⁸²⁶ ⁸²⁷ ⁸²⁸ ⁸²⁹ ⁸³⁰ ⁸³¹ ⁸³² ⁸³³ ⁸³⁴ ⁸³⁵ ⁸³⁶ ⁸³⁷ ⁸³⁸ ⁸³⁹ ⁸⁴⁰ ⁸⁴¹ ⁸⁴² ⁸⁴³ ⁸⁴⁴ ⁸⁴⁵ ⁸⁴⁶ ⁸⁴⁷ ⁸⁴⁸ ⁸⁴⁹ ⁸⁵⁰ ⁸⁵¹ ⁸⁵² ⁸⁵³ ⁸⁵⁴ ⁸⁵⁵ ⁸⁵⁶ ⁸⁵⁷ ⁸⁵⁸ ⁸⁵⁹ ⁸⁶⁰ ⁸⁶¹ ⁸⁶² ⁸⁶³ ⁸⁶⁴ ⁸⁶⁵ ⁸⁶⁶ ⁸⁶⁷ ⁸⁶⁸ ⁸⁶⁹ ⁸⁷⁰ ⁸⁷¹ ⁸⁷² ⁸⁷³ ⁸⁷⁴ ⁸⁷⁵ ⁸⁷⁶ ⁸⁷⁷ ⁸⁷⁸ ⁸⁷⁹ ⁸⁸⁰ ⁸⁸¹ ⁸⁸² ⁸⁸³ ⁸⁸⁴ ⁸⁸⁵ ⁸⁸⁶ ⁸⁸⁷ ⁸⁸⁸ ⁸⁸⁹ ⁸⁹⁰ ⁸⁹¹ ⁸⁹² ⁸⁹³ ⁸⁹⁴ ⁸⁹⁵ ⁸⁹⁶ ⁸⁹⁷ ⁸⁹⁸ ⁸⁹⁹ ⁹⁰⁰ ⁹⁰¹ ⁹⁰² ⁹⁰³ ⁹⁰⁴ ⁹⁰⁵ ⁹⁰⁶ ⁹⁰⁷ ⁹⁰⁸ ⁹⁰⁹ ⁹¹⁰ ⁹¹¹ ⁹¹² ⁹¹³ ⁹¹⁴ ⁹¹⁵ ⁹¹⁶ ⁹¹⁷ ⁹¹⁸ ⁹¹⁹ ⁹²⁰ ⁹²¹ ⁹²² ⁹²³ ⁹²⁴ ⁹²⁵ ⁹²⁶ ⁹²⁷ ⁹²⁸ ⁹²⁹ ⁹³⁰ ⁹³¹ ⁹³² ⁹³³ ⁹³⁴ ⁹³⁵ ⁹³⁶ ⁹³⁷ ⁹³⁸ ⁹³⁹ ⁹⁴⁰ ⁹⁴¹ ⁹⁴² ⁹⁴³ ⁹⁴⁴ ⁹⁴⁵ ⁹⁴⁶ ⁹⁴⁷ ⁹⁴⁸ ⁹⁴⁹ ⁹⁵⁰ ⁹⁵¹ ⁹⁵² ⁹⁵³ ⁹⁵⁴ ⁹⁵⁵ ⁹⁵⁶ ⁹⁵⁷ ⁹⁵⁸ ⁹⁵⁹ ⁹⁶⁰ ⁹⁶¹ ⁹⁶² ⁹⁶³ ⁹⁶⁴ ⁹⁶⁵ ⁹⁶⁶ ⁹⁶⁷ ⁹⁶⁸ ⁹⁶⁹ ⁹⁷⁰ ⁹⁷¹ ⁹⁷² ⁹⁷³ ⁹⁷⁴ ⁹⁷⁵ ⁹⁷⁶ ⁹⁷⁷ ⁹⁷⁸ ⁹⁷⁹ ⁹⁸⁰ ⁹⁸¹ ⁹⁸² ⁹⁸³ ⁹⁸⁴ ⁹⁸⁵ ⁹⁸⁶ ⁹⁸⁷ ⁹⁸⁸ ⁹⁸⁹ ⁹⁹⁰ ⁹⁹¹ ⁹⁹² ⁹⁹³ ⁹⁹⁴ ⁹⁹⁵ ⁹⁹⁶ ⁹⁹⁷ ⁹⁹⁸ ⁹⁹⁹ ¹⁰⁰⁰ ¹⁰⁰¹ ¹⁰⁰² ¹⁰⁰³ ¹⁰⁰⁴ ¹⁰⁰⁵ ¹⁰⁰⁶ ¹⁰⁰⁷ ¹⁰⁰⁸ ¹⁰⁰⁹ ¹⁰¹⁰ ¹⁰¹¹ ¹⁰¹² ¹⁰¹³ ¹⁰¹⁴ ¹⁰¹⁵ ¹⁰¹⁶ ¹⁰¹⁷ ¹⁰¹⁸ ¹⁰¹⁹ ¹⁰²⁰ ¹⁰²¹ ¹⁰²² ¹⁰²³ ¹⁰²⁴ ¹⁰²⁵ ¹⁰²⁶ ¹⁰²⁷ ¹⁰²⁸ ¹⁰²⁹ ¹⁰³⁰ ¹⁰³¹ ¹⁰³² ¹⁰³³ ¹⁰³⁴ ¹⁰³⁵ ¹⁰³⁶ ¹⁰³⁷ ¹⁰³⁸ ¹⁰³⁹ ¹⁰⁴⁰ ¹⁰⁴¹ ¹⁰⁴² ¹⁰⁴³ ¹⁰⁴⁴ ¹⁰⁴⁵ ¹⁰⁴⁶ ¹⁰⁴⁷ ¹⁰⁴⁸ ¹⁰⁴⁹ ¹⁰⁵⁰ ¹⁰⁵¹ ¹⁰⁵² ¹⁰⁵³ ¹⁰⁵⁴ ¹⁰⁵⁵ ¹⁰⁵⁶ ¹⁰⁵⁷ ¹⁰⁵⁸ ¹⁰⁵⁹ ¹⁰⁶⁰ ¹⁰⁶¹ ¹⁰⁶² ¹⁰⁶³ ¹⁰⁶⁴ ¹⁰⁶⁵ ¹⁰⁶⁶ ¹⁰⁶⁷ ¹⁰⁶⁸ ¹⁰⁶⁹ ¹⁰⁷⁰ ¹⁰⁷¹ ¹⁰⁷² ¹⁰⁷³ ¹⁰⁷⁴ ¹⁰⁷⁵ ¹⁰⁷⁶ ¹⁰⁷⁷ ¹⁰⁷⁸ ¹⁰⁷⁹ ¹⁰⁸⁰ ¹⁰⁸¹ ¹⁰⁸² ¹⁰⁸³ ¹⁰⁸⁴ ¹⁰⁸⁵ ¹⁰⁸⁶ ¹⁰⁸⁷ ¹⁰⁸⁸ ¹⁰⁸⁹ ¹⁰⁹⁰ ¹⁰⁹¹ ¹⁰⁹² ¹⁰⁹³ ¹⁰⁹⁴ ¹⁰⁹⁵ ¹⁰⁹⁶ ¹⁰⁹⁷ ¹⁰⁹⁸ ¹⁰⁹⁹ ¹¹⁰⁰ ¹¹⁰¹ ¹¹⁰² ¹¹⁰³ ¹¹⁰⁴ ¹¹⁰⁵ ¹¹⁰⁶ ¹¹⁰⁷ ¹¹⁰⁸ ¹¹⁰⁹ ¹¹¹⁰ ¹¹¹¹ ¹¹¹² ¹¹¹³ ¹¹¹⁴ ¹¹¹⁵ ¹¹¹⁶ ¹¹¹⁷ ¹¹¹⁸ ¹¹¹⁹ ¹¹²⁰ ¹¹²¹ ¹¹²² ¹¹²³ ¹¹²⁴ ¹¹²⁵ ¹¹²⁶ ¹¹²⁷ ¹¹²⁸ ¹¹²⁹ ¹¹³⁰ ¹¹³¹ ¹¹³² ¹¹³³ ¹¹³⁴ ¹¹³⁵ ¹¹³⁶ ¹¹³⁷ ¹¹³⁸ ¹¹³⁹ ¹¹⁴⁰ ¹¹⁴¹ ¹¹⁴² ¹¹⁴³ ¹¹⁴⁴ ¹¹⁴⁵ ¹¹⁴⁶ ¹¹⁴⁷ ¹¹⁴⁸ ¹¹⁴⁹ ¹¹⁵⁰ ¹¹⁵¹ ¹¹⁵² ¹¹⁵³ ¹¹⁵⁴ ¹¹⁵⁵ ¹¹⁵⁶ ¹¹⁵⁷ ¹¹⁵⁸ ¹¹⁵⁹ ¹¹⁶⁰ ¹¹⁶¹ ¹¹⁶² ¹¹⁶³ ¹¹⁶⁴ ¹¹⁶⁵ ¹¹⁶⁶ ¹¹⁶⁷ ¹¹⁶⁸ ¹¹⁶⁹ ¹¹⁷⁰ ¹¹⁷¹ ¹¹⁷² ¹¹⁷³ ¹¹⁷⁴ ¹¹⁷⁵ ¹¹⁷⁶ ¹¹⁷⁷ ¹¹⁷⁸ ¹¹⁷⁹ ¹¹⁸⁰ ¹¹⁸¹ ¹¹⁸² ¹¹⁸³ ¹¹⁸⁴ ¹¹⁸⁵ ¹¹⁸⁶ ¹¹⁸⁷ ¹¹⁸⁸ ¹¹⁸⁹ ¹¹⁹⁰ ¹¹⁹¹ ¹¹⁹² ¹¹⁹³ ¹¹⁹⁴ ¹¹⁹⁵ ¹¹⁹⁶ ¹¹⁹⁷ ¹¹⁹⁸ ¹¹⁹⁹ ¹²⁰⁰ ¹²⁰¹ ¹²⁰² ¹²⁰³ ¹²⁰⁴ ¹²⁰⁵ ¹²⁰⁶ ¹²⁰⁷ ¹²⁰⁸ ¹²⁰⁹ ¹²¹⁰ ¹²¹¹ ¹²¹² ¹²¹³ ¹²¹⁴ ¹²¹⁵ ¹²¹⁶ ¹²¹⁷ ¹²¹⁸ ¹²¹⁹ ¹²²⁰ ¹²²¹ ¹²²² ¹²²³ ¹²²⁴ ¹²²⁵ ¹²²⁶ ¹²²⁷ ¹²²⁸ ¹²²⁹ ¹²³⁰ ¹²³¹ ¹²³² ¹²³³ ¹²³⁴ ¹²³⁵ ¹²³⁶ ¹²³⁷ ¹²³⁸ ¹²³⁹ ¹²⁴⁰ ¹²⁴¹ ¹²⁴² ¹²⁴³ ¹²⁴⁴ ¹²⁴⁵ ¹²⁴⁶ ¹²⁴⁷ ¹²⁴⁸ ¹²⁴⁹ ¹²⁵⁰ ¹²⁵¹ ¹²⁵² ¹²⁵³ ¹²⁵⁴ ¹²⁵⁵ ¹²⁵⁶ ¹²⁵⁷ ¹²⁵⁸ ¹²⁵⁹ ¹²⁶⁰ ¹²⁶¹ ¹²⁶² ¹²⁶³ ¹²⁶⁴ ¹²⁶⁵ ¹²⁶⁶ ¹²⁶⁷ ¹²⁶⁸ ¹²⁶⁹ ¹²⁷⁰ ¹²⁷¹ ¹²⁷² ¹²⁷³ ¹²⁷⁴ ¹²⁷⁵ ¹²⁷⁶ ¹²⁷⁷ ¹²⁷⁸ ¹²⁷⁹ ¹²⁸⁰ ¹²⁸¹ ¹²⁸² ¹²⁸³ ¹²⁸⁴ ¹²⁸⁵ ¹²⁸⁶ ¹²⁸⁷ ¹²⁸⁸ ¹²⁸⁹ ¹²⁹⁰ ¹²⁹¹ ¹²⁹² ¹²⁹³ ¹²⁹⁴ ¹²⁹⁵ ¹²⁹⁶ ¹²⁹⁷ ¹²⁹⁸ ¹²⁹⁹ ¹³⁰⁰ ¹³⁰¹ ¹³⁰² ¹³⁰³ ¹³⁰⁴ ¹³⁰⁵ ¹³⁰⁶ ¹³⁰⁷ ¹³⁰⁸ ¹³⁰⁹ ¹³¹⁰ ¹³¹¹ ¹³¹²

Abi bunaidtedi bedquin Nuquin Papa tantienquo yec unēsash ¿mitsimbo tabadpatsiash? Nuquin Papabéd tabadte bunquin ¿atotsi menepatsiash? ¿Pitucquid meniashta Nuquin Papa yacno tabadpatsiash? Padenquo. Adotiapimbo iquec. ¿Atoda meniantiapimbo iquec? ²⁷ Èmbien matses cuidte chiendac. Nuquin Papa yacnuēsh ambi abi yacnoshon uaido mayan bédabobéd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bédamboec tabadquin Nuquin Papabéd tabadmequin Nuquin Papa tantienquo yec icsaquido icsano nidmendambi. ²⁸Tantia. Chuinu. Utsi-utsiec unēsabi icquin èbi tantiaquido dadpen yansho mimbi isendac —quepondash Esus.

17

Esus bēchamauanquiecscho isaid
(*Mad 9.2-13; Duc 9.28-36*)

¹ Aden chiash 6tedec ushanec nidquimbi Esusēn abéd icquido 3tedtsēqui buampondash. Petedo yec Acobo yec Acobon buchi Ūan yec quetsēcncuc buanash macuēsh dapa dectatoash mananēnquo tabadtuidpac caondash. ² Tabadtuidshun isquien Esus utsiacimboc isadpec. Aton dashcutbēdi aton bētantete ushēbimboec bēchamauanquieac yanac caondash.

³ Esus bēchamauanquieac icnubien dada utsi daéd isadcuenash Esusbéd onquiampac caondash. Abentsēc Moises yampid icnubi utsi Edias Nuquin Papan ambi tantiaid oncamiampid icpac caondash. ⁴ Adsho isashien Petedo: —Mibi adec tabadsho isash bédambo iquebi. Mibi nēmbobi tabadmenun abentsēc hotsecnuc shubumpi uatsēcuna, Icho. Mitsana natsēcquinc Moisesēn na natsēcquinc Ediasēn na natsēcquinc canuna. ¿Ada bēda icpec? —quenubi ⁵ abu ushu bēchamauanquieac icquidēn isadenquo icnuc bētimepac caondash. Adnubien abu ushu nēnantanuēshquo Nuquin Papa onquiampac caondash. —Nēid con Madombo nec. Èmbi tantiaidquo yec èmbi bédamboen isaidquo neque. Nēidquo tantiaida —quec dacuēdampamboec onquenubien ⁶ uinte paēdtampamboec dacuēdtanec uebudcuedepac caondash Petedo chedo.

⁷ Adshobien Esusēn camishquin: —Dacuēdenda. Nidto —cac ⁸ nidtoquin isquien Esus abentsēqui iquec.

⁹ Adtanec macuēsh budequi Esus: —Mimbi isboed nēbi utsibo chienda. Unēs uac èbi uincuenacsho isun chianta —quepac caondash abéd icquido chieac.

¹⁰ Adsho tantiaish Petedo chedo: —“Nuquin Papan chomiaidquo nec,” quequin nēbi mibi tantiembi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —queshobien ¹¹ Esusēn: —Abimbo chiosh. “Edias yampid bēyecu choshon: ‘Nuquin Papan chomiac bédambo icquid choeque. Bédamboec tabadta,’ quequin chiendac,” quequin abimbo chiosh. ¹² Adquid Ediasbimboecquid chondash. Choacsho tantienquo icquin matsesēn abi bunacpaden unēs uapac caondash. Adembidi Nuquin Papan chomiaid icsho èbitsen chieshēnquin unēs uaindac —quesho tantiaishien: ¹³ —“Ediasbimboecquid nec,” quequinshenda chuiposh. Ūan pado acten mentoandened caquinshenda Edias capec —quepac caondash Petedo chedo.

Madompi dapuedaidda podobitsi icsa cuemiaid
(*Mad 9.14-29; Duc 9.37-43*)

¹⁴ Bēchamauanquieac ictanec choequi abéd icquido utsibo yacno choquin matses dadpen aido datsidadacsho Esusēn istuidpondash. Adec Esus chosho isumbien unēsansetsēcquidēn papan Esus ismequin danēsēn sebudshun chuipondash. ¹⁵ —Con mado bédamboen isquien bédameta, Icho. Baded-badedquieac unēsaneac cuēten pichiquianec. Adecbidi unēsaneac acten mentoadtšenaccosh. ¹⁶ Mibéd icquidion bédamete danquin bēidombi. “Nē bédame,” cac bédamenuen tanuidosh. Bédamenquo iccoshe. Mimbimbo bédameta —caquien ¹⁷ Esusēn ambo icquidotedi chuipondash. —Èmbi nadatiambo icquin nabanquin ismiaqui mimbi èbi tantienquo iquec. Adsho isash chieshtoash cuentiaidquo icchitebi. Adtiaidquo yequi padenquo iquec nebique. Min mado beccho —cac ¹⁸ bēsho istanquin Esusēn podobitsi icsa chushcapondash. —Padi. Daicsa uainda —cac podobitsi icsa cuenubi madompi bédampondash.

¹⁹ Adsho isun abéd icquidon Esus chuipondash utsibo tantiamenquo icquin. —Èmbi: “Cuemenu,” cac ¿atotsi quiash podobitsi icsa cuenenu icposh? —caquien: ²⁰ —Nuquin Papa bédamboen tantiaquin mimbi bédamboen natsenoc. Mimbi bēdiactēsēc tantiatsec. Pete èshēmpi mostasa caid pistsēcquidi siac nua yec canitsiash. Adecbidi Nuquin Papa tantiatsecboedi: “Ambi natiapimbo ictequid nibēdec,” quequin abimbo tantiaquidquo yanshun comapenen tantiaquidbimboec mibi ictsiac. Adquidēn nēid macuēshquibōi cain: “Uquē manēd,” cac manēdtsiash. Aden mimbi: “Èbi bédamboen nameta, Papa,” quequin Nuquin

Papa chianiac aidëmbi mimbi: “Ëmbi natiapimbo ictequid nec,” caid mibi bëdamboen nametsiash. ²¹ Nëbi ëmbi cuemeboed abembi cuentiapimbo icquid nec. Nuquin Papauidi tantianuen buna mëmunquin Nuquin Papa chianeshun adquid cuemequid –quequin Esusën chuipondashi.

Abi unëste Esusën chuioid
(Mad 9.30-32; Duc 9.43-45)

²² Adanec aton nidaid Cadidia yacnobi capucuenquimbi Esusën abëd icquido chuipondash. –Ëbëd icquid abentsëcshun ëbi chieshënquido ëbi bedmendac. ²³ Bedshun ëbi unës uamendac. Aden unës uamiacsho chococaquini daëdec ushash uincuenendac –quesho tantiatanequien abëd icquido: –Unësquio icnuc chiec –quiash shubiantiadtsëcquio icpondash.

Chuiquid dapa menetequid piucquid Petedon istuiddaid

²⁴ Aden chianec nidequi shubu dadpen icquid Capednaun caid yacno Esus chopondash. Adnubien Nuquin Papa tabadte shubu uashunaid nacnemenuequin piucquid bedquidon Petedo chuituidpac caondash. –Nuquin Papa tabadte shubu uashunaid nacnemenuen çada min icbon dos dada uatsaid piucquid shocoshëmpi abentsëc menepatsiash? –cac ²⁵ Petedo: –Ai, menetsiash –quepac caondash. Adanec nidec shubun puduedshobien Esusën ambia Petedo chuipondash. –çAtotsi mimbi chie, Simon? Aton matsesën na nacnemenuen çtsutsi chuiquid dapabon piucquid bedshumpec? çAda aton matses piucquid bedshumpec? Aido bedshunenquio icquin çada ambi bedaido aton yuabo piucquid bedshumpec? –caquien ²⁶ Petedo: –Ma aton yuabo bedshumpaid yoc. Aton matses piucquid bedshunenquio iquec –quesho tantiashien: –Adembidi aton Mado icsho aton shubu nacnemenuen Nuquin Papan ëbi bedshuntiapimbo iquec. ²⁷ Aden tantiaquimbi: “Nëishnushë,” qeshun menenun nanuna. Chianën ansemetan. Tauaquin ansemiaidi ancanshun anisquïn 4 dada uatsaid piucquid shocoshëmpi abentsëc mimbi istuidendac. Aid bedshun piucquid bedshumënquido menetanta. “Në con icbon nabëdi con na nec,” quequin menetanta –capondash Esusën. Adoac Petedon Esusën chiacpadomboen menetampac caondash.

18

çMitsicquid chuiquid dapa mimbi icmepatsia?

quequin chiaid
(Mad 9.33-37; Duc 9.46-48)

¹ Adshumbic abëd icquidon Esus chuipondash. –Abitedishun Ico icquin matses mimbi namendac. Ëbi chedo caic çmitsicquid mibëdtan chuiquid dapa mimbi icmepatsia? –quesho ² tantiashun abi tabadacno nënantanquio bacuë tsaduntsëcshun Esusën chuipondash. ³ –Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuën amën chiacpadomboen nacimboben ëbi tantiaquiota. Adash ambi namiaid yanash Nuquin Papa yacno mibi puduedendac. ⁴ Aden ëmbi chiacpadomboen naquidquio icsho mibi Nuquin Papan: “Bëdambohë iquec,” caindac. ⁵ Nadquid bacuëbëdta ëbi tantiabentsëcquid bëdamboen tantiaquidën ëbitsen bëdamboen tantientac –quepondash Esus.

Tantiabentsëcquido icsamete chiaid
(Mad 9.42-48; Duc 17.1-2)

⁶ Adshumbic padpiden chiec: –Ëbi tantiabentsëcquid caic: “Nuquibi Nuquin Papan chiaid niac-niacquiec icsaquionona,” quequid Nuquin Papan cuidendac. Icsamiabi yec unësacsho isun: “Bëdambo iquec,” catsiambi. “Cuënote yuëmboshë icquid tēdectanshun acte nënepatecnëdan,” caimbi icsamiente bunquidquio. ⁷ Aden ëbi tantiatsëcquid utsibon icsamendac. Adec icsamianquid Nuquin Papan cuidendac.

⁸ Aden Nuquin Papan cuidte chuisho tantiequi icsainda. Mëdanten naic mibi icsaic. Mëteshuniac bedtiapimbo yacimboec icsainquio yec ënëdta. Taën capuec mibi icsaic. Tateshuniac caputiapimbo yacimboec icsainquio yec ënëdta. Ënëdenquio icsho Nuquin Papan mibi cuidendac. ⁹ Adecbidi ëshën isec mibi icsate bunquiec. Èshë chichshuniacimboec icsainquio yec ënëdacsho: “Bëdambo iquec,” catsiambi. Ënëdenquio icsho Nuquin Papan chian anëdënquiacno nësecaindac –quequin Esusën chuipondash.

Matses ëbi tantiamete Nuquin Papa bunaid
(Duc 15.3-7)

¹⁰ Adashic padpidec: –Nadquid bacuëmpin ëbi tantiatsëcsho isun: “çAdtsëcquidëmpinquiobida bëdamboen tantiapec?” cainda. Nuquin Papan abi yacnoshon

uaid mayan bëda aid bacuëbo dayun uaquid icquin Nuquin Papa yacno puduedshun mimbi mamënsumboed Nuquin Papa chuinushe. Adtsëcquidëmpi mamënsnunenda. Èbi tantiabentsëcquido con Pan tantiaquieque. ¹¹ Èmbitsen aido tantiembi. “Bënuaid istuidacimboen èbi tantienquo icquidobi èbi tantiaquido icmenu,” quiash matsesondabi —quepondash Esus.

¹² Adashic padpidec: —*ç*Mitsipadquio nuquin matses icpec? Nëish yua obeca dadpen 100ted dayun uaquidën aton yua tambanac abentsëc nibëdsho istanquin utsitedi nianshun aid abentsëc nibënbenequin istuidquid. ¹³ Aden istuidash comapenec cuishonquequid: “Con yua nibëdantsenquiac,” quia. Aton yua utsi yacno bëash abi icboctedi icsho isash bëdambo quid. Adecbidi matsën èbi tantiabensho isash Nuquin Papabëd cuishonquebi bënuaid istuidacimboec. ¹⁴ Icsaido cuidacno matses nidmete Nuquin Papa bunenquo iquec. Matses bëdamboen isquin abëd tabadmete Nuquin Papa bunquiec —quepondash Esus.

Chieshënuquidobëdi onquete chiaid
(Duc 17.3)

¹⁵ Adashic padpidec: —*ç*Ada èbi tantiaquid utsin mibi icsa uaosh? “Ai, icsa uaoshi. Chieshëmiantiaquio icchitosh,” qeshun nadoac bëdambo ictsiash. Aid abentsëqui chuiquin aidbëd bëdamboec onquequin: “Èbi icsa uaquin Nuquin Papan chiaid mimbi niac-niaccoc. Adeccainsainquo yec ènëdta,” mimbi cac: “Ai, adebi,” quia. Mibëdi bëdamboec tabadtsiash Nuquin Papan tantiesabimboec icuidboedi. ¹⁶ Mimbi: “Icsainquo yec ènëdta,” caqui: “Padi. Adequi icsaibi,” qesho tantianshun èbi tantiaquid utsi beduanshun aidbëdntan chuitanta. “Nuquin Papan chiaid niac-niacsho isun daëdshun chiaid abimbo chiaid nec,” quequin chiaid tantiaquin adota. ¹⁷ Mimbi buanaidëntsen: “Adeccainsain,” caqui: “Adequi icsaibi,” qesho tantiantanec choashun mibëdntan èbi tantieccuëdquido chuiquido chuituida. “Mimbitsen chuitanta,” cac aidontsen chiaqui tantienquo icsho isun: “Nuquin Papan chiaid niac-niacquid yec Esus tantiesabimboecquid nec,” qeshun èbi tantiaquido cuëdënacno chomenda. ¹⁸ Aden mimbi: “Esus tantiesabimboecquid neque. Cuëdënacno chomenquo ictiad,” casho Nuquin Papan: “Bëdamboen naic,” mibi catsiash. Adembidi mimbi: “Adeccainsainquo yec ènëdsho isun cuëdënacno chomeoanuna,” qeshun chomeoasho Nuquin Papan: “Bëdamboen naic,” catsiash.

¹⁹ Padpiden chuinu. Tanta. Mimbi: “Nuquin Papan chuina,” cac: “Ai, adonona,” qesho tantianshun aidbëdntan mimbi Nuquin Papan chianiac mimbi chiacpadomboen Nuquin Papan natsiash. ²⁰ Èbi tantieccuëd tabadnuc aidbëd con Mayan yec èbëd yachimboec tantiadendac. Adeccuëd tabadsho isun: “Con Mado tantiaquido nec,” qeshun aidon chianiaid Nuquin Papan tantiadendac.

Yuan bëdamboen istiapimbo yaid

²¹ Adeccuëd: —Icsa uanec chieshtomiantiaquio iquec —Esus qesho tantianshumbien Pedton Esus chuipondash. —*ç*Icsa uanec chieshtomiantiaquid tedentsimbi chieshenquo icquin bëdamboen ispe? Chieshënuquid padpiden icsa uac *ç*padpidendambi bëdamboen isoape? *ç*Mëdante utsiuc daëd tauadoquin sietetedembi nashun padpiden bëdamboen isenquo icquin ènacta bëdambo icpatsiash? —caquien ²² Esusën: —“Mëdante utsiuc daëd tauadoec sietetedi” quequin daëdpcatsëcquio mimbi chuipec. ⁷⁰ por ⁷ caid *ç*tedtsi icpec? Aidten 490tedembi ènenquo icquin bëdamboen isoadoniac bëdambo ictsiash —quepondash Esus.

²³ Adashic abi onquec: —Nuquin Papan chiacpadomboen matses bëdamboen iste mibi chuinu. Tanta. Tsusion yuabo dadpen icpac caondash. “Ma bënu,” quequin ambi meniactedi piucquid bednuen aton yuabo aton shubuno chomepac caondash. ²⁴ Abia chomiaidën piucquid dadpenquioshë bedshun aton icbo meniampo icpac caondash. ²⁵ Adsho icbon: “Mimbi bedactededi beccho,” cac: “Nibëdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Min chido min bacuëbobëdntabi cuësh-cuëshëdmeshun aidtedi piucquid bednu. Mibi icsambo iqueque,” cac ²⁶ yua abi yuaquid ismequin danëshën sebudash: “Padi. Èbi yuamenuen cuësh-cuëshëdmenda. Chiata. Yuecshun aidtedi bedshun mibi menenun nanu,” capac caondash. ²⁷ Adoquien icbon bëdamboen isquin: “Padi. Èbi menenda. Mibi utsibo yuamenquo iquembique. Dacuëdenda. Nidëc nid,” quequin icbon aton yua bëdamboen nidmepac caondash.

²⁸ Adoac nidquimbien aid yuan icbon bëdamboen isoedën ambi: “Ma bënu,” quequin piucquid daëdpcatsëc meniaid yua utsi istuidpac caondash. Istuidshumbic bedtanquin tëtëdinquin: “Mimbi bedactededi piucquid beccho. Unës uachitomane,” caquien ²⁹ aidtsen ambi piucquid bedshunonaid ismenuen danëshën sebudtsec: “Chiata. Èbi unës uanda. Yuecshun bedshun mibi menenun nanu. Chiata,” quepac caondash yua utsi. ³⁰ Adsho tantianshun icbon bëdamboen isoedëmbi chieshënuquid: “Padi. Mibi cuidmembu,” qeshun

quënën nauedmepac caondash. “Piucquid aidded abi menianenquo yacpadequi ma quënënuësh mëyadbudchitono,” qeshun nauedmiac caondash.

³¹ Aden chieshënquin quënën nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bédamboen isboedëmbi min yua utsi quënën nauedmiac: ‘Piucquid menianenquo iquec,’ qeshun,” quequin icbo chuipac caondash. ³² Adsho tantiashun icbon ambi cuidenquo icquin bédamboen isboed chomeshun chushcapac caondash. “Icsambo icquidquo mibi nec. ‘Chiata. Mibi menenun nanu,’ mibi qesho: ‘Padi. Èbi menenda,’ quequin mibi bédamboen isombi. ³³ Èmbi mibi adobocpadomboen utsi bédamboen istiapimboda icco? ‘Ma bënu,’ qeshun mimbi meniactedi bëabi icsho bédamboen isec mibitsen bédambo ictsenac. Mibi yacpadec nëishun mibi cuidembi,” quepac caondash icbo. ³⁴ Adshun quënën nauedmepac caondash. “Ambi bedactedi piucquid dadpenquo meniash ma puduemanu,” qeshun quënën nauedmiac caondash. ³⁵ Aden matses yuan icbon nacpadomboen Nuquin Papan naindac. Utsibon chieshënaqui chieshënansho Nuquin Papan mibi bédamboen istiapimbo iqueque. Chieshënanenda. Mibi chieshënquidobi bédamboen ista —quepondash Esus.

19

Chidobéd cuëshédte Esusën chiaid (Mad 10.1-12; Duc 16.18)

¹ Adanec nidaid cuëshë Cadidia caid yacnuësh puduanec nidec nidaid cuëshë utsi Udeya caidën nidquin acte Odan caid potebidanec Esus nidpondash. ² Adec nidshobien matses dadpenhshun tsibanampondash. Abi tsibanansho isun nitudidshun daicsaidtedi Esusën bédamepondash.

³ Adnubien tsusedpabon chiampid namequido padiseyobon chieshënquin: —Nuquin Papan chiaid niacmenu —quequin Esus chuituidpondash. —¿Atotsi mimbi chuipe? Dada uashun aton chidobi nidmete ¿mitsipaden mimbi chuipe? En chui. Tiantianu —capondash.

⁴ Adoaquien Esus: —¿Nuquin Papan chiaid isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispaboc. ⁵ Adembidi: “Dadan canite chido uaid icsho dadan aton chido bedquid. Amë chedobéd icboedi aton chido bedash aid nianenquo yec aibdéd tantiananquiec dada aton chidobéd abentsëc yacimboec tabadquid,” quequin dada uaid ma mimbi ispaboc. ⁶ Aden Nuquin Papan tantiapadomboen aton chido nianenquo yec aibdédi tantiananquiec abentsëc yacimboec tabadac bédambo ictsiash. Padnuen aton chido nianec aibdédi cuëshédquin Nuquin Papan chiaid niactsiash. Adecbidi chido aton bënë nianec icsaquid —Esus qesho ⁷ tantiashumbien abi chieshënquidon: —¿Abimboda mimbi capadi? Nuquin Papan chiaid dada uaquin ¿atotsieshun Moisesën naden chuipampic? “Aton chido bunenquo yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampid ma icpayoc —quequin chuipondash Esus chieshënquidon.

⁸ Adsho tantiashun Esusën chuipondash. —Ai, Nuquin Papan chiapadec aton chidobéd bédamboec tabadiapimbo icsho isun Nuquin Papan Moises aden dada uamepampic. Tauamboen matses uaquin Nuquin Papan aden chambo icpampic. ⁹ Tantia. Mibi chuinu. Aton chidobéd cuëshédshun chido utsi bedquin Nuquin Papan chiaid niactsiash. Padnuen aton chidon bënëpenquo chudmesho istuidash aibdéd cuëshédquin Nuquin Papan chiaid niaquenquo ictsiash —quepondash Esus.

¹⁰ Adnubien abéd icquidon: —Adotiapimbo icte mimbi chuipic. Aton chidobéd cuëshédshun icte mimbi chuisho tantiashun: “Aton chido bedesambo dada bédambo ictsiash,” caimbi —quepondash abéd icquido. ¹¹ Adsho tantiash Esus: —Ai, utsi-utsiec pabiate shëcuë nibédacimboen ëmbi chiaid tantiapimbo iquec. Utsiboen aton chido bedash Nuquin Papan chiapadec bédamboec tabadquid nec. ¹² Utsibic mimbi chiapadquid chido bedesa iquec. Nēidtedi chido bedesa iquec. Nēidic aton padibi impadishtsaid. Nēidic matsesën inicsa uaid. Nēidic: “Nuquin Papan yuambo icquin aiddën chiapadomboenuidi naquin chido bedtiapimbo iquebi,” qeshun chido bedesa. Adquidtedi chido bedesa nec. Èmbi chuibodet tantiashun ëmbi chiapadomboen nac bédambo ictsiash —quepondash Esus.

Esusën bacuëbo chiaid (Mad 10.13-16; Duc 18.15-17)

¹³ Adnubien Esus ismenuen bacuëbo bë-bëpondash. —Mamishquin ma Nuquin Papa Esusën chuinu —quequin bë-bësho isumbimbi: —Padi. Bëenda —cauidpondac. ¹⁴ Adshobini Esusën: —Chën. Ma bënu. Cuemenda. Bacuëbimboecquid Nuquin Papa yacno puduedtequid nec. Amën chuisho tantiash bacuë badedi: “Abimbo caic,” quiacimboen ëbi tantiaquid

Nuquin Papa yacno puduedtequid nec. Bacuëbo bédambo iqueque. Beccho –cac bê-bépondash. ¹⁵ Adshobien mamishbanquin Nuquin Papa chuipondash. Adobidanec nidondash Esus.

Cania aton na dadpenquoio dayun uaquid Esusbéd onquiaid
(Mad 10.17-31; Duc 18.18-30)

¹⁶ Adnubien dada caniampinquoio Esus chuituidpondash. –Mibi bédambo iquec. Bédamboen chuiquidquoio mibi neque. Èbi chui. Padpidec unëstiapimbo icquid icmenun bédambo icquid Nuquin Papan abi yacno puduedmetsiash. ¿Atotsi nasho Nuquin Papan èbi bédambo capatsiash? –caquien ¹⁷ Esusën: –¿Mitsipadquid bédambo icquid cai? Nuquin Papauidsëqui bédambo icquid nec. Aidbéd tabadnuen ambi Moises dada uamiampictedi nata –capondash. ¹⁸ Adoaquien cania: –Nuquin Papan chiaid ¿mitsipadquid cai? –quesho tantiashumbien: –Naden chiaid caimbi. “Cuesunenda. Min chidopenquoio chudenda. Min bënëpenquoio chudmenda. Ampenda. Muainda. ¹⁹ Titabédta papa chieshënenquoio icquin bédamboen tantiata. Adembidi mibibi datantiadacimboben matses utsi abitedi tantiaquiota,” quequin chiaid caimbi –capondash Esusën. ²⁰ Adsho tantiash cania: –Aidtedi niaquenquoio icquin nabanquidquoio nebi. Bacuëtsëc icquimbi tauaondambi. “Nuquin Papabéd tabadnuen ¿atotsimbi utsi nape?” caimbi –quepondash.

²¹ Adsho tantiashumbien Esusën: –Nuquin Papan chiaid niaquesambo ictiadquoio icquin mibi dayun uaidtedi uesquin menequin piucquid bedta. Piucquid bedshun piucquid nibédquido min piucquid uesquin menebanta. Adsho abéd tabadmenun Nuquin Papan mibi bédamboen istiashe. Adota. Adotanequic ëbéd iquec cho –caquien ²² cania: –Con na dadpenquoio icsho uesquin menetiapimbo iquebi –quiash shubiantiadtsëcquoio ictanec nidpondash Esusën chiacpadomboen natiapimbo yec.

²³ Adsho isun Esusën abéd icquido chuipondash. –Chuinu. Tantia. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedëmbi èbi tantiatiapimbo iquec. Aton nauidsëqui tantiec. ²⁴ ¿Ada nëishamën pinchuc chichte ancumpadic? Padenquoio. Adebcbidi aton na dadpenquoio dayun uaquidën aton nauidsëqui tantiaquin ëmbi chiacpadomboen natiapimbo yec Nuquin Papa yacno natiatiapimbo iquendac –quequin Esusën chuipondash.

²⁵ Adec: –¿Ada nëishamën pinchuc chichte ancumpadic? –quesho tantiashien abéd icquido nadpondash. –¿Tsudain Nuquin Papa yacno puduedtequid icchitotsiash? Nibëchitequien iquec –quesho tantiashumbien ²⁶ Esusën abéd icquido bëisquin naden chuipondash. –Matses namiantiapimbo icnuc Nuquin Papain namianquidquoio nec. Ambi natiapimbo ictequid nibëdec –quepondash.

²⁷ Adsho tantiashun Petedon: –Mimbi: “Nuquibi icnu. Cho,” cac con na abitedi nianec mibéd icnuec chopondabi. ¿Mitsimbo tabadtequidini nepe? ¿Atotsimbi nape? –caquien ²⁸ Esusën: –Tantia. Mibi chuinu. Nuquin Papan ambi uaid abitedi chuca uabocnoëshquoio ëbédtan chuiquid mibitedi iquendac ëmbi abitedi namiacnuëshquoio. Èbéd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedtsi icpampic? Aidtedi 12tedshun tsyuecquidon shubu 12tedi shubun-shubunquiech chuiquid dapabo mibitedi iquendac. ²⁹ Utsibontsen èbi tantiendac. Aton shubu nianquinc abédta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain èbi tantiaguin ëmbi chiacpadomboen naquid iquendac. Adsho nèbi unësabi icsho ambi nianaidobéd tabadacimboecnuc bédambo icmendambi. Adoshombic unësacsho Nuquin Papa yacno tabadmendambi padpidec unësenquoio icnuc. ³⁰ Nidaidënuësh chuiquid dapambo icboedi Nuquin Papa yacnuësh utsi-utsec chuiquidpenquoio iquendac. Utsibic nëuëshquoio chuiquidpenquoio icboedi Nuquin Papa yacnoshon: “Bédambo icquid nec,” quequin chuiquid dapa icmendac –quepondash Esus.

20

Chonoadquido chiaid

¹ Adshumbic abéd icquido Esusën ompoachimboen chuipondash. –Tantia. Èbi taniaquido Nuquin Papa yacnoshon namete mibi chuinu. Badiadnubi tied ichon piucquid menequin aton tied neshcamenuen matses istuidpac caondash. ² Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash. ³ Ushë abucquoio yanubi tied ichon pete meniaco nidshun utsibo nainquoio yec samédsho istuidpac caondash. ⁴ Adoshombic aidotsen chuiquin: “Con tied neshcaic cho. Mibi bédamboen cuidquin menenu,” cac ⁵ tied neshcaic nidpac caondash. Ushë cuembo icnubi tied ichon padpidec pete meniaco nidoashun utsitsen istuidshun adembidi aton tied neshcamepac caondash. Ushë budambic padpiden utsitsen. ⁶ Inchëshbudtsëqui nidoaquin utsibo nainquoio yec samédsho

istuidoashun: “¿Atotsi quiaash samëduidequi ique?” cac ⁷ samëdquido: “Chonoa uanquid nibëdosh,” qesho tantiashun tied icbon: “Mimbítsen con tied neshcaic cho. Mibi menenu,” cac tied neshcaic nidaneoapac caondash inchëshbudtsëqui neshcaquin tauaic.

⁸ Inchështsëcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choeboedba menequin tauatanquin ushë budambi choeboedotsen meneta. Adoshombic ushë cuembo icnuc choeboedotsen. Adoshombic ushë abuctoan choeboedotsen. Adoshombic badiadnubi abia choeboedo ënquimbi meneta,” cac menequin tauapac caondash. ⁹ Inchëshbudtsëqui chonoadec choeboedoba menequin badiadnuc chonoadec taëboed tied icbon: “Menenu,” cactedquido piucquid menepac caondash.

¹⁰ Adosho isashien badiadnubi choeboedo: “Aido aden meneshun nuqui chonoadquioeboed yuapambo nuqui menec,” qeshobi aidtedtsëcbidi piucquid menepac caondash. ¹¹ Aidtedtsëcbidi meniaquien tied icbo chushcapac caondash. ¹² “Tsyuec chonoadboed meniactedsëcbidi menioshi. Icsambo iquec. Inchëshbudtsëqui chotsash daëdpactsëc chonoadtsëccuid meniactedsëc yuec chonoadquid piucquid meniac icsambo iquec. Chun mëyadec yuecquio chonoadobi. Aidtedtsëc menianec mibi chieshanquieic iquec. Èbi dadpen meniac bëdambo ictsiash,” quequin chushcapac caondash.

¹³ Adoaquien tied icbon: “¿Chieshanquiectabi ique? Èmbi: ‘Nëidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidtedquido menepaboc. ¹⁴ Mimi bedboed buanec nid. Èbi bunacpaden tsyuec choash chonoadquid mibi meniactedquioibi menioimbi. ¿Icsamboda iquec? ¹⁵ ¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimi èbi nëishëmpe? Aden nëishënac ¿ada bëdambo iquec?” quequin tied icbon chuipac caondash —quequin ompoacbimboen chuipondash Esusën. ¹⁶ Adashic: —Adembidi abi yacnoshon ambi tantiacpadomboen Nuquin Papan naindac. Utsi-utsien chuiquid dapa icmequin utsi-utsien padenquio icmendac —quequin chuipondash Esusën.

Abi unëste Esusën padpiden chuoiaid
(Mad 10.32-34; Duc 18.31-34)

¹⁷ Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquio icquin abëd icquido 12tedi icquid chuinuen uanotantsëcquin buampondashi. ¹⁸ Buanshun chuipondashi naden: —Edusaden yacno nidacsho Nuquin Papan matsesmiaid icsho èbi chieshëquido èbi bedmendac. Nësh yua abided unës uaquido chuiquid dapabobëdtan Moisesën dada uampid chuibanquidon èbi bedshun: “Ma unës uamenu,” qeshun ¹⁹ matses utsibo isadaidpembo èbi bedmendac. Aden bedmiac matses utsibon mamënshunquin èbi cueshcaten comapenen cueshcaindac. Adshumbic èbi unës uanuen cuستن dectanendac. Aden unës uaqü daëdec ushash uincuenendabi —quequin Esusën abi unës uate padpiden chuoiapondashi.

Uanën titan chiaid
(Mad 10.35-45)

²⁰ Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. —Èmbi chiacpadomboen èbi nashunta, Icbo —caquien: ²¹ —¿Atotsi cai? —capondash Esusën. Adoaquien: —Nëid con mado daëdi nec. Abitedishun icbo icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën: ²² —Èmbi naid tantienquio icquin mimi chuipac —quequin ani chuishumbic Uanbëdta Acobo Esusën chuipondash. —¿Ada èbi mëyadacpadquiecbidi mëyadtsia? ¿Ada chieshtoenuquo icpatsia? —caquien Uan: —Ai, chieshtoenuquo ictsiabi. Mibëd mëyadtsiabi —quepondash.

²³ Adsho tantiasien: —Ai, èbi tantiaquid yec mibi mëyadendac. Padnuembi ebëdtan chuiquid dapa icmequin mibi èbi datsadmetiapimbo iquec. Nuquin Papambien ambi tantiacpadomboen ebëdtan chuiquid dapa icmendac —quequin Esusën chuipondash.

²⁴ Adnubimbi: —Chuiquid dapa èbi icme —Esus casho tantiasun Uan chedo nëishëmpondac. ²⁵ Adsho Esusën ebitedi chuipondash. —¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuëdquin aton yuabon badedi naic. ²⁶ Èbi tantiaquido icquin mimi doenuquo iquendac. “Bëdambo mibi iquec,” Nuquin Papa cametiadquio icquin utsibo tantiaquin mimi utsibo nashuntsiac. ²⁷ Bëdambo icquid ictiadquio icquin yuan aton icbo nashunac bimboen mimi utsibo nashuntsiac. ²⁸ Adembidi Nuquin Papan matsesmiaid icquin matses nashunquid nebi. Ancainquio icquin matses tantiaquin Nuquin Papa icsaquidobi cuidmenquio icnuec èbided cuidadec unësendabi —quequin Esusën abëd icquido chuipondash.

Bēshuaid daēd Esusēn bēdamiaid
(*Mad 10.46-52; Duc 18.35-43*)

²⁹ Adashic yuecquio ictanec shubu dadpen icquid Edico caid yacno tabadash auēshquiobi Esus nidpondash. Adsho isanec nidquin matses dadpenshun Esus tsibanampondash. ³⁰ Adnubien aid podqued cuēman bēshuaid dada daēd tsadpondash. —Esus cuenec —quesho tantiashien aid daēdi comanec cuēdpondash. —Tsusedpa Dabidēn tsyuecquid Nuquin Papan namiaidquio icquin ēbi bēdamboen ista, Icho —quepondash Esus caic.

³¹ Adsho tantiashun matses dadpenshun chushcapondash. —Padi. Chēn. Adec cuēdec chieshanquiec mibi iqueque —caquien abi niachidanec buēdanquiec cuēdpondash. —Tsusedpa Dabidēn tsyuecquid Nuquin Papan namiaidquio icquin ēbi bēdamboen ista, Icho —queoapondash.

³² Adoquien Esusēn nidtuidshun ēcbedpondash. —¿Atotsi chuinuec ne? —caquien: ³³ —Isbente bunquiebi, Icho —quepondash. ³⁴ Adsho tantiash: —Unēsquio iquec —quetanquin Esusēn bēshuaid daēdi bēmishpondash. Adoac abi daēdi bēdampondash. Bēdānshun aidēntsen Esus tsibanampondash bēshuacboedēmbi.

Edusaden yacnoshon chuiquid dapabimboecnuc Esus bēdamboen isaid

21

Edusaden yacnoshon chuiquid dapabimboecnuc Esus bēdamboen isaid
(*Mad 11.1-11; Duc 19.28-40; Uan 12.12-19*)

¹ Adanec nidequi shubu dadpen icquid Edusaden caid anoentsēqui macuēsh dapa Odibos caid poctse shubu daēdpactsēcquid Bedpaque caid yacno Esus nidpondash. Adshumbic anoentsēqui choshon abēd icquido daēd chuipondash. ² —Nēid podquedēn nidquin shubu daēdpactsēc yacno nidshun cabayobitsecquid aton bacuē caniatšēcbēdta mimbī badedquio istuidendac. Istuidshun tēnēshaid tēdiadsho tēchicta. ³ Mimbī tēchicsho isquidēn: —¿Atotsi acnun nai? —cac: —Nuquin Icho: “ ‘Bedtan,’ quiosh,” mimbī cac: “ ‘Ai, buantan,” quendac —quequin Esusēn chuipondash. ⁴ Ambi Esusēn nate chiaid Nuquin Papan con tsusedpa dada uamiampicpadomboen nanuen Esusēn adopondash. Naden dada uapampic.

⁵ “Shubu dadpen icquid Sion caidēn tabadquido chui. Edusaden cain Sion capec. ‘Is. Mibi chictanquin dapa cabayobitsecquidēn bacuē caniatšēc catsadtoash choeque. Ancanenuquo yec bēdamboshē icquidquio neque. Is,’ quequin chui,” quequin dada uapampic. ⁶ Aden dada uampicpadomboen ambi: —Bedtan —caidon bedtampondash.

⁷ Adotanquin cabayobitsecquid anibēdta caniatšēc bēacshobimbi con dashcute bēntse dasiuidboed chictanquin casanondac. Aden ēmbi cabayobitsecquid casansho isash caniatšēquēn Esus catsadtopondash.

⁸ Adanec nidsho istanquin matses dadpenshun aton dashcute abi dasiuidaid bēntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —queshun. ⁹ Matses dadpen bēyuc nidnubi aidtedbidi tsyuec nidpondash. Abitedi cuēdēnidpondash.

“Adeduya. Nuquin tsusedpa Dabidēn tsyuecquid Nuquin Papan namiaid yec mibi bēdamboshē iquec.

Nuquin Papan chomiaid yec mibi bēdamboshē iquec. Mibi chomequid Nuquin Papsen bēdamboshē iquec. Adeduya,” quec cuēdēncuededpondash.

¹⁰ Adec Edusaden yacno matses dadpenquo cuēdēnidec nidsho isashien Edusaden yacnocquido: —¿Tsutsi tantiec cuēdēncuededpec? —quepondash. ¹¹ Adsho tantiashun Esusbēd nidquido: —Esusquio tantiec nec. Nuquin nidaid cuēshē Cadidia caidēn shubu dadpen icquid Nasaded caid yacnuēsh caniondaid Nuquin Papan chiaidquio chuiquid Esus tantiec nec —quepondash.

Esusēn chushcaquin cuemiaid
(*Mad 11.15-19; Duc 19.45-48; Uan 2.13-22*)

¹² Edusaden yacno choash Nuquin Papa tabadte shubu uashunaid umanuc daquēnē uabenaidēn Esus puduedpondash nuntanquo puduedenquo yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daēdpactsēc menequid icnubi utsi-utsiec: —Nēid bedquidēn: “Ma Nuquin Papan ēbi bēdamboen isnu,” quesahun pichicametsiash —quequin aton nēish yua menequin piucquid dadpenquo bedquid nepondash. Adsho istanquin Esusēn cuemepondash. Ambi tabēcaid bidiacbanquin aton yua dēbimbitsecquido cuemequin

piucquid bednequidotedi cuemepondash naden chuiquin. ¹³ —*¿Adenda mimbi Nuquin Papan chiaid bédambo nape? Naden Nuquin Papan chiaid dada uapampic.*

“Èbi tabadte shubu uashunaid èbi chianete shububidi nec,”

quequin Nuquin Papan chiacpadomboen aton shubun puduedshun aid chianetiadquidi mimbi adoenguio iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

¹⁴ Adnubien Nuquin Papa tabadte shubu uashunaid yacno bëshuaid yec daicsaid yec quenuc bē-bēpondash. Aden bē-bëshobien Esusēn bédamepondash.

¹⁵ Adsho isashien Esus chieshēnquido nēishpondash. Adec nēish yua abided unēs uaquido chuiquid dapabobēd Moisesēn dada uampid chuibanquido nēishpondash. Adec comapenen tantiaquin Esusēn nabansho isash nēishboedi bacuēbotsen: —Nuquin tsusedpa Dabidēn tsyuecquid Nuquin Papan namiaid yec mibi bédamboshē iquec —quec Esus caic cuēdēncuededsho tantiaish nēishquidpondash. ¹⁶ Adshumbic: —Icsambo iquec —queshun Esus chuituidec: —*¿Ada bacuēbo cuēdēnsho tanto? —caquien: —Ai, tantiombi. ¿Nuquin Papan chiaid isabida ictio? Naden bacuēbo cuēdēnte chuiampic.*

“Nuquin Papan oncamiac bacuēmpin aton bacuē utsibēdtan:

‘Nuquin Papa bédambo iquec,’ caindac.”

quequin chuiampic —quepondash Esus. ¹⁷ Adanec nidec shubu dadpen icquid Betania yacno nidash ushtuidpondash.

*Esusēn cuēte unēs uaid
(Mad 11.12-14, 20-26)*

¹⁸ Badiadnubi ènden aubidi nidoaic Edusaden yacnobidi nidoapondash. Piabi nidec bundoshon ¹⁹ podquec cuēman nidquid cuētempo icueda caid istuidash: —*¿Ada bacuēaye? Chenun isbono —quepondash Esus. Adshun isquien bacuē nibēdec. Podoidquio icpec. Adsho isumbien Esusēn: —Adequi bacuēesambo yec unēsta —capondash. Adoac badedquio unēspondash.*

²⁰ Adosho isun abēd icquidon: —*¿Atotsi quiash badedquio unēsposh? —caquien ²¹ Esusēn: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquio icquin: “Nuquin Papan ambi chiacpadomboen naquidquio nec,” queshun mimbi Nuquin Papa chianesho aidēmbi mimbi: “Natiapimbo iquec,” caidi mibi nametsiash. Aden tantiaquin mimbi nēid macuēsh cain: “Mananuc tabadboedi adqueicbidi acte nantan tabadoata,” mimbi cac nēid macuēsh acte nantan tabadoatsiash. ²² “Ambi chiacpadomboen naquidquio Nuquin Papa nec,” queshun mimbi aid chianiac mimbi chiaid Nuquin Papan mibi nashuntsiash —quequin Esusēn abēd icquido chuipondash.*

*¿Tsuntsin: Naic nid, cac nai? quequin Esus chuimiai
(Mad 11.27-33; Duc 20.1-8)*

²³ Adcuidanec Edusaden yacno padpidec nidshun Nuquin Papa tabadte shubu uashunaid daquēnē uaidēn puduedshun Esusēn Nuquin Papan chiaid chuipondash. Adsho tantiaishun con matses tsusiobon Esus chieshēnquidon chuituidpondash. —*¿Tsuntsin: “Naic nid,” cac nai? En chui. Tantianu —caquien ²⁴ Esusēn: —En mimbua chui. Èmbia tantianu. Mimbi chuisho tantiaishun èbi namequidtsen chuinu. ²⁵ ¿Tsuntsin namiac Uan padon acten mentopadenec? ¿Ambembida napadenec? —capondash Esusēn. Adoquien badedquio chienquio yec uanotantsec tabadec onquecuedēdpondash Esus chieshēnquido. —¿Atotsi nuqui chuipeba? “Nuquin Papan namiaidquio Uan pado nepadenec,” cac Esusēn: “¿Atotsiēshun aidēn chiacpadomboen nainquio iquec?” canushe. Aden chienquien ictiad. ²⁶ Nuqui: “Ambembi napondash,” quesho tantiaishun nēmbo icquidon nēishēnushe: “Nuquin Papan namiaid Uan pado niondash,” queshun. Aden chienquien ictiad —quepac caondash Esus chieshēnquido. Isadaidbo tsusiobobēdi nēish abided unēs uaquido chuiquid dapabo adpac caondash. ²⁷ Adashien Esus padpiden chuioaic: —Tsaudi. ¿Tsundan chiaquien nachitondash? —queshobien: —Mimbi chienquio icsho tantiaishun èmbitsen èbi namequid chienquio iquembi —capondash Esusēn abi chieshēnquido cuidquin chuiquin.*

Mado daēdshun nacbimboecquido chiaid

²⁸ Adshumbic Esusēn padpiden chuipondash. —Tantia. Mibi chuinu. Èmbi chiaid tantiaishun ¿mitsicquid: “Bédambo iquec,” catsia? Dada aton mado daēdpambo icquid icpac caondash. Abentsēc chuiquin: “Neshcaic nid, mado,” cac: ²⁹ “Padi,” quec chieshuidboedi yuec-yuecpectsēctanec: “Tiedimbi neshcatanchitec,” quiash neshcaic nidac caondash.

³⁰ Adshumbic amēn aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquio icpac caondash. ³¹ ¿Mitsicquidēn aton papan chiacpadomboen napac caondash? En chui. Tantianu —caquien Esus chieshēnquido: —Abia

chiac chieshuidboedën —quesho tantiashumbien Esusën: —Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduedendac. Chieshuidacimboecquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabenash abêd tabadtequido yanendac. Mibien padenquio iquec. ³² Uan pado acten mentoandenedën Nuquin Papan chiaid chuiquin bédamboec tabadte chuiadenec. Adsho mimbi tantienquio icnubi mimbi icsambo caidombi Nuquin Papa tantiabempondash. Adsho isun Uan padon chiapadomboen mibi icsaid ëntiadquidi mimbi ënenquio iccondac. Aton papan chiaid niacquidbimboecquid mibi nec —quepondash Esus abi chieshênquido chiec.

Abi chieshênquido icsaid Esusën chuioid
(*Mad 12.1-12; Duc 20.9-19*)

³³ Adshumbic Esusën abi chieshênquido ompoachimboen chuipondash naden. —Tied icbon chetequid nidsinac caondash. Adoshombic aid tied daquênë uatanquimbic chetequid chintetsen nactempac caondash. Adoshombic: “Ampequid chosho isnu,” qeshun shubu abucquio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi neshcashunta,” utsibo canec ënapen nidpac caondash. ³⁴ Adash yuetaneshumbien abêd nidondaïdo aton yuabo chuiquin: “Nëen chetequid sinashe. Bedtan,” cac aton yuabo nidanepac caondash. ³⁵ Adec aton icbon tiedno nidaniacshobien neshcaquidon cudasênquin chieshêmpac caondash. Abentsêc cuesunetanquin utsi cuënoten seshunequiopac caondash. Utsibic cuesquin cuemepac caondash. ³⁶ Aden cuemiaid choshon chuituidaquien icbon nidboetedpenquio dadpenquio aton yua utsibo chuiapac caondash. “Bedtan,” cac nidanec tiedno choacscho isun adembidi cuesun siapac caondash.

³⁷ Adoacsho tantiash aton madombo caic: “Bedtan,” quepac caondash. “Con mado cuesunenquio icquin ëmbi chetequid menetsiashe,” qeshun aton madotsen nidmepac caondash ³⁸ Adoac nidec aton papan tiedno choacscho chetequid cudasquidon: “Tied icbo unësan aidën natedi aton madon bedtsiashe. Nëbien aton mado cuesunetiaid. Aid nibêdnuc icbo unësan aidën natedi nuquin nabi ictsiash,” qeshun ³⁹ tied tsitsuno buanshun cuesunepac caondash —quequin Esusën chuipondash.

⁴⁰ Adshumbic ambi chuiboedquido abi datsidadquido chuimenuen chuipondash. —Ëmbi chuiboed tantiash ¿atotsi mibi quepatsia? “Min mado cuesuniaccosh,” cac ¿atotsi tied icbon napatsiashe? —quesho ⁴¹ tantiash datsidadquido: —Aïdo icsamboshë icsho comapenen cuidtsiashe. Adshumbic ambi chetequid sinacscho abi cudasënesambo utsibo aton tied neshcametsiashe —quecuededpondash datsidadquido.

⁴² Adsho tantiashun Esusën: —Ai, abimbo caic. Adembidi ambi chomiaid chieshênsho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispaboc.

“Buintad bédambo icquid istuidashi: ‘Nëidquido shubu uanun nitsinembi,’ quetiadquidi isuidachimboen Nuquin Papan namiaid chieshênac.

Aden buintad isuidaid utsin bedshun shubu uanun nitsinacimboen Nuquin Papan tantiamicpadomboen utsibon ambi namiaid tantiosh.

Adsho isun: ‘Nuquin Papan namiaid bédambo iquec,’ caimbi,”

quequin dada uapampic. ⁴³ Aden ambi namiaid ëbi chieshênsho isash mibi caic Nuquin Papa nadpec. “Ëmbi con matses caid isadaïdo ëbi bédamboen tantiametiadquidi chuiquid dapabon namenquio icsho isun utsibotsen: ‘Ëbi chuiquid icta,’ caindambi,” quepec Nuquin Papa. Aden ambi chiapadquidën bédamboen chuiabanac abi tantiaquido dadpen yanendac. ⁴⁴ Mibien Nuquin Papan cuidtequido nec. Cuëte uebudquin catashac canite uesadec podquëd-podquëdachimboecnuc mibi comapenen cuidendac —quepondash Esus abi chieshênquido chiec.

⁴⁵ Adsho tantiashun padiseyobobêdtan nëish abided unës uaquido chuiquid dapabon: —Nuquien cachitec —quequin tantiabempanêdash. ⁴⁶ Adshumbic Esus cuesunemenuen bedtiadquido icquimbic bedenquio icpanêdash. —Abi datsidadquidon: “Nuquin Papan chiaid chuiabanquidquido Esus nec,” qeshun Esus bedsho isun nuqui cuesnushe —qeshun aton matses dacuëdênquin bedenquio icpanêdash.

22

Cacuidanaid chiaid
(*Duc 14.15-24*)

¹ Adshumbic Esusën padpiden ompoachimboembidi chuipondash naden. ² —Tantia. Isadaïdbon nacpadomboen aton mado chido bednuesho tantiashun amën matses dadpen: “Pec cho,” cauidaïd mibi chuinu. ³ Chuiquid dapan aton yuabo chuiquin: “ ‘Con icbon

madon chido bedeqe. Aidbéd cuishonquenuen pec cho,' quequin ëmbi tantiaidotedi chuitan," cac yuabon chuitanaqui choenquoio icpac caondash.

⁴ Adsho isumbien chuiquid dapan aton yua utsibo chuiquin: "Nëish nua bëchichoquidquo dadpen codoquiaccoshe. Padpiden chuitan," cac chuitanoaqui⁵ choenquibidi icpac caondash. Adec cacuidanqueic abentsëc aton tied nantan nidnubi utsi piucquid bednequin ambi aton na menebante shubuno nidpac caondash. ⁶ Utsimbic abi: "Pec cho," cashobi yuabo mëyanquin cuesun secapac caondash.

⁷ Adshobien chuiquid dapan nëishtanquin shëpiapac caondash. "Uesquin cuesun siatan," cac aton sondado chedon aton yuabo cuesun siaquido uesquin cuesun secatanquin aton shubutsen uesquin nëdëncapac caondash. ⁸ Adomeboshombic chuiquid dapan: "Abi pete codocaid dadpen iqueque. 'Pec cho,' cac cacuidanoshe. Utsibo chuitan. ⁹ Ëmbi: 'Pec cho,' cacmaidobi chuibenetan. Podquedën nidquin mimbi istuidaidtedi: 'Pec cho,' cabenetan," cac nidshun ¹⁰ ambi istuidaidtedi chuibenetanac matses dadpenquoio pec cho-chopac caondash. Icsambo icquidobëdi bédambo icquido cho-choash chuiquid dapan shubun puduedash pec tabadte quënë dapan tabadcuededpac caondash tsucus-tsucustsëcquoio yec.

¹¹ Adshun chuiquid dapantsen puduedshun isquien dashcute bédaidquoio dasiuidabi icquid abentsëc tsadtsec. ¹² Adshobien chuiquid dapan: "¿Atotsi quiaish dashcute bédaidquoio dasiuidambobi cho, buchi?" caqui ëcbedenquoio yec tsadec. ¹³ Adshobien chuiquid dapan: " 'Chido bedacno isuec dashcute bédaidquoio dasiuidabi,' quepadenec. Mibi icsambo iqueque. Mibi cuidnu," queshun aton yuabo chiec: "Shëbunshun buanshun icsano netan," capac caondash. Adoac taneshun netanac mëyadqueic natiac shubiquiopac caondash.

¹⁴ Adembiti Nuquin Papan ambi matses bédamboen iste dadpen tantiamiaqui utsin-utsinquin tantienquoio iquendac. "Abi yacno puduednu," queuidbodi bédambo icte bunenquoio yec abi tantiatiapimbo icsho Nuquin Papan comapenen cuidendac. Utsi daëdpactsëquien Nuquin Papan tantiacpadec abëd tabadtequid iquendac –quequin Esusën chuipondash.

Chuiquid dapa piucquid menete chiaid
(Mad 12.13-17; Duc 20.20-26)

¹⁵ Adsho tantianec nidash abi chieshënquido padiseyobo: –Esus icsamboen chuimenuna. Icsamboen chuisho tantiaishun bedshun unës uamechitono –queshun ambi chuibanquin tantiamiaido chuipac caondash. ¹⁶ –Icsamboen chuimetan –caquien chuiquid dapa Edodes caid tantiaquidobëd tan icsamboen chuimenuc cho-choshon chuituidpondash. –Bédamboen chuiquid mibi neque. En ëbi chui. Tantianu. Muesambo icquin Nuquin Papan chiapadec bédamboec tabadte mimbi abimbo chuipoc. Matses dacuëdënenquoio icquin Nuquin Papan chiaidquoio mimbi chuipoc. ¹⁷ Adquid icquin ¿atotsi mimbi chuipe? Tantanu. Chui. Nuquin matses yuaquid chuiquid dapa Sesad caidën: "Piucquid shocoshëmpi dadpen beccho," cac nuqui meniac ¿ada bédambo icpatsiash? –capondash. ¹⁸ Adoquien Esusën ambembi tantiaishun: –Bédambo icquid damianqueic mibi muambo nec. ¿Atotsieshun ëbi icsamboen chuimetiaidquoio ique? –quetanquin: ¹⁹ –Chuiquid dapa menetequid piucquid shocoshëmpi beccho –ambi cac ²⁰ bësho bedshun Esusën chuipondash. –Në tsut-sibimboecnuc dada uaid në iquec? ¿Tsutsi cuëmëdquidbëdta dada uac? En chui. Tantanu –caquien: ²¹ –Ma nuqui yuaquid chuiquid dapambo Sesad neyoc –quepondash. Adsho tantiaishumbien Esusën: –Abibimboecnuc dada uaid abi cuëmëdquid dada uaid bedtequid shocosh icnuc Sesadën na neque. Icbon: "Beccho," cac meneta. Adecbiti Nuquin Papan nuquin Icbombo neque. Aidën chiapadomboen nabanta –quequin Esusën bédamboen chuipondash. ²² Adsho tantiaish icsamboen chuimetiaidquoio icboedi: –Bédamboen chuipec –quetanec nidanepondash.

Matses uincuemete chiaid
(Mad 12.18-27; Duc 20.27-40)

²³ Adnubien aid ushëmbi Saduseyubo: –Matses unësaid uincuenesambo nec –quequidotsen: –Esus icsamboen chuimenu –quec cho-chopondash. ²⁴ –Bédamboen chuiquidquoio mibi neque. Mimbi chuisho tantianu. ¿Mitsipaden mimbi chuipatsia? Nuquin tsusedpa Moisesën naden chuiquin dada uapampic. "Aton chido bedash bacuë tishmiabi unësacsho aton utsin aid chido bedshun: 'Con buchin bacuëbo nibëdeque. Con buchin mado-bimboecnuc tishmenu,' quequin tishmequid," quequin Moisesën dada uapampic. ²⁵ Aid tantiaquin chuinu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unësapac caondash. Adsho isun abi tsibanquidën aidën chido bedash ²⁶ bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënquien aton buchi unësan-unësanquien aid chidoudi beduid-beduidpac caondash. Bacuë tishmiabi-tishmiabiec abitedi unësbudnepac

caondash. ²⁷ Adashic bacuë tishambobi aid chidotsen unëspac caondash. ²⁸ Aid abitedi uincuemiac ¿mitsicquidën chido icpatsiash? —caquien ²⁹ Esusën: —Nuquin Papan chidaidquo tantienquo icquin Nuquin Papan nadatiambo icquin nabanquin uincuemete mimbi tantienquo iqueque. Chuinu. Tantia.

³⁰ Uincuemiac dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bédabobimboec matses uincuemiaido iquendac. Aden uincuemiaidën chido bedesa —quepondash Esus. ³¹ Adshumbic padpiden chuipondash. —Ambi unësaid uincuemete chuiquin Nuquin Papan dada uamepampid ¿isbanabida ictio? Ma mimbi aid isbampaboc. ³² Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unësash aton dada chodquiambic aton tantiate unësambo icnuc abi Nuquin Papa tantiatsiash —quepondash Esus. ³³ Adsho tantiash abi datsidadquido: —¿Mitsipadquid nepec? Bédamboenshëen chuipec —quepondash.

Moisesën dada uampid chiaid

(Mad 12.28-34)

³⁴ Aden unësaid uincuemete chuisho tantiashumbien Saduseyobon padpiden: —En chui —cainquo icpondash. Adsho isashien Esus chieshënquid utsibo Padiseyobo: —Nuquin Papan chiaid Esus icsamboen chuimenu. Nid —quianec Esus chuimec cho-chopondash. ³⁵ Cho-choquin abentsëschun Nuquin Papan Moises dada uamiampid tantiaquidquido icquin chuimetuidpondash. ³⁶ —Chuiquidquido mibi neque. En ëbi chui. Tantanu. Nuquin tsusedpa Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bédamboshë iquec,” capatsiash? —caquien ³⁷ Esus: —“Nuquin Papa tantiaquiec ambi chiapadec tabadte bunquiota,” quequin ³⁸ chiampidba naic Nuquin Papan chiapadec mibi bédamboec tabadtsiandac. ³⁹ Adembidi Moisesën chiampid utsitsen naic matses bédamboec tabadtsiash. “Min dada mibibi datantiadacimboen utsibotsen tantiaquiota,” quequin chiampicpadomboen nasho Nuquin Papan bédambo catsiash. ⁴⁰ Aden matses bédamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic —quequin Esusën bédamboen chuipondash abi chieshënquido chuiquin.

Nuquin Papan chomiaidquo chiaid

(Mad 12.35-37; Duc 20.41-44)

⁴¹ Adshumbic Esusëtsen abi icsamboen chuimete bunquido Padiseyobo chuipondash. ⁴² —Ëmbitsen mibi chuimenu. Tantia. Nuquin Papan chomiaid ¿mitsipadquid nec? ¿Matsesën madouidida nepec? —capondash Esusën abibi cadquimbi. Adoquien badedi: —Nuquin tsusedpa yampid Dabidën tsyuecquid icsho Dabidën mado caimbi —quepondash Padiseyobo.

⁴³ Adsho tantiashumbien Esusën: —¿Bédamboenda chuidio? Mimbi chiapadquid aton mado icsho ¿atotsieshun Nuquin Papan Mayanën tantiamiacpadomboen Dabidën con Icho capampic? Naden Dabidën dada uapampic.

⁴⁴ “Nuquin Papan con Icho naden chiendac.

‘Con abiuc tsadash abitedishun Icbombo icnush nëmbo cho.

Mibi chieshënquidobi con Icho mibi camenu,’ quequin Nuquin Papan con Icho chiendac,” quequin Dabidën dada uapampic. ⁴⁵ Con mado cainquo icquin con Icho capampic Dabidën. ¿Atotsieshun mimbi: “Dabidën mado nec,” quequin tantiate? —caquien ⁴⁶ ëcbedenquo yec otacquo tabadpondash. Esusën bédamboen chuisho tantiash: —Icsamboen chienquien icchitec. Ëmbi padpiden: “Icsamboen chuimenu,” cac bédamboembidi chuiotsiash —queshun abi chieshënquido abitedishun Esus padpiden chuimenquo icquin ënaccondash.

23

Bédambo icquid damianquido tanenda, quiaid

(Mad 12.38-39; Duc 11.43, 46; 20.46)

¹ Adshumbic Esusën abéd icquidobédta abi datsidadquido tantiamequin chuipondash. ² —Tantia. Moisesën dada uampid chuibanquidobédtan tsusedpabon chiampid namequido Padiseyobon naid mibi chuinu. Aidon: “Moisesën chiampicpadomboen nata,” quequin nuquin matses isadaidbo chuidenepec. ³ Aden Moisesën dada uampid abimbo chiac adenuidî mimbi nac bédambo ictsiash. Aden naquin padiseyobon nacpadomboen nainda. Aidon Moisesën chiampid chuiquimbi ambibi aidën chiaid niac-niaquec. ⁴ Chieshëmënquido nec. Nuquin Papan chiaid nametiadquidëmbi tsusedpabon ambembi

chiaid dadpenquo namepec chushcanquin. “Matsesën aiddedi natiapimbo iquec. Padi icnuna. Nuquin matsesën chiampidtedi nainda,” catiadquidi adoenquo iquec.

⁵ Aden padiseyobon Nuquin Papa tantiaquidquo damequin matses ismenuenuidi naic. Nuquin Papan chiaid dada uaidëmpi sauedtsash bédectamédec abiuc daédi pédectamédec qeshun matses ismenuenuidi naic. Adembidi aton dashcute tēdiade nacnenuquin: “ ‘Nuquin Papa chianequidquo nec,’ ma ēbi canu,” qeshun sedquid shoyonaid ēnapenpactsēcnuc cuiddicash matses ismenuec matses tabadacno capucuenepc. Adec Nuquin Papa chianequid damianquiec. ⁶ “Chuiquid dapa nec,” cameteuidi bunec. Isedec puduedash: “Chuiquid dapa icsho icbon abēdi tsadmequid,” quiaish icbobēdi tsadte bunquiec. Nuquin Papan chiaid chuibante shubun puduedash: “Tsuio dapambo nec,” camenuc utsibobēd tabadenquo yec tsusiobobēduidi tabadquid nec. ⁷ “Chuiquidquo yec mibi bēdambo iquec,” camete bunquiec matses dadpen tabadacno nidtenepec.

⁸ Mibitsen adenda. Utsibo: “Mibiuidtsēqui bēdambo iquec, Icho,” camenuc adenda. Min Icho abentsēcquiobi ēbi iquec. Ēbi abentsēqui con Icho cata. Con yuambo yec con utsibo mibi neque. Bēdamboec isnanta. ⁹ Adembidi mibi chuibanquid chuiquimbi: “Mibiuidtsēqui bēdambo iquec, Papa,” cainda. Nuquin Papauidtsēqui aden chuita. ¹⁰ Adembidi: “Chuiquid dapa yec mibiuidtsēqui bēdambo iquec,” utsibo camenuenuidi nainda. Ēbiuidtsēqui mibi chuiquid dapa nec. Nuquin Papa yacnuēshquo choquid ēbipadquidquo utsi nibēdec.

¹¹ Padnuen ambi chiacpadomboen utsibo nashunquidquo utsibo dēniacte bunenquo icquid Nuquin Papan bēdamboshē catsiash. ¹² Utsien abibi cadequi: “Ēbiuidtsēqui bēdambo iquec,” quequin utsibo ismenuenuidi naquido Nuquin Papan icsambo catsiash. Utsibic Nuquin Papan chiacpadomboen naquin utsibo nashunquid yec utsibo ismeteuidi bunenquo icsho Nuquin Papan bēdambo caindac –quepondash Esus abi datsidadaido chiech.

*Abi chieshēnquido Esusēn chushcaid
(Mad 12.40; Duc 11.39-45, 52; 20.47)*

¹³ Adshumbic abi chieshēnquidotsen chuipondash. –Tantia. Moisesēn chiampid chuibanquidobēda Padiseyobo mibi chuinu. Nuquin Papan cuidtequidombo mibi nec. Bēdambo icquid damianquiec mibi icsambo iquec. Nuquin matses: “Nuquin Papabēd tabadte tantianu,” qeshobi mibi bēdamboen chienquo iquec. Ēmbi Nuquin Papabēd tabadte bēdamboen chuisho mimbi tantienquo iquec. Aden tantienquo icquin: “Aidēn chiaid tantienda,” quequin mimbi utsibotsen Nuquin Papabēd tabadte tantiametiapimbo iquec.

¹⁴ Nuquin Papan cuidtequido mibi nec. Muaquin unēsboedēn niante piucquid bedshunquido mibi nec. Nuquin Papa tantiaquidquo damenuen utsibo tantiaquidquidi buēdpambo cuēdquin Nuquin Papa chiachimboen mimbi chianepec. Aid abimbo mimbi chienquo iquec. Adec chieshanquiesho isun Nuquin Papan mibi comapenen cuidendac.

¹⁵ Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquo yanash Satanasēn yuambo yanec Nuquin Papan cuidtequidombo iquendac.

¹⁶ Nuquin Papan cuidtequido mibi nec. Isadaidbo chuiquid icquin bēdamboen tantiamenuen mimbi icchitec. “ ‘Nuquin Papa utsi uatiapimbo yacpaden abimbo caimbi,’ quequid muaisa nec. Muaquidēn Nuquin Papan chiaid niacquid,” quetiadquidi mibi adenquo iccoc. “ ‘Nuquin Papa tabadte shubu uashunaid utsi uatiapimbo yacpaden abimbo chiombi,’ quequid muesa nec,” quetiadquidi mibi adenquo iccoc. Padenquo yec: “ ‘Nuquin Papa tabadte shubu uashunaid dapan icquid shocosh piu nacnenaquidquo utsi uatiapimbo yacpaden abimbo chiombi,’ quequid muesa nec,” quechitequien mibi iquec. ¹⁷ Aden tantienquo icquin mimbi icsamboen chiech. Nuquin Papa tabadte shubu uashunaid Nuquin Papa tabadtequid yec ¿bēdapenquido icpec? “Aid bēdamboshē icnubi aid nuntan icquid bēdiactsec bēdambo iquec,” caimbi. Mimbien icsamboen tantiec. ¹⁸ Nadentsen mimbi icsamboen chiech. “ ‘Nuquin Papa tabadte shubu uashunaid dapa yacnoshon: Mabi Nuquin Papan bēdamboen isnu, quequin nēish pichicate nacnenaid dapa utsi uatiapimbo yacpaden abimbo caimbi,’ quequid muesa nec,” quetiadquidi mibi adenquo iccoc. “ ‘Nuquin Papa mabi bēdamboen isnuequin pichicatequid nēish utsi uatiapimbo yacpaden abimbo caimbi,’ quequid muesa nec,” mibi quepec. ¹⁹ ¿Adenda mimbi bēdamboen chuipe? Pashuachimboen mimbi bēdamboen tantienquo iquec. ¿Mitsicquid bēdambo iquec? “Mabi Nuquin Papan bēdamboen isnu,” quequin nēish pichicate nacnenaid dapa bēdambo icnuc aidēn pichicatequidi nēishquo bēdapabi icctsec. Nuquin Papamboen bēdamboshē iquec. ²⁰ Nēish pichicate nacnenaid caic: “Aid utsi uatiapimbo yacpaden abimbo caimbi,” quequin aid nantequid nēish abitedi chiaidbidi nec. Adembidi ambi: “Mabi bēdamboen isnu,” caid Nuquin Papatsen chuipec. ²¹ Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin

Papatsen mimbi chiec. ²² Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaidtsen chiec. Nuquin Papa tsadaid cain Nuquin Papambo chiec. Aidën chiaidquio tantiec: “Abimbo cachimboen chuiquid icsaquid nec,” quetiadquidi mibi adenquio iccoc.

²³ Bëdambo icquid damianquid yec Nuquin Papan cuidtequido mibi nec. Nuquin Papan chiaid abentsëqui tantiatseëquin min tiedën canitsëquid musuquëmpi bedshun Nuquin Papa mimbi menepec. Aden menequid icquimbi mimbi Nuquin Papan chiaid utsi dadpen niac-niacpec. Chieshëmianquid icboedi: “Ëbi bëdamboen ista,” qesho bëdamboen istiapimbo mibi iquec. Adembidi bëdambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquio iquec. Aden mimbi Nuquin Papan chiaid niac-niacpec. Ambi chiacpadamboen Nuquin Papa menequid icquimbi ambi chiaid utsi abitedi natiadquidi ma mimbi nainquio icpaboc. ²⁴ Tantesa uatsëcquimbi mimbi utsibo icsamboen chiec. Manuampi nibedbantsëcquimbi utsi nuacquid nibedquabi abi nësamëdpanumbobi acachimboembien mimbi nachitec. “Nuquin Papa meneta,” quequin chiauidtsëqui natsëcshun adenuidtsëqui mimbi utsibo namepec. Adenuidtsëqui namequimbi Nuquin Papan chiaid utsien mimbi niac-niacchitec.

²⁵ Nuquin Papan cuidtequido mibi nec. Padiseyobo yec Moisesën dada uapampid chuibanquido yec quequimbi mimbi icsamboen naic. Pada-padaidbëdta dëshote chieshquin cachocuidtsëqui dapanshun anauc ampanambo icquidi ampanaid damianacimboec mibi bëdamboec tabadquid damianquiec. Nuquin Papan chiaid dadpen nainquio icquin mitsanauidi bednuen mibi bunaiduidi mimbi napec. ²⁶ Pamumëdachimboec tantiatiapimbo mibi iquec. Dëshote abichobi bëdamboen ampanacimboec icsaid ucudash bëdambo icca. Adec icsainquio yec ënëdash Nuquin Papan chiacpadec mibi bëdamboec tabadtsiac.

²⁷ Bëdamboec tabadquido mimbi damesho isun Nuquin Papan mibi cuidendac. Unësaid chococacno bëdamboen nacnenac bëdambo isadec ënden pisenambi. ²⁸ Adembidi bëdamboec tabadquid mimbi damec. Matses ismec bëdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

*Padiseyobo chedo cuidte chiaid
(Duc 11.47-51)*

²⁹ Nuquin Papan cuidtequidombo mibi nec. Nuquin Papan oncamiadobëdta bëdamboec tabadquido nuquin tsusedpabon unës uampido tantiaquin aido chococampicno shubu uaquin mimbi nacnempec. ³⁰ Adoshombic: “Nëmbo con tsusedpabon chieshënquin unës uampid chococac. Aidbëd tabadquin ëmbi unës uainquio ictsenëdac. Ëmbien bëdamboen istsenëdac,” qeshun mimbi aido chococacno nacnempec. ³¹ Adoboedëmbi nuquin tsusedpabon bëdambo icquid unës uampicpadomboen adoante bunquin mimbisen chieshtoshon adoaindac. ³² Ai, nuquin tsusedpabon Nuquin Papan oncamiampid unës uacpadombota — quepondash Esus abi unës uate chiec.

³³ Adashic abi padiseyobo chiec: —Nisibimboec icsa uanquido mibi nec. Adquido icsho Nuquin Papan icsano nësecaquin mibi cuidendac. ³⁴ Icsaido icsho isun: “Ma Nuquin Papan bëdamboen iste tantiamenu,” qeshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno cho-choacsho mimbi dadpen unës uaindac. Utsi-utsien cuesten dectanquin utsi-utsien Nuquin Papan chiaid chuibante shubunoshon cueshcaten mimbi cueshcaindac. Utsi-utsien cuesnuequin nadancatanequin shubu utsin shubu utsinquin mimbi cuemetanendac. ³⁵ Adosho isun Nuquin Papan mibi cuidendac. Nuquin Papan chiacpadec bëdamboec tabadsho tsusedpan chieshënquin tauamboen cuesuniampid Abed nepampic. Adoshombic adecbidi bëdamboec tabadsho tsusedpa utsibon utsi-utsien unës uapampic. Adoshombic ënquin Bedequias caidën mado Sacadias caid unës uapampic. Aidi Nuquin Papa tabadte shubu uashunaid dayunshunquio cuesunepampic. Aidedi unës uampido tantiaquin aido unës uaquido cuidacimboen Nuquin Papan mibitsen cuidquiendac. ³⁶ “Yuecshun min tsyuecquido cuidendac,” quec nenquio iquebi. Nëbi caimbi —capondash Esusën abi chieshënquido chuiquin.

*Edusaden yacnocquido Esusën shubi uaid
(Duc 13.34-35)*

³⁷ Adshumbic Esusën chuiopondash. —Tantia, Edusaden yacnocquido. Mibitsen chuinu. Mibi tantiac unësquio iquec. Mibi yacnobidi tabadquin Nuquin Papan oncami-aidon chuisho nuquin tsusedpabon unës uapampic. Adembidi Nuquin Papan: “Isadaidbo chiec nid,” caido chosho utsi-utsien cuënoten seshunequopampic. Adembidi mimbi nëbi naindac. Adquidombo icsho mibi tantiaquiembi. ¿Mitsipadec cachina aton bacuë cud-aspac? “Penushe,” quiaish aton bacuëmpi nua shoccoshon madadec cudasquid. Adecbidi:

“Satanasèn yuanushe,” quiaŝ cudasquieci mibi Nuquin Papa bédamboen ismete tantiametiadiquo iccobi. “Tantiamenu,” cac tantiate bunenquoio mibi icchitoc. ³⁸ Èbi nidambic èbi tantiatiapimbo icŝho Nuquin Papan namlac min shububédtabi mibi nibédamendac. ³⁹ Nèbi mimbi èbi isenquoio yanendac. Padnuen min matsesèn yuecash chosho èbi isendac. Aden isash: “Nuquin Papa yacnuèsh choquid bédambo iquec,” min matses quendac —quequin Edusaden yacnocquido Esusèn chuipondash.

24

Nuquin Papa tabadte shubu uashunaid nibédante chiaid
(Mad 13.1-2; Duc 21.5-6)

¹ Adash Nuquin Papa tabadte shubu uashunaid daquènè uacno tabadanec nidequi Esusbéd icquido Nuquin Papa tabadte shubu uashunaid caic: —En is, Icho. Nèid shubu bédamboen nacnenaidquoio neque —quepondash. ² Adsho tantiaŝhun Esusèn: —Mimbi isboedquoio cuènote bédamboen nacnenaid matses utsibon cuènote chic-chiquendac nibédquiecnuc —capondash.

Nuquin Papan cuidte ushè chiaid
(Mad 13.3-13; Duc 21.7-19)

³ Adanec nidequi macuèsh dapa Odibos caidèn pudundoec poctsebi tabadtuidshun abéd icquidon utsibo tantiamenquoio icquin Esus chuipondash. —En mibi chote chui. Tantianu. “Nèbi choec,” quequin mibi chote çmitsipadembimbi tantiape? Adecbidi çatotsi isashini: “Nuquin Papan cuidte nèbi nec,” quepe? —capondash abéd icquidon. ⁴ Adoaquien Esusèn naden chuipondash: —Tantia. Mibi chuinu. Muaquidoba choendac. Aidon chuisho tantiaŝ: “Abimboen chuichitec,” quenda. ⁵ Adquido choshon: “Nuquin Papan chomiaidquoio Quidistu caid nebi,” quequin muaquin chiaqui dadpeshun: “Ai, abimboen mimbi caic,” capendac.

⁶ Èbi choabi icnuc: “Matses dadpenquoio cuesnan-cuesnanac caosh,” quecuededendac. Adsho tantiaŝ dacuèdenda. Nuquin Papan matses abitedi cuidte ushè choabi icnuc ambi tantiacpadec matses adonanendac. ⁷ Adec matses utsi dadpen icquido matses utsibobéd cuesnanendac. Nidaid utsi-utsiec yacno pete nibédquieci icted-ictedendac. Nidaid utsi-utsiec yacno nidaidquiobi comapenec uèdèquedenendac. ⁸ Adsho isash chido bacuè nèncuenacŝho isun: “Nèbien tishchitec,” quequin tantiacimboen tantiaata. “Nuquin Papan abitedi cuidte nèbi nec,” quequin tantiaata —quepondash Esus.

⁹ Adashic abi onquec: —Èmbi chiacpadquoio icnuc chieshèmènquidon èbi tantiaquido bedshun chieshènquin utsi-utsien cuesendac. Utsi-utsien unès uaindac. Aden nidaid utsi-utsiec yacno tabadquidon dadpeshun èbi tantiaquido chieshènquiendac. ¹⁰ Adoac èbi tantiatŝchoedèmbi chieshtoshon èbi tantienquoio yanendac. Aidèmbi èbi tantiaquid ompodacŝho istuidmeshun mèyamendac. Adashic abipadquid utsibobéd chieshènanendac.

¹¹ Padnuen muaquido: “Nuquin Papan chuiboedquoio chuinu. Tantia,” quependac dadpen. Adsho tantiaŝhun dadpeshun: “Ai, abimboen mimbi chiec,” caindac. ¹² Matses dadpenquoio icsamboecshè tabadsho isun èbi tantiatŝchoedèmbi èbi tantienquoio yanendac. ¹³ Padnuembi èbi choabi icshobi ènenquoio icquin èbi tantiaquido Nuquin Papa yacno tabadmendac.

¹⁴ Èbi choabi icnuc: “Ma matses abitedishun Nuquin Papabéd tabadte tantianu,” qeshun èbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

Matses icsamboshè icquid chote chiaid
(Mad 13.14-20; Duc 21.20-24; 17.22-24)

¹⁵ Adashic abi onquec: —Èbi chote ushè nèbi yanuc matses icsamboshè icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Èmbi chiacpadomboenuidi nata,” quequin Nuquin Papa chieshènquin chiendac. Èndenquimbo nuquin tsusedpa Danied caidèn aden icsa uate chuiquin Nuquin Papan chiaid dada uapampic. Aidèn dada uampid mimbi isaidquoio nec. ¹⁶ Aden: “Nuquin Papa tabadte shubu uashunaid dapa icsa uanuec puduedosh,” qesho tantiaŝ Udeya yacnocquido macuèsh dapa yacno ompodec cuenac bédambo ictsiash.

¹⁷ Adec cuenec shubu dayun icquido puduedenquoio yec: “Con na bednu,” quenquoio yec umanucuèshi cuenac bédambo ictsiash. ¹⁸ Adecbidi badedquoio cuenuen tied nantan icquidon aton dashcute utsi aton shubuno beduanenquoio yac bédambo ictsiash. ¹⁹ Nidequi bacuè usunquid yec bacuè chishmequid yec quec badedquoio cuentiapimbo yec mèyadquiendac. ²⁰ Adec cuente tantiec: “Ue sequenambo cuemenquoio icpashuni,” queta.

“Pete bedmianenquo icnushe,” quias “Chonoadenquo icte ushënquo cuemenquo icpashuni,” queoata. ²¹ Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquo natiambo chieshëmënquieq tabadendac. Nuquin Papan tauamboen matses uac adec tabadenquo icteneq. Nëbi adec tabadenquo iquec. Aido icsamboeshë tabadquido nibëdanambic utsibo adquidpenquo yanoaindac. ²² Adec icsamboeshë tabadte tantiaquin Nuquin Papan: “Ëmbi Esus tantiaquid icmiaido uesquin cuesun sianushe. Matses abitedi nibëdanushe,” qeshun yuenquo icsamboen tabadmenquo icquin ënëdmendac –quepondash Esus.

²³ Nuquin Papan aden ënëdmiabi yac icsamboeshë tabadec utsibo: “Is. Nëid Nuquin Papan chomiaidquo Quidistu neque,” quependac. Utsibic: “Is. Nëidquien Nuquin Papan chomiaidquo Quidistu caid neque,” quequin icsamboen chuioaindac. Adsho tantiahsun: “Nuquin Icho Esus choashien nec,” cainda.

²⁴ Adec muaquidoba choendac. “Nuquin Papan chomiaidquo nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamiaid nebique. Is,” quequin nadatiambo icquin nabanquin ismendac. Adsho isun dadpeshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ëbi tantiaquidontsen: “Ai, abimbo caic,” catsempendac. Nuquin Papan bëdamboen tantiamiado yec adtiapimbo iquendac. ²⁵ “Chieshëmënquido iquendac,” quequin tantienquo icquidën ëbi tantienquo yanushe,” qeshun: “Aden ëbi tantiaquido chieshënquiendac,” quequin chiombi –quepondash Esus.

²⁶ Adashic padpidec onquec: –Ëmbi aden chuiboed tantiahsun utsibo muasho tantienda. Ëbi caic: “Utsibo ismenquo yec matses nibëdacno choac caoshe. Isnu. Nid,” cac istanenda. Ademibidi: “Choash nëid shubun puduedac caoshe. Isnu. Nid,” cac ademibidi istanenda. Muambo neque. ²⁷ Ëbimbo padpidec choquimbimbi abitedimbo ismendac. Abu ushëmbi yec bed-bedquetanesho ¿ada matsesën abitedishunquo isenquo icpadic? Ai, isec. Ademibidi ëbi choasho matses abitedishunquo isendac. ²⁸ Adec choendabi. ¿Ada edeste pisen chec budenquo icpadic? Ai, budec. Adecbidi Nuquin Papan cuidte ushë chonoc choendabi –quepondash Esus.

Abi chote Esusën chiaid

(Mad 13.24-37; Duc 21.25-33)

²⁹ Adashic padpiden chieq: –Aden matses icsamboshë icquidon ëbi tantiaquido natiamenubi ushë chënquenquo yanendac. Inchëshën ushëtsen chënquenquo yanendac. Uispa chedo paëdbudnendac. Uispabimboecquid abitedimbo uëdëquendac. ³⁰ Adnubini abitedishun Icho yec dacuëdampambo yec abucueësh choendac. Ëbi nadatiambo icquin nabanquidquo yec chosho isash cuidadtequido abitedimbo dacuëdec natiac shubiquiendac. ³¹ Adnuc nua shoncanubimbi Nuquin Papan abi yacnoshon uaido mayan bëdabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

³² Ëmbi chuibocpadquieq yansho isun: “Esus chote nëbi nec,” quequin tantiata. ¿Mitsipaden: “Seta taëc,” quequin tantiapeq? Suc seccuduquiaid isun: “Nëbi seta taëc,” quequin tantiaquid. ³³ Ademibidi ëmbi chuiboed isun: “Nëbimbobi Esus choec,” quequin tantiata. ³⁴ ¿Muectabi nedi? Ëmbi chuibocpadquo iquendac. Ëmbi chiacpadec yanabi matses abitedi nibëdantiapimbo iquendac. ³⁵ Abimbo caimbi. Abu nibëdanendac. Nidaidsen nibëdanendac. Padnuen ëmbi chuiboedquo nibëdantiapimbo iquendac. Bënudenquo iquendac. Ucuttiapimbo iquendac. Ëmbi chuibocpadquo iquendac –quepondash Esus abëd icquido chieq.

Esus chote ushë tantienquo icte chiaid

(Mad 13.32-33; Duc 17.26-35)

³⁶ Adashic abi onquec Esus: –Ëbi chote tantienquo iquembi. “Aid ushënquo choendabi,” quetiapimbo iquebi. Ademibidi mayan bëdabon tantienquo iquec. Ëmbibi Nuquin Papan Madonquibi tantienquo iquembi. Nuquin Papanuidtsëquien tantieq. ³⁷ Matses ëbi caic: “Nëbi choec,” quetiapimbo icnuq choendabi. Noen cano nacnenubi ¿mitsipaden aton matses icsambo icquidon tantiapampic? ³⁸ Nidaid abichobi mauanabi icnuq: “Nuquin Papan nuqui cuidendac,” quequin tantienquo icquin peshun acquinc aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaqin nacnenash puduedpampic. ³⁹ Aton matses: “Nëbimbobini Nuquin Papan cuidchiteq,” quenquo icnubi ue dapambo choec mauanquidën matses abitedimbo unësbudnepampic Noe ambi cano anshubu uaidën nuadtonobi. Adecbidi Nuquin Papan cuidtequido ëbi caic: “Choec,” quenquo icnubini choendac.

⁴⁰ Choquin Nuquin Papa yacno tabadmenuen beduamendambi. Ëmbi: “Bedtan,” cac tied nantan dada daëd icsho istuidshun ëbi tantiaquid abentsëc icsho beduanendac. Utsibic ëbi

tantiesa icsho nianendac. ⁴¹ Adembidi Nuquin Papa yacno tabadmenuen chido daëdshun macueso istuidshun abentsëc ëbi tantiaquid icsho aid abentsëc beduanendac. Chido utsibic ëbi tantiesa icsho nianendac.

⁴² Aden ëmbi chuiboed tantiashun: “¿Nëbida con Icho chopeba?” quequin ënenquo icquin tantiata. Ëbi chote mimbi tantienquo iquec. ⁴³ ¿“Nëbi ampequidën ampec,” quequinda tantiapadic? Padenquo. Tantiapadënquien aid ushënquo aton na bédamboen isquin ampemenquo ictsiash. Aden tantienuo icquin: “Ampesho isnu,” quequin ënenquo icquin isquid. ⁴⁴ Adembidi ëbi chote ushë mimbi tantienquo ye. ¿“Nëbida nuquin Icho chopeba?” quec Nuquin Papabéd tabadte bunec bédamboec tabadta. Matses dadpen: “Nëbien chochitec,” quenquo icnubini choendac —quepondash Esus abéd icquido chieç.

Esus bédamboen cainte chiaid
(Duc 12.41-48)

⁴⁵ Adshumbic abi bédamboen cainte Esusën chuipondash. —Tantia. Aton icho tantiaquin yua bédambo icquidën naid mibi chuinu. Icbon: “Ëbi nidan mibëdta yuaido pete sandoaid musucshun ëmbi chiacpadën ëmbi chiacpadënquien menianeta,” cac yua bédambo icquidën adotsiash. ⁴⁶ Adnubien icbon choshon ambi chiacpadomboen yuan nasho isun bédamboen istsiash. ⁴⁷ Adshumbic aton yua chuitsiash. “Bédamboen tantiaquid mibi neque. Con yua utsibo namequin con natedi dayun uata,” catsiash icbon yua bédambo icquid caquin. ⁴⁸ Padnuen yua icsambo icquid: “Ëndenquimbo con icho nidondash. Choenquien icchitec. Con nauidi nanu,” ⁴⁹ quiampatsiash. Adshumbic chieshtoshon abëdta yuaido cuesanetsiash. Adashic icsambo icquidobëdi icsamboec tabadtsiash. ⁵⁰ Adec: “¿Nëbida con icho chopeba?” quenquo icnubien aton icho chotsiash. ⁵¹ Choshon ambi chiacpadomboen nainquo icsho istuidshumbic: “Icsambo iquec,” qeshun comapenen cuesquin cuesunetsiash. Adembidi Nuquin Papan icsambo icquido cuidendac. Bédambo icquid damianquido cuidacno icsamboshë yacno nidmendac. Adoac natiaic shubiquendac —quequin abi bédamboen cainte Esusën chuipondash.

25

Chido 10tedshun cainaid

chiaid

¹ Adshumbic Esusën ompoacbimboen chuiquin abi chote ushë tantienquo icte chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuishonguec aibdëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” qeshun aton tabote bëchin taboadquid icho-icboen buanuen sanambededpac caondash. ² Aid chido Stedi tantienquo icquido icnubi 5tedbidi bédamboen tantiaquido icpac caondash. ³ Tantienquo icquidon: “Tabote bëchi naimëdsho cushtonon buanu,” quenquo icquin bëchi uesadbudtsaid taboteuidtsëqui sananquin cainpac caondash. ⁴ Padnuen bédamboen tantiaquidon naimëdsho cushtonoequin tabotebëdta sedunten cushtoaid bëchi sananquin cainpac caondash. ⁵ Aden cainaqui: “Chido bedtanu,” quianec nidboed choenquo icsho isash abitedi ushcastoash ushcuededpac caondash. ⁶ Inchësh poctsemboen: “Choeque. Bëquednu. Nid,” cac ⁷ isucunshun chidobon taboelon tabote dëbedpac caondash. Adoshon bédamboen tantiaquidon ambi bëboed bëchi cushtonobien ⁸ icsamboen tantiaquidon: “Bëchi beccho. Con na naimëdeque,” caquien bëchi bëboedën ⁹ bédamboen tantiaquidon: “Padi. Mibi meniäc con na uesadtsiash. Aid uesadan shubun puduedabi nuquitedi inchështsiac. Piucquid menequin bëchi cushtoquid baded cushtometan,” capac caondash. ¹⁰ Adoac bëchi bedec nidnubien chido bedtanec dada chopac caondash. Chosho bédamboen tantiaquidon aton tabote taboshon chido bedtanec choquid bëquedtapac caondash. Adtanec abëdi choash puduedshun bëtashte puduedtiapimbo icnu bédamboen bëtashpac caondash. ¹¹ Adnubien bédamboen tantienquo icquido bëchi bedtanec chopac caondash. Choshon shëcuë bëtashacsho isun: “Shëcuë shëcne, buchi. Èbitsen puduednu,” ¹² caquien chido bedquid: “Padi. Ëmbi tantiacmaido mibi nec,” quepac caondash.

¹³ Ëmbi chuiboed tantiashun chido icsamboen tantiaquido tanenda. Bédamboen nabi icsho: “Ëmbi tantiacmaid mibi neque. Puduedenda,” aido cacbimboen ëmbitsen Nuquin Papa yacno puduedmenquo icquin cacumechitomane. Ëbi chote ushë tantiaquid icnu: “¿Nëbida con Icho chopeba?” quequin ëbi bédamboen tantieç ëmbi chiacpadec bédamboec tabadta —quepondash Esus abéd icquido chieç.

Icbon piucquid daëd uaid chiaid
(Duc 19.11-27)

¹⁴ Adshumbic abi tantiaquidon ambi chiacpadomboen nate Esusën ompoacimboen chuioapondash. Ënapen nidnun aton piucquid dadpen dayun uaquidën aton yuabo: “Ëbi piucquid daëd uashunta,” quequin chuipac caondash. ¹⁵ “Nëidën bédamboen tantiaquidquo icquin con piucquid ëbi daëd uashuntsiash,” qeshun aton yua piucquid Stedi meniäc caondash. Adshumbic: “Nëidëntsën bédamboen tantiaquin ademibidi con piucquid ëbi daëd uashuntsiash,” qeshun utsitsen 2tedi menepac caondash. Adshumbic: “Nëidëntsën bëdiäcstëc tantiätsëcquin ademibidi ëbi con piucquid daëd uashuntsëcstiasih,” qeshun utsitsen piucquid abentsëcquiobi menetsac caondash. Adanec nidpac caondash icbo. ¹⁶ Adnubien piucquid Stedi bedboedën aton matsesën nacpadomboen piucquid daëd uanuen utsibo menequin yuecshun ambi meneboed udictsëc dëniäcquin bedoapac caondash. Sincoted icboedi 5tedbidi bedoapac caondash 10ted icnuc. ¹⁷ Ademibidi piucquid 2ted meneboedën 2bidi daëd uapac caondash 4tedi icnuc. ¹⁸ Padnuen abentsëc meneboedën chieshquin aid daëd uainquo icquin ambi uëdëshcaboed shëcuë anantsëcquin piucquid abentsëqui ompopac caondash.

¹⁹ Yuecquo ictaneshumbien icbon choshon ambi piucquid meniondaido chuituidpac caondash. “¿Atotsi nao?” cac ²⁰ sincoted meniondaidën: “Is, icbo. Mimbi ëbi meniondaidtedbidi daëd uaombi. Nëbi mitsana 10tedi iquec,” caquien ²¹ icbon: “Ai, con na daëdpactsëc icboedi daëd uaquin mimbi bédamboen nac. Nëbi ëbëdtan chuiquid dapa icta. Ëbëd cuishonquec tabadec cho,” capac caondash. ²² Adnubien piucquid 2tedi meniondaidën: “Is, icbo. Mimbi meniondaid 2ted icboedi daëd uaondambique. Nëbi mitsana 4tedi iquec,” caquien ²³ icbon: “Ai, ëmbi chiacpadomboen mimbi con na daëd uac. Nëbi ëbëdtan chuiquid icta. Mibitsen ëbëd cuishonquec tabadec cho,” capac caondash.

²⁴ Adnubien piucquid abentsëcquiobi meniondaidën chieshquidëntsën: “Mimbi ancaidon nidtsinaid peteuidi bedquid mibi nec, icbo. Mimbi chiacpadomboen nainquo icsho isash chushcanquidquo mibi nec. ²⁵ Adec dacuëdampambo icquid icsho mibi dacuëdëntquin mimbi meniondaid piucquid ompoquin chococaondambi. Nè mimbi meniondaiduidtsëqui ictsec,” caquien ²⁶ icbon: “Chieshquiec mibi icsac. Ëmbi chiacpadomboen nambo mimbi iquec. Ëbi caic: ‘Ancanquid icquin ëbi chushcanushë,’ qeshun ²⁷ nuquin matsesën nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshquin mimbi icsamboen nac,” ²⁸ quepac caondash. Adshun aton yua utsi caic: “Chieshquidën na bedshunshun piucquid 10ted dayun uatsëcboed mene,” cac meniäc 10ted icboedi 11ted yanac caondash. Adshumbic chieshquid comapenen cuidpac caondash. ²⁹ Ademibidi naindambi. Ëbi tantiaquin ëmbi chiacpadomboen naquid ademibidi namequin bédamboen tantiamendambi. Ëbi tantiesabo ëmbi chiaid niacquid bédamboen tantiamenquo iquendambi. ³⁰ Aid yua icsambo icquid cuidacimboen Nuquin Papan ëbi tantiesabo cuidquiendac. Ambi icsaido cuidquiäcno nësecac natiaic shubiäquendac –quepondash Esus abëd icquido chieic.

Matses nashunesa cuidte chiaid

³¹ Adshumbic Esusën padpiden chuipondash. —Nuquin Papan abi yacnoshon uaido mayan bédabobëd choec: “Abitedishun Icbomboeni nec,” quiash bëchamauampamboec dacuëdampamboec choequi chuiquid dapan tsadten tsadtoquin abitedi ismendambi. ³² Adshumbic matses abitedimbo cho-chomequin tsidadmendambi. Adshumbic icbon aton nauidquo tsinacacimboen ëbi tantiaquido naden chiendambi. ³³ “Ëbëd tabadtequido mibi neque. Nëmbo con abiuc tabadec cho,” caindambi. Adshumbic ëbi tantiesabo chuiquin: “Ëbi tantiesabo cuidadtequido mibi neque. Con copioc tabadec cho,” caindambi. ³⁴ Adshumbic ëbi tantiaquido padpiden chuioaindambi. “Ëbëdi tabadec cho. Matses uaquin tauabi ëndenquimboshë mibi caic: ‘Aido ëbi tantiaquido icmeshun ëbëdi tabadmendambi,’ quequin Nuquin Papan tantiaidombo yec ëbëdi bédamboec tabadec cho. ³⁵ Mimbi ëbi nashundenec. Bundoacsho mimbi ëbi pemedenedec. Acte bundoacsho ademibidi mimbi ëbi acmedenedec. Mimbi isacmaidquo icsho mimbi ëbi yuedtenec. ³⁶ Con dashcute nibëdsho mimbi ëbi dashcute menenedec. Daicsabudtsash unëstiaätsëcquo icsho ëbi tantiec mibi datsadtenec. Quënën nauedacsho mimbi ëbi isuan-isuandenedec,” caindambi. ³⁷ Adoäquien bédamboec tabadquido: “Tantiaädenquo icnuc mimbi chuipac, icbo. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. ³⁸ ¿Ëmbi isacmaidquo icshodambi mibi yuedtionda? Mambi padambo yoc. ¿Dashcute nibëdshodambi mibi dashcute menepacti? Mambi padambo yoc. ³⁹ Mibi daicsacsho datsadambo iquebi. Quënën nauedacsho mibi istianambo iquembi. Mimbi tantiaädenquo icnuc chuipac,” ëbi caindac. ⁴⁰ Adoac naden chiendambi. “Tantia. Mibi chuinu. Ëmbi

chiacpadomboen ëbi tantiaquido utsibo bédamboen isquin mimbi nashundenec. Aden ëbibi nashunacimboen mimbi utsibo nashundeneque. Èbëdi tabadec cho,” caindambi.

⁴¹ Adoshombic ëbi tantiesabotsen chiendambi. “Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan Satanas aton yuabo podobitsi icsabobëdta ënenquio icquin cuidacno nid. ⁴² Èmbi chiacpadomboen ëbi tantiaquido nashunesambo mibi icteneque. Bundoacsho mimbi ëbi pemenquio ictenec. Acte hundoacsho mimbi ëbi acmenquio ictenec. ⁴³ Mimbi isacmaid icsho mimbi ëbi cacumedenec. Dashcute nibëdsho mimbi ëbi menenquio ictenec. Daicsacsho isash mibi ëbi datsadenquio ictenec. Quënën nauedacsho mimbi ëbi istanenquio ictenec,” caindambi. ⁴⁴ Aden chiaquien: “Tantiadenquio icnuc mimbi chiec. ‘Pete bundopash,’ quequin tantienquio iccondambi. ‘Acte bundopash,’ quequin tantienquio iccondambi. Èmbi isacmaid icsho mambi mibi isambo yoc. ¿Min dashcute nibëdshodambi mibi istionda? Mambi padambo yoc. Mambi mibi daicsacsho isambo yoc. Mibi quënën nauedaid tanti-ambo iccondambi. Tantiadenquio icnuc mimbi chuipec,” caindabi ëmbi chiacpadomboen naisabon. ⁴⁵ Adoac naden chiendambi. “Èbi tantiaquido nashunenquio icquin ëbibi nashunenquio yacimboen ëmbi chiacpadomboen naisabo mibi neque. Nuquin Papan cuidacno nid,” caindambi. ⁴⁶ Adoac icsamboec tabadquido ënenquio icquin cuidacnombo nidnubi bédamboec tabadquido Nuquin Papa yacno ënëdenquio yec tabadendac —quequin Esusën chuipondash.

26

Esus bedshun unës uanuequin chiaid
(Mad 14.1-2; Duc 22.1-2; Uan 11.45-53)

¹ Aden abi chote ënquin chuitanquimbic abi unës uatetsen abëd icquido Esusën chuipondash. ² —Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquio icnu,” qeshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten dectamendac —quepondash Esus.

³ Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun puduedpuduedpac caondash. ⁴ Adashic: —Nëbien Esus unës uametiad utsibo ismenquio icquin bedshun. ⁵ Nuquin matses obeca pec tabadnuc bedenquien ictiad. “Esus bédambo icquidi cuesunec,” qeshun obeca penuec cho-choquidon nuqui cuesnushe —quepac caondash.

Chidon Esus machiuinaid
(Mad 14.3-9; Uan 12.1-8)

⁶ Adnubien Esus shubu dadpen icquid Betania caid yacno choash ambi daushumbo yec daicsaid bédamiondaid Simon caidën shubun puduedpondash. ⁷ Puduedshun pec samëdshobien chidon puduedshun ambi piucquid dadpenquio menequin bedaid tēchumpin icquid bédambo nuadquid Esus machiuimpondash: —Esus bédamboshë icquid nec —qeshun. ⁸ Adsho isumbien Esusbëd icquidon: —¿Adenda bédamboen nai? Ma icsambo yoc. ⁹ Utsibo menequin dadpen piucquid bedshun piucquid nibëdquido aid piucquid menetiadquidi mibi nec —quequin chido chushcapondash.

¹⁰ Adsho tantiashumbien Esusën: —¿Atotsieshun chido chushcai? Èbi bédamboen tantiaquin ëbi ismequin bédamboen nashunebique. Chushcainda. ¹¹ Mimbi chuiboed piucquid nibëdquido ënëdenquio yec mibëdi tabadendac. Èbien mibëdi tabadenquio yanendac. ¹² Èbi unës uashun chococate tantiachimboen machiuinoshibique. Chushcainda. ¹³ Èmbi chiaid chuibeniacnoshon nëid chidon ëbi machiuimboed chiendac —quepondash Esus abëd icquido chiec.

Udasën Esus bedmenun piucquid bedaid
(Mad 14.10-11; Duc 22.3-6)

¹⁴ Adnubien Udas Iscadiote caid Esusbëd icboedi Esus chieshënquido chuiquid dapabo chiec nidpac caondash. ¹⁵ Nidshumbic chuituidpac caondash. —Utsibo ismenquio icquin mibiuidtsëqui Esus bedmenu. ¿Tetsi piucquid ëbi menetsia? —caquien badedi pudunquin piucquid shocoshëmpi 30ted icnuc tambantanquin menepac caondash: —Baded ëbi bedme —quequin. ¹⁶ Meniac bedanec nidec: —¿Mitsishunquiemi utsibo ismenquio icquin Esus bedmepeba? —quepanëdash Udas. Adashic Esusbëdi tabadoaic chopondash.

Unësnush abëd icquidobëd Esus pec tabadaid
(1Cod 11.23-26)

¹⁷ Adnubien Esusbéd icquidon: —Equipito yacnuësh cuenun pan bidiscamiabi yampid 7tedec ushquin tantiaquin tauaid ushë nëid nec —qeshun Esus chuipondash. —Nuquin Papan nuquin tsusedpabo unës uamenquo icquin matamiampid inchësh tantiaquin obeca bacuë penuen çmitsishunquiemi mibi codocashumpe? —caquien Esusën: ¹⁸ —Edusaden yacno nidshun èmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiacpadombo uesquin nabanemi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedenu,’ quiosh,” quequin chiec nid ¹⁹ —cac nidquimbi shubu icbo chuituidac caondash. Adoac: —Ai, ma chobono —qesho tantiaashumbien abia nidboedon aidën shubun puduedshun penuen nëish yua obeca codocapaccondash. Adnubien Esus chedo puduedpondash.

²⁰ Inchëshëmbi abéd icquido 12tedbéd samédquin Esusën pepondash. ²¹ Pec samédquin Esusën chuipondash. —Tantia. Mibi chuinu. Èbi chieshënquido èbi bedmequid abentsëc nëmbobi iquec —qesho tantiaashun ²² unësquio yanshun abentsëcschun abentsëcschunquien Esus chuipondash abéd icquidon. —Èbida cai, Icho? —quequin abi chuishobien ²³ Esusën: —Èbédtan pete codocaid ènë punqid èbi bedmequid nendac. ²⁴ Èbi Nuquin Papan chiaid dada uamepampicpadquid matsesmiaid yec unësendabi. Padnuen èbi bedmequid comapen cuidtequidquio nec. Anin aid tishenquo icpatecnédan. Cuidac natiaquiendac —quepondash Udas caic.

²⁵ Adoquien Udasën abi bedmequidënquo: —Èbida cai, Icho? —caquien: —Ai, mibibimbi caic —capondash. Adoac Udas puduenanec nidpondash.

²⁶ Adshumbic Esusën pete sananquin: —Mimbi pete uaid nëid nec. Mibi bédambo iquec, Papa —quequin Nuquin Papa chuitanquin cuësh-cuëshbanshun abéd icquido menebampondash. —Nëid cuësh-cuëshquin nibédamiachimboen èbi mëyanquin unës uaindac. Èbi unës uate tantiaquin nëid peta —cac pebededtsëccondambi. ²⁷ Adshumbien Esusën dëshoten actequid cushtoshon sananquin: —Mimbi uaid nëid nec. Mibi bédambo iquec, Papa —quequin Nuquin Papa chuishun: —Nëid abitedishun acbeded —cac dëshoten abentsen cushtoaid pictsë-pictsen acbampondambi. ²⁸ Aid actequid acshobien Esusën: —Nuquin Papan chiaid nuquin tsusedpan dada uampampicpadec èbided cuidadec unësendabi. Nëid acquin: “Esused Nuquin Papan cuidac aton intac siebudpamboec unësposh. Aton Madoded cuidshun Nuquin Papan èbi padenquo iquec,” quequin nëid acquin tantia —capondashi.

²⁹ Adashic: —Nadquid actequid padpiden aquec cuishonquec mibédi tabadenquo iquendabi. Nuquin Papan abitedishun Icbombo icmiac abi yacnombo mibédi cuishonquec tabadendabi —quepondash Esus èbi chedo chiec. ³⁰ Adashic cuëdënten abentsec cuëdënash macuësh dapa Odibos caid pudundonoec nidanepondash Esus Udas Esus chieshënquido chiec nidbon.

Petedo chieshuidte Esusën chiaid

(Mad 14.26-31; Duc 22.31-34; Uan 13.36-38)

³¹ Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chiacpadec èbi nianec mibitedi niquendac. Nuquin Papan naden chuiampic. “‘Icho cuesnu,’ canubi aton yuabo niquendac,” quequin Nuquin Papan dada uamepampicpadec mibitedi adec niquendac. ³² Padnueni unësash uincuenendac. Adanec mibi cainuec nidaid cuëshë utsi Cadidia caid yacno èbia nidendabi —quepondash Esus abéd icquido chiec.

³³ Adoquien Petedo: —Mibi cuesnuec cho-chosho isash utsiibo dacuëdec niqunec èbimboen cuenenquimbo ictsiandac —qeshobien ³⁴ Esusën: —Tantia. Mibi chuinu. Nëid inchëshëmbi cachina bënë cuëdanabi icnuc: “Èmbi isacmaidquio aidi nec,” mimbi èbi caindac. Cachina bënë cuëdanabi icnuc 3tedec mibi adendac —caquien ³⁵ Petedo: —Pada. Adtiapimboeni iquec. Chieshëmënkuidon: “Esusbéd icquid mibi neque. Mibi cuesunenu,” caqui: “Èmbi isacmaid neque. Padi,” quenquo iquendabi. Mibédquiobi unësstsiandabi —Petedo quenubini: —Ai, èbibic adecbidi ictsiac —quecuedepondabi Esusbéd icquidotedi.

Quetsemani caid yacnoshon Esusën Nuquin Papa chiaid

(Mad 14.32-42; Duc 22.39-46)

³⁶ Adanec nidequi cuête dadpen nitsinacno Quetsemani yacno nidpondash. Auëshquio Esus nadpondash. —Ambobi tabadta. Udicsëc nidshun Nuquin Papa chuitanu —quepondash.

³⁷ Adashic Petedobédta Sebedeyon mado daéd buanec nidpondash. Udicsëc nidequi unësquio yanec shubiantiadtsëcquio yampac caondash. ³⁸ Adshumbic Petedo chiec: —“Matsestedi icsaid èmbi bedshunsho isun Nuquin Papan èbi istiapimbo yanendac,” quias unësquio iquebi. Èbi yacpadec ushenquo yec nëmbobi isec tabadta —quianec ³⁹ udicsëc nidash nidaidën uebudshun Nuquin Papa chuiampac caondash. —ÈAda mimbi èbi unës

uamenquo icpatsia, Papa? Mimbi: “Ai, mibi unēs uamenquo iquemi,” cac bēdambo ictsiabi. Mimbi: “Nēbi mibi unēs uamenu,” cac mimbi tantiacpadequi unēsendabi —quepac caondash Esus Nuquin Papa chiec.

⁴⁰ Adtanec choshon isquien Petedo chedo ushpec: —Ushenquo yec isequi tabadta —caboqui. —¿Yuec-yuecpactsec ushenquo icquin istiapimboda icco? ⁴¹ “Satanasēn icsamenushe,” qeshun ushenquo icquin Nuquin Papa chuita. “Ushenquo iquebi,” queboedobi ushcas mēmunenquo yec mibi ushpec —capac caondash Esusēn Petedo chedo chuiquin.

⁴² Adtanec padpidec nidoashun Nuquin Papa chuioaic: —Ēbi unēs uametiadquo icquin ēbi unēs uameta, Papa. Ēbi unēs uametiapimbo icquin mimbi ēbi unēs uamenquo ictsiac. Mimbi tantiacpadomboen nata, Papa —quetanec ⁴³ choaquin isquien Petedo chedo ushoaic ushcas mēmuntiapimbo yec.

⁴⁴ Adsho istanec nidoashun ambi chuibocpadomboembidi Esusēn Nuquin Papa chuitanepac caondash tedesteden.

⁴⁵ Adtanec choaquin ushach usho istuidoashun: —¿Ushecta ue? Nēbimbobi ēbi unēs uamenuen ēbēd icboedēmbi icsambo icquido ēbi bedmeque. ⁴⁶ Nidnu nid. Is. Ēbi bedmenuec ēbi bedmequid choeque —quepondash Esus Udas chosho isash.

Abi chieshēnquidon Esus bedaid

(*Mad 14.43-50; Duc 22.47-53; Uan 18.2-11*)

⁴⁷ Adnubien Udasēn Esusbēd icboedēn bedtanac matses dadpen cuesantiadpambo yec chēshtebēdta cuate sanambēdētsēcquiec cho-chopondash. Nēish yua abided unēs uaquido chuiquid dapabobēdtan con matses tsusiobon: —Bedtan —cac cho-chopondash. ⁴⁸ Ambi bedtanaidobēd cho-choquimbien Udasēn: —“Nēid Esus nec,” quequin adoendambi —abi quiacpadembi ⁴⁹ Esus tansudcatuidpondash: —Chobi, Icho —quequin. ⁵⁰ Adoaquien Esusēn: —Ēmbi tantiaboedquo mibi nec. Ēmbi adoboedēnquiobi mimbi tantiacpadomboen nata —qeshobien cho-choquidon Esus bedtuidpondash. Aden bedshun: —Cuidmenun chuiquid dapa yacno mibi buanu —capondash.

⁵¹ Aden Esus bedshobien abēd icquidēn abi tsusudaid chēshte chictanquin chuiquid dapan yua pateshunepondash. ⁵² Adshobien Esusēn: —Padi. Chēn. Min chēshte tsusudoata. Cuesanquid icsho adembidi cuidnushe. ⁵³ ¿Tantienquioda ique? Ēmbi chiac con Pan ambi abi yacnoshon uaido mayan bēdabo dadpenquioshē ēbi cudasmenuen chometsiash. ⁵⁴ Nuquin Papan aden ēbi cudasmiac bedatiapimbo icsho ¿mitsipaden Nuquin Papan chuiquin dada uamiampicpadomboen ēbi naden bedpatsiash? —capondash pateshunianquid chuiquin.

⁵⁵ Adashic abi bedquido chiec: —¿Atotsi quenuec chēshtebēdta cuate sanambēdētsēcquiec ēbi bednuec cho? ¿Nuqui chuiquid dapan chiaid niac-niacquin matses cuesanquid chuiquid dapadabi nedi? Mabi mimbi isboedquiobi neyoc. Badiadquidēn badiadquidēnquin Nuquin Papa tabadte shubu uashunaid daquēnē uaidēn puduedshun chuideneshobi ma mimbi ēbi bedenquo icboc. ⁵⁶ Padenquo icboedombi Nuquin Papan tantiacpadēnquiobi mimbi ēbi bedec. Ēbi bedte chuiquin Nuquin Papan nuquin tsusedpa dada uamiampicpadomboen mimbi ēbi bedec —quequin Esusēn chuinubini niquepondac: —Cuenenquo ictsiabi —queboedi.

Caipas caid yacno Esus buanaid

(*Mad 14.53-65; Duc 22.54-55, 63-71; Uan 18.12-14, 19-24*)

⁵⁷ Adnubien chuiquid dapambo Caipas cuēmēdquid yacno Moisesēn dada uampid chuibanquidobēdi tsusio utsibo cho-chopac caondash. Adnubien ambobi Esus bēpac caondash. ⁵⁸ Adnubien Petedo uanoshon isbēec tsyuec chopac caondash. Choash chuiquid dapabo tabadacno daquēnē uaidēn puduedpac caondash. Adashic Esus mēyansho isnuec puduedash chuiquid dapan namiaido sondadobēdi tsadtuidpac caondash Petedo.

⁵⁹ Adnubien cho-choboedo tsusio dapabo: —Esus unēs uamenuen: “Esus icsasho isombi,” quequin muaquidon chuisho tantianuna —qeshun chomiach muaquido dadpeshun: —Esusēn icsamboen nasho isombi —quequin chuipac caondash. ⁶⁰ Aden Esusēn naid muaquin chuiquin Esus unēs uatiadquo icquid chiamo icpac caondash. Adnubien muaquid daēdshun chuituidpac caondash. ⁶¹ —Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daēdec ushquin nainendambi,” ma Esus quepondac —quepac caondash.

⁶² Adshobien chuiquid dapabo chuiquidēn Esus chuiquin: —¿Atotsi quenuec ado? ¿Atotsi nēidēn chiec? —caquien ⁶³ Esusēn ēcbēdenquo icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” qeshun abimbo cata. ¿Nuquin Papan chomiaidquo aton Madombobida mibi nepe? —caquien ⁶⁴ Esusēn: —Ai, mimbi chiaidquo nebi. Tantia. Mibitedi chuinu. Nuquin Papan abitedishun Icbombo icmiacshobini mimbi

isendac. Adecbidi Nuquin Papa yacnuësh padpidec choec abu ushu yacnuësh choshobini mimbi isendac —quepac caondash Esus.

⁶⁵ Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec muaposh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiashun ⁶⁶ ¿Atotsi natiadquoio ique? —caquien abëdtan chuiquid utsibo: —Adquid cuidquid quedeneque. Unës uamequimbien ictiad —quecuededpac caondash.

⁶⁷ Adshumbien Esus chieshênquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen istiapiambo icnuc Esus dashcuten bëpuctanquin mëdanten bëcues-bëcuespac caondash. ⁶⁸ Bëcuestanquin: —“Nuquin Papan madombobien nec,” canu. En chui. Tantanu. ¿Tsundan mibi naoshe? —cabededtsëcquien mamênshumpac caondash Esus.

*Esus caic: Ęmbi isacmaid nec, quequin Petedon chiaid
(Mad 14.66-72; Duc 22.56-62; Uan 18.15-18, 25-27)*

⁶⁹ Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbëd ma mibi icpaboc —caquien: ⁷⁰ —Tantiadenquoio icnuc mimbi chiec. Ęmbi isacmaidquoio mimbi chiec —quec Petedo muaic taëpac caondash.

⁷¹ Adanec daquënë uaidën puduedte shëcuë dayun nidash niduntuidpac caondash.

Adshobien chido yua utsin: —Nasaded yacnocquid Esusbëd ma nëid icpaboc —caquien ⁷² Petedo: —Ma ëmbi isacmaidquoio Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

⁷³ Adash yuec-yuecpectsëcshumbien ambo tabadquidontsen Petedo chuipac caondash. —Aidbëd icquidien mibi nec. Cadidia yacnocquid onquiachimbiboec ma mibi onquepayoc —quesho tantiash ⁷⁴ Petedo: —Comapenen Nuquin Papan cuidchitoshe muasho. Abimbo caimbi. Ma ëmbi isacmaidquoio neyoc —queoapac caondash.

Adec 3tedec Petedo manubien cachina bënë cuëdampac caondash. ⁷⁵ Adsho tantiashun Petedon Esusën chuiboedquoio tantiactampac caondash. —Cachina bënë cuëdanabi icnuc mimbi ëbi caic: “Ęmbi isacmaid nec,” capendac tedesteden —quequin Esusën chuiboedquoio tantiactanec umanuc puduenanec nidëc Esus muauabosh natiac shubinidpac caondash.

27

Pidato caid yacno

Esus buanaid

(Mad 15.1; Duc 23.1-2; Uan 18.28-32)

¹ Adnubien chuiquid dapabo aton tsusio utsibobëdi Esus isec ushenquoio badiadpondash. Badiadshun Esus chieshênquin: —Nuqui yuaquid ancanquid Esus unës uamec nidnu. Nid —queshun ² podo cataneshun ancanquid Pidato cuëmëdquid ismenuen Esus buampac caondash.

Esus bedmequid Udas têtaniadaid

³ Adnubien Udas Esus bedmeboed: —Unës uamechitembien iquec. Unës uametiapiambo iquebi. Ęmbi bedboed piucquid shocoshëmpi 30ted meneoatanu —quianec abi meneboed tsusiobo menenuc nidpac caondash. ⁴ Nidshun tsusiobo chuituidpac caondash. —Icsachitobi. Unës uanuequido bëdambo icquidi bedmechitombi. Nëid mimbi meneboed mibi menenuc chobi. Në bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic. ⁵ Adoaquien Nuquin Papa tabadte shubu uashunaid shëcuën ambi bedboed shocoshëmpi piucquid ansecanec nidash uano cuenash têtaniadpac caondash Udas.

⁶ Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibëdta dayun uatiapiambo iquec. Unës uanuen meniadaid shocoshëmpi dayun uatemaid quedeneque. ⁷ Matsun nacenquidën tied bedquin nëid menenuna. Nuquin matsespenquoio isedquido unësacsho ambo chococanun aid tied bednuna —queshun piucquid meniac caondash. ⁸ Aidon bedacsho isun nëbi aid tied cuënquin nadopec. —Unës uamequidën bedaid tied nec —capec. ⁹ Aden Udasën shocoshëmpi 30ted menete nuquin tsusedpa Edemias caidën dada uapampicpaden napac caondash. Naden dada uapampic. “ ‘Aid bednuen Isadaidbon piucquid shocoshëmpi 30ted meneuidaid bedoashun ¹⁰ matsun nacenquidën tied bedquin meneoapondash,’ quequin Nuquin Papan chiaid dada uaombi,” quepampic Edemias.

*Pidato caidën Esus chuimiaiä**(Mad 15.2-5; Duc 23.3-5; Uan 18.33-38)*

¹¹ Adnubien isadaidbo yuaquid ancanquid Pidaton Esus bëacsho chuipac caondash. — ¿Min matses isadaidbo chuiquid dapamboda mibi nepe? —caquien Esusën: —Ai, aid nebi —capac caondash. ¹² Adnubien abi chieshënquidon muaguen Esusën naid Pidato chuipac caondash. Adsho tantiashun Esusën ëcbedenquio icpac caondash.

¹³ Adshobien Pidaton Esus padpiden chuioaquin: —Mibi icsaid dadpen chuipec. ¿Tantienuquioda ique? ¿Ëcbedantiapimboda ique? —caquien ¹⁴ ëcbedenquio icpac caondash Esusën. — Nëidon muauac nebi —quequin chienquio icsho tantiash: —Adquid tantiambo iquembi —quepac caondash Pidato.

*Esus unës ua, quequin chiaid**(Mad 15.6-15; Duc 23.13-25; Uan 18.38-19.16)*

¹⁵ Nuquin Papan isadaidbo unës uainquio icquin matamiampid tantiate ushëmbi seta utsin-utsinquien Pidaton quënën nauedaid isadaidbo abentsëc cuemedenedec. Pidaton: — ¿Tsutsi abentsëquimbi cuemepe? —cac isadaidbon chiacpadquid abentsëc cuemedenedec. ¹⁶ Esus bëabi icnuc uimanëmënuquidquio Badabas cuëmëdquid nauedpac caondash.

¹⁷ Adnubien Esus cuidte chuisho tantianuec cho-choash dadpenquio tabadpondash. Adsho isumbien Pidaton: —¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caidtambi cuemepe? —capondash. ¹⁸ —Esus chieshënquidon: “Nuqui padenquio yanuc nuqui dëniaquec Esus chuiquid dapa yanushe,” queshun Esus bëaccosh. Nëmbo tabadquidon: “Esusquio cueme,” capashunì —quequin tantiaquin aden chuipanëdash Pidaton.

¹⁹ Adashic matses icsaido cuidte chuinuec tsadte dapan abucquio tsadtopondash Pidato. Adshobien yuan chuituidpondash. —Min chidon: “Chuitan,” cac chobi. Esus caic: “ ‘Aid dada bëdambo icquid neque. Unës uamenda. Dacuëdampambo icsho ushquin isombique. Unës uamenda, quiosh’ quequin chuitan,” min chidon cac chobi mibi chiec —quequin aton yuan chuituidpac caondash.

²⁰ Adnubien Esus chieshënquido tsusiobon ambo tabadquido chuibudpondash. — Pidaton: “¿Mitsicquidimbi cuemepe?” cac: “Badabas cuemequin Esus unës ua,” cado-cadota —cac: —Ai, adoendambi —quecuededpondash.

²¹ Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash. ²² Adoquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unës ua. Cuesten dectanquin unës ua —quecuededpondash.

²³ Adoquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buëdanquiecuëdec: —Cuesten dectanquin unës ua —quecuededpondash.

²⁴ Adsho —Padi icnuna —caqui niacbidanquiecuëdequi unës uate bunquiecuësantiadpambo yansho isash: —Acte beccho —quepondash Pidato. Bëacsho tasun dapan cushtotaneccuëdec mèpamëdquin abitedi ismepondash. Adashic Esus caic: —Nëid unës uame-tiapimbo iquebi. Nëid unës uamete bunec mibien cuidadtequidombo nendac. Èmbien adotiapiquiecuëdec. Mëpamëdec bëchish ucudacimboc mimbi icsamiaid ucudebi —quiash mèpamëdquin ismepondash Pidaton. ²⁵ Adsho tantiashien: —Con nabobëdtsëqui adequi cuidadtequidombo icnuna —quecuededpondash abitedimbo.

²⁶ Adsho tantiashun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unës uatan —quequin sondado buamepac caondash Pidaton.

*Esus mamëshunaid**(Mad 15.16-20; Uan 19.2-3)*

²⁷ Adoquien sondadon Pidaton shubun Esus yuedshun: —Isec cho —cac aton sondado utsibo dadpen cho-chopac caondash. Cho-choshon Esus mamëshumbededpac caondash unës uanumbi. ²⁸ Abi dasiuidaid ënapen icquid chichshun: —¿Chuiquid dapada nedi? —quequin dashcute pimbo icquid dasiuintanquin ²⁹ mauete pinchuc-pinchucpambo icnuc nacenaid mauemepac caondash. Adshumbic aton matses chuiquid dapan sananacimboen sananuc abiucshun cuate sanamepac caondash. Adshumbic aton matses chuiquid dapa ismiacimboen mamëshunquin: —Is. Isadaidbo chuiquid dapambo neque —queshun danëshën sebudquin Esus ismepac caondash. ³⁰ Adshumbic dacuishtucatanquin ambi cuate sanameboed bedshuntanquin aidëmbi matombudnepac caondash. ³¹ Aden mamëshuntanquin ambi dasiumboed chictanquin aton dashcutebidi dasiunoapac caondash. Adoshon: —Ma unësnequin cuate dectanec nidnu. Nid —quequin Esus buampac caondash.

*Esus cuesten dectanaid**(Mad 15.21-32; Duc 23.26-43; Uan 19.17-27)*

³² Buanquin Esus abi dectante cueste yuëmemebanquimbi dada nidaid Sidene caid yacnuësh choquid Simon cuëmédquid Esusën yuëmiaid sondadon chiadtomebidampondash.

³³ Adobidanec nidec macuësh dapa yacno matses mapi canitebimboec isadquid Codocota caid yacno chopondash.

³⁴ Choshombien sondadon uba chinaid actequad paëmbo dauë nêcushaid Esus meneuidpondash. —Nê. Ac —cac pictsêc tantanec: —Padi —quepondash aquenquo yec.

³⁵ Adshobien cueste napotiaid bëboedën dectampondash. Dectanshumbic ambi chichshumboe Esusën dashcute bednequin sondadobon abi cuëmédquidtedi dada uabanshun têchun sandoshon cadotanequin dada uatempi puduemiaid isbanquin Esusën dashcute bedbampondash. ³⁶ Adash: —Esus unêso isnu —quec sondado tabadcuededpondash.

³⁷ Adshumbic: —“Nadquid icsho cuidquin unês uac,” quequin ma isquidon tantianu —qeshun cueste cuëshën naden dada uapaccondash. —Nêidquid Esus nec. Isadaidbo chuiquid dapambo nec —quequin dada uaid Esusën mapino dectampondash. ³⁸ Ampequid daéd cuesten êquë dectambudcuenquin dectantanquin nênantanquo Esus dectampondash.

³⁹ Adshobien podqued cuëmanquo Esus diadsho isbidanequin chieshênquin chuipondash. ⁴⁰ —“Nuquin Papa tabadte shubu uashunaid chic-chictanquin daëdec ushquin nacnenquin nainendambi,” quiondaid yec bud. Nuquin Papan madombo yec unêsenuquo yec auëshquiobi bud —cabidanepondash. ⁴¹ Adechidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamênshumec nadpondash. ⁴² —Utsibo ismenumbien comapenen tantiaquin matses bëdamechitosh. Adembidi comapenen tantiaquin nacnenash budsho isnuqui. “Isadaidbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi. ⁴³ “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unêsenuquo icsho isnu —quepondash tsusiobo. ⁴⁴ Adnubien abêda cuesten dectamboedon ampequidontsen Esus mamênshumpondash.

*Esus unêsaid**(Mad 15.33-41; Duc 23.44-49; Uan 19.28-30)*

⁴⁵ Adnubien ushê cuembo icnuc inchêshbocpadquiec inchêshpondash. Ushê cuembo icnuc inchêshstanec ushê budambi ushêmbo yanoapondash. ⁴⁶ Ushêmbo yanubien Esus comapenec cuêdec nadpondash. —Eloi, Eloi, lama sabactani —quec con onqueten cuêdpondash. —¿Atotsieshun êbi bëdamboen isenquo yano, Papa Edoen? —quec adondash.

⁴⁷ Adec cuêdsho tantiansh isquido nadpondash. —Edias yampid cuênchitequien nec —quiampondash. ⁴⁸ Adnubien Esus isec tabadquid abentsêc titinquianec nidshun shapushapupactsêcquid bedtampondash. Bedtanshumbic actequad mucacquid anidtsêcquidên shapu-shapupactsêcquid punshun cueste dêdectanshun abuc sananec: —Chishmenu —queuidpondash. ⁴⁹ Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

⁵⁰ Adnubien padpidec buêdanquiec cuêdtanec Esus unêspondash. ⁵¹ Esus unêsnuubi Nuquin Papa tabadte shubu uashunaid yacnuësh: —“Quênê uquêducquidên Nuquin Papa tabadtembo nec,” caidên utsi puduednushe —qeshun dashcute ênapen icquid dectanaid abucuësh canchedbudcuenac caondash abitiombi. Nuquin Papan ambi bëdamboen iste tantiamenuen nanêdash. Adnubien nidaid uêdêquequidên cuênote dapa dadpen cuëshêdbudnepac caondash. ⁵² Adec unêsaid nauedaïd shêcuê bëtashte cuênote dapambo cuëshêdnubien Nuquin Papa tantiaquido ênden unêsaido abentse-abentsec uincuenanec chopac caondash. ⁵³ Esus uincuenanec adec uincuenaidon shubu dadpen icquid Edusaden caid yacno nidshun matses dadpen ismepac caondash.

⁵⁴ Nidaid uêdêquenic dacuêdampambo icsho isashien: —Esus unêso isnu —quiashtabaddquid sondado chedo abi chuiquidbêdi dacuêdtanec: —Ma Nuquin Papan Madombobi nepayoc —quepac caondash.

⁵⁵ Adnubien chidobo Cadidia yacnuësh Esusbêd choquin abi codocashumboedo Esus unêso isnuec ancuenashun isec tabadpac caondash. ⁵⁶ Nêidted icpac caondash. Nêidic Madia Mactada yacnuësh choquid. Nêidic Madia utsi Acobon tita. Aid Ose cuëmédquidên titabidi niosh. Nêidic Sebedeyon chido Uanên tita. Aid Acobo cuëmédquidên titabidi niosh. Aidtedi uanoshon isbededec tabadpac caondash.

*Esus chococaid**(Mad 15.42-47; Duc 23.50-56; Uan 19.38-42)*

⁵⁷ Adnubien inchêshbudtsêqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac

caondash. ⁵⁸ Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton. ⁵⁹ Aden bedtanshun Osen Esus dashcute bëchish nibëdquidënguio nuamboshë icnuc datanedonepac caondash. ⁶⁰ Adotanquimbic nidaid cuënoteuidpambo icquid macuësh tsimpiduc shëcuë uaboed ambi: —Ëbi unësacsho nauedte nendac —caidëmbi Esus nauedpac caondash Osen. Adotanquimbic cuënote dapabidi bëtashe uaid bincumbëshun bëtimpac caondash. Adotanec nidpac caondash Ose. ⁶¹ Adnubien Madia utsibëd Mactada yacnuësh choquid Osen Esus nauedsho isbosh ambobi tsadpac caondash.

Esus nauedaïd isec sondado tabadaïd

⁶² Isadaïdbon obeca bacuë unës uacpadën Esus unës uamiash abentsec ushashi chonoadtemaïd ushëmbi Esus chieshënguïdo Pidato caid chiec nidpac caondash. Padiseyobobëdi nidshun chuiquid dapabon Pidato chuituidpac caondash. ⁶³ —Esus nadpadenec. “Unësash daëdec ushash uincuenendabi,” quec muapadeneque. ⁶⁴ Daëdec ushquin min sondado Esus nauedaïd cudasmeta. Esusbëd icboedon chicshun buanushe. Aden buanash: “Uincuenaccosh,” quec muanushe. Unësabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshë ictsiashë. Min sondado: “Cudasta,” quequin chuita —capac caondash Esus chieshënguïdon. ⁶⁵ Adoquien Pidaton: —Ai, con sondado buantan. Aden buanshun: “Unësaid nauedaïd cudasec databëdta,” cata —capac caondash. ⁶⁶ Adoquien isadaïdbo tsusiobon sondado buanshun cuënote dapa bëtashaid bucun bëbitaccapac caondash. —Bëbitaccaid isash: “Chuiquid dapan bëbitaccamaïd nec. Cuidnushe. Esus chictiapimbo iqebei,” ma quenu —qeshun bucun bëbitaccapac caondash. Adoshon: —Beduanushe. Isquiec tabadta —capac caondash sondado chedo chuiquin.

28

Esus uincuenaid

(Mad 16.1-8; Duc 24.1-12; Uan 20.1-10)

¹ Esus unësbon abentsec ushash abi chonoadtemaïdëntsen abentsecbidi ushash dominco badiadnuc chidobo Esus nauedshun bëtimboed isec tabadnuec padpidec choapac caondash. Mactada yacnuësh choquid Madia utsibëd isec choapac caondash. ² Choash isec tabadnubi nidaïd uëdëquiampac caondash. Adnubien Nuquin Papan abi yacnoshon uaid mayan bëda abucnuësh budtanquin cuënote dapa bëtashaid shëcbempac caondash. Adtanec cuënoten tsadtopac caondash. ³ Mayan bëda yec abu bed-bedquiacbimboec ushëmboshë bëchamauanquieic icpac caondash. Aton dashcute adquiobidi bëchish nibëdquieic ushumboshë icpac caondash. ⁴ Adec dacuëdampambo icsho isashien unësaid cudasquido sondado dacuëdtanec uëdëquec tantiadpambo yec padishbudnepac caondash abitedi.

⁵ Adnubien mayan bëdan Madia chedo chuipac caondash. —Dacuëdenda. Cuesten decantanquin unës uaboed Esus isnuec mibi tabadec. ⁶ Nibëdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuoapac caondash. ⁷ —Mimbi isboed Esusbëd icboedo chiec nid. Badedquio nidshun naden chuita. “Unësboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien ⁸ auëshquiobi chidobo dacuëdboedi cuishonquec titinquier nec nidanepac caondash.

⁹ Titinguianec nidaneshobien Esusënguïotsen bëquedpac caondash. Adash: —Mibi isnuec nebi —quepac caondash. Adshobien chidobon: —Con Icbo nec —quequin ismenuen danëshën sebudquin taë uidën uapac caondash. ¹⁰ Adoquien Esusën: —Dacuëdenda. Con utsibo ëbëd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

Esus uincuenasho isun sondadon muauaid

¹¹ Madia nidnubien Esus nauedaïd isquido sondado abi chomeboedo isadaïdbo chuiquido chiec chopac caondash. Mayan bëda chonoc Esus uincuenboedo chuituidpac caondash.

¹² Adoquien isadaïdbo chuiquidon aton chuiquid utsibobëd onqeshun aid sondado chedo chuipac caondash. —Mimbi chuiboeo utsibo chienda. Mibi piucquid dadpen menenu —qeshun piucquid dadpenquio menepac caondash. ¹³ —Mimbi isboedquio chienquio icquin naden chuita. “Ëbi chedo ushtoan abëd icboedon Esus ampequin beduanaccosh,” quequin utsibo chuita. ¹⁴ Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —qeshun ¹⁵ piucquid meniac bedanec nidec isadaïdbo chuiquidon

chiacpadec muapac caondash sondado. Adembidi nēbi isadaidbo dadpeshun: “Esus ampiac,” quequin chuiuoic.

*Ēbi chuibeneta, quequin Esusēn chiaid
(Mad 16.14-18; Duc 24.36-49; Uan 20.19-23)*

¹⁶ Adnubini Esusbēd icboedo 11tedi yec Esusēn chiacnombo Cadidia yacno nidec macuēsh dapa yacno nidanepondac. ¹⁷ Macuēsh dapa yacno nidquimbi Esus istuidpondambi. Istuidshumbic: —Con Icho neque. Ismenu —qeshun danēshēn sebudpondambi. Utsibombien: —¿Con Icbombobida nepeba? —capondash.

¹⁸ Adsho isun Esusēn anoentsēqui choquin chuituidpondash. —Ēbipadquid utsi nibēdec. Nuquin Papan uaido abitedi con na nec. Abitedishun Icbombo icquin abitedimbo namequidquo nebique. Mibitsen namenu. ¹⁹ Nidaid utsi-utsiec yacno nidshun ēbi tantiaquido icmenuen matses abitedi ěmbi chiaid chuibeneta. Adoac ēbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nēdbēd Nuquin Papan Mayan tabadeque. Utsibo ismenu,” quetanquin aden acten mentobeneta. ²⁰ Mimbi mentoaido chuiban. “Nuquin Ichon chiacpadec bēdamboec tabadnuna,” quequin ěmbi chuiboedtedi chuiban. Mimbi adosho isash mibēd iquendabi. Nidaid abitedi nibēdanabi icnuc mibi chedo nianenquo iquendambi. Adembidi ēbi tantiaquidotedi niantiapimbo iquebi —quepondash Esus ěnquimbi chiec.

MADCOSEN DADA UAID

Bëyuc choshon Uanën Esus chote chiaid
(*Mat 3.1-12; Duc 3.1-18; Uan 1.19-28*)

¹ Madcos nebi. Nuquin Papan tantiampicpadquiec aton madombo Esus abi yacno matses yuedquid chote tauamboen chiaid bëda chuinu. Tantia.

² Abi aton mado Esus chiec onquiaid Nuquin Papan Isayas dada uamiampid nad iquec: “Naden naimbique. Tantia, mado. Mibi chotequid chuibanquidba chomendambi. Aidën chuibanac ambi tantiaid icsa ënshun mibi cainquidombo iguendac, mado.

³ Shubu nibëdacnoshon comapenec onquequin mibi chotequid aidën chuibanendac naden: Nuquin Icho choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chiec onquiaid Nuquin Papan Isayas dada uamiampid nec.

⁴ Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tantiaquidquio icsho mibi cuidenquio yec mibi icsaid Nuquin Papa bëpiscudendac quequin chuibampondash. Aden chuibanquimbi ambi chi-acpadomboen naquid acten mentobampondash Uanën. ⁵ Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiashien, Icsapobi, quec abi icsaid chiec utsi-utsiec onquecuededpondash. Aden abi icsaid chuibanquidtedictsëqui Uanën acte Odan caidën mentobampondash. ⁶ Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaid tsiuquid niondash. Shioshbimboecquid shuishun pequid niondash. Bacun chequid niondash. ⁷ Aidëmbi naden chuibampondash: —Con tsyuecquid choendac. Aidi nadatiambocquin naquidquio nendac. Aidi bëdamboshëcquid icnuc ëbi icsaquid icsho çatotsieshun aid choec quequin chuiquidquio Nuquin Papan icmiosi? quec tsadebi. ⁸ Mibi acten mentoquid nebi; aidien abipadquiocquid aton Mayan menianquidquio nendac — quepondash Uan.

Esus acten mentoaid
(*Mat 3.13-17; Duc 3.21-22*)

⁹ Adnubien ambi chian-chianaidquio Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash. ¹⁰ Aden acten mentoac Esus pudundonobi abu bëcadoacnoëshquio dëbimbimboec isadquid abipadquiocquid aton Mayan bede-bedequemboec Esusbëd icnuc budpondash. ¹¹ Aden budmetanec ambi bëcadoacnoëshi: —Mibentsëcquiobi icsho ëmbi tantiaidquio mibi nec, mado. Èmbi bëdamboen isaidquio mibi nec —quepondash aton Papa Esus chiec.

Esus Nuquin Papan chiaid niacmenuequin Satanasën tanaid
(*Mat 4.1-11; Duc 4.1-13*)

¹² Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi. ¹³ Ambo tsadquimbi ushë abentsëc nidmec utsi choaid abutomettsëcquiec tabadpondash. Ambo tabadshobi Nuquin Papan chiaid niacmenuequin tanu quianec mayan icsan icho Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bëdabon cho-choshon nashumbededpondash.

Cadidia yacnoshon tauamboen chuibanaid
(*Mat 4.12-17; Duc 4.14-15*)

¹⁴ Ambo yuec tabadash Esus choambien isadaidpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash. ¹⁵ —Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantia —quepondash Esus comapenec onquec.

Èbëd iquec cho Esusën abia caido
(*Mat 4.18-22; Duc 5.8-11*)

¹⁶ Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. ¹⁷ Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Èbëd iquec cho —quepondash Esus. ¹⁸ Adsho tantiash nëshaid abëd icquid menianec abi chuiquidbëd nidanepondash.

¹⁹ Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin. ²⁰ Aden nacnesho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

Mayan icsa Esusën dapuduemaiad
(Duc 4.33-37)

²¹ Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ènapen capuenquo yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash. ²² Aden chuisho tantiashun: —Ambia tantiaquidën chiacpadomboen Esusën chuibanec. Utsimbien adomboen chienquo iccosh —quec onquec tabadcuededpondash. ²³ Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash: ²⁴ —Esus Nasaded yacnoësh choquid mibëd icquidpenquo nebique. Nidec nid. ¿Chian anëdëncuacno èbitedi nidmenuecta cho? Nuquin Papan Madombo icsaisa nec quequin èmbi tantiaid mibi nec —quec mayan icsa dapuduedtsaid onquepondash. ²⁵ Adoquien: —Otaquo tabad —quetanquin: —Dapuduen —capondash Esusën. ²⁶ Adoac comapenec abi dapuduedaid uëdëquenec sidquianec dapuduempondash.

²⁷ Adsho isash: —¿Abimbodambi ispo? ¿Mitsipadquidquo nepec? Ambi tantiamaiad utsin nechitec. Chuiquidën nacpadomboen naid nec. Dapuduen, ambi cac ambi chiacpadomboen mayan icsan naic —quec onquecuededpondash Esusën naid chiec. ²⁸ Adec onquecuededash auëshquo nidaneshun ambi isboed, Esusën naid, chuibampondash. Aden chuibansho nidaid Cadidia caid yacnocquidtedishuntsen tantiabedeppondash.

Simonën nachi bëdamiaid
(Mat 8.14-15; Duc 4.38-39)

²⁹ Ambi chuisho tantiaboedo nidanenubien Petedo Simon caidën shubu yacno Esus Acobo Uan aidtedi nidpondash. Aidën shubun icquidbidi aton utsi Andedes icpondash. ³⁰ Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin. ³¹ Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquo bëdampondash. Adec bëdanash nidtoshon codocashun abi choquidtedi pemebampondash Simonën nachin.

Esusën dadpen bëdamiaid
(Mat 8.16-17; Duc 4.40-41)

³² Adnubien inchëshbudtsëqui Capednaun caid yacnocquidën daicsaidtedi bë-bëpondash. Adembidi mayan icsa dapuduedaidtedi bë-bëpondash. ³³ Bë-bëash Simonën shubu shëcuë cuëmano puduedabi tabadcuededpondash. ³⁴ Adsho isun daicsaidtedi Esusën bëdamebampondash. Adembidi mayan icsa dapuduedaid dapuduemebampondash oncamenquicquin. Nuquin Papan Madombo abi yacno yuedmianquid abentsëquiobi mibi nec quequin chuinushe queshun oncamenquicquidpondash.

Shubu nibëdacno Nuquin Papabëd onque Esus onquiaid
(Duc 4.43-44)

³⁵ Adashic badiadte noentsëqui yanubi isucunanec puduanec shubu nibëdacno Esus nidpondash. Nidec tabadtuidshun Nuquin Papabëd onquequin chuibampondash. ³⁶ Esus nidacshobi isucunshun Petedo Simombëd icquidën nibënampondash. ³⁷ Aden nibëncin istuidashi: —Mibi isec cho-choquidtedishun mibi nibëmbededec —quepondash Esus caic.

³⁸ Adoquien Esus: —Capucenecquin utsibotsen Nuquin Papan shubu abentsëquën yuedanquid iquec quequin chuibenec chobique. Shubu utsi-utsiec dadpen yacno nidnu. Nid —quepondash. ³⁹ Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuiopondash. Adembidi mayan icsa dapudueameopondash.

Nami mishac tantiadenquiocquid bēdamiaid
(*Mat 8.2-4; Duc 5.12-13*)

⁴⁰ Aden Esusën chuibanubien daushac bimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bēdame —quequin Esus chiec comapenec cuēdpondash.

⁴¹ Adec cuēdshobi nēid isash unēsquo iquebi quequin ëquēducshun tantiaquin mishec Esus: —Mibi bēdamembique. Bēdambo icta ⁴²—quenubi daicsaid nibēdquo yec bēdampondash.

⁴³ Aden bēdametanquin nidmepondash: —Nidec nid. ⁴⁴ Nidquimbi, Esusën bēdamioshi quequin chuituidena. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bēdambo icquin anocquid, Nuquin Papa matses chiec onquianequid, isme. Adoshon dēbimbicquid daēd meneta Moisesën chiacpadomboen ma anocquidēn napanueshun. Aden meniac abentsēc cuesuneshun utsi cuesunenu quenquiocquin cuesuniadēn intac puntanequin intac mibi dasecashun dēbimbicquid utsi cuemeshun naden aidēn mibi chuipec. Nuquin Papan mibi bēdamboen istiapimbochoedi nēbi bēdamboen mibi isendac. Aden chuiquin mibi bēdamiaid Nuquin Papan naid nec quequin tantiatsiash —quepondash Esus ambi bēdameboed chiec. ⁴⁵ Adsho tantiaboshombi niachidanquin Esusën bēdamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibēdacno capupondash. Adnubien Esus nibēnec nidaid utsi-utsiec yacnoēsh dadpen cho-chopondash.

2

Cuembo yec uishquiaid Esusën bēdamiaid
(*Mat 9.2-8; Duc 5.18-26*)

¹ Adashic Capednaun yacno nidoash shubun puduedpondash Esus. Adnubien, Esus chosh qesho tantiash padpidec dadpen cho-choapondash. ² Dadpen cho-choash puduedash tsucus-tsucustsēcquo yec tabadnubi adecbidi shēcūē cuēmano tabadpondash. Adec tabadsho isun Esusën Nuquin Papa yacno shubu abentsēcquēn tabadte iquec quequin chuibampondash. ³ Adnubien cuembo yec uishquiaid bēc dada daēd-daēdquiec 4ted cho-chopondash. ⁴ Cho-choshon matses tsucus-tsucustsēcquo yec tabadsho isun decatoshon macano nacenaid chic-chictanquin Esusën dayunquo uishquiaid imbupondash. ⁵ Aton dayunquo imbudsho isun Esusën bēdamec quequin abi imbudboedēn tantiec quequin ambibi tantiapondash Esusën. Adashic: —Mado, mibi cuidenquo yec mibi icsaid bēpiscudobi —quepondash Esus.

⁶ Adnubien isadaidbo tsusedpabon nadomboen nata quequin chiaid tantiamequidon ambobi tabadquin naden onquenuiocquin icsamboen tantiapondash. ⁷ ¿Atotsi quiash adec Esus onquepeque? Tantianu. Nuquin Papa icsamboen chuiquidien aid nechitec. Nuquin Papauidi matses cuidenquo yec abi icsaid bēpiscudquid nec, quetsēcquiec tabadpondash.

⁸ Aidon tantiaid tantiec nadpondash Esus: —¿Atotsieshun aden mimbi icsamboen tantiaepe? ⁹ ¿Mibi cuidenquo yec mibi icsaid bēpiscudobi quequin ëmbi chiaidquo bēdantequidpenda nedic? Adecbidi, ¿Mibi icsambochoedi mibi bēdanoque. Nidtochon mibi imbudboed chiadtochon buanec nid quequin ëmbi chiaid bēdantequidpembidida neoadic? ¹⁰ Ai, adquidquibidi nec. Mibi cuidenquo yec mibi icsaid bēpiscudobi queboed chidon tishac matses yanaid yequi chuiquidquo Esus nec quequin tantiesabo mibi nepec. Adquid icsho ëbi tantiamenuquin ¹¹ cuembo yec uishquiaid naden chiembique Tania. Mibi icsambochoedi mibi bēdamiombique. Nidtochon mibi imbudboed chiadtochon buanec nid —capondash Esusën. ¹² Adoaquien nidtochon abi imbudboed chiadtoanquin buampondash. Aden buansho isash: —Nideque. Is. Adomboen nasho isamboccondambi —quetsēcquiec onquiash Nuquin Papan naid nec quec cuēdēncuedepondash.

Ēbēd iquec cho Esusën Debi caid
(*Mat 9.9-13; Duc 5.27-32*)

¹³ Adashic padpidec chian Cadidia caid cuēmano nidoapondash Esus. Ambobi tabadnubien aidēn chiaid tantianuec matses dadpen cho-choapondash. Cho-choasho isun Nuquin Papan chiaid chuibanopondash Esusën. ¹⁴ Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuēnondash. Nidaid utsi yacno aton na utsibon buan-buansho isun piucquid bedshunquid Debi nepondash. Adembidi nidaid utsi yacnoshon aton na bē-bēsho isun piucquid bedshunoaquid Debi nepondash. Isadaidpembo ancaquidēn, Con matsespembon piucquid bedshunta, cac bedshunoaquid Debi nepondash. Adshobien: —Ēbēd iquec cho —Esusën cac: —Ai, mibēd nidnu. Nid —quianec badedi Esus tsibanane Debi nidpondash.

¹⁵ Adshumbic Debin shubuno nidshun Esusbëd icquidon pepondash. Ashunquiobidi aton na buansho isun piucquid bedshunquid Debipadquidën utsin-utsinquier pepondash. Ashunquiobidi isadaidbo tsusedpabon nadomboen nata quequin chiaid naisan utsin-utsinquier pepondash. Debin shubuno Esus tsibanec choquid dadpen icpondash. ¹⁶ Aden adquidbëdtan Esusën pesho isun isadaidbon nadomboen nata quequin chiaid tantiaquid icsho mibi icsaid ënta. Aden ënash ëbëd icquid mibi iquendac quequin chiesha nata nadomboen nata quequin chiaid naisabëdtambi mibi chuiquidën pepec? Tantianu. Ëbi chui –quepondash padiseyobo Esusbëd icquido chiec.

¹⁷ Adsho tantiashien Esus: –¿Dada bëdamboquidta dauëchoquidën bëdametequid nedic? Padenquio. Daicsaidien dauëchoquidën bëdamec. Adquiecbidi, icsaisa nebi quequin ambibi tantiaquid icsho mibi icsaid ënta. Aden ënash ëbëd icquid mibi iquendac quequin chiesha nebi. Icsaquid nebi queshun mibi icsaid ënta. Aden ënash, ëbëd icquid mibi iquendac quequin chuiquid nebi –quepondash Esus.

*¿Atotsi quiash mibëd icquid buna mëmunesa nec? quiaid
(Mat 9.14-17; Duc 5.33-39)*

¹⁸ Adnubien abi chuiquid quënën nauedan aid tantiec unësquioquuin Uan acten mentoanquidbëd icquidën buna mëmunubi padiseyobobëd icquidon unësaid tantiec unësquioquuin buna mëmunoapondash. Aden buna mëmunsho isanec nidequi Esus yacno nidash Esusbëd icquidon buna mëmunenquio icsho isash utsibo: –¿Atotsieshun Uambëd icquidon ademibidi padiseyobobëd icquidon buna mëmunubi mibëd icquidon buna mëmunenquio icpec? Tantianu. Chui –quepondash.

¹⁹⁻²⁰ Adoquien Esus: –Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquioquuin isuidenquio iquec. Yuecash chido inquid nibëdanan abëd icboedo unësquioquuin buna mëmunquuin isuidpec. Adecbidi ëbi nibëdanan ëbëd icboedo unësquio yampec.

²¹ “Ademibidi dashcute shë nibëdta chucambocquid bëtuscaisa matses nec. Shë nibëdta chucambocquid bëtuscatsaid amëec canchedoaic. Adecbidi abi icsaid ënesa tantiaid bëda pausudtiapimbo yec icsabudec. ²² Ademibidi dadpen icquid chodo uashun sandoe. Adotanquimbic istuidshun chuca uain chodo uashun sandoaic. Chodo shënin icsa sandoshon nequid bëenquioquuin. Adecbidi Nuquin Papan tantiacpadec pausudnu queshun mibi icsaid ënacsho isun Nuquin Papan pausunendac –quepondash Esus.

*Chonoadtemaid ushë icbo nebi quiaid
(Mat 12.1-8; Duc 6.1-5)*

²³ Adnubien chonoadtemaid ushë utsi icnuc ënapen capuenquioquuin tied matanquin adosbiecquid trico caid ëshë bedshun Esusbëd icquidon pepondash. ²⁴ Adshobien: –Mibëd icquido is. Chonoadtemaid ushën chonoadeque. Abi chuiquid mibi iquec ¿atotsi quiash, Padi. Chën, quenquio ique? –quepondash padiseyobo Esus caic.

²⁵ Adoquien Esus: –¿Chuiquid Dabidbëd icquidon natia bunquin ambi petemaid pepondash quequin dada uapampid tantiaimboda icconda? ²⁶ Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quënën puduedshun Nuquin Papa tantianuequin pan meniac sanaid bedshun ambi petemaid abëd icquidobëdtambi abi chuiquidën Dabidën pepampic. Puduedtemaid quënën puduedquid, Nuquin Papa matses chiec onquianequid, Abiatad abentsëqui icnubi aid quënën puduedshun bedshun Dabidën pepampic. Abiatadpadquidën peteuidsëqui nec quenquioquuin abëd icquido tantiaquin pan bedshun aidobëdtambi pepampic chuiquid dapa Dabidën –quepondash Esus padiseyobo caic.

²⁷ Aden chuishumbic naden padiseyobo Esusën chuoapondash: –Nabanash tiboedte matses bumpec quequin tantiaquin abitedi uabanquin ënashini con pabëdi tiboquepampic. Adashic yuecash, Chonoadtemaid ushë nec, quepadenebi con pabëdi. Aden chiequi matses tiboedte ushë aton icbo ictiapimbo iquec. ²⁸ Aid ushë icbo icquin ëbëd icquidon bunquin pebededsho isash, Padi. Chonoadtemaid ushë neque. Aden penda, quenquiocobi –quepondash Esus abi chieshënkuido padiseyobo chiec.

3

*Mëuesadaid Esusën bëdamiaid
(Mat 12.9-14; Duc 6.6-11)*

¹ Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi ² Esus chieshënkuido padiseyobo dadpen tabadpondash. Adece tabadec, Nëbi chonoadtemaid ushë icnuda Esusën mëuesadaid bëdamepeque. Nëdi

badiadën bédamesho isun bedmeshun quënën nauedmenu quetsëcquieq padiseyobo tabad-cuededpondash. ³ Aden tantiec padiseyobo tabadnubien mëuesadaid chuiquin Esusën: —Nënantanquio nidto —capondash.

⁴ Adoac nënantanquio nidtoash mëuesadaid nidnubi iccuededquido chiec Esus onquepondash: —¿Chonoatdemaid ushën matses tantiaquindambi nape? ¿Adoenquicquin matses icsa uapendambi ique? ¿Nëid ushëndambi matses bédamepe? ¿Bédamenquicquindambi cuesunepe? —quepondash. Aden chiec Esus onquenubien onquenquio yec tabadpondash padiseyobo.

⁵ Adoaquien nëishtanquimbi abi chieshënquido bëisbanec Esus, Nuquin Papan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bédampondash. ⁶ Adosho isash puduenanec nidquin edodesbo padiseyobon badedquido istuidpondash. Aido istuidash: —Esus cuesunete mibi bunacpadquieq bunebi. ¿Mitsipadentsimbi cuesunemenuen bedmepeba? —quecuededpondash padiseyobo.

Esus yacno matses dadpen choaid

⁷ Adnubien Esusbéd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash. ⁸ Adnubien Esusën nabansho isboedon chiac nidaid Udeya caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuiquo tantiash cho-chopondash. ⁹ Adec cho-choash tsucus-tsucustëcquieq yec tabadquin tsicatiac nënantanquio tsadacnoëshi catashnushe quiasch Esus: —Cano bec cho —quiampondash abéd icquidquieq caic. ¹⁰ Dadpen bédamiosh cadoshe. Èbitsen bédanu quequin ambibi tantiaquin Esus mishbededpondash. ¹¹ Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuédpondash. ¹² Adoaquien: —Padi. Aden ëbi chienda —quepondash Esus.

Abéd 12ted icquid Esusën tantiamenu caid

(Mat 10.1-4; Duc 6.12-16)

¹³ Adashic macuësh dapa yacno nidnushi abéd 12ted icquido chomeshun nadopondash: ¹⁴ Èmbi tantiacpadomboen mibitedi tantiamembi. Adquid icquin ëbéd tabadquin ëmbi chiacpadomboen mimbi tantiabemendac. Aden tantiabenascho isun ëmbi chiacpadomboen chuimenuen mibitsen nidmembi. ¹⁵ Adembidi mayan icsa dapuduedaid dapuduemequidbidi mibi icmembi quequin abéd icquido Esusën chuipondash. ¹⁶ Ambi tantiamenu caid nëidtedi icpondash: Simon cashumbic Esusën Petedo capondash, ¹⁷ utsibic Sebedeyon mado daéd, Acobobéd Uan. Aid daëdi, abu cuédtequidën mado nec quequin oncaïn Buanedquis quequin Esusën cuëmpondash. ¹⁸ Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. ¹⁹ Utsibic Udas Iscadiote, aidi abi chieshënquido Esus bedmenush Esusbéd capuquid nepondash. Aidedti Esusën tantiamequin chuiquin ismiaido niondash.

Bedtsibu caidën dausunaid Esus nec quiaid

(Mat 12.22-32; Duc 11.14-23; 12.10)

²⁰ Aidedti chianec nidequi Esusbéd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuiabanubi Esusbéd icquidon penquio icpondash. ²¹ Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

²² Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënquid yec nadpondash: —Mayan icsan icbo Satanas cashumbic Bedtsibu caidën tantiamiaid Esus nec. Adquid icquin mayan icsa matses dapuduedaid dapuduemec —quepondash.

²³ Adoaquien Esus: —Mimbi icsamboen tantieque. Mibi chuibanu. Tantiec tabadta. ¿Mayan icsan icbo ambi dapuduedmiaid dapuduemequidta nepadic? Padenquio. ²⁴ Adquiecbidi shubu icbo abéd icquido cuëshëdmesa nec. ²⁵ Ichon abéd icquido cuëshëdmiasch shubu abentsëquën tabadtiapimbo iquendac. ²⁶ Adembidi ambi dapuduedmiaid dapuduemiasch adquidën icbo ictiapimbo Satanas iquec. Icbo icnuequid abéd

icquid puduemesa nec. ²⁷ Dadpeshun icbo Satanac nec. Adquid icquin ambi matses dapuedmiad dëniacanquidënuidquio nadatiambocquinn nabanquinn cuemepec. Adquid icquin ëmbi nac mayan icsa dapuedaid Satanacën yua icboedi icbombo tantiec bëdambo yanec ëbëd iquendac. ²⁸ Abimbo chiembique. Tantiata. Matses cuidenquiocquinn abi icsaid bëpiscudquinn paucquid Nuquinn Papa nendac. Adecbidi Nuquinn Papa icsamboen chuibodi, Icsaobi, Papa, qesho tantiaquinn Nuquinn Papan aid pauquendac. ²⁹ Utsien Nuquinn Papan Mayan abipadquidënn tantiamiac nasho isun Satanacën naid nec qesho pauquiquio iquendac. Adquid ënëdenquio yec icsaquid nendac —quepondash Esus ³⁰ Satanacën tantiamiac mayan icsa dapudemequid Esus nec abi caquid chiec.

*Esus yacno aton utsibo anibëd choaid
(Mat 12.46-50; Duc 8.19-21)*

³¹ Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chiec. ³² Adoac puduedshun Esus nënantan tsadsho isun: —Titabëd min utsibo choshon umanucshun mibi isnuen cainec —quequinn chuituidpondash. ³³ Adoquien Esus: —Adquid utsi chuinn. Tantiata. ³⁴ Në tabadquid ëbëd icquid neque. Is —quepondash Esus abëd iccuededquid chiec. ³⁵ Adashic: —Nuquinn Papan chiacpadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi —quepondash Esus.

4

*Tantiamequinn pete ëshë nësecain chiaid
(Mat 13.1-9, 18-23; Duc 8.4-15)*

¹ Adashic padpidec chian cuëmano nidshun Esusën tantiamequinn chuibanopondash. Aden chuibanuc cho-choquid dadpen icsho isash cano antabëdtopondash cho-choquid acte cuëmano tabadnubi. ² Adec tabadshobi, matses nadquio iquec quequinn tantiaquinn tiedënn caniquid ëshë Esusën tantiamequinn naden chuibanpondash: ³ —Tied icbo pete ëshë nësecanuc aton tied yacno nidquid. ⁴ Adec nësecanuc nidshun pete ëshë nësecac maisec pudun-pudunaid uicchuën chequid. ⁵ Adnubien nidaid cuënote dadpen samëdacno utsi-utsiec paëdash badedquio dëyucuidtsash ⁶ tapunenquio iquec ushënn shoedec. ⁷ Adnubien pete ëshë utsi-utsiec nisanquid dëyucacno paëdash dëyucash canidouditsacsho nisanquidënn bëtinac podo sinash bacuëtiapimbo iquec. ⁸ Adnubien nidaid bëdambo yacno paëdaid dëyucuid canish dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec —quepondash Esus.

⁹ Aden chiash: —Ëmbi chuibod tantianu quiash bëdamboen tantiec papuedta —quepondash Esus.

¹⁰ Aden chuibanash udictsëc Esusbëdi nidshun utsibo choenquiocsho isun databëdtuidquinn abëd icquidon: —Mimbi chuibanboed tantianu. Ëbi chui —capondash Esus chuiquinn.

¹¹ Adoquien: —Nuquinn Papan shubun tabadquid tantiamendambi utsiboembi, Mibi nadquid iquec, quenquiocquinn chuibanoc. ¹² Aden chiac:

“Nuquinn Papan nabamboed isto-istoboedi ma padenquio tabadteneyoc.

Adembidi tantiaido-tantiadoneboedi ma padenquio tabadteneyoc.

Aidon abimbo tantiaquinn abi icsaid ëntsiandac. Aden abi icsaid ënsho isun cuidenquio yec

Nuquinn Papa abi icsaid bëpiscudtsiandac”

—quepondash Esus abëd icquid caic.

¹³ Aden chiashic: —¿Mimbisen ëmbi chuibod tantienquioda iquec? Aidi tantienquiocquinn ¿mitsipadentsi adomboembi chuibancho mimbi tantiape? Ëmbi chuibod nad iqueque. Tanti. Chuinn. ¹⁴ Pete ëshë sequidbimboecquid Nuquinn Papan chiaid chuibanquidquio nec. Ëshë ambi siaidbimboecquid Nuquinn Papan chiaid nec. Abi paëdacno nidaidbimboecquid matsesën tantie nec. ¹⁵ Nidaidënn paëdash pete ëshë dëyucuiapimbocho uicchuën chidbidbimboec matses utsi-utsiec iquec. Adquid Nuquinn Papan chiaid tantiaquinn papuednednu qesho Satanacën bëpiscudmiac tantienquio yanec Nuquinn Papa yacno puduedtiapimbo iquec. ¹⁶⁻¹⁷ Nidaid cuënote dadpen samëdacno pete ëshë paëdash badedquio dëyucuidtsash tapunenquio yec ushënn shoedaibimboec matses utsi-utsiec iquec. Adquid Nuquinn Papan chiaid tantiauidash bëdambo iquec queboedi ¿Esus tantiaquid nebi quecta icco? quequinn utsibon mamënnshunac badedquio tantiesa nebi quendac. ¹⁸⁻¹⁹ Nisanquid dëyucacno pete ëshë paëdash dëyucash canidouditsacsho nisanquidënn bëtinac podo sinash bacuëesabimboec matses utsi-utsiec iquec. Adquid Nuquinn Papan chiaid tantiauidash abi bunaid, abi nënaid, abi icsaid aidtedi tantiaquinn Nuquinn Papan chiaid tantiesa yanshun bëdamboec

tabadaid ismesa yanec. Adquidèn Nuquin Papan chiaid tantiaquid utsi icmetiapimbo iquec. ²⁰ Èshè utsibic nidaid bédambocquidèn paèdash dèyucash caniashtadpen bacuè icquidbimboec matses utsi-utsiec iquendac. Adquid Nuquin Papan chiaid tantiadonec bédamboec tabadquin utsi ismequid nec. Aden ismiac Nuquin Papan chiaid tantiaquid daèdpectsèc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshè yanendac —quepondash Esus abèd icquido tantiameneuc.

Tabote nēnantan nanac chēnquiacbimboec ictiad quiaid
(Duc 8.16-18)

²¹ Aden chuishumbic abèd icquido naden Esusèn chuipondash: —*ζ*Tabote icbon ambi dayun uaboeid taboshon tsadte tēdion nanshun isaidta nedic? Adembidi *ζ*Tabote matsun bētashun isaidta neoadic? Padenquo. Nēnantan tabote nanac chēnquiacbimboec ismenu quec ictiad. ²² Adquibidi abi yacno yuedanquid ambi dayun uapampidi nēbi Nuquin Papan dayun uainquioquin èbi chomeshun ismec. Adembidi con mado chuiban quenquiochoedēmbi nēbi èbi ismec ma con mado chuibanu quequid con Pa nec. ²³ Ambi chiaid tantianu qeshun tantiaquiec papuduedta —quepondash Esus.

²⁴ Aden chiash Esus: —Chiaid bēda tantiatequidquo iquec qeshun tantiaquiec papuduedquid icta. Aden chiaiduidi tantiec papuduedquid abipadquid bédambocquid ambia tantiaquidèn Nuquin Papan mibi icmendac. ²⁵ Adquid ambi tantiadoniaidquo iquendac. Aden tantienquioctscquidèn tantiaid bēda uesandac nibèdquiec —quepondash.

Ambi siaboeid icbon isenquiocnoc bacuēc quiaid

²⁶ Adec onquequin abèd icquidquo chuishumbic cho-choquidtsen naden Esusèn chuipondash: —Nuquin Papan shubu abentsèquèn tabadec caidaidquo chuibanu. Tantiata. Nidaid bēdan tiedèn caniquid pete èshè siash ²⁷ tabadquin cainquidquo icbo nec. Dadpen ushquin ambi seboed isenquo yec icbo tabadnubi ²⁸ ambi seboed dèyucash caniec tauitanec bacuēc. ²⁹ Ambi siaid isenquiocnoc canitanec bacuēcasho badedquid bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidèn isenquiocnobi. Papuduedquioshon tantiabeneuc. Adquid isash con shubun puduedquido neque. Bednu quependac Nuquin Papan —quepondash Esus.

Mostasa caid èshè chiaid
(Mat 13.31-35; Duc 13.18-19)

³⁰⁻³² Adec onquequin chuibanashic Esus: —Nadquo Nuquin Papan shubun icquido iqueque. Chuinu. Tantiata. Mostasa caid pistsc èshèmpi ictscquid nēsecaid dèyucash nuamboshè caniec cuidi-cuidipambo iquec shubu-shubupambo yec podoeuc. Ambo uicchunèn shubu uaic. Adomboembidi aton shubun abi tantiaquid dadpen dayun uaquid Nuquin Papan nec —quepondash.

³³ Aden chuibanashumbic adomboembidi Esusèn chuibanpondash. Aden chuibanash, aidtedquid tantiapec abibi qeshumbic aden chiaid chuiquin èmpondash Esusèn. ³⁴ Aden abited chuibanashumbic abèd icquiduidtsèqui bédamboen tantiamequin chuipondash.

Acte tèccoasquiaid ènèd cac ènèdaid
(Mat 8.23-27; Duc 8.22-25)

³⁵ Adashic abi ushèmbi inchèshbudtsèc cano antabèdtoaneuc Esus: —Chian uquè cuèma utsiuc nuquiduidtsèqui nidnu. Nid —quiampondash abèd icquido caic. ³⁶ Aden chiac chian cuèman tabadcuèdquido niananec badedquid nidquin canon Esus buampondash. Abèd icquidon potenubien cano antabèdtoanquin utsin-utsinquien potepondash. ³⁷ Aden potenubien cunquequid dapan acte tèccoasquequin cano acte uemiaidèn mentoadtsempondash Esus tèotadec ushnubi. ³⁸ Adec uec usho: —Cunquequid dapan acte tèccoascaidèn nuqui mentoeque. Isucnta, icbo —quequin Esus timpondash.

³⁹ Aden tinac uètsèdtonshon Esusèn: —Mibi comapeneuc cunqueque. Ènèd —cac badedquid ènèdpondash. Adembidi: —Mibi comapeneuc tèccoasqueque. Ènèd —cac badedquid ènèdoapondash acte.

⁴⁰ Aden ènèdmetanec Esus: —*ζ*Atotsi quiaish èbi tantienquo yec dacuèdcuedede? Èbi tantiesia mibi nepec —quepondash abèd icquido caic. ⁴¹ Adec Esus cuèmbi badedquid cunquequid dapa ènèdposh. Adecbidi acte tèccoasquequid ènèdoaposh. *ζ*Mitsipadquidèn napeba? Ènèd cacpadequi ènèdposh —quec abibi onquecuededequi uèdèquianquipoapondash abèd icquido.

5

Mayan icsa dadpen dapuduedaid bédamiaid
(Mat 8.28-34; Duc 8.26-39)

¹ Adshumbic acte tëccosquec ënëdmebon nidquimbi cuëma utsiuc potiaş nidaid Cadada cashumbic Quedasa caid yacno choapondash. ² Ambobi choaş pudundoshō mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash. ³ Aidi unësaid chococate cuënote dapa şhëcuë uaidën tabadquid icpac caondash. Aidi şocosh bucon mëdantebëdta taë taniaid icboedi nadatiambo yanshobi mëtanetiapimbo yampac caondash. ⁴ Abi mëtaniaidi şocosh bucu secduatanquin tës-tëstenepac caondash. Adoshō isac abi tanebocpadquid utsi nibëdpac caondash. ⁵ Aidi inchëshën capucuenequi mëyanacimboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

⁶ Aidi abi yacno Esus canon choshō isanec titinquianec choaş: —¿Tşusio, ada cho? —quiashic: ⁷ —¿Mibëd icquidtabi nedi? Mimi namiaidpenquio nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquio iquembi. Abimbo chiembi quequin ëbi chuita —quepondash mayan icsa dapuduedaid Esus chiec. ⁸ Adec mayan icsa dapuduedaid abi onqeshobien Esusën: —Dapuduen —cashic: ⁹ —¿Tşutsi cuëmëdquid mibi ne? —quepondash Esus.

Adoaquien: —Dadpenquioshë. Cuëte podotedi dapuduedondaid nebi —quepondash mayan icsa dapuduedaid abentsëc yacimboec onquec.

¹⁰ Adashic: —Mibi nadatiambocquid cadoque. Èbitedi chian anëdënquiacno nidmenquiocnequin çnëid nidaidën adabi tabadmetsia? —quepondash mayan icsatedi.

¹¹ Adnubien macuësh potseshun chiancho dadpeshun pec tabadpondash. ¹² Aden pec tabadshō isashien: —¿Ada mimi ëbitedi chiancho dapuduedmetsia? —quepondash mayan icsa Esus caic.

¹³ Adoaquien: —Dada dapuduencuededash chiancho dapuduedcuededta —Esusën cac dapuduedcuededash acte dapa quiusudacnombo comapenec niqec pudun-pudunec mentoadbudnepondash chiancho nibëdqieç.

¹⁴ Adshō isash chiancho pemequin isquido chiec nidanepondash. Adec nidquimbi şhubu dadpen icquid uano-uanoc tabadquido chuituidac aidotsen isec cho-chopondash. ¹⁵ Esus yacno cho-choshon mayan icsa dapuduedaid bëdamiosh quequin chuituidac mayan icsa dapuduedaid icboed naden isbededpondash. Dashcute dasiuidesa icboedi dasiuidash tsadshō abimbo iquec quequin isbededpondash. Aidën tantienquicboedi tantieç tsadshō adembidi isbededoapondash. Adec tsadshō comapenen isbededequi nadatiambocquin naid nepec quetsëcquieç tabadcuededpondash. ¹⁶ Adec tabadshō isun mayan icsa dapuduedaid bëdamequin chiancho dapuduedmesho isboedon cho-choquido tantiamenuen chuibampondash. ¹⁷ Aden chuişo tantiaşun cho-choboedon: —Nëmbo tabadenquio yec nidec nid. Mibëd tabadtiapimbo iquebique —capondash comapenen Esus chuşcaquin.

¹⁸ Adshō tantiaş cano yacno nidequi cano Esus antabëdtonobien mayan icsa dadpen dapuduemoed choaş: —Mibëd icte bunebi. ¿Adabi buane? —quepondash. ¹⁹ Adoaquien: —Padi. Min şhubuno nidtan. Ambo nidşun mibi bëdamequin mayan icsa dadpen dapudemeboed Nuquin Papa tantiaquin chuiban. Nuquin Papan ëbi ad icşo unëşquicquin dapuduemiac quequin chuiban —quepondash Esus. ²⁰ Aden Esusën chiaquien nidpondash. Nidequi şhubu dadpen icquid yacno-yacnomboec nidanec nidaid Decapodis caid yacno choshon Esusën naid chuiban-chuibampondash. Aden chuiban-chuibanshō tanti-aquidtedi, Adopenşhenda Esusën bëdamiaş, quec abibi onquec tabadcuededpondash.

*Nua intac budaid bëdameshun champi unësaid bëdamiaid
(Mat 9.18-26; Duc 8.40-56)*

²¹ Adshumbic canon Esusbëd icquidon padpiden abi chobocmibidi chian poteoapondash. Adec choshō isash matses dadpen chian cuëmano padpidec cho-choaşun mananuc Esus pudundotsëçshobi badedquio tsucus-tsucustsëçquio yec datsidadpondash. ²² Adnubien Nuquin Papan chiaid chuibante şhubun tabadquido isquid, Aido cuëmëdquid, chopondash. Adec choquimbi Esus istuidash mibi bëdamocquid nec quequin ismenuec Esus taebudşun: ²³ —Con champi unëşequ. Aid mişquin bëdamec cho —cac ²⁴ Aidobëdi Esus nidpondash.

Adec nidşhobi matses dadpeshun tsibanampondash. Tsucus-tsucustsëçquio yec nidquin Esus tsibanampondash. ²⁵ Esus tsibanquidquio chido utsi icpondash. Aid chido seta 12ted matamec intac budash bëdanenquicquid icpac caondash. ²⁶ Dauë meniaqui bëdanenquio icpac caondash. Dauëchoquid utsi-utsien piucquid menequin dauë bedşun chequi bëdanenquio yec intac nuambo yampac caondash aton piucquid naimëdnubi. ²⁷ Adec intac icnubi capuquin Esusën nabanaid chuişo tantianec nidquimbi matses dadpeshun

tsibananubi aidëntsen tsibanampondash. Aden matses dadpenshun tsibananubi ismen-
quiocquin cacoch choshon Esusën dashcute mishpac caondash. ²⁸ Aden aton dashcu-
teuidtsëqui mishhec bédampatsiash icmane queshun mishtsequi bédampac caondash. ²⁹ Intac
bédanenquiocquid Esus mishhec bédampac caondash. Ĕmbi tantiacpadquiequi bédanobi que-
quin ambibi tantiapondash.

³⁰ Adec chido bédanubien Ĕmbi nadatiambocquin naoc quequin tantiec amibidi bidi-
adquin isec Esus: —ĔTsuntsimbini mishposh? —quepondash.

³¹ Aden chuisho tantiashun abéd icquidënuquo: —Tsucus-tsucustsëcquio matses dadpen
iquec, Ĕtsuntsimbini mishosh, quecta ique? —capondash.

³² Adec abéd icquid cuëdnubi onquenquiocquin, ĔMidaquidënuquo mishoshibique? Isnu,
abibi quequin matses utsi-utsien bëispondash Esusën. ³³ Aden bëisbanubi, Ĕmbi mishoc
quenquo yec bédamboed uëdëquec choequi mibi nadatiambocquin naquid nec quequin
tantiequi Esusën taëno uebudshun abi mishhec bédanaid chuibampondash. ³⁴ Adoaquien
Esusën: —Champi, mimi tantiacpadquiequi mibi bédanoc. Dada icsambo icboedi nëbi
dada bédambo mibi iqueque. Bédambo yec nid —capondash chido chuiquin.

³⁵ Aden nidmenubien Aidon shubun icquid cho-choshon: —Min champi unësoshe. Tsusio
chomenda —capondash Aido chuiquin.

³⁶ Adnubien Aido Nuquin Papan chiaid chuibante shubun tabadquido isquid caic: —
Dacuëdenquiocquin Ĕbi tantiata —quepondash Esus.

³⁷ Aden Aido chuishun Esusën: —Cho-choenda —capondash abi tsibanuequido chuiquin.
Aden chianec Petedobëdta Acobo Uan, Acobon utsimbo aidtedi buanec Esus nidpondash.

³⁸ Adec nidequi Aidon shubuno choquin comapenec shubicuededsho tantiatuidpondash.

³⁹ Aden tantiequi puduedash Esus: —ĔAtotsi quec comapenec shubicedede? Champi
unësenquo yec ushacimboec uec nec —quepondash.

⁴⁰ Adshobien tantiesa icquin mamëshumbededpondash. Adoaquien aidtedi puduem-
ish champin tita aton papa chedo abéd icquidbëd champi yacno Esus puduedpondash.

⁴¹ Ambo choshon mëdante mëdintanquin Esusën: —Talita, cumi —capondash. Aton on-
queten, Champi, isucunash nidto, quequin adopondash. ⁴² Adoac badedquio isucunash
nidtoash capupondash. Champi seta 12ted icquid niondash. Aidi bédansho isun abite-
dishun, Adopenshenda iquec quequin isbededpondash. ⁴³ Aden champi bédameshun
Esusën: —Ĕmbi naboed utsi chienda. Abimbo caimbi. Abentsëcquiobi chienda —capondash.
Aden chuitanequi: —Champi peme —quepondash Esus.

6

Abi icnëdacnoshon Esus chieshënuquido
(Mat 13.53-58)

¹ Auëshquio puduanec nidequi abi icnëdacno Nasaded caid yacno Esus choapondash.
Abëdi abéd icquido chopondash. ² Ambo tabadashic chonoattemaid ushën Nuquin Papan
chiaid chuibante shubun puduedshun Nuquin Papan chiaid chuibanquin tauapondash
Esusën. Aden chuibansho tantienuiocquid abentsëc: —ĔMitsishun chuibansho tantiashun
adomboen Esusën chuibampec? —quepondash.

Adnubien utsi: —ĔMitsicquidën ismiac Esusën nadatiambocquin nabampec? —
queoapondash.

³ Adnubien utsi: —Nëmbocquid, cuëte nacnenquid, Osen mado nec —queoapondash.

Adnubien utsi: —Ani Madia nec. Aton utsibo nëidtedi nëmbo tabadquid nec. Nëdic
Acobo, utsibic Ose, utsibic Udas, utsibic Simon. Nëmbobidi aton chibi chedo tabadoaic —
quetsëcquieq tabadec onquecuededec chieshuededpondash.

⁴ Aden chieshënaqui Esus nadpondash: —Utsi yacno nidshun Nuquin Papan chiaid
chuibansho tantiaquid dadpen icnubi abi yacno chuibansho chieshënuquid aton matses
iquendac. Aton shubun icquido adecbidi iquendac —quepondash Nasaded yacnoquido
chiec. ⁵ Aido abi chieshënuquid icsho isun nadatiambocquin nabantiapimbo icpondash. Ĕbi
bédamepec quequin tantiaquidquido daëdpactsëc icsho mishquin bédamepondash. ⁶ ĔAtotsi
quiashe Ĕmbi chiaid tantiatiapimbo icpec? Adembidi nadatiambocquin nasho istiapimbo
icpec quepondash Esus abibi onquec.

Abéd icquido Esusën nidmiaid
(Mat 10.5-42; Duc 9.1-6)

Adashic auëshquio puduanec nidaniash shubu daëdpactsëc yacno puduedcuenequin
Nuquin Papan chiaid Esusën chuibenepondash. ⁷ Adec cuenadquin chuibanequi abéd
icquido caic: —Cho —quetanec tabadtuidpondash. Adec tabadtuidash Esus: —Nëbi
mibi daëdshun-daëdshunquien chuibanec nid. Chuibanquimbi mayan icsa dapuedaid
dapuduemeta. ⁸ Nidquin dadpen mitsana sauedshun buanenda. ⁹ Tapucudte sandadia

caiduidtsëqui tapucudash nidaneta. Adechbidi utsi bedenquoio yec mibi dasiuidaiduidtsëqui dasiuidec nidaneta. ¹⁰ Shubu dadpen yacno nidash mibi yuedaid shubun puduedash ambouidi tabadquin chuibanta. Auëshquoio puduanec nidequi shubu dadpen yacnobidi nidshun adquiecbidi tabadquin chuibanooata. Adenuidi naquin chuibanta. ¹¹ Mibi yuedquid nibëdsho isash nidaneta. Auëshquoio nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomboen ismeta –capondash Esusën abëd icquido chuiquin.

¹² Aden Esusën chiaquien nidanepondash. Adec nidshumbic, mibi icsaid ënshun padpiden tantianu quenquiocquin Nuquin Papan chiacpadomboen nabanta quequin chuibampondash Esusën nidmiaidon. ¹³ Adembidi mayan icsa dapuduedaid dadpen dapuduempondash aidëmbidi. Adembidi nënquid dadpen daicsaid chedo cuête bacuë bëchichoquid ënë dachinquin bédameapondash Esusën nidmiaidon.

Uan acten mentoanquid mapi butiaid

(Mat 14.1-12; Duc 9.7-9)

¹⁴ Adnubien, Chuibanquimbi Esusën nadatiambocquin nabanosh, quequin isboedon ancanquid Edodes chuipondash. Aden chuiban-chuibanac dadpenshun Esusën nabanaid tantiapondash. Aden tantiaash: –Uan acten mentoanondaid mapi butemeboed uincuempash icnui. Adec uincuenshun nadatiambocquin nabanec nepanui –quecuededpondash tantiaquido.

¹⁵ Adnubien utsibo: –Ediasien nechitec. Nuquin Papan chiampicpadquiec choashien nec –quecuededpondash.

Adnubien utsibo: –Nuquin Papan chiaid chuipampidien Esus yanchitash –quecuededpondash.

¹⁶ Adnubien Edodes: –Ëmbi mapi butemiondaid, Uan pado, uincuempash icnui –quepac caondash.

¹⁷ Ënden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caid, bedacsho isash: ¹⁸ –Min utsin chido mimbi bedaid natemaid niosh –qeshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuisho dadpenshun tantianushe qeshun Uan bedmeshun quënën nauedmepac caondash Edodesën. ¹⁹ Adoquien Uan Edodiasën chieshëquin: –Uan cuesunemetiaquidi mibi nec –quepac caondash aton bënë Edodes caic. ²⁰ Uan bédambocquid Nuquin Papan chomiaidbidi nec qeshun Edodesën Uan cuesunemetiapimbo iquec cudasac caondash con chidon cuesunemenushe quiaash. Aden tantiaquin Edodesën abi tsadacno Uan chuibamenuen chomedenepac caondash. Uanën chuibansho tantiaash: ¿Atotsimbi nëid napeba? Ambi chuibanaid bédambo iquec. Aidën chuisho tantiaash bédambo iquebi, abibi qeshumbic Edodesën chomedednepac caondash chuisho tantianuen.

²¹ Adnubien aton chido bunacpadomboen Uan cuesunemete ushë chonobi naden napac caondash: Aton bënë abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnocquido chuiquid dapabobidi chomeoapac caondash. ²² Aden aidtedi chochomias tabadnubien aton chidon champi puduedpac caondash. Puduedacsho: –Baidata –cac baidapac caondash. Adsho isash: –Bédamboen mimbi naoc –quecuededpac caondash Edodesën chomiaido champi caic.

Adec onquesho tantiaashien Edodes aton chidon champi caic: –Mibi bunaid mibi menenu. Ëbi chui. ²³ Abimbo caimbi. Mibi bunaid ëbi chuita. Mitsanatedi bunebi ëbi casho tantiaashun dadpen mibi menembi –quepondash.

²⁴ Aden Edodesën chuisho tantiaash: –¿Atotsibi bumpeba? –quetanec aton tita yacno puduedshun: –“Mibi bunaid mibi menenu. Ëbi chui,” Edodesën caoshi. ¿Atotsimbi chuipe, tita? –quepac caondash ani chiech.

Adsho tantiaashun anin: –Uanën mapi bunebi quequin chuita –capac caondash aton champi chuiquin.

²⁵ Aden chiaquien badedquio Edodes yacno titinquec choec puduedshun champin: –Nëbimbobi Uan acten mentoanquidën mapi maspanën nandoshon ëbi mene –capac caondash anin chuibocpadomboen chuituidquin.

²⁶ Adsho tantiaash Uan tantiec unësqquoio icpac caondash Edodes. Adec unësqquiocquin ambi champi chiacpadomboen natiapimbo iquec ëmbi chomiaido quenushe qeshun adoembi abibi qeshun: ²⁷ –Uanën mapi bec cho –capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin ²⁸ maspanën nandoshon bëshun champi meriac bedshun champin aton tita menetuidpac caondash.

²⁹ Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chococapac caondash.

Dada 5000ted Esusën pemiaid
(Mat 14.13-21; Duc 9.10-17; Uan 6.1-14)

³⁰ Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash. ³¹ Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquo iccuededpondash Esusbëd icquido. Adnubien Esus: –Matses nibëdacno tabadec nidnu. Nid –quepondash abëd icquido caic.

³² Aden chiashic cano antabëdtoanec matses nibëdacno nidpondash aidtedtsëqui. ³³ Adec nidsho isash matses dadpen abi nidte yacno tantiec: –U nidanec –quiash titingue choec abia cho-chopondash. Abia titinguequid cuensho isash utsi-utsiequid dadpen titinguec cho-choapondash. ³⁴ Adec aidtedi abia cho-choambien Esusbëd icquido choapondash. Pudundoquimbi matses dadpenishun abi cainec tabadsho isashien Esus, Abi tantiamequin Nuquin Papan chiaid chuiquid nibëdacbimboecnuc matses cho-choec quequin tantiec unësquio iquebi qeshun tauain chuibampondash Esusën. Yuen chuibampondash.

³⁵ Yuen Esusën chuibanubi ushë budpondash. Ushë budsho isun abëd icquidon: –Icbo, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. ³⁶ Nidmiac shubu yacno nidshun piucquid menequin ma aton pete bedpanuna penun –capondash Esus chuiquin.

³⁷ Adoaquien Esusën: –Mimbibi nëdtedi pemeban –capondash.

Adsho tantiashien: –¿Adambi nidshun piucquid menequin panëmpi bedpe? Ma matses dadpenquo yoc –quepondash abëd icquido Esus caic.

³⁸ Adoaquien: –¿Panëmpi penun bëaid iccuededquidon na tedtsi iqueque? Ista –capondash Esusën.

Aden chiac ashunquiobi matsesën bëaid isbanash abëd icquido: –Panëmpi sincoted icnubi nuëcquid doted iquec –quepondash.

³⁹ Aden bësho isun: –Uasinën tabadbud mibëd icquid 50ted icnuc, utsibëd icquid 100ted icnuc quec tabadbud –capondash Esusën iccuededquido chuiquin. ⁴⁰ Adoac ambi chiacted-tedquec tabadbudpondash. ⁴¹ Adec tabadbudsho isun panëmpibëdta nuëcquid bedshun sananquin abuc isec: –Mimbi meniaid nec Papa. Nëbi mimbi nadatiambocquin naid ismembu –qeshun cuësh-cuëshun: –Meneban –Esusën cac abëd icquidon menebampondash. ⁴² Menebanac piash: –Padi. Piombi –quecuededpondash pequido. ⁴³ Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. ⁴⁴ Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenquiocquin dadatedicttsëqui tambampondash 5000ted iquec quequin.

Acte bëntse Esus choaid
(Mat 14.22-27, 34-36; Uan 6.16-21)

⁴⁵ Aden iccuededquido pemiashic: –Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedi nidmembu –quepondash Esus abëd icquido caic. ⁴⁶ Adoac canon potenubi matsestedi nidmianec matses nibëdacno macuësh yacno Nuquin Papa chuinuec Esus nidpondash. ⁴⁷ Adnubien inchëshbudtsëqui abëd icquido acte nënantanquo canon noadpondash. Ambobi noadnubi Esus abentsëqui mananuc tsadpondash. ⁴⁸ Ashunquo Esusën isaquien abëd icquido bëdiacttsëcquio nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadiapimboenoc acte bëntse choquin abëd icquido Esusën ismetuidpondash. ⁴⁹ Datantsensho isash, Mayambien nechitec, quequin ambibi tantiec sidquecuededec ⁵⁰ dacuëcuededpondash.

Adsho isumbien: –Ëbibi nebique. Dacuëdenquo yec tabadta –capondash Esusën. ⁵¹ Aden chuitanec cano antsadtonobi comapenec cunqueboedi ënëdpondash. Aid ënëdsho isash: –Adquidshenda nepec –quepondash abëd icquido. ⁵² Panëmpi daëdpactsëc icttsëcquid matses dadpen menebamboedën naid nec quequin tantienquiocpondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquo icoapondash pamunacbimboecquin.

⁵³ Ashunquo chian potiashic nidaid Quenesaded caid yacno choshon cano nëshpondash. ⁵⁴ Aden nëshash mananuc pudundosho isec anocquido, Aidi bëdamaianquid nec, quequin ambibi tantiaquimbi ⁵⁵ daicsaid aton ueten nandoshon Esus yacno bë-bëpondash. ⁵⁶ Adecbidi shubu dadpen yacno-yacnomboc Esus puduedcuenesho isun adembidi anocquidon, Bëdamequid nec, qeshun daicsaido bë-bëpondash. Adoac –Min dashcute ëbi

mishme —capondash bë-bëaidon. Aden ambi tantiacpaden Esusën dashcute mishash bédancuedépondash.

7

Nuquin Papan paucaid (Mat 15.1-20)

¹ Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon, ² Èmbi mishboed mishtemaid ictsiash, quesa iquec tsusedpabon chuinédacpadquiec mëpanudabi Esusbëd icquidon pesho ispondash. ³ Padiseyobo isadaidbobidi yec tsusedpabon chuinédacpadquiec penush mëpanudanequid nec. ⁴ Tiedën caniquid ambi piucquid menequin bedacnoësh choec adecbidi penush tsusedpabon chuinédacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinédaid utsi-utsiec dadpen iquec. Ambi chuinédacpadomboen dëshotetsen cachonouidi dapanquidquibidi nec. Adembidi matsu nacnenaïd cachonouidi dapanoquidquibidi nec. Shocosh matsu cachonouidi dapanoquidquibidi neoaic. Tsusedpabon chuinédacpadomboen naquidquido nec.

⁵ Aden nabanquidquido padiseyobo nec. Adquibidi abipadquid utsibo isadaidbo tsusedpabon naden nata quequin chuinédaid tantiaquid neoaic. Adec tsusedpabon chuinédacpadquiec Esusbëd icquido mëpanudenquiocsho isash padiseyobo: —Atotsieshun mibëd icquidon tsusedpabon chuinédacpadomboen nainquiocquin mëpanudabi pepeç — quepondash Esus caic.

⁶ Adoquien Esus: —Isayasën ëdenquido dada uaquin mibitedi bëdamboen chiampidpadquid mibi nec. Ambi dada uampid nad iqueque. Tantia:

“Nuquin Papa bëdamboquid nec quequin chiacpadomboen tantiesa isadaidbo nec.

⁷ Abia Yampidënuquo Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinédaid tantiaquidquido nec.”

⁸ Aden tsusedpabon chuinédacpadomboen nabanquin Abia Yampidënuquo chiaid niacquid mibi nec —quepondash Esus isadaidbo tsusiobo caic Nuquin Papan Isayas dada uamepampid tantiamenuc.

⁹ Aden chuishumbic adomboembidi chuioaic: —Badedquido Nuquin Papan chiaid chieshënuquin tsusedpabon nadomboen nata quequin chuinédacpadomboen nabanquidquido mibi nec. ¿Aden naquinda Nuquin Papan chiacpadomboen mimi nape? ¹⁰ Nuquin Papan chiacpadomboen Moisesën dada uampid nad iquec: “Titan papabëdta chiaid chieshenquiocquin naban.” Adquidën chiaid utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uoa,” quequin Nuquin Papan chiac Moisesën dada uampid nec. ¹¹ Mibien tsusedpabon chuinédaid tantiaquin adoesa nec. Papan na naimëdacsho isun naden mimi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimi chiec. Adembidi titatsen mimi chuioaic. Aden chuiquin papabëdta tita tantiaquin nashunenquiocquin Nuquin Papan chiaid niacquid mibi nec. ¹² Aden mimi nashunenquiocquin ismiacpadec, Papa, mibi nashunquin menetiapimbo iquebi, queoac utsibo. Adecbidi, Tita, mibi nashunquin menetiapimbo iquebi, queoac. ¹³ Aden chuiquimbi titabëdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinédacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinédaid nata quequin mimi chiec —quepondash Esus isadaidbo tsusiobo caic.

¹⁴ Aden Nuquin Papan chiacpadomboen niacquido chiashic: —Utsibo, tantiec cho. Mibi bëdamboen chuinu. Bëdamboec papuedta. ¹⁵ Tsusedpabon chuinédacpadquiec mëpanudabi mimi piad min tantiate icsabudtemaid nendac. Icsamboen tantiec mibi icsaic. ¹⁶ Èmbi chiaid tantiaquin utsi chuibanta —quepondash Esus.

¹⁷ Aden chiasch iccuedquido abi tabadnubi shubun puduedash tabadpondash Esus. Tabadsho isash: —Mimbi chuiboed ëbitedi tantiamë —quepondash abëd icquido. ¹⁸ Adoquien: —Utsitedishun tantienquido icboepadquido mibitedi neque. Tantia. Mimi piadën mimi tantiaid icsabudtiapimbo iquec. ¹⁹ ¿Min tantiate yacnoda mimi piad nidpec? Padenquido. Mimi piad min pucu yacno bud-budec auëshquido chimu nëncuenash puduenec —quepondash abëd icquido caic.

²⁰ Aden chiec onquiashic: —Mimbi tantiacpadquiequi mibi icsabudec. ²¹ Chido mimi inacmaid isash chudtiadquido iquec quequin mimi tantiacpadomboen chido isuidtiapimboquin mimi chudted-chudtedec. Utsin na bedtiadquido iquebi quequin mimi tantiacpadomboen mimi ampec. Cuesunetiadquido iquebi quequin mimi tantiacpadomboen

mimbi cunesunep. Utsin chido chudtiadquio iquec quequin mimbi tantiapadomboen aidi mimbi chudpec. Dada utsin ëbi bēdaidquiocsho ispec quequin mimbi tantiapadomboen min bēnēpenquio chudmequid mibi nec. ²² Utsin bedactedī bednu quequin mimbi tantiapadomboen bedquid mibi nendac. Adecbidi utsin bedaid isash adomboembidi bednu qeshun isuidesa iquec adomboen bedbanquidquio mibi yampec. Mibibi icsambocquid nec quiaish chieshēmēnquid mibi nendac. Adquid abimbo chiacbimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bēdambo icsho isash chieshēnquid mibi icpec. Utsi icsamboen chuiquid mibi nendac. Utsin chuisho, Ēbentsēqui tantiaquidquio nebi, quequin mamēnshunquid mibi nendac. Ademibidi nasho mamēnshunoaquidbidi mibi nendac. Ēmbia tantiaquid nebi, quequin mimbi nabanaid icsa isash bēdambo iquec quec mibi mamēnec tsadec. ²³ Ēmbi chuiboedtedi icsaquidēn naid nec. Aden tantiaquid icsabudte nec –quepondash Esus.

Sidopenisia caid yacnoësh chido ambi tantiapadquiec bēdanaid
(Mat 15.21-28)

²⁴ Aden chiashic isadaidbo yacnoësh puduanec nidequi isadaidpembo yacno nidpondash. Shubu dadpen icquid Tido caid anoentsēqui yacno choash shubun puduedash: –Nēmbo ëbi choaid chienda –quepondash Esus. Ambi chiacpadpenquiocnoc chuisho tantiapondash anocquidon. ²⁵ Adoac: –Esus chosh –qesho tantiashien mayan icsa dapuduedaidēn tita Esus tabadacno nidpondash. Adece nidec puduedequi Esus taebudpondash chuiquid nada pec quequin tantiec. ²⁶ Isadaidpembon chido nīdaid Sidopenisia caid yacnoquid niondash. Aidi Esus taebudash: –Con champi mayan icsa dapuduedaid dapudueme, tsusio, –quepondash comapenen chiec.

²⁷ Adoquien Esus: –Mabi con matses isadaidboba bēdamenuc choboc. ¿Bacuēbo cubud-abicinubi opashēmpida pete menequin anin bēnepadic? Padenquio. Ademibidi, ¿isadaidbotedi bēdamiabidambi matses utsibo, isadaidpembo, bēdamepadi? –quepondash Esus.

²⁸ Adsho tantiashien chido: –Icho, mimbi bēdamboen chiec. Padnuen anin meniac bacuēbon pete sananaid cuēshēmpi paēdtsacsho opashēmpin ambibi bedshun pec. Ademibidi mimbi nadatiambocquin nabanac isadaidbo dadpen bēdanubi isadaidpembo abentsēc tantiaquid yec bēdanoapec –quepondash chido.

²⁹ Aden chidon chuishobien: –Bēdamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid –capondash Esusēn isadaidpembon chido chuiquin.

³⁰ Adsho tantianec choec shubun puduedquin isaquien aton champi uebocno ěnden mayan icsa niquian bēdanash abi ushaidēmbi uec.

Pashu buēd onquenquiocquid Esusēn bēdamiad

³¹ Adashien Tido caid anoentsēcuësh nidequi Sidon caid matambidanec chian Cadidia caid yacno choapondash Esus. Nidaid Decapodis caid shubu dadpen yacno-yacnomboec capucueniash choapondash. ³² Ambo choash tsadnubien dada icsa, pashu buēd onquenquiocquid, Esus yacno bēash tsadquin: –Nēid mishquin bēdame –capondash.

³³ Adsho tantiashun iccuededquido ismenquiocnuen udictsēc dada icsa buanshun aton mēdante bushbi pashun pabiante pausuntanquin chiepondash Esusēn. Adshun, min anatsen mishnu quetanquin ismequin uicchun mēpidadtanquin pashun ana mishpondash.

³⁴ Aden amishec abuc isec: –Epata –quepondash. Paucud, quec adpondash Esus. ³⁵ Adece Esus cuēdnubi pashu buēd onquenquiocboedi tantiadcuēnash onquiampondash.

³⁶ Aden pashuaid bēdamiash: –Esusēn naid nec quequin chienda –quepondash Esus. Adoboqui niachidanquin chuibampondash. ³⁷ Aden chuisho tantiash: –Adquidshenda Esus nepec. Ambi naidtedi bēdambo iquec. Pashu paucquid nec. Ademibidi ana onquesa oncamequid nec –quec onquecuededpondash.

8

4000ted matses Esusēn pemaiad
(Mat 15.32-39)

¹ Adashic Esus yacno matses dadpen padpidec cho-choash yuec tabadec bundocuededpondash. Adsho isun abēd icquido chomiash Esus nadpondash: ² –Matses bunec tabadsho isash unēsquo iquebi. Daēdec ushec ēbēd tabadquin aton pete uesquin piac. ³ Aton pete nibēdsho isash, Pec nid, quetiapimbo iquebi padishnushe quiaish. Ēnapenuësh dadpen chochoash nec –quepondash Esus abēd icquido chiec.

⁴ Adoquien: –Pete nibēdacno nuquī tabadec. Pemenun ¿Mitsimbo nidshumbimbi pete bedpatsia? –quepondash abēd icquido.

⁵ Adsho tantiashien: –¿Tedsī panēmpi mitsana iquec? –quepondash Esus.

Adoaquien: —Siete iquec —quepondash abèd icquido.

⁶ Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nèid meneban —cac abèd icquidon iccuededquido menebampondash. ⁷ Adembidi nuècquid dëmishaid daèdpectsëcbidi bedshun: —Mimbi meniaid nec quequin tantiemi, Papa —queshun: —Nèidtsen meneban —Esusën cac menebanoapondash. ⁸ Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abèd icquidon bedaid tsitsan sieteted icpondash. ⁹ Peboedo dada caniaid dadpen 400ted icpondash. Chidon aton bacuëbobèdtambi pepondash. ¹⁰ Aden pemeshun peboedotedi nidmiash Esus abèd icquidobèd cano antabèdtoanec nidquin Dadmanuta caid yacno potepondash.

Nadatiambocquin nata. Isnu, padiseyobo quiaid

(Mat 16.1-4; Duc 12.54-56)

¹¹ Aden potiash tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

¹² Adsho tantiash, Èbi tantiesha nec, quec unësquio yec tsadequi —Èmbi naid dadpen mimbi ispaboc. ¿Adosho isboshida, Èbi isme, queoape? Nadatiambocquin nabanquin èbi isme caqui ismenquio iquemi. Abimbo caimbi —quepondash Esus. ¹³ Aden chianec nidec cano antabèdtoanquin uguè cuëma utsiuc poteopondash.

Nuquin Papan chiaidbèda ambi chiaid daèd uaquin chuiquid padiseyobo

(Mat 16.5-12)

¹⁴ Badedquio Esus nidnuesho tantiash cano antabèdtopondash abèd icquido. Panëmpi bedabi puduampondash panëmpi abentsëqui tsitsanën anuetsëcnuc. ¹⁵ Aden potequimbi Esusën nadopondash: —Pan uanuequidën trico caid putubèda bidiscamete acte pistsec cacushaqui nua yec bidisquic. Adembidi padiseyobon Nuquin Papan chiaidbèdtabi ambibi tantiaquin chiaid daèd uaquin chuibanec. Aden chuiquidbidi Edodesbèd icquido nec quequin tantiata. Aden tantiaquin padiseyobopadquid adecbidi Edodesbopadquid icmane quesun ambi tantiacpadomboen nabanenda —capondash Esusën abèd icquido chuiquin.

¹⁶ Adsho Esusën chuiboed icsamboen tantiec abèd icquido: —¿Èmbi panëmpi bèambo yaidta ichon chuipec? —quec onquecuededpondash.

¹⁷ Aden chiec onquecuedednubien tantiaquidquio icquin Esusën nadopondash: —¿Atotsi quiaish ¿ada panëmpi bèambo yaid con Ichon chuipec? quepe, mibi? ¿Èmbi nabamboed isenquio yec bëshu tsadachimboecta tsadpo? ¹⁸ Adecbidi ¿Èmbi chuibanaid tantienquio yec pashuachimboecta tsadoapo? ¹⁹ ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Doseted iccosh —quepondash abèd icquido.

²⁰ Adoaquien: —Adembidi, ¿nèbi siete panëmpi bedshun matsesën piaid napi uaid tedtsi tsitsanën sandoaid icposh? Chui —caoapondash Esusën.

Adoaquien: —Siete iccosh —quepondash abèd icquido.

²¹ Adoaquien Esus: —¿Nadatiambocquid Esus nec quequin èbi tantienquioda mimbi icpe? —quepondash abèd icquido caic.

Betsaida caid yacnoshon bëshu bédamiaid

²² Adshumbic Betsaida caid yacno poteopondash Esusbèdtambidi. Aden potiash chosho isun bëshuaid bèpondash anocquidon. Aden bëshun ismequin: —Nèid bëshumbo neque. Mibi bédamianquidquio icquin mishquin bédame —capondash Esus chuiquin. ²³ Adsho Esusën bëshu mèdianquin Betsaida caid anoentsëqui buanshun uicchn bëcuishtuatanquin bëmishhec: —¿Ada mimbi isequè? Èbi chui —capondash Esusën.

²⁴ Adsho tantiash Esus isquin: —Bèdamboen isenquiocquin cuète podo inchëshquio yacchimboecnuc mibi isembi —capondash bëshuaidën. ²⁵ Aden chuishobi Esusën bëshuaid padpiden bëmishoaquien bëucudquopondash bédamboen isec. ²⁶ Aden bédamboen iso isun: —Nèbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

Quidistu mibimbo neyoc, Petedo quiaid

(Mat 16.13-20; Duc 9.18-21)

²⁷ Aden nidmiashic ancanquid Uedipo caid tabadaid nidaid Sesadeya caid yacno nidequi: —¿Atotsi Matsesën èbi capec? —quepondash Esus abèd icquido chiec.

²⁸ Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiapadomboen chomiaidien Esus nechitec, quenubic; utsi-utsiec,

Nuquin Papan chiaid ëndenquimbo chiampidpadquidien Esus nechitec, quec —quepondash abëd icquido Esus caic.

²⁹ Adsho tantiashun: —Ma mibitedishun çatotsibi cai? —capondash Esusën.

Adoquien: —Quidistu, Nuquin Papan ambi tantiampicpaden abi yacnoshon chomaidquio mibi neyoc —quepondash Petedo abëd icquid utsibo onquiacimboen chuiioaic.

³⁰ Adsho: —Mimbi chuiboed utsi chienda. Abentsëcquiobi chienda —capondash Esusën abëd icquido comapenen chuiquin.

*Abi unës uate Esusën chiaid
(Mat 16.21-28; Duc 9.22-27)*

³¹ Aden chuishun abi unës uate tantiamequin abëd icquido Esusën chuipondash. Nuquin Papan chomiaid yec matsesacsho isadaidbo tsusiobon chieshënquin ëbi mëyanendac. Aden mëyanquin unës uaqi daëdec ushash uincuenoaindabi, quequin Esusën chuipondash. ³² Abi unës uatequid chuipechenda niondash. Aden Esusën chiaquien aibdëtsëqui uano nidshun Petedon: —Aden tantiaquin chienda —capac caondash.

³³ Aden Petedon chuisho tantiash aubidi bidiadquin abëd icquid utsibo isec Esus nadpondash: —Nidec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimbi tantiec —quepondash Esus Petedo comapenen chushcaic. Petedo Satanasbimboecquid nec quequin Satanas capondash Esusën Petedo chuiquin.

³⁴ Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu qeshun mibi bunaid nainquiocquin ëmbi chiaid tantiaquin nabanta. Ëbi mëyanacpadembidi mibi mëyante icnuc niaquenda. ³⁵ Esus tantiaquin ambi chiacpadomboen nanu queboedi unësmane quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmane quenquiocquin ëbi chuibanec tabadquid Nuquin Papa yacno tabadendac. ³⁶ Aden aton na dadpen bedbanashic Esus tantiesa yec unësash Nuquin Papa yacno puduedtiapimbo iquendac. ¿Adquidta bëdambo icpadic? ³⁷ ¿Nuquin Papa mitsana menecta abi yacno puduedtatsia? Padenquio. ³⁸ Utsi icnubi dacuëdec Esus tantiaquid nebi quesa chido aton bënë bunenquio yec dada utsibëd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesha caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan ëbi icmiac ëmbi abuchshun uaido mayan bëdabobëdi nidaidën choaindabi. Adec aidoëbëdi choashun ëbi chieshënquid isec, Con utsi nec, queoatiapimbo iquendabi —quepondash Esus cho-choquido caic.

9

¹ Aden chiashic Esus: —Nëbimbobi tabadquid ëbi tantiaquid utsi-utsiec unësabicquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

*Esus bëdaidquio icmiaid
(Mat 17.1-13; Duc 9.28-36)*

² Aden chuibanashic Sted ushash: —Nidnu. Nid —quianec Esusbëd Petedo, Acobo, Uan, aitedi ambi chiactedi macuësh dapa yacno nidpondash. Ambo nidash tabadquimbi abi bëdambo isadaid aidon ispac caondash. ³ Abi dasiuidaid dashcute icboedi nac-nacquo yampac caondash. ⁴ Edias, Moises, aid daëd ënden yampidi Esusbëd onquesho ispac caondash Esusbëd choboedon. ⁵ Aden isequi: —Chuiquid Dapa, nuquibi nëmbo choash tabadquin mibi isec bëdambo iquebi. Min shubumpi 3ted icnuc shubu uanuna mitsana, Moisesën na, Ediasën na, aited icnuc —quepac caondash Petedo. ⁶ ¿Atotsimbi chuipe? quetiapimbo yec dacuëdcuededquin aden chuipac caondash Petedon.

⁷ Adec tabadshobien abu ushu choquidën ambo tabadquidtedi bëtimpac caondash. Aden bëtinacnoëshquiobi Esus chiec onquiampac caondash: —Esus, con madombo con daynquiocquid nec. Adquid icquin chuibanasho bëdamboen tantiata —capac caondash Nuquin Papan.

⁸ Adsho isbanquin isaquien Esusbëd choboeuidi icoapac caondash.

⁹ Adanec macuësh yacnoësh budtanequi: —Mimbi isboed nëbi chienda. Ëbi Nuquin Papan mado matsesacsho unësmiac ëbi uincuenan mimbi isboed chuita —capac caondash Esusën. ¹⁰ Adsho tantiash utsi chienquio yec abi uincuemete ¿mitsipadquio icpec? quec abibi onquecuededpac caondash Esusbëd choboedo.

¹¹ Adec onquecuededash: —Nuquin Papan chomiaidquio choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ëndenquimboshë chopampic —quepondash abëd icquido Esus caic.

¹² Adoaquien: —Ai, Ediasën matses bēdamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomiaidquio yec matsesash nēbi tabadsho matsesën chieshēnquin mēyanendac quequin chuiampid nec. ¹³ Ediasën chiampicpadquie Uan acten mentoanquid chopondash. Aidi choacsho abi bunacpadomboen abi chieshēnquidēn mēyanac. Ēndenquimboshē Edias chiec onquequin dada uampicpadomboen Ediaspadquid chomiaid Uan choshon, Mibi icsaid ēnta, quequin chuisho abi chieshēnquidēn mēyanondash —quepondash Esus abēd icquido chiec.

*Mayan icsan buēd onquetiapimbo icmiaid Esusën bēdamiaid
(Mat 17.14-21; Duc 9.37-43)*

¹⁴ Adec onquetanec choquin isquien matses dadpenshun abēd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bētimpondash. ¹⁵ Adnubien Esus chosho isash iccuededquido, Bēdamianquid choec. ¿Atotsi aidēn napatsiashe? Isnu, quetanec titinque choec: —¿Ada cho? —quepondash.

¹⁶ Adoaquien: —¿Atotsi quec ebēd icquidbēd comapenec onquecuedede? —quepondash Esus.

¹⁷ Adshobien: —Chuiquid Dapa, mibi ismenuen con mado bēombi. Mayan icsan buēd oncamenquio yaid nec. ¹⁸ Aid Mayan icsan comapenen nebudteniac ēbcacush-ēbcacushpambo yec uedeniosh. Adecbidi, uebudash unēsane shēta chēquēdēshaic uiosh. Adquio yanesho, Bēombique. Bēdame, cauidombi mibēd icquido chuiquin. Adoaqui bēdamenquio iccosh —quepondash mayan icsan buēd onquetiapimbo icmiaidēn papa.

¹⁹ Aden chuisho tantiashe abēd icquido caic: —Esus nadatiambocquid nec quequin ēbi tantiesha mibi nepec. ¿Tedectsi icshun ēmbi chiacpaden mimbi tantiabempe? Mibi tantiesha icsho ¿mitsipadembimbi tantiamepe? —queshumbic: —Madompi bec cho —capondash Esusën.

²⁰ Adsho tantiashe bēpondash. Bēshobi Esus istanquin mayan icsan abi dapuduedaid comapenen cuididicamiampondash. Aden nac madompi uebudec ēbcacush-ēbcacushpambo yec cuididiquepondash.

²¹ Adsho isash: —¿Tedtsi seta matamec ad iccondashe? Chui. Tantianu —quepondash Esus madompin papa chiec.

Adoaquien: —Bacuē ictsequi ad iccondash. ²² Cuēte dētsiadaid nēnedeniosh abi dapuduedaidēn. Actetsen nēnedeniosh unēsmenuequin. Mibi bēdamequidquio icquin ebēdta tantiaquin ēbi con mado bēdameshun —quepondash madompin papa Esus caic.

²³ Adoaquien: —¿Mibi bēdamequidquio icquin ēbi con mado bēdameshun quecta igue? Nuquin Papa nadatiambocquin naquid nec quequin tantiaquidēn tantiacpadomboen Nuquin Papan naindac —quepondash Esus.

²⁴ Adsho tantiashe: —Tantiembi. Ēmbi abimbo tantienquiocsho isun ēbi tantiamē, Icho —quepondash madompin papa Esus caic.

²⁵ Adsho tantiasheun matses dadpen titinquec chosho isun mayan icsa chuiquin: —Matses buēd oncamenquiocquid mibi nec. Adembidi tantiametiapimbo icmequidbidi mibi neque. Ambo tabadenquio yec dapuduen —capondash Esusën.

²⁶ Aden chiaquien sidquec madompi cuididiquenubi dapuduempondash. Adnubien unēsacimboc madompi uesho isash: —Unēsosh —quepondash isquido. ²⁷ Adnubien madompi mēdintanquin Esusën uētsēndopondash. Adoac abembi nidtopondash.

²⁸ Adnubien shubun puduedacsho: —¿Atotsieshumbimbi mayan icsa dapuduemetiapimbo icpo? —quepondash abēd icquido Esus caic utsibon tantienquiocnobi.

²⁹ Adoaquien Esus: —Dapuduen quequinuidi chuibudaqui adquidquio dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac —quepondash.

*Abi unēs uate chuioaid
(Mat 17.22-23; Duc 9.43-45)*

³⁰⁻³¹ Aden chianec nidaid Cadidia caid matanec nidpondash. Nidquimbi, Ēbēd icquid 12tedtsēqui chuibanu, quec utsibo ismenquio yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincupendac —quepondash Esus. Abi uincuntequid chiecshenda adec Esus onquepondash. ³² Aden chuisho bēdamboen tantienquio yequi dacuēdec ēbi bēdamboen tantiamequin chui quetiapimbo icpondash abēd icquido.

*¿Mitsicquid chuiquid dapa icpec? quequin chiaid
(Mat 18.1-5; Duc 9.46-48)*

³³ Adanec shubu dadpen icquid Capednaun caid yacno Esus choapondash. Adec choash shubun puduedshun: —¿Podquedèn choec atotsi chiec onquecuedo? —capondash Esusèn abèd icquido chuiquin. ³⁴ Adsho tantiaash cuèdenquiocondash abèd icquido. ¿Esusbèd icquid mitsicquid chuiquid dapa icpeque? Tantienu, quec onquequin ambi chiaid chienquio yec tabadpondash. ³⁵ Adec tabadnubi abi tsadacnoèshi: —Cho —quiampondash Esus abèd icquido caic. Aido choacsho isash: —Chuiquid dapa èbentsèqui icnu quequid utsi nashunquidbidi ictiad —quepondash Esus.

³⁶ Adec onqueshumbic bacuèmpi abentsèc mèdintanquin abèd icquid tabadacno nēnantanquio tsadumbudpondash. Aden tsadumbudshun bacuè icuquequi: ³⁷ — Esus tantiaquid nebi quequin ismequin bacuè yuedquin nashunquid èbi yuedquin nashunacimboecquid nendac. Èbi yuedquin nashunquid èbi chomiondaid Nuquin Papa yacno yuedquin nashunoacimboecquid neoaindac —quepondash Esus abèd icquido chiec.

Nuqui chieshēnesa nuqui bēdamboen chuibanquid nec quiaid

(Mat 10.42; Duc 9.49-50)

³⁸ Adnubien utsin naid chiec Uan onquedopondash: —Icho, mimbi chiacpadomboen utsin chuisho tantiapombi. Aidèn: “Esus nadatiambocquin naquidquio nec, quequin tantiemi. Aden tantiaquin aidèn chiacpadomboen mibi chiembique. Dapuduen,” cac mayan icsa dapudemposh. Adosho isun, Esusbèd icquidpenquio mibi neque. Adenda quequin chuiquid —quepondash Uan.

³⁹ Adoaquien Esus: —Padicnuna. Nadatiambocquin naquidquio Esus nec quequin abimbo tantiaquin èmbi nacpadomboen nabanquidèn èbi icsamboen chuitiapimbo iquec. ⁴⁰ Nuqui chieshēnesa nuqui bēdamboen chuibanquid adquid nec. ⁴¹ Abimbo chiembique. Tantia. Esus tantiaquid nec quequin mibi nashunquid Nuquin Papan cuidnanquin bēdamboen naoaindac —quepondash Esus.

Icsa uanquin tantiabenicquid ismequid cuidendac quiaid

(Mat 18.6-9; Duc 17.1-2)

⁴² Abi Esusèn onquequin chuibanec: —Adembidi abi icsacpadomboen bēdamboen tantiabenicquid ismequid Nuquin Papan comapenen cuidendac. Adquid abi icsacpadomboen ismiabicsho cuènote yuèmbocquidbèda tētaneshun acte dapa nēnepatecnēdan. ⁴³⁻⁴⁴ Adembidi mimbi icsamboen tantiaquin mishaid èntiapimbocquin ismedeniad adomboembidi utsin tantiec. Bednu quenquio yec mètaniacimboec tsad ènēdenquio yec chian anèdēnquiacno nidmane quiash. ⁴⁵⁻⁴⁶ Adecbidi capuquin mibi icsaid mimbi ismebeneque. Capunu quequin tantienquio yec tateshuniacimboec tsada ènēdenquio yec chian anèdēnquiacno nidmane quiash. Adec mibi tsadnuc adquiecbidi mimbi ismiad tantiec tsadendac. ⁴⁷ Adecbidi èshèn isec mibi icsaid èntiapimbocquin mimbi ismedoniad adomboembidi utsin tantiec. Èshè chicshuniacimboec tsad ènēdenquio yec chian anèdēnquiacno nidmane quiash ma mibi tsadapadec mimbi ismiad tsadoapanu. ⁴⁸ Icsa uadenequin ènenquio yash unēsash chian anèdēnquiacno nidash unēsenuicoshobi chodquiaid pequid macun mibi pendac. Ènēdenquio yec chian anèdēnquiacno mibi tabadendac. Icsadenequin ènenquiocquid comapenen cuidtequid nendac. ⁴⁹ Sa casecac pam-bid batambo yacimboec Esuspadquid icnu quiash mibi icsaid ènēdnuen mēmunc mibi bēdambo yampec. ⁵⁰ Sa batambocquid bēdambo iquec. Sa batambochoedi batapenquio yec icsasho ¿mitsipadentsi batambo icmeoapec? Sa batambocquid casecac daèdash batambo yacpadec utsibèd bēdamboec tabadta —quepondash Esus.

10

Aton chido bedshun nidmequid

(Mat 19.1-12; Duc 16.18)

¹ Aden abèd icquido chuiquin nainashic Esus aidobèdi nidaid Cadidia caid yacnoèsh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen cho-choapondash. Adec cho-chosho isun Nuquin Papan chiaid chuibanoapondash Esusèn.

² Adecbidi cho-choquid padiseyobon Esus Nuquin Papan chiaid icsamboen chuinu qeshun: —Aton chido bedash bunenquio yanshun cuemec. ¿Aden naicta bēdambo iqueque? Tantienu. Chui —capondash Esus chuiquin.

³ Adoaquien: —¿Atotsi quequin Moisesèn chuiampic? —queoapondash Esus.

⁴ Adoaquien: —Aton chido bedash bunenquio yanshun, Con chido icsambocquid nec, quequin ambi tantiacpaden aton bēnèn dada uashun nidmiacsho isash, Padi, quenquiocpampic Moises —quepondash padiseyobo.

⁵ Adoaquien Esus: —Nuquin Papan chiaid tantiesä tsusedpabo yansho isash, Padi. Adenda, quenquoio Moises icpampic. ⁶ Nadomboen Nuquin Papan tauapampic. Dada abentsëc uashumbic chido abentsëcbidi uashun dada menepampic. ⁷ Adomboembidi nanuec dada aton tita aton papabëd tabadenquoio yec aton chido bedash abëdi ambi quënë uaidëmbi tabadec. ⁸ Aden aton chido bedash tabadequi matses abentsëc icboedi daëdec. Matses daëd icboedi abentsëc yacimboc tabadec. ⁹ Aden dada aton chidobëdta Nuquin Papan daëd uacsho ma cuëshëdmenquoio icpanuna —quepondash Esus.

¹⁰ Aden chiash shubun puduedacsho: —Mimbi chuiboed ëbitedi tantieme —capondash abëd icquidon.

¹¹ Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesä nec. ¹² Adembidi chido aton bënë bedac aton bënë nianshun dada utsi bedmequid Nuquin Papan menepampid niacquin tantiesä neoaic —quepondash Esus.

*Esus yacno bacuëbo bë-beaid
(Mat 19.13-15; Duc 18.15-17)*

¹³ Adnubien: Con bacuë mishquin Esusën bëdambo icmetsiash, quequin Esus yacno aton bacuëbo anin bë-bëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon. ¹⁴ Aden nidmesho isash nëishash: —Bacuëbo nidmenda. Ma cho-chono. Anin chiacpadomboen tantiaquidquoio bacuëbo neque. Adomboembidi badedquoio Nuquin Papan chiaid tantiendac. Nuquin Papan shubu abentsëquën tabadquid aido nec. ¹⁵ Abimbo chiembique. Tanta. Nuquin Papan chiaid bacuëbobadedquoio tantiacpaden tantiesä Nuquin Papa yacno puduedtiapimbo iquendac —quepondash Esus. ¹⁶ Aden chuitanquin bacuëbo dayumbanquin mamishec, Nëid bacuë bëdambo icme, Papa, quequin Nuquin Papa chuipondash Esusën.

*Na dadpen icquid chiaid
(Mat 19.16-30; Duc 18.18-30)*

¹⁷ Aden bacuëbo chianec auëshquoio puduanec nidshobien dada abentsëc titinquec choquin bëquedtanec danëshën sebudash tsadec: —Chuibanquin tantiamianquid, bëdamboquid mibi neque. ¿Nuquin Papan shubu abentsëquën tabadnuequin atotsimbi napeba? —quepondash choboed Esus chiec.

¹⁸ Adoaquien Esus: —¿Nuquin Papabëdtabidabi mibi bëdamboquid nec, ëbi cape mimbi? Nuquin Papauidtsëqui bëdamboquidquoio nec ¹⁹ —quequin chiec abi onquec: —¿Nuquin Papan nadomboen nata quequin dada uamiampidtedi nabanquidta ne? Aidedi mimbi tantiapec. Nad iqueque. Tanta: “cuesunianenda; adembidi min chidouidi chudquid icta; adembidi, ampenda; adecbidi, utsi chiec muainda; adecbidi, utsin na bedesabimboec muainda; adembidi papabëditan titan chiaid chieshënenda.” ¿Aidedi Nuquin Papan dada uamiampid nabanquidta ne? —quepondash Esus choboed caic.

²⁰ Adoaquien: —Abimbo chiembique. Tanta, Icho. Aidedi nabanquidquoio nebi. Bacuëtsëc icquimbi adquid nabanondambi ënenquiocquin —quepondash choboed.

²¹ Adsho tantias, Aibëd icte bunebi, quequin ambibi tantiec Esus nadpondash: —Nuquin Papan chuiquin dada uamiad nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tanta. Min shubuno nidshun mitsana mimbi tantiaidquoio menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquoio mibi iquendac. Adec Nuquin Papa tantiaquidquoio yec ëbëd iquec cho —quepondash Esus.

²² Adsho tantias choboed mamënenquoio yec unësquoio yec nidpondash con na meneban-tiapimbo iquebi quiash.

²³ Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepondash abëd icquido chiec.

²⁴ Aden Esusën chuisho tantias, ¿Abimboda capec? quequin ambibi tantiec abëd icquido otacquoio tabadsho isec Esus: —Abuido, Nuquin Papan shubu abentsëquën matses badedquoio puduedtiapimbo iquec. ²⁵ Adembidi shëcuën puduedte nidaidën capuquid dapan badedquoio tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid matsesën badedquoio tantiatiapimbo iquec. Ambi tantiacpadequi puduedte bunec —quepondash Esus.

²⁶ Adsho tantias abëd icquido, ¿Abimbobida capec? quetsëcquiec onquecuededpondash. Adec tabadequi: —Ambi tantiacpadequi puduedtiapimbo noc ¿tsutsi puduedquid icpeba? —quepondash abëd icquido Esus chiec.

²⁷ Adoquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimbo noc Nuquin Papambien abi yacno yuedanquid mibi tantiamendac —quepondash Esus.

²⁸ Aden chiaquien Petedo nadpondash: —Chuinu. Tantia, Icho. Mibëd icnu, quequin abitedi nianondambi. Ademibidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chieci.

²⁹ Adoquien: —Abimbo chiembique. Tantia. Esusbëd icnu qeshun Nuquin Papan shubu abentsëquën tabadte iquec quequin chuinequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidtedimbocho ³⁰ daëd uaqin Nuquin Papan menendac. Nëbi shubu utsin-utsinquec mibi puduedcuene. Adecbidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnuc mibi chieshëquidbidi iquendac. Yucash ënëdenquio yec Nuquin Papan shubun mibi tabadendac mibi chieshëquid nibëdacno. ³¹ Nidaidëshun chuiquid ichoedi Nuquin Papa yacno tabadquid utsi nashunquid mibi iquendac. Adecbidi nidaidën tabadquid nashunquid ichoedi Nuquin Papa yacno tabadquid chuiquid iquendac. Nashunesa yec chuiquid ichoedi Nuquin Papan shubun puduedash utsi nashunquid adquid iquendac —quepondash Esus.

*Ëbi unës uaindac quequin Esusën chiaid
(Mat 20.17-19; Duc 18.31-34)*

³² Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquieci abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Ëbëd icquidouditsëqui padpiden chuiöanu —quiash Esus niduidshun cho-chosho isquin naden abi mëyante chuiquid tauapondash: ³³ —Chuinu. Bëdamboen tantia. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac icsaquidbimboecnuc ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqeshun ëbi buanshun isadaidpembo ancaquid ëbi meneoaindac. ³⁴ Aden meniac bedshun aidon ëbi oncain mamëshumbedequimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chieci.

*Ëbi daëdi nashunta Acobo Uambëd quiaid
(Mat 20.20-28)*

³⁵ Aden chiaquien Acobo Uambëd Esusën dayuntsëqui choash: —Mibi chuinu. Tantia. ¿Ëbi daëdshun chiacpadamboen ëbi daëdi nashunenquioda mimbi icpe? —quepondash.

³⁶ Adoquien: —¿Atotsimibi mibi nashuneque? Ëbi chui. Tantanu —capondash Esusën.

³⁷ Adoquien: —Abuc nidash chuiquid dapambo mibi icquin utsi ismequin min dayunquio ëquë tsadumbudenquin ëbi daëdi tsadunta —capondash Uanën Acobobëdtañ Esus chuiquid.

³⁸ Aden aid daëdshun chiaquien: —Tantienuiocquin mimbi chioc. Icsaquid matsestedi nec, quequin Nuquin Papan aido cuidenquiocquin ëbi aton madombo bëdambocquiddec cuidendac. ¿Ada ëbipadquid mibi icpatsia? —capondash Esusën.

³⁹ Adoquien: —Ai, adquid tantiembi —quepondash.

Adoquien: —Ai, adomboembidi mimbitsen tantiendac —quepondash Esus. ⁴⁰ Aden chieci abi onquec: —Abuc nidash chuiquidquio iquec con dayunquio ëquë tsadbudcuene tsadec cho, quetiapimbo iquebi. Nuquin Papambien ambi tantiaidquio aden chiendac. Ëmbi padenquio iquec —quepondash Esus Uambëdta Acobo chieci.

⁴¹ Aden Esusën chiaqui abëd icquidquio utsitedi Acobobëdtañ Uanën chuiboed tantiañ nëishcuededpondash. ⁴² Adec nëishash tabadsho isash: —Cho —quepondash Esus. Aden chomias: —Utsi namequid isadaidpembo nec quequin mimbi tantieci. Aidon matses utsi yuaquin mëyanquin namebanec. ⁴³ Aden namesa mibi nec. Chuiquid dapa icnu quiash utsi nashunquid icta. ⁴⁴ Adecbidi tsusio icnu quiash yuabimboe yec utsin namiaid icta. ⁴⁵ Adquid icnuec Nuquin Papan madombo matsesash nidaidën tabadobi. Ancanquid iquenquio yec nashumëquidquio nebi. Adquid yec matses icsaid bedshunash ëbided cuidadec unësëndabi —quepondash Esus.

*Bëshuaid, Badtimeyo cuëmëdquid bëdamiaid
(Mat 20.29-34; Duc 18.35-43)*

⁴⁶ Aden chiashe Edico caid yacno chonobi abi tsibanquid utsibo dadpen chochopondash. Ambo tabadash abitedi puduampondash. Puduamash nidquin isaquien

bëshuaid, Timeyon mado, Badtimeyo cuëmëdquid podqued cuëman tsadpondash. Pucquid bednu quequin cainec podqued cuëman tsadpondash. ⁴⁷ Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa, Dabidën madon, ëbi tantiaquin nashun —quequin chiec cuëdpondash bëshuaid.

⁴⁸ Adec cuëdsho tantiashun: —Esus cuënenquo yec otacquo tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

⁴⁹ Adoac nidtuidshun Esusën: —Cuënquid chome —capondash.

Adoquien: —“Chome,” queque. Nidtoash nid —capondash utsibon.

⁵⁰ Adsho tantiash bëshuaid aton dashcute bëntsecquid chicaneç badedquo nidtoanec Esus yacno chopondash. ⁵¹ Adec chosho isun: —¿Atotsimbi mibi nashumpeba? —capondash Esusën.

Adoquien: —Iste bunebi, Içbo —quepondash bëshuaid.

⁵² Adoquien: —Esusën ëbi bëshuaid bëuquec quequin mimbi tantiapadquieç mibi bédanoque. Nideç nid —Esus quenubi isbenquiopondash bëshuaidën. Adec bédanshun Esus nidsho isun tsibampondash.

11

Chuiquid dapabimboec yec Edusaden yacno Esus choaid
(Mat 21.1-11; Duc 19.28-40; Uan 12.12-19)

¹ Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëçbidi Betania caid icoapondash. Aidtedi macuësh Odibos caid potsembo icpondash. Ambo choash ëbëd icquid daëd shubuno nidmenu quequin tantieç nadpondash Esus: ² —Në shubu dapen yacno nideç nid. Ambo nidshun cabayobieçquidën bacuë caniabieçsëçquid tënëshac tsadsho mimbi istuidendac. Aidi matses catsadabieçquid neque. Aidi istuidshun tënëshaid tēchicshun sananquin bëta. ³ Aden bedsho isun, ¿Atotsi canun aid bede? cac, Bëoaimbi. Nëid nuquin icbo bunaid nec, cata. Mimbi aden chiac, Buanec nid, quendac —quepondash Esus abëd icquid daëd chieç.

⁴ Aden Esusën chiaquien abi daëdi nidpondash. Adec nidanequimbi cabayobieçquid caniabieçsëçquid shubu shëcuë cuëmano tënëshac tsadsho istuidshun tënëshaid tēchicpondash.

⁵ Aden tënëshaid tēchicsho isun: —¿Mitsipaden tantiaquin ëmbi tënëshaid mimbi tēchiqueque? Tantuanu. Chui —capondash anocquidën.

⁶ Adoquien: —Tënëshaid tēchicshun bëta, con icbo quebocpaden naimbi —capondash tēchicquidën.

Adoquien: —Buanec nid —queoapondash.

⁷ Adoac Esus yacno buampondash. Aden bëshun aton dashcute bëntsecquid chicshun cabayobieçquid capuçpondash ma chuiquid aidën catsadtonoeshun. Adoaidën Esus catsadtopondash. ⁸ Adembidi chuiquid Esus nec quequin ismequin utsibontsen aton dashcute bëntsecquid chiechededshun podqued ansambampondash ma chuiquid dapa bēdamboçquid capunueshun. Adembidi tantiaquin utsibon budēbieçquid podo tebededshun podqued ansambanoapondash. ⁹ Aden ansambanash matses dapen bëyucanec nidanenubi Esus nënantanquo nidnuc aidtedbidi tsyuec choquin tsibambēpondash. Adec abitedi nidanec Esus tantieç nadeç cuëdëncuededpondash: —¿Adeduya! Nuquin Papan bēdambo icmiaid ambi tantiapadomboen chuitanta quequin chomiaid nec. Tsusedpa chuiquid dapa, Dabid cuëmëdquidën tsyueçquid, shubu abentsëqui tabadquido chuiquid dapambo choec nec. ¹⁰ Èbi chuiquid dapa Nuquin Papan abuc tabadquidën chomiaid Esus nec. Nuquin Papa bēdambohë iqueç. ¿Adeduya! —queç cuëdëncuededpondash Esusbēd nidquido.

¹¹ Adec cuëdëncuededeçqui Edusaden yacno cho-chopondash. Choashic Nuquin Papa tabadte shubu uashunaid quënë dapen yacno nidash Esus puduedpondash. Adec puduedshun abitedi isbanash ushë budtsambi Betania caid yacno nidaneapondash Esus.

Cuëta bacuësa chiaid
(Mat 21.18-19)

¹² Abadiadsashi Betania yacnoësh nidanec Esus bundopondash. ¹³ Adec bundoshombi cuëta icueda caid podo buntac-buntacpambo ancuenquo nidsho istuideç Esus: —Icueda podo buntac-buntacpambo podoash nideque. Isbono. ¿Bacuëshashida neque? —quianec nidpondash. Adec nidquimbi icueda podouidquo icsho ispondash. Ushë utsin bacuëtiaquidi bacuëabi podopac. ¹⁴ Ad icsho isun Esusën: —Adeçqui bacuësa icsho ma matsesën chenquo icpanuna —capondash. Aden chuisho tantiapondash abëd icquidon.

Nuquin Papa tabadte shubu uashunaid yacnoshon cuemiaid
(Mat 21.12-17; Duc 19.45-48; Uan 2.12-22)

¹⁵ Aden cuëte chuijëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedoapondash. Adec puduedshun piucquid bedquin piucquid sanaid cuestetedi bidiacbanquin piucquid bednru nidaidën capuquidbëda podochoquid chedo menabanquidën tsadetsen nebudquin icbotedi puduemampondash. ¹⁶ Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin. ¹⁷ Aden chushcashic: —¿Ëbi tabadte shubu uashunaid matsesën ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaguin piucquid bedte shubu mimbi icmiayoc —quepondash Esus. ¹⁸ Aden Esusën chuisho tantiash, Icsambocquid Esus neque. Unës uatiad, quequin ambibi tantiabedec isadaidbo tsusiobo tabadcuededpondash. Utsioben: —Chuiquid dapan chiapadomboen Esusën chiec —quepondash. Adsho tantiash, Esus bednu, quetiapimbo yec dachuëdcuedec tabadpundash isadaidbo tsusiobo. ¹⁹ Adnubien inchëshbudtsëqui Edusaden yacnoësh nidoapondash Esus.

Cuëte bidiquiaid
(Mat 21.20-22)

²⁰ Abadiatsashi Edusaden yacno nidoaquimbi cuëte icueda caid bidiquiacsho istuidpondash. ²¹ Aden istuidash Esusën icueda bacuësa chiaid tantiec Petedo: —Cuëte bacuëabicsho mimbi chuiboed bidiquiaie. Is, Icho —quepondash.

²² Adoaquien Esus: —Nuquin Papa nadatiambocquin nabanquid nec, quequin tanti aquiota. ²³ Abimbo chiembique. Nuquin Papa nadatiambocquin nabanquidquo nec, quequin abimbo tantiasho isun mimbi chiapadomboembidi naindac. Aden tantiaguin mimbi nëid macuësh cain, Mananuc tabadboedi adquiecbidi acte nantan tabadoata, mimbi cac nëid macuësh acte nantan tabadoaindac. ²⁴ Ëmbi chiapadomboen Nuquin Papan naindac, quequin abimbo tantiaguin mimbi chuisho tantiashun Nuquin Papan adomboembidi naindac. ²⁵ Aden Nuquin Papa chuinush mibi utsin icsambocquin naid tantienquo yec bëpiscudta. Adsho abucshun isash Nuquin Papan mimbi icsa uanquin naid tantienquo yec bëpiscudendac. ²⁶ Adenquo mibi icsho isun Nuquin Papan mibi icsa uanaid bëpiscudenquicquin mimbi chiaid tantiatiapimbo iquendac —quepondash Esus abëd icquido caic.

¿Mitsicquidën chuibanta caid mibi ne? quiaid
(Mat 21.23-27; Duc 20.1-8)

²⁷ Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: ²⁸ —¿Mitsicquidën chuibanta cac chuiquid dapabimboecquin mimbi chieque? Tantianu. Chui —capondash.

²⁹⁻³⁰ Adoaquien: —Adembidi ¿Atotsi tantiaguin mimbi chuipe? Chui. Tantianu. ¿Matses mentondaidën, Uan padon Nuquin Papan chuimiapadomboen nabanquinda nadiandash? Padenquo, quequin, ¿Ambibi tantiapadomboen Uan padon naondash, quequinda mimbi tantiapeque? En chui. Tantianu. Aden mimbi chiac ëmbitsen mibi chiembi —capondash Esusën tsusiobo chuiquin.

³¹ Aden Esusën chuisho tantiash udictsëc nidash isadaidbo tsusiobo onquec nadcuededpondash: —Nuquin Papan tantiamiapadomboen Uan padon naondash, nuqui qesho tantiash, ¿Atotsieshun aidën chiaid tantienquo iconda? quetsiash Esus. ³² Naden Uan padon ambi tantiapadomboen naondash, nuqui qesho tantiashun, ¿atotsi napatsiash Uanën chuisho tantiondaidon? Aidon, Nuquin Papan chuimiaid Uan pado niandash, quequin tantiabededquin nuqui cuënoten seshunetsiash —quecuededpondash. ³³ Aden chiec onquecuededashic —¿Tsuntsin tantiamiapadomboen Uan padon nabampondash? quequin tantienquo iquembi —quepondash isadaidbo tsusiobo Esus chiec.

Adoaquien: —¿Tsuntsin tantiamiapadomboen Uan padon nabampondashba? quequin mimbi chienquo yacpadembi ëbi chuiquin tantiamequid mibi chienquo icoaimbi —quepondash Esus abi chieshënuquido isadaidbo tsusiobo chiec.

12

Tied icho nashunta quequin chiaid
(Mat 21.33-46; Duc 20.9-19)

¹ Aden chiashic, isadaidbo tsusiobon nacpadomboen naid nec quequin tantiec utsi chiachimboec Esus nadpondash: —Chuinu. Tanta. Icbon aton tiedën uba caiduidquo

nitsinshun cueste bënitsinaidën otadnidec cuidian-cuidianec dadpen bacuëec. Sinash didiesho icbon bedec. Aid nitsinshun icbon daquënë uaic. Aden daquënë uashun yuecshun uba ënë chinun tsuc-tsucte nacnemposh. Aden nacnenshun uba ampenushe qeshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

²“Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh. ³Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeaposh. ⁴Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeaposh tied icbo nashunquidon.

⁵“Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Adembidi, tied icbon nidmiaid utsi-utsien abi tied nashunquidon cuesosh. Aden nabanquimbi utsi-utsien cuesuneposh.

⁶“Adsho isash tied icbo nadposh: Nëid, con madombo abentsëqui nec. Èbi cudasaid nec. Aidi tsyuec con tied yacno nidmembidi. Aidi chosho isun, Tied icbon madombo nec, qeshun bédamboen istsiash, qeshun aton madombo nidmeposh.

⁷“Aden nidmiac ancuenquid chosho isash, Tied icbon madombo choeque. Is. Aton papa unësan aton papa yacpadec icbo icoanushe qeshun tied icbo nuqui icnun aidi cuesunenuna, quecuededposh tied icbo nashunquido.

⁸“Adec onquetanquin aton icbon madombotsen bedshun cuesuneshun daquënë uaid mabudacquin nebudposh. ⁹Adoacsho tantiasun ¿atotsi tied icbon napec? Naden naindac. Utsibéd aton tied yacno nidshun abi nashunquidon cuesuneshun utsibo abi nashunquido icmendac –quepondash Esus.

¹⁰Aden chuishumbic Esusën: –¿Adomboembidi chuiquin Nuquin Papan dada uamiampid tantienquioda icco? Nad iqueque. Tántia.

“Shubu uanuequidën buintad isuidaidi utsin abia nitsinaid icoaposh. Adquiobidi Nuquin Papan chuimiaid matsesën tantiauidaid iquendac.

¹¹Nuquin Papan naid bédambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidënquio tantiec”
–quepondash Esus Nuquin Papan chiampidquio chiec. Nuquin Papain shubu abentsëquën abi tantiaquido yuedanquid nendac, quequin utsi chiacbimboec abibi chiadquin Esusën chuibampondash.

¹²Adsho tantiashe, Èbitedishun isuidaidbimboecnuc chuibanec quequin tantiec isadaidbo tsusiobo Esus bedtiadquio icpondash. Adnubien Esus onquesho dadpenshun tantiabedepondash. Dadpen icsho isash dacuëdcuededec Esus bednu quenquio yec nidanepondash chieshëmênquido isadaidbo tsusiobo.

Bec cho quequin bedshunquid nec, quequin chiaid

(Mat 22.15-22; Duc 20.20-26)

¹³Isadaidbo tsusiobo nidshun padiseyobo edodesbobëda istuidshun: –Nëidon Esus icsamboen chuimetsiashe –qeshun aido Esus yacno nidmepondash. ¹⁴Aden nidmiac Esus yacno choshon abentsëcshun Esus nadopondash: –Ambia tantiaquid, matsesën tantiamiacpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin èbi chui. Tántianu. Shocosh piucquid bec cho quequin bedshunquid, isadaidpambo ancaquid, Sesad cuëmédquid nec. ¿Aden meniaid bédambo iquec, quequin Nuquin Papan chiaidta nepec? ¹⁵¿Adambi menepeba? –quepondash padiseyobobéd edodesbo Esus caic.

Adoquien, Èbi icsamboen chuimenuc adec onquec, quequin ambibi tantiec: –Shocosh piucquid bec cho ma isnu –quepondash Esus.

¹⁶Adsho tantiasheun bēpondash. Adoquien: –Sananquin isme. ¿Tsutsibimboecnuc dada uaid iqueque? Chui. Tántianu –capondash Esusën.

Adoquien: –Isadaidpambo ancaquid, Sesadbimboecnuc dada uaid nec –quepondash.

¹⁷Adoquien: –Ai, aidën na nec. Aid bec cho, qesho meneta. Adembidi Nuquin Papa Nuquin Icho icquin, Nata, cacpadomboen naban –capondash Esusën.

Aden bédamboen chuisho tantiashe, Bédamboenshenda tantiapec, quequin ambibi tantiec Esus chieshëmênquido tabadcuèdedpondash.

Abuc tabadequi, ¿mitsicquidën chido neque? chui quiaid

(Mat 22.23-33; Duc 20.27-40)

¹⁸Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido nepondash. Aido cho-choash nadpondash: ¹⁹–Moisesën dada uapampid nad iqueque. Tántia. chuinu. Chidochoquid bacuë tishmiabi yec unësan

unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaidbimboec ma icpanuna, quequin chuipampid nec — quepondash saduseyobo. ²⁰ Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash. ²¹ Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën ²² aton utsi unësan aid chidobidi bedshun tishmiambo yec unësoapondash bacuë nibëdquo yec. Adecbidi dadatedi unësbudnepondash. Adecbidi chidotsen unësoapondash. ²³ Adec unësash abuc tabadequi, ¿mitsicquidën chido aid icpatsiashe? Chui. Tiantianu —capondash saduseyobon Esus chuiquin.

²⁴ Adoquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic. ²⁵ Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaid mayan bëda unësesa yacpadquiec matses uincuenash unësesa iquec caidesa nendac. ²⁶ Adembidi unësash uincuenaid tiantianu qeshun ¿Moisesën dada uaid isenquioda ictionda? Aidën cuëtempi abibi nëdënqesho istanec nidtuidquin naded Nuquin Papa onqesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën. ²⁷ Nuquin Papan chiacpadpenquiocquin Moisesën dada uapampid nec quequin mimbibi muaquin chienda. Chuinu. Tantia. Unësaidën Papa nebi qesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiate icsho ambi uincuen uatequido Nuquin Papan tantiendac —quepondash Esus matses uincuenta iquec quequin saduseyobo tiantiamenuc.

Naden nata quequin chiaid ¿mitsicquid adquidpadquid utsi nibëdpec? quiaid (Mat 22.34-40)

²⁸ Adec Esusbëd saduseyobo onquecuedednubien tsusedpabon nadomboen nata quequin chiaid tantiamequid abentsëc chopondash. Bëdamboen Esusën saduseyobo chuisho tantiash Esus icsamboen chuimenuc aidtsen: —Ëmbitsen tiantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibëdpec? —quepondash.

²⁹ Adoquien Esus nadpondash: —Nëid chiaidpadquid utsi nibëdeque. Chuinu. Tantia. “Nuquin Icho Nuquin Papa nec. Nuquin Icho Abentsëcquiobi iquec. ³⁰ Adquid icsho ëbi tantiaquid isash bëdambo iquebi camequin Nuquin Papa tantiadoneta. Adecbidi ëbi yacpadecuidi icnu quenquo yec Nuquin Papa bunacpadquiec icnu quec bëdamboec tabadta. Adembidi ambi tantiapaden tantianu quequin adombota. Adembidi aid tanti-aquin bëdamboen nabanquiota. ³¹ Aden nabanquin Nuquin Papa bëdambo icmequin utsibo adembidi bëdambo icmequin nabanta. Ëbi tantiaquin utsibon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibëdec —quepondash Esus.

³² Adoquien Esus icsamboen chuimenuc choboed nadpondash: —Mimbi chuiboe abimbo iquec. Nuquin Papa abentsëcquiobi iquec. Aidpadquid utsi nibëdec. ³³ Adembidi, ëbi tantiaquid isash bëdambo iquebi Nuquin Papa camequin tantiadoneta. Adecbidi mimbi tantiapadomboen nainquo yec Nuquin Papan tantiapadquiec icnu quec bëdamboec tabadta. Adquid icquin ambi tantiapaden tantianu quequin adombota. Adembidi abi tantiaquin bëdamboen nabanquiota quequin chuitequidpadquid utsi nibëdec. Aden Nuquin Papa bëdambo icmequimbi utsibo adembidi bëdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibëdec. Aden naquid Nuquin Papan bëdamboen isendac. Aden naisa, Con na Nuquin Papa menenu, qesho Nuquin Papan bëdamboen istiapimbo iquendac —queoapondash choboed.

³⁴ Aden choboedën bëdamboen chuioasho tantiash: —Nuquin Papan shubu abentsëquën tabadaid mimbi bëdamboen tantiatempoc —quepondash Esus.

Adoac Esus icsamboen chuimenuc quetiapimbo icpondash utsibo.

¿Tsuntsin mado Quidistu nepec? quiaid (Mat 22.42-46; Duc 20.41-44)

³⁵ Abi icsamboen chuimenucquid utsi nibëdnuc Nuquin Papa tabadte shubu uashunaidën tabadquimbi Esusën Nuquin Papan dada uamiampid chuibanquin nadopondash: —Nuquin Papan chomiaidquo tsusedpa Dabidën mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu. ³⁶ Naden Nuquin Papan Mayanën Dabid chuimiampic:

“Icbo utsi icsho mibi chiembique. Tantia, mado, quequin chiec Icbo Dapa nadpampic: Èquè con dayun abiucquio cainec tsadec cho ma mibi chieshënquidtedi mimbi namiaid ma icpanu.”

quequin chuiampic. ³⁷ Aden Nuquin Papa icbo dapanquo aton dayunquo chomiaid chiec Dabid pado, Con icbo nec, quiashic, ζmitsipadquiec, Con mado nec, queopampic? Nuquin Papan chometequid, aton mado, Dabidën icbo yec ζmitsipadectsi Dabidën tsyuecquid icoapec? —quepondash Esus abibi chiadequi.

Aden chiec onquesho tantiash badedquo tantiatiadquo yampondash utsibo. Bëdamboen chiec, quequin comapenen tantiapondash.

Nuquin Papan chiaid tantiamequidon chuisho tantienda quiaid
(Mat 23.1-36; Duc 11.37-54; 20.45-47)

³⁸ Aden tantiamequimbi Esusën nadopondash: —Tsusedpabon nadomboen nata quequin chiaid tantiamequidën chuibansho tantienda. Aido nadquid iqueque. Tantia. Tsusio-bimboec isadnu quiash abi dasiuidaid ënapen icquid dasiuidtenequid aido nec. Adecbidi tantiaquidquo yec tsusio-bimboec isadnu quiash aton matses dadpen yacno capuquid nec.

³⁹ Adomboembidi ëbi isoanu quiash Nuquin Papan chiaid chuibante shubun puduedash tsusiohëd tsadec. Adomboembidi ismenu quiash isedquido dadpen yacno choash shubu icbon dayunquo tsadoaic. ⁴⁰ Aido bëdamboen nashumbimboen nianten na ampequid nec. Ademebidi bëdamboquid nec camenuen yuen Nuquin Papa chiec. Adquid comapenen cuidtequid nendac —quepondash Esus.

Nuquin Papa tantiaquin nianten meniaid
(Duc 21.1-4)

⁴¹ Aden chiashic aton na bedtequid sandote tabëcaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidën nacentsiash quequin aton na bedtequid bë-bëquin sandobansho isec tsadpondash. Adec tsadquin isquimbi aton na dadpen icquidën aton na bedtequid sando-sandonobi ⁴² aton na daëdpactsëcquidquo niantè choquimbi aton shocosh nuquid daëdquibictscquid sandopondash aton na utsi nibëdquiocnoc.

⁴³ Adosho isun abëd icquido chomeshun Esusën nadopondash: —Abimbo chiembique. Tantia. Niantè aton na bedtequid dayun uanu quenquioctscquid Nuquin Papa tantiaquidquo sandoquidquo nec utsibon aden sandoenquiocnobi. ⁴⁴ Utsibon aton na bedtequid dadpen uesenguioocquin sandobededpash. Aido daëdpactsëc icquid sandoacimboen sandoquido nec quequin tantiambi. Adquidpenquo niantè nec. ζBednun tedtsimbi dayunoape? quenquioocquin aton na daëdquibictscquid nibëdquiocnoc sandopash nianten. Dadpen icquid sandoacimboen sandosho aid isembi —quepondash Esus.

13

Nuquin Papa tabadte shubu uashunaid chic-chicte chiaid
(Mat 24.1-2; Duc 21.5-6)

¹ Aden chianec Nuquin Papa tabadte shubu uashunaidën puduenubien: —Nuquin Papan shubu cuënote nacnenaid bëdaidquo iqueque. Is, Icbo —quepondash abëd icquid abentsëc Esus caic.

² Adoaquien: —ζNëid shubu dapa isecta ne? Shubu uaquin cuënote dapa tsindonëdaid mimbi nëbi isaïd chic-chicac nibëdquidnac —quepondash Esus.

Abitedi naimbudte tauanun ismete chiaid
(Mat 24.3-28; Duc 21.7-24; 17.22-24)

³ Aden chiashic auëshquo nidanec macuësh Odibos caid yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aidted icpondash. Utsibon tantienquiocnoc aidon: ⁴ —Cuënote nacnenaid nebudte mimbi chuiboed ζmitsipadën nebudte icpeque? Tiantianu. Èbi chui. Ademebidi aidi tauanun ismete ζatotsi icoapecque? Tiantianu. Aid chuioa —capondash.

⁵ Adoaquien Esusën nadopondash: —Muaquin chiaid tantiamane qeshun Nuquin Papan chiaid isban-isbanquiota. ⁶ Nuquin Papan chomiaid nebi quec muaquid chochoendac. Aid chosh, quequin chiac utsin-utsinquien, Abimbi caic, quequin tantiabed-edendac. ⁷ Adecbidi cunesnancuededec quendac. Ademebidi cunesnancuededosh, quequin chuituidsho tantiaoaindac. Aden chuituidsho tantiash dacuëdenda. Ad icnuc abitedi naimbudte ushë choabi iquendac. ⁸ Ai, adquo iquendac. Adashic abëd tabadquidobëdi cunesnancuededendac. Adecbidi abi ancaquid dapan, Cuestan, quequin nidmiac nidaid

utsin icquidobëdi cuesnancuedoaindac. Adecbidi utsi-utsiec yacno nidaid ishcludendac canchednuec. Adecbidi bunquiqote iquendac. Aidedi icsamboshëcquid taëyendac.

⁹ “Adquid yanubi Nuquin Papan chiaicpadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpombo ancaquid dapabo yacno buanaqui mimbi tantiaid Nuquin Papan chiaid mimbi chuibanendac. ¹⁰ Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidën chuitiad. Aden chiaibicnuc abitedi naimbudtiapimbo iquec. ¹¹ Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimbibi tantiec tsadenda. Nuquin Papan Mayanën mibi tantiamiacpadomboen mimbi chuibanendac.

¹² “Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tantiesia icquin aton papan chiaid niacquin adembidi aton titan chiaid niacoaquin cuesunemendac. ¹³ Esus tantiaquid chieshënquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquo yec unësash Nuquin Papa yacno nidacsho bëdambo icmiaid mibi iquendac.

¹⁴ “Adnubien Nuquin Papa chieshënte ushë choendac. Aid chonoc Edusaden yacno abi chieshënquid dapa choash, Nuquin Papa caid nebi, quiash Nuquin Papa tabadte shubu uashunaidën tsadendac. Adsho isash cuesunenushë quiash anoentsëqui icquido cuenquioicboedi ma cuempanuna. Abimbo chiembique. Bëdamboen tantiaa caimbi. ¹⁵ Adecbidi shubu macano pada-padapambo yacno tabadquid yec umanuc dectatote uaid dectandoaidën budanec con na bednu quenquo yec cuenta. ¹⁶ Adecbidi aton tied nantan tabadquid yec aton dashcute bëntsecquid chichsun dectanaid bednuec bidiadenquo yec badedquid cuenta. ¹⁷ Bacuë usunquid adecbidi bacuë chishmequin buanquid badedquio cuentiapimbocsho mëyampec. Adquid tantiec utsibo unësquo ichhitec. Nuquin Papa chieshënte ushë icsamboshë iquendac. Adnuc badedquio cuenta. ¹⁸ Nuquin Papa chieshënte ushë icnuc ma ue dapa sequenquioapanuna, quequin Nuquin Papa chuidedchuidedta. Adoac ma badedquio cuempanu. ¹⁹ Comapenen Nuquin Papa chieshënquin abi tantiaquid icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac. ²⁰ Nuquin Papa ëmenuen chuideneta. Nuquin Papa chuiquin, Chën, Papa, mimbi cainquioicnoc matsteddi nibëdtsiandac. Èbi tantiaquid ambi cuënaido tantiec, Chën, quequin Nuquin Papan ëmendac. ²¹ Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, qesho tantienquo icta. ²² Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshënquidombidi nadatiambocquin nabanendac. Adosho isun ëbi tantiaquidëmbi utsin-utsinquin tantiauidtsendac adquid. Nuquin Papapenquo aid nec, quequin Nuquin Papambo tantiaa. ²³ Ad iquendac quequin chiombique. Ad icnuc chieshenquioquin Nuquin Papan chiaid tantiaquiota –capondash Esusën.

Nuquin Papan madombo choaid

(Mat 24.29-35, 42-44; Duc 21.25-36)

²⁴ Aden chiash abi onquec: —Adnubien Nuquin Papa chieshënte ushë nidan inchëshquio yanendac. Badiadën ushëbëdtabi inchëshën chënquequid nibëdquioicnoc unës uaindac.

²⁵ Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Satanasbëd icquido ¿mitsimbo nuqui cuempeba? quendac.

²⁶ “Adnubien Nuquin Papan madombo matsesaid ëbi choasho matsesën isendac. Abu ushun nadatiambo yec ushumbo yec bëdaidquio iquequi ëbi choasho isendac matsesën.

²⁷ Adnubien Nuquin Papan uaido mayan bëdabo, Èmbi nidtan, cac nidanendac. Nuquin Papan cuënaido bednuec nidaidtedi yacno nidaneshun bedbanash ëbi tsadacno choec, Bëombi, quetuidendac bedtanec choquido —quepondash Esus.

²⁸ Aden chiashic: —Abi chiembique. Tantia. Suc secquiduquiac nëbi cunquecuenec, quequin matsesën tantiec. ²⁹ Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuinanta. ³⁰ Abimbo chiembique. Tantiata. Èmbi chuibamboed naimbudabicnuc ëmbi chuibamboed tantiaquidën tsyuecquido naimëbudenquo iquendac. ³¹ Aden matsesën isnubien nidaidbëdi abu ënëdendac. Èmbi chiaidtedi abimbo yec adquiouidi iquendac.

Nëid ushënquo tauadoendac, quetiapimbo matses iquec quiaid

³² “Adnuc nëid ushënuquo Nuquin Papa chieshënuquin tauaindac quetiapimbo matses iquec. Ambi uaido mayan bédabo adecbidi quetiapimbo icoaic. Aton madombo yec adtiapimbo iquebi. Nuquin Papa abentsëcquiobien adquid tantiaquid nec. ³³ Aid tauadote ushë choaid tantiatiapimbocquin Nuquin Papan chiaid niacmane qeshun isbanquin nabanta. ³⁴ Nad iqueque. Tantia. Chuinu. Utsibo yacno nidnun abèd tabadquido naden chuiposh. Min utsibo chieshënuquocquin shubu isquid icta quequin chianec nidposh. ³⁵ Adec icho nidan abi choate ushë mimbi tantienquo iqueque. Bëshunenquocquin tantiaquiota. Inchëshbudtsëqui choapatsiash, quequin tantiata. Adembidi inchëshpotsëmbo chopatsiash qeshun adembidi tantiaquiota. Adembidi, cachina cuëdanubi chopatsiash, qeshun isucunshun tantiadenequiota ³⁶ ëmbi tantienguicnoc con icho chochitondac, qeshun. ³⁷ Adquiecbidi bédamboec tabadquin Nuquin Papan chiaid isted-istedta Nuquin Papa chieshënuquidën niacmenushe qeshun —quepondash Esus.

14

Esus cuesunete bunaid chiaid

(*Mat 26.1-5; Duc 22.1-2; Uan 11.45-53*)

¹ Adashic, bëyuc tishaid unësmenuequid aton shubu datamenuequin Isadaidbo tsusedpabon nidaidën capuquid yuaded cuesunepampic. Aid tantiad ushëbëdtabi pan bidisquesa tantiad ushë Pascuas caid daëdec ushash choendac. Aid chonoshe qeshun isadaidbo tsusiobon Esus nibëmbedëpndash. ² Aden nibënc: —Pascuas ushë tantiec Edusaden yacno matses dadpen cho-choec. Matses dadpen choabicnuc ismenquocquin Esus bedtiad. Bedsho isash, Padi. Bedenda, queuidash nëishun comapenen nuqui cuestashe —quepondash isadaidbo tsusiobo.

Esus unësec qeshun nacbimboen noadte machiunte chiaid

(*Mat 26.6-13; Uan 12.1-8*)

³ Adnubien Betania caid yacno tabadquin Esusën Simonën shubun puduedshun pondash. Simon daushachimboecquid, nami mishac tantiadenquocquid icsho Esusën bédamiad nepondash. Adec puduedshun pec tabadnubi comapenec noadquid bëec chido puduedpondash. Piuquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchictanquin Esus chidon machiuimpondash.

⁴ Aden machiunsho isash utsibo nëishun: —¿Atotsieshun machiuno? ⁵ Noadte menequin piucquid dadpen bedshun aton na nibëdquid dadpen menetsiandac —quec onquecuedepanëdash Esus machiuimboed chido chushcaic. ⁶ Aden chushcacho tantiashien Esus onquec nadpondash: —Chushcainda. ¿Mitsanada nediosh? Ambi noadte machiuimboed bédaidquio nec. ⁷ Badiadquidën-badiadquidënuic ënëdenquo yec aton na nibëdquid ënabi iquec. Aidi menenu qeshun mimbi menepec. Èbien nashuntiapimbo iquendac. ⁸ Èbi unësabincuc nëid chidon tantiakin chococanuequin nacbimboen noadte machiuimpacoc. ⁹ Abimbo chiembique. Tantia. Nuquin Papan shubu abentsëquën tabadaid chuiquimbi ëbi machiuimboedën naidtsen tantiaquidon chuiben-chuibenendac —quepondash Esus.

Esus bedmembì, Udas quiaid

(*Mat 26.14-16; Duc 22.3-6*)

¹⁰ Adnubien Udas Iscadiote, Esusbëd icquid abentsëc, Esus bedmenu, quianec isadaidbo tsusiobo yacno nidpondash. ¹¹ Adec nidequi isadaidbo tsusiobo yacno choshon Esus mibi bedmembì quequin chuituidac bédambo icpac caondash aido. Adembidi: —Esus ëbi bedmesho isun piucquid mibi menembì —quecuedepac caondash. Adsho tantiash nidanec, ¿Mitsipadentsimbi bedmepe? quec tabadquin caimpac caondash Udasën.

Nidaidën capuquidded cuesuniaid abèd icquidobëdtan piaid

(*Mat 26.17-29; Duc 22.7-23; Uan 13.21-30; 1Cod 11.23-26*)

¹² Adashien penun isadaidbo utsibon nidaidën capuquid cuesunenubien: —Cuesuniaid pambid penu qeshun, ¿mitsishunquiembi nacnempatsia? —quepondash Esusbëd icquido.

¹³ Adsho tantiash Esus abèd icquid daëd chiec nadpondash: —Edusaden yacno nidquimbi dadan acte bësho litsuidash tsibananec aibëdi nidta. ¹⁴ Aden aid tsibanec pudueddash, ¿Èbi tabadte quënë mitsimbo iquec? ëbëd icquidobëdtan penu, quiosh chuiquid, quequin shubu icho chuita. ¹⁵ Aden chiac buanshun decatomesun abuc quënë dapa mibi ismendac. Ambo pete sante cueste iquendac. Ashunquo penun nacnenta —quepondash Esus ambi daëd chuimiaid caic.

¹⁶ Aden chiac abèd icquid daëd Edusaden yacno nidquin Esusën chiacpadomboen bëquedshun tsibananash puduedshun penun nacnempondash.

¹⁷ Adnubien inchëshbudtsëqui aid daëdtsëqui yacno Esusbëd icquid utsibo chopondash.
¹⁸ Adec choash pec tabadnubien: –Abimbo chiembique. Tantia. Èbëdtan pequid abentsëcshun isadaidbo tsusiobo ëbi bedmendac –quepondash Esus.

¹⁹ Adsho tantia, Icsambo iquec, quequin tantiec: –¿Èbida chienquoio ique? – quepondash abëd icquidtedi.

²⁰ Adoaquien: –Mibëd icquid nebi, quec mibitedi. Padnuen abentsëcshun ëbëdtambi pete cuëshën ënë punshun pequidën ëbi chieshënquido bedmendac. ²¹ Nuquin Papan chuimiapadomboen aton madombo chidon tishac matsesaid ëbi unës uate anoentsëqui yanec. Èbi bedmequid icsamboshë iquendac. Abi cuidte icsamboshë icnushe queshun aidi tishenquiocpatecnëdan –quepondash Esus.

²² Adashic pebededquin pete bedshun Nuquin Papa chiec onquetanquin pete cuësh-cuëshun abëd icquido menenquin: –Nëid pete cuëshë ëmbi piaid con dadabëd daëdacpadquiec Esus unësash abi tantiaquid ëbi icnuc Esus ëbëdi iquec quequin tantiaata –capondash Esusën.

²³ Adembidi dëshote bedshun uba caid actequid icnuc Nuquin Papa padpiden chuishun abëd icquido menenbanac apondash.

²⁴ –Nëid acquin Esusded Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquoio iquec quequin nëid acquin tantiaata.

²⁵ Uba caid ënë nidaidëshun padpiden aquenquiocquimbi Nuquin Papan shubunshun actequid chuca mibëdtambi aquendambi –quepondash Esus abëd icquido caic.

²⁶ Aden chiash Nuquin Papan naid chiec cuëdënanec macuësh Odibos caid yacno nidoapondash.

Esus tantiesa nebi quequin Petedon chuite chiaid
(Mat 26.30-35; Duc 22.31-34; Uan 13.36-38)

²⁷ Adshumbic Esusën: –Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unës uaimbi. Adosho isash abëd icquido cuenec cuëshëd-cuëshëdendac.”

quequin Nuquin Papan chuipampid nec. ²⁸ Unës uac uincuenash Cadidia yacno ëbia nidoaindabi. Mibitsen ambo nidta –capondash Esusën abëd icquido chuiquin.

²⁹ Adoaquien: –Esus tantiaquid nebi quenquoio utsitedi icnuc ëbien padenquoio iquec – quepondash Petedo.

³⁰ Aden Petedon chuisho tantia: –Abimbo chiembique. Tantia. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimbi tedesteden chiendac –quepondash Esus Petedo caic.

³¹ Adsho tantia: –Esus tantiaquid mibi icsho mibi aidbëdta unës uaimbi, cac, Esus tantiesa nebi, quenquoio iquendabi –quepondash Petedo comapenec onquec. Adecbidi Esusbëd icquidtedi onquepondash.

Quetsemani caid yacno choash tabadaid chiaid
(Mat 26.36-46; Duc 22.39-46)

³² Adashic cuëte odibo caid dadpen icsho Quetsemani quequin cuënacno choash nidtuidash: –Nuquin Papa chuinuec udi nidebique. Nëmbobi tabad –quepac caondash Esus abëd icquido caic.

³³ Aden chianec Petedo, Acobo, Uan nëidted cho quianec bëyucanec nidec Esus, Matsestedi icsaid cuidtequid ëmbi bedshunsho isun Nuquin Papan ëbi istiapimbo iquec, quequin tantiec unësquioshë yampondash. ³⁴ Adquio iquec: –Èbibi unësquioshë yec udictsëc nidebi. Chieshtomane queshun nëmbobi tabadquin Nuquin Papa chuiban –quepac caondash Esus ambi nëid 3ted, Cho, caboed chiec. ³⁵ Aden chianec udictsëc nidash Nuquin Papa chuinuec nidaidën uebudash uec onquec: –¿Adabi adquid icmenquioctsia? Papa –quepac caondash Esus Nuquin Papa chiec. ³⁶ Aden chuishumbic: –Papa, mimbi natiapimbo ictequid nibëdec. Adquid icquin matses cuidtequid bedshunquid con mado icmenquoio iquembi queshun mimbi adoenquioctsiandac, Papa. Èbi bunacpaden nainquiocquin mibi bunacpadomboen nata, Papa –capac caondash Esusën Nuquin Papa chuiquin.

³⁷ Aden chiash choquin abëd choboed 3ted icquid usho istuidec Petedo caic: –Simon, ¿ushecta ne? ¿Èbibi chieshmane quiash yuecpectsëc iquec ushenquoio yec tabadtiapimboda icco? ³⁸ Chieshmane queshun Nuquin Papa chuita Nuquin Papan chiaid niacmenuequidën Satanas caidën chiaid tantiamanë queshun. Chieshenquoio iquebi quiash dacuëdash bad-edquoio mibi chieshendac –quepac caondash Esus.

³⁹ Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuiopac caondash. ⁴⁰ Adtanec choashumbic abêd chooboedo adecbidi ushacsho istuidoapac caondash. Ushcasquieq tabadec, Ushenquiocobi, quequin chuitiapimbo yec otacquo tabadpac caondash.

⁴¹ Adnubien padpidec nidoashun Nuquin Papa chuiotanec choec: —¿Uimabudashta tiboquec ushec ne? Padi. Ushenquio yec isucun. Nuquin Papan madombo chidon ushac matsesaid ëbi icsho nëbimbobi ëbi chieshënquidon bedmeque. ⁴² Nidtoash ëbëdi nid. Ënden choaye. Is —quetuidpac caondash Esus abi bednuec choquido isec.

Esus bedshun buante chiaid

(*Mat 26.47-56; Duc 22.47-53; Uan 18.2-11*)

⁴³ Aden chuinubien Esusbêd icboedquiobi Udasbêd matses dadpen cho-chopondash. Cho-choquid utsi-utsiec chështe sanampamboec chonobi utsi cueste sanampamboec chopondash. Aided Udasën chiac isadaidbo tsusiobon chomiaido nepondash.

⁴⁴ Esus bednuequid tantiamenuec ambiabi Udasën: —Ëmbi tanchoccaid mimbi bedtequid nendac. Aidquiobi bedshun buanta. Cuenushe queshun bédamboen ista —capac caondash. ⁴⁵ Aden chiashic aidobëdi choquimbi: —Icho —quequin Udasën Esus tanchoccatuidpondash.

⁴⁶ Aden Udasën tanchoccasho isun Esus bedpondash. ⁴⁷ Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

⁴⁸ Adnubien: —¿Cuesanquid Esus nec, queshun utsin cueste sananubi utsibon chështe sananec ëbi bedecta cho-choec ne? ⁴⁹ Badiadquidën-badiadquidënquieq Nuquin Papa tabadte shubu uashunaid umanic daquënë uaidën tabadquin matses tantiamenuec chuiban-iombi mibitedi tabadnubi. Ambo icshobi ¿atotsieshumbini mimbi bedenquicopo? Nuquin Papan chiacpadomboen nëbi mimbi ëbi bedec, —quepondash Esus abi bedquido caic. ⁵⁰ Adec onqesho tantishun cuenquin abêd icquidtedishun Esus niampondash.

⁵¹ Adec cuenubini nëbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibanpondambi. Aden tsibanshobi Esus chieshënquidon bedpondashi. ⁵² Aden bedac dasiuidte bédaidquio nianec dadauidquio cuempondabi.

Isadaidbo tsusiobo iccuedacno Esus buante chiaid

(*Mat 26.57-68; Duc 22.54-55, 63-71; Uan 18.12-14, 19-24*)

⁵³ Adnubien, isadaidbo tsusio dapa, matses tantiec Nuquin Papa chiec onquequido yacno Esus buampondash. Aden buanec puduednu quiacnombobi isadaidbo tsusiobo ut-sibo iccuededec tabadpondash. ⁵⁴ Aden Esus buanubi tsyuec choquin Petedo cuemboedën tsibananec isadaidbo tsusio dapan shubu umanic daquënë uaidën puduedpondash. Adec puduedash Esus cuenushe quequin isquido tabadacno ambotsen cuête cuêc tsadpondash Petedo. ⁵⁵ Adec Petedo tsadnubien Esus unës uate bunquin Esus icsambocquid nec quequin chuiquid ¿Ada ipec? quequin nibënquin adquid tsusiobon istuidabicpondash. ⁵⁶ Abimbo chiacbimboen dadpeshun chuibededpondash. Aden chuiquin abentsëcshun chiacpadomboen chienquicquin utsin chuiopondash.

⁵⁷ Adnubien, Chuinu. Tanta, queshun Esusën chiacbimboen utsi uain chuipondash utsibon. ⁵⁸ Aden chuinubien utsi onquec: —Naden Esusën chuisho tantiombique. Tanta. Chuinu. “Nëid, Nuquin Papa tabadte shubu uashunaid chicanendambi. Aden chichanshumbic daëdec ushquin matsesën naidpenquio isadnuc ëmbibi naindambi,” quequin Esusën chuipondash —quepondash utsi. ⁵⁹ Aden abentsëcshun chuinubi utsin aden chienquicquin chuipondash.

⁶⁰ Aden chuisho tantiash isadaidbo tsusio dapa nënantanquio nidtoash nidquin: —¿Mimbi chiacpadomboen chieca nec? ¿Abimbo chuiquida nëidtedi neque? Chui. Tantanu —capondash isadaidbo tsusio dapan Esus chuiquin.

⁶¹ Adsho tantiash ëcbenquio yec otacquo nidsho isash: —¿Nuquin Papan chomiaidquio, Quidistu caid, Bédambocquidën mado nebi, quecta mibi ique? —queopondash isadaidbo tsusio dapa Esus caic.

⁶² Adoquien Esus: —Ai, aidi nebi. Nuquin Papan madombo matsesaid abuc nidoashic Nadatiambocquidën dayun abiucquo tsadash abu ushun ëbi chosho matsesën isendac —quepondash Esus.

⁶³ Adsho tantiash, Icsamboen chiec, quec abi daëd dasiuidaid bëntsecquid dached-dachedquiash: —¿Atotsieshun Esusën icsamboen naosh, quequin chuimenuec utsi nibëmpe nuqui? ⁶⁴ Nuquin Papa icsamboen Esusën chuisho mimbi tantioc. ¿Midapaden mimbi chieque? Tantanu. Chui —capondash isadaidbo tsusio dapan tsusio utsibo chuiquin.

Adoquien: —Icsamboen iqueque. Unës uametiad —quecuededpondash.

⁶⁵ Adsho tantiaishun Esus dacuishtuaquin utsibon tauapondash. Adotanquin dashcuten bèpucshun ambi custanequi: —¿Tsuntsin mibi cuespoh? Comapenen tantiaquidquio mibi neque. Èbi chui. Tiantianu —capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

Esus èmbi tantiacmaidquio nec quiaid

(*Mat 26.69-75; Duc 22.56-62; Uan 18.15-18, 25-29*)

⁶⁶ Adnubien Petedo umanuc daquënë uaidèn tsadnubi isadaidbo tsusio dapan yua chido chopondash. ⁶⁷ Choshon Petedo cuète cuèc tsadsho isun: —Nasaded caid yacnocquid Esusbèd icquid mibi nec —capondash.

⁶⁸ Adoaquien, Esusbèd icquid nebi, quetiapimbo yec Petedo: —¿Atotsi mibi quepe? Tiantienquio yec tsadebi —quepondash.

Adtanec puuedet shècùe aonetsèqui niduntidash tsadnuc cachina bènè cuèdpondash.

⁶⁹ Adec Petedo ambo tsadsho chido yuaidèn istuidtanquin padpiden: —Esusbèd icquidquio nèid nec —quequin anocquido chuiopondash.

⁷⁰ Adoaquien: —¿Aidbèd icquidtabi nedi? —quepondash Petedo.

Adnubien yuecpactsèc yash: —Aidbèdi Cadidia yacnocquid mibi nec —quepondash ambobidi tabadquido.

⁷¹ Adoaquien: —Èmbi tantiacmaidquio nec quequin abimbo chiemi. Èmbi abimbo chienquio icsho ma èbi chian anèdènquiacno Nuquin Papan nènepanuna —quepondash Petedo comapenen chiec.

⁷² Adnubien cachina padpidec cuèdpondash. Adsho tantiaishun, “Cachina daèdec cuèdabincuc èmbi tantiacmaidquio Esus nec, quequin mimbi chiendac tedestedec onquequin,” quequin Esusèn chioshi quequin tantiec unèsquio yanec shubianquiopondash Petedo.

15

Pidato yacno nidshun Esus meniaid

(*Mat 27.1-2, 15-31; Duc 23.1-5, 13-25; Uan 18.28-19.16*)

¹ Badiadnuc isadaidbo tsusiobo iccuededpondash. Nèidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqueshun Esus mètaneshun buanshun isadaidpembo ancaquid Pidato caid menepondash. ² Aden meniac Pidato: —¿Isadaidbo ancaquidta mibi neque? Èbi chui. Tiantianu —capondash Pidaton Esus chuiquin.

Adoaquien: —Mimbibi aden chuiPAYOC —quepondash Esus.

³ Adnubien, Esus icsaded-icsadedosh, quequin chiec isadaidbo tsusiobo onquecuedednuc cuèdenquio yec Esus tsadpondash. ⁴ Adec tsadsho isun: —¿Ècbedanenquio yec otacquioda tsade? Mibi icsaid dadpen nèidon chuibanec —Pidaton caqui ⁵ adquiebèdi Esus tsadpondash. Adec tsadsho isash ¿Mitsipadquidquio Esus nepec? Utsimbien, Icsapenquiocquid nebi, quequin chuipec, Aden chienquio Esusèn iquec, quequin ambibi tantiec Pidato tsadpondash.

⁶ Adashic, isadaidbon nidaidèn capuquidded cuesunepampid tantiaid Pascuas caid ushè choaidèn-choaidènquien, Quènèn nauedmiaid abentsèc nidmenu. ¿Mitsiquidimbi nidmepeque? Chui. Tiantianu, quequin isadaidbo Pidaton chuided-chuidedpadenec. Adoaquien ismequin, Nèid nidme, cac nidmedenepadenec. ⁷ Aden chuidenequin ambi quènèn nauedmiaid Badabas cuèmedquid nepondash. Aidèmbi utsibobèdan Domanobo bunenquiocquin cuesquin tauasho isun bedmeshun quènèn nauedmepac caondash.

⁸ Adnubien Pidaton seta utsin quènèn nauedmiaid abentsèc ambi nidmiondacadpen nèbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec chosh: —Quènèn nauedmiaid abentsècta mimbi nidmepatsia —quecuededpondash aido Pidato caic.

⁹ Adec onquesho tantiaish Esus nidmetiadquiocquin Pidaton: —Mibi ancaquid caid, Esus, nidmependambi iqueque. Isadaidbon, èbi chui. Tiantianu —capondash. ¹⁰ Esusbidi tsusio icpec matses quenushè quiaish isadaidbo tsusiobo Esus unès uate bumpec quequin tantiaquin Pidaton aden chuipondash. ¹¹ Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiapadomboen. ¹² Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tiantianu —capondash Pidaton.

¹³ Adoaquien: —Cueste nitsinshun dectan —quec comapenec cuèdcuededpondash isadaidbo.

¹⁴ Adoaquien: —¿Atotsi icsa uaosh? —quepondash Pidato.

Adoaquien: —Cueste nitsinshun dectan —queoaic comapenec cuèdcuededpondash.

¹⁵ Adsho tantiash Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushe qeshun Badabas nidmepondash. Adshumbic: —Cueshcaten Esus comapenen cuesmebededshun cuesten dectanun buanec nid —capondash Pidaton sondado chuiquid chuiquin.

Sondadon Esus mamënshumbededaid chiaid

¹⁶ Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnu chomepondash. ¹⁷ Choshon dashcute abichobicquid bédaidquio bedshun ancanquid dasiuidacimboecnuc dasiuiunshun pinchuc-pinchucquid mauete uashun Esus matoncashun ¹⁸ ancanquid cuënëacpaden cuënëc: —Mibi isash bédambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado. ¹⁹ Adoquimbi ancanquidën sanante cuate bédaidquibimboecnuc sananquin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash uepondash. ²⁰ Aden mamënshumbededquin mëyanshun dashcute bédambocquid ambi dasiuiamboed dachicshun aton dashcutebi dasiuiunshun cuesten dectanuequin Esus buampondash.

Esus cuesten dectante chiaid

(Mat 27.32-44; Duc 23.26-43; Uan 19.17-27)

²¹ Aden abi dectante cuate Esusën buantiapimboconoc nidquimbi abi datanquid cuate chiadtoetanquin buamepondash sondadon. Abi datanquid Sidene caid yacnocquid nëbi Edusaden caid dëuequiacnoësh choquid nepondash. Adecandedo, Dupo chedon papa Simon cuëmëdquid niondash. ²² Aden cuate Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota quequin isadaidbon aton onqueten cuëmpondash. ²³ Ambo choshon uba sicaid paëacsho paëmbocquid dauë cacushtanquin meniäc aquenquiocondash Esusën. ²⁴ Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tëshun sandoshon cadotanequin dada uatsaidëmpi puduemiaid isbanquin Esusën dashcute bedbampondash.

²⁵ Ushë dectatoec 9 yanuc Esus cuesten dectampondash. ²⁶ Esus dectanaid mapino dada uaid cuate podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiacpaden dada uaid nepondash. ²⁷ Cuesunetanquin ampequid daëd ëquë dectambudcuenshun nënantanquio Esus dectampondash. ²⁸ “Dectanquin icsaquidbëdta dectanendac,” quequin Nuquin Papan chuimiampicpadembi napondash. ²⁹ Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamënshumbededpondash. Adec cuenquin mamënshunquin: —Nuquin Papa tabadte shubu uashunaid chibanshun daëdec ushquin chuca uambi, quequin chiec mibi onquiondaque. ³⁰ Abimbo chuiquid yec unëstiapimboconoc nebi quianec mibibi budta —cabidnepondash.

³¹ Aden cuenquidën chuinubi adembidi isadaidbo tsusio dapabotedi tsusedpabon nadomboen nata quequin chiaid tantiamequid chedo onquecuededec: —Utsi-utsien bédamequimbi utsi unësascho uincuemboed yec mëtoccad abembi chiquidtiapimboconoc nec —quepondash isadaidbo tsusiobo Esus caic. ³² —Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiendambi —quepondash. Aden cuenquidën mamënshunubi abëdta dectanaidën adembidi chuiopondash.

Esus unës uate chiaid

(Mat 27.45-56; Duc 23.44-49; Uan 19.28-30)

³³ Adnubien ushë cuemboconoc 12 yanan inchëshquio icboedi ushë budec 3 yanuc uëshëmbo yanoapondash. ³⁴ Ushë 3 yanuc: —Eloi, Eloi, ¿lama sabactani? —quequin aton papa chiec Esus comapenec cuëdpondash. Aton onqueten: Papa Edoen, ¿atotsieshumbini bidiaquid isenquio ique? quec adpondash Esus.

³⁵ Aden Nuquin Papa Esusën chuisho tantiaquido, Nuquin Papa cuënëc, quenquio yec: —Edias cuëneque. Tantia —quepondash.

³⁶ Aden tantianubi badedi titinqeshun sicaid mucambocquid nëcushtanquin puntanquin cuate dëdectanshun acmenuequin ëccuëscadonequi: —Chiata. Edias Esus bedec chonoshe caimbono —quepondash.

³⁷ Adnubien comapenec cuëdec Esus unësbudpondash.

³⁸ Esus unësbudnubi abi inchëshacimbocnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daëdquio yec. ³⁹ Adec Esus cuëdbud-cuëdbudec

unëso isash: —Abimbo chuiquid niosh. Nuquin Papan madombo nëid nec —quepondash sondado chuiquid uquë tsadbudec.

⁴⁰ Adnubien ancuenquio isec chidobo nëidtedi tabadpondash: Madia Mactada caid yacnocquid; Madia utsi, Acobo bushcuctsëcquidën tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash. ⁴¹ Aidon Esus Cadidia caid yacno capusho isun abi nashumboedo nepondash. Aidobëdta pidato isquido chido utsibo Edusaden yacno choshon Esus buansho isun tsibanquido icpondash.

Esus chococate chiaid

(*Mat 27.57-61; Duc 23.50-56; Uan 19.38-42*)

⁴² Adashic biednes ushë budtsambi: —Inchëshbudtsëqui seis icnuc chonoadtemaid ushë chonoshe Esus unësoshe chococatanu —quianec Esus tantiaquid utsi nidpondash. ⁴³ Aidi, Ose Adimateya caid yacnoshon tishaid Pidato yacno nidpondash. ⁴⁴ Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Ëndenda unësacosh? quequin tantiesha icquin sondado chuiquid Pidaton chomeshun: —¿Ada Esus unësosh? —capondash.

⁴⁵ Adoac: —Ai —quesho tantiasun: —Ai, bedshun buanta —capondash Pidaton Ose chuiquin.

⁴⁶ Adoac nidshun unësaid dabiadate bedshun Esusën dada imbudshun dataneshun macuësh dapa cuënote shëcuë uaquin ambi nacnenaidën nauedshun cuënote dapan bëtashpondash. ⁴⁷ Aden Osen Esus chococasho Madia Mactada caid yacnocquidbëdtambi Madia, Ose utsin titan ispondash.

16

Esus uincuente chiaid

(*Mat 28.1-10; Duc 24.1-12; Uan 20.1-10*)

¹ Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aidtedi nidshun aton na bedtequid menequin comapenec noadte dadpen bedpondash Esus danoshcanuequin. ² Bedtsash badiadtsëcnubi dominco ushë caidën Esus chococano nidanequi: ³ —¿Tsuntsin cuënote shëcnepeba? —quec onqueuededpac caondash.

⁴ Adec onquequin ancuenquio isquien cuënote ënden shëcniac. Cuënote dapa yuëmbocquid nepondash. ⁵ Aden isequi nidash chococaid shëcuë puduedquin isaquien dada nëbi caniaid dashcute ushumbocquid dasiuidash abiucquio tsadpondash. Aidi isash dacuëdcededec tabadpac caondash chidobo.

⁶ Adec dacuëdec tabadsho isun: —Dacuëdenquio yec tabad. Esus cuesten dectanaid mimi nibënaid tantiemi. Uincuenash nidac. Nëmbobi nanac ueuidoshe. Is. ⁷ Nadoshi: “Cadidia caid yacno ëbia nidebi. Ambo nidshun ëmbi chiapadomboen mimi ëbi isendac, quiosh quequin nëmo choacsho isun chuita,” Esusën caoshi. Nëbi ëmbi chiapaden Petedo Esusbëd icquidquio utsibobëdta chuituidec nid —quepondash nëbi caniquid chidobo chiech.

⁸ Aden chuisho tantias ushëdëquequi chococaid shëcuënuësh puduenanec titinquec dacuëdec onquenquio yec nidanepac caondash chidobo.

Esus abuc indote chiaid

(*Mat 28.16-20; Duc 24.13-53; Uan 20.11-23*)

⁹ Adnubien abi nibëmboed uincuenashun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash. ¹⁰ Aden ismiac Esusbëd icboedo yacno nidash puduedshun aido shubisho Esusën abi ismiad Madian chuituidpondash. ¹¹ Esus uincuenash capusho isombi, Madia quesho tantias, Aidquio mimi isambo iquec, quec tantienquio yec tabadcededpondash.

¹² Adashic tantienquio yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën. ¹³ Aden ismiac aid daëdi aucbidi Edusaden yacno nidshun ambi isboed chuiopondash. Adembidi tantienquio icoapondash utsibon.

¹⁴ Adashic, abëd icquidquio 11ted pete sante cuesten tabadnubi Esus chopondash. Adec choshon: —Uincuenac quequin ëbi isquidon chiaid tantienquio mimi icpoc. Chobique. Is —capondash Esusën.

¹⁵ Adashic: —Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbisen chuiban. ¹⁶ Aden chuisho tantiaquid, Ëbi cuidenquiocquien Esused Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac.

Tantiesain Nuquin Papan cuidendac abi yacno puduedtiapimboconoc. ¹⁷ Abi tantiaquid utsi-utsien Nuquin Papan nadatiambocquin nabanquid icmendac. Adquid icmiaidēn ěmbi nacpaden mayan icsa dapuduemendac. Adembidi, utsi onquiaid tantienquiochoedēmbi tantiaquin ěbi chuibanendac. ¹⁸ Adecbidi, nisinguio piaqui bidisquenquio iquendac. Adecbidi, unēsmenuequin acmiaqui unēsenquio iquendac. Adembidi, utsi unēstsensho mishac bēdanendac. Nuquin Papan nadatiambocquin namiaidēnquio adobanendac — quepondash Esus.

¹⁹ Aden chuiquin ěnacsho Esus abuc buanaqui Nuquin Papan dayun abiucquio Esus tsadtuidpondash. ²⁰ Ambo tsadquimbi nadatiambocquin namiac nidaidēn tabadquimbi abēd icquido nidaid utsi-utsiec yacno capuquin Nuquin Papan shubu abentsēquēn tabadaid chuibenepondash nadatiambocquin nabanquimbi.

Ěmbi abimbo chuiboedquio mimbi isec aidquio tantianeta. Padi. Aidedi dada uaombi.

DUCASËN DADA UAID

Mibi ismenuequin dada uaquid Ducas nebi.

¹ Utsin-utsinquien ambi naidbëdtabi Esuquidistu chuibanquin dada uaid dadpen iquec.
² Aidon Esuquidistun tauain naidbëdtabi ambi naid utsitedi isted-istedquin chuibanquin chiapaden dada uaidtedi nec. ³ Esuquidistu chuibanquin dada uaid isbanquimbi Esuquidistu isnëdaidon chuibanaid tantiaashun aidtedi mibi chuibanquin dada uaimbi, chuiquid dapa, Teyopido. ⁴ Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

Uan, acten mentoanquid tishte chiaid

⁵ Nidaid Udeya caid yacno Edodes cuëmëdquid ancanquid icnubien Nuquin Papan nami-aidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquid-bidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. ⁶ Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. ⁷ Edisabed bacuë tishesa icpanëdash. Adquid yequi aton bënëbëdi tsusio budpanëdash.

⁸ Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash. ⁹ Ambi noadte bëda tauite ushë chonoc Sacadias aid shubun puduedpanëdash. Ènden abipadquid utsibobëdtan abi cuëmëdquid-cuëmëdquidquien dada uashun dada uatempi tēchun sandoshon cadotaniac ambi dada uatsaidëmpi abia pudue-nacsho isacpade Sacadias puduedpanëdash. ¹⁰ Noadte bëda tauinec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecued-panëdash.

¹¹ Adnubien utsi puduedtemaid quënë yacno Sacadias icnubi ambobi Nuquin Ibon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. ¹² Adec tabadsho isash dacuëdampambo iquec, quetanec Sacadias uëdëquiampanëdash. ¹³ Adsho isash Nuquin Papan uaid mayan bëda nadpanëdash: — Bacuë bunquin mimbi chian-chiamboed Nuquin Papan tantiaidquio neque. Dacuëdenquio Sacadias. Min chido Edisabedën min mado tishendac. Min mado tishacsho Uan cuënta. ¹⁴ Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiaash matses dadpen bëdambo iquendac. ¹⁵ Aidi Nuquin Papan bëdamboen isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. ¹⁶ Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icho Nuquin Papa nec, queoaind. ¹⁷ Min mado Nuquin Icho bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icho bëyucanec choendac. Tsusedpabon tishmiadën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquio iquendac. Nuquin Ibon matses aido icmenuen min madon chuibanendac —quepanëdash Nuquin Papan uaid mayan bëda.

¹⁸ Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tantiape? Con chidobëdi tsusio budpobi —capanëdash.

¹⁹ Adoquien: —Èbibi, Cabaded nebi. Nuquin Papan abëd tabadquin namiaidquio nebi. Nuquin Papan ambi chiapadomboen mibi chuimenuen chomiaid nebique. ²⁰ Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquio icsho mibi eme uaind. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

²¹ Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec tabadpanëdash utsibo. ²² Aden yuen caimbudnubien puduenash onquenuequi buëd cuëdenquiocpanëdash Sacadias. Adsho isun: — Ushquin isachimboen isbenac —cabededpanëdash. Adnubien Sacadiasën iccuedquido nidmenuen mëdante uic-uicapanëdash.

²³ Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. ²⁴ Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec

aton shubu nuntan icpanëdash. ²⁵ Adec tabadec Nuquin Papan naid chiec nadec Edisabed onquepanëdash: —Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon ëbi isec. Ëbi tantiaquin Nuquin Papan usundomiaid nebi —quepanëdash Edisabed.

Esus tishendac, quequin chiaid

²⁶ Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. ²⁷ Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. ²⁸ Adec choshon: —Mibi tantiaquin Nuquin Papan bédamboen icmiaidquio mibi nec. Nuquin Icho mibëdi tabadendac —capanëdash Cabadedën.

²⁹ Adoquien Madia, ¿Atotsi quepeba? quequin otacquo tantiec tsadpanëdash. ³⁰ Adec tsadsho isun Cabadedën: —Dacuëdenda. Mibi bédamboen tantiaquin Nuquin Papan naden nanu quequin chiaid nad iqueque. ³¹ Chuinu. Tantiata. Bacuë usundoshon min mado mimbi tishendac. Tishun, Ëmbi tishaid Nuquin Papa yacno yuedanquidquio nec, quequin Esus cuënta. ³² Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuedependac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac. ³³ Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

³⁴ Adoquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

³⁵ Adoquien: —Nuquin Papan Mayan mibëdi tabadnuc mimbi tishendac. Aden Nadatiambocquien naidënuquo Madia usundomiaid, icsa nibëdquid, Nuquin Papan madombobi nec, utsibon cabededendac. ³⁶ Min utsi Edisabed macho icquin bacuë usundoenquiochoedëmbi nëbi bacuë usundoac. Usundoenquiocquid nec, cabededboedëmbi nëbi ushë 6ted nidan usundoac. ³⁷ Utsin natiapimbo yaid Nuquin Papan naidquio nec —quepanëdash Cabaded.

³⁸ Adoquien Madia: —Ai, con Ibon namiaidquio nebi. Ma mimbi chiacpadquio icpanuna —quepanëdash. Aden chiaquien Cabaded nidpanëdash.

Madia Edisabed isedec nidaid

³⁹ Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash. ⁴⁰ Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash. ⁴¹ Adsho Edisabedën tantianubi aton bacuë comapenec cuididiquianpanëdash. Adec aton bacuë cuididiquenubi Nuquin Papan Mayanën tantiamiac Edisabed ⁴² Madia chiec nadec comapenec onquepanëdash: —Nuquin Papan bédamboshë icmiaidquio mibi nec. Mimbi usundoaid adembidi bédamboshë icmiaidquio nec. ⁴³ Nuquin Ibon tita mibi yec ¿atotsi quiash ëbi isnuec cho? ⁴⁴ Mibi isec chobi, mibi quesho ëmbi tantianubi, Cuishon, quiacbimboec con bacuë cuididiquianosh. ⁴⁵ Nuquin Ibon tantiacpadomboen chuisho tantiaquid mibi iquec mibi bédambo icted-ictedendac —quepanëdash Edisabed Madia chiec.

Nuquin Papan naid chiec Madia cuëdënaid

⁴⁶ Adnubien Madia nadec onquec cuëdëmpañëdash: “Nuquin Papan naid chuibanu. Tantiata.

⁴⁷ Ëbi usundomiaid Nuquin Papa yacno Yuedanquid nec, quequin tantiec bédambo iquebi.

⁴⁸⁻⁴⁹ Ëbi ambi namiaid icsho bédamboen isquin Nuquin Papan naosh.

Adoacsho, Nuquin Papan bédamboshë icmiaid Madia nec, quequin abitedishunquio tantiatedendac.

Adembidi aton tsyuecquidon tantiatededoaic.

Nuquin Papa icsaisa iquec. Icsatiapimbo iquec.

⁵⁰ Ambi chiaid tantiaquin naquid icsho,

Mimbi naid icsa cuidnu, quenquiocquin abëdi shubu abentsëquën tabadacimboecnu adquid tabadmendac.

Adenuidi tantiaquin nampidquio abi iquec.

⁵¹ Nadatiambocquien naded-nadedquidquio Nuquin Papa nec.

Ëmbi tantiacpadomboen naimbi, quequid icsho isun Nuquin Papan cacumiac uano tabadendac.

⁵² Ancanquid dapa icboedi utsin namiaidquio adquid iquendac.

Utsin namiaid icboedi chuiquid Nuquin Papan icmendac.

⁵³ Ambi chiaid tantiec bédamboec tabadte comapenec bunquiacpaden naquidquo Nuquin Papan icmendac.

Con na ëmbi bedaiduidi tantiec bédamboec tabadebi quequid unësacsho cacumiac uano tabadendac.

⁵⁴ Chuiquid Dapa Abentsëcquiobi chidon usundoendac, quequin ambi tsusedpabo chuimi-ampicpadomboen Nuquin Papan ëbi usundomiac.

⁵⁵ Tsusedpa Abadauambëdta aton tsyuecquidtedi ambi tantiampicpadomboen Nuquin Papan ëbi usundomiac.

Mimbi usundoaid ëbi yacno yuedanquid nec, quequin Nuquin Papan ambi tantiampicpadembi ëbi isec,”

quec comapenec cuëdënash Madia ënëdpanëdash. ⁵⁶ Adec ënëdash Edisabedbëd ushë daëd nidmec tabadashic ushë utsi nidbudtsëcnubi aton shubuno nidoapanëdash.

Uan tishaid

⁵⁷ Adnubien Edisabedën bacuë tishte ushë chonoc dada bacuë tishpanëdash. ⁵⁸ Bacuë tishenquiochoedëmbi nëbi aton bacuë tishosh, qesho tantiashton matses ado shubu utsinquidotedi Edisabedbëd bédambo icpanëdash.

⁵⁹ Adashic, 8tedec ushtanquin Edisabedën madon shui dëbid dëteshunu qesho tantiashton utsibo cho-chopanëdash. Choash puduedash bacuëmpi aton papa cuëmëdquid cuënu quenubi ⁶⁰ Edisabed: —Padenquo. Abi cuëmëdquid Uan nec —quepanëdash.

⁶¹ Adoaquien utsibo: —Min matses utsi Uan cuëmëdquid nibëdec —queshun ⁶² Sacadias ismenuequin mëdante uic-uiccaquin: —Abi cuëmëdquid chui. Tantaranu —capanëdash utsibon.

⁶³ Adoaquien dada uate bedshun, Abi cuëmëdquid Uan nec, quequin dada uaqin Sacadiasën ismepanëdash.

Adoaquien: —¿Abimboda mimbi cape? —quecuededpanëdash utsibo.

⁶⁴ Adnubien Nuquin Papan oncameoac Nuquin Papan naid Sacadiasën chuibampanëdash. ⁶⁵ Aden chuibansho tantiashton: —Dacuëdampambo iquec. ¿Atotsiepashun onquenquiochoedëmbi nëbi onquequin Nuquin Papan naid chuibampec? —quecuededpanëdash utsibo.

Aden tantianec aton shubuno nidaneshun ambi isboedbëdtabi ambi tantiaboedsutsibon chuipañdash. ⁶⁶ Adoac: —¿Mitsipadquidquo aton mado nepec? —quecuededpanëdash Sacadiasën mado Nuquin Papan tantiamiaidquo isbededec.

Sacadias oncamiaid

⁶⁷ Adnubien Uanën papa Sacadias Nuquin Papan Mayanën oncamiac nadec Esus chieconquepanëdash:

⁶⁸ “Nuquin Papa isadaidbon Icho nec, quequin chuibanuna.

Aidën isadaidbo icsaquid icsho cuidnushe quiash abided cuidadquid chomiac mayan icsan yuaid icboedi aidën mënchictequidquo isadaidbo iquendac.

⁶⁹ Abi mënchicquid nadatiamboquid nendac.

Tsusedpa Dabidën tsyuecquidquo aid nendac.

⁷⁰ Ambi chuimiaidon chiampicpadembi

Nuquin Papan adquidquo icmianac.

⁷¹⁻⁷³ Nuquin tsusedpa Abadauan tantiaquin

Nuquin Papan ambi chiampicpadembi nuquin tsusedpabo

aton tsyuecquidbëdtabi abi chieshënquido

nidiapimbo yacnombo abi yacno yuedanquid

Nuquin Icho Abentsëcquiobi nec.

⁷⁴ Abi cudasquin mënchicaid yec dacuëdenquo yec

Nuquin Papan namiaidombo iquendac.

⁷⁵ Adquid yec icsaisa abipadquid bédamboec tabadquid icsho

nuquid aidën isendac ënenquiocquin.”

Adec Esus chieconquiashic nadec aton mado chiec Sacadias onqueoapanëdash:

⁷⁶ “Adnubien nëbi Nuquin Papan chomiaid chuibanquidquo

mibi nec, quequin utsibon mibi cuënenac, mado.

Nuquin Icho choec, quequin utsibon tantiabincnuc bëyuc tantiashton abi chuiquidquo mibi iquendac.

⁷⁷ Adquid icquin mibi icsaquid icsho cuidnushe quiash

abided cuidadquid tantiashton isash Nuquin Papa mibi icsaid tantienquo yec bëpiscudendac, quequin chuibanquid mibi iquendac, mado.

⁷⁸ Nuquin Papan matses tantiaquin naquidquo icquin abipadquidquo icsaisa abi yacnoshon chomiaidquo iquendac.

⁷⁹ Aidën tantiamiac unēsash abi iquendac.

Adquid shubu abentsēquēn tabadacpadecec tabadendac, quequin mimbi chiendac, mado,”

quec Uanēn papa Sacadias Nuquin Papan Mayanēn oncamiac onquepanēdash.

Matses nibēdacno Uan tabadcueniaid

⁸⁰ Adashic, Sacadiasēn bacuē Uan caniacsho Nuquin Papan tantiamiaid yequi matses nibēdacno tabadcueneapanēdash ambi Esus chuibante ushē choabicnuc.

2

Esus tishaid

(Mat 1.18-25)

¹ Adnubien, Doma yacno tabadquid, isadaidbo ancaquid dapambo, empedadod caid, Aucusto cuēmēdquid icpanēdash. Aucuston, ζĒmbi ancaid isadaidbo aton nabēdta tedtsi iqueque? Isquin tantiata, quequin Sidenio cuēmēdquid chuipanēdash. ² Sidenio nidaid Sidia caid yacnoquido chuiquid, cobednadod caid icpanēdash.

³ Min tsusedpa tishampid yacnoshon mibi cuēmēdquid mitsanabēdtabi dada uanuec niddan, cac abēd icquido buanec isadaidbo nidaneapanēdash.

⁴ Adec utsibo nidnubien Ose aton chido Madiabēdi nidaid Cadidia caid shubu dadpen icquid Nasaded caid yacnoēsh puduanec nidequi aton tsusedpa Dabid caid tishampidnom-bobi nidaid Udeya caid yacno shubu dadpen icquid Beden caid yacno chopanēdash. ⁵ Aton chido Madia bacuē nua usunquidbēdi Ose abī cuēmēdquid aton nabēdtabi dada uanuec Beden yacno chopanēdash. ⁶ Ambo choquin aton bacuē nuambo usumpanēdash. ⁷ Ambo matses dadpen cho-choash shubu abitedi puduedash tsucus-tsucustsēcquo tabadnuc nidaidēn capuquid tabadacno puduedshun ambi bēyuc usundoaid Madian tishpanēdash. Tishun dashcute cuēsh-cuēshun dapucshun nidaidēn capuquidēn pete sanaid cuesten ambi bēyuc tishaid dada bacuē Madian nampanēdash.

Obeca pemebanquin buanquido Nuquin Papan uaidon chiaid

⁸ Aden Beden yacnoshon Esus tishnubien shubu nibēdacno obeca dadpen pemebanquin buanquido inchēshbudtsēqui choec tabadtuidpanēdash. ⁹ Inchēshbudtsēqui choash tabadnubien inchēshnuc Nuquin Papan chomiac ambi uaid mayan bēda abuc chopanēdash. Aid uēshēmbo chēnquenic obeca pemebanquin buanquido dacuēdcuededpanēdash. ¹⁰ Dacuēdsho isash: —Chiaid bēda chuinec chobique. Dacuēdenquocquin tantiata. Chuinu. Ēmbi chuitequid bēda mibi, Cuishon, quetequid nendac. ¹¹ Nēbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. ¹² Abi tishacno nidshun naden mimbi aidi ispec. Dashcute cuēsh-cuēshun dapucaid nidaidēn capuquidēn pete santen uesho mimbi istuidendac. Bacuēmpi adqueic uesho istuidash, Nuquin Papan chomiaid Quidistu nec, mibi quependac. ¹³ Aden chiec Nuquin Papan uaid mayan bēda onquenubien abēdi abipadquid utsi dadpen choash Nuquin Papan naid chiec nadec cuēdēncuededpanēdash:

¹⁴ “Nuquin Papa abucquo tabadquid abitedi uaquidquo bēdamboshē iquec.

Nuquin Papan bēdamboen isaido ma abēdi tabadpanuna,”

quec cuēdēmpañdash. ¹⁵ Adec cuēdēnash Nuquin Papan uaido mayan bēdabo abuc nidoapanēdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuqui tantiambeoed bacuēmpi isnuec Beden yacno nidnu. Nid —quiانع nidpanēdash. ¹⁶ Adec nidshun nidaidēn capuquidēn pete santen bacuē nanacsho istuidpanēdash. ¹⁷ Isanec nidquimbi ambi isboedbēda ambi tantiaboed chiac ¹⁸ tantiaquidtedi: —ζMidapadquidien capec? —quecuededpanēdash. ¹⁹ Aden obeca pemebanquin buanquidon chiaid tantiasch bēpiscudenquo yec Esusēn tita, Madia, ζMitsipadquid con bacuē nepec? quequin bēpiscudenquocquin tantiadenepañdash.

²⁰ Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: —Ēmbi isboed ėmbi tantiaboed Nuquin Papan naidquio nec —quequin chiec onquecuededpanēdash.

Nuquin Papa tabadte shubu uashunaid yacno Esus buanaid

²¹ Adnubien 7tedec ushtanquin aton madon shui dēbid dētemiacsho isun, Nuquin Papan uaid mayan bēdan chiacpadomboen cuēnaid Esus nec, quequin Madian aton mado cuēmpañdash.

²² Adshumbic, bacuē tishun aid bacuēn shui dēbid dētemeshun ushē abentsēc nidan utsi chotsēcnic Moises Nuquin Papan dada uamiacpaden nanuen Madiabēdta Osen

Esus Edusaden yacno buampanëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepanëdash. ²³ Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. ²⁴ Mimbi bëyuc tishaid bedte bunquin ëbi tabadte shubu uashunaid yacno mimbi buanaid min mado cuidtequidoain dëbin daëd cuesunemeta. Dëbin nibëdnuc masën bédambocquid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chiacpadomboen nanuec aton madobëdi puduedpanëdash.

²⁵ Adnubien Edusaden yacnombo tabadquid Simeyon cuëmëdquid Nuquin Papan naden nata quequin chiaid tantiaquin naquidquio icpanëdash. Aidi isadaidbo chuiquid dapa abentsëcquiobi cainquidquio icpanëdash. Aidi Nuquin Papan aton Mayan meniaidquio icpanëdash. ²⁶ Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bédamboen isaidquio choacsho unësabicquin isendambi, quequin tantia-panëdash. ²⁷ Ademibidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquio nanuen aton bënëbëdtambi Madian Esus bëpanëdash. ²⁸ Esus bësho isun Simeyonën Esus bedshun icucquin Nuquin Papan naid naden chuibampanëdash:

²⁹⁻³⁰ “Abitedishun Icho icquin mimbi ëndenquio chiampid nëbi nëid isembi.

Nëid isash unësmanc quenquio yec, Cuishon, quec unësebi, Papa.

³¹ Mibi yacno yuedanquid nëbi isembi.

Nëid mimbi chomiaid icsho ma abitedishunquio ispanuna.

³² Nëidëmbi mimbi tantiacpaden chuibanquin isadaidbo bédambo icmendac,”

quepanëdash Simeyon.

³³ Aden chuibanubi, ¿Midapadquidquien con mado capec? quequin Madian aton bënëbëdtambi tantiaquinëdash. ³⁴ Esus chuibanquin naimbudshun Osebëdta Madia chiec Simeyon: —Bédambo icmiaid mibi daëdi nec —quepanëdash. Aden chuishumbic Madi-aidtsëqui naden Simeyonën chuiopanëdash: —Chuinu. Tantiata. Nëid bacuë tantiesadaidbo utsi-utsiec icsho Nuquin Papan uguë nësecaindac. Min mado tantiaquid utsi-utsiec icsho Nuquin Papan abi yacno puduedmiaid iquec bédambo iquendac. Min bacuë, Esus, Nuquin Papa yacno puduedmianquid nec, qesho tantiaishun matses dadpeshun icsamboen chuided-chuidedendac. ³⁵ Adsho ambi ompoquin naid icsabëdta ambi tantiaid icsa tantiamequid min mado iquendac. Adobanquin ismiac unës uasho isash mibibi unësquio yec, Con madon natiambo iquebi, mibi quendac —quepanëdash Simeyon Madia chiec.

³⁶ Aden Simeyonën chuinubi Nuquin Papan naden nanu quequin chiaid chuiquid chido Ana cuëmëdquid icpanëdash. Aidën papa Panued icpanëdash. Aidën tsused Ana Ashed icpampic. Aid aton bënënen bedac abëdi seta 7ted matamias tabadnubi ³⁷ aton bënë unësapanëdash. Aton bënë unësan Nuquin Papa tabadte shubu uashunaid yacno nidshun Anan tabadec nidenquiocquin Nuquin Papauidi tantiaquin buna mëmumbudnequin Nuquin Papa chuidenapanëdash. ³⁸ Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: —Isadaidbo icsaquid icsho cuidnu caid mënchictequid nëid nec —quepanëdash Ana Esus chiec utsibon tantianubi.

³⁹ Adashic, Nuquin Papan naden nata quequin chiacpaden nainash Osebëd Madia nidaid Cadidia caid yacno nidoash Nasaded caid yacno abi tabadacno choapanëdash.

⁴⁰ Ambo tabadnubi aton bacuë Esus dada bédambo yec canicuepanëdash. Aidi comapenen tantiaquidquio Nuquin Papan bédamboen isaidquio icpanëdash.

Canicuenash Nuquin Papa tabadte shubu uashunaidën Esus tabadaid

⁴¹ Adashic, Ëmbi bëyuc tishaid unës uamenushë qeshun intaquën aton shubu shëcuë ëcnoshcacsho isun aidon bëyuc tishaid unësmanquicquin Nuquin Papan uaid mayan bédan matampampid tantiate ushë yanuc Madia Osebëd Edusaden yacno nidoapanëdash. Nuquin Papan chiacpadequi setan-setanquiec nidtenapanëdash. ⁴² Adecbidi, Esus abi tishaid seta 12ted yanash canicuenash anibëd Edusaden yacno nidpanëdash. ⁴³ Adec ambo nidashic nami uabicquid petequid tantiaid ushëtedi tantiec tabadtenapanëdash. ⁴⁴ Adec ambo tabadquin nainash Esus ambobi icnubi tantienquio yec Madia Osebëd auëshquio nidoapanëdash. Adec nidash inchëshbudtsëqui abëd choboedo yacno capuquin Esus nibëmbenapanëdash. ⁴⁵ Aden nibënquin istuidabi yec Edusaden yacno padpidec nidoapanëdash. ⁴⁶ Daëdec ushquin nibënshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiamequin chuibanquidbëd onquecuededsho istuidpanëdash. ⁴⁷ Adec onquec tsadsho isquin,

Bëdamboen tantiaquin chuibanquidquo nëid nec, quequin utsibon tantiabededpanëdash.
⁴⁸ Adnubien, ¿Mitsipadquid con mado nepec? quequin otacquio Madian tantiapanëdash.
 Aden tantiequi: —¿Atotsi quiash ëbi daëdi tantienquo yec nëmbo choash mibi tabade,
 mado? Unësquioacquin papabëdtambi mibi nibëmbeniombi —capanëdash anin.

⁴⁹ Adoquien Esus: —¿Atotsieshun ëbi nibëno? Con Pa shubu uashunaidën tabadnuec
 chobosh nëbi. ¿Tantienquioda mimbi icpe? ⁵⁰ Aden Esusën chuisho anibëdtan Osen tantien-
 quioacpanëdash.

⁵¹ Adashien: —Nidnu. Nid, mado —anin cac cacuidenquo yec Nasaded yacno anibëdi
 choash tabadquin Madian chiaidbëdta Osen chiaid tantiaquin Esusën nadenepanëdash.
 Adec tabadnubi aton titan ambi isboedbëdta ambi tantienquo yaid bëpiscudenquioacquin
 tantiadeneapanëdash.

⁵² Adnubien comapenen tantiec bëdamboec canidopanëdash. Adquid icsho Esus Nuquin
 Papan bëdamboen isacpadomboen adomboembidi matsesën isbededpanëdash.

3

Esus choec, quequin Uan mentoanquidën chiaid

(Mat 3.1-12; Mad 1.1-8; Uan 1.19-28)

¹ Adashic, seta 15ted matamec Tibedio Sesad cuëmëdquid, Doma yacno tabadequi abitedi
 ancaquid dapa, empedadod caid icpanëdash. Aidi Doma yacnoquido ancaquid dapa ic-
 nubien Ponso Pidato cuëmëdquid, nidaid Udeya caid yacnoquido ancaquid, cobednadod
 caid icpanëdash. Aid daëd ancanquid icnubien Edodes cuëmëdquid, nidaid Cadidia caid
 yacnoquido ancaquid, cobednadod caidbidi icpanëdash. Ancanquid aitedi icnubien
 Edodesën utsi, Uedipe cuëmëdquid nidaid Itudeya caid yacnoquidobëdi nidaid Tëdaconite
 caid yacnoquido ancaquid, cobednadod caidbidi icpanëdash. Ancanquid aitedi icnu-
 bien Disanias cuëmëdquid nidaid Abidinia caid yacnoquido ancanquid cobednadod caid
 icpanëdash. ² Ancanquid aitedi icnubien Anashëdi Caipas isadaidbo tsusio dapabo ic-
 panëdash. Aid daëdi isadaidbo tsusio icnubien Uan, Sacadiasën mado matses nibëdacnombo
 tabadshobi Nuquin Papan, Ëmbi chiaid chuibanta, capanëdash. ³ Adoac acte Odan caid
 cuëmano capuquimbi naden chuibampanëdash. Mimbi tantiaid icsa ënta. Aden ënsho
 isun mimbi icsambocquin nabod tantienquo yacnimboen Nuquin Papan mibi bëdamboen
 isendac. Ëmbi tantiaid icsa nainquioacquin ënu, mibi qesho tantianshun mibi acten
 mentono, quequin cho-choquid cho-choquidquien Uanën chuidedneapanëdash.

⁴ Ëndenquimbo Nuquin Papan tantiamiac Isayasën Uan chuiquin dada uampicpadequi
 Uan icpanëdash. Naden Isayasën Uan chuiquin dada uapampic:

“Matses nibëdacnombo tabadquidën ëcauanshun naden chiendac:

Nuquin Icbombo choeque. Aid tantianu, quequin mimbi tantiaid icsa ëmbanta.

⁵ Umbo ancuenquo chosho isnu quequin cuembocnoc andëdshun

ambescabanacnimboen abimbo chuiquidënquo chiaid tantianu, quequin mimbi tantiaid
 icsa ëmbanta.

⁶ Aden ënshun Nuquin Papa yacno puduedmianquid chuiquid dapa abentsëcquiobi cuem-
 bocnoc mimbi tantiabenendac,”

quequin Isayasën Uan tishabicnuc chuiquin dada uapampid nec.

⁷ Aden ënden chiampicpadequi Esus bëyucanequin acten mentomenuc cho-choquid dap-
 den icsho Uanën nadopanëdash: —Nisin bacuë anipadquid nec. Aiddimboecquid icsamboc-
 quid mibi neyoc. Mibi adquid icsho isun ¿tsuntsin Nuquin Papan cuidnushe qeshun ambi
 mënchictequid icta, quequin mibi chiosh? ¿Aidën chiaid tantiashta acten mentomenuc
 cho? ⁸ Mentomete bunquin mimbi tantiaid icsa ënshun bëdamboec tabadquin utsibo
 ismebanta. Nuquin tsusedpa Abadauan Nuquin Papan bëdamboen isaidquid icpampic.
 Ambi tishmiaidën tishmiaid caidaid ëbi icsho Nuquin Papan bëdamboen isaidquid nëbi,
 quequin tantienda. Abadauampadquid ambi chiaid tantiaquid bunquin, Matses icta,
 Nuquin Papan cac cuënotëbi matses iquendac —quepanëdash Uan. ⁹ Adequi onquebudec:
 —Cuëte icsatedi matenu, quequin cuëte bacuëesa dëdshun mateshun icbon nëdencaquin
 tauec. Adquiecbidi tantiaid icsambocquid cuëshëdmenu, qeshun bëdamboec tabadaid
 ismesa cuëshëdmeshun chian anëdënquequid Nuquin Papan nënendac —quepanëdash Uan.

¹⁰ Adoquien: —Chian anëdënquequid Nuquin Papan nësiate ictiapimbocquin ¿atotsimbi
 napeba? —quepanëdash iccuededquido.

¹¹ Adoquien: —Mibi dasiuidaid daëd icsho dashcute nibëdquid isun mitsana abentsëc
 meneta. Adembidi pete nibëdquid icsho isun meneta —capanëdash Uanën.

¹² Adecbidi ancanquid dapan matses utsin na bedtequid nëidted bedta caidotsen
 acten mentomenuc cho-chopanëdash. Choshon Uanën chuibansho tantiasht: —Chian
 anëdënquequid nësiate ictiapimbocquin ¿atotsimbi napeba? —quepanëdash.

¹³ Adoquien: —Ancanquid dapan chiacstedtsëquid bedta. Muaquin mitsana daëd uanuequin bedenda —capanëdash Uanën aido chuiquin.

¹⁴ Adashic, adecbidi sondado cho-choash: —¿Atotsimbi napeba? —quepanëdash Uan caic.

Adoquien: —Mitsana bedtequid bunquin icsamboen bedenda. Utsin naid tantiasahun mua uaquin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

¹⁵ Aden Uanën chuibansho tantiasch: —¿Tsutsi nepec? ¿Nuquin Papan chomiaidta nepec? —quecuededpanëdash cho-choquido.

¹⁶ Adsho tantiasch: —Mibi acten mentoquidquio nebi. Padnuen ëbipadquidpenquio nada-tiambocquid choendac. Aidi bëdamboshëcquid nendac. Adquid icnuc ëbi icsaquid icsho ¿atotsiesheshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan. ¹⁷ Aden chuibanec nadpanëdash: —Piacbo ëshë uashun bitsi secatanquïn nëdëncashun ëshë icbon dayun uacpadomboen abi tantiesha cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. ¹⁸ Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

¹⁹ Adshumbic, ancanquid Edodesën tantiaid icsatsen Uanën chuibampanëdash: —Mïn utsin chido, mimbï bedaid, mimbï tantiaid icsa neque. Mimbï tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuiopanëdash. ²⁰ Aden ambi tantiaid icsa chuibansho tantiasahun Edodesën Uan bedmeshun quënën nauedmepanëdash abitedishun tantianushe qeshun.

Esus acten mentoaid

(Mat 3.13-17; Mad 1.9-11)

²¹ Quënën nauedabicquïn matses dadpen acten mentobampanëdash Uanën. Utsiboba mentoshombic Esustsen mentopanëdash. Adoquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcniac ²² dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec nadec aton Papa onquepanëdash: —Mibentsëquiobi icsho ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

Esuquidistun tsusedpabo chiaidtedi

(Mat 1.1-17)

²³ Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiasch aton matses nadpanëdash. Osen mado nec, quiaish, Nuquin Papan mado nec, quenquio yec matses onquepanëdash. Esusën papapenquio Ose icnëdash. Madia aton tita icbo icnuc Esusën tsusedpabo nëidtedi iquéc: aton buchido Edi cuëmëdquid icpanëdash. ²⁴ Aidën papabic Matac cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, ²⁵ aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid, ²⁶ aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid, ²⁷ aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid, ²⁸ aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën papabic Ed cuëmëdquid, ²⁹ aidën papabic Osue cuëmëdquid, aidën papabic Ediesed cuëmëdquid, aidën papabic Odin cuëmëdquid, aidën papabic Matac cuëmëdquid, ³⁰ aidën papabic Debi cuëmëdquid, aidën papabic Simeyon cuëmëdquid, aidën papabic Uda cuëmëdquid, aidën papabic Ose cuëmëdquid, aidën papabic Onan cuëmëdquid, aidën papabic Ediaquin cuëmëdquid, ³¹ aidën papabic Medeya cuëmëdquid, aidën papabic Menan cuëmëdquid, aidën papabic Matata cuëmëdquid, aidën papabic Natan cuëmëdquid, ³² aidën papabic Dabid cuëmëdquid, aidën papabic Isai cuëmëdquid, aidën papabic Obed cuëmëdquid, aidën papabic Bos cuëmëdquid, aidën papabic Sadomon cuëmëdquid, aidën papabic Nason cuëmëdquid, ³³ aidën papabic Aminidad cuëmëdquid, aidën papabic Adan cuëmëdquid, aidën papabic Eston cuëmëdquid, aidën papabic Pades cuëmëdquid, aidën papabic Uda cuëmëdquid, ³⁴ aidën papabic Acobo cuëmëdquid, aidën papabic Isac cuëmëdquid, aidën papabic Abadauan cuëmëdquid, aidën papabic Tade cuëmëdquid, aidën papabic Nacod cuëmëdquid, ³⁵ aidën papabic Seduc cuëmëdquid, aidën papabic Dacau cuëmëdquid, aidën papabic Pedec cuëmëdquid, aidën papabic Ebed cuëmëdquid,

aidèn papabic Sada cuëmédquid, ³⁶ aidèn papabic Cainan cuëmédquid, aidèn papabic Adpashad cuëmédquid, aidèn papabic Sen cuëmédquid, aidèn papabic Noe cuëmédquid, aidèn papabic Damec cuëmédquid, ³⁷ aidèn papabic Matusaden cuëmédquid, aidèn papabic Enoc cuëmédquid, aidèn papabic Aded cuëmédquid, aidèn papabic Macadaded cuëmédquid, aidèn papabic Cainan cuëmédquid, ³⁸ aidèn papabic Enos cuëmédquid, aidèn papabic Sed cuëmédquid, aidèn papa abia uampid Adan cuëmédquid, aidèn papambo Nuquin Papa abia yanampidquio nec. Abi tabadec. Aidedi Esusèn tsusedpabo nec.

4

Satanas Esus icsamete bunaid

(*Mat 4.1-11; Mad 1.12-13*)

¹ Adshumbic, Matses nebi, quequin Nuquin Papan chiacpaden nanuen acten mentoepanédash Esusèn. Aden Uanèn acten mentoquien Nuquin Papan Mayanèn chiacpadec acte Odan caid yacnoèsh putuanec matses nibèdacnombo nidash tsadpanédash. ² Ushè utsi nidash utsi choaid abuctotsècquiecnuc ambobi tsadpanédash. Aidedi ushquin penquo yash Esus bundopanédash.

³ Bundoacsho isash Nuquin Papa chieshènquid choash Satanas nadpanédash: —Nuquin Papan madombo icquin penun cuènotebi pete icta cata —capanédash Satanasèn Esus chuiquin.

⁴ Adoaquien: —Padi: “Peteuidi pec bédamboec tabadtemaid nec,” quequin dada uapampic —quepanédash Esus Satanas caic.

⁵ Adoshombic, macuèsh dapa abucquio yacno Esus buanshun Satanasèn badedquio nidaidtedi ismepampanédash. ⁶ Ismiash: —Nidaidèn icquidtedishun icbo icmiaidquio nebi. Abitedi con na nec. Èmbi menenu cac aidedi mitsana iquendac. Nidaidèn tabadquidtedi chuiquid dapa mibi icmete bunebi. Adquid mibi icnuc mibi buntequid nibèdac. ⁷ Nidaidèn tabadquidtedi chuiquid dapa icnu quequin, Con icbo mibi nec, èbi casho adquid mibi icmambi —quepanédash Satanas Esus caic.

⁸ Adoaquien: —Padi. Nuquin Papan chiaid dada uapampid nad iquec: “Nuquin Papa abentsècquio mibi tantiaiduidtsèqui min icbombo neque. Aidèn namiaidquio icta” —quepanédash Esus Satanas caic.

⁹ Adoshombic Edusaden yacno Esus buanshun Satanasèn Nuquin Papa tabadte shubu uashunaid macano abucquio tsadumpanédash. Aden tsadunshun: —Mibi Nuquin Papan madombo yec nèuèshquio dacuèdenquio yec pudunta. ¹⁰ Naden dada uapampid iqueque. Tanti. Chuinu.

“Mibi pudunsho isun, Tscatequin bédamboen budmeta, quequin Nuquin Papan ambi uaido mayan bédabo chiendac.

¹¹ Aidombi min taèn tsasimbocquid tincanushe queshun uidèn uaquin mibi bédamboen budmendac.”

Aden min Papan chiaid icnuc dacuèdenquio yec pudunta —capanédash Satanasèn Esus chuiquin.

¹² Adoaquien: —Chuinu. Tantiata: “Nuquin Ibon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanédash Esus Satanas caic.

¹³ Aden chiaquien Satanasèn Esus icsamboen namenuen tanquin naimbudpanédash. Aden naimbudequi, Padpidemboen èmbi chiaid namenuquin Esus tanun nanuna, quequin ambibi tantianec Esus nianec Satanas nidpanédash.

Nasaded yacnocquido Esus bunesabo

(*Mat 4.12-17; 13.53-58; Mad 1.14-15; 6.1-6*)

¹⁴ Adashic, Nuquin Papan Mayanèn tantiamiaidquio iquequi matses nibèdacnoèsh Cadidia yacno Esus choapanédash. Choacsho isun, Nuquin Papan Mayanèn tantiamiaidquio nec, quequin abi isquidon chiac dèuequidon tantianpanédash. ¹⁵ Adnubic, Nuquin Papan chiaid chuibante shubu utsin-utsinquec puduedcuenequin Nuquin Papan chiaid Esusèn chuibampanédash. Aden chuisho tantiash, Nuquin Papan chiaid tantiaquidquio Esus nec, quec cuèdencuedpanédash.

¹⁶ Adashic, Nasaded yacno abi caninèdacno Esus nidoapanédash. Ambo choash chonoadtemaid ushèn Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec onquenush nidtopanédash. ¹⁷ Nidtosho isun Nuquin Papan chiaid Isayas cuëmédquidèn dada uapampid anocquidèn Esus menepanédash. Aden aid meniac sananquin seccudoabanquin isbanec nadec Esus onquepanédash:

18 “Nuquin Icbon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa ëmenuen chuibanta caidquio nebi. Aidëmbidi Satanasën yuaid Nuquin Papan bacuë icmenuequin chuibanta caidquio nebi.

19 Aidën Nuquin Icbon bëdamboen iste chuibanta caidquio nebi.”

20 Adec isec onquequin nainshun dada uaid bidicashun meniash tsadpanëdash Esus. Adec tsadsho shubu nuntan icquidtedishun bëisbededpanëdash. 21 Adoac: —Nuquin Papan chiaid mimbi tantiaboed nëbimbobi tauadoec —quepanëdash Esus abibi chiaidequi.

22 Adoaquien: —Bëdamboen chuipec. ¿Mitsipaden tantiaid ambi chiaid nepeba? — quecuededpanëdash. Adec onqueboedobi: —¿Osen mado Esus nenquioda ictic? — queoapanëdash.

23 Adoaquien: —Bëdamequid yequi abibi daicsambo yanash bëdamiadacsho isash, Bëdamequidquio nec, quequin matsesën tantiapec, quequin chuipampid nec. Ëmbi Capednaun yacnoshon nabambocpadomboen nëshuntsen nabansho isun, Nadatiambocquin nabanquid nec, quequin mibitedishun tantiapec. 24 Abimbo chiembique. Tantiata — quiaish Esus abi onquec: —Nuquin Papan ëmbi tantiamiacpaden chuibanta caidën abi caniacnoshon chuibansho tantienquiocquid icpec. 25 Ëndenquimboshë adomboembidi Nuquin Papan ëmbi tantiamiacpaden chuibanta caid Edias cuëmëdquidën chuibansho tantiesa icpampic. Aidi icnubien isadaidbon bënua chidobo dadpen icpampic. Aido adquid icnubien seta abentsëc chotsëcnc matamec aton pete nibëdquieq yanubi isadaidbon bënua bunc tabadpampic. 26 Adec bunc tabadsho isun, Isadaidbon bënua yacno nidta, quenquiocquin isadaidpembon bënua yacno pemenuc nidta cac Edias nidshun ambi chiacpadomboen isadaidpembon bënua nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsëqui icpampic. 27 Adashic, adecbidi isadaidbo abi daushumbo yacno mishac mishadenquio yacimboecquido dadpen icpampic. Adquido icnubien Nuquin Papan namiaidquio utsi Ediseyo icpampic. Aidëmbi isadaidbo daushumbocquido bëdamenquiocquin isadaidpembo abentsëc Naman cuëmëdquid Ediseyon bëdamepampic. Ëbi bëdamepec, quequin tantiec aton nidaid Sidia caid yacnoësh choacsho Ediseyon Naman bëdamepampic —quepanëdash Esus.

28 Aden Esusën isadaidpembo nashumpampid chuisho tantiaish iccuededquido isadaidbo comapenec nëishpanëdash. Isadaidpembobëd isadaidbo ictiapimbo iquec, quec iccuededquido nëishpanëdash. 29 Adec nëishash nidanec nuntanuësh puduenanec shubu ënëdacno nidshun acte dapa quiusudacnombo nebudnuequin Esus buampanëdash.

30 Aden nidmiaquien matses dadpen icquid natsusash Esus nidpanëdash.

*Mayan icsa dapudedaid cuemete
(Mad 1.21-28)*

31 Adec abi caniacnoësh Nasaded caid yacno nidtanashi nidaid Cadidia yacno nidequi Capednaun caid yacno Esus choapanëdash. Ambo choash chonoadtemaid ushë icnuc Nuquin Papan chiaid chuibante shubun puduedshun Nuquin Papan chiaid chuibampänëdash. 32 Aden chuibansho tantiaish: —Ambia tantiaquidën chiacpaden chuibanquidien Esus nechitec —quecuededpanëdash anocquido.

33 Aden Esusën chuibanubien Nuquin Papan chiaid chuibante shubu nuntan mayan icsa dapudedaid icpanëdash. Aidi comapenec sidquetanec onquec: 34 —¿Nasaded yacnocquid Esus caid atotsi quec mibi cho? ¿Ëbipadquidtedi naimbudmenuecta cho? Ëmbi isaid mibi nec. Nuquin Papan bëdamboen isaidquio, icsapenquiocquidquio mibi nec —mayan icsan caquien: 35 —Otacquoio tabad. Adec tabadec dapuedanta —Esusën cac mayan icsan abi dapudedaid tacpanën nebudec icsa uainquio yec dapuduempänëdash.

36 Adosho isash tantiadempambo iquequi: —¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchitequien nec —quepanëdash Capednaun yacnocquido. 37 Aden tantiaquien Esusën mayan icsa dapuduemiash, quequin isquidon chuiban-chuibanac Capednaun yacno dëuequidtedishuntsen tantiapänëdash.

*Daicsambocquid dadpen Esusën bëdamiaid
(Mat 8.14-17; Mad 1.29-34)*

38 Mayan icsa dapuduemiashic Nuquin Papan chiaid chuibante shubu yacnoësh puduenanec Simonën shubu yacno Esus nidpanëdash. Ambo puduedacsho isun: —Simonën nachi chumboshë iqueque. ¿Ada aid bëdametsia? —caquien:

³⁹ Simonèn nachi yacno choash dayunquio nidtuidec: —Chumbocquid daebudta —Esus quenubi badedquio daebudpanèdash. Adec daebudash nidtoshon codocashun Esusbèd icquido pemepanèdash Simonèn nachin.

⁴⁰ Adshumbic, inchèshbudtsèqui daicsaid utsi-utsien bè-bèpanèdash. Aden bè-bèsho isun damishquin Esusèn bèdamepanèdash. ⁴¹ Adembidi mayan icsa utsi-utsien dapudue-mepanèdash. Adoac, Nuquin Papan madombobi mibi nec, quec sidquesho tantiasun: —Nuquin Papan chomiaid nec, quequin èbi chiec adec onquenda —Esusèn cac mayan icsa ènèdpanèdash.

⁴² Adashic, badiadnuc matses nibèdacno Esus nidpanèdash. Esus nidacsho isun matses dadpenshun nibènquin istuidshun: —Nidenquio yec èbèdi tabadta —capanèdash istuidquidon.

⁴³ Adoquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuc nidendabi. Nuquin Papan chomiaid icquin chuibanun nabono —quepanèdash Esus abi nibènquin istuidquido chiec.

⁴⁴ Aden chiashic Nuquin Papan chiaid chuibante shubu utsin-utsinquec pudued-cuenequin Nuquin Papa yacno tabadte iquec quequin chuibampanèdash. Nidaid Udeya caid yacno shubu dadpen icquid utsi-utsiec yacno choshon aden Esusèn chuibampanèdash.

5

Abèd tabadmenuen chomiaid (Mat 4.18-22; Mad 1.16-20)

¹ Adashic chian quenesaded caid cuèmambi tabadquin Esusèn Nuquin Papan chiaid chuibansho tantiec iccededquido dadpen tabadpanèdash. ² Adnubien masi yacno aton cano daèd nèshun icbon aton nèshaidtedi pambampanèdash. ³ Adsho isanec nidash Simonèn cano antsadtoshon, Udictsèc èbi buan, Esusèn cac Simonèn udictsèc buampanèdash. Aden buanac chian cuèman iccededec tabadshobi cano antsadquin Esusèn chuibampanèdash.

⁴ Aden chuibanquin nainshun: —Shodombo yacno nuècquid bednuequin nèshaid nènebanta, Simon —capanèdash Esusèn.

⁵ Adoquien: —Icbo, inchèshèmbi nuècquid bednuen nèshaid nènebenuquin èbitedishun bedamboccombi. Mimbi nèshaid nènetan cac nènetanembi —quepanèdash Simon.

⁶ Adash shodombo yacno nidshun nèshaid nènetanquin nuècquid dadpenquioshè bedac nèshaid tèsèdec taèpanèdash. ⁷ Adsho isun abèdtan nuècquid beduidboedo cuènquin, Cadoec cho, quequin ismiac aido cano utsin choshon cano cubu-cubutsècquiocnoc nuècquid sandoac cano daèd mentoadtsempanèdash.

⁸ Adoanec Esus yacno choequi danèshèn sebudec shuebudash Simon Petedon: —Icbo, èbèd iquenquio yec nidaneta. Icsambocquid nebique —capanèdash Esus chuiquin. ⁹ Abèd icquidobèdtan nuècquid dadpen bedboed tantiadempambo iquec, Esus nadatiambocquid nec, quequin tantiec onquepanèdash Petedo. ¹⁰ Acobo Uan chedo tantiadempambo yec tabadoapanèdash. Aid daèdi Sebedeyon mado icpanèdash.

Adec Petedo shuebudash onquesho tantiatanec Esus nadpanèdash: —Dacuèdenda. Mimbi nuècquid penun acten bedbocpaden nèbi tauain èbi tantiaquid icmenuen nidaidèn capucuenequin abuc tabadaid mimbi chuiban-chuibanendac —quepanèdash Esus Petedo caic. ¹¹ Aden chiaquien aton cano acte cuèman nèshanec aton natedi nianec, Esusèn chiacpaden tantianuna, quianec abèdtan nuècquid bedboedobèdtan Petedon Esus nidsho tsibanampanèdash.

Daushumbocquid bèdamaid (Mat 8.1-4; Mad 1.40-45)

¹² Adashic, shubu dadpen yacno Esus icnubien daushumbocquid nami mishac paèpenquiocquid chopanèdash. Aidi choash Esusèn taèno shuebudec nadpanèdash: —Èbi bèdamete bunquin èbi mimbi bèdamepec —quepanèdash daushumbocquid.

¹³ Adsho tantiasun adquid daushumbocquid mishtemaid nec, quenquiocquin damishec Esus: —Mibi bèdamete bunebique. Mibi bèdamenu —quenubi badedquio bèdampanèdash.

¹⁴ Aden bèdametanec Esus: —Èmbi naid utsibo chienda. Adenquiocquin isadaidbo tussiobo ismetanta ma bèdamaid Nuquin Papan naid nec quequin ma aidon tantiapanu. Aido ismshun Nuquin Papan ambi chiaid Moises dada uamiampicpadembi bèdambo icmiaid cuidtequidquio meneta —capanèdash Esusèn ambi bèdameboed chuiquin.

¹⁵ Adnubien Esusèn bèdamesho isquidon Esusèn bèdamaid chuibanac matses dadpen Esusèn chiaid tantianec cho-chopanèdash. Adecbidi, daicsambocquido bèdanuec chochoacsho Esusèn bèdamepanèdash. ¹⁶ Adashien matses nibèdacnombo nidash Nuquin Papa chiec onquepanèdash.

Dada shëquëquenquiocquid bëdamiaid
(*Mat 9.1-8; Mad 2.1-12*)

¹⁷ Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiamequid dadpen tabadpanëdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquin naquid icmiac matses bëdamenuec Esus icpanëdash. ¹⁸ Aid icnubien dada shëquëquenquiocquid aton din nandoshon aton utsibon bëpanëdash. Aden bëquin shubu nuntan nënantanquio Esus icnubi ¹⁹ matses tsucus-tsucustsëcquiocsho isash puduedtiapimbo yec macano pada-padapambo yacno dada shëquëquenquiocquid buanec dectatoshon macano chic-chicshun dada shëquëquenquiocquid abi bëquidon imbudpanëdash.

²⁰ Dada shëquëquenquiocquid ëmbi bëaid Esusën bëdamec, quequin tantiaquin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquo yec bëpiscudtequidquio mibi nendac —quepanëdash Esus.

²¹ Aden chuisho tantiash padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuïtequidquioda chuïbamposh? ¿Tsutsi aden chuïbanquid nepec? Nuquin Papauidi tantiaid icsa cuidenquo yec bëpiscudquidquio nec —quepanëdash ambibi tantiacpadec onquec.

²² Aidon tantiaid tantiec Esus: —¿Atotsi quiash mimbibi icsamboen tantiec onquepe? ²³ ¿Mimbi tantiaid icsa cuidenquo yec bëpiscudtequidquio nendac ëmbi chiaidquio bédantequidpenda nedic? Adecbidi, ¿Mibi icsambochoedi mibi bédanoque. Nidtoash nïda, quequin chiaid bédantequidpenda nedic? ²⁴ Nuquin Papan chomiaid icquimbi mimbi tantiaid icsa cuidenquo yec bëpiscudtequidquio nendac ëmbi cac ad iquendac. Nuquin Papan chuïmaidquio nec mibitedi camenuen dada shëquëquenquiocquid naden chiëmbique Tantia. Nidtoash nidquin min di buanec nid —capanëdash Esusën dada shëquëquenquiocquid chuïquin. ²⁵ Adoac nidtoshon aton di bedanec Nuquin Papan naboad chuïbanequi aton shubuno nidpanëdash.

²⁶ Adsho isash tantiadempambo yec Nuquin Papan naid chiec onquecuededec tabadpanëdash: —Aden bëdamiaid isenquicohedëmbi nëbimbobi aid isbempombi —quecuededpanëdash.

Debi, ëbi tsibanec cho, quequin Esusën chiaid
(*Mat 9.9-13; Mad 2.13-17*)

²⁷ Adashic, capucuenequin Debi cuëmëdquid Esusën istuidpanëdash. Debi nec queshumbi Mateyo cuëmpañdash. Ancanquid dapan utsibon na bedtequid bedshumbanta caid Debi icpanëdash. Ancanquidën chiacpaden Debin utsibon na bedtequid bedbansho isun: —Ëmbi chiaid tantianush ëbi tsibanec cho —Esusën cac ²⁸ Debi nidtoac aton natedi nianec Esus tsibananec nidpanëdash.

²⁹ Adshun aton shubuno Esus buanshun Debin pemepañdash. Ancanquidën utsibon na bedtequid bedbanta caido abipadquido dadpembëdtabi Esus Debin pemepañdash. ³⁰ Aden adquidobëdta Esusën pesho isash padiseyobo: —¿Atotsieshun mibi chuïquidbëdta mibitedishun icsambocquidbëdta pepeba? —quepanëdash Esusbëd icquido caic.

³¹ Aden chuisho tantiash Esus nadpanëdash: —Ëbi bédamec cho, quenquo bédambocquid iquec. Daicsambocquidien, Ëbi bédamec cho, quendac. ³² Adecbidi, Nuquin Papan bédamboen isaidquio icsho, Mimbi tantiaid icsa ënta, quequin chuïnuec choenquo iccondabi. Nuquin Papan icsamboen isaidquio icsho, Mimbi tantiaid icsa ënta, quequin chuïnuec chondabi —quepanëdash Esus padiseyobo caic.

Buna mëmunaid
(*Mat 9.14-17; Mad 2.18-22*)

³³ Aden Esusën chuïbansho tantiashun naden padiseyobon Esus chuïpanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquo mibëd icquido iquec. Aidon buna mëmunenquocquin peshun sicaid actenec —quepanëdash padiseyobo Esus chiec.

³⁴ Adoaquien: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuïquid icnuc ëbëd icquidon buna mëmunenquocquin isuidenquo iquec. ³⁵ Yuecash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

³⁶ Aden chuïbanequi abi Esus onquec: —Dashcute chuca cuëshun dashcute shënbëdta nancenquin bëtuscaisa matses nec. Cuëshquin dashcute chuca icsa uaic. Adecbidi shëni

tuscaid bêtësêdec. ³⁷ Adembidi dadpen icquid chodo uashun sandoe. Adotanquimbic istuidshun chuca uain chodo uashun sandoaic chodo shênin icsa sandoshon nequid bëenquiocquin. ³⁸ Adembidi, êmbi ênden tantiauiduidi tantianu, quequin Nuquin Papan nêbi chiaid pausudtequid bêda tantiauidquid yanec icsabudendac. Mibi adquid iquec, quequin tantiaquin utsi chiacimboen Esusên padiseyobo chuipanêdash. ³⁹ Adashic ambi ênden chiaid tantienquicoeodi nêbi Nuquin Papan chiaid utsi chuibanac tantiaquidquico iquendac –quepanêdash Esus.

6

Chonoadtemaid ushê tantiaquid

(*Mat 12.1-8; Mad 2.23-28*)

¹ Adashic, chonoadtemaid ushê icnuc Esusbêdtan abêd icquidon tied matanquin tiedên caniquid êshchicshun abêd icquidon bitsi tsucucashun pebededpanêdash. ² Aden pesho isquin padiseyobon: –¿Atotsieshshun chonoadtemaid ushên chonoadpeque? Tantianu. Êbi chui –capanêdash Esusbêd icquido chuiquin.

³ Adoaquien: –¿Tsusedpa Dabid caidbêd icquidon piasquin pepampid tantiamboda ique?
⁴ Naden chuipampid neque. Tantia. Abêd icquidobêd Nuquin Papa tabadte shubu uashunaid puduedtemaid quênên puduedshun Nuquin Papa tantiaquin pan meniac nanaid chuiquid dapan bedshun abêd icquido menebanshun aidobêdtambi pepampic. Aid pan Nuquin Papan namiaidênuidtsêqui petequid nepampic –quequin padiseyobo chuishun Esusên nadopanêdash: ⁵ –Êbia: Tiboquenu, quiash tsadacpadec matses: Nêid chonoadtemaid ushê nec, quequin tantiec. Adnubini aid ushê icho yec tiedên caniquid êshchicshun bitsi tsucucasho isash: Mimbi icsamboen naic, quetiapimbo iquebi.

Mêuesadaid bédamaid

(*Mat 12.9-14; Mad 3.1-6*)

⁶ Adashic, chonoadtemaid ushê utsin Nuquin Papan chiaid chuibante shubun puduedshun Esusên chuibanubien abiucquico mêuesadaid dada icpanêdash. ⁷ Ambobidi tabadquimbi Esus chieshênquidon, Chonoadtemaid ushên Esusên bédamenushe. Isnu, quequin padiseyobon caimbededpanêdash. ⁸ Aden cainubien abi chieshênquidon tantiaid tantiaquin mêuesadaid isquin: –Nênantanquico nidto –Esusên cac mêuesadaid nênantanquico nidtoash nidpanêdash.

⁹ Adsho isashien: –Tantianu. Chui. ¿Chonoadtemaid ushên matses tantiaquindambi bédamboen nape? ¿Adoenquiocquindambi bédametemaid ushê nêid neque? ¿Mibi nêbi bédametiapimbo iquebi, quequindambi chuipe? ¿Adoac daicsaid utsi-utsec unêspec? –quepanêdash Esus.

¹⁰ Aden chuishumbic iccuededquido isbanquin: –Êbi mêd –cac Esus mêdequi mêuesadaid bédampanêdash.

¹¹ Adec mêuesadaid bédansho isashien comapenec nêishash: –¿Mitsipadentsimbi Esus acpe? –quec onquecuededpanêdash abi chieshênquido.

Esusên, Êbi chuibeneta, caido

(*Mat 10.1-4; Mad 3.13-19*)

¹² Adashic, ushê utsin macuêsh yacno matses nibêdacno Nuquin Papa chiec onquenuec nidash inchêshên ushenquico yec Nuquin Papa chiec Esus onquepanêdash. ¹³ Badiadshun abêd icquido dadpen icsho chomeshun, Êbi chuibeneta, quequin 12tedictseqi chuipanêdash. ¹⁴ Nêidic, Simon, Esusên Petedo caid; utsibic, Andedes, Simonên utsibi; utsibic, Acobo; utsibic, Uan; utsibic, Uedipe; utsibic, Badtodome; ¹⁵ utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaid-pembo bunesa; ¹⁶ utsibic, Udas, Acobon mado; utsibic, Udas Iscadiote, yuecshun Esus chieshênquido Esus bedmequid. Aidtedi, Esusên, Êbi chuibeneta, caido icpanêdash.

Nuquin Papan bédamboen isaïdo icnuc ambi icsamboen isaïdo

(*Mat 4.23-25; 5.1-12*)

¹⁷ Adashic macuêsh yacnoêsh abêd 12ted icquido pada-padambo yacno budash abi tsibanquido dadpen icsho isash Esus nidtuidpanêdash. Nêidted icpanêdash: Nêidic, Edusaden yacnoêsh choquido; utsibic, Acte Dapa cuêman shubu dadpen icquid Tido caid yacnoêsh choquido; utsibic, Sidon caid yacnoêsh choquido. Aido Esusên chuibansho tantianuec chochoash tabadnubi, Êbi bédamepec, quequin tantiec utsibo choash tabadpanêdash. ¹⁸ Adec choquido mayan icsa dapuduedaid icsho isun Esusên dapuduemepanêdash. ¹⁹ Adsho isun nadatiambocquid Esus neque. Mishnu, qeshun mishequi bédancuededpanêdash.

²⁰ Adshumbic abêd icquidombo isbanquin naden Esusên chuibampanêdash:

—Nēmbo mibi icnuc mitsana nibēdtenesho isun Nuquin Papan bēdamboen isaïdo iquec abuc nidan con natedi mitsana nendac.

²¹ “Nēuēshquïo bundodenesho isun Nuquin Papan bēdamboen isaïdo yec abuc ēbēd tabadec bundoesa iquendac.

“Nēuēshquïo matses Nuquin Papan chiaïd tantiesä icsho isash unēsquïo yec shubidednequid Nuquin Papan bēdamboen isaïd yec abuc nidash ēbēd tabadec bēdambo iquebi quependac adquïdo.

²² “Esus tantiaquid icsho chieshēnquin pudued cainquïo yaid adembidi mua uaqin chuishunaid Nuquin Papan bēdamboen isaïdquïo nec.

²³ “Adomboembidi ěmbi ěndenquimbo chuimïaid aton matsesēn icsamboen chuishundeniampic. Adomboembidi mibi min matsesēn icsamboen chuishundenetsiash. Nïdaïdēnshun adoaid iquec Nuquin Papa yacno choacsho ambi bēdambo icmïaid mibi iquendac. Adquid iquendabi quequin tantiec mibi icsamboen chuishunaquï, Cuishon, queta.

²⁴ “Padnuen, con na dadpen iquec, quequin tantiec bēdamboec tabadebi, qesho Nuquin Papan icsamboen isaïdo mibi nec. Nïdaïdēnshun mimbi bedtenïaiduidi tantiec Nuquin Papa yacno puduedtiapimbocquid mibi iquendac. Nïdaïdēn bēdamboec tabadquin ěnden bedondaïdi mibi nec.

²⁵ “Nïdaïdēnshun abi bunaidtedi bedquïdo Nuquin Papan icsamboen isaïdo nec. Abi bunaiduidi tantiaquin Nuquin Papan chiaïd tantianu qeshun tantiatiapimbo iquendac.

“Mitsanauidi tantiec, Bēdambo iquebi, quec mamēnec tabadquïdo icsho Nuquin Papan icsamboen isaïdo mibi nec. Adquïdo Nuquin Papa yacno puduedte bunsho, Padi, cac shubiquïendac.

²⁶ “Bēdamboquid nec, quequin mibi dadpenshun chuïsho tantienda. Adomboembidi mua uain Nuquin Papan ěndenquimbo chuimïaidpembon chuipampic. Aidon chiaïd tantïashun tsusedpabon Nuquin Papan chiaïd tantienquïo yanampic. Adquïdo Nuquin Papan icsamboen isaïdo nec —quepanēdash Esus.

Mibi uïmanēnquïdo tantiaquin nabanta, quïaid
(Mat 5.38-48; 7.12)

²⁷ Aden chiashic abi Esus onquec: —Ěmbi chiaïd tantiaquidquïo nad iqueque. Chuïnu. Tantiata. Mibi chieshēnquïdo bēdamboen tantiaquin nabanta. ²⁸ Adembidi mibi icsamboen chuïquid bēdamboen chuita. Adembidi, ěbi icsamboen naquïdo bēdamboen tantiaquin cuidenda, Papa, quequin Nuquin Papa chuita. ²⁹ Adembidi mibi cuesquid cuidenda. Adembidi mibi icsamboen nadenesho cuidenquïocquin ademi bēdamboen nabanta. Adembidi ampequin min dashcute bedanec nidsho isun, Chiata. Dadamicquïdtsen buan, cata. ³⁰ Utsibic, aton na nibēdquid, Bec cho, qesho meneta. Adembidi utsin mitsana ampesho isun cuidenquïocquin bēdamboen naota. ³¹ Adembidi ěbi bēdamboen nashuntïadquïdi nepec quequin mimbi tantiacpadomboen utsi tantiaquin nashunta.

³² “Ěbēd tantiananquïduïdi tantianu, quec ʒbēdamboda mibi icpe? Padenquïo. Adembidi Esus tantiesan abïpadquïocquïdo tantiec. ³³ Adecbidi, Ěbi bēdamboen tantiaquin nashunquïduïdi tantiaquin nashunoanu quec ʒbēdamboda mibi icpe? Padenquïo. Esus tantiesan adembidi nashunquïduïdo nec. ³⁴ Adecbidi, Ěbi menequïduïdi menenu, quec ʒbēdamboda mibi icpe? Padenquïo. Esus tantiesan adenuïdi menec. ³⁵ Naden nata, quequin chuïnu. Tantia. Mibi chieshēnquid icsho aid tantiaquin bēdamboen nabanta. Adembidi mibi meniantiapimbocquid, Bec cho, qesho, Yuecash cuidnanun nanuna, quenquïocquin meneta. Mimbi adosho isun Nuquin Papan mibi bēdamboen isendac. Adobanec bēdambo iquebi quec mibi tabadendac. Adomboen nabanquïdo Nuquin Papan nacpadomboen nabanquid nendac. Adquïdo aton mado iquendac. ³⁶ Nuquin Papan abi chieshēnquïdo nashundeniacpadomboen mibi chieshēnquïdo nashundeneta —quepanēdash Esus.

Icsambocquid nec, quequin chienda, quïaid
(Mat 7.1-5)

³⁷ Aden chuïbanashic Esus abi onquec: —Ěmbi tantiacpadomboen naisa icsambocquid nec, quenda. Adesa abi yacno choacsho Bēdamboquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquïdi Nuquin Papa nec, quenda. Adenquïo icsho Nuquin Papan cuidenquïoctequid mibi iquendac. Mibi icsamboen tantiaquin utsin nasho isash cuidnanenquïo yec bēpiscudta. Adquid, Cuidnu, quenquïo yec mimbi icsamboen tantiaquin naid Nuquin Papa bēpiscudendac. ³⁸ Aton na nibēdquid bēdamboen tantiaquin meneta. Adembidi, mibi tantiaquin abi utsibēd bēdamboec tabadtequid Nuquin Papan mibi menendac. Utsi tantiaquin mimbi meniacpadomboen

mibi tantiaquin bédamboen tabadmetequad daëd uashun Nuquin Papan mibi meneoaindac —quepanëdash Esus.

³⁹ Aden chuishumbic utsin tantienquoio ictequad abëd icquido naden Esusën chuipanëdash: —¿Podquedën nidnu quec bëshuaid utsi bëyucampecta nidtic? Nidnu, quianec nidec abi daëdi nidaid shëcuë ampaëdpatsiash. ⁴⁰ Adembidi tantianuequidën abi tantiaequid daëniactiapimbo iquec. Tantiamic abi tantiaequidpadquid iquendac —quepanëdash Esus.

⁴¹ Adoshombic adembi tantiaequin naden Esusën chuipanëdash: —¿Atotsi quiaish utsi bëtsiadaid pistsëcquid isequi mibi bëtsiadaid dapa isadtiapimbo icpec? ¿Mibibi bëtsiadaid dapa bëbedadabicquin mitsipadentsi mimbi utsi bëtsiadaid pistsëcquid bedshunuen ispe? ⁴² Adembidi, utsin tantiaid icsa abentsëc icnubien mimbi tantiaid icsa utsi-utsiec icnuc ¿atotsieshun, Mimbi tantiaid icsa ënta, quequin utsi chuipe? Mimbi tantiaid icsa nibëdacimboen mimbi chuipeque. Adoenda. Mimbi tantiaid icsa ënshun utsin tantiaid icsa icsho isun ëmenuequin chui —capanëdash Esusën.

Cuëte abipadquid aton bacuë nec, quequin chiaid

(Mat 7.17-20; 12.34-35)

⁴³ Adoshombic, adembidi Esusën chuipanëdash: —Cuëte bëdan bacuë adquiobidi bacuëec. Cuëte icsan bacuë adquiobidi bacuëoaic. ⁴⁴ Chetequad isun cuëte dada matsesën tantiec. Aden tantiec nisanquidën bacuë isash, Dadain bacuë nec, quenquoio matses iquec. Adecbidi, echo bacuë isash, Bata nec, quenquoio matses icoaic. ⁴⁵ Adembidi bédamboen tantiaquidën ambi tantiacpadomboen utsi bédamboen tantiaquin nabanendac. Adecbidi ambi tantiacpadec bédamboec onquec. Adembidi icsamboen tantiaquidën ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanëdash Esus.

Tantiaquidquoio icnuc tantiaquidquid nec, quequin chiaid

(Mat 7.24-27)

⁴⁶ Adoshombic: —¿Atotsieshun, Con Icho mibi nec, queshumbi ëmbi chiacpadomboen naisa mibi ne? ⁴⁷ Èbi yacno choshon ëmbi chuibansho tantiaquiash nidshun nadomboen naquidquoio iqueque. Chuinu. Tantiata. ⁴⁸ Cunquequid dapan chimeshnushe queshun shubu uaquidën shëcuë ëquëduc uëdëshcashun buintad nitsinquid. Adembidi, natiamianqueic cametequad yanabicnuc tantesa uainquiocnuen ëbi tantiaquidquoio icquin ëmbi chiaid papuduedshun adomboembidi nabanquid nec. Adquidën tantesa uainquoio iquendac. ⁴⁹ Utsibic nad iqueque. Tantia. Èquëduc uëdëshcabi nitsinaid cunquequid dapan chimeshunendac. Adecbidi, ëmbi chiaid papudueduidtsacpadomboen nabanenquoio yec natiamianquid chonoc abi papudueduidtsaid bëpiscudendac. Adquid uquë nësecatequid nendac —quepanëdash Esus.

7

Sondado chuiquidën tantiaid

(Mat 8.5-13)

¹ Aden iccuededquido chuiquin nainash Capednaun caid yacno Esus nidoapanëdash. ² Capednaun caid yacno choash Esus tabadnubien isadaidpembon sondado chuiquidën yua abi cudasaid unëstiadsëcquoio icpanëdash. ³ Aton yua unëstiadsëcquoio icnubien, Nënquid bédamequid Esus nëmbobi iquec, quequin utsibon chiac:

—Aidën con yua bëdametsiash —quianec isadaidbo tsusiobo yacno nidshun istuidash: —¿Con yua chiec Esus yacno ada mibi nidpatsia? —quepanëdash sondado chuiquid.

⁴⁻⁵ Adoaquien: —Ai —quianec Esus yacno isadaidbo tsusiobo nidshun chuituidec: —Sondado chuiquidën chuitan caido nebi. Con yua unëstiadsëcquoio iqueque. Esus bëdamequid neque. Chuitan, cac mibi chiec chobi. Sondado chuiquid bëdambocquid nec. Nuquin Papan chiaid chuibante shubu uamiondaidquid nioshe. Ambi chiacpadomboen aton yua bëdametiadquidi mibi nec —quepanëdash isadaidbo tsusiobo Esus caic.

Adoac aidobëdi Esus nidpanëdash. ⁶ Adec aidobëd Esus nidshobi sondado chuiquidën chomiaid utsibo choquin bëquedtuiddash nadpanëdash: —Sondado chuiquidën chomiaid nebi. Aidën chiaid chuinuec chopobi. Naden chuita, caposhi: “Padicnuna, Icho. Icsambocquid nebique. Mibi bëdambocquid iquec con shubun puduedenquioctiadquidi mibi nec. ⁷ Èbi icsambocquid iquec mibi bëquedec nidenquioccobi. Mibi bëdamequid yec con shubun puduedenquiocquin mibi yacnoshombi, Bëdanta, mimbi cac con yua bëdampec. ⁸ Èbien sondado chuiquid nec. Èmbi nidta cacpadquiequi sondado nidec. Adecbidi, Cho, ëmbi

cacpadquiecbidi choaic. Ademibidi, Nadota, cacpadomboembidi con yuan nabanec,” quequin chuitan sondado chuiquidën cabocpadembi mibi chuiquidën —quepanëdash sondado chuiquidën chuitan caido Esus caic.

⁹Adoquien: —¿Abimbobida cai? —queshun ambi chiaid tantiamenuquin iccuededquido Esusën bëisbanquin nadopanëdash: —Chuinu. Tantiata. Sondado chuiquidën isaidaidpembo ëbi tantiaquidpadquid isaidaidbën nibëdec —quepanëdash Esus. ¹⁰Aden chiaquien sondado chuiquidën chuitan caido aubidi nidoash shubun puduedshun sondado chuiquidën yua bëdamiaid istuidpanëdash.

Nianten mado uincuen uaid

¹¹Adashic, ushë utsin shubu dadpen icquid Nain caid yacno Esus nidpanëdash. Aidbëdi abëd icquido nidpanëdash. Adecbidi matses utsibo dadpen nidpanëdash. ¹²Adec nidequi Nain tsasi uaid quënë shëcuë anoentsëqui choquimbi unësaid bëquido bëqueduidpanëdash. Unësaid epa icnubi ani niantepanëdash. Niantebëd Nain yacnocquido dadpen chochopanëdash. ¹³Adec cho-choec niantepanëdash. Niantebëd Nain yacnocquido dadpen chochopanëdash. ¹⁴Adec, Ënëd, quetanec udictsëc nidshun unësaid nanaid Esusën mishnubi abi bëquido nidtuidpanëdash. Nidtuisho isun: —Abuido, uëtsëdota —cac ¹⁵uëtsëdtoash tsadec unësaid onquepanëdash. Adsho isash ani caic: —Në, unësaid min mado uincuenoshe. Abëdi nidec nid —capanëdash Esusën.

¹⁶Aden unësaid uincuemesho isash cho-choquido: —Adopenshenda uincuemec —queshun Nuquin Papan naid chuibampanëdash. Aden chuibanec: —Nuquin Papan matses bëdamboen isnuen ambi chomiaidquido nuquibëd icmiosh —quec isquido onquecuedepanëdash.

¹⁷Aden isash nidshun unësaid uincuemiaid isquidon chuibansho isaidaidbon nidaid Udeya caid yacnocquidon tantiabempanëdash. Ademibidi chiac dëuequidontsen tantiaipanëdash.

Ëbitedishun cainaid mibi nec, quequin Uanën chiaid (Mat 11.2-19)

¹⁸Adnubien, acten mentoanondaid Uan cuëmëdquid quënë nauedaid icsho abëd icquidon Esusën nabanaid chuibampanëdash. Adoquien abëd icquido daëd chomeshun Uanën nadopanëdash: ¹⁹—Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanën cac aid daëdi Esus yacno nidpanëdash.

²⁰Adec Esus yacno choash: —Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan —quepanëdash Uanën chomiaido Esus caic.

²¹Aden chiaquien icsambocquid bëdamequinc, mayan icsa dapuduedaid dapudue-mequinc, bëshuaid bëdamequinc caquin Esusën ismebampanëdash. ²²Aden nabanquin nainashic: —Mibi chuidequid Uan caid yacno nidshun ëmbi nabamboedtedi mimbis isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bëdanosh. Ademibidi pashun tantiabenos. Ademibidi unësaid uincuemiosh. Ademibidi aton na nibëdquido tantiamenuen Nuquin Papan chiaid Esusën chuibanos, quequin Uan chuitanta. ²³Ëmbi aden nabansho isun tantesa uainquiocquin Nuquin Papan bëdamboen isaidquido nendac, Esus quiosh quequin Uan chuitanta —quepanëdash Esus Uanën chomiaid daëd chiec.

²⁴Adashic, Uanën chomiaido nidambi iccuededquido tantiamenuec Uan chiec Esus nadpanëdash: —¿Atotsi isnuec matses nibëdacno nidonda? ¿Cunquidquidën ishcnuid isnuec nidonda? ²⁵¿Aid isnuec nidenquido yec atotsi isnuec nidonda? ¿Dashcute ushumbocquid dasiuidquid isnuec nidonda? Padenquido. Dashcute ushumbocquid dasiuidquido aton na dadpenquido icquido ancanquid dapan shubun tabadquido nec. ²⁶Ad icnu, ¿atotsi isnuec matses nibëdacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibëdacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic. ²⁷Ëbi cain naden Uan Nuquin Papan chuimiampid nec: “Mibi choec quequin chuibanquidba chomembi.

Mibi choec quequin chuibanac ambi tantiaid icsa ënshun mibi cainquidombo iquendac.” Aden ëbi cain Uan chuiquin dada uapampid nec.

²⁸“Adembi Uan chuibanu. Tantiata. Nuquin Papan chuimiaid Uampadquid matsesën tishaid utsi nibëdec. Aidën ëbi chotequid chuibanac choshon ëmbi nabansho isenquido icposh. Isash, Nëid Nuquin Papan chomiaid nec, quetsemposh Uan. Aidi quënë nauedac

ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec –quepanëdash Esus.

²⁹ Aden Esusën chuibansho tantiash: –Nuquin Papan naid bëdambo iquec –quepanëdash Uanën mentobanondaido. ³⁰ Utsiboen ambi tantiaid icsa ënenquo icquin Uan Esusën chuisho tantiash, Nuquin Papan naid bëdambo iquec, quetiapimbo aido icpanëdash. Aido padiseyobobëd matsesën naden nata quequin chiaid tantiamequido icpanëdash.

³¹ Aden Uan chiaish Esus: –¿Nuquin Papan chiaid nëbi chuisho tantiesa mitsipadquid nepeque? ³² Adquid chuinu. Tantia. Ambi tantiacpaden naisa icsho isash bacuëbo yacimboec nëishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquo iquec. Adquidën Nuquin Papan chuimaidën nabansho icsamboen ispec. ³³ Nua cubudquin pesa Uan icsho isash, Mayan icsa dapuedaid nec, queposh Uanën chuisho tantiesa. ³⁴ Ëmbi peshun acsho isec, Nua peshun tantienquiocquin acquid nepec. Aidbidi icsambocquidobëd icquid nec, ëbi caposh. ³⁵ Aden tantienquiocquid, Bëdamboen tantianu, queshun bëdamboen tantiaquidënquo chuibansho tantiash abi tantiamequidpadquid iquendac –quepanëdash Esus.

Chidon Esus tanoshcaid

³⁶ Adashic, Ëbi yacno pec cho, padiseyobo abentsëcshun cac aidbëd nidash shubun puduedash pete santen cuëshnudash Esus uepanëdash. ³⁷ Adec Esus puduedash uesho isquidon chiac utsin, Icsambocquid nec, caid chido choquin noadte bëda danoshquete aton shubumpichobi bëpanëdash. ³⁸ Aden bëequi Esus yuedacno choash puduedshun abi bëdamequid Esus istuidash, Ëbi bëdamequid bëdambo iquec, quequin ambibi tantiec shubiec Esusën taëno tsadbudshun aton bëunën tapascapanëdash. Aden tapascac taë chucusho isun aton manëdaidën tauchshun taë tachoccabanshun noadte bëdan chidon tanoshcapanëdash. Chidon aton na bedtequid dadpen menequin comapenec noadte bëda bedshun Esusën taë tanoshcapanëdash chidon.

³⁹ Chidon adosho isash Esus yuedquid, Simon caid, abibi onquec: “Ëmbi yuedaid Nuquin Papan chuimaid iquec, Ëbi mishquid icsambocquid nec,” quequin chido mishmenquo icpec, quepanëdash Simon.

⁴⁰ Adoaquien, tantiaquidquo icquin Esusën: –Mibi tantiamequin chuinu. Tantiata, Simon –capanëdash.

Adoaquien: –Aden chuiban. Tantanu –quepanëdash Simon.

⁴¹ Aden tantiashun Esusën Simon ambi tantiaid icsa tantiamenuen utsi chuiquin nadopanëdash: –Bec cho. Yueshun menenun nanuna, quepondash daëd. Abentsëcshun dadpen bedshunubi utsin daëdpactsëc bedshumpondash. ⁴² Aden bedshunshun yueshun ambi bedshunacted abi daëdi meniantiapimbo icpondash. Adsho isun: “Padi. Mimbi bedondaid ëbi cuidenda,” quequin abi bedshunëdaidën abi daëdi chuipondash. Adoacsho, ¿Mitsiquid abi bedshunëdaid ënenquiocquin tantiec bëpiscudenquo icpec? –quepanëdash Esus Simon caic.

⁴³ Adoaquien: –Ambi dadpen meneshun cuidenda caidien nechitec –quepanëdash Simon.

Aden chiaquien: –Ai, bëdamboen tantiaquin mimbi chioc –quiash ⁴⁴ Simon ismenuec Esus chido yacmi bidiadshun naden chuipanëdash: –Min shubun puduedacsho mimbi taë pante ëbi menenquiococ. ¿Nëid chido isquindactio? Aidëmbien aton bëunën taë chucu uashun aton manëdaidën con taë bëchishaid ucposh. ⁴⁵ Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquioquin yuen con taë tachoccaniosh. ⁴⁶ Bëchin manoshcanesa mibi iccoc. Padnueni nëid chidombi noadte bëdan tanoshcanyosh. ⁴⁷ Adembidi mibi chiembique. Tantiata. Mayan icsa dadpenshun tantiamiaid icsho nëid chido bëdamapombi. Aden bëdamiashic abi icsaid tantienquo yec bëpiscudpobi. Ëmbi aden nac ëbi comapenen tantiaquioquin ëbi nashunquidquo nëid chido nec. Padnuen utsi icsaid daëdpactsëc mibi icsaidtedtsëcbidi icpec. Adquid icsaid bëpiscudebi ëbi quenuc ëbi bëdiactsëc tantiatsec mibi nashumënec –quepanëdash Esus Simon caic.

⁴⁸ Aden Simon chiaishic chido caic: –Icsaquid nec, quenquiocquin icsainquo yacimboecquid mibi isembi –quepanëdash Esus chido chuioaic.

⁴⁹ Adsho tantiash: –Icsainquo yacimboecquid mibi isembi, quec ¿mitsipadquid Esus nepec? –quepanëdash iccuededquido. ⁵⁰ Aden iccuededquidon tantianubi chido caic Esus: –Ëbi tantiaquid yec Nuquin Papa yacno puduedquid mibi neyoc. Bëdamboec tabadaid tantiamiaid mibi iqueque. Dacuëdenquo yec nidta –quepanëdash chido caic.

8

Chidobo abi nashunquido

¹ Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsëqui yachimboec nidaidën tabadaid chuibenepanëdash. Abi bédamequid tsibananec chidobo nidpanëdash. ² Ambi mayan icsa dapuduemiaidobëdtan ambi bédamiaidon Esus tsibanampanëdash. Madia, Macada yacnoshon tishaid chedon Esus tsibanampanëdash. Mayan icsa 7ted dapuduemiaid Madia icpanëdash. ³ Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

Pete ëshë sequid

(*Mat 13.1-23; Mad 4.1-20*)

⁴ Aden chuibeniash tabadtuidtsëcnubi ambi chuiquin tantiaameboedo cho-choquin tsibanampanëdash. Cho-chosho isun, Mibibimboecnuc chiemi, quenquiocquin Esusën nadopanëdash: ⁵ —Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiec podqued nantan paëdacsho matsesën manenubi utsi-utsien uicchunën chec. ⁶ Utsibic, cuënote dadpen samëdacno secac badedquio dëyucuidtsash nidaid ëquëduc tapun nidenquio iquec bidiquequid. ⁷ Utsibic, nisanquid dëyucacno secac aibdëdi dëyucash canidoudtsacsho nisanquidën bëtinaç unësquid. ⁸ Utsibic, nidaid bëdan secac dëyucash caniaash dadpen ëshëendac —quepanëdash Esus.

Aden chuibanashic: —Tantiate bëdamboçquidën ëmbi chuiboed tantiapec —quepanëdash. ⁹ Adoaquien: —¿Mitsipadquid tantiaid mimbi chuiboed icpec? Èbitedi tantiaamequin chuihoa —capanëdash abëd icquidon.

¹⁰ Adoaquien: —¿Mitsipadequini Nuquin Papa yacno tabadpe? queboedëmbi nëbi mimbi tantiabeneç. Padnuen utsibon tantienquio yaid aid iquec. Aden chiaç: “Èshë bëdamboçquid icquimbi tantiesa icquin ma Nuquin Papa yacno isenquiocpanuna. Adembidi tantiate bëdamboçquid icquimbi tantiesa icquin ma abimbo chiaid tantienquiocpanuna” —quepanëdash Esus.

¹¹ Aden chiaçic: —Èmbi chuiboed nad iqueque. Tantia. Chuinu. Tiedën caniquid pete ëshë ichon siaidbimboecquid Nuquin Papan chiaid nec. Èshë siacno nidaidbimboecquid matsesën tantiate nec. ¹² Podquedën nidaid tsasimbocquidbimboecquid nad iquec. Nuquin Papan chiaid tantiaash papuuedtiapimboçsho Satansën bëpiscudmiaid adquid nec. ¹³ Cuënote dadpen samëdacno nidaidbimboecquid nadquid iquendac. Nuquin Papan chiaid tantiaash, Bëdambo iquebi, quiaçic natiamianquieç cametequid icnuc aid tantieç Nuquin Papan chiaid papuuedquidquid iquendac. ¹⁴ Nisanquid dëyucaid dadpen yacno nidaidbimboecquid nad iquec. Nuquin Papan chiaid tantiaash abi bunaid, abi nënaid, ambi natequid adquid tantiaquin Nuquin Papan chiaid bëtashacimboc icnuc bëdamboec tabadaid ismesa yampec. Aden bëdamboec tabadaid ismesa yanuc utsin Nuquin Papan chiaid tantiatiapimbo iquendac. ¹⁵ Nidaid bëdabimboecquidien nad iquec. Nuquin Papan chiaid tantiadoneç bëdamboec tabadquin utsi ismequidquio nec. Adquid natiamianquid chonoc tantesa uainquiocquin ënenquiocquin ismendac. Aden ismiac Esus tantiaquid utsi dadpen yampec —quepanëdash Esus ambi chuiboed abëd icquido tantiamenueç.

Tabote nënantan nanac chënquiacbimboecquid

(*Mad 4.21-25*)

¹⁶ Aden chuishumbic naden Esusën chuiopanëdash: —Tabote taboshon matsun bëtashesa. Adembidi tsadte tédion tabote nanesa icbo nec. Ma ëmbi yuedaidon isnueshun nënantan tabote nanquid. ¹⁷ Adomboembidi mimbi ompoquin chuibanaid Nuquin Papan ompoenquiocquin chuibanendac. Adomboembidi mimbi tantiamenquio yaid aidëmbi chuibanendac. ¹⁸ Ad icnuc ëmbi chiaid bëdamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiaçpadeç tabadquid. Adec tabadquin ompoenquiocquin utsi ismequid. Nuquin Papan chiaid tantiauidboed, Bëdamboen tantiemi, qeshun papuuedmenquiocquin bëdamboen ismesa nec. Aden ambi tantiauidaid ueasadendac —quepanëdash Esus.

Aton utsibo aton titabëd choaid

(*Mat 12.46-50; Mad 3.31-35*)

¹⁹ Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Èbi choaid chuita, cac ²⁰ shubun puduedshun: —Titabëd min utsibo choshon umanucshun mibi cainec mibëd onquete bunquin —capanëdash Esus chuiquin.

²¹ Adoquien: —Adquid chuinu. Tantia. Nuquin Papan chiaid tantiashun nabanquido ëbëd icquid nec. Adquid buchi caindambi. Adquid utsi chido chuchu caindambi. Utsibi tita caindambi —quepanëdash Esus.

*Acte tècecoasquesho ënëdmiaid
(Mat 8.23-27; Mad 4.35-41)*

²² Adashic: —Chian cuëma utsiuc nidnu. Nid —quianec abëd icquidobëd cano antsadtoanec nidpanëdash. ²³ Adec nidec cano anuequi Esus ushtopanëdash. Adec ushnbien cunquequid dapa comapenec cunqueubi acte tècecoasquequidën acte uemiac cano mentoadtsempanëdash. Adsho isash dacuëdec ²⁴ Esus ushacno nidshun tinec abëd icquido: —Nuqui mentoaddeque. Isucun, Icho —quec comapenec cuëdpanëdash abëd icquido. Adsho tantiash isucunash nidoshon: —Mibi comapenec cunqueque. Ènëd —Esusën cac cunquequid badedquio ënëdpanëdash. Adembidi: —Mibi comapenec tècecoasqueque. Ènëd —Esusën cac badedquio acte tècecoasquequid ënëdoapanëdash. ²⁵ Aden ënëdmetanec: —¿Atotsi quiash ëbi tantienguo yec dacuëdcuedede? —Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tècecoasquequid ënëd cacpadequi ënëdchitosh, quec abëd icquido abibi onquecuededpanëdash.

*Mayan icsa dapuduedaid dapuduemequin bëdamiaid
(Mat 8.28-34; Mad 5.1-20)*

²⁶ Adshumbic, acte tècecoasquec ënëdan nidaid Cadidia yacno chian cuëma utsiuc Esusbëd icquidon poteoac nidaidëmpi Cadada caid yacno aido nidpanëdash. ²⁷ Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash. ²⁸ Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Èbi mëyanenda —quec onquenubien ²⁹ mayan icsa chuiquin: —Dapuduenta —capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaid icpanëdash.

³⁰ Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoquien: —Sincó midted dapuduedondaid nebi —quepanëdash mayan icsa dapuduedaid onquec. ³¹ Aden chiasic: —Mibi bëdambocquid cadoque. Ènenquicquin mëyanacno cuidnuequin ëbitedi nidmenda —quiashic ³² chancho dadpenshun pec tabadsho isash: —Èbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.

Adoquien: —Aido dapuduedtan —Esusën cac ³³ dapuduenequi chancho mayan icsa dadpen dapuduedash acte quiusudacno chancho comapenec niqec chian pudun-pudunec mentoadbudnec nibëdquieq unësbunepanëdash.

³⁴ Adsho isash chancho pemequin isquido titinquianec shubu dadpen yacno choshon ambi isboed chuituidac ³⁵ anocquido istanu quianec Esus yacno cho-chopanëdash. Adec choshon mayan icsa dapuduemequin bëdamiaid dashcute dasiuidash bëdamboen tantiec Esusën taëno tsadsho istuidpanëdash. Adec aid onquesho isash anocquido, Uinsadpambo iquec, quiash dacuëdcuededpanëdash. ³⁶ Dacuëdsho isun mayan icsa dapuduemequin bëdamiaid isquidon ambi isboed dacuëdquido chuipanëdash. ³⁷ Aden chiac: —Nëuëshquio nidenquio icpec —quepanëdash dacuëdquido Esus chiec. Adoac Esusbëd icquido canon antabëdtopanëdash.

³⁸ Adsho isun: —Mibëd nidiadquio iquebi —quepanëdash ambi mayan icsa dapuduemequin bëdamiaid Esus chiec.

³⁹ Adoquien: —Padí. Mìn shubuno nid. Ambo tabadquin Nuquin Papan naid mayan icsa mibi dapuduedaid dapuduemiaid anocquido chuibanta —quianec Esus canon nidpanëdash. Aid nidnubien mayan icsa dapuduemequin bëdamiaid nidanec aton shubu yacno choshon anocquidtedi Esusën naid abi mayan icsa dapuduemequin bëdamiaid chuibanoapanëdash.

*Chido intac budaid bëdanaid icnuc champi uincuemiaid
(Mat 9.18-26; Mad 5.21-43)*

⁴⁰ Adashic chian potias cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. ⁴¹ Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno

uebudash: ⁴²—Con champi abentsëc tishaid unësanecquidquico iccosh. Aton seta 12ted icquid niosh. Ĕbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquico yec Esus datsidadpanëdash. ⁴³ Adnubien, chido seta 12ted matamec intac budaid chopanëdash. Aidi dauëchoquid dadpeshun bëdametiapimbo icpanëdash. ⁴⁴ Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquico bëdampanëdash.

⁴⁵ Aden mishac: —¿Tsuntsimbini mishosh? —quepanëdash Esus. Aden chuisho tantiash abi datsidash capuquido mishambo yec otacquico tabadcuededpanëdash. Adec tabadnubien: —Mates dadpeshun tsucus-tsucustsëcquicoquico mibi cuëscabededec —capanëdash Petedon.

⁴⁶ Adoacquien: —Mates abentsëcshun ëbi mishosh. Ĕmbi nadatiambocquin natequid bëuesadtsac —quepanëdash Esus.

⁴⁷ Adec Esus onquesho tantiash chido, Ambi tantiacpadomboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanuequin min dashcute cuëscatsequi bëdanabi —quepanëdash chido Esus caic.

⁴⁸ Adoacquien: —Mimbi tantiacpadquieci mibi bëdanaye. Dacuëdenquico yec bëdamboec tabadec nid, champi —capanëdash Esusën.

⁴⁹ Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantiamequid min shubuno nidnunda —capanëdash abi yacnoësh choquidon Aido chuiquin.

⁵⁰ Aden chuisho tantiash: —Dacuëdenda. Aden tantiequi nid. Mimbi tantiacpadquieci min champi bëdaneque —quepanëdash Esus Aido caic.

⁵¹ Aden chianec Aidon shubuno nidash cho-choquidotedi, Ĕbëd puduedenda, quequin chianec Petedo, Uan, Acobo aited buanec Aido cuëmëdquidën champi yacno Esus puduedpanëdash. ⁵² Ambo puduedshun anocquido unësquico yec shubisho tantiashun: —Mibi shubieque. Ĕnëdta. Champi unësenquico yec usheque —capanëdash Esusën.

⁵³ Adsho tantiashun, Champi unësascho isombi, quequin Esus tantienquicoquico shubiquidon mamënshumbedepanëdash. ⁵⁴ Mamënshumbedenubi Esusën Aido cuëmëdquidën champin mëdante mëdinquin: —Nidto, champi —comapenen cac ⁵⁵ aton tiboedte unësabi yec champi badedquico nidtopanëdash. Champi nidtosho isash: —Peme —quepanëdash Esus. ⁵⁶ Aton champi nidtosho isash: —Adopenshenda iquec —quepanëdash ani amëbëdi.

Adoacquien: —Mimbi isboed chuibanenda —quepanëdash Esus.

9

Esusën ëbi chuibeneta, quequin ambi nidmiaido

(Mat 10.5-15; 14.1-12; Mad 6.7-29)

¹ Adashic ambi ëbi chuibeneta caido 12tedtsëqui chometanquin Esusën nadopanëdash: —Ĕmbi nadatiambocquin nabanacpaden mibitedishun nabanendac. Mayan icsa dapudue-mequinc daicsaido bëdamequinc cain mibi capucueniacnoshon mimbi ismebenendac. ² Nëbi mibi nideque. Adec capucuenequin chuibenequimbi bëdamebeneta. ³ Nidquin cueste uidën nidte buanenda. Shictoadte buanenda. Petequid buanenda. Mitsana bedtequid buanenda. Dashcute utsi buanenda. Buanenquico yec dadauidquico nidtan. ⁴ Adec nidash mibi yuedquidën shubun puduedshun ëmbi chiacpadomboen nabanec anouidi tabadta. ⁵ Mibi nidacno mibi yuedquid nibëdsho isun naden nata. Mimbi tantiaid icsa mibibi cuidadte nec, quequin nidaid putu tasequequin ismeta —capanëdash Esusën abëd icquido chuiquin.

⁶ Aden chiac nidash abëd icquido abi yuedacno puduedash tabadquin Esusën chiacpadomboen Nuquin Papabëd tabadaid chuibanquimbi daicsaido bëdamebenepanëdash.

⁷ Adnubien Esusën nabansho isquidon Edodes chuibanpanëdash. Edodes Cadidia yacnocquido ancaquid icpanëdash. Aden Esusën nabanaid chuisho tantiashun, ¿Tsudain nepec? Edodesën caquien,

Acten mentoanondaid, Uan cuëmëdquid uincuenpash icnui, quenubien; ⁸ Edias Nuquin Papan ambi chiaid chuimiampid padpidec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuededpanëdash, quequin chuipanëdash Esusën nabansho isun chuiquidon Edodes tantiamequin.

⁹ Adoacquien: —Mambi uincuentiapimbocnoc Uan mapi budtemiondac. ¿Tsudain ëmbi tantiacmaidquico adobanquid icpec? —quiashic Esus iste bumpanëdash Edodes.

Mates dadpen pemiaid

(Mat 14.13-21; Mad 6.30-44; Uan 6.1-14)

¹⁰ Adashic ambi nidmeboedo Esus yacno padpidec choapanëdash. Choashumbic ambi nabamboedtedi chuibanpanëdash. Aden chuibancho tantiash Esus abëdicquido bëyucanec shubu dadpen icquid Betsaida caid anoentsëqui nidpanëdash. ¹¹ Aido nidsho isun chochoquidon tsibanampanëdash. Adsho isun Esusën Nuquin Papa yacno tabadaid chuibanquimbi daicsaido bëdamepanëdash.

¹² Adashic ushë budtsan Esusbëd icquidombo Esusën dayunquio choshon: —Nëmbo shubu nibëdeque. Shubu utsi-utsiec yacno nidshun pete bedshun pec tabadta, quequin chochoquido chuita —capanëdash Esus chuiquin.

¹³ Adoaquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidedtsëqui icsho isunda cho-choquidtedi pemenuquin ëbitedi bedtan, cai? —quecuededpanëdash abëd icquido.

¹⁴ Ambobi tabadsho chido bacuëbobëdtabi tambanenquio icquimbi dadauidquio, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac ¹⁵ ambi chiacpadomboen tabadmepanëdash. ¹⁶ Aden tabadmesho isun panëmpi Stedbëdta nuëcquid daëd sananquin abuc isec: —Mibi bëdamocquid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

¹⁷ Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

Chuiquid dapa abentsëcquiobi iquec, quiaid
(Mat 16.13-19; Mad 8.27-29)

¹⁸ Adashic, matses nibëdacno abëd icquido icnubi Nuquin Papa chiec Esus onquepanëdash. Adec onqueshumbic: —¿Tsutsi ëbi tsibanquidon ëbi capec? —capanëdash Esusën.

¹⁹ Adoaquien: —Acten mesobanondaid, Uan padoen Esus nechitec, quenubien, Edias Nuquin Papan ambi chiaid chuimepampiden Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanëdash abëd icquido.

²⁰ Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomiaidquio yec Quidistu caid ma mibi neyoc —quepanëdash.

Abi unëste chiaid
(Mat 16.20-28; Mad 8.30-9.1)

²¹ Adoaquien: —Mimbi ëbi tantiaid nëbi utsi chienda —quepanëdash Esus compapen chiec. ²² Aden compapen chiashic Esus: —Ëbi matsesaid icsho natiambocquin mëyantequid iquendabi. Ëbi chieshënquido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiamequido yec quec aitedi ëbi chieshënquido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquio nec, quequin ëbi cuesunemependac aidombi. Adoaquini daëdec ushacsho uincuen uaindac —quepanëdash Esus abi uincuen uate chiec.

²³ Aden chiashic: —Ëbi tantiaquid icnuequin ambibi tantiacpadomboen nainquicquin ëmbi chiacpadomboen nabantiadquidi nec. Ëbi mëyanacpaden mëyanuc nidësmane quenquicquin tantesa uainquicquid. Ëbi tantiaquidquio iquendac adquid. Nidaidën tabadaiduidi tantiaquid iquec Nuquin Papa yacno nidenquio iquendac. ²⁴ Cuesunenu cac unësmane quiaish Esus tantiaquid nebi queboedi Esus tantiesha nebi quequid unësash Nuquin Papa yacno tabadenquio iquendac. Utsibo, Esus tantiaquid nebi, quiaishic abi cuesunenuquid icnuc adecbidi Esus tantiaquid nebi, queoapoc. Adquid unësash Nuquin Papa yacno tabadendac. ²⁵ ¿Atotsieshun Nuquin Papa yacno tabadaid tantienquio yec nidaidën bëdamoc tabadnuequin bedted-bedtede? Mimbi bedaidënquio Nuquin Papa yacno puduedtiapimbo mibi iquec. ²⁶ Esusbëdtabi ambi chiaid tantiaquid nebi nidaidënuësh quetiapimboquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. ²⁷ Nad iquendac. Tantiaquiota. Chuinu. Ëbi tantiaquid dadpen yansho ënabicquid utsin-utsinquien isendac —quepanëdash Esus.

Esus bed-bedquesho istiapimbo yaid
(Mat 17.1-8; Mad 9.2-8)

²⁸ Aden chiashic Esus mëdante utsiuc tauadoec ushash Nuquin Papa chiec onquenuec macuësh yacno nidoapanëdash. Petedo, Uan, Acobo aitedted buanec macuësh yacno Esus

nidpanëdash. ²⁹ Adec macuësh yacno nidash Nuquin Papa chiec Esus onquenubi aton bësbed aton dashcutebëdi nac-nacquio ushë chënquiacbimboec icpanëdash. ³⁰ Adsho isnu-bien badedquio dada utsi daëd choash adquiobidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. ³¹ Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquecuedepanëdash. ³² Adnubien Esusbëd chobedo abëd icquido 3ted ushcasdash tabadtuidquin Esusbëd utsi daëd nac-nacquiocquid dasiuidacimboec bed-bedquesho isbededpanëdash. ³³ Esusbëd daëd nid-tuidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcnuc shubumpi uanuna, Icho. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo.

³⁴ Adec Petedo onquenubien abu ushun isadenquiocnoc abitedi bëtimpanëdash. Adsho isash Esusbëd chobedo dacuëdpanëdash.

³⁵ Adnubien abu ushunuësh onquec: —Nëidic ëbëd icte bunquidquio, con madombo, ëmbi bëdamboen isaidquio neque. Aidën chiaidquio tantiata —quepanëdash Nuquin Papa Esusbëd icquido tedestedshun isenquiocnobi.

³⁶ Adec onquiash ënëdami Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsiobien quiocpanëdash.

Mayan icsa dapudedaid madompi
(Mat 17.14-21; Mad 9.14-29)

³⁷ Adashic badiadash macuësh dapa yacnoësh Esus budsho isash bëquedec matses dadpen cho-chopanëdash. ³⁸⁻³⁹ Cho-choash abentsëc nadpanëdash: —Con mado abentsëc icquid mayan icsa dapudedash icsambo iccoshe. Isec chota. Aidën bedto-bedtoac badedquio sidquianesho aidëmbidi bedshun bëcundeniac con mado ëcbacushaniosh. Dapuduenquio icquin con mado aidën uimambo icmedeniosh. ⁴⁰ Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenquio iccosh —quepanëdash dada abentsëc Esus caic.

⁴¹ Adoquien ambi nianaïdo caic Esus nadpanëdash: —Nadatiambocquid Nuquin Papa nec, quequin tantiesha mibitedi neque. ¿Tedectsi icshun ëmbi chiapaden mimbi tantiabempe? ¿Mimbi tantienquiosho isash tedectsiashini chieshtope? —quetanquin: —Min mado bec cho —Esusën cac aton mado aton papan bëpanëdash. ⁴² Aden bënubi mayan icsan bëcuniac madompi uëdëquiampanëdash.

Adsho isun: —Padi. Chën —capanëdash mayan icsa chuiquin. Aden madompi bëdametanquin aton papa Esusën meneoapanëdash.

⁴³ Adsho isash: —Nuquin Papan nadatiambocquin naid uinsadpambo iquec —quecuedepanëdash isquido.

Abi unëste chuioaid
(Mat 17.22-23; Mad 9.30-32)

⁴⁴ Adoquien: —Chuinu. Bëpiscudenquiocquin tantiaquiota. Matsesacsho nëbi bedmendabi —quepanëdash Esus abi unës uate chiec.

⁴⁵ Aden chuisho abëd icquidon tantienquiocpanëdash. Aden tantienquio yec, Mimbi chiaid tantienquio iquembi, quetiapimbo yec otacquio tabadcuededpanëdash abëd icquido.

¿Tsutsi chuiquid dapa icpec? quequin chiaid
(Mat 18.1-5; Mad 9.33-37)

⁴⁶ Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onquecuedepanëdash. ¿Ëbida chuiquid dapa icpe? quec ambibi tantiequi adpanëdash.

⁴⁷ Adoquien Esus tantiaquidquio icquin bacuëmpi chomeshun aton dayunquio tabëcash: ⁴⁸ —Chuiquid dapa icnu, quesa icta. Ëbi tantiaquid icquin nëid bacuëmpi bëdamboen nashunquid iquec ëbi nashunoquid iquendac. Nuquin Papan chiapadomboen nabanquid Esus nec, quequin tantiaquidquio iquec ëbi chomiondaid, Nuquin Papa tantiaquidquio icoaindac. Nidaidënuësh utsi nashunquidquio icboedi aidquiobi Nuquin Papan chuiquid dapa icta caindac —quepanëdash Esus abëd icquido caic.

Abimbo tantiaquid ëbëd icquid nec quiaid
(Mad 9.38-40)

⁴⁹ Adashic, Uan Esusbëd icquid abentsëc nadpanëdash: —Mayan icsa dapuduemebanquid ispombi. Aidi mayan icsa dapuduemenuc nadposh: “Esus, nadatiambocquin naquidquio mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuipo? —quepanëdash Uan Esus caic.

⁵⁰ Adoquien: —Adquid, Padicnuna, cainda. Nadatiambocquin naquidquio Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

Esus bunesabo, Samadia yacnocquido

⁵¹ Adashic Esus abi abuc indote ushë chote anoentsëqui yanan, Unësmane quenquio yec nidebi, quequin ambibi tantianec Edusaden yacni Esus nidoapanëdash. ⁵² Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien ⁵³ Esus isadaidbo nec, quequin yuedenquiocpanëdash Samadia yacnocquidon.

⁵⁴ Adoquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Icho? —quepanëdash.

⁵⁵ Adoquien: —Padicnuna. ¿Matses unësmenuectabi chodio? —quianec ⁵⁶ shubu daëdpactsëc yacno nidoapanëdash abëd icquidobëd.

Esus tsibante bunquidën natequid

(Mat 8.19-22)

⁵⁷ Adec podquedën Esus nidsho abi databëdquid abentsëcshun nadopanëdash: —Mimbi chuibeniactombobi mibi tsibananec nidendabi —quepanëdash Esus databëdquid abentsëc.

⁵⁸ Adoquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

⁵⁹ Adoshombic: —Ëbi tsibanta —Esusën caquien utsi:

—Con pa unëscasho chococashun mibi tsibanec nidendabi, Icho —quepanëdash.

⁶⁰ Adoquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

⁶¹ Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icho —caquien:

⁶² —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

10

Abi bëyucanec nidquid 72ted icquido

(Mat 11.20-27; 13.16-17)

¹ Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. ² Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpactsëc iqueque. Naden Nuquin Papa chui: Icombobi, mibi cadoque. Mibi tantiamenuen chuibanquid dadpen nidmeta, Papa, quequin chui. ³ Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iguendac. ⁴ Ëbi chuibenec nidanequin mitsana buanenda. Mitsana bedtequidbëda shictoade buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta. ⁵ Shubun puduedshun naden shubu icho chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna. ⁶ Aden chiac shubu icho bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icho ëbi chieshënquid ictsias. Adquid yec mimbi chiaid tantianu quesa aid shubu icho icpec. Adquid icsho Nuquin Papan abi bëdamboec tabadte aid shubun icquido menenquio iguendac. ⁷ Mibi yuedacnouidsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

⁸ “Shubu dadpen yacno mibi choacsho yuedshun pete meniac isuidec, Utsitsen bec cho, quenda. ⁹ Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita. ¹⁰ Shubu dadpen yacno choshon mibi yuedquid nibëdsho isun aton podquedën nidquin naden chuita: ¹¹ Nuquin Papan chomiaid mibi chuinuec chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi chomiaidën mibitedi yuedtiapimbo iguendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmetequid 72ted icquido chuiquin. ¹² Aden chiashic aido chiec abi Esus onquec: —Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Ëbi

choabicnuc Sodoma yacnoquido icpampic. Ëbi choabicnuc aidon ëbi tantiatipimbo icpampic. Adquido Nuquin Papan bëdiactšëc cuidendac –quepanëdash Esus.

¹³ Aden ambi nidmetequid 72ted icquido chuibanshumbic utsibo isacimboben Esusën nadopanëdash: –Nëbi icquido, shubu dadpen icquid tantiec unësquioquin mibi chiem-bique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquo mimbi iccuededpec. Adembidi nadatiambocquin nabansho isted-istedboedi Betsaida yacnoquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, qeshun unësquiocnoc shubiquin abi icsaid ëntsempampic. ¹⁴ Aden Tido yacnoquidobëdan Sidon yacnoquidon tantiahsun abi icsaid ëntsempampic. Adquido Nuquin Papan bëdiactšëc cuidendac. Isadaidbo Codasin yacnoquidobëd Betsaida yacnoquido ëbi isquido mib-itedi nec. Ëbi tantiesa icsho Nuquin Papan mibi comapenen cuidendac. ¹⁵ Adecbidi, nëbi icquido, Capednaun yacnoquido mibi unësash ¿Nuquin Papa yacnoda mibi nidpe? Padenquo. Ëmbi nadatiambocquin nabansho isun tantiesa yec chian anëdënquiacno mibi nidendac –quepanëdash Esus abi tantiesabo chiacimboc onquec.

¹⁶ Aden chiashic, ambi nidmenu caido 72ted icquido tantiamenuen chuibudec: –Mibitedishun ëbi chiac ëbi tantiaquido utsibo iquendac. Adquiobidi mimbi ëbi chiac ëbi tantiesabo icoaindac. Adomboembidi ëbi chuibansho tantienquo yash ëbi chomiondaid tantiesambo nendac –quepanëdash Esus. Aden chiac ambi nidmenu caido nidaneapanëdash.

¹⁷ Adec nidanequin Esusën chiacpaden nabeniashic, Bëdambo iquebi, quecuededec Esus yacno cho-choapanëdash. Adec cho-choash: –Mimbi chiacpaden nabanombi. Aden nabanquimbic, Esusën nadatiambocquin naidënquo dapuduenta ëmbi caidtedi mayan icsa dapuduempoh, Icbo –quecuededpanëdash ambi nidmiaido 72ted icquido ambi nabod Esus chuibanec.

¹⁸ Adoaquien: –Ëmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacacimbocnuc bedquetanacimboc Satanab abucüësh badedquo paëdsho isec niobi. ¹⁹ Ëmbi nadatiambocquin nabanacpadquid mibitedi icmabanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquidimboc mibi chieshënquid icsho ëmbi chiacpadombon nabanac mibi icsa uatiapimbo iquendac. ²⁰ Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuequin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta –capanëdash Esusën ambi nidmiaido chuiquin.

²¹ Aden chuibanshumbic ambi nidmiaidon chiaid tantiahs, Bëdambo iquebi, quequin Nuquin Papa Esusën nadopanëdash: –Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadombon nadatiambocquin aidon nabededosh. Aden nabededshun chuisho tantiahs bëdambo iquebi. Dadpen tantiaquido mimbi nadatiambocquin naid tantiamenquiocquimbi, ëmbi namiaido, daëdpackšëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa –quepanëdash Esus Nuquin Papa chiec.

²² Aden Nuquin Papa chiec onquequin nainec: –Con pa abia yampid icquin abitedi tantiaquidquio nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquio con pa nec. Adecbidi abëd abia yampid icquin con pa bëdamboen tantiaquidquio nebi. Adquid icquin, Con pa nad iquec, quequin ëbi tantiaquido tantiamendambi –quepanëdash Esus abi tantiec choash iccuededquido caic.

²³ Aden iccuededquido chuibanshumbic naden ambi 72ted icquido nidmian chobodouidsëqui Esusën chuioapanëdash: –Ëbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec. ²⁴ Nuquin Papan chiaid chiampidobëd ancanquid iccampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon ëbi istiapimbo icoapampic –quepanëdash Esus.

Utsi tantiaquin bëdamboen naquidquio

²⁵ Adashic, ¿Tantiaquidquioda Esus neque? Tantiabono, abibi quequin dada utsin: –¿Nuquin Papa yacno tabadnuen atotsimbi napeba? chuibanquin tantiamequidën ëbi chui –capanëdash.

²⁶ Adoquien: —Ambi Nuquin Papan naden nata quequin chiaid Moises dada uami-ampid ¿mitsipaden chuipec? ¿Aid isquin atotsi mimbi tantiape? —quepanëdash Esus abi chuimequid caic.

²⁷ Adoquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bëdambo icmequin naban. Ëbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

²⁸ Adoquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

²⁹ Aden Esusën chiac ëbi otacquio icsho isash Nuquin Papan chiacpadpenquiocquid nepec, quequin iccuededquid utsibon ëbi chuitsiash quequin tantiaquin Esusën chuimeboed: —¿Mitsicquid con utsi nepec? —quepanëdash.

³⁰ Adoquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestanquin niamposh. ³¹ Adoambi, cuestanquin nianaid uacno podquedën choquin isadaidbo tsusion, Con matses nenushe. Isnu, quenquiocquin uano datamposh. ³² Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembidi uano datanoaposh. ³³ Utsibic, Samadia yacnoësh choquid aid podquedëmbi choquin cuestanquin nianaid istuidash unësquiocquin ³⁴ aton dayun tsadbudshun cuestanquin nianaidën chiuëtedi aton dauëmbi bënoshcashun bëtaneshumposh. Aden bëtaneshunshun cuestanquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh. ³⁵ Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestanquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanëdash Esus. ³⁶ Aden chuishumbic: —Ëmbi chuiboed utsi-utsiec icposh. ¿Mitsicquid ampequidon cuestanquin nianaidën utsibimboecquid icposh? —capanëdash Esusën.

³⁷ Adoquien: —Ampequidon cuestanquin nianaid istuidash unësqüio yanquin abi nashumboedien con utsi nec, capendac —quepanëdash Esus chuimequid.

Adoquien: —Adembidi mimbembi ëmbi chuiboedbimboecnuc utsibo tantiaquin nashunoata —quepanëdash Esus.

Madtan nabanubi Madian tantiaid

³⁸ Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash. ³⁹ Adoac ambo puduedash tsadquin Esusën chuibansho Madian Madtan chibinquo datsadbudshun tantianpanëdash. ⁴⁰ Adec tsadquin Madian tantianubi Madtan ambi natiadquio yaidtedi tantiaquin nabampanëdash. Aden nabanequi Esus yacno choshon: —¿Con chibin ëbëdtambi nainquiocsho isenquioda mimbi ique? Min utsibëdtan nabanta, cata, Icbo —capanëdash Madtan Esus chuiquin.

⁴¹ Adoquien: —Mimbi natiadquio yaid dadpen tantiaquidquio mibi iqueque. ⁴² Ëbi tantiaquidquio icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

11

Nuquin Papa chiec onquianete (Mat 6.9-15; 7.7-11)

¹ Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: —Nuquin Papa chiec onquianeta quequin Uan padon abëd icquido tantiamapanëdash. Adembidi Nuquin Papa chiec onqueta quequin ëbitedi tantiamequin chuioa, Icbo —capanëdash.

² Adoquien: —Nuquin Papabëd onquequin naden chuuta:

“Bëdamboquidquio mibi nec, Papa.

Adquid mibi icsho matsestedishun mibi con icbo capashun, Papa.

Mibi yacnoshon mimbi uaido mayan bëdabon bëdabon mimbi chiacpadomboenuidi naic.

Adomboembidi matses abitedishunquoio napashun, Papa.

³Tantiaquidquoio, mibi cadoque. Bumianenquiocquin badiadquidën-badiadquidënquien con pete ëbi bedmedene, Papa.

⁴Adecbidi utsin ëbi chieshënsho cuidenquoio yec ëbi abi icsaid bëpiscudacpadquiequi ëbi icsasho cuidenquoio yec bëpiscudoata, Papa.

Adembidi, Satanasën icsa uanushe qeshun ëbi cudasquin dayun uata, Papa, quequin chuita”

—quepanëdash Esus.

⁵Adtaneguic Esus nadpanëdash: —Mibëd nashunanquid iquec. ¿Adquid icnuda inchëshpotsembo abi yacno nidshun pete mimbi bedshumpatsia? ⁶Inchëshpotsembo pete bedshunuec mibëd nashunanquid yacno nidash: “Ëbi yacno utsi chosho pete nibëdnubi yuedombi. Con pete nibëdsho isash pemenun bedec chobi. Mimbi meniaid cuidquin adquidi mibi meneaomibi,” quepatsiac mibi mibëd nashunanquid caic.

⁷“Adoaquien, nuntanüeshi: ‘Padi. Shëcnandombi. Con bacuë ishcnec din ictoshon mibi menetiapimbo iquebi,’ quequin mibëd nashunanquidën mibi chuitsias.

⁸“Aden aidën chiaqui min pete nibëdnuc chuidonetsiac mimbi. Aden chuidoniac mibi menetsias. ¿Abëd nashunanquid icshoda mibi menepadic? Padenquoio. Mimbi nidenquiocquin chuidonesho tantiashun mimbi chuiboedtedi mibi menepatsias — quepanëdash Esus.

⁹⁻¹⁰Aden chiec abi onquec: —Adomboembidi Nuquin Papa chuidonesho mimbi bedtiadquoio yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

¹¹“Adembidi chuinu. Tantia. ¿Min mado, Nuëcquid bec cho, qeshoda mimbi nisimbo menedi? ¹²Adembidi, ¿Cachinan bacuë bec cho, qeshoda mimbi chichun menedi?

¹³Padenquoio. ¿Aden icsaquid icquin min bacuë tantiaquin bëdamboen menequid mibi icnu Nuquin Papa icsaisa icquin mibi, Min Mayan ëbi mene, qesho tantiashun menenquioda mibi ictic? —quepanëdash Esus.

Bedtsibun namiaid Esus nec, quequin chiaid
(Mat 12.22-30; Mad 3.19-27)

¹⁴Adashic, mayan icsa dapudedquin eme uaid icsho Esusën istanquin: —Dapuduen —cac mayan icsa dapuduempanëdash. Adec dapuduenan ambi eme uaid onquepanëdash. Adsho isash tantiadempambo yec iccuededquid dadpen tabadcuededpanëdash.

¹⁵Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnuí —quepanëdash Esus chieshënquido.

¹⁶Adnubiën iccuededquid utsibo: —Nuquin Papan chomiaidquoio icquin Nuquin Papa mimbi chiac aidëmbi abucshun naquin ëbi isambo yaid nadatiambocquin ismepatsias. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuedquid utsibo Esus caic.

¹⁷Aden chuisho tantiash tantiaquidquoio yec abi icsamboen chuimenuquido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. ¹⁸Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadic? Adembidi, ¿ambi mayan icsa dapuduemiac abëd icquido nibëdenquioda ictic? ¹⁹Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquoio mibi icpe? ²⁰¿Nuquin Papan tantiamiac mayan icsa dapuduemequid ëbi yec ambi chomiaidquoio matses chuiquid dapa mibi yacno ënden choabida ictio? —quepanëdash Esus abi chuimequid chiec.

²¹Aden chiashic abi onquec: —Mibitedi tantiamenuen utsi chuinu. Bëdamboen tantiaata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. ²²Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

²³Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu quesa cuëshëdmianquid nec —quepanëdash Esus.

Abibi dapuduemoed mayan icsa dapuduedoaid
(Mat 12.43-45)

²⁴ Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibêdacno nidash capuquin abi dapuduedbocpadquid istuidenquo icposh. Adquid istuidambo yec, Abibidi dapuduedoanu, quianec anobidi nidoaposh. ²⁵ Adec nidshun abi dapuduemboed naden istuidposh. Mayan icsa nidan, Êbibi bêdambo iquec. Adash bêdambo tabadnu, abibi quiaishic, Nuquin Papa tantianu, quenquiocposh. Aden chienquiocsh aton Mayan Nuquin Papan aid metiapiambo icnuc abi dapuduemboed choshon aid abentsêcquoio ²⁶ istuidashic nidoashun abipadquid chuituidac utsi 7ted abêdi choash abitedi dapuduedcuededac dada icsamboshê yamposh —quepanêdash Esus.

²⁷ Aden Esusên chiambien iccuededquid chido: —Mibi tishacsho shuma chishmiondaid Nuquin Papan bêdamboen isaid icpec —quepanêdash Esus caic.

²⁸ Adoquien: —Aden nasho padenquoio. Nuquin Papan chiaid tantiashun nabansho Nuquin Papan bêdamboen isaidquoio nec —quepanêdash Esus chido caic.

Onasën ismiampicpaden ismiaid

(Mat 12.38-42; Mad 8.12)

²⁹ Adnubien abi yacno cho-choash utsi dadpen iccuededsho isun Esusên nadopanêdash: —Nêbi nidaidên tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquoio iquendac. Nuquin Papan Onas ismiampicpaden ismiaid mimbi isendac. ³⁰ Ninibe yacno nidshun ambocquido icsaid cuidte Nuquin Papan chuimiapaden Onasên comapenen chuisho tantiash, Abimbo chuiquid nec, qeshun abi icsaid Ninibe yacnocquidon êmbededpampic. ³¹ Utsibic, Nuquin Papan dadpen tantiamiaid, Sadomon iquec qesho tantiash chuiquid dapa chido Sadomonên chiaid tantianuec ênapenuêsh choshon tantiash, Abimbo iquec, quepampic. Nuquin Papan matsesên naid icsa ambi naid bêdabêdta chuibante ushê chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bêdamboen tantiaquin chuiquid dapa Sadomon icmepampic. Abitedi tantiampidquoio nêmbobi iqueque. Êmbi chiaid tantiata. ³² Ademibidi, matses icsaidbêdta ambi bêdamboen naid Nuquin Papan chuibante ushê chonoc Ninibe yacnocquidon Onasên chiaid tantiacpadomboen Nuquin Papan chiaid abimbo iquec, quequin tantienquoio icsho Nuquin Papan mibitedi isendac. Nuquin Papan chuimiapaden Onasên chuisho Ninibe yacnocquidon tantiabededpampic. Onas Nuquin Papan matses icsaid cuidte chuimiadquoio icpampic. Padnuen mibi icsaid bedshunash abided cuidadtequid nêmbobi iqueque. Êmbi chiaid tantiata —quepanêdash Esus abibi chidequid.

Tabote taboshon bêtashenquoio yacimboc abi bêdamboec tabadaid ismequid

(Mat 5.15; 6.22-23)

³³ Aden chuishumbic Esusên abi chuibanec: —Tabote taboshon ompoesa. Ademibidi matsun bêtashesambo icbo nec. Ma êmbi yuedaidon isnueshun tabote nênantan nanquid. ³⁴ Adoaidbimboec min tantiate iquec. Min tantiate bêdamboecquid icquin bêdamboec tabadquin ismequid mibi nendac. Bêtashacimboc min tantiate icnuc icsamboen ismequid mibi nendac. ³⁵ Con icbo êbi bednuec choec qeshun bêpiscudenquoioquin isted-istedta. ³⁶ Min tantiate icsaisa icsho Nuquin Papan chiacpadomboen tantiaquidquoio aidi nec, quequin utsibon mibi isendac —quepanêdash Esus.

Nuquin Papan icsamboen isaidquoio

(Mat 23.1-26; Mad 12.28-40; Duc 20.45-47)

³⁷ Aden Esusên chuibanshobien padiseyobo abentsêcshun: —¿Ada êbi yacno pec nidtsia? —capanêdash. Adoac aidbêdi nidash pete sanaid cueste dayunquoio Esus tsadbudpanêdash. ³⁸ Adec Esus tsadsho isash, ¿Adpecshenda iquec. Penush mêpamêdenquoio Esus icpec? quec abibi onquequin padiseyobon Esus yuedquidêmbi tantiapapanêdash.

³⁹ Adoquien, tantiaquidquoio iquec Esus nadpanêdash: —Êndenquimbo padiseyobon peshun acnun dêshote cachocbêdtabi pada-padaid cachoc bêdamboen dapanta quequin chuinëdacpaden mimbi naoaic. Aden dapanshun mimbi codocaidbêdtabi mimbi actequid nitsinaid anauc ampanenquoio mimbi icpec. Mibitedi adquoio iquec. Nesquin bêchish iquec dapanudquin mimbi tantiaid icsa ênenquoio mimbi icpec. Adecbidi, mibi bunaid bednuen icsamboen naquin ampequid mibi nec. ⁴⁰ Nuquin Papan chiaid tantiesabimboecquid mibitedi nec. Nuquin Papan matses uaquin dadabêdtabi tantiate uainquioda icpampic. ⁴¹ Ai. Adquid icnuc aton na nibêdquid tantiaquin mimbi pada-padaidên nitsinaidpadquid menebanta. Aden mimbi nadenesho isun Nuquin Papan min tantiatebêdta min dada bêdamboen isendac —quepanêdash Esus.

⁴² Aden chiashic padiseyobo caic Esus nadpanêdash: —Uno bedanquin dies yacno ênquin min tiedên caniquid êshê tambanshun, Nuquin Papan chiacpaden con na 9ted

icnubi abentsëc Nuquin Papan na nec, quequin aid abentsëc menuequin mimbi dayun uaic penquiocquin. Aden nabanquin Nuquin Papan ambi matses bédamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsëc menebanshun utsibo bédamboen tantiaquin nabantiadquidi mibi neyoc. Adesa icsho Nuquin Papan icsamboen isaidquo mibi nec, padiseyobo.⁴³ Adembidi, tsusio dapabimboesh bédamboen ispashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsadtene. Adomboembidi tantiec matses iccuededacno nidequi, Èbi bèquedquidon èbi tsusio dapabimboesho isash onquequin chuiplashuni quec mibi capuec. Aden tantiaquid Nuquin Papan icsamboen isaidquo mibi nec.⁴⁴ Adembidi, matses unësaid chococate manenushe queshun ismequin mabiunu, quenquo yacpadomboen èbi icsaid tantianushe quequin ompoquid mibi nec — quepanëdash Esus padiseyobo chiec.

⁴⁵ Adoquien, Nuquin Papan naden nata quequin chiaid tantiembi, quiaish utsibo tantimequid abentsëc: —Padiseyobo chuiquin èbipadquido mimbi chuiuopec —quepanëdash.

⁴⁶ Adoquien: —Nuquin Papan èndenquimbo naden nata quequin chiaidbëdta mimbi naden nata quequin chiaid dadpen chuibanquin matses mimbi namec. Adoac aitted matsesën natiapimbo icpec. Dadsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

⁴⁷ “Adembidi, Nuquin Papan chuimiaid dadpen min tsusedpabon cuesunepampic. Tsusedpabon cuesuniampido ènenquiocquin tantianu quiacimboen mimbi shubumpi uabanec. Èmbi shubumpi uaido isun utsibon bédamboen ispashuni, quequin aden mimbi nabanec.⁴⁸ Aden naquin tantiec, Nuquin Papan chuimiaido cuesunequin bédamboen tsusedpabon napampic, quiacimboen tantiaquid mibi icnuc ambi chuimiampido cuesuniampidobimboesho Nuquin Papan mibi isec. Nuquin Papan icsamboen isaidquo mibi nec.⁴⁹ Èmbi chiacpaden chuibanta, cabicquin naden Nuquin Papan chuiampic. Èmbi chuimiaid utsi-utsien aton matsesën mëyampec. Utsi-utsien mëyanshun cuesuneppec, quec Nuquin Papan abitedi tantiaquidquo adpampic.⁵⁰ Aden min tsusedpabo Nuquin Papan chuimiaidon chuisho tantiesa icquin aido mëyampampic. Min tsusedpabopadquid nèbi icquido icquin Nuquin Papan chuimiaid tantiesambo mibi nec. Adquido iquec ènden mëyanampidpadquido mibi neoaic. Aido cuesuniampidpadquido mibi neoaic.⁵¹ Tsusedpaban abia abed cuesunepampid icnubi ambi tsyuec Sacadias cuesunepampic. Aid Nuquin Papan tabadte shubu uashunaid dayunquobi aidon cuesunepampic. Ai, Nuquin Papan chiaid tantiesatedi ambi chuimiaido cuesuniampidpadquido nèbi icquid neoaic.

⁵² “Nuquin Papan naden nata quequin chiaid tantiembi, queshun utsibo tantiamenquicsho Nuquin Papan icsamboen isaïdo mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic — quepanëdash Esus Nuquin Papan naden nata quequin chiaiduidi tantiaquid chiec.

⁵³ Aden chiashic, Èbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënquidombo padiseyobo: —Esus icsamboen chuimenu —quiampanëdash.⁵⁴ Adquid icquin Esusën chuibanacno nidanshun chuimeoanuequin naden padiseyobon tantiapnanëdash: Èbitedishun chuimiac Nuquin Papan chiaid icsamboen Esusën chuitsiash. Aden icsamboen chuisho tantias, Nuquin Papan chomiaid nec, quec mibi muasho tantias, Unësh uametiadquo iquebi, quequin Esus chiembi, quequin tantiaquin Esus chuimepanëdash padiseyobon.

12

Natiamiantequidbëdtabi dayacmetequid
(Mat 10.28-31)

¹ Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucus-tsucustsëcquo yec tabadpanëdash. Aido tsucus-tsucustsëcquo yec tabadnubien abëd icquido Esusën nadopanëdash: —Sicaïd nami uaid cabiunac amëec bidisquedoec matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuioaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bédamboen ista.² Matsesën ompoquin naid Nuquin Papan abitedi ismendac. Matsesën ompoquin chienquo yaïdbidi abitedi tantiamendac.³ Inchëshën min nuntanuësh mibi icsamboec onquiaid Nuquin Papan matsestedi tantiamequin chuibanendac. Nuntanuësh shoshquequin mimbi chiaïd Nuquin Papan matsestedi tantiamenuen chuioaindac.

⁴ “Adembidi chuinu. Tantiata. Mibi cuesunenuequid dacuëdënenda. Adquidën mibi cuesunequin mibi nibëdametiapimbo iquendac. ⁵ Nuquin Papauidtsëqui dacuëdënta. Icsadnednequid icsho aidën mibi cuesunemeshun chian anëdënnequid nësecaindac. Adoanquiduidtsëqui dacuëdënta. ⁶ Nuquin Papa tantiaguid yec dacuëdënta. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaguinda Nuquin Papan mibi tantienquid ictic? ⁷ Ai, mibi tantiagüec. Min manëdaidtedi ambi tambanaid nec. Aid pistsëcquidtedi tantiaguin Nuquin Papan mibi tantienquioda ictic? Mibi comapenen tantiec.

Esus tantiaguid nebi, quequin utsibon tantianubi chiaid
(Mat 10.32-33; 12.32; 10.19-20)

⁸ “Abi chiembique. Tantiagüota. Utsibo icnubi Esus tantiaguid nebi, quequin abimbo chuiquid Nuquin Papa yacno chosho isun, Nëid ëbi tantiaguid neque. Puduedme, quequin chiendambi. ⁹ Adecbidi, utsibo icnubi, Esus tantiaguid nebi, quetiapimbocquid Nuquin Papa yacno chosho isun, Nëid ëbi tantiesha neque. Puduedmenda, quequin Nuquin Papan uaido mayan bëdabo chiendambi. ¹⁰ Èbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Èmbi mibi icsamboen chienquio yacimboec bëpiscudta, Papa, qesho tantiash aidën icsamboen chienquio yacimboec Nuquin Papa bëpiscudendac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bëpiscudenquiocquin Nuquin Papan abi yacno adquid yuedenquio iquendac.

¹¹ “Adembidi chuinu. Tantiagüota. Mibi chieshënquido iquendac. Adquid icquin chuiquid dapa yacno Esus tantiagüido ëmbi buanacsho aidën mëyantsiash, quequin mibi bedshun aid yacno buamepec. Aden nanu, quequin buanaqui ¿Atotsimbi chuiquid dapa chuipe? quequin tantienda. ¹² Nuquin Papan Mayanën mimbi chuibante mibi tantiameque – quepanëdash Esus abëd icquido caic.

Aton na dadpen icquidën tantiaguid icsa

¹³ Adashic, abi datsidadquid abentsëcshun: —Con pa unësan con pan na dadpen con buchün bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

¹⁴ Adoquien: —¿Buchibëdta mibi chuiquidtabi nepe? —quepanëdash Esus abi chuita caquid caic. ¹⁵ Aden aid chuishumbic utsibo chuiquin nadopanëdash: —Con na dadpen bednu, quesa icta. Mimbi bedaidënquio mibi Nuquin Papa yacno puduedtiapimbo iquendac.

¹⁶ “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuëash dadpen icsho isash icbo nadposh: ¹⁷ “Con tiedën caniquid bacuëd dadpen iqueque. ¿Atontsimbimbi aidtedi dayun uapeba? ¹⁸ Naden naimbi. Tiedën caniquid ëshë dayun uate shubu shënitedi chichanshun aidtedi nuamboshëcñuc shubu uabanuna. Aden nuamboshëcñuc shubu uashun aidënquio con tiedën caniquid bacuëtedi sandoshon dayun uanuna. ¹⁹ Aden dayun uashumbic nadopembi: Con na dadpen iquec yuecash naimëdenquio iquec. Ad icnuc nainquio yec tabadquin peshun aquendambi. Aden naic, Bëdambo iquebi, quec aton na dadpen icquid abibi onqueposh.

²⁰ “Adec abibi onquesho tantiashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuipeposh —quepanëdash Esus.

²¹ Aden chiashic: —Aton na dadpenuidi tantiaguin Nuquin Papan chiacpaden naisa yec aton na nianec unëssh Nuquin Papa yacno tabadtiapimbo iquec —quepanëdash Esus.

¿Atotsimbi napeba? quesa icta, quequin chiaid
(Mat 6.25-34)

²² Aden icquededquido chuishumbic Esusën abëd icquido nadopanëdash: —Aton na dadpen icquidën tantiapaden tantienda. ¿Con na nibëdnuc atotsimbi pepeba? quec dacuëdënta. Adecbidi, ¿Atotsimbi dasiuidpeba? quec dacuëdënta. ²³ Bëdamboec tabadnequin mibi piasteuudi tantienda. Adembidi, Con dada bëdambo icmenuequin, Dashcute bedteuudi tantienda. ²⁴ ¿Uicchunënda ambibi cuëte ëshë siac bacuëacsho chepadic? Padenquio. Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papapadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan? ²⁵ Adecbidi, ¿mibi unëste ushë abimbo chonoc, Padi, quepecta mibi icti? Padenquio. ²⁶ Adec mibi unëste chonoc, Padi, quetiapimbo mibi iquec ¿atotsi quiaish ¿atotsimbi pepeba? quepe mibi?

²⁷ “Adembidi, cuètempi chuinu. Tantia. ¿Cuètempinda aton bacuè ictequid daèdcapec? Padenquio. Adoenquio yaid aton bacuè ictequid bédaidquio iquec. Cuètempi bacuè ictequid bédaidquio yacpadquid chuiquid dapa Sadomonën dashcute adquio ictiapimbo icpampic. ²⁸ Padnuen cuète bacuè ictequid bédaidquio ichoedi badedquio sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidè bedmenquioda icpadic? Èbi bedmenquio ictsiash quequin Nuquin Papa bédiaetsèc tantienda. ²⁹ Aden tantienquio yec ¿Atotsimbi peshun aque? quec dacuèdenda. ³⁰ Nuquin Papa tantiesan abi bunaiduidi tantianubi Nuquin Papa tantiaquidquio icquin pete actequidbèda èbi bedmedonec, quequin tantiec tabadta. ³¹ Adembidi, Nuquin Papabèd tabadnu quequin tantiec tabadta. Aden tantiaquin mimbi bedtiadquio yaid mimbi bedendac.

Abi yacno choacsho meniaid
(Mat 6.19-21)

³² “Nuquin Papan abi yacno mibi chomeque. Dacuèdenda, èbi tantiaquido caimbi. ³³ Ambo nidabi icquin mitsana menebanquin mitsana bedtequid bedshun aton na nibèdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidën bedtemaidquio iquendac. Capishton petemaidquio aid iquendac. ³⁴ Mimbi tantiaidquio mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bédamboec tabadte cudasquin mimbi dayun uaid iquendac —quepanèdash Esus.

Chieshenquiocquin caintequid
(Mat 24.45-51)

³⁵⁻³⁶ Aden chuishumbic Esusën nadopanèdash: —Aton icho u isec nidan con icho chonoshe quiash dasiuidacchobi ushenquiocquin tabote dèbedtonequin, Con icho chosho puduedmeshun nashunu, quequin aton yuabon caimpec. ³⁷ Aden abi cainquido aton ichon bédambo icmequin nadopec: “Èmbimbo mibi pemenu. Nëmbo tabadec cho,” qeshun ambi yuaido ichonquio nemequin bédambo icmendac. ³⁸ Adembidi, icho inchèshpotsembro choshon abi nashunuequin cainquido icsho ichon bédambo icmiaido iquendac. Adembidi, cachina cuèdanabi badiadabicnuc choshon abi cainquido ichon bédambo icmiaido iquendac. ³⁹ Adquidpenquio icho utsi chuinu. Tantia. Aidi abi cainquid nibèdnubi aton na icnuc isedtanec choshon isac ampequid ènden nidac. Adsho isash, Ampequid choec, quequin tantiaquid yec nidenquio ictsenobi, quependac icho. ⁴⁰ Adquiecbidi ampequid choachimboec Nuquin Icho choeque. Ad icnuc, Chosho èmbibi tantienquiocchitomane qeshun chieshenquiocquin èbi cainta —capanèdash Esusën.

⁴¹ Aden Esusën chuisho tantiahi Petedo: —¿Utsi chuiquin mibèd icquidouidi tantiamenuenda chio? ¿Abitedi tantiamenuenda chio? Tantienu. Èbi chui —quepanèdash Esus caic.

⁴² Adoquien: —¿Icbon chiac mitsipadquiocquin ambi namiaido bédamboen napeba? Adquid chuinu: Pete tambanshun mususchun èmbi namiaid utsidedi bédamboen menebanta, quequin ambi namiaid utsi abentsèc chianec icho nidac. ⁴³ Adec nidashic choshon ambi chiacpaden ambi namiaidën chieshenquiocquin nabanacsho isun ichon bédambo icmiaid nendac. Adquid naden chuipec: Èbi nidan chieshenquiocquin mimbi nabanoque. ⁴⁴ Èmbi namiaid utsibotedi èbipadquiocquin chuiquid icta. Adquid icquin con natedi dayun uata, quequin chiendac ichon. ⁴⁵ Adquid icnubi adomboen naisa icho utsin namiaid icpec. Aton icho yuec choenquiocsho isun aton ichon namiaid utsibo chieshènquin cuesbanshun ambentsèqui nua peshun tantienquio yanquin aquec. ⁴⁶ Aden nabanquin tantienquiocnoc aton icho choshon ambi namiaidën icsamboen cuesbanaido isun ichon compapen cuesquin abi tantiesu utsibo ambi nidmiacnombo aidi nidmeoaindac.

⁴⁷ “Adembidi, ambi chiacpaden nabanesa icho isun, Comapen cuesta, ichon cac cusesendac. ⁴⁸ Aton icho bunaid tantiabicquidën cuesmetiadquiocquin nabansho aton ichon bédiaetsèc cuesmendac. Adembidi, Nuquin Papan dadpen tantiamiaido ambi chiacpaden nashuntiadquio iquendac. Adembidi, ichon dadpen meniaidon dadpen meneoatiadquid nendac —quepanèdash Esus.

Utsibèd bédamboec tabadnu quesa icquin cuèshèdmequid
(Mat 10.34-36)

⁴⁹ Aden chiashic abi onquec: —Èbi tantiaquid icnuc èbi tantiesu yec cuèshèdendac. Aido ènden cuèshèdondan èbi tantiaquidombo bédamboec tabadtsiandac, quec tsadebi. ⁵⁰ Adecbidi, Yuecshun èbi unès uanun mèyantequid iquendac, quequin tantiec, Ènden mèyanondaid iquec abuc Nuquin Papabèd tabadtsiandabi, quec tsadebi. ⁵¹ ¿Nidaidènsun abitedi bédamboen tabadmenu quetabi chodionda? Padenquio. Èmbi chiaid tantiesu èbi

tantiaquidbëd icboedi cuëshëdtsiash quianec chopondabi. ⁵² Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquio yec cuëshëdec adquid. ⁵³ Nadec cuëshëdtsiash: aton papa ëbi tantiaquid icnuc con papadquid icnu quesa aton mado cuëshëndendac. Shubu utsin aton mado ëbi tantiaquid icnuc aton papa adquid icnu quenquio yec cuëshëndendac. Adecbidi aton tita ëbi tantiaquid icnuc con tapadquid icnu quenquio yec aton champi cuëshëndendac. Shubu utsin, aton champi ëbi tantiaquid icnuc aton tita padenquio yec cuëshëndendac. Shubu utsin aton chaya ëbi tantiaquid icnuc aton babanën padenquio yec cuëshëndendac. Shubu utsin, aton babanën ëbi tantiaquid icnuc aton chaya padenquio yec cuëshëndendac —quepanëdash Esus. Abi tantiesha cuëshëdtequid chuibanec.

Nuquin Papan ismiantie isun nad iquendac, quequin tantiaid
(Mat 16.1-4; Mad 8.11-13)

⁵⁴ Aden abëd icquidombo chuishumbic Esusën naden iccuededquido chuioapanëdash: —Inchësh chosho isec, Ue choec, quiacpadec choec. ⁵⁵ Adecbidi, ushë chënquec chosho isash, Chumbo yamec quiacpadec iquec. ⁵⁶ Aden isquin mimbi ëmbi nidaidëshun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquio icquin çatotsieshun abucshun Nuquin Papan chomiaid isumbi tantienquiocquin mibi icsaid ënenquio ique? —quepanëdash Esus iccuededquido caic.

Utsibëd chushcananquid
(Mat 5.25-26)

⁵⁷ Aden chashic: —Utsibëd chushcananquido mibi nec. Adec tabadec çatotsi quiaish, Naden natiadquidi nebi, quequin tantiasahun mibi icsaid ënenquio ique? ⁵⁸ Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bédamenuen, Mimbi chiacpadomboen mibi nashunu, quequin bédamboen chuita. Mibi aidenquio icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. ⁵⁹ Aden nauedaqui mimbi icsamboen naboed cuidnante meniabicnuc quënë yacnoësh mibi puduentiapimbo iquendac —quepanëdash Esus.

13

Utsibo unësmiacpadec unësmemane quequin mibi icsaid ënta caid

¹ Aden Esusën chuibanubien iccuededquid utsibon, Esus chuimenu, quequin caimpanëdash. Aden cainequi Esusën chuibanquin nainsho tantiasahun iccuededquid utsibo: —Chuinu. Tanti. Cadidia yacnoquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniaidën intacbëd daëdash chididiquiosh, quequin chuipanëdash. Aid chiaid tantiasahun. Çatotsi icsamboen nasho aido cuesunemepashba? caimbi mibi —quecuedpanëdash Esus chiec.

² Adoquien: —ÇCadidia yacnoquido utsitedi icsaid daëdpectsëc icnuc cuesunemiaido icsaid dadpen icsho aido cuesunemiashe, quequinda mimbi tantiepe? ³ Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe qeshun. ⁴ Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaaid uebudquin abëd icquido 18ted cuesac unësosh, quiosh. ÇEdusaden yacnoquid utsibo icsaid daëdpectsëc icnuc Sidoe yacnoquido icsaid dadpen icquid unësosh, quequinda mimbi tantiepe? ⁵ Mimbi icsamboen tantieque. Utsibo unëscapadec unësmemane quequin mibitedishun mibi icsaid ënta —capanëdash Esusën abi chuimeboedo chuiquin.

⁶ Aden chuishumbic utsitsen chiec: —Icbon cuëte icnuc nadpec: ‘ÇCon cuëte ada bacuëashë? Istanu,’ quianec icbo nidpec. Adec nidshun isquien bacuë nibëdec. ⁷ Adsho isun abi neshcashunquid chuiquin nadopec: ‘Seta tedested matamiashe cuëte yacno cuësnuec choudobi. Bacuëambo iqueque. ÇBacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

⁸ “Adoquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshcatanquin seta abentsëc matamequin nidaid chëshë chodquiaid ëbi bédamboen tasiameeta. Adoac bacuëtsiash. ⁹ Aden seta abentsëc matamiashe choquin bacuëacsho isash bédambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh —quepanëdash Esus. Ëmbi tantiacpadec tabadenquiocboedi bédamboen chiac bédamboec tabadsho isash ëbi tantiaquid dadpen yanendac, quequin tantiec adpanëdash Esus.

Cashuebudaid bédamiaid

¹⁰ Adashic, chonoadtemaid ushën Nuquin Papan chiaid chuibante shubun puduedshun Nuquin Papan chiaid Esusën tantiamenubien ¹¹ seta dadpen 18tedi matamequin mayan icsan shuabudaaid icpanëdash. ¹² Adquid icsho isun Esusën: —Shuabudaaid icboedi nëbi cacueoaid mibi iquendac, chido —cashun ¹³ mishac cacuiash, Nuquin Papan nadatiambocquin naid nec, quequin chiec chido onquepanëdash.

¹⁴ Aden chonoadtemaid ushën Esusën chido bédamesho isun Nuquin Papan chiaid chuibante shubu isquidon: —Nëid ushë chonoadtemaid ushë neque. Bédamenu quequin nëid ushënquo bédamenda. Chonoadtequid ushënquo bédameta —capanëdash iccued-edquido chuiquin.

¹⁵ Adoaquien Esus: —Mimbi chiapaden naisa mibi neyoc. ¿Chonoadtemaid ushë icnuc, Con yua acte acmebono queshun mimbi yuaid tēneshacchobi acte yacno buanenquioda mimbi icpe? ¹⁶ ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mēnchiquenquiodambi icpe? —quepanëdash Esus nëid ushën bédamenda quequido tantiamequin chiec.

¹⁷ Aden Esusën chuisho tantias, Adenda, quequin bédamboen chiombi, quetiapimbo yec otacquo tabadcuedednubi utsibotedi, Esusën nadatiambocquin naidtedi bédambo iquec, quec bédambo yec tabadpanëdash.

Cuëte ëshëmpi chiaid

(Mat 13.31-32; Mad 4.30-32)

¹⁸ Adashic: —¿Nuquin Papan shubun icquido mitsipadquidquio icpec? ¹⁹ Nadquidquio iqueque. Chuinu. Tantia. Icbon cuëte ëshë pistsëcquioquid mostasa caid nësecaid dëyucash nuamboshë caniec. Aid cuëte caniaidën cuidin podochoquidën shubu uabededec. Adquiecbidi, Nuquin Papan chiaid chuisho tantiasëcquidën tantiaibenash bédambocquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

Sicaid nami uaidpadquid

(Mat 13.31-33)

²⁰ Aden chuishumbic utsitsen chuioaic: —¿Nuquin Papan shubun icquido mitsipadquidquio icpec? ²¹ Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amëec bidisquedoec. Adomboembidi ëmbi chiaid ëbi tantiaquidën chuibanac ëbi tantiaquid dadpen yanec utsibon isenquiocnobi —quepanëdash Esus.

Pudued-puduedtequid shëcuë pistsëcquio chiaid

(Mat 7.13-14, 21-23)

²² Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daëdpectsëcquid utsi-utsiec yacnotsen isbidanoaquin anocquidotsen tantiamenuen chuibenenu, quec Esus nidpanëdash. ²³ Adec nidsho isun iccuededquid abentsëcshun nadopanëdash: —¿Nuquin Papa yacno matses daëdpectsëcta nidpec? Tiantianu. Èbi chui.

Adoaquien Esusën nadopanëdash: ²⁴—Nuquin Papa yacno pudued-puduedtequid shëcuë pistsëcquio iquendac. Esusquio tantiec aidëmpinquo mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc, ²⁵ Nuquin Icbon, Èbi yacno puduedte ushë naimbudosh, caqui cho-choshon, Èbi puduedme, quequin comapenen cuëmbededpec.

“Adoaquien: ‘Èbëd icquidpenquo mibi neque. Mibi puduedmetiapimbo iquebique. Mibëd icquido yacno nidan,’ caindac Nuquin Icbon adquid.

²⁶ “Adoaquien: ‘Mibëdtambi peshun acbededombi. Èbi yacnoshon mimbi tantiamequin chuibansho tantiombi,’ quequin abi tantiesan Nuquin Icho chuipec.

²⁷ “Adoaquien: ‘Icsaquido mibi neque. Nëmbo puduedenda,’ quepec Icho. ²⁸ Aden chiaqui Abadauan yec Isac yec Acobo yec quec Nuquin Papan chuimiaido aidtedi Nuquin Icho yacno tabadsho isash abi tanties aadiapimbo yec chian anëdënquiacno tabadec shubiquic, Nuquin Papa icsambo iquec, quec nëishpec. ²⁹ Nuquin Papa yacno abi tanties puduedtiapimbo nobien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac. ³⁰ Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac —quepanëdash Esus.

Edusaden isash anocquido Esus unësqiotequid

(Mat 23.37-39)

³¹ Aden Esusën chuibanquin naimbudnubien padiseyobo utsi-utsiec cho-choshon: —Ancanquid Edodes mibi cuesunemete buneque. Nëuëshquio nidec nid —capanëdash Esus chuiquin.

³² Adoquien: —Edodes cuesunemenuecbimboec onquequidquio nec. Aid yacno nidshun naden chuita. Nëbi mayan icsa dapudemequin utsibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquien adomboembidi nabanoaimbi. Adobanquimbi naimbudembi. ³³ Adobanequi nëbi capuebi. Adobanequi badiadash capuoai. Adobanequi abadiadash capuoai. Adobanequi Edusaden yacno capuoai. Adec capuec ðEdusaden yacno choabidabi unëš uapec? quiosh, Esus quequin Edodes chuita —capanëdash Esusën.

³⁴ Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnoquido chiacbimboec Esus nadpanëdash: —Nuquin Papan chuimiado cuesunequido mibi nec. Adembidi, Nuquin Papan mibi yacno chomiaido cuënoten se-sequido mibi neoaic. Èbi tantiaquid icmenu, quequin chuideniombi. Cachinan, Con bacuë chieshëquid choec, qeshun nua shocotsëcsun aton bacuë cudasquin mabësec aton podon. Adembidi: Mibi chieshëquid choec, qeshun mibi cudasquin chuibanombi. Aden chuisho tantiatipimbo yec mibi tabadpoc. ³⁵ Adquido yec nëbi min shubun icquido cudasquid ëbipadquid nibëdec. Nad iqueque. Tantia. Mibi chieshë nec cuesunenequido choabincuc ëbi nidacsho yuen ëbi isenquio mimi iquendac. Yuecash abucueš choasho isash, Ambi chomiaid Nuquin Papan bëdamboen isaidquio nec, quequin tantienquiochoedëmbi tantiendac —quepanëdash Esus Edusaden uano icnuc Edusaden yacnoquido tantiamequin chiacbimboec onquec.

14

Padiseyobon shubun Esus puduedash tabadaid

¹ Adashic, chonoattemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bëdamenushe qeshun isnequin padiseyobo utsibo tabadquin caimbededpanëdash. ² Aden caimbedednubien podo nidte chedo bidisquaid uano tsadsho isun Esusën: ³ —ðChonoattemaid ushën daicsambocquid bëdamenquiocte ushë nec, quequinda mimi tantiapec? —caquien ⁴ abi caimbededquido otacquo tabadcededpanëdash. Adec aido otacquo tabadcedednubien podo nidte chedo bidisquaid dada Esusën bedshun bëdameshun: —Nidec nid —cac bëdambo yec nidpanëdash.

⁵ Aden aid nidmeshun abi bëdamenushe quequin caimbededquido caic: —ðChonoattemaid ushën nua uëdëshcaidën min baca ampaëdacsho isun badedquio bedtanquin indoenquioda mimi ictsia? —quepanëdash Esus. ⁶ Aden chuisho tantiash adquiobidi otacquo tabadcededpanëdash.

⁷ Adashic, tsusiobon dayunquio tsadsho isash, Chuiquid dapa nec, utsibo quetsiash, quec padiseyobo cho-choec, quequin tantiashun Esusën nadopanëdash: ⁸ —Pec cho, cac choshon tsadte bëtinenada. Tsadte mimi bëtinambien shubu icbon ambi pec cho caid utsi mibi chuiquid tsusio chosho ⁹ isun: “Chuiquid dapa choeque. Uano tabadad,” icbon cac icsamboen naombi quiaš natiac uano tsadpec mibi. ¹⁰ Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nëmbo, chuiquidbëd tsadec cho,” capec mibi shubu icbon. ¹¹ Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanëdash Esus abëdta yuedaido caic.

¹² Aden aido chuishumbic abi yuedquid Esus nadpanëdash: —Pemenu, quequin mibëd icquid min utsibo aton na dadpen icquidoidi pec cho cainda. Aido pemiac, mibi pec cho caoic. ¹³ Pemenu, quequin aton na nibëdquido, daicsaidobëdta bëshuaido pec cho cata. ¹⁴ Adquido mibi cuidquin pemetiapimbo iquec. Adquido pemiaš, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac —quepanëdash Esus abi yuedquid caic.

Nuquin Papa yacnoshon pequido

¹⁵ Aden Esusën chuisho tantiash abëdta pec tsadquid abentsëc: —Nuquin Papa yacno nidshun abëdtambi pec bëdambo iquebi —quepanëdash.

¹⁶ Adoquien aidi tantiamenuen utsi chiacbimboec Esus nadpanëdash: —Yuednu, quequin nadënuquo pec chota, quequin ambi yuedtequid dadpen chuiposh. ¹⁷ Ambi chiacpadën ushë chonoc: ‘Èmbi chuiboedtedi pec cho quequin chuitanta,’ cac aton yua nidposh. ¹⁸ Adec nidshun chuituidaquien: ‘Nidtiapimbo iquebi,’ queposh abitedi. Abia chuituidaid abentsëc nadposh: ‘Èmbi sëuëmboed dëdabi nidtiapimbo iquebi,’ queposh.

¹⁹ “Utsibic: ‘Baca bedshun, Bëdamboen nimbanquinda buaneque. Isnu,’ qeshun isedtanenquocquin ambi bedboed nimbameposh.

²⁰ “Utsibic: ‘Con chido bedombique. Nidenquo iquebi,’ queposh.

²¹ “Aden chuisho tantiash nidshun aidon chiacpaden aton yuan icbo chuioposh. Adsho tantiash nëishun icbon: ‘Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,’ cac aton yua nidposh.

²² “Nidshun chuitanec aidobëdi choshon, ‘Mimbi chuiboedo bëombi. Aido icnubi abi tabadte iquec,’ queposh yua.

²³ “Adoaquien: ‘Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquo yec ma adquido tabadpanuna. ²⁴ Abia ëmbi pec cho caidon ëbëdtambi petiapimbo iquendac,’ queposh icbo –quepanëdash Esus.

Esuspadquo ictequidquo

²⁵ Adashic, nidsho mates dadpeshun tsibanac abi choacmi bidiadshun isec Esus nadpanëdash: ²⁶ –Ëbipadquo icnuequid aton papabëduidi icquid iquec ëbipadquo ictiapimbo iquec. Adecbidi, aton titabëduidi icquid iquec ëbipadquo ictiapimbo icoaic. Adecbidi, aton chidobëduidi icquid iquec ëbipadquo ictiapimbo icoaic. Adecbidi aton bacuëbobëduidi icquid iquec ëbipadquo ictiapimbo icoaic. Adecbidi, aton utsibobëduidi icquid iquec ëbipadquo ictiapimbo icoaic. ²⁷ Unësmanc quiash mëyanac dayactiapimbocquid ëbipadquo ictiapimbo icoaindac –quepanëdash Esus.

²⁸ Aden chiec Esus abi onquec: –¿Shubu uanu, qeshun abia shubu uaid isec, Nëidtenquo nanu, qeshun aitedquobidi bëshun toccashun shubu uainquioda icpec? ²⁹ Aden tantienquiocquidën abentse-abentsen bë-bëtsëcquin baded naintiapimbo iquec. ³⁰ Adsho isun utsibon mamëshumpec. Bëdamboen isun shubu uaquidpadquid, Esuspadquo icnu, qeshun ëmbi chiaid bëdamboen tantiabenash adquobidi icpec. Ëbi tantiauidtsëcquid ëbipadquo ictiapimbo iquec.

³¹ “Adembi chuinu. Tantiata: ‘Mibëd icquidobëd cuesnanuec chuiquid utsi nëmbo chochoec,’ qesho tantiashun nëmbobi icquido chuiquidën naden tantiapec: ‘Ëbëd icquido daëdpactsëc iquec. Aidedtsëqui iquec dayacquiocquid icquin chuiquid utsi abëd icquido cuemepec, qeshun ma chobono,’ quequin caimpec. ³² Padnuen, abëd icquido dayactiapimbo icsho isun chuiquidën: Chuiquid utsi bëquedanta. Bëquedshun, Mibëdi ictsiabi. Ëbëd icquido chuiquid icta, ëbi chuiquid quiosh, quequin chuita, quequin chuiposh. ³³ Adembidi ëbipadquo icnuequidon bëdamboen tantiata. ¿Ëbi chuiquid Esus nec, quequin ambi chiacpadendambi nabampeba? Ai, adonona, qeshun adota. Adoesa, Esuspadquiocquid nebi, quenda –quepanëdash Esus abi tsibananquido chiec.

Sa batapentsëcquiocquid (*Mat 5.13; Mad 9.50*)

³⁴ Aden chiashic Esus nadpanëdash: –Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadic? ³⁵ Padenquo. Secatequid adquid nendac. Adecbidi Esuspadquo icnu quiash ëbipadquo yanesa chian anëdënquequid nësiatequid nendac. Adquid ictiapimbo iquebi, quequin, Tantienu, qeshun tantiacpadomboen nabanta –quepanëdash Esus.

15

Obeca abentsëc bënudtequid (*Mat 18.10-14*)

¹ Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tantienu, quiash Esus datsidadpanëdash. ² Adsho isash padiseyobo Esus tantiamenquo yec chushquiacimboec, Abi datsidadquido icsambocquid icsho cacumenquiocquin aidobëdtambi peshun Esusën aqec, quec abibi onquecuededpanëdash.

³ Adoaquien, tantiaquidquo iquec Esus: ⁴ –¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibëne nidenquioda mibi icbe? ⁵ Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec. ⁶ Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin icbon chuipec. ⁷ Adecbidi Nuquin Papa tantiaquid dadpen icnuc mates icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuedependac –quepanëdash Esus.

Aton na bedtequid bënudtequid

⁸ Aden icbon aton yua bënudaid chuishumbic utsi chiec Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec? ⁹ Ai. Aden nibënquin istuidshun abëd icquido chomeshun: ‘Con shocoshëmpi abentsëc niadachoedi nibënquin istuidash bëdambo iquebi,’ quepec chido.

¹⁰ “Adechidi matses abentsëcshun abi icsaid ënsho isash abi yacnoquido ambi uaido mayan bëdabobëdi Nuquin Papa bëdambo iquebi, quecuededec —quepanëdash Esus.

Aton mado cuëshëdquid

¹¹ Aden chido chiashic utsi chiacbimboec Esus nadpanëdash: —Aton mado daëd icnubi ¹² tsyuec tishaid aton papa caic: ‘Tsusio budquin mimbi chiondacadpen nëbi ëbi aitted meneta, papa,’ quepondash. Adoac aton na musucshun aton mado abi daëdi menebampondash.

¹³ “Aden meniac daëdpactsëc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimëdpondash.

¹⁴ Aden aton natedi naimëdambic tiedën caniquid unësbunian abi nidacnoquidon pete naimëdan tsusion mado chedo comapenec bundocuededpondash. ¹⁵ Adec bundoquiec abi nidacnoquid abentsëc yacno nidshun: ‘Mimbi namiaid ictiadquo iquebi,’ caquien: ‘Con chanco pemebanta,’ qeshun aton chanco yacno tsusion mado nidmepondash.

¹⁶ Aden nidmiac nidquin chanco pemebanequi ambi chanco pemiaid petiadquo yec tabadshobi anocquidon menenquo icpondash.

¹⁷ “Adec natiambo bunec tabadquin aton papa ambi nianondaidbëdta abi icsaid ut-sidedi tantiec abibi onquec nadpondash: ‘Con pan namiaidon pete dadpen icnubi con na nibëdnuc unëspebi. ¹⁸ Nëbi con pa yacno nidshun naden con pa chiëmbi: Nuquin Papan chiacpaden nainquioquin mibi tantienquo yec nidshun icsamboen nabanombique. ¹⁹ Adquid icsho con mado nec, ëbi cainda, papa. Nëbi min yuapadquid ëbi icme,’ quequin chiëmbi, ²⁰ abibi quianec aton papa yacno nidoapondash. Adec nidec ancuenquo yacno aton mado nidondaid casenash chosho isash unësqiucnoc aton mado bëquedquin dayumbudshun shubi uatanquin aton papan tanchoccapondash. ²¹ Adoac ambibi tantiabocpaden aton papa chuiquin: ‘Nuquin Papan chiacpaden nainquioquin mibi tantienquo yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,’ capondash aton madon.

²² “Aden chiaquien bëdambo yanshun ambi namiaidompo naden aton papan chuipondash: ‘Con mado ënden nidondaid choaoshe. Dasiuidte bëdaidquo bëshun con mado dasiunta. Adoshombic mëusudtetsen mëusunta. Adoshombic tapucudtetsen tasiuinta. ²³ Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun. ²⁴ Con mado unësbimbocboedi nëbi ëbëdi tabadoaic. Aidi bënudacimbocboedi nëbi istuidacimbocboec choash iquec,’ cac bacan bacuë cuesuneshun codocacsho pebededpondash.

²⁵ “Adnubien bëyuc tishaid tied nantan icpondash. Auëshquo nidec shubu anoentsëqui choquin tentenate cuëdëmec matses cuëdënsho tantiatuidpondash. ²⁶ Aden tantiatudashien aton papan namiaid istuidash: ‘¿Atotsi naic nec?’ quepondash bëyuc tishaid.

²⁷ “Adoquien: ‘Min utsi ënden nidondaid choaposh. Aidi chosho isash unësqiucquin nuquitedi bëdamboec tabadquin pemenuquin aton bacan bacuë nuacquid dapa papan cuesunemiosh,’ cac ²⁸ bëyuc tishaid nëishash shubun puduedenquo icpondash.

“Adsho isash, Puduedenquo iccosh, quequin chiac bëyuc tishaid yacno nidshun: ‘Min utsibobëd bëdambo icnuec cho, mado,’ capondash aton papan. ²⁹ Adoquien: ‘Seta dadpen matamequin mimbi chiacpadomboen nabanteniombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc. ³⁰ Nëbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepaboc,’ quequin bëyuc tishaidën aton papa chushcapondash.

³¹ “Adoquien: ‘Mado, ëbëd icquid mibi nec. Adquid icnuc con natedi mitsana neyoc.

³² Min utsi unësbimbocboedi nëbi choash tabadoaic. Aidi bënudacimbocboedi nëbi istuidaid nec,’ quequin aton papan choobedën buchi chuipondash —quepanëdash Esus.

16

Icbon na icsamboen isquid

¹ Adshumbic, abëd icquido Esusën naden chuipanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh.

² Adoac, ambi con na ista caid chomiash icbo nadposh: ‘Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi

ÿËm̄bi tambamboed abitedida iqueque? Con na daëd uata quequin ëm̄bi meniac mimbi daëd uabanquin dada uaid bec cho. Isnu,' queposh icbo.

³“Aden chiac icbon na isquid otacquo onquec: ‘ÿIcbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibëdeque. Bec cho, quetiapimbo icoaibi. ⁴Naden natsiambi. Con icbon na meniondaid abitedi cuidmenquo yac ëbi yuedtsiash,’ queposh.

⁵“Aden tantiashun ambi icbon na meniondaid abentse-abentsen chomiach bëyuc choquid chuiquin: ‘ÿTeds̄i ëm̄bi con icbon na meniaqui mimbi cuidenquicpaccoc?’ caquien:

⁶“Bëchi shocosh nuacquid dapan cushtoaid 15tedi bedshun cuidamboccombì,’ queposh. “Adoquien: ‘Mimbi 15ted bedombi, quequin dada uaid secashun dada uatemp̄i bedshun shocosh dapa bëchi cushtoaid 7ted bedshun cuidembi, quequin dada uata.’

⁷“Aden bëyuc choquid chuishumbic utsi chosho isun: ‘ÿCon icbon na tedtsi bedshun cuidenquo mimbi icpo?’ caquien:

“Tsitsan dapa dadpen 1000ted tiedën caniquid ëshë bedombi,’ queposh.

“Adoquien: ‘Mimbi aited bedombi quequin dada uaid secashun dada uatemp̄i utsin tsitsan dapa dadpen 800ted tiedën caniquid ëshë bedshun cuidembi, quequin dada uata,’ quequin icbon na isquidën chuiquosh. Adoac ambi chiapaden ambi bedaid cuidambocquidën dada uaposh.

⁸⁻⁹“Aden dada uabansho isun dada uatemp̄itēdi bedshun icbo yacno nidshun meniac isbanec icbo tantiaquidquid iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,’ caposh icbon –quequin Esusën chuipanëdash. Aden chuishun ambi chuiboed tantiamenuen abi chuibudec: –Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac –quepanëdash Esus.

¹⁰ Aden chuishumbic adomboembidi chuiquin Esusën nadopanëdash: –Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac. ¹¹ Adembidi mimbi nidaidënshun bedquin mimbi icsamboen nabansho isun, ÿËbi tantiaquid bëdamboen ista, quequinda Nuquin Papan mibi chuipeba? Padenquo iquec. ¹² Adembidi, ÿutsin na isquin bëdamboen nashunquo icsho isun abi yacno chosho isun mibi menependa ictic? Padenquo.

¹³ “Adecbidi, chuiquid daëd icnuc aid daëdshun namiaidquid ictiapimbo mibi iquec. Abentsëcshun chiaiduidi tantiaquin utsin chiaid mimbi chieshë nec. Adquiobidi Nuquin Papa mimbi tantiaidquid icquimbi mitsana bedtequid mimbi tantiaidquid ictiapimbo iquec –quepanëdash Esus.

¹⁴ Aden chuibanubi aton na bedtequid ambi tantiaidquid icnuc chieshec padiseyobo tabadcuëdpanëdash. ¹⁵ Adec tabadsho isun Esusën: –Bëdamboen nashumbimboen ismequido mibitēdi icsho mimbi ompoquin naidtēdi Nuquin Papan isquin tantie. Adembidi, Bëdamboen naquidbimboecsho matsesën ispashuni, quequin tantiaquin nasho Nuquin Papan bëdamboen istiapimbo iquec.

¹⁶ “Adembidi, acten mētoanquid Uan pado tishabicnuc Nuquin Papan naden nata quequin chiaid Moisesën dada uampidbëda Nuquin Papan chuimiaid utsibon dada uampid mimbi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquo yec ambibi tantiacpadec puduedte bunec. ¹⁷ Abubëd nidaid ënëdtequid icnuc Nuquin Papan naden nata quequin chiaid ënëdtiapimbo iquendac.

Aton chido nianquid

(Mat 19.1-12; Mad 10.1-12)

¹⁸ “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic –quepanëdash Esus.

Aton na dadpen icquid icnubien aton na nibëdquid

¹⁹ Adequi onquequimbi utsi chiacimboen Esusën naden chuipanëdash: –Dada, aton na dadpen icquid bëdaidquid dasiuidquidën badiadquidën badiadquidënquien nua peshun acposh. ²⁰ Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh. ²¹ Bunquiec ambo tsadec aton na dadpen icquidën peshun secaid bedshun penuec tsadtsëcsho menenquiocposh. Aden menenquiocnoc tsadshobi opa choquin aton chiuë Dëtahuntuidposh.

²² “Adnubien, aton na nibêdquid Dasado unêso isun Nuquin Papan uaido mayan bédabon abuc buanshun Abadauanên dayunquio tsadumposh. Adoambic, aton na dadpen icquidtsen unêsashi ²³ chian anêdênquiaicnoshon mëyanaid icquin abucquio isquien aton na nibêdquid unêsboedi Dasado Abadauanên dayunquio tsadpec. ²⁴ Adec aid daêdi tsadsho isun aton na dadpen icboedên Abadauan chuiquin: ‘Èbi antauidêque. Con ana dauebudoaquin èbi ècpanun Dasado acte bême, papa,’ caposh.

²⁵ “Adoquien: ‘Chuinu. Tantia, abuido. Ènden nidaidên tabadquin mitsana dadpen bedbanec bédambo mibi tabadnubien Dasado comapenec bunquieic tsadposh. Nêbi aidi ênabi bédamboec tabadnubien anchumbo yec mibi tènquebudec. ²⁶ Adboedi, uquêmbo mibi iquec cuêma utsiuc potetemaic icnuc nêuêshquio nidtiapimbo iquec. Adquibidi mibi yacnocquido nêmbô chotiapimbo icoaic,’ quequin Abadauanên aton na dadpen icboed chuiquosh.

²⁷ “Adoquien: ‘Èbi yacno potetemaic icnuc con pan shubu yacno Dasado nidme. ²⁸ Con buchi ado mêdante auc abentsêc Stedi unêsabi yec nidaidêmibi tabadeque. Con buchi ado nêmbô mëyanacno chonoshe qeshun Dasado aido chuimetanta, papa,’ queposh aton na dadpen icboed.

²⁹ “Adoquien: ‘Nuquin Papan chiaid, Moisesën dada uampidbêdta dada uaid utsi isec tsusiobo onquepayoc. Aden chiaid ma min buchi adon tantiaquiopanuna,’ quequin Abadauanên chuiquosh.

³⁰ “Adoquien: ‘Aid tantienquioctsiash, papa. Unêsboed nidshun chiac aidon tantiapatsiash,’ quequin aton na dadpen icboedên chuiquosh.

³¹ “Adoquien: ‘Padicnuna. Nuquin Papa tantiesa icquin uincuemiaidên chiaid min utsibon tantienquio icpatsiash,’ caposh Abadauanên aton na dadpen icboed chuiquin – quepanêdash Esus.

17

*Matses icsaid chiaid, ambi Esus tantiaid chiaid, ambi natequid chiaid
(Mat 18.6-7, 21-22; Mad 9.42)*

¹ Aden chuishumbic abêd icquido Esusën nadopanêdash: –Icsa uanquid iquendac. Adquid Nuquin Papan comapenen cuidendac. ² Adquid èbi tantiabenicquid icsa uanabicsho cuênote yuêmboquid têtanetanquin acte shodomboshê yacno nênepatecnêdan. ³ Aid tantiec aidpadquid icmane quequin bédamboec tabadquin ismedeneta.

“Utsi icsasho isun: ‘Mibi icsaique. Mibi icsaid ênta,’ mimi cac: ‘Ai, icsaobique. Ènêdnuna,’ qesho tantiaid aidi icsainquio yacnimboec bêpiscudta. ⁴ Mibi icsamboen nash choec: ‘Icsaobique. Ènêdnuna,’ quenic mibi icsamboen nacmaidbimboec yec bêpiscudta. Mibi padpiden icsamboen nash choaic: ‘Icsaobique. Ènêdnuna,’ queoanuc mibi icsamboen nacmaidbimboec yec bêpiscudoata. Mibi padpiden icsamboen nash padpidec choec: ‘Icsaobique. Ènu,’ queoanuc aidtedebidi aidi icsambo yenquio yacnimboec bêpiscudoata – capanêdash Esusën abêd icquido chuiquin.

⁵ Adoquien: –Nuquin Papa nadatiambocquin nabanquidquio nec, quequin tantiaquidquio ictiadquio iquebique. Adquid èbi icme, icbo –capanêdash abêd icquidon Esus chuiquin.

⁶ Adoquien: –Cuêtempi êshê mostasa caid pistêcquio iquec. Siac dêyucash nua yanec. Adecbidi Nuquin Papa nadatiambocquin nabanquid iquec quequin mimi bêdiactêc tantiapec. Aden bêdiactêc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquio iquec, quequin tantiabenshun nêid cuêtempi caic, Cuête mananuc tabadboedi adquiecbidi acte nantan tabadoata, quequin mimi chiacpadec acte nantantsen abi tabadacpadechidi tabadoaindac –quepanêdash Esus.

⁷ Aden chiashic Esus abi onquec: –¿Min yua mimi neshcata cac nidshun neshcaquin nainash shubuno chosho isun: “Nêmbô tsadquin pec cho,” caquinda mimi icpe? ⁸ Padenquio. “Con pete codocashun èbi pemeshun acte menetanquin mimbitsen peshun acta,” mimi caic. ⁹ Aden mimi chiac mimi chuiboedtedictêqui nabanquin mimi yuaidên naimbudec. Aden naimbudsho isash: “¿Bêdamboen mimi naoc,” quecta mimi icpe? ¹⁰ Padenquio. Ambembi nainquio iccosh. Mimi chiacpaden min yuan nabanosh. Adembidi Nuquin Papan chuiboedtedictêqui nabanash Nuquin Icho caic: “Mimi chuiboedtedi nabampombi. Mimi namiaid icquin êmbi naboed êmbi natequiduidi napombi,” quequin mimi chuite nendac –quepanêdash Esus.

Daushumbocquido bédamiaid

¹¹ Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec ¹² shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëquedtuippanëdash. ¹³ Adquido yec uano tabadquin: –Ëbitedi bëdamboen tantiaquin nadatiambocquin naban, icbo –cabededpanëdash comapenen cuëquin.

¹⁴ Adsho tantiashun Esusën: –Isadaidbo tsusiobo yacno nidshun ismetanta –capanëdash. Adoac nidanequi abitedi bëdambudnapanëdash.

¹⁵ Adoac bëdamboed abentsëc dëbidiadanec Nuquin Papan naid chiec onquec choaic

¹⁶ Esusën taëno tsadbudash: –Mimbi bëdameboc bëdambo iquebi –quepanëdash Esus caic. Aidi Samadia yacnocquid isadaidpemo nepanëdash.

¹⁷ Adoaquien: –¿Diestedidambi bëdamepo? –quepanëdash Esus dëbidiadanec choboed caic.

¹⁸ Aden chiashic iccuededquidtedi caic: –Nëidi isadaidpemo yequi dëbidiadanec choash Nuquin Papan naid chiec onquenubi ambi chiacpadomboen bëdameboed utsibo isadaidbo icquimbi Nuquin Papan naid chienquo icpec –quepanëdash Esus. ¹⁹ Aden chuishumbic: –Mimbi tantiacpadequi mibi bëdanoque. Nidtoanec nid –capanëdash Esusën daushumbo icboedi chuiquin.

Chuiquid dapabëd bëdamboec tabadte chote ushë

(Mat 24.23-28, 36-41)

²⁰ Adshumbic: –¿Chuiquid dapa abentsëcbëd bëdamboec tabadte ushë choaid mitsipadënquo nuqui ispeque? Tiantianu. Ëbi chui –capanëdash padiseyobon Esus chuiquin.

Adoaquien: –Chuiquid dapabëd bëdamboec tabadte ushë chote ismete nibëdendac.

²¹ Adecbidi, nëmbobi chuiquid dapa abentsëc choeque. Is, quetiapimbo matses pec. Adecbidi, Umbo choeque. Is, quetiapimbo matses icoaic. Chuiquid dapa abentsëcbëd tabadte nëmbobi iquec caimbi –quepanëdash Esus padiseyobo abi chuimeboedo caic.

²² Aden padiseyobo chuishumbic abëd icquido Esusën nadopanëdash: –Yuecash nati-amiantequid icnuc abuc Esusbëd tabadte ushë chopashun, quec ëbi iste mibi bunquimbi ëbi isenquo mimbi iquendac. ²³ Adec ëbi iste bunubien: “Bëdamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda. ²⁴ Nuquin Papa yacno bëdamboec tabadte ushë chonoc abu bedquetaniacimboec uëshëmbo chënquec ëbi chosho abitedishun isbededendac. ²⁵ Aid ushë choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbededec –quepanëdash Esus.

²⁶ Aden chiec Esus abi onquec: –Ëndenquimboshë Noe tabadnuc matsesën icsamboen tantiaded-tantiadednëdacadomboen ëbi choate ushë icnuc adembidi matsesën tiantienepec. ²⁷ Nadec tabadpampic: Nuquin Papan chiaid tanties cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido bedpampic. Adembidi tantiaquin aton champi menepampic. Aden tantiaquin nabanubien Noebëd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic –quepanëdash Esus.

²⁸ Adec Noe tabadnuc icsamboen tantiec matses tabadaid chiashic, Esus nadpanëdash: –Adecbidi Dod caid icnuc icsamboen tantiec matses tabadpampic. Nuquin Papan chiaid tanties iquec abi bunaiduidtsëqui tantiaquid icoapampic. Nidaidën tabadaiduidquo tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. ²⁹ Aden nabanquin Nuquin Papan chiaid tantienquo icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquicimboecquid nëdënquetequid ue sequiacimboec sequequidën Sodoma yacnocquidtedi Nuquin Papan chiaid tantiesabo unës uabunepampic –quepanëdash Esus.

³⁰ Aden chiashic: –Ëbi choate ushë icnuc ëmbi chuibocpadquiec Nuquin Papan chiaid tanties yec abi bunaiduidtsëqui tantiaquid iquendac. ³¹ Shubu macano yacno decataosh mibi tsadnuc ëbi choate ushë chosho isash budanec mitsana bednu quec shubuno puduedenquo yec cuenta. Adecbidi, tied nantan mibi icnuc aid ushë chosho isash shubu yacno mitsana bednuc nidenquo yec badedquo cuenta. ³² Mibi yacnocquidtedi unës uanushe bidaidshun isenquo yec cuenta, cac Dod cuenubien aton na tantiec aton chido auebidi bidaidsho unës uampidpadquid iquenda. ³³ Unësmanc queshun ambi tantiacpadecc tabadquid unësash mëyanacno tabadnubien unësmanc quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac. ³⁴ Ëbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tanties nianendac. ³⁵ Adembidi, chido daëdshun macueso Nuquin Papa

yacno yuednuen abi tantiaquid bedquin abi tantiesa nianoaindac. ³⁶ Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac —quepanëdash Esus.

³⁷ Aden chuisho bēdamboen tantienquiocquin abēd icquidon: —¿Mitsimbo budpec, icbo? —capanëdash.

Adoquien: —Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac —quepanëdash Esus abēd icquido caic.

18

Cadonequidquo chido chiaid

¹ Adashic, Ebēd icquido chieshenquo yec Nuquin Papa chiec onquian-onquianquidquo ma icpanu quec aido tantiamenu quec Esus nadpanëdash; ² —Shubu dadpen yacno icsambocquid cuidte chuiquid icposh. Aidi Nuquin Papan chiaidbēda utsibo tantiesa icposh. ³ Adnubien uano tabadquid niante chido icposh. Aidi icsambocquid cuidte chuiquid yacno nidshun: ‘Ēbi icsamboen naquid ma cuidnu chuiquiota,’ quequin chuiposh. Aden chiaqui padenquiocsho isash choded-chodedquin adomboenuidi chuided-chuidedposh.

⁴ “Aden chuidoniaqui abi icsambocquin naquid cuidte chienquiochoedēmbi chido ēnēdenquo yec ⁵ choded-chodedquin adomboembidi chuioasho tantiahsun: ‘Nuquin Papabēda mates tantiesa nebi, quequimbi niante ēnēdenquo yec chodenedsho isun uimabudmane qeshun abi icsamboen naquid cuidte chuiquiono,’ qeshun cuidte chuiquidēn chuiquioposh.

⁶ Aden chiashic Esus: —Choded-chodedquin chidon chuioasho tantiahs: “Mibi icsamboen naquid cuidte chuinu,” queposh icsambocquid cuidte chuiquid. ⁷ ¿Adomboembidi ambi cuēnaidon, Ēbi chieshēnquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nēbimbobida cuidpeba? ⁸ Abitedi padenquioctsiash. Ūtsi nēbimbobi cuidenquiocquin choshon cuidendac. Badedquo cuidenquiocsho isash choquin ¿tedectsisumbimbi ēbi tantiaquin caimbudnequido istuidpendac? —quepanëdash Esus.

Padiseyobo abentsēc icnuc ancanquidēn utsin na bedtequid bedmianiaid chiaid

⁹ Adashic, bēdamboquid nebi, quiahs utsitedi icsambo iquec, quequido tantiamenuen adquidēn tantiaid icsa chuiquin Esusēn nadopanëdash: ¹⁰ —Nuquin Papa tabadte shubu uashunaid yacno Nuquin Papa chiec onquenuc nidnequid daëd icposh. Abentsēc padiseyobo icnubi ancanquidēn utsin na bedmianiaid utsi icposh. ¹¹ Nuquin Papa tabadte shubu uashunaid yacno abi daēdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bēdamboquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choboed, ancanquidēn utsin na bedtequid bedmianiaid-padquidpenquo nebi, Papa. ¹² Adembidi, chonoadtemaid ushē yambi chonoadtemaid ushē utsi choabincnuc daēdec ushquin mibi tantiaquin buna mēmundenembi. Adembidi, uno bedanquin dies yacno cuēsaquin con na tambanshun 9ted dayun uaquin abentsēc mibi menedenembi, Papa, quequin padiseyobon chuiposh.

¹³ “Aden padiseyobon uanoshon chuinubien ancanquidēn utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquo yec abi onquec: ‘Icsambocquin nabanquid nebique. Ēbi tantiaquin pauc, Papa,’ queposh —quepanëdash Esus.

¹⁴ Aden chiashic: —Chuinu. Tantia. Ancanquidēn utsin na bedtequid bedmianiaid Nuquin Papan bēdamboen isaquidquo icnubien padiseyobo ambi icsamboen isaquidquo icposh. Icsaisa yachimboec, Bēdamboquid nebi, quequid yuecshun Nuquin Papan aidēn icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bēdamboen naid Nuquin Papan ismequin chuioaindac —quepanëdash Esus.

Bacuēbo Esus yacno bē-bēaid (Mat 19.13-14; Mad 10.13-16)

¹⁵ Adshumbic, aton bacuēbo Esus mishmenuequin utsin-utsinquien bē-bēsho isun: —Bacuēbo bē-bēenda. Esusēn nabanaid utsi iqueque. Nidanec nid —capanëdash Esusbēd icquidon.

¹⁶ Aden chuisho tantiahs Esus nadpanëdash: —Bacuēbo nidmenquiocquin con dayunquo cho-chome. Chiac, Abimbo caic, quequin tantiaquidquo bacuēbo nec. ¹⁷ Adomboembidi, Nuquin Papa yacno tabadte iquec, quequin chiac bacuēbon badedquo tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

*Nëbi caniquid chuiquidën chiaid**(Mat 19.16-30; Mad 10.17-31)*

¹⁸ Adshumbic, nëbi chuiquid caniquidën: —Nuquin Papa yacno nidnuequin çatotsimbi nape? Bëdamboen tantiaquidquio icquin ëbi chui. Tiantianu —capanëdash Esus chuiquin.

¹⁹ Adoaquien: —çMitsipaden tantiec bëdambocquid nec, quepe mibi? Nuquin Papauidtsëqui bëdambocquid nec. ²⁰ Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta,” quequin chiampid mimbi tantiapec —capanëdash Esusën nëbi chuiquid caniquid chuiquin.

²¹ Adoaquien: —Canidotsëcquimbi aden nadeniondambi —quepanëdash nëbi caniquid.

²² Aden chuisho tantiash: —Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota —quepanëdash Esus.

²³ Aden Esusën chuisho tantiash aton na dadpen tantiec unësquio yanshun Esusën chiacpaden natiapimbo icpanëdash. ²⁴ Adsho isun: —Aton na dadpen tantiaquin Nuquin Papa badedquio tantiatipimbo adquidën iquec. Nuquin Papa tantienquio yec abi yacno puduedtiapimboquid iquendac. ²⁵ Adquiecbidi shëcuë pistsëcquid puduedte nidaidën capuquid dapan badedquio tantiatipimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatipimbo icoaic. Aden aid tantiatipimboquid ambibi tantiacpadequi puduedte bunec —quepanëdash Esus.

²⁶ Aden chuisho tantiash iccuededquido nadpanëdash: —çTutsi Nuquin Papa yacno puduedquid icpec? —quepanëdash Esus caic.

²⁷ Adoaquien: —Matses ambibi tantiacpadeq puduedtiapimboconoc Nuquin Papambien abi yacno yuedanquid matses tantiamendac —quepanëdash Esus.

²⁸ Adoaquien Petedo: —Mibëd icnu, quequin ëbëd icquidbëdta con natedi nianondambi, icho —quepanëdash Esus caic.

²⁹ Adoaquien: —Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnu aton chidobëdta aton bacuëbo nianacsho ³⁰ ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdamboshë icmiaid mibi iquendac —quepanëdash Esus Petedo chieç.

*Ëbi unës uaindac, quequin Esusën chiaid**(Mat 20.17-19; Mad 10.32-34)*

³¹ Adashic, abëd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquïn ëbi nabandendac. ³² Anoshon bedshun buanshun isadaidbon isadaidpembo ëbi menendac. Aden meniäc bedshun ëbi mamëns shumbededquimbi, icsamboen chuibededquimbi, dacuisthabededquimbi, dacuesbededsëcquien mëyanshun ëbi custen dectanquin unës uaindac. ³³ Adoaqui daëdec ushtanec uincuenendabi —quepanëdash Esus abëd icquido chieç.

³⁴ Aden abi unëste Esusën chuisho abëd icquidon bëdamboen tantienquio yec tabadpanëdash.

*Bëshuaid bëdamiaid**(Mat 20.29-34; Mad 10.46-52)*

³⁵ Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid. ³⁶ Adec tsadquimbi matses dadpen cuensho tantiashun: —çAtotsi quec cuen-cuene? —capanëdash. ³⁷ Adoaquien choquid abentsëc: —Nasaded yacnoësh choquid Esus cuenec nec —quepanëdash.

³⁸ Adsho tantiashun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

³⁹ Adshobien: —Adec cuëdenquio yec tsad —capanëdash choquidon.

Adoaquien bëdiatsëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caoapanëdash bëshuaidën.

⁴⁰ Adoac nidtuidshun Esusën: —Aidi bec cho —cac abi yacno bësho isun: ⁴¹ —çAtotsimbi mibi nashumpeba? —capanëdash Esusën bëshuaid chuiquin.

Adoaquien: —Bëshuaid nebique. Ëbi bëucshune, Ichö —capanëdash.

⁴² Adoaquien: —Mimbi tantiacpadomboen padpidemboen is —cac ⁴³ badedquio isbenshun bëshuacboedën Esus tsibanquimbi Nuquin Papan naid chuibanquin isbanec onquec

nidpanëdash. Aid bédansho isun Esusbëd nidanequidotedishuntsen Nuquin Papan naid chuibededpanëdash.

19

Saqueyo, ancanquidën utsin na bedtequid bedmianiaid dapa

¹ Adec nidequi Edico caid yacno datambidanec Esus nidpanëdash. ² Edico yacnoquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash. ³ Adoaid icquimbi utsi, Esus cuenec, qesho tantiash, ¿Mitsipadquidquo Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuuctsëcquid icquin Esus Saqueyon isenquo icpanëdash. ⁴ Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

⁵ Adec tsadnubien aid podquedënquo choec nidtuidshun Saqueyo bushcuuctsëcquid istuidshun Esusën: —Nëbi mibi yacno nuquibi tabadec nidnu. Baded bud —cac ⁶ Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bédambo iquebique. Pudued —Saqueyon cac Esus puduedpanëdash.

⁷ Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

⁸ Adnubien, aton shubu nuntanuësh nidtoash Saqueyo: —Chuinu. Tanta, Icho. Nëbi con na mais uaqin aton na nibëdquid menenun nabono. Adoshombic, con matses: “Con na mimbi ampioc,” qesho tantiashun ëmbi ampiaidbëdta daëd-daëdquiecnuc daëd uaqin menebanembi —quepanëdash Esus chiec.

⁹ Adoquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec. ¹⁰ Icsambocquid Saqueyo icbocpadquid nibëqin istuidshun nësecanushe qeshun mënchicnuec chopobi —quepanëdash Esus Saqueyobëd icquido caic.

Aton na bedtequid 10ted icquid meniaid

¹¹ Aden Esusën chuisho tantiashun Edusaden yacno choash chuiquid dapa Esus yantsiash, quequin utsibon icsamboen tantiapanëdash. ¹² Aden tantianubi tantiaquidquo icquin utsi chiacimboben aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’ ¹³ qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bédamboen nabanquin daëd uata ma choshon dadpen bedoapanuna,’ quianec chuiquid ictheadquicoquid abi chuiquid dapa yacno nidposh.

¹⁴ “Adec aid nidambic abi yacnoquidon abi chieshënquido nadposh: ‘Aidi ëbitedi chuiquid icmenushe qeshun chuiquid dapa yacno chuitanta,’ qeshun abëd icquido chuimenuen chuiquid dapa yacno nidmeposh.

¹⁵ “Adoquid, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid ¿tedtsi daëd uapashba? abibi qeshun ambi meneboedo chomeposh.

¹⁶ “Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icho,’ queposh.

¹⁷ “Adoquien: ‘Ëmbi meneboed abentsëc bedshun bédamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanocquido chuiquid icta,’ caposh abi chuiquidën.

¹⁸ “Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

¹⁹ “Adoquien: ‘Mimbi daëd uaidtedquiobi shubu dadpen icquid 5ted uano-uanocquido chuiquid icta,’ caposh abi chuiquidën.

²⁰ “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icho. ²¹ Mitsana bedtequid mimbi tantiactedimbo daëd uatiapimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanushe quash dacuëdec tsadteniobi,’ queposh.

²² “Adoquien: ‘Ëmbi chiaid niacquid mibi neyoc. Mimbi mua uaqin chiaidtedimbocsho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco? ²³ ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquo icco? Aden meniac daëd uashun bedtsenombi,’ queposh abi chuiquid.

²⁴ “Aden aton na daëd uaisa chuishumbic iccuededquido chuiquin: ‘Ëbi chieshënquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

²⁵ “Adoquien: ‘Aton na dadpen iqueque. Aid menenda, chuiquid,’ queposh iccuededquido.

²⁶ “Adoquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaquin menembi. Ëmbi chiacpaden chieshquin daëd uainquiocsho isun ëmbi meneboed bedshunembi. ²⁷ Adembidi ëbi chieshë nec abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

Chuiquid dapabimboec yec Edusaden yacno Esus choaid
(*Mat 21.1-11; Mad 11.1-11; Uan 12.12-19*)

²⁸ Aden chuibanashic Esus Edusaden yacmi nidequi anoentsëqui choash nidtuidpanëdash. ²⁹ Uano macuësh Odibos caid potsembo shubu daëdpacksëc icquid Bedpaque caid icnubi shubu daëdpacksëc icquid utsi Betania caid icpanëdash. Adec nidtuidash abëd icquid daëd caic: ³⁰ —Nëid podquedën nidquimbi shubu daëdpacksëc yacno choshon cabayobitsecquidën bacuë caniaid catsadabicquid tënëshaid mimi istuidendac. Aid istuidshun tënëshaid tēchicshun nēmbo bēta. ³¹ Aden chicsho isash: “¿Atotsi canun mimi aid chicpe?” quepec. Adsho tantiashun: “Con Icho bunaid nec,” quequin chuita —quepanëdash Esus.

³² Adoac nidshun istuidtanquin ³³ cabayobitsecquidēmpi tënëshaid tēchicsho isash: —¿Atotsi canuen aid tēchique? —capanëdash icbon.

³⁴ Adoquien: —Con Icho bunaid nec —qeshun Esus yacno nimbanquin abi tënëshaidën buampanëdash Esusbëd icquidon.

³⁵ Aden bëshun, Chuiquid dapa Esus nepanui, quec onqeshun Esusbëd icquidon aton dashcute bēntsecquid chictanquin cabayobitsecquid capucshun Esus catsadumpanëdash. ³⁶ Aden Esus catsadunash nidnubien iccuededquidontsen aton dashcute bēntsecquid chictanquin podqued ansambanec nidanepanëdash. Chuiquid dapa Esus nepanui, qeshun aidontsen adopanëdash.

³⁷ Adec nidanec macuësh Odibos caid budtuidequi iccuededquidtedimbo bēdambo iquec comapenen Nuquin Papan nadatiambocquin naid ambi isboed naden chiec comapenec onqucuededpanëdash:

³⁸ —Nuquin Papan chomiaid ambi chuiquid dapa icmiaid ambi bēdambo icmiaidquiobidi nec. Nuquin Papa yacno abëdi bēdamboec tabadequi icsaisatedi iquendac —quepanëdash iccuededquido comapenec cuēdcuededec.

³⁹ Aden cuēdcuededsho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

⁴⁰ Adoquien: —Ëmbi naid chiec aidtedi cuēdcuededenquiocnoc cuēnote podqued cuēman samëdquido onquianendac —quepanëdash Esus padiseyobo chiec.

⁴¹ Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash: ⁴² —Ëbi bēdambo icmequid Esus nec, quec nēbi ëbi tantiaquid mibi ictsiandac. Tantiesic icquin mibi chuiquid mimi nibēnacpadquid mimi istuidtiapimbo iquendac. ⁴³ Yucash choquin uimanēmēnquidon mibi cuentiapimbo noc tsi-catebudcuenendac. ⁴⁴ Aden mibi tsi-catebudcuenshun min bacuëbobëdtabi naimbudquin mibi unēs uashun nendac. Min shubutedi nibēdquienendac. Nuquin Papan chomiaid ëbi tantiesic icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unēsquio icnuc anocquido chiacbimboec adpanëdash.

Nuquin Papa tabadte shubu uashunaid yacnoshon cuemiaid

⁴⁵ Adashic, Edusaden yacno choash Nuquin Papa tabadte shubu uashunaidën puduedshun nuntanshunquio aton na bedtequid bednun menebanquido Esusën cuemepanëdash.

⁴⁶ Cuemec: —Nuquin Papan chuipampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aidtedi cuemec.

⁴⁷ Adoshombic, badiadquidën-badiadquidēnquieq Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepaba? quequin caimbededpanëdash. ⁴⁸ Aden caimbededquimbi Esusën chiaid tantianu quec dadpen Esus datsidacsho isun ashunquio isadaidbon Esus cuesunemenuen bedtiapimbo icpanëdash.

20

¿Tсандан чуибанта каид мибине?

(Mat 21.23-27; Mad 11.27-33)

¹ Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash.

² Cho-choshon: —¿Tсандан чуибанта каид мибине? Tantuan. Èbitedi chui —capanëdash.

³ Adoaquien: —Èmbia tantianu. Èbi chui. ⁴ ¿Nuquin Papan èmbi chiaid chuibanshun mentobanta caidta Uan icpondash? Padenquio mibi quenuc, ¿Matsesën nata caidta nepondash, quequinda mimbi tantie? —quepanëdash Esus isadaidbo tsusiobo caic.

⁵ Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, èbitedi qesho tantiash Esus nadpendac. ¿Atotsieshun Uanën chuisho mibitedishun tantienquio icponda? ⁶ Matsesën nata caid Uan pado niondash, èbitedi qesho tantiashun iccuededquidon cuënoten nuquitedi se-sependac. Nuquin Papan chuimiai, Uan icpondash, quequin iccuededquidon tantiec —quepanëdash isadaidbo tsusiobo.

⁷ Adec onquecuededash: —¿Tsuentsin nata caid Uan pado icpondash? quequin tantiambo iccombi —quepanëdash tsusiobo.

⁸ Adoaquien: —Mimbi chienquio yacpadembi èmbitsen èbi chuita caquid mibi chienquio icoaimbi —quepanëdash Esus.

Neshcashunquidon icsambocquin naid

(Mat 21.33-44; Mad 12.1-11)

⁹ Aden isadaidbo tsusiobo chuishumbic, Utsi chuinu, quiacbimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi èbi neshcashunta caidtedi istuidash tied icbo nidposh. Nidaid utsin yuec tabadshumbic:

¹⁰ ‘Tiedën caniquid ènden bacuëpash. Èbi neshcashunquidën musucaid con na bedmenu,’ qeshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestasquin tiedën caniquid bacuë ambi musucaid menenquicquin abi neshcashunquidon icbon chomiaid nidmeoaposh. ¹¹ Adoshombic, icbon aton tied yacno ambi namiaid utsi nidmeoaposh. Aid chosho isun ademvidi cuestasquin icsamboen nashun ambi musucaid menenquicquin icbo neshcashunquidon aйтsen nidmeoaposh. ¹² Adoshombic, ambi namiaid utsitsen icbon nidmeoaposh. Aidi chosho isun chiuë-chiuëpambocnoc cuestasquin tied tsitsuno icbo neshcashunquidon aidi netamposh.

¹³ ‘Netamboedi nidtoanec icbo yacno choacsho isash: ‘¿Mitsipadentsimbi napeba? Con madombobi èbi cudasaid con tied yacno nidmembali. Aidi con tied yacno chosho bèdamboen ispec,’ quequin aton mado nidmeposh.

¹⁴ ‘Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna. ¹⁵ Aden cuesunian icbo unësan aton natedi nuquin na ictsiandac,’ quecuededshun tied tsitsuno icbon mado buanshun icbo neshcashunquidon cuesuneposh —quequin chiaishic Esus:

“‘Mìn mado cuesuniosh,’ quequin utsin chiac ¿atotsi tied icbon napec? ¹⁶ Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenquio icpashun —quepanëdash iccuededquido. ¹⁷ Adoaquien iccuededquido bèisequi Esus nadpanëdash: —¿Nuquin Papan dada uamiaiën naden chienquoda icpampic? Ai, aйдën chuipampid nad iquec: “Shubu uanuequidën isuidaid buintad utsin ambia nitsinaid icposh.” ¹⁸ Buintad sec uebudec podquëd-podquëdendac. Ademvidi buintad uebudquin matses tish-tishendac. Ademvidi, abi yacno puduedmianquid tanti-auidquid Nuquin Papan cuëshëdmiac comapenen cuidte yacno tabadendac —quepanëdash Esus.

¹⁹ Aden Esusën chuisho tantiash: —Nuqui naid chiacbimboen chiec Esus niosh —quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

Sesadën shocoshëmpi neque. Mene, quequin chiaid

(Mat 21.45-46; 22.15-22; Mad 12.12-17)

²⁰ Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdambocquid nebi, quequin ismiacbimboecquid icsho Esusën chuibanacno tsusiobon nidmepanëdash. Esus yacno nidshun èmbi ista caidon chuimiac Esusën icsamboen chuitsiash. Aden chuisho isadaidpembo ancaquidën Esus bedpashun, quequin tantiaquin nidmepanëdash. ²¹ Aden nidmiac choash Esus ista caid

abentsëc: —Mimbi tantiamequin chuibanaid bédambo iquec, quequin tantiembi, Abitedi Nuquin Papan chiaid abimbo chuibanquid mibi nec. ²² Adquid mibi icquin ëbi chui. Tantianu. ¿Ancanquid Sesad cuëmédquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? —quepanëdash isadaidbo tsusiobon ista caid Esus caic.

²³ Aden chuisho tantiashun choboedën icsamboen tantiaid tantiaquin Esusën nadopanëdash: ²⁴ —Piucquid shocoshëmpi ancanquidën bec cho caid sananquin abuc cadota —cac sananquin abuc cadosho isash: —¿Tsuntsin podò bitsi dada uaid aidën icpec? —quepanëdash Esus.

²⁵ Adoaquien: —Ancanquid Sesadën na nec —quepanëdash tsusiobon ista quequin chomiaid.

Adoaquien: —Ancanquid, Bec cho, qesho meneta. Nuquin Papan naden nata cac adobanta —capanëdash Esusën. ²⁶ Aden chiac, Bédamboen tantiaquidimboc onquec, quequin tantiaquin icsamboen chuimetiapimbo yec tsusiobon chomiaid otacquo tabadcededpanëdash.

Uincuen uaid chido bedesa nec, quequin chiaid
(Mat 22.23-33; Mad 12.18-27)

²⁷ Adashic, saduseyobo caido yec ²⁸ unësaid uincuen uate nibëdec quequin chuiquido Esus yacno chopanëdash. Aido choash: —Unësaidën chido bedshun aidën tishmiaid unësaidën bacuëbimbocquid iquendac, quequin Moisesën dada uapampic. ²⁹ Aden Moisesën dada uaid icnuc dada 7ted iccuededposh. Aidedtada icnuc bëyuc tishaidën aton chido bedshun bacuë tishmiabi yec unësposh. ³⁰ Aton buchi unësan aidën chido bedash adecbidi bacuë tishmiabi yec unësoaposh aton utsi. ³¹ Adembidi, bëyuc tishaid tsibanquidën—tsibanquidënquien chido abentsëqui bedto-bedtoec bacuë tishmiabi yec unësbuneposh. ³² Yucash chidotsen unësoaposh. ³³ Adec chido abentsëcshun bënë dadpen icboedi uincuen uate ushë icnuc ¿mitsicquid chidon bënë icpeque? Èbi chui. Tantianu —quepanëdash saduseyobo Esus caic.

³⁴ Adoaquien: —Nidaidënshun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec. ³⁵ Uincuen uate ushë choan Nuquin Papan bédamboen isaido abëdi tabadquin chido bedenquo iquendac. Adembidi, aton champi menenquid aton papan iquendac. ³⁶ Adecbidi, Nuquin Papan uaido mayan bédabo unësesa yacpadquiequi Nuquin Papan uincuen uatequid unësenquo iquendac. Nuquin Papan uincuen uatequido aton bacuëbo nendac. ³⁷ Adembidi chuinu. Tántia. Cuëtèmpi nédënquiacimbocquid isun Moisesën dada uapampid nec. Cuëtè nédënquiacimbocchesho isun Nuquin Papa chuiquin nadopampic: “Tsusedpa Abadauanën papa cain cuënaid mibi nec. Adecbidi tsusedpa Isaquén papa cain cuënaid mibi neoaic. Adecbidi tsusedpa Acobon papa cain cuënaid mibi nec,” quequin Moisesën chuipampic. ³⁸ Moisesën tsusedpabo ambi chuiboed ënden unësampidën nami chodquaidën papa cain Nuquin Papa cuëntiapimbo iquec. Aton nami chodquaiash abi tantiaquidquid icquin tantiecsadquidën papa cain Nuquin Papa cuë nec —quepanëdash Esus saduseyobo chiech.

³⁹ Aden Esusën chuisho tantiash Nuquin Papan naden nata quequin chiaid tantiamequid padiseyobo utsi—utsiec nadpanëdash: —Bédamboen mimbi chuibanoc —quepanëdash Esus chiech. ⁴⁰ Aden Esusën chuisho tantiashun Esus chuimetiapimbo utsibo icpanëdash.

¿Tsuntsin mado Quidistu nepec? quiaid
(Mat 22.41-46; Mad 12.35-37)

⁴¹ Aden utsibon abi icsamboen chuimetiapimbo icsho isun Esusën nadopanëdash: —Èbi abia yampid icsho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuipec? ⁴² Dabidën ambibi Sadmo caid dada uaquin naden chuipampic:

“Icho utsi yec con mado mibi chiembique. Tántia, quequin chiech icho dapa nadpampic: ‘Èquë con dayun abiucquo cainec tsadec cho

⁴³ ma mibi chieshënquidtedi mimbi namiaid ma icpanu,’”

quequin Nuquin Papan Esus chiaid Moisesën dada uapampid nec. ⁴⁴ Aden Dabid padon dada uaquin ¿mitsipadomboentsibi con icho cashumbi con mado ëbi caoapampic Dabidën? —quepanëdash Esus abi chieshënquido caic.

Naden nata quequin chiaid tantiamequidpadquid iquenda, quequin chiaid
(Mat 23.1-36; Mad 12.38-40; Duc 11.37-54)

⁴⁵ Aden chuishun iccuededquidon tantianubi abëd icquido Esusën nadopanëdash: ⁴⁶ —Nuquin Papan naden nata quequin chiaid tantiamequidpadquid iquenda. Aido ancanquidimbocchesho utsibon ispashuni quequin nabanesa dasiuidacpadec dashcute ënapen

icquid dasiuidcuededpec. Adomboembidi tantiec matses dadpen iccuededacno nidash capuequi, Èbi bèquedquidon èbi chuiquid dapabimboecsho isash onquequin chuiplashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsadtene. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsadtene. Adquidpadquid iquenda. ⁴⁷ Aidon bèdamboen nabanacimboen nianten natedi bedbanec. Aidombidi Nuquin Papa abimbo tantiacimboec yuen chiec onquec. Aden bèdamboen nabanacimboecquido Nuquin Papan comapenen cuidendac. Adoesa bèdiactsèc cuidendac –quepanèdash Esus abèd icquido chiec.

21

*Nianten piucquid shocoshèmpi meniaid
(Mad 12.41-44)*

¹ Adashic, Nuquin Papa tabadte shubu uashunaid yacno tabadtuidash tsadquin Esusèn isbampanèdash. Ambi isaido Nuquin Papa tabadte shubu nacnemetè cuidnu, quequin menequin aid shubun shocosh tabècaidèn aton na bedtequid utsin-utsiniquien sandobedpanèdash. Aton na bedtequid dadpen icquidon dadpen sandobededsho isquimbi ² nianten aton na nibèdquidèmbi aton na bedtequid shocosh daèd ictsècquid sandosho ispanèdash. ³⁻⁴ Adosho isash: –Chuinu. Tanta. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niantè isec. Utsibon aton na dadpen abi icnubi dadpen menesho, Daèdpectsèc menequido nec, quequin Nuquin Papan aido isoaic –quepanèdash Esus.

*Abitedi naimbudte ushè choec quequin chuite
(Mat 24.1-35, 42-44; Mad 13.1-37)*

⁵ Adashic, Nuquin Papa tabadte shubu uashunaidbèdtabi matsesèn dectanaid didiquesho isec: –Nuquin Papa tabadte shubu bèdaidquio iquec –quepanèdash utsibo.

⁶ Adoaquien: –Mimbi nèbi isaid yuecash nidbèdquidendac. Matses utsibon nèid shubutedi chic-chicbudendac –quepanèdash Esus.

⁷ Adoaquien: –¿Mitsipadèn Nuquin Papa tabadte shubu uashunaid chic-chicquin tauapec? ¿Aid ushè anoentsèqui yanuc mitsipadquid ismiantè icpeque? Tantaranu. Chui –quepanèdash utsibo.

⁸ Adoaquien: –Cho-choshon muaquin chuisho tantienquiocta. Adquid cho-choash: “Nuquin Papan Chomiaid Quidistu nebique. Èbèd iquec cho,” queded-quededendac. Aden chuiquid tsibanenda. ⁹ Adecbidi: “Cuesnancuededec,” quesho tantiashtu dacuèdenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushè badedquio choenquio iquendac –quepanèdash Esus.

¹⁰ Aden chiequi abi onquebudec: –Adecbidi, abi ancaquid dapan nidmiac nidaid utsin icquidobèd cuesnancuededendac. ¹¹ Adecbidi, nidaid utsi-utsiec yacno canchednuec ishucud-ishcudendac. Adecbidi, utsi-utsiec yacno bunquiotè iquendac. Adecbidi, utsi-utsiec yacno daicsabudnetè iquendac. Adecbidi, mibi dacuèdmetequid iquendac. Adecbidi, mimbi isacmaid abucùesh natiambo icsho mimbi isbedendac.

¹² “Aidtedi choabincuc èbi tantiaquid utsi-utsien bedshun mèyanendac. Adobanshumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac ¹³ aidotsen tantiaquid yantsiashtu queshun èbi chuibanta. ¹⁴ Aden buanaquid, ¿atotsimbi ancanquid cape? quequin tantiec tsadenda. ¹⁵ Nuquin Papan Mayanèn tantiamiacpadomboen mimbi chuibanendac. Adoac, Icsambocquid mibi nec, quetiapimbo mibi chieshènquido iquendac. ¹⁶ Adembidi, Nuquin Papan chiaid tantiesan min shubun icquidèn mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiashtu. Animbi aton mado adembidi adotsiashtu. Utsi aton buchimbi adoatsiashtu. Utsi aton chuchumbi adoatsiashtu. Utsin abèdtan isedquidèmbi adoatsiashtu. ¹⁷ Èbi tantiaquid chieshènquid dadpen iquendac. ¹⁸⁻¹⁹ Aden nabanquin mibi cuesunemenu, cac chieshenquio yec, Esus tantiaquid nebi, quequid icta. Adquid iquec unèsash ènèdenquio yec Nuquin Papabèd mibi tabadendac.

²⁰ “Adecbidi shubu dadpen icquid Edusaden caid yacno cuesanquid dadpen cho-choshon tsicatebudsho isash, Edusaden yacno naimbudte ushè choec, quequin mimbi tantientac. ²¹ Aden tantiec ma Cadidia yacnocquido macuèsh dapa yacno cuempanuna. Adecbidi, Edusaden yacnocquido ma auèshquio cuempanuna. Adecbidi, dèuequido Edusaden yacno ma nidenquiocpanuna. ²² Aid ushè icnuc Nuquin Papan chiacpadomboen cuidtequid iquendac. ²³ Aid ushè chonoc matses utsibon Edusaden yacno tsicatebudac pete naimbudnuc bacuè usunquidobèd bacuè chishmequido mèyadec natiaquidendac. Edusaden yacnocquido abi tantiesabo icsho Nuquin Papan natiambocquin cuidte iquendac.

²⁴ Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsiccateboedo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

²⁵ “Adec Nuquin Papa, Chën, quian badiadën ushë, inchëshën ushë uispa chedo aitedi ambi nadatiambocquin naid ismiantequid iquendac. Aid ismiantë icsho isash, Uinsadpambo iquec, quec comapenec dacuëdec matsestedi tabadcuededendac. Acte nati-ambo chëuëdsho isash adqueicbidi comapenec dacuëdec matsestedi tabadcuededoaindac. ²⁶ Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac. ²⁷ Adnubini Nuquin Papan chomiaid matsesaid ëbi dasiuidaid bëchomauanquieic ushë chënquiacimboec uëshëmbo yec nadatiambocquin nabanquidquio abu ushun ëbi budsho matsestedishun isbededendac. ²⁸ Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bëdamocquin abuc isteneta –quepanëdash Esus.

²⁹ Aden chuishumbic ambi chuiboeed ushë chote tantiamenuen nadopanëdash: ³⁰ –Cuëtampi bacuëacsho isash, Ènden suc seccuduquiac nëbi seta taëec, quequin matsesën tantiec. ³¹ Adembidi ëmbi chuiboeed icsho isun, Nuquin Papabëd tabadte ushë choec, quequin mimbi tantiec. ³² Abimbo chiembique. Tantia. Èmbi chuibamboed naimbudabicnuc con tan matses isadaidbo naimëdbudenquio iquendac. ³³ Abubëdta naimbudtequid nidaid nendac. Èmbi chiaid abimbo iquendac.

³⁴⁻³⁵ “Adembidi chuinu. Tantiata. Nidaidën capuquidën, Nëbi ëbi sec, quequin tantienquio yec capusho badedquio siac cuentiapimbo iquec. Adembidi, Natiatë ushë choec, quequin tantienquio yec chieshquin badiadquidën-badiadquidënquien paëmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matsestedi cuidte ushë choenda ictic? Ai, aid ushë choendac, quequin caimbudec bëdamboec tabadta. ³⁶ Ènenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquio ëbi icme, Papa. Adembidi natiambocquin cuidte ushë chonoshe qeshun ëbi mënchicta, Papa. Aid ushë chonoc ëbi bedshun mimbi chomiac matsesaidën dayun tsadquidquio ëbi icmeta, Papa, quec onquedeneta –capanëdash Esusën.

³⁷ Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash. Adecbidi inchëshquidën-inchëshquidënquieic macuësh Odibos caid yacno nidash tabadtenapanëdash. ³⁸ Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

22

Esus bedmenu, quequidquio Udas

(*Mat 26.1-5, 14-16; Mad 14.1-2, 10-11; Uan 11.45-53*)

¹ Adashic, nami uabicquid pete tantiate ushë, Pascuas caid, anoentsëqui yampanëdash. ² Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido iccuededtenequin, ¿Mitsipaden Esus bedshun cuesunecque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquio icpanëdash. ³ Adnubien Udas cashumbic Iscadiote caid Esusbëd icquid dadpudedshun Satanasën tantiamiac ⁴ Esus chieshënquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshënquid utsibo iquec quianec aido yacno Udas choash, Esus bedmete bunebi, quequin chuipanëdash. ⁵ Aden chiac isadaidbo tsusiobo bëdambo iquebi quetanquin: –Esus bedmiacsho mibi piucquid menenu –capanëdash Udas chuiquin. ⁶ Adoaquien: –Adonuna –quianec Esus yacno nidoash abëd capuquimbi Esus tantiec datsidquido nibëdacnoshon abi chieshënquido, isadaidbo tsusiobo, Esus bedmimbi, quequin isted-istedpanëdash Udasën.

Ènquin nidaidëshun Esusën pebanaid

(*Mat 26.17-29; Mad 14.12-25; Uan 13.21-30; 1Cod 11.23-26*)

⁷ Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe qeshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash. ⁸ Aid ushë chonoc Uambëdta Petedo chuiquin: –Matante ushë tantianuequin obeca bacuë cuesuniaid penun nacentia –capanëdash Esusën.

⁹ Adoaquien: –¿Mitsishumbimbi aid nacnempe? –quepanëdash Uambëd Petedo.

¹⁰ Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun ¹¹ shubun puduedabi naden shubu icho chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. ¹² Aden chiac abuc dectatoshon abuc quënëcquid mibi aidëmbi ismendac. Ashunquio penun nacnenta —capanëdash Esusën.

¹³ Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempandash.

¹⁴ Adashic, inchëshën choash abëd icquidobëd pete sante cueste dayun uequi Esus: ¹⁵ —Ëbi mëyante yanabincuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiadquo yanobi. ¹⁶ Matanampid tantiaquin obeca cuesuneshun nuqui pehocpadomboen mibëdtambi nidaidënshun padpiden penquo iquendambi. Matses icsaquid icsho cuidnushe queshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

¹⁷ Adoshombic dëshote sananec Nuquin Papa chiec onqueshun actanquin abëd icquido menec: —Në, aniactse-aniactsen acban mibitedishun. ¹⁸ Tiedën caniquid ënë nidaidënshun padpiden aquenquio iquendambi. Nuquin Papa yacno choash tabadquidobëdtambi ashunquio aquendambi —quepanëdash Esus.

¹⁹ Adoshombic, pete bedshun Nuquin Papa chiec onqueshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cuesuniaid tantiaquin pebeded —capanëdash Esusën.

²⁰ Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, queshun obecaded cuesunemenuen isadaidbon menedeniac. Aden cuesuniaidën intac siquec unëso isun, Obeca cuesuneboed ëbi icsaquid icsho cuidnushe queshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esusded cuidadac, quequin tantiatequidquo nendac. ²¹ Ëbi chieshënquido ëbi bedmenuequin chuiquid pete sante dayun ëbëdi uec. ²² Nuquin Papan chiampicpaden ëbi matsesacsho unës uaid iquendac. Ëbi chieshënquido bedmenuequin chuiquid comapenen cuidte iquendac —quepanëdash Esus.

²³ Aden Esusën chuisho tantiaash abëd icquido: —¿Midacquidien capec? — quequededpanëdash.

²⁴ Adashic: —Doseted nuqui iquec. ¿Tsudain chuiquid icpec? quequin utsibon ispec — quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanampanëdash. ²⁵ Adec chushcanansho tantiaash Esus nadpanëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ëmbi namiaido bëdambo icmequid nebi, quequin muaquin chiec. ²⁶ Mibitedi adquid iquenda. Nadquidquo icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta. ²⁷ Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi. ²⁸ Ëbi chieshënquido icnuc ëbi nianesa ²⁹ icsho con Pan ëbi chuiquid icmiacpadquid chuiquid mibitedi icmendambi. ³⁰ Aden chuiquid icmiac ëbëd icquid ëbëdtambi peshun aquec mibitedi tabadendac. Chuiquid icquid abuc tsadte icquidën tsadquin isadaidbon naid bëdabëda ambi naid icsa cuidte ëbëdtambi mimbi chuibanendac —quepanëdash Esus abëd icquido caic.

*Esus ëmbi isacmaid nec, quequin Petedon chiaid
(Mat 26.31-35; Mad 14.27-31; Uan 13.36-38)*

³¹ Aden chuishumbic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiadquo iquec. Aden yuanuequin piacho macuesquin nainshun bitsi secacimboen mëyantankin ëbëd icboedi mibi cuëshëdmetiadquo iquec. ³² Aden mibi Satanasën yuatiadquo iquec, quequin tantiaquin Nuquin Papa naden chiombi. Simon ëbëd icquidquo iqueque. Yuadnushe queshun Satanasën niac-niacmete chiaid Petedo tantienquo icmeta, Papa, quequin chiombi. Adec ëbëd icboedi cuëshëdtsembosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon —capanëdash Esusën Petedo chuiquin.

³³ Adoaquien: —Mibi caic, Quënën nauednu, quenuc mibëdi nauedadebi. Adecbidi mibi caic, Unës uanu, quenuc adecbidi mibëdi unës uadebi, Icho —quepanëdash Petedo Esus caic.

³⁴ Adoaquien: —Chuinu. Tantiata, Petedo. Cachina bënë cuëdanabincuc nëid inchëshëmbi, Esus ëmbi isacmaid nec, mibi queded-quededendac —quepanëdash Esus.

Buanenda, queboedëmbi, Buanta, quequin chiaid

³⁵ Aden Petedo chuishumbic abëd icquidtedi chuiquin: —Mitsana bedtequid buanenquio yec shictoachte buanenquio yec dashcute utsi buanenquio yec quec nidaneta, ëmbi cac nidash çmibitedi bunecta tabado? —capanëdash Esusën.

Adoquien: —Padenquio —quepanëdash abëd icquido.

³⁶ Adoquien: —Ënden adquid buanenda, queboedi, Ëbi nibëdnuc mitsana bedtequid shictoachtebëdtabi buanta. Chëshite bednu, qeshun mitsana bedtequid nibëdnuc min dashcute abentsëc menequin chëshite bedshun adembi buanta, caimbi nëbi. ³⁷ Nuquin Papan ëbi chuiquin dada uamiampid nad iqueque. Tantia. Chuinu: “Icsambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadomboembi nëbimbobi naimbudembi —quepanëdash Esus.

³⁸ Adoquien Esusën chuiboed tantienquio yec abëd icquido: —Në, chëshite daëd iqueque. Is, Icbo —quepanëdash.

Aden abëd icquidon tantienquiosho isash: —Ai, padi —quepanëdash Esus.

Macuësh Odibos caid yacnoshon Esusën Nuquin Papa chiaid

(*Mat 26.36-46; Mad 14.32-42*)

³⁹ Adashic, Edusaden caid yacnoësh macuësh Odibos caid yacno abi nidteniacpadën nidnuc abëd icquidon tsibanampanëdash. ⁴⁰ Adec nidequi abi tabadteniacno choshon Esusën: —Chieshëmënnquidën ëbi namete bunacpaden natiapimbocquid ëbi icme, Papa, quequin Nuquin Papa chuideneta —capanëdash abëd icquido chuiquin. ⁴¹ Aden chiashic abiuidsëqui uano nidash danëshën nidaidën sebudash Nuquin Papa chiec nadech yuec Esus onquetan-onquetampanëdash: ⁴² —Mëyanquin mibi unës uanu, ëbi chieshënquidon casho tantias bunenquio yec. Adoenda, quepatsiac mibi Papa. Adoshombic mibi bunacpadomboen nameta, Papa —capanëdash Esusën Nuquin Papa chuiquin. ⁴³ Aden Esusën badedbadedquien chuishobi Nuquin Papan uaid mayan bëda choshon Esus chieshtomenquio icpanëdash. ⁴⁴ Aden uidën uaqui adec uëshquec Nuquin Papa chuiquiequi ichacbëd intacash nidaidën siquepanëdash.

⁴⁵ Aden Nuquin Papa chiashic nidtoash abëd icquido yacno choaquimbi ambi chuisho tantiaobed tantiec uimabudash ushec uesho istuidshun: ⁴⁶ —çAtotsi quiash ushe? Nidtoashon ëbi chieshënquidën nametiadquio yacpaden natiapimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

Esus bedaid

(*Mat 26.47-56; Mad 14.43-50; Uan 18.2-11*)

⁴⁷ Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chohanëdash. Adec choquimbi abi tanchoccanuesho isash: ⁴⁸ —çËbi mat-sesaid icsho bedmenuen tanchoccaquinda ëbi chieshënquido isme, Udas? —quepanëdash Esus.

⁴⁹ Aden Udasën nac Esus bednuesho isash Esusbëd icquido: —çCho-choquido nuquida cuesten cuespe? —quec ⁵⁰ onquetanquin abentsëcshun isadaidbo tsusio dapan yuan pabiäte opioc pateshunepanëdash.

⁵¹ Adosho isash: —Padi. Chën. Adoenda —quetanquin Esusën tsusio dapan yuan pabiäte patiacno mishquin bëdamepanëdash.

⁵² Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: —çMatses cuëshëdmequid nec, qeshunda utsin-utsinquin chëshite sananubi utsin-utsinquin cuate sananëc cho-chopec? ⁵³ Badiadquidën-badiadquidënquieç Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nëidquobi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac —quepanëdash Esus.

Ëmbi isacmaid nec, Petedo quiaid

(*Mat 26.57-58, 69-75; Mad 14.53-54, 66-72; Uan 18.12-18, 25-27*)

⁵⁴ Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chohanëdash. ⁵⁵ Adec choec umanuc cuëte dëtsiadaid cuëc utsibo tabadacno Petedo cuëte cuëc tsadpanëdash. ⁵⁶ Ambo Petedo tsadsho isash tsusion yuaid chido anoentsëqui choshon bëdamboen isec: —Nëid bëboedbëd icboedi nec —quepanëdash.

⁵⁷ Adoquien: —Bëboed ëmbi isacmaidquio nec —quepanëdash Petedo.

⁵⁸ Adashic, yuecpactsëcshun Petedo isec utsitsen: —Ma mibi bëboedbëd icquid neyoc —quepanëdash.

Adoquien: —Aidbëd iquenquio iccobi —quepanëdash Petedo.

⁵⁹ Adashic yuec-yuecpactsëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc —queoapanëdash.

⁶⁰ Adoquien: —Mimbi chiaidbëd icquidpenquo nebi —quepanëdash Petedo. Aden chuinubien cachina bënë cuëdampanëdash. ⁶¹ Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacnmaid nec, quequin tedesteden mimbi chiendac,” quequin aton Icbon chuiboed tantiash ⁶² unësquo yec umanuc nidash Petedo shubiquipanëdash.

Esus sondadon mamëshunaid

(*Mat 26.67-68; Mad 14.65*)

⁶³ Adshumbic Esus cuenushe qeshun abi isquidon, sondadon, Esus mamëshumbededquin cuesbededpanëdash. ⁶⁴ Adoshombic, dashcute cuëshaidën bëpucshun cuestanquin Esus sondadon nadopanëdash: —Mibi tantiaquidquo icquin çmidaquidën mibi nëbi cueseque. Tiantianu. Chui —capanëdash Esus chuiquin. ⁶⁵ Aden cuesbededquin Esus icsamboen chuiipanëdash.

Isadaidbo tsusiobo yacno Esus buanaid

(*Mat 26.59-66; Mad 14.55-64; Uan 18.19-24*)

⁶⁶ Adshumbic badiadnubi isadaidbo tsusiobo iccuededado Esus buanshun nënantanquo nidtomesho isash: —Nuquin Papan chomiaid, Quidistu caid, nebi, quecta ique? Tiantianu. Chui —quepanëdash isadaidbo tsusiobo Esus caic.

Adoquien: —Ëmbi abimbo chuisho mibitedishun tantienquo iquendac. ⁶⁸ Ademibidi, çMitsipadquidquo Nuquin Papan chomiaid neque? Tiantianu. Èbi chui, cac ëcbedenquo mimbi iquendac. ⁶⁹ Nad iqueque. Chuinu. Tantia. Matsesash nidaidën tabadboedi ambi nadatiambocquin naidënquo Nuquin Papan dayunquo tsadendabi —quepanëdash Esus isadaidbo tsusiobo tantiamequin chiec.

⁷⁰ Adoquien: —çNuquin Papan madombobi nebi, quequina chio? —quepanëdash isadaidbo tsusiobo Esus caic.

Adoquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

⁷¹ Adoquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuitiadquocquin chuita, cainquo iquemi utsibo chuiquin. Adquid iquec, quequin nuqui tantiec —quepanëdash isadaidbo tsusiobo.

23

Pidato yacno Esus buanaid

(*Mat 27.1-2, 11-14; Mad 15.1-5; Uan 18.28-38*)

¹ Aden ambibi chiec Esus muc nec, isadaidbo tsusio abentsëc qesho tantiash isadaidbo tsusiobotedi nidtoshon Esus bedshun Pidato yacno buampanëdash. ² Aden Pidato yacno Esus bëec choash: —Esusën chuibansho tantiash, Cuëshëdmianquid nec, quequin mibi yacno bëombi. Nèid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

³ Adoquien Pidato: —çIsadaidbo chuiquid dapada ne? —quepanëdash Esus caic.

Adoquien: —Mimbi chiaidquio abimbo iquec —quepanëdash Esus.

⁴ Adsho tantiash: —çAtotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

⁵ Adoquien: —Ambi tantiamiaidënquo Cadidia yacnocquido nëishmiac comapenec cuëdcededosh. Anoshon tantiameshumbic Edusaden yacno choshon adomboembidi tantiam eoaposh —quepanëdash isadaidbo tsusiobo Pidato caic.

Edodes yacno Esus buanaid

⁶ Aden chuisho tantiash: —çNidaid Cadidia yacnoësh choquidta Esus nec? —quepanëdash Pidato.

⁷ Adoquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

⁸ Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquo nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec ⁹ Esus chuimenu quec Edodes onquepanëdash. Adoqui Esusën ëcbedenquo icpanëdash. ¹⁰ Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec. ¹¹ Adoac Edodesbëd sondado Esus icsamboen chuiquin mamëshumbededshumbi chuiquid dapan dashcutebimboecquid abichobicquid Esus dasiunshun Pidato yacno buameoapanëdash. ¹² Mimbi tantiacpaden Esus

cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesëbëd Pidato bëdambo yampanëdash.

Esus cuesten dectameta quiaid

(*Mat 27.15-26; Mad 15.6-15; Uan 18.39-19.16*)

¹³ Adashic, isadaidbo tsusiobobëdta isadaidbo utsibo chomeshun ¹⁴ Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aibëdi onquiash, ¿Cuëshëmianquidta nedic? quendabi. ¹⁵ Aden ëmbi tantiacpadomboen tantiaquin Edodesën ëbi yacno chomeoaposh. Esus unës uainquiocquidquid nec. ¹⁶ Aden tantiaquin mëyanshun aidi nidmenuna —quepanëdash isadaidbo tsusiobo caic.

¹⁷ Aden chiac naden isadaidbon tantiapanëdash. Setan-setanquien icsambocquid con matses quënën nauedaid abentsëc ambi nidmiacpaden nëbi adquid utsi Pidaton nidmetsiash, quequin tantiec isadaidbo nadec cuëdcuededquin: ¹⁸ —Nëid Esus caid unës uatiadquid nec. Mimbi quënën nauednëdaid Badabas cuëmëdquid puduemeta —capanëdash comapenec cuëdcuededquin isadaidbon. ¹⁹ Ancanquid bunenquiocquin utsibo cuëdcuededmiomdaid utsi cuesuniondaibidi Badabas icsho quënën nauedmepanëdash.

²⁰ Adec isadaidbo cuëdcuededsho tantiash Esus nidmetiadquio iquec: —Esus cuidenquiocquidquid nec —quepanëdash Pidato isadaidbo caic.

²¹ Adnubien: —Cuesten dectame —capanëdash isadaidbon yuec comapenec cuëdcuededquin.

²² Adec cuëdcuededsho tantiash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantianu. Ma unës uainquiocquidquid neyoc. Aden tantiaquin mëyanshun Esus nidmimbi —quepanëdash Pidato.

²³ Adoquien: —Cuesten dectame —quepanëdash cuëdcuededoaic isadaidbo Pidato, Ai, camenuc.

²⁴ Adoac iccuededquidon chiacpaden namenuc ²⁵ Pidaton: —Utsi cuesuniondaid Badabas puduemeshun Esus cuesten dectameta —capanëdash Pidaton cuesten dectamëquido chuiquin.

Esus mëyanaid

(*Mat 27.32-44; Mad 15.21-32; Uan 19.17-27*)

²⁶ Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëquedtuiddanquin Esus dectante cueste Simon buamiac Esus tsibambëpanëdash. ²⁷ Adec Esus nidsho isun matses dadpeshun shubiquin tsibanampanëdash. Adembidi abi tsibanquid chidobo icpanëdash. ²⁸ Adec chidobo abi tsibanec shubisho tantiash bidiadshun isec Esus: —Ëbi tantiec shubienda, Edusaden yacnoquidon chidobo. Mibibi tantiadec min bacuëbobëdta tantiec shubicedta. ²⁹ Yuecash mëyantequid ushë choendac. Aid ushë chonoc bacuë tishtiapimbocquid caic utsibo nadendac: “Bacuëbo nibëdquid icquin min bacuëbo natiasho isenquio mimbi iquec. Adquid yec bëdamboshë mibitedi iquec.” ³⁰ Mëyantequid ushë chonoc matses utsibon natiambocquin mëyanaiquin naden mimbi Nuquin Papa chiendac: “Natiagianquieque. Acte quiusudquid macuësh dapa catashmetabi, Papa, mibi quendac. Adecbidi, Acte quiusudquid macuësh masiametabi, Papa, utsi queoaindac.”

³¹ Ëbi buansho isec shubiequi, Ëbi mëyantequid ushë choec, quequin tantiesha mibi icpec. Nëdënquenquiocquidquid achuëshquiocquid nëdëncasho isash: “¿Tanunquiocquid badedquio nëdënquenquio icpec,” quecta mibi icti? Adembidi: “Cuidenquiocquidquid nec,” queboedëmbi ëbi icsaisa unës uasho isash: “¿Ëbitedi icsambocquid comapenen cuidenquio icpec,” queopecta mibi ique? Ai, quequin tantiatad —quepanëdash Esus.

³² Adnubien Esusbëdta icsambocquid dada daëd nidmequimbi ³³ macuësh mapi canite caid yacno choshombi ëquë daëd dectambudcuentanquin nënantanquio Esus dectampanëdash. ³⁴ Dectanac diadequi Esus Nuquin Papa caic: —Ëbi unës uanuequidon tantienquiocquin unës uainquiocquidquid cuesten dectanoshibique. Aidon icsamboen nambo yacimboc bëpiscudta, Papa —quepanëdash. Adnubic Esusën dashcute bednuequin sondadon dada uashun tëchun sandoshon cadotanequin dada uatempi puduemebanquin isquin Esusën dashcute bedbampanëdash.

³⁵ Adnubien matses dadpeshun isnubi Isadaidbo tsusiobo isec tabadquin mamëshumbedec: —¿Utsi-utsien Nuquin Papa yacno yuedanquidta nec? Aidi matses mëchictequid Nuquin Papan chomiaidquio iquec abibi budtiadquid diadpec. ¿Ada budeque? Isnu —quec onquecuededpanëdash.

³⁶ Adembidi sondadon mamëshumbededquin paëmbocquid mucambocquid sananquin Esus ismequimbi: ³⁷ —Isadaidbo chuiquid dapa iquec unësenquio iquebi, quiash nëid bednush bud —capanëdash sondadon.

³⁸ Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

³⁹ Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac ëbi daëdi mibëd budebi —quepanëdash abëd diadquid.

⁴⁰ Adec Esusbëdta dectamboed abentsëc onquesho tantiaash aibdëdta dectamboed utsi: —¿Aidi unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe? ⁴¹ Icsamboen nabanacsho cuidaid ëbi daëdi nec. Aidi bëdamboquin nabanquid icsho cuidenquioctiadquidi nec —quepanëdash.

⁴² Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

⁴³ Adoaquien: —Abimbo chuinu. Tantia. Nëid ushëmbi abuc ëbi bëdamboec tabadacno ëbëdi mibi iquendac —quepanëdash Esus abëdta dectamboed abentsëc chiec.

Esus unësaid

(*Mat 27.45-56; Mad 15.33-41; Uan 19.28-30*)

⁴⁴ Adec onquenubi ushë cuembo yanuc bëtinacimboec inchëshquio yashic ushë budtsan chënquedoapanëdash. ⁴⁵ Inchëshquio icnubi Nuquin Papa tabadte shubu uashunaid yacno puduedtemaid quëñën dashcute bitsipambocquid tsincabudquin dectanëdaid tembi daëdquio yec canchedbudcuempanëdash. ⁴⁶ Adnubien unës budec comapenec cuëdec: —Mibi yacno ëbi yuedta, Papa —quiash Esus unës budpanëdash.

⁴⁷ Adec Esus unëso isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bëdamboquid niosh. Aidi unësenquioctiadquidi unës uaposh —quepanëdash. ⁴⁸ Ambo tabadquin isquid utsibo Esus unëso isash unësquio yec aton shubuno nidanepanëdash. ⁴⁹ Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpanëdash.

Esus nauedaid

(*Mat 27.57-61; Mad 15.42, 47; Uan 19.38-42*)

⁵⁰ Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdamboquid icpanëdash. ⁵¹ Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin cainquidquio icpanëdash. ⁵² Aidi Esus unëso isash Esusën dada nauedtiadquio yec Pidato yacno nidshun ambi tantiacpaden Osen chuipanëdash. ⁵³ Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nashenaid chucanquio Esus Osen badedquio nauedpanëdash. ⁵⁴ Inchëshbudtsëqui seis yanuc chonoadtemaid ushë nec, qeshun Esusën dada Osen nauedpanëdash.

⁵⁵ Adnubien: Nauednu, quequin Osen buansho isun Cadidia yacnoësh Esusbëd chobedon chidobon tsibanshun shëcuën Esusën dada Osen nauedsho aidon isbededpanëdash. ⁵⁶ Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempanëdash. Nacnesh inchëshbudtsëqui seis icnuc Nuquin Papan chiacpadec chonoadtemaid ushë nec, quiash Esus nauedacno nidenquio yec tabadpanëdash. Nuquin Papan chiacpadec tabadpanëdash.

24

Esus uincuenta

(*Mat 28.1-10; Mad 16.1-8; Uan 20.1-10*)

¹ Adashic, sabado inchëshbudtsëqui seis yanuc chonoadtemaid ushë naimëdan badiadnuc danoshcanun ambi nacnemboed buanec Esus nauedbocno isec chidobo nidpanëdash. ² Ambo choshon Esus nauedshun bëtashaid cuënote shëcniacsho isashi ³ shëcuën puduedash aton Icho Esusën dada nibëdsho isec tabadpanëdash. ⁴ Adec tabadnubien dada daëd dashcute dasiuidacimboec dasiuidash chënquic chopanëdash. ⁵ Aid isash dacuëdcuededequi isenquio yec chidobo tabadpanëdash. Adsho isash dada daëd: —¿Atotsi canuen unësacsho nauedac uincueniaid nibëne? ⁶ Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuisho tantienquioda icco? ⁷ Naden Esusën mibidëdi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanac daëdec ushtanec uincuenoaiibi,” quequin Esusën chiondash —quepanëdash dada daëd chidobo caic. ⁸ Aden chiac chidobon Esusën chiaid abi bëpiscudaid padpiden tantiaipanëdash.

⁹ Aden tantiash Esus nauedaid shëcuë yacnoësh puduenanec Esus tantiaquid dadpen tabadacno choec puduedshun ambi isboedbëdtabi ambi tantiaboed chidobon chuibampanëdash. ¹⁰ Madia shubu dadpen icquid Mactada caid yacnoshon tishaid yec Uana yec Madia utsi Uambëdtan Acobon tita yec chido utsibo yec quec choshon Esusën Èbi chuibeneta caido chuiapanëdash. ¹¹ Aden chuisho tantiash: —Mimbi chiaid tantiatiapimbo iquebi —quecuededpanëdash iccuedquido. ¹² Adnubien Petedo nidtoanec titinquec nauedaid shëcuë yacno choash shuebudquin shëcuë anisquin dataniaid dashcuteuidi uesho ispanëdash. Aden isanec nidequi: —¿Atodain nechítec? —quepanëdash Petedo tantienquio yec.

Emau yacmi nidte
(*Mat 16.12-13*)

¹³ Adashic abi ushëmbi Edusaden yacnoësh utsibobëd iccuededboed dada daëd shubu daëdpactsëc icquid Emau caid yacno nidpanëdash. ¹⁴ Adec nidequi ambi Edusaden yacnoshon isboedbëdta ambi tantiaboed chiec onquepanëdash. ¹⁵ Aden chiec onquec nidshobi Esusën aid daëdi chinunash aidobëd nidpanëdash. ¹⁶ Aden abi chinuntuidsho isac utsibimboec Esus isadpanëdash.

¹⁷ Adec nidequi Esus: —¿Atotsi chuibanec onquec nide? —quepanëdash. Adsho tantiash unësquio yec mamënenquio yec nidtuidpanëdash.

¹⁸ Adec nidtuidash Quëdeyopas cuëmëdquid: —¿Edusaden yacno tabadtuidquin anoshon nabooed mimbiuidtsëqui tantiamboda icco? —quepanëdash Esus caic.

¹⁹ Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiai icquin ambi chuibaniaid ambi nabanaidbidi Nuquin Papabëdtan matses dadpenshun bëdamboen isaid icposh. ²⁰ Nuquin tsusio dapabobëdtan nuqui chuiquid utsibon Esus bedshun: “Unës uata,” quequin isadaidpembo chuiquid meniac cuesten dectanquin unës uaposh. ²¹ Nëbi chuiquid dapa isadaidpembo iquenquiocpashun, quequin Esus isadaidbo yec isadaidbo chuiquid dapa ictsiash quequin ëbitedishun tantiapombi. Èmbi caboedi unës uaposh. Aidi unës uan daëdec ushobi. ²² Adec daëdec ushun dacuëdanquiecnuc chidobon naden chuibededposh: “Esusën dada nauedbocono badiadnuc nidshun isac ²³ nibëdosh. Ambobi icnubi Nuquin Papan uaido mayan bëdabo daëd icsho isac, ‘Mimbi nibënaid nibëdec. Uincuenac,’ quiosh,” quequin chidobon chuiposh. ²⁴ Aden chidobon chuisho tantienquio yec ëbëd icquido Esusën dada nauedbocono nidshun chidobon chuibocpadembi unës uabooed nibëdsho isposh —quepanëdash ambi chinunaido Esus chiec.

²⁵ Adoaquien: —Ma bëdiactsëc tantiaquid mibi daëdi neyoc. Nuquin Papan ambi chiaid chuimiaiada dada uampid bëdiactsëc tantiatsec tantiesabidi ma mibi neyoc. ²⁶ ¿Bëdamboec tabadacno chuiquid dapa icnuc Esus mëyanaidba iquendactiosh? —quepanëdash Esus. ²⁷ Aden chuibanquin Moisesën dada uampidbëdtabi Nuquin Papan ambi yuecshun nanun chiaid chuimiaiada dada uampid tantiamequin Esusën chuibampanëdash.

²⁸ Aden chuibanequi shubu daëdpactsëc icquid Emau caid yacno anoentsëqui choshon datanshobimboecnuc Esus isun: ²⁹ —Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

³⁰ Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshun Esusën menebampanëdash. ³¹ Aden nasho isun badedi, Esus nec, quequin tantianubi Esus nibëdquio yampanëdash. ³² Adsho isash: —¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? —quepanëdash Esus yuedquido.

³³ Aden chuitanequi Emau yacno chochoed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash: ³⁴ —Abimbo iquec. Nuquin Icho uincuempaccosh. Uincuenanec choquin aidëmbi Simon ismetuidposh —quepanëdash iccuededquido. ³⁵ Aden iccuededquidon chuisho tantiashun Emau yacnoësh chochoed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuiapanëdash.

Abëd icboedo yacno Esus chote
(*Mat 28.16-20; Mad 16.14-18; Uan 20.19-23*)

³⁶ Adec onquecuedednubi nënantanquio choshon Esusën: —Nuquin Papan bëdamboen isaïdo yec dacuëdenquio yec tabad —capanëdash.

³⁷ Adec aid chosho isash: Podo bitsi nec, quec dacuëdequi abëd icquido tabadpanëdash. ³⁸ Adsho isashien Esus: —¿Atotsi quiash, ¿Esusida nepec? mibitedi quepe? ³⁹ Con mëdantebëdta con taë is. Èbibi nebique. ¿Mëtoccaid taëbëd chiuë nibëdecta ye? Mishec cho.

Ëbi yacpadquid canitebëd nami icquid podobitsi nibëdec —quepanëdash Esus abëd icquido chiec.

⁴⁰ Aden chuitanquin abi bëchun shuin mëtoccaid chiuë aton mëdantebëdta aton taë Esusën ismepanëdash. ⁴¹ Aden ismiac, Aidquiobi nec, quenquio yec abëd icquido mamëncuededquin isec bëdambo yanec, Adec uincuentequidshenda dectampaccosh, quequin tantiec tabadpanëdash. Adec tabadsho isun: —¿Ada pete iquec? —Esusën caquien ⁴² nuëcquid shëaid cuëshë menepanëdash. ⁴³ Aden meniac bedshun Esusën pepanëdash abëd icquidon isnubi.

⁴⁴ Aden piash: —Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuecshun nanun chiaid dada uamiampid naimbudtenendac,” quequin chuibanombi —quepanëdash abëd icquido tantiamenuc. ⁴⁵ Aden chuishumbic abëd icquido tantiamequioquin: ⁴⁶ —Nuquin Papan dada uamiampid nad iquec: “Nuquin Papan chomiaid, Quidistu caid, matsesën mëyanquin unës uaqi daëdec ushash uincuenendac. ⁴⁷ Aid tantiashun mibi icsaid mimbi ënsho isash, Icsaquid nec, quenquio yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoindac. ⁴⁸ Mëyanquin unës uaqi ëbi uincuenacsho mibitedishun ispoc. ⁴⁹ Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” —capanëdash Esusën.

Esus abuc indote

(Mad 16.19-20)

⁵⁰ Adashic, bëyucanec nidequi Betania yacno anoentsëqui choash nitudishun aton mëdante abuc sananquin ismec: —Nëidtedi bëdamboen ista, Papa —quepanëdash Esus.

⁵¹ Aden chiacsho abëd capucuenequido niamequin Esus aton Papan abuc indopanëdash.

⁵² Aden indosho isash, Èbitedishun icbo nec, quequin ismec shuebudash: —Bëdambo iquebi —quianec Edusaden yacno nidanepanëdash. ⁵³ Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nided-nidedquid Nuquin Papan naid chuidenepanëdash.

Padi. Aidedtada uombi, Teyopido.

UANÈN DADA UAID

Nuquin Papa tantiamanquid chiaid

¹ Èndenquimboshè matses uabi yec abitedimbo uabi yequi Nuquin Papabèd Esus icpampic. Nuquin Papapadquidquiobidi yec: —Nadquo Nuquin Papa iquec —quec tantiamanquidquo nec. ² Aidèmbi Nuquin Papabèd icquin ³ abitedimbo uapampic. Abubèdta nidaid uashun aidèn icquidtei uapampic. Ambi uacmaid utsi nibèdec. ⁴ Aidquo Nuquin Papa yacno tabadmianquid nec. Nuquin Papapadquidquiobidi yec: —Nadquo Nuquin Papa iquec —quequin paposhquiacbimboecnuc tantiamanquidbidi Esus nec. ⁵ Adembidi matses ambi icsamboen naid tantiamequid nec. Adquid icquin: —Con Pamboen bédamboshè icquidquo nendac. Aidèn chiaid niac-niaquec mibi icsamboec tabadec —quequin chuisho tantiatiapimbo icquin matsèsèn Esus chieshèmpondash.

⁶ Aden Esusèn chuibeniyabi icnuc con shènision acten mentoanquidèmba Nuquin Papan chiacpadomboen ambi chiaid chuibampondash. ⁷ —“Nuquin Papa yacnuèsh abi tantiamequidquo choendac,” quequin Uanèn chuibansho tantiasun ma dadpenshun ambi chuiboed tantianu —quequin Nuquin Papan con shènision abi chuibanquid icmepanèdash. ⁸ Nuquin Papa yacnuèsh choacmaidèmbi con shènision: —Nuquin Papan chomiaid Esus nec —quequin chuibampondash. ⁹ Aden ambi chuiboedquo Nuquin Papa tantiamenuc matsespanèdash Esus.

¹⁰ Adash matsesbèd tabadsho ambi matses uaidombi tantienquo icquin chieshèmpondash. ¹¹ Aden con matses isadaidbon Esus tantienquo iccondash. —Isadaidbo con matses nec —Nuquin Papa quenèdacadquie: —Isadaidbo con matses nec —queoapondash Esus. Adsho ambi con matses caidonquiobi dadpenshun Esus tantienquo icpondash. ¹² Utsibombien daèdpactsècshun: —Nuquin Papan Madombo Esus nec —quequin tantiasho Nuquin Papan: —Con mado nec. Con champi nec —cabempanèdash. ¹³ —Con matsesuidien Nuquin Papan: “Con mado nec. Con champi nec,” capec —iquequidta adopanèdash? Padenquo. —Nuquin Papan mado nebi —quequin çambembi chuiquidta con mado capanèdash? Padenquo. Nuquin Papan Mayanèn tantiamiacpadomboen aton Madombo Esus tantiasho dada con mado caquin chido con champi capanèdash. Adembidi Esus tantiasho adoendac.

¹⁴ Adec Nuquin Papa tantiamequidquo Esus matsespanèdash. Nuquin Papan Mado abentsèqui yec bédamboshè icpondash. Èbèd tabadquin nadatiambo icquin nabanquin matses bédamboen nashumbampondash. Aden Nuquin Papambo tantiamepondash Esusèn. ¹⁵ Aid con shènision chuipondash. —Èmbi chuiboedquo nec. “Èbi icsaquid icnuc bédamboshè icquidquo choec,” èmbi caboedquo nec. “Èmbia Nuquin Papan chiaid chuibambon aidèntsen tsyuec choshon chuibanendac. Èbi bëyuc tishaidi tishabi icnubi aid ènden icpampic,” èmbi caboedquiobi Esus nec —quepondash con shènision.

¹⁶ Con shènision chiacpadquidquo icquin abi tantiaquido Nuquin Papan bédamboen isaido icmeshun adenuidi Nuquin Papa nuqui bédamboen ismec. ¹⁷ Èndenquimboshè Nuquin Papan chiaid dada uaquin Moisesèn Nuquin Papan matses icsaido cuidte tantiamepampic. Padnuen Esuquidistun Nuquin Papan bédamboen iste tantiamequid: —Nadquo Nuquin Papa iquec —quequin matses bédamboen tantiamepondash. ¹⁸ Ambi isacmaidquo icsho matsèsèn Nuquin Papa bédamboen tantiatiapimbo iquec. Padnuen aton Mado abentsècshunquo aton dayun tsadquidènquiobi matsesun Nuquin Papa bédamboen tantiamepondash. Aidquo chuinu. Tantia.

Tsusiobon chuimiac Uan acten mentoanquidèn chiaid (Mat 3.11-12; Mad 1.7-8; Duc 3.15-17)

¹⁹ Con shènision Nuquin Papa tantiabenuid acten mentobenequid niondash. Aden acten mentobesho isash Moisesèn chiampid namequido aid chuimenuc cho-chopondash. Edusaden yacnocquido isadaidbo tsusiobon: —Chuimetan —cac cho-choquin con shènision chuituidpondash. ²⁰ —çTsumtsin chiac nai? çMimbembida nai? “Bédamboshè icquidquo Nuquin Papan chomendac,” quequin nuquin tsusedpan çdada uapampidta ne? —catuidpondash. Adoaquien: —Padenquo. Aidpenquo nebi —quepondash. ²¹ Adshobien: —çTsumintsi ne? ç“Naden naindambi,” quequin Nuquin Papan chiaid chuibanquidquo unèspampid Edias uincuenaidta ne? —caquien: —Padenquo. Aidpenquo nebi —queoapondash. Adshobien padpiden: çTsumintsimbo ne? “Moisespadquidquo choendac,” çcapampidta ne? —caquien: —Padenquo. Aidpenquo nebi —queoapondash con shènision.

²² Adshobien padpidemboen: —¿Tsumintsimbo ne? ¿Mimbenquiobienda nao? Èbi: “Chuimetan,” caboed chiec nidnu. Baded èbi chui —caquien: ²³ —Nuquin Papan tantiamiac nuquin tsusedpa Isayasën naden chuiampid nebi.

“Nuquin Papan bédamboshè icquid chomiabi icnuc aid bëyuec utsiba choendac. Aidën shubu nibédacno capucuenequin chuibanendac naden.

‘Chuiquid dapanbo choeque. Podqued andèdbanshunta,’

quiacimboen chuiquin: ‘Nuquin Icho choeque. Icsaid ènash bédamboec tabadta,’

quequin chiendac bëyuc choshon,”

quequin chuiampid nebi —quepondash con shënisio.

²⁴ Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shënisio chuituidpondash. ²⁵ —Utsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquo icquin acten mentobano?” mibi caimbi —caquien: ²⁶ —Nuquin Papan chiacpadomboen abi tantiabenguido acten mentobenec nebi. Èmbi aden bédamboen nanuc utsimbien bédamboeshè naindac. Aidi mibédi tabadshobi ma mimi tantienquo iccoc. ²⁷ Èmbia Nuquin Papan chiaid chuibanombi. Aidèntsen tsyuec choshon comapenen tantiaquin Nuquin Papan chiaidquo chuiquin Nuquin Papambo tantiamendac. “Aidi bédamboshè icquid icnuc èbi icsaquid icscho ¿atotsieshun: ‘Aid choec,’ quequin chuiquidquo Nuquin Papan icmishi?” quec tsadebi —quepondash con shënisio padiseyobo chiec. ²⁸ Acte Odan caid uquè chëmatsiucùesh shubu dadpen icquid Betania caid yacnuësh adpondash.

Abided cuidadtequid nendac, Esus caid

²⁹ Badiadshun padpiden con shënisio matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquo obeca bacuèbimboecquid choeque. Aidi isadaidbun obeca bacuèded cuidquin unès uacimboec matses icsaid bedshunec abided cuidadec unèsendac. ³⁰ Èmbi chianeboedquo nec. “Èbi bëyuc tishaidi tishabi icnubi aidi ènden icpampic,” quiaish: “Èbi bédapabi icnuc bédamboshè icquidquo choendac,” quepobi. ³¹ Aid chosho con matses isadaidbo tantiamenuen Nuquin Papan acten mentobenecquid icmiondashi. Adondaidèmbi èmbibi badedquo tantienquo iccombi. “Nuquin Papan chomiaid nec,” quequin tantienquo iccombi —quepondash con shënisio.

Esus mentoaid

(Mat 3.16-17; Mad 1.9-11; Duc 3.21-22)

³² Adashic abi onquec: —Nuquin Papan naden ismiac tantiabemombi. Aton Mayan aton dada nibèdquieic dèbimbimboec budec: “Matsadtoendac,” quebocpadequi Esus matsadtoشو ispombi. ³³ Adsho isash: “Adquidshenda caposh Nuquin Papan: ‘Acten mentoanquid icta,’ èbi caboedèn. ‘Con Mayan dèbimbimboec budec matsadtoboeedèn abi tantiaquidobèd con Mayan tabadmendac,’ Nuquin Papan caboedshenda nepec,” quioibi Esus caic. Èmbembi tantienquo ictsenombi. ³⁴ Aden ismiac: “Nuquin Papan Madombo Esus nec,” quequin tantiombi. Aden tantiaishun: “Nuqui caimboed Nuquin Papan chomiaidquo Esus nec,” quequin mibi chiec nebi —quepondash con shënisio.

Nèid dada uaquid Uan Esusbèd yanaid

³⁵ Adashic badiadash ambi acten mentobambocno con shënisio nidoapondash. Aid tsibanequi nidoapondabi. ³⁶ Adec nidquin isquien Esus cuempec. Cuensho isashien con shënisio: —Is. “Nuquin Papan namiaidquo obeca bacuèbimboecquid nec,” èmbi caboed cueneque —quepondash.

³⁷ Adsho tantiatanequini con shënisio èd iccondaid utsièd Esus chinunec nidpondac. ³⁸ Nidquin chinunac bìdiadquin istanequien: —¿Atotsi quec ne? —quepondash Esus. Adshobimbi: —Mibi isec nebi, Dabi. ¿Mitsimbo mibi ushaque? Isnu —capondambi. — Chuiquidquo nec —quequin con onquetembi Dabi caondambi. ³⁹ Adoac: —En isec cho —cac abi ushacno isec nidondabi. Ushè abucquo icnuc puduedash yuec tabadec onquetianash inchèshstècnubi chondabi.

⁴⁰ Èbèdtan Esus chinunondaid Andedes niondash. Shubu dadpen icquid Betsaida caid yacnuësh caniquid niondash. Aton buchi Petedo niondash. Petedobidi Simon capondash.

⁴¹ Adnubien Andedes aton buchi chiec nidpondash. Adec nidquin Petedo istuidash: — Nuquin tsusedpabon chuiampid Nuquin Papa yacnuësh choquid Mesias caid istuidombique. En isec cho, buchi —capac caondash. Nuquin Papa yacnuësh choquid Quidistu cashumbic con onqueten Mesias caic.

⁴² Aden chiaquien aton buchi Esus isec chopondash. Chosho isash Esus: —Uanën mado mibi nec. Mibi Simon nec. “Nidaid moco utsi uatiapimbo yacimboec mibi chieshtoenquo icquid yanendac,” quequin mibi nidaid moco cuèndambi —quepondash Esus Petedo caic.

Con onqueten nidaid moco cain Sepas capondash Esusën. Quidieco matsesën onqueten Petedo capondash.

Esusën Uedipebêda Natanaid istuidaid

⁴³ Badiadash: —Con nidaid Cadidia caid yacno nidnu —quianec nidpondash Esus. Adec nidquimbi Uedipe istuidpondash. Istuidshun: —Nuquibi icnu. Cho —caquien Uedipe chopondash. ⁴⁴ Betsaida yacnuësh caniquidbidi nepondash aid. ⁴⁵ Esusbêd icquid yanashic dada utsitsen Natanaid caid chiec nidpondash Uedipe. Adec nidquin istuidshumbien: —Isec cho. Moisesën chiampicpadomboen chuiquin nuquin tsusedpabo utsibon: “Bêdamboshê icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuësh caniquid neque. Osen mado nec —quepac caondash. ⁴⁶ Adsho tantiash: —¿Nasaded yacnuështa dada bêdambo icquid chopatsiash? Auëshquio dada bêdambo icquid chotiapimbo iquendac —quepac caondash Natanaid. Adsho tantiash: —En isquiec cho —quepac caondash Uedipe.

⁴⁷ Adoac choshobien Esusën: —Is. Isadaidbombo neque. Muesambo nec —caquien ⁴⁸ Natanaidën: —¿Mitsipaden êbi tantie? Mabi mimbi isacmaidquo nepayoc —capondash. Adoacuen: —Uedipen bedtanabi icnubi mibi cuête icueda caid tayun tsadsho tantiombi —capondash Esusën. ⁴⁹ Adsho tantiashumbien: —Nuquin Papan Madombobien mibi nec. Comapenen tantiaquid yec nuquin matses isadaidbo chuiquid dapambo mibi nendac —capondash Natanaidën: —Istiapimbo yacno chiosh —quequin tantiashun. ⁵⁰ Adoacuen Esusën: —“Cuête icueda caid tayun tsadsho mibi tantiombi,” êbi qesho ¿tantiashta: “Nuquin Papan Madombobien nec,” badedquo que? Padpiden comapenen tantiaquin nabansho isun mimbi êbi tantiaquotsiandac. ⁵¹ Tantia. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bêdambo Nuquin Papa yacno decatonesho isash: “Aidbêd tabadte Nuquin Papan êbi tantiametiadquo iquec,” quequin tantiapampicpadomboen mimbi êbi tantiendac. “Matsesun Nuquin Papan Madon matses abêd tabadte tantiamec,” quequin mimbi êbi tantiendac —quepondash Esus abêd icquido chiec.

2

Esusën ambembi actequid uaid

¹ Aden Natanaid chiash aton nidaid Cadidia caid yacnobi Esus tabadpondash. Ambo tabadec daêdec ushtsambi shubu dadpen icquid Cana caid yacnocquidên isadaidbon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobêd Esusën tita puduedpondash. ² Esuseten puduedpondash. ³ Adec puduedash tabadquin uba chinâid actequid uesquin acbededpondash. Adsho isumbien anin Esus chuipondash. —Actequid naimêdoshe. Comapenen tantiaquid icquin mimbi tantiapadomboen nata, mado —capondash. ⁴ Adoacuen: —¿Atotsi quequin mimbi êbi chuipe, tita? Chiata. Con Pan tantiapadênquio naimbique —quepondash Esus. ⁵ Adsho tantiatanquin anin yuabo actequid cushtobanquido chuipondash. —Con madon chiacpadomboen nata —capondash.

⁶ Ambobi têchu dapa 6tedi tabêcaid icpondash. Mêpamêdtembo acte nua 120 ditedos cactembi anidboedi acte naimêdaid icpondash. ⁷ Adnubien Esusën: —Nê tabadquidên acte cushtoban —cac cubu-cubuctsêcquo icnu acte cushtobampondash yuabon. ⁸ Cushtobanacsho isun Esusën: —Ueshun buanshun mibi ancaquid acmetan —cac acmetampondash.

⁹ Adoac acquin tanauqien actequid bêdamboshê icquid icpac caondash acte icboedi. —Nibêda damboedquo ¿mitsimbo bedpash? —quepac caondash yuabo ancaquid. Adsho tantiashun yuabon: —Esusênquobien naccosh —quequin tantiapac caondash. Adnubien yuabo ancaquidên chido bednuequid chuipondash: —Aidên actequid bêpash —qeshun. ¹⁰ —Nuquin matsesên actequid bêdambo icquidba isedanquido acmequid nendac. Adquid acmiac matses nua cubudacsho isash: “Actequid icsactêsêcquidtsen acmenu,” quequid yendac. Aden mimbi nambo. Bêdambo icquidquo ma mimbi nêbi acmianeyoc —quepondash yuabo ancaquid chido bednuequid chiec. Adnubien yuabon actequid bêdamboshê icquid abitedi acmebampondash.

¹¹ Aden comapenen tantiaquid icquin ambembi actequid uaqien Esusën tauamboen ismebempondash. —Nuquin Papa yacnuësh choquid yec comapenen tantiaquidquo nebi —quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquo. Adoshon isun: —Con matsesên chiampid Nuquin Papan chomiaidien nec —quequin tantiabonondambi.

Esusën chushcaquin cuemiaid

(Mat 21.12-13; Mad 11.15-18; Duc 19.45-46)

¹² Aden ambembi actequad uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abêd icquido yec ëbi yec quec Esusbêd nidaniondabi. Ambo daêd pactsec ushec tabadondash. ¹³ Ambo ushcuidanec nidequi shubu dadpen icquid Edusaden yacnotsen Esus nidaniondash. —Nuquin matses tsusedpabo unês uainquo icquin Nuquin Papan matamiampid inchêsh tantiaquin obeca bacuë pec nêbi tabadeque. Isec nidnu. Nid —quianec nidanepondash. ¹⁴ Nidashic Nuquin Papa tabadte shubu uashunaid dapa daquënë uaidën puduedondash nuntanquo puduedabi. Puduedshun isquien matses dadpen nêish yua chedobêd tabadpec. Baca bënë yec obeca yec dëbimbimboecquid quënëmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabêcaid dayun tabadpondash. Aido nidaid utsi yacnuësh choquido aton piucquid dadpen bedshun ampeshunquin daêd pactsec menequido niondash. ¹⁵ Adec tabadsho istanquimbien Esusën cueshcate badedquio nacnentanquin cuesquin niacumpondash umanuc abitedimbo. Aden umanuc niacuntanquin tabêcaidtsen bidiacbanquin piucquid siabudshumbampondash. ¹⁶ Adotanquimbic dëbimbimboecquid yuaquidotsen chushcapondash. —Baded mitsana buanec nid. ¿Piucquid bednuen shubu uaidta nedic? Ma con Pa tantiate shubu neyoc —quequin chushcapondash. ¹⁷ Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquido nendac,” quequin Esusën nate chuiquin dada uapampic —quequin tantiondambi.

¹⁸ Aden nicacsho isumbien con matses chuiquidon: —¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin ëbi isme —caquien ¹⁹ ismenquo icquin ompoacimbioen Esusën chuipondash. Abibi cadequi: —Mimbi nêid shubu icsa uabocsho padpiden nacnenoaindambi bëdambo icnuc. Daêdec ushquin nacnenquin nainendambi —quepondash Esus. ²⁰ Adsho tantiasu Nuquin Papa tabadte shubu uashunaid dapa ca danec: —¿Badedquioda nacnempatsia? Nêid nacnenquin seta dadpenquioshê 46tedquioi matamiac cadenec —quepondash con matses chuiquido. ²¹⁻²² Yuecquio ictaneshun Esusën aden chiaid tantiondambi. Unês uacsho chococac daêdec ushash Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daêdec ushquin nacnenquin nainendambi,” quecshenda nepondash. Aden chuiquinshenda con tsusedpabon dada uapampic —quequin tantiondambi.

Dadpeshun Esus tantiauidaid

²³ Nuquin Papa tabadte shubu uashunaid daquënë uacnoshon cuemeshumbic Edusaden yacnoshontsen comapenen tantiaquin nabanquin Esusën ismepondash. Adsho isun matses dadpeshun: —Nuquin tsusedpabon chiampid Nuquin Papan chomiaidien Esus nechitec —qeshun Esus bêdiactsec tantiatseccondash. ²⁴ Aden tantiatsecsho ambembi tantiasu: —Ai, ëbi tantiaquidquido nec —quenquo icquin: —Ëbi bêdiactsec tantiatsec —quequin tantiapandash. ²⁵ Utsin chiambobi ambembi tantianêdash. Aden matses abitedishun otacquo tantiaid ambembi tantiaquidquido Esus niondash.

3

Esusën Nicodemo caid chiaid

¹ Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobêdan aton matses namequid niondash. ² Inchêshên Esusbêd onqueneq chopondash. Choshombic aidëmbi: —“Nuquin Papan icmiacpadquid chuiquidquido mibi nec,” quequin tantiambi. Mimbi comapenen tantiaquin nabansho isun: “Nuquin Papan namiaidênuidtsëquien adotsiasu,” mibi caombi —quepondash.

³ Adsho tantiasu: —Ai, adquid nebi —quenquo icquin Esusën ompoacimbioen chuipondash naden. —Tantia. Mibi bëdamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquo ictsiac ⁴ —qesho tantiasu: —¿Mitsipaden tsusiobi chuca uapatiasu? Chidon padpiden usundoshon tishiapimboen iquec —quepondash Nicodemo. ⁵ Adsho tantiasu Esusën: —Nuquin Papan Mayanên tantiamiac: “Nuquin Papa tantiaquin ëbi icsaid êntiadquio iquebi,” quiash bëdamboec tabadquid Nuquin Papabêd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadtiapimbo iquendac. ⁶ Chidon tishaiduidtsëqui yec Nuquin Papabêd tabadtiapimbo iquendac. Nuquin Papan Mayanên chuca uaid Nuquin Papabêd tabadendac. ⁷ “Chuca uaiduidtsëqui Nuquin Papabêd tabadendac,” ëbi qesho tantiasu: “¿Midapaden chie?” quepequien mibi iquec. ⁸ Tantia. Mibi chuinu. Cunquequid isadenquo icquid nec. Isadenquo icquimbi cuncac cuête ishucudsho isash: “Abi cunquec,” mibi quepec. Adquibidi isadenquo Nuquin Papan Mayanên iquec. Isadenquo icquimbi aidên chuca uaid bëdamboec tabadsho isun: “Nuquin Papan Mayanên nac,” quequin mimbi

tantiatsiac. “Nèid utsitsen natsiash,” quequin mimbi tantienquo icnubi Nuquin Papan tantiapadomboen aton Mayanèn utsitsen chuca uatsiandac —quepondash Esus.

⁹ Adsho tantiash: —¿Midapadec? —quepondash Nicodemo. ¹⁰ Adoquien: —¿Tantienquioda ique? Ma isadaidbo Nuquin Papan chiaid chuibanquid mibi neyoc. ¹¹ Ènden ushè utsin mibi chedo chiombi. Èmbi isondaidquo chuiquinc èmbi tantiondaidquo chuiquinc caombi. Adsho tantiash: “Tantiadenquo iquec,” ma mibi quebec. ¹² ¿Èmbi chui-boed tantiadenquo icnubi padpiden chuiquin èmbi Nuquin Papan abi yacnoshon naid chuishomenda tantiatsia? ¹³ Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Èmbien Nuquin Papa yacnuèsh chondaidènquo: “Nadquo iquec,” quequin Nuquin Papa tantiamendac. ¹⁴ ¿Atotsi canuen nuquin tsusedpa Moisesèn nisibimboecnuc shocosh nacenaid dectampampic? “Nuquin Papan chiapadec ma aid isec nisin piad bédanu,” quequin cuesten dectampampic. Adom-boembidi matses cuidmenquo icnuec cuesten dectamèdendabi èbided cuidadec unèsec. ¹⁵ Èbi tantiaquido unèsacsho cuidenquo icquin Nuquin Papa yacno èbèd tabadmeneuc adendabi —quepondash Esus Nicodemo chiec.

Nuquin Papan matses abitedi tantiaquin naid

¹⁶ Aden Esusèn abided cuidadec unèste chuipondash. Nuquin Papan: —Ma adec abided cuidadec unèsnu —quequin Esus chomepanèdash. —Unèsquo iquec —quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsècquiobi abided cuidpanèdash. —Èmbi adoaid con Mado tantiaquid unèsacsho icsaido cuidacno nidmenquo icquin èbèdi tabadmendambi —quequin aton Madoded cuidpanèdash. ¹⁷ ¿Matses cuidnuenda Nuquin Papan Esus matsesmepanèdash? Padenquo. Matses cuidenquo icnuen napanèdash.

¹⁸ Aden aton Mado Esus tantiaquido cuidenquo icquin Esus tantiesabo cuidendac: —Con Mado chieshèmpec —qeshun. ¹⁹ Nuquin Papan matsesmiadèn Esusèn abi icsaid chuisho matses icsambo icquidon tantiatiapimbo iquec. Ambi icsamboen naid èntiapimbo icquin Esus tantiatiapimbo iquec. ²⁰ Adquidon: —Èbi icsaid Esusèn utsibo tantiamenushe. “Icsambo iquec,” èbi canushe —qeshun Esus chieshèmpec. ²¹ Nuquin Papan chiapadec tabadquidombien Esus chieshènenquo iquec. —Nuquin Papan namiapadec tabadquid nebiqùe. Ma Esusèn èmbi bédamboen naid chuibampanuna —quiash Esus tantiate bumpec.

Uan acten mentoanquidèn Esus chuoaid

²² Adec Nicodemobèd onqueboshien Esus nidpondash. Edusaden yacnuèsh nidec aid nidaidèmbi Udeya caidèn capucueniondash. Abèd nidshobini Nuquin Papan chiaid Esusèn chuibampondash. Adec nidshun Nuquin Papa tantiabenquido acten mentobeniondambi. ²³ Adnubien adomboembidi con shènisionsen acten mentobeniac caondash. Enon caid yacnoshon Sadin caid anoentsèqui chunquen diadacnoshon matses dadpen acten mentoac caondash con shènisison. ²⁴ Chieshèmènquidon quènèn nauedabi adoac caondash.

²⁵ Adnubien con shènisioèd icquido con matses utsibèd: —Mimbi icsamboen chiec —quec chushcananac caondash. Con shènisioèd icquido: —Uanèn Nuquin Papa tantiabenquido bédamboen acten mentobamposh —quesho tantiash: —Padenquo. Esusèmbien bédamboen acten mentobaniosh —quepac caondash. ²⁶ Adshumbien con shènisioèd icquidon: —Nuqui chuiquid chiec nidnu. Nid —quianec nidquin con shènisio chuituidpac caondash. —Acte Odan caid uquè cuèmatsiucshun ¿mitsicquid: “Nuquin Papan chomiaid nec,” mimbi cadio? Aidèn mimbi naid dèniacquin matses dadpenquo acten mentobeniac caosh. ¿Ada bèda icpec? —caquien: ²⁷ —“Nuquin Papan chiapadomboen Esusèn nash. Adomboembimbi naic,” qeshun Esus chieshèntiapimbo iquendabi. ²⁸ “Nuquin Papan chomiaidpenquieni nec,” quequin mibi chiondambi. “Nuquin Papan chomiaic bédamboshè icquid choendac; quequin bèyuc choshon aid chiec nebi,” quiondabi mibi chiec. ²⁹ “Èmbi chuiboed nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiacimboec cuishonquepobi. ¿Aden chido bedmequidèn: “Min bènèbèd nidenda,” caquinda ictiosh? Padenquo. Bènèbèd nidmiasb bédambo yacbimboec Esusbèd nidanesho isash bédambo iquebi. ³⁰ Èmbibi Nuquin Papan chiapadomboen Esus tantiamenquin ènquin chuibanquid èmbi acten mentoaido daèdactsèc yanendac. Èmbi chuiboedquo Esus tantiaquidoen dadpenquo yanendac. Aidquo bédamboshè iquec —quepac caondash con shènisio abèd icquido chiec.

Nuquin Papa yacnuèsh choquid chiaid

³¹ Adshumbic con shènisison naden chuipac caondash. —Esusquo bédamboshè iquec. Nuquin Papa yacnuèsh choquid abipadquid utsi nibèdec. Padnueni matses yec: “Nuquin Papa isondambi. Nadquo iccondash” quequin chuitiapimbo iquebi. Esusèmbien

³² ambi isondaidbêda ambi tantiondaidquo chuipac. Aden chiaqui matses dadpen: “Abimbo caic,” quenquo icpec. ³³ Esus tantiaquidon: “Nuquin Papa muesambo nec. Ambi: ‘Bêdamboshê icquid choendac,’ quequin dada uamepampidquo Esus nec,” capec. ³⁴ Nuquin Papan chomiaidquo icquin Nuquin Papan chiaidquo Esusên chuibanec. Nuquin Papan aton Mayan abêd tabadmiaid icquin comapenen tantiaquin ismebanquin chuibanec. ³⁵ Ambi tantiaidquo icsho aton Papan abitedishun Icbombo icmiac. ³⁶ Adnuc: “Abitedishun Icbombo Esus nec,” quequin aton Mado tantiaquido unêsacsho Nuquin Papan abêdi tabadmendac padpidec unêsenquo icnuc. Esus chieshênquidoen Nuquin Papa yacno isenquo yec icsaido cuidquiacono nidendac –quequin con shênision chuipac caondash.

4

Acte uequid chido Esusên chiaid

¹ Esusbêd icquin Nuquin Papa tantiabênquido acten mentobanondambi. Adnubien con matses chuiquido padiseyo caidon: –“Uan acten mentoanquidên naid dêniacquin Esusên matses dadpenquo acten mentobanosh,” quiosh –queshun Esus chieshêmpac caondash.

² Esusên nainquo icnuc êmbimbo nasho isun chiaqui aden Esus chieshênac caondash. ³ –Mibi adosh –cac: –Con nidaidên nidnu –quianec nidondash Esus. Aid nidaid Udeya caid yacnuêsh nidec aton nidaid Cadidia caid yacno nidondash.

⁴ Aid podquedên nidequi nidaid utsi yacno Samadia caid yacno nidpondash. ⁵⁻⁶ Adec nidquin ushê cuembo icnuc shubu dadpen icquid Sicad caid yacno istuidpondash. Aid anoentsêqui con tsusedpa Acobon tied uampid icpondash. Aid tied caic: –Ëbi unêsân nêid tied: “Con na nec,” cata, mado –quequin aton mado Ose chiampid tied niondash. Ambo aidên uêdêscampid acte uete icpondash. Aid dayunquibô: –Tiboquenu –quec Esus tsadtuidpondash. ⁷⁻⁸ Adec tsadtuidnubini: –Pete bedtanu –quianec shubuno nidanepondac. Esus abentsêqui nianec nidaniondabi. Adec nidân Samadia yacnocquid chido acte uec choquin Esus tsadsho istuidpaccondash. Choshobien Esusên: –Acte beccho. Acnu, champi –caquien: ⁹ –“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. –Samadia yacnocquidbêd onquesambo isadaidbo nec –quequin tantiec adac caondash.

¹⁰ Adshobien Esusên badedquo cuembo chienquo icquin chuipac caondash. –Nuquin Papan bêtamboen isquin naidbêda êbi tantiaquin: “Acte beccho,” mimi êbi catsiac. Adsho acte bêtambo icmianquid mibi acmetsiambi –quepac caondash Esus. ¹¹ Adoquien acte uequid chidon actembo ca danquin: –¿Mitsipaden acte ueshun êbi menetsia? Ma min têchu nibêdpayoc. ¿Midapaden mimi uetiapimboen acte uquêducquio iquec? ¿Mitsimbo acte bêtambo icmianquid ueshun êbi acmetsia? ¹² Nêid acte nuquin tsusedpa Acobon uêdêscapampid nec. Aton yuabobêdtan aton bacuêbon acampid nec. Nuquin tsusedpa bêtambo icquin nampid icnuc ¿mitsipadquidquo icquin nai? ¿Bêdamboshê icquid icquinda mimi acte bêtamboshê icquid êbi acmepatsia? –capondash acte uequid chidon. ¹³ Adoquien: –Nêid acash mibi bundoaic. ¹⁴ Êmbi acmiac mibi bundoenquo ictsiac. Acte bêtambo icmianquid acmiac ênêdenquo yec tabadquid mibi yantsiac –quepac caondash Esus badedi cuembo chienquo yec. –Ëbi tantiaquidobêd con Mayan tabadmiac bêtambo yanec unêsacsho êbêdi tabadmendambi –quequin tantiec adac caondash.

¹⁵ Adsho tantiaishun padpiden acte ca danquin: –Adquidquo êbi acme. Bundoenquo yec nêmo acte uec choenquo ictsiabique –caquien: ¹⁶ –Min bêtân bedtan –capac caondash Esusên. –Nuquin Papan chomiaidquo yec comapenen tantiaquid mibi nec –camenuen adoac caondash. ¹⁷ –Min bêtân bedtan –caquien acte uequid chido: –Con bêtân nibêdec –quepac caondash. Adshobien Esusên: –Abimbo mimi caic. Min bêtân nibêdec. ¹⁸ Dada mêtante auc abentsêtedquibô min bêtân icpadenec. Aidon mibi niambudnian nêbi mibêd icquid min bêtânepenquo nec. Abimbo mimi caic –quepac caondash Esus.

¹⁹ Adsho tantiaish: –Isambobi comapenen tantiaquidien mibi nechitec. Mibi-padquidquo chiec: “Nuquin Papan chomiaidquo nendac,” quepec con matses. Adquid icquin en êbi chui. ¿Mitsishunquiembi Nuquin Papa bêtamboen tantiape? ²⁰ Con matses: “Nêmbôen Nuquin Papa iquec. Nêid macuêsh dapanshunuidtsêqui Nuquin Papa tantia bêtambo ictsiash,” quepec. Min matsesien: “Edusaden yacnoshonuidtsêqui Nuquin Papa tantiac bêtambo ictsiash,” quepec –quepac caondash acte uequid chido. ²¹ Adsho tantiaishun Esusên: –Tantia. Mibi bêtamboen chuinu. Nêbi nêid macuêsh dapanshunuidtsêqui Nuquin Papa tantienquo icquin Edusaden yacnoshonuidtsêqui tantienquo icquin nidaid utsi-utsiec yacnoshon adembidi Nuquin Papa tantiabedendac. ²² Min matsesên Nuquin Papan chiaid daêdpectsêc tantiatsetsêcshun Nuquin Papa bêdiactsêc tantiatsec. Con matses isadaidbombien Nuquin Papan chiaid dadpen tantiaishun: “Nuquin Papan chomiaid nuquin matses bêtambo icmianquid nuquin matsesên tishendac,” quequin bêtambo

tantiec. ²³ Nëbien utsin-utsinquein muainquo icquin: “Con Icho nec,” quequin Nuquin Papa tantiendac. Ambi chiacpadeç bēdamboec tabadsho isash: “Adquid ēbi tantiaquidquo nec,” quetsiash Nuquin Papa. ²⁴ “Nuquin Papa tantiaquid ictiadquo iquebi,” quequidēn Nuquin Papan Mayanēn tantiamiacpadomboen abi tantiaquin ambi chiacpadomboen naquid nendac —quepac caondash Esus acte uequid chido chieç.

²⁵ Adsho tantiash chido: —“Nuquin Papan matses bēdambo icmequid chuiquid dapa chomendac,” quequin chuisho tantiondambi. Aid mesias caidi utsibon quidistu caposh. Aidēmbi nuqui tantienquo yaidtedi tantiametsiash. Aidbimboecquidien mibi nechitec —caquien: ²⁶ —Mimbi chiaidquiobini nec —quepac caondash Esus chido chieç.

Esus Samadia yacnocquido chieç tabadaid

²⁷ Adnubini pete bedtanec chopondac. Adshun isquien chidobēd onquepec. Adsho isash: —çAtotsi chieç chidobēd onquepec? —quepondabi utsibēd otacquo onquec. —çAtotsi chieç chidobēd onquo? —cainquo iccondambi Esus. ²⁸ Adec ēbi chonobi tēchu nianec acte uec choquid chido nidpondash aton matses chieç shubuno nidec. ²⁹ —Isec cho. Ēmbi isacmaid dadan ēmbi naid abitedi chioši. çNuquin Papa yacnuēsh choquid Quidistu caidta nioshe? En isec cho —catuidac: ³⁰ —En isnu. Nid. Aidien nechitashe. Isnu —quianec matses dadpen cho-chopondash.

³¹ Aido choabi icnubi: —Nē pete, Icho —ēmbi caquien: ³² —Padi. Mimbi tantienquo yaid con na utsi iquec —quepondash Esus petepenquo chiequi. ³³ Adsho tantiashini pete ca danec: —çUtsibonda pete bēshumpash? —quecuedepondac ēbitedi. ³⁴ Adsho tantiash Esus: —Ēbi cuishoncamete utsi iquec. Ēbi chomiondai Nuquin Papan chiacpadomboen naic bēdambo iquebi pete piacbimboec. Ambi chiaidtedi nainuec dayacquo iquebi —quepondash. ³⁵ Adashic padpidec: —“Ushē daēd-daēdquiecnuc nidmeshun nadquid adyuecshunda nēmbi icquidon ēbi tantiabempec? Padenquo. “Nēidon Esus tantiendac,” mimbi cacmaidobi cho-choeque. Is. ³⁶ Acte uequid chido ēmbi chuiboedēn chiac matses dadpen cho-choeque. Chuibanuna. Ēbi tantiash Nuquin Papabēd tabadtequid yanendac. Adsho isash nuqui cuishonquendac piucquid bedashbimboec. ³⁷ Tied icbon: “Con na peta,” cac ambi nidtsinacmaid matsesēn bedec. ³⁸ Aden ambi nitsinacmaid bedacbimboen mimbi naic. Utsibomba Nuquin Papan chiaid chuibanēdaido nēmbi icquido mimbitsen chuibanec. Adoac nēmbi icquidon Nuquin Papabēda ēbi tantiabeneç. Cho-choeque. Is. En chuiban —capondash Esusēn abēd icquido chuigin.

³⁹ Adnubien Esusbēd onqueboed chidon chuitanaido cho-chopondash. —“Comapenen tantiaquin ēmbi naid abitedi chioši,” quioshe. Nuquin Papa yacnuēsh choquidien nechitashe. Isnu. Nid —quianec cho-chopac caondash. ⁴⁰ Cho-choquimbi badedi: —Ēbi yacno ushquin chieç cho —quequin beduanac Samadia yacno tabadquin chuibaupondash Esusēn. Aid matses chieç ambo daēdec ushpondash. ⁴¹ Aden Esusēn chuisho tantiashien: —Nuquin Papa yacnuēsh choquid Esus nec —quiampondash anocquido dadpen. ⁴² Adashic acte uequid chido chieç: —Mimbi chuishouidi tantiaboedēmbi nēmbi aidēnquo chuisho bēdamboen tantiaquioc. “Nuquin Papa matses bēdamboen ismequid nec,” quequin tantiambi —quiampondash Samadia yacnocquido dadpen.

Chuiquid dapan mado Esusēn bēdamiaid

⁴³ Daēdec ushanec Samadia yacnuēsh Esus nidondash. Abi caniondacno nidaid Cadidia caid yacno nidpondash. ⁴⁴ —Ēmbi chiacpaden abi caniondacnoshon Nuquin Papan chiaid chuibanquidēn chuisho aton matsesēn tantienquo iquec. Con nidaidēn nidsho con matsesēn abi chuiquid dapa icmetiapimbo icpebi —quianec aton nidaidēn chopondash. ⁴⁵ Adsho isun: —Tantiesha nendac —Esusēn caboedombi abi bēdiactsēc tantiatsēccondash. —çChoecta icco? Nuquin Papan nuquin tsusedpabo unēs uainquo icquin matamiampid inchēsh tantianuec Edusaden yacno nidshun mimbi nadatiambo icquin nabansho isondambi —quepondash abi bēdiactsēc tantiatsēcquido Esus chieç.

⁴⁶ Adec aton nidaidēn nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiquid dapa icpac caondash. Aidēn mado unēs-tiadtsēcquo yampac caondash. ⁴⁷ Adashic: —Esus Udeya yacnuēsh choac caoshe. Istanu —quianec chopac caondash unēstiadtsēcquo icquidēn papa. Adec Esus yacno choshombien: —Con mado unēstiadtsēcquo iccoshe. Bēdamec cho —caqui ⁴⁸ nidenquo yec abi datsidadquido chieç: —Ēbimbo mimbi tantienquo iquec. Ēmbi bēdameteuidtsēqui mimbi tantieç. Ēmbi comapenen tantiaquin nabansho isunuidtsēqui: “Nuquin Papan chomiaidien nechitec,” quequin mimbi tantieç —quepondash Esus.

⁴⁹ Adec onqueshobien abi niacbidanquin padpiden: —Baded cho. Con mado unēstiadtsēcquo iccoshe —capondash. ⁵⁰ Adoquien Esus: —Padi. Min mado unēsenuo

ye. Nidec nid —quesho tantiash: —Abimbo caic —quianec nidpondash. ⁵¹ Adec nidquimbi abi chuinec cho-chosho aton yuabo bëquedac caondash. Aden bëquedacui yuan: —Min mado bëdanosh —quesho tantiashun: ⁵² —¿Mitsimbo ushë icnuc con mado bëdanosh? —cac: —Ënden ushë yaquëduidsëcnubi da una yantsëcnubi bëdanosh —quepac caondash aton yuabo. ⁵³ Adsho tantiash: —Adënquioshendabi: “Min mado unësenquo ye. Nidec nid,” caposh Esusën —quepac caondash unëstsemboedën papa. Adshun: —Nuquin Papan chomiaidquo ye comapenen tantiaquin nabanquidquo Esus nec —quequin aton shubun icquidobëdtambi Esus tantiapac caondash. ⁵⁴ Adec Udeya yacnuësh choash Cadidia yacnobidi ambi uba chinaid actequid uaquin ismequin tauaondacnobidi tabadquin bëdamequintsen Esusën ismepondash.

5

Esusën dada icsatsaid bëdamiaid

¹ Yuecquo ictanec Esus: —Edusaden yacno cuëdënuec nuquin matses cho-choeque. Nuquitsen nidnu. Nid —quianec nidanepondash. ² Shubu dadpen icquid Edusaden caid dacuenadquin daquënë uaid puduedte shëcuë dadpen icnuc abentsëc obeca puduedte caid icpondash. Aid anoentsëqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mëdantetedi icpondash. ³ Acte nënantanquo icnuc dacuenadquiec shubumpi tabadquidën matses dadpen tabadpondash daicsaidquidquo. Bëshuaido yec capuenquo icquido yec canite tsasiaido yec quec tabadpondash. ⁴ —“Nuquin Papan abi yacnoshon uaid mayan bëdan tēcucascaid acten abia mentoadquid bëdanquid,” quedeneque. Tēcucascaic ma chobono —quiash cainec tabadpondash.

⁵ Adnubien Esusën ënden caniaidquo ambobi uesho istuidpondash. Ëdenquimboshë aton dada icsabadsh seta dadpen 38tedquobi matamec capuenquo yec icsabudtsaidquo nepondash. ⁶ Adsho istuidshun: —Ëdenquo daicsabadaid nec —quequin tantiaishun: —¿Bëdanteda bune? —catuidpondash Esusën. ⁷ Adoquien: —Ai ¿mitsipadequini bëdampe? Èbi bëdiactsëcquo nidnuc utsiba badedquo mentoadteniosh. Èbi buanquin mentoquid nibëdec —quepondash daicsatsaid. ⁸ Adshobien Esusën: —Min ushte nacentanquin buanec nid —cac ⁹ badedquo aton dada bëdantanquin aton ushte buanec nidpondash. Aid ushë chonoadenquo icte ushë niondash.

¹⁰ Aden buanshobien con matses chuiquidon: —¿Chonoadenquo icte ushënda ushte buampaid? Chonoadte ushëmbien ushte buanquid. Tsusedpabon dada uapampid ma mimbi niacpayoc —quequin chushcapac caondash. ¹¹ Adoquien: —Èbi bëdameboedën: “Buanec nid,” cac mambi naiyoc —quepac caondash Esusën bëdameboed. ¹² Adsho tantiashun: —¿Tsuntsin naosh? —caquien: ¹³ —Tsaudi. Èmbi isacmaid ëmbi isquiambobi badedquo nidaccosh matses dadpen icnuc —quepac caondash bëdameboed.

¹⁴ Adshumbic Nuquin Papa tabadte shubu uashunaid daquënë uacno puduedshun ambi bëdameboed daicsaboed Esusën istuidpondash. Istuidshumbien: —Tantia. Mibi chuinu. Èmbi bëdameboedquo mibi neque. Mimbi icsamboen naid ënash bëdamo icta. “Nuquin Papan cuidquiac bëdanenquo yec daicsabudquiochitomane,” quiash adta —capondash Esusën.

¹⁵ Adoquien bëdameboed abi: “¿Tsuntsin naosh?” caboedo chiec nidpac caondash. Nidshumbic: —Èbi bëdameboed Esus niosh —quequin chuituidpac caondash. ¹⁶ Aden chuisho tantiatanequien: —Chonoadenquo icte ushënuidi bëdamepac caosh. Icsambo iquec —quequin con matses chuiquidon Esus chieshëmpac caondash. ¹⁷ Adnubien: —Mibi adosh —quesho tantiashun abi chieshënkuido istuidshun Esusën naden chuipondash. —Mimbi Nuquin Papa caid con Pa ënenquo icquin matses nashunquidquo nec. Adecbidi ënenquo icquin matses nashunquidquo nebi. Chonoadenquo icte ushëmbidi con Pabëdan adquid nebi —quepondash Esus. ¹⁸ Adsho tantiatanequien: —“Chonoadenquo icte ushën naquid icsambo iquec,” nuqui caboedquo: “Nuquin Papambo con pa nec,” quiosh. Adquid icsamboshë iquec. “Nuquin Papapadquidquo nebi,” quechitequien nioshe. Cuesunequimbien ictiad —quepac caondash con matses chuiquido.

Nuquin Papan Mado nebi, quiaid

¹⁹ Adec abi chieshënkuido abi cuesunete bunshobien padpiden istuidshun chuipondash Esusën. —¿Èmbimbo naidtambi nadio? Padenquo. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Èmbentsëqui natiapimbo iquebi. ²⁰ Èbi tantiaquin Con Pan ambi naidtedimbo ëbi tantiamec. Ambentsëqui nainquo iquec. Aidën tantiamiacpadomboen bëdiactsëc naquin nëid capuenquo icquid bëdamiombi. Adembidi ambi tantiamiacpadomboen naquin dacuëdampamboecnu

naindambi ma isquionoeshun. ²¹ Con Papadquidquo yec unësaid uincuemequidquo nebi. Matses ëmbi tantiaidotedi ëbëdi tabadmenuen uincuemendambi. ²² ¿Ëbi tantiesabo cuidnuen ambiuidtsëqui chuiquidta con Pa nedic? Padenquo. Ëmbien ambi chiacpadomboen naden chiendac. “Nëid nuqui tantiaquid neque. Nuquibëdi tabadmenuna. Nëid ëbi tantiesa icsambo icsho cuidnuna,” caindambi con Pa. ²³ Aidëmbi: “Ëbi tantiacpaden ma con Madotsen bëdamboen tantianu,” qeshun aden matses cuidte chuiquid icmiondashi. Ëbi adquid icmiondaid icsho ëbi tantiatipimbo icquidon ëbi chomiondaid Nuquin Papatsen tantienquo iquec. ²⁴ ¿Muectabi nedî? Abimbo chuinu. Tantiã. Ëbi chomiondaid con Pabëdtan ëbi tantiaquid unësaid cho cuidenquo icquin ëbëdi tabadmendambi. Cuidtequid icboedi ëbi tantiasb ëbëdi tabadtequid yanendac –quepondash Esus.

²⁵ Adashic padpidec onquec: –Tantiã. Mibi padpiden chuinu. Unësaidën tantienquo yachimboen ëbi tantienquo icboedombi ëbi tantiabensho bëdamboen tantiamequin bëdamboec tabadquid icmendambi. Adshun aido unësaid cho uincuemeshun ëbëdi tabadmendambi. ²⁶ Con Pan icmiacpadequi unësaid uincuemequid nebi. Abibi unëstiapimbo icquid icquin unësaid uincuemequidquo con Pa nec. Ambi icmiacpadequi abi yacpadquidquo iquebi. ²⁷ Adec unëstiapimbo iccondaidi matsesash icsaisambo icsho Con Pan matses icsaido cuidquid icmiondashi. ²⁸ Ëbi adsho tantiasbun: “¿Abimbobida capeba? Muequien nechitec,” ëbi cainda. ¿Muectabi nedî? Padenquo. Con Pan tantiacpadënquo ëmbi cuënac unësaidotedi uincuenendac. ²⁹ Adec uincuenacsho ëbi tantiaquid ëbëdi tabadmequin ëbi tantiesabo icsaido cuidacno nidmendambi. ³⁰ Ëmbentsëqui nainquo iquembi. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Ëmbi naid nainquo icquin Con Pa bëdambo icmenuen aidën chiacpadomboen naimbi –quepondash Esus abi chieshënquido chieç.

Utsintsen ëbi chieç, quequin Esusën chiaid

³¹ Adshumbic Esusën abi chieshënquido chuoapondash. –Nuquin matsesën naden chieç. “Abentsëschun chiaid icsambo iquec. Daëdshun chiaid abimbo iquec,” quequin chieç. Aden chiaid tantieç ëbiuidtsëqui: “Nuquin Papan Mado nebi,” qesho tantiasbun: “Abimbo mimbi caic,” mimbi ëbi catiapimbo iquec. ³² Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. ³³ Aden ëbi chuiquid utsi acten mentoanquid Uan pado icpadenec. Aidëmbi ëbi abimbo capadenec. “¿Nuquin Papa yacnuësh choquidta ne?” quequin mimbi chuitanac: “Padenquo. Esusuidi Nuquin Papa yacnuësh choquid nec,” quepadenec Uan pado. ³⁴⁻³⁵ Aden chieshtoengquo icquin bëdamboen chuipadenec. Chuisho tantiasbun mibi bëdambo icuidtsëcondac. “Ëmbi Uan padon naid chuisho tantiasbun: ‘Abimbo mimbi caic,’ ëbi capashun. Ëbi adsho bëdamboen istsiambi,” quequin mimbi tantiondaid Uan caombi. Matses icquimbi Uanën ëbi bëdiatsëc tantiamequin chuipadenec. ¿Adquid matsesënuidtsëquidabi abimbo chuipec? ³⁶ Con Pambien: “Con Mado neque. Matses ismenu,” qeshun comapenen tantiaquidquido icmepondashi. Ambi adomiaid icquin comapenen tantiaquin nabanquin ëmbi ismesho isash: “Ai, adquid nec,” quetiadquidi mibi nec. ³⁷ Ëbi chieçbidi onquequin Nuquin Papan nuquin tsusedpabo dada uamepampic. Adeçbidi Nuquin Papa onquesho ¿ada mimbi tantiapadio? ¿Nuquin Papada istio? Padambo mimbi iquec. ³⁸ Adembidi ambi dada uamequin chiampidquido ma mimbi bëdamboen tantienquo yoc. Aid bëdamboen tantiasbumbien Nuquin Papan chomiondaid ëbitsen mimbi tantiasiac. ³⁹ Mibi nadpec. “Nuquin Papan chiaid nuquin tsusedpabon dada uampid tantiaquidquido nebi. Aid isbanquid yec Nuquin Papabëd tabadtequid nebi,” mibi quepec. Ma ëbimbo chuiquin Nuquin Papan dada uamepampid neyoc. ⁴⁰ Aden dada uamepampid isbanquidombi mimbi ëbi tantienquo iquec. Ëbi tantiasbumbi mibi Nuquin Papa yacno ëbëd tabadmetsiandac. ⁴¹ “Ëbi adsho tantiasbun ma matsesën ëbi: ‘Bëdambo mibi iquec,’ canu,” ¿quectabi ique? Padenquo. Con Pan chiacpadomboen nanuembimbi aden chioç. ⁴² Ëbi tantienquo icsho isun: “Nuquin Papa tantiesabo nec,” quequin mibi tantiëmbi. ⁴³ Ëmbien Nuquin Papan chiacpadomboen naic. Aden nasho mimbi ëbi tantienquo iquec. Utsi: “Nuquin Papa yacnuësh choquid nebi,” quec muaquidien mimbi badedi tantiasiac. ⁴⁴ Mibibi tantiadec: “Mibi bëdambo iquec,” cananteuidi bunquin mimbi Nuquin Papa tantiatipimbo iquec. Aden mimbi Nuquin Papa: “Mibi bëdambo iquec,” cametiapimbo iquec –quepondash Esus abi chieshënquido chieç.

⁴⁵ Adashic padpidec: –¿Ëmbentsëquidambi: “Ëbi tantiesabo neque. Cuidnuna,” quequin mimbi naid Nuquin Papa chuieç? Padenquo. Mimbi tantiaidënquo Moisesëntsen: “Nëido icsambo iquec,” mibi caindac. ⁴⁶ Aidën chiampid bëdamboen tantiaquimbien mimbi ëbi tantiasiac. Aidën chiampidi mabi neyoc. ⁴⁷ Aden Moisesën chiampid tantienquo

icquin ëmbi chuiboedtsen mimbi tantiatipimbo iquec —quequin Esusën abi chieshënquido chuipondash: —Moisesën chiampid tantiaquidquido nebi —quequido chuiquin.

6

Esusën pete uatanquin 5000tedi pemiaid
(*Mat 14.13-21; Mad 6.30-44; Duc 9.10-17*)

¹ Yuecquio ictaniash Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabëdtoshon potiacpondash. Aid chiambidi matses utsibon Tibedias capondash. ²⁻³ Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin ëbi chedo chuipondash. Adnubien Esusën matses dadpen bédamesho isboedo Esus isnuec cho-chopondash. ⁴ Nuquin Papan isadaidho unës uainquio icquin matamiampid inchësh tantianuec pec tabadte ushë nëbi yanuc niondash.

⁵ Aido cho-chosho istanequien Esus: —Uedipe, piucquid buanshun ¿mitsimbo pete bedtane nëido pemenu? —quepondash Uedipe chiec. ⁶ —¿Atoda queque? Tiantianu —quiash adpondash Esus. —Pete bedabi icnuc ëmbibi pete uanu —quequin otacquio tantiequi adondash. ⁷ Adoaquien Uedipe: —Ma aidtedquio pemetiapimbo yoc. Inchëshën ushë 8tedquiobi nidmec chonoadshun bedaidtedimbo piucquid menequin pete bedshun: “Pemenu,” cac aidtedquio pemiaenquio ictsiash —quepondash Uedipe.

⁸ Adnubien Andedesën Petedon utsin: ⁹ —Ma në madompin panëmpi 5tedtsëc icpayoc, Icho. Nuëcquidëmpi daëdquiobi ictsec. Matses dadpenquio iquec. Aidtedtsëcquid pemetiapimbo iquec —caquien ¹⁰ Esusën: —Padi. Aidi bédambo iquec. Abitedi: “Nëmba tabad,” caban —cac: —Nëmba tabad —cabanac sebad-sebadpambo icquidën uasinën matses dadpenquioshë tabadbudpondash. Dadaidtsëqui tambanac 5000ted icpondash. Chido bacuëbobëdta tambanambo icpondambi.

¹¹ Adshumbien Esusën madompin pete pamba bedtanquin Nuquin Papa chuipondash. —Pete uaquid yec mibi bédamboshë iquec. Mimbi uaid nëid pete bédambo iquec, Papa —quec onquetanquin: —Meneban —cac abëd icquidon tabadquido abitedi menebampondash. Adotanquimbic nuëcquidëmpitsen bedtanquin adembidi Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembi pebededpondash. ¹² Aden ambi piactembi pebededacshobien Esusën: —Napi uaid secainda. Sandoshon dayun ua —cac ¹³ tsitsan dapan napiauid sandoshon dayun uapondambi tsitsan 12tedquiobi sandoaid icnuc.

¹⁴ Aden pemiaquien pemiaido: —Comapenen tantiaquin Esusën pete dadpenquio icmiac. Moisesën chuiampidshenda nepec. “Nuquin Papan bédamboshë icquid chomen-dac,” capampidshenda nepec. Adien nuqui chuiquid dapa icmetiad —quepac caondash Esus tantiamenquio yec. ¹⁵ Adsho ambembi tantiashien: —Abi chuiquid icmenuen ëbi “Bednu,” caique. Nëbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

Esus acte bëntse choaid
(*Mat 14.22-27; Mad 6.45-52*)

¹⁶ Esus cuembon inchëshbudtsëqui chian budondabi ëbitedi. ¹⁷ —Capednaun yacno nidnu —quec cano antabëdtoshon potenubi inchëshpondash Esus acte bëntse chopanushta. ¹⁸ Adnubien cunquequid dapa cunquequidpondash. Acte comapenec tēcucasquenuc ¹⁹ uncadenquio yampondash. Ënapen nidabi nëbi 6 quidometodos cactiontsëqui nidshun isquien matsesbimboec acte bëntse chopec. Adsho istanec dacuëdquidandabi. ²⁰ Adshobini: —Ëbi neque. Dacuëndenda —capondash. ²¹ Adoac: —Esus nec —quetanquin badedi antsadtomiondambi. Aid antsadtometanquin badedquio potepondambi. Nandoash ambobi ushondabi Capednaun yacno.

Pemiaidon Esus istuidoaid

²² Adnubien abi pemebocnobi matses ushpac caondash. Badiadnuc isucunshun isaquien Esus nibëdec. Nibëdsho isashien: —Ma cano abentsëcquidëmbi abëd icquidon potepaboc. Ma aidbëd nidenquio icpaboc. ¿Mitsimbo nidpash? —quepac caondash pemiaido. ²³ Adnubien shubu dadpen icquid Tibedias caid yacnocquidon cano dadpen bēbēpac caondash. Pete pemebocno anoentsëqui nando-nandosho isash: ²⁴ —Potequimbien Esusën yashe. Nëid canobi antabëdtoshon potenuna —quetanec antabëdtoshon potiacpotiacpac caondash.

Potiac-potiacash Capednaun yacno pudundoshon ²⁵ Nuquin Papan chiaid chuibante shubun abitedi puduedshun Esus istuidpondash. Istuidshun: —¿Mitsipaden potio, tsusio? —caquien: —Naden —quenquio yec: ²⁶ —Tantia. Mibitedi chuinu. ¿Ëbimbo tantianuecta

chodio? Padenquio. Ĕmbi pete uasho isash: “Nuquin Papan namiaidën naoshe. Istanu,” ¿quecta ictio? Peteuidtsëqui tantiaquin ma mimi ãbi nibëneyoc. ²⁷ Peteuidtsëqui tantiaquin pete bednuen naquidquo ma mibi neyoc. Aidquo chodquetequid nendac. Chodquetiapimbo icquid tantiaquin bédamboen nata. Aden nash ĩmbi icmiacpadquiec Nuquin Papabéd tabadtequid mibi yanendac. Nuquin Papan: “Con Mado neque. Ismenu,” quequin namiacpadomboen comapen tantiaquid icquin mibi adquid icmetsiami – quepondash Esus. ²⁸ Adsho tantiash: –“Nuquin Papan chiacpadomboen nata,” quepequien mibi iquec. Adomboen natiadquo icquin ¿atotsimbi nape? –caquien: ²⁹ –Nuquin Papan chiacpadomboen natiadquo icquin ambi chomiondaidquo tantiata –quepondash Esus ambi pemiaido chiec.

³⁰ Adoquien: –¿Mimbi aden chuishouididambi: “Adquid nec,” quequin tantiape? ¿Atotsi utsi comapen tantiaquin mimi ãbi ismepatsia? ³¹ “Ĕndenquimboshë pete nibëdacnoshon Moisesën con tsusedpabo nibedbëdi sequiaid pete pemianepampic,” quequin dada uapampid isombique. Adquid nacnenquin ãbi isme –quepondash pemiaido peteuidtsëqui tantiec. ³² Adoquien Esus: –Nuquin tsusedpa Moisesën nainquin icpampic. Con Pambien aden pemepampic. Nëbi ambi chomiondaid petebimboecquid utsien Nuquin Papan mibi tantiametiadquo iquec. ³³ Aid petebimboecquidën matses bédambo icmetsiashe pete piacimboecnu –quepondash Esus abibi cadequi.

³⁴ Adsho tantiash petembo ca danec: –Ĕnenquo icquin adquid ãbi pemeta –quepondash pemiaido ambi peboeuidtsëqui tantiec. ³⁵ Adshobien Esusën: –“Ĕbiuidtsëqui petebimboecquid icquin matses bédambo icmequid nebi,” caimbi. Ĕbi tantiaquid ĩnenquo icquin bédambo icmendambi petebëdi acte bundoenquo yacimboecnu. ³⁶ Ĕmbi chuibocpadomboen ma mimi ãbi tantienquo icboc. Ĕmbi comapen tantiaquin nabansho isumbi ma mimi ãbi tantienquo icboc. ³⁷ Utsibombien ãbi tantiendac. Nuquin Papan tantiamiaidtedishun ãbi tantiasho bédamboen isquin cacumenquo iquendambi. ³⁸ ¿Ĕmbi tantiacpadomboen naquidtabi nedi? Padenquio. Nuquin Papan chiacpadomboen nanuec mabi abi yacnuësh chondac. ³⁹ Aden aidën chiacpadomboen nanuen ãbi tantiaquido unësascho uincuemeshun cuidenquo icquin ëbëdi tabadmendambi. Unësaid abitedi uincuemete ushën adoendambi. ⁴⁰ Nuquin Papa bunacpaden ãbi tantiaquido uincuemeshun Nuquin Papa yacno ãbi tabadacnombo tabadmendambi –quepondash Esus ambi pemeboedo chiec.

⁴¹ Adec: –Nuquin Papa yacnuësh chonaid yec petebimboecquid nebi –quesho tantiashien con matses chuiquido: ⁴² –¿Adquidida nepec? Ma icsamboen chuiPAYOC. ¿Nuquin Papa yacnuësh choaidta nedic? ¿Nuqui isacmaidta nedic? Ma Esus cuëmëdquid neyoc. Ma Osen mado neyoc. Anitsen tantiembi. Matsesën tishaid Nuquin Papa yacnuësh choquid ictiapimbo iquec –quecudedpondash.

⁴³ Adshobien Esusën: –Shoshquetsëcquin ãbi icsamboen chienda. Abimboembi caoc. ⁴⁴ Ĕbi chomiondaidën Nuquin Papan tantiamiabi yaido icquin mimi ãbi tantiatiapimbo iquendac. Nuquin Papan tantiamiaid icquin mimi ãbi tantiatsiac. Aden Nuquin Papan ãbi tantiamiaido unësascho unësaid uincuemete ushën uincuemendambi. ⁴⁵ Aden Nuquin Papan tantiamete chuiquin nuquin tsusedpan dada uapampic. “Nuquin Papambien ambi bédamboen iste matses tantiamendac,” quequin chuipampic. Aden Nuquin Papan tantiamiaido ãbi tantiaquido yantsiashe. ⁴⁶ “Ambi tantiamiaidën matsesën Nuquin Papa ishash,” quenquo iquebi. Ĕmbiuidtsëqui abëd icquin Nuquin Papa isondambi. Aden abëd icquin abi isondaidi matsesondabi –quepondash Esus: –Matsesi nec –abi caquido chiec.

⁴⁷ Adashic padpidec: –Abimbo caombi. Ĕbi tantiaquido Nuquin Papa yacnombo ëbëdi tabadmendambi. ⁴⁸ Petebimboecquid icquin aden tabadmendambi. Adecididi bédamboec tabadmianquid nebi. ⁴⁹ Nuquin tsusedpabon pete utsi nibëdacnoshon mana caid pepampic. Aid pequid tsusiobudash unëspampic unëstiapimbo icquid yanabi. ⁵⁰ Petebimboecquid utsien Nuquin Papa yacnuësh chonaid nëmbobi iquec. Aid piash ĩmbi chiacpadquiec padpidec unësenquo yec Nuquin Papabéd tabadtequid yanendac. ⁵¹ Adquidquo nebi. Con nami piash matses unëstiapimbo icquid yanendac. Adquidquo matses icmenuec ëbided cuidadquin con nami menendambi –quepondash Esus ompoacimboen chiec. –Ĕbi tantiaquido nëbi bédamboen tabadmeshun unësascho Nuquin Papa yacno ëbëdi tabadmendambi padpidec unëstiapimbo icnu –quequin tantiec: –Petebimboecquid icsho ãbi piash matses unëstiapimbo icquid yanendac –quepondash Esus. –Ĕbi tantiaquido cuidmenquo icnuec ëbided cuidadec unësendabi –quequin tantiec: –Con nami menendambi –quepondash Esus.

⁵² Adec: –Con nami piash matses unëstiapimbo icquid yanendac –quesho tantiashien namimbo ca danec con matses chuiquido onquecudedpondash. Utsi-utsiec: –¿Mitsipaden

Esusën aton nami nuqui pemepatsiash? Aidquo tantiatiapimbo iquebi —quecuedednubi utsi-utsiec: —¿Atotsi chuitiadquo yec niosh? Chuisho tantianu —quecuededpondash. ⁵³⁻⁵⁴ Adsho tantiashun Esusën ambi chiacpadomboembidi chuiopondash. —Tantia. Mibi chuinu. Matses tantiaquidquo nebi. Aden tantiaquiec ëbided cuidadec unësendabi. Ëbi adec unëso isun con nami pequinc con intac acquinc cash nidaidënuësh bëdamboec tabadquid yanash Nuquin Papabëd tabadtequid mibi yanendac. Adquid icsho unësaido uincuemete ushënquo uincuemendambi ëbëdi tabadmenuen. Ëmbi chiacpadomboen nainquo yash Nuquin Papabëd tabadtiapimbo mibi iquendac. ⁵⁵ Ai, con nami petebimboecquid nec. Con intac actebimboecquid nec. ¿Petebëdi acte naimëdanda mibi bëdambo icpatsia? Adecbidi con intac chididquiec con nami icsabudec ëbided cuidadec unësaid tantienquo yec mibi bëdamboec tabadtiapimbo iquendac. ⁵⁶ Aden ëmbi namibëda intac chuisho bëdamboen tantiashun ëmbi chiacpadomboen matsesën natiadquo yanendac. Adsho isun aidbëd tëshnanenquo icquin bëdamboec tabadquid icmendambi. ⁵⁷ Nuquin Papa unëstiapimbo icquid yec matses uincuemequidquo nec. Aidën chomiac ambi namiacpadomboenuidi naquin ëbi tantiec tabadquid unëscasho uincuemequin unëstiapimbo icquid icmendambi. ⁵⁸ Aden ëmbi naid tantiamenuc: “Nuquin Papa yacnuësh chonaid petebimboecquid utsi iquiec,” quioibi. Ëbi adquid icsho isash ëbi tantiaquid Nuquin Papabëd tabadtequid yantsiash. Nuquin tsusedpabon pepampidpadquidpenquo nebi. Adquid pequidi tsiobudash unëspampic. Ëbi tantiaquidien padpidec unëstiapimbo icquid yanendac ⁵⁹ —quepondash Esus Nuquin Papan chiaid chuibante shubunuësh Capednaun yacnuësh.

Abi tantiauidquidon Esus nianondaid

⁶⁰ Adec: —Con nami pequinc con intac acquinc cash mibi bëdambo ictsiac —Esus qesho tantiashien abëd icquido utsi-utsiec: —Aidën chiacpadomboen natiapimbo iquebi. Icsamboen chiec —quepondash Esus tantiamenquo yec. ⁶¹ Adec onqesho ambembi tantiash Esus onqueoapondash. —¿Ëmbi chuiboeid tantiash chieshtotiadquida ique? ⁶² Nuquin Papan matsesmaid yequi unësash ëbi icconadno ëbi nidacsho isash ¿atoda mibi quendac? Abimbo caombi. Nuquin Papa yacnuësh chonaidini nec. ⁶³ Namimbo intacquibëda ca danequien mibi nec. ¿Namimbo pequinc intacquio acquinc casha mibi bëdambo icpatsia? Padenquo. Nuquin Papan Mayanën ëmbi chuiboeidbëda ëbi tantiamequin matses bëdamboec tabadquid icmetsiash. Adoaid unësash Nuquin Papa yacno ëbëdi tabadtsiash —quepondash Esus cuembo chiec. ⁶⁴ Adashic padpidec: —Ëmbi aden bëdamboen chiaqui utsin-utsinquien mimbi ëbi tantienquo yanendac —quepondash abi tantiauidquido chiec. Aido tauamboec abëdi nidnuc: —Nëidën ëbi tantienquo yanendac. Nëid utsin ëbi chieshëquido ëbi bedmendac —quequin ambembi Esusën tantiapanëdash.

⁶⁵ Adashic padpidec: —Ëbi tantiauidquido tantiaquin naden chiombi. “Nuquin Papan tantiamiabi yaidën ëbi tantiatiapimbo iquendac. Nuquin Papan tantiamiaidënquien ëbi tantiatsiash,” quequin chiombi —quepondash Esus. ⁶⁶ Adsho tantiashun dadpeshun Esus nianondash. ⁶⁷ Aden nianaquien Esusën abëd icquido 12ted icquid chuipondash. —¿Mimbisendabi niampe? —caquien ⁶⁸ Petedo: —Padenquo. ¿Tsudabëd icnuendambi mibi nianuc? Mibipadquid utsi nibëdec. Mimbuidtsëquien: “Ëbi tantiaquid bëdamboen isquin unëscasho uincuemeshun ëbëdi tabadmendambi,” quequin chuipoc. ⁶⁹ “Abimboen caosh,” quequin mibi tantiembi. “Nuquin Papa yacnuësh chonëdaid yec bëdamboshë icquidquien nec,” caombi mibi. Mibi niantiapimbo iquebi —quepondash Petedo Esus caic. ⁷⁰ Adoagain Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Ëmbi adonaid abentsëc Satanasën namiaidquo yec icsamboshë iquendac —quepondash Esus. ⁷¹ —Simon Iscadioten mado Udasën ëbi chieshënquido ëbi bedmendac —quequin ambembi tantiash adondash Esus.

7

Aton utsibon Esus tantienquo yaid

¹ Abi tantiauidquidon nianac Cadidia yacnoui yuec Esus capucuenepondash. —Nidaid Udeya caid yacnocquido con matses chuiquidon ëbi cuesunetiadquo iquiec —quias Udeya yacno nidenquo icpondash. ² Adnubien con matses abitedi: —Edusaden yacnuësh cuëdëntanu —quiampondash. Adanec nidaid utsi Udeya caidën nidec 7tedec ushec cuëdënec matses dadpen nidacno Edusaden yacno nidanepondash. Cuëdënec Esus nidenquo icpondash. ³ Adec nidenquo icsho isumbien aton utsibon: —Edusaden yacno nidec nid. Mibëd ictiadquo icquid ano icnushe. Comapenen tantiaquin nabanquin aido ismec nid. ⁴ ¿“Ma matses dadpeshun ëbi tantianu,” quequina matses daëdpactsëc yacnoshonuidi napec? Matses dadpen yacno nidshun comapenen tantiaquin nabanquin

ismec nid —capondash aton utsibon. ⁵—Nuquin Papan chomenëdaidquio nec —quequin tantienquio icquimbi adopondash aton utsibon.

⁶ Adoquien Esus: —Matses dadpen nidnuc nidtiadquio yec mibia nidta. Abitedishun isnuc nëbi nidtiapimbo iquebique. ⁷ Mibien anocquidon chieshëntiapimbo ye. Mibia nidta. “Nuquin Papan chiaid niac-niaquec mibi icsaic,” ëmbi cac chieshë nondashibique. ⁸ “Cuesunenushe,” quiaish nëbi nidtiapimbo iquebique. Mibia nidta. Nuquin Papan tantiacpadec nidendabi ⁹—quiaish anobi Cadidia yacno Esus tabadpondash.

Esustsen Edusaden yacnuësh cuëdëneuc nidaid

¹⁰ Aden aton utsibo nidanemiashe yuec-yuecpactsëc ictanec abitsen Esus nidpondash Edusaden yacnuësh cuëdëneuc nidec. Abitedi ismenquio yec tsyuec Esus nidpondash. ¹¹ Adnubien con matses cuëdëneuc dactacnoshon abi chieshënquidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash. ¹²⁻¹³ Adsho tantiashe con matses Esus chieshënquido dactuëdëneuc utsibo tantiamenquio yec shoshshquetsëcquieq onquepac caondash. Utsi-utsiec: —Esus bëdamboshë icquid nec —quenubien utsi-utsiec: —Ma icsambo icquid neyoc. “Nuquin Papa yacnuësh chondaidini nec,” quec ma muequi neyoc —quec onquecuedepac caondash.

¹⁴ Adnubien con matses cuëdëneuc taëbon abentsëc choec ushash Nuquin Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash. ¹⁵ Adsho tantiashe: —¿Mitsipaden tantiashe chuipe naic? Nuquibëdtan Nuquin Papan chiaid isbanambo aidën iquec —quepondash con matses chuiquido. ¹⁶ Adsho tantiashe Esus: —Ëmbembi chienquio icquin ëbi chomiondaidën chiaidquio chiec nebi. ¹⁷ Nuquin Papan chiacpadomboen natiadquio icquidën bëdamboen tantiashe. Ëmbi Nuquin Papan chiaid chuisho tantiashe: “Nuquin Papan chiaidquio chiec nec,” quequin tantiashe. Ëmbembi chuisho tantiashe: “Ambembi chiaid nec. Nuquin Papan chiaidpenquien nec,” quequin tantiashe Nuquin Papa tantiaquidën. ¹⁸ Ambembi chuiquidën: “Mabi matsesën bëdambo canu,” quequinuidtsëqui chuibantsiashe. Adquidpenquien nec. Ëmbien: “Ëbi chomiondaidquio ma matsesën tantianu,” quequin ambi chiaidquio chiendac. ¹⁹ Mimbien adoenguiquio iquec. Mimbiantiaid nuquin tusedpa Moisesën: “Cuesunenda,” quequin Nuquin Papan chiaidquio dada uapampic. Ëbi: “Cuesunenu,” caquin aidën chiaid ma mimbiantiaqueyoc —quepondash Esus abi chieshënquido chiec.

²⁰ —Mimbi ëbi: “Cuesunenu,” caoc —Esus qesho tantiashebien ano tabadquidon: —Podobitsi icsa dapuedesh mibi tantiaquidquio yec onquepec. ¿Tsuntsin mibi cuesunetsiashe? —capondash. ²¹ Adoquien Esus: —Nëidën ëbi cuesunetsiashe —quequin chienquio yec: —Chonoaenguiquio icte ushën comapenen tantiaquin dada bëdamepondambi. Aden bëdamiashe isash: “Adopenshenda naic. Chonoaenguiquio icte ushën daicsatsaid bëdamequin Nuquin Papan chiaid niac-niacposh,” ma mibi quepondac. ²² ¿Ëmbentsëquidambi chonoaenguiquio icte ushën nadi? Ma min matsesën adoapaboc. Mimbiantiaid Moisesën chiaid tantiaquin dada bacuë tishacsho 7tedec ushun shui dëbid dëteshunquid mibi nec. Moisesën aden tauambo iquec. Moises tishabi icnubien Nuquin Papan chiacpadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunquid tauapampic. Yuecquio ictaneshun adembidi Moisesënten adopampic. Nëbi adembidi naic chonoaenguiquio icte ushëmbi chonoaenguiquid ma mimbiantiaid shui dëbid dëteshunquid. ²³ Aden Moisesën chiampid niaquienquio icquin shui nacnenquin mimbi bëdamboen naic. Ëmbitsen daicsatsaid dada abichobi bëdamequin mambi bëdamboen naondac. ¿Atotsi quequin ëbi chushcai? ²⁴ Chonoaenguiquio icte ushën dada bëdamequid icsho: “Icsambo mibi iquec,” mimbi ëbi capec. Aden ëbi bëdamboen tantienquio icquin mimbi icsamboen chiec. Ëbi bëdamboen tantiaquoshon ëmbi naboed bëdamboen chui —quepondash Esus abi chieshënquido chiec.

Esus bedshun cuesunetiad, cauida

²⁵ Adec Esus: —Chonoaenguiquio icte ushën naondambi —qesho tantiashe anocquido Edusaden yacnoquido nadeconquecuedepac caondash. —Nuqui chuiquidon: “Cuesunetiad,” caboedien nëid nechitec. ²⁶ En is. Abi chieshënquidobëdi tabadquin chieque. Chuisho ma chuiquidon chushcainquio icboc. “Nuquin Papa yacnuësh choquid Quidistu caid Esus nec,” quequin tantiashebien nachitec —quetanequien ²⁷ aidobidi: —Nuquin Papa yacnuësh choquid ictiapimboen aid iquec. Abi caniacno tantiembi. Nuquin Papa yacnuësh choquid abi caniacno tantiaquidquio ictsiashe —quepondash ano tabadquido.

²⁸ Adsho tantiashe Esusën Nuquin Papa tabadte shubu uashunaid daquënë uacnoshon chuibanquin abitedi tantiamen naden chuipondash. —“Ëmbi isonda nec. Aton nidaid

Cadidia caid yacnuĕsh caniquid nec,” *¿quequindabi bĕdamboen tantiapadi? Ma mimbi padenquio yoc. Ēbemi chondaidpenquio nebi. Ēbi chomiondaid abi iquec. Ma mimbi aidquiobi tantienquio yoc.* ²⁹ Ēmbien aidquio tantiendac. Aiddĕd tabadondaidquio nebi. Adsho aidĕn: “Nid,” cac chondaid nebi –caquien ³⁰ –“Con pa Nuquin Papambo nec,” quechitequien nec –queshun abi chieshĕnquidon: –Cuesunemenuembien bedtiad –quetanquin: –Bednu –caqui bedadenquio icpondash. –Nĕbi ma Esus unĕs uainquio icnu –Nuquin Papa quenuc bedmenquio icquĕn Esusĕn mĕtampanĕdash. ³¹ Esus cuesunetiadquio incubien utsibon dadpenshun Esus tantiabempondash. –Nĕidpadquid utsi nibĕdtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tantiaquin Esusĕn matses bĕdamebamposh. Nuquin Papa yacnuĕsh choaid Quidistu caid Esus nec –quequin dadpenshun Esus tantiabempondash.

Ēbi istuidenquio iquendac, quequin chiaid

³² Aden Esus chiec sho-shoshquetsĕcquiec onqueshoben Esus chieshĕnquidon padiseyo caidon tantiapac caondash. Adshun abĕdtan chuiquid utsibo chuipac caondash. –Ēmbi chuibocpaden Esusien bedtiad. Icsamboec onquioshe –cac: –Ai, adembien ictiad –quepac caondash. Adshumbic abĕd icquido sondado chuiquin: –Baded bedtan –capac caondash. ³³ Adoac nidanequin tantiatuidaquien naded Esus onquepondash. –Yuec-yuecpactsec mibĕd icashic ĕbi chomiondaidbĕdtsen tabadoaic nidendabi. ³⁴ Ēbi nibĕnquin ĕbi istuidenquio mimbi iquendac. Ēbi nidacno mibi nidtiapimbo iquec –quepondash Esus. ³⁵ Adsho tantiash abi chieshĕnquido: –Nuqui istuidmenquio icnuĕc *¿mitsimbo nidpanuec nec? Matses utsi yacno tabadnuĕc con matses utsi-utsiec nidequi nidaniondacno nidshun ¿anocquidoda chuipatsiash? ³⁶ Tantiadenquio yec onquepec. ¿Atotsi quepec? “Ēbi nibĕnquin miboci ĕbi istuidenquio iquendac. Ēbi nidacno mibi nidtiapimbo iquec,” quepequien iccosh. ¿Atotsi quepash nioš? –quepac caondash Esus chieshĕnquido.*

Aton Mayan abi tantiaquidbĕd tabadmete chiaid

³⁷ Adnubien cuĕdĕnec ĕnĕdte ušĕnquiobi con matses abitedimbo cuĕdĕnuec chopondash. Cho-choash tabadbudnubien nidtoash comapenec onquequin Esusĕn chuipondash. –Acte natia bunacximboec Nuquin Papa tantiate bunquin ĕbi bĕdamboen tantiata. ³⁸ Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ĕbi tantiaquidobĕd tabadmendambi. Adoac mibĕd tabadquin mibi bĕdamboen tabadmequin utsibotsen Nuquin Papa tantiate bumetsiash –quepondash Esus. ³⁹ –Nuquin Papabĕdta ĕbi tantiamequidquio Nuquin Papan Mayan nec –quequin tantiec adondash. Adquid abi tantiaquidobĕd tabadmequin chomiabi aden chuipondash Esusĕn. Nuquin Papa yacno nidambien abi tantiaquidobĕd Nuquin Papan Mayan tabadcuenondash.

¿Nuquin Papan chomiaidta nepeba? Esus caid

⁴⁰ –Nuquin Papa tantiate bunquin ĕbi tantiata –Esus qesho tantiashien Esus chiec ano tabadquido onquecuedepac caondash. Utsi-utsiec: –“Nuquin Papan chiaid chuiquidquio choendac,” quequin nuquin tsusedpa Moisesĕn chiampidien Esus nechitec –quenubien ⁴¹ utsi-utsiec: –Nuquin Papa yacnuĕsh choquid Quidistu caidien Esus nechitec –quenubien utsi-utsiec: –*¿Cadidia yacnuĕshsta Nuquin Papa yacnuĕsh choquid chopadic? ⁴² Padenquio. Nuquin Papan chiaidquio naden dada uapampic. “Nuquin Papan chomiaid nuquin tsusedpa Dabidĕn tsyuecquid nendac. Dabid caniampicnoshon shubu daĕdpactsĕcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquio nec –quepac caondash. ⁴³ Adĕc dadpen: –Bĕdambo icquid nec –quenubi aiddĕdbidi: –Icsambo iquec –quepac caondash. ⁴⁴ Adnubien: –Icsambo iqueque. Cuesunemenuembien bedtiad –queuidpac caondash. Adshun Esus bedabi icpondash.*

Isadaidbo chuiquid dapabon Esus chieshĕnaid

⁴⁵ Adnubien: –Esus bedtan –caboedo sondado bedabi Esus chieshĕnquido chiec chopac caondash. Chosho: –*¿Atotsi quiaš bedabi cho? –caquien: ⁴⁶ –Ma bĕdamboenshĕ chuiboc. “Adomboen chuibanquid utsi nibĕdec,” queshun bedtiapimbo iccobi –quesho ⁴⁷ tantiashien: –Aid muasho tantiashun: “Abimbo caic,” ¿cainda icco? ⁴⁸ ¿Adambi Esus muasho tantiadio? ¿Ada tsusiobon tantiadiosh? Padenquio iccosh. ⁴⁹ Utsibombien tantiash. Adquidon ĕmbi bĕdamboen tantiacpadomboen Nuquin Papan chiampid tantienquio iquec. Icsambo aido iquec. Aido cuidchitoshon. Esus icsambo iquec –quepac caondash con matses chuiquido padiseyobo Esus chieshĕnec.*

⁵⁰ Adnubien inchĕshĕn pudĕdash Esusbĕd onquiondaid Nicodemo caid abitsen chuiquid yec nadpac caondash. ⁵¹ –*¿Abibi chuimiabida cuidpec? Nuquin Papan chuipampid*

nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bédambo ictsiash. Chuimiabi cuidac icsambo ictsiash —quepac caondash Nicodemo abédtan chuiquid utsibo chiec. ⁵² Adoquien chuiquido: —Esus yacpadec Cadidia yacnuësh caniquid mibi nepanui. Aid tantiaquiden mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquo choenquio iquendac,” quequin mibi tantiatsiac. Ma Esus muequi neyoc —quepac caondash chuiquido Nicodemo chushcaic. ⁵³ —¿Chuimiabida cuidpec? —quetsécsho aden Nicodemo chushcanec abitedi nidaniac caondash aton shubuno ushec nidec.

8

Bënëpenquo chudmequid cuënoten seshunetsenaid

¹ Nicodemo chushcabon Esus macuësh dapa Odibos caid yacno ushec nidondash. ² Adtanec choashic Nuquin Papa tabadte shubu uashunaid daquënë uaidën puduedpondash. Puduedsho isash matses dadpen cho-choec abi datsidadsho Esusën chuipondash.

³ Aden chuinubien con matses tsusiobon aton bënëpenquo chudmesho istuidshun chido bēpondash. Moisesën dada uampid chuibanquidobédtan tsusedpabon chiampid namequido padiseyobon Esus yacno bëshun chido nēnantanquino nitsimpondash. ⁴ Adshumbien Esus chuipondash. —Aton bënëpenquo chudmesho istuidshun nēid bēombi. ⁵ Nuquin Papan chiaid Moisesën naden dada uapampic. “Aton bënëpenquo chudmesho istuidshun cuënoten seshunequin unēs uaquid,” quepampic. ¿Adembidida mimi tantie? —quepondash chido bēquido. ⁶ —¿Atotsi Esus quepatsiash? Nuquin Papan chiampidquid chienquio icsho: “Mimbi icsamboen chiec,” catiad —quiash adondash. —¿Adembidida mimi tantie? —caquien Esusën ècbedenquio icquin shuebudshun mēdanten nidaid dada uapondash. ⁷ Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbia cuënoten se —quetanec ⁸ padpidec shuebudshun mēdanten nidaid dada uapondash.

⁹ Adnubien: —Nuquin Papan chiaid niaquesambo icquin en mimbia cuënoten se —cac: —Nuquin Papan chiaid niaquesamboen nibēdchitec. Setiapimbo iquec —quetanec nidanepondash. Tsusioboba nidanebon caniabotsen tsyuec nidanepondash chiduidtsēqui Esusbēd icnuc. ¹⁰ Adec nidanian Esusën nidtoquin isquien nibēdec. Nidaniac. Abi bēboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibēdosh? —Esusën cac: ¹¹ —Ai, nibēdosh —quesho tantiashien: —Èmbimbo mibi cuënoten senquio iquembi. Mibi icsaid ènash bédamboec tabadec nid, champi —capondash Esusën. Adoac chido nidondash.

Pabiate cuembo icnuc tantiamequid

¹² Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshēnquido tantiamequin padpiden chuiopondash. —Pabiate cuembo icnuc con Pan bédamboen iste matses tantiamequidquid nebi. Èmbi tantiamiac èbi tantiaquido icsateuidi bunenquio yanec bédamboec tabadte buncuenendac. Adec èbēd tabadtequid yanendac —quepondash Esus.

¹³ Adsho tantiash abi chieshēnquido: —Mibentsēqui: “Adquid nebi,” quesho tantiatiapimbo iquebi. Muequien mibi nechitec. Matses daēdshun chiac bédambo ictsiash —quepondash. ¹⁴ Adsho tantiash Esus: —Èbibi abimbo cadebi. “Con Pa yacnuësh chondash anobidi nidendabi,” quec muainquio iquebi. “Aton papa yacnuësh choash anobidi Esus nidoaindac,” quequin ma mimi èbi tantienquio icboc. ¹⁵ Cadidia yacnuësh choquid matsesuiden mimi èbi danec. Adquid danquin mimi icsamboen chiec. Èmbien abimbo chiec. Abimbo chuiquid icquin: “Nēid icsambo iqueque. Cuidnuna. Nēid bédambo iqueque. Cuidenquio icnuna,” quequin nēbi chienquio iquembi. ¹⁶ Aden chuiquin abimbo chuitsiambi. Èmbentsēqui chienquio icquin èbi chomiondaid Nuquin Papabēdtambi chuiquin abimboshē chuitsiambi. ¹⁷ Nuquin Papan chiaidquid Moisesën naden dada uapampic. “‘Icsaosh,’ quequin daēdshun chuisho tantiash: ‘Abimbo chiec,’ quequid yendac. Adecbidi: ‘Bédambo iquec,’ quequin daēdshumbidi chuisho tantiash: ‘Abimbo chiec,’ quequid yendac. Abentsécshun chuishoen mua caquid yendac,” quequin Nuquin Papan chiaidquid Moisesën dada uapampic. ¹⁸ Aden Moisesën dada uampid tantiashun èmbentsēqui chienquio iquembi. Èbi chomiondaid con Pabēdtantsēqui chiambi —quepondash Esus.

¹⁹ Adsho tantiashun abi chieshēnquidon: —¿Mitsimbo papa icpec? —capondash. Adoquien: —Con Pa èbēdta ma mimi tantienquio icboc. Èbi tantiaquimbien mimi con Patsen tantiatsiac —quepondash Esus abi chieshēnquido chiec. ²⁰ Abi chieshēnquido onquecuedec quēnēn tabadnubi aid quēnē cachotsēqui Nuquin Papa tantiaquin piucquid

menequin nauedte tabëcacosnosh Esusën chuipondash. Adec Esus anoentsëqui tabadsho abi chieshënquidon bedabi icpondash. Nuquin Papa: —Ma ëmbi tantiacpadënquio matsesën unës uanu —quenuc Esus bedabi icpondash.

Utsibon Esus tantiauidaid

²¹ Adnubien Esusën abi chieshënquido padpiden chuioapondash. —Nidendabi. Ëbi nidan ëbi nibënquin mimbi ëbi istuidenquio iquendac. Ambi chiaid niac-niacquido icsho Nuquin Papan bëdamboen isambobi mibi unësendac. Adash ëbi nidacno mibi nidtiapimbo iquendac —quequin chuipondash Esusën. ²² Adsho tantiash Esus chieshënquido: —¿Abibida Esus cuesuniadpec? Abibi cuesuniadash Nuquin Papan icsaido cuidacno nidtsiash. Ambo nuqui nidtiapimbo iquec. ¿Aden chiecta: “Ëbi nidacno mibi nidtiapimbo iquec,” quepec? —quepondash abi chieshënquido. ²³ Adsho tantiash Esus: —Mibi matses nec. Ëbien con Pa yacnuësh chondaidquio nec. ²⁴ “Adquid icsho ëbi tantienquio icquid unësacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bëdamboen isabi mibi unësendac,” mibi caombi —quepondash Esus.

²⁵ Adsho tantiash abi chieshënquido: —¿Mitsipadquid icquin ëbi aden chie? —quepondash Esus caic. Adoquien: —Ëmbi chianeboedquiobi mabi neyoc —queoapondash Esus. ²⁶ Adashic padpidec: —Mimbi naid dadpen chuiquin mibi cuidte chiendambi. Ëmbembi chienquio icquin ëbi chomiondaid muesanquio chiaidquio chiendambi. Aidën chiaiduidi matses abitedi chiendambi —quenubien ²⁷ Esus chieshënquidon: —Abi chomiondaid Nuquin Papambo nec —quequin tantienquio icpondash. ²⁸ Aden tantienquio icsho isun Esusën padpiden chuioapondash. —Matsesmiadquio icshobi ëbi cuesten dectanshumbic mimbi ëbi tantiabenendac. “Ambi chiapadquidshenda nepadenec. Ambembi chiaid chienquio icquin aton Papan chiaidquio chuiquin aidën chiapadomboenshenda napadenec,” quequin ëmimbo mimbi tantiendac —quepondash Esus. ²⁹ Adashic padpidec: —Nëbi ëbi chomiondaid ëbëd iquec. Aid bëdambo icmienen ambi chiapadomboen nasho isun ëbi nianenquio iquec —quepondash Esus.

³⁰ Adsho tantiashun: —Abimboen Esusën caic. Nuquin Papa yacnuësh choquidien nec —qeshun Esus tantiauidtsëccondash dadpeshun.

Satanasën yuabo nec, quequin Esusën chiaid

³¹ Adsho isumbien Esusën abi bëdiactsëc tantiauidtsëcboedo chuipondash. —Ëbi tantiauidën ëmbi chiapadomboen natiadquio iquendac. ³² Nuquin Papabëdta ëbi aden tantiasho icsamianquidien yua icboedi aidën yuapenquio mibi icmetsiambi —quepondash Esus abi tantiauidtsëcboedo chiech. ³³ Adec Esus: —Yua —quesho tantiashien: —Abadauan yampidën tsyuecquido yec utsin yuacmaido nebi. Tantienquio icquin mimbi icsamboen chiech. ¿Atotsieshun: “Mibi yuapenquio icmetsiambi,” quequin ëbi chio? —capondash abi tantiauidtsëcboedon Esus chuiquin.

³⁴ Adoquien: —Tantia. Mibi abimbo chuinu. Uidën uachimboen icsambo icquidën ambembi abi icsaid ëntiapimbo iquec. Abembi bëdambo ictiapimbo iquec. ³⁵ ¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bëdamboen isquid. ³⁶ Aden con Pan aton Madombo icsho ëbi bëdamboen isquin ëbi tantiaquidotsen bëdamboen isendac. Aden ëbi tantiaquido bëdamboen isquin bëdamboec tabadte bumequin abi yacno ëbëd tabadtequido icmendac —quepondash Esus.

Satanasën madobimboecquido chiaid

³⁷ Adshumbic Esusën abi chieshënquido chuioapondash. —“Con tsusedpa Abadauan icpampic,” quequin mimbi abimbo chioch. Adboedëmbi ëbi cuesunetiadquio mibi iquec. Ëmbi abimbo chuisho tantiate bunenquio icquin ëbi cuesunetiadquio mibi icpec. ³⁸ “Con Pabëd tabadquin isondambi,” quequin ëmbi bëdamboen chuisho tantienquio icquin min papabimboecquidën chiapadomboen mimbi naindac —quepondash Esus abi chieshënquido chiech. ³⁹ —Min papabimboecquidën chiapadomboen mimbi naindac —qeshobien: —Con tsusedpa Abadauanën nacpadomboen mambi napaboc —capondash Esus chieshënquidon. Adoquien Esus: —Ma mimbi adoenuquio yoc. Abadauanën nacpadomboen naquin mimbi bëdamboen natsiac. ⁴⁰ Bëdamboen natiapimbo icquin mimbi ëbi cuesunetiadquio iquec. Nuquin Papan chiaidquio abimbo chuisho mimbi adotiadquio iquec. Nuquin Papan chiaid tantiec ma Abadauan cuesuniantiapimbo icpampiyoc. ⁴¹ Min papabimboecquidën namiapadomboen naquidien mibi nec —capondash Esusën abi chieshënquido chuiquin. Adoquien: —Mambi Nuquin Papauidtsëqui tantieyoc. Utsi tantiatiapimbo icquin Nuquin Papauidtsëqui con pa caimbi —quepondash Esus chieshënquido.

⁴² Adsho tantiashien Esus: —Nuquin Papambo tantiaquimbien mimbi ëbitsen tantiatsiac. Ëmbembi choenquio iccondabi. Nuquin Papan: “Matsesbëd tabadec nid,” caquini chondac.

Adoaid icsho Nuquin Papa tantiaquidën ëbitsen tantiatsiash. ⁴³ ¿Mitsipadquid yec ëmbi chiaid tantiash: “Tantiadenquien icpec,” quepe mibi? Ëmbi abimbo chuisho tantiate bunenquio yec pamumëdacimboec mibi iquec. ⁴⁴ Min papabimboecquid Satanas nec. Aid bunacpade-nuidi mimbi natiadquio iquec. Ëndenquimboshë Nuquin Papan tauamboen matses uanubi min papabimboecquid cuesunianquidquio nepampic. Aton padibi nec. Nuquin Papan chiacpadomboen namenquio yec chieshë nec muaquidquio nec. Aton padibi icquid yec matses muamequidquio nec. Aidën madobimboecquid mimbi ëbi tantiatiapimbo icpec. ⁴⁵ Ëmbi Nuquin Papan chiaidquio abimbo chuisho mimbi tantiatiapimbo iquec. Icsambo icquidën ambembi chuisho mimbi tantienquio yaquien bëdambo ictsiash. Mabi icsambo icquidpenquio neyoc. ⁴⁶ ¿Tsuntsimbini: “Mibi icsaoc,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquio mimbi icpe? ⁴⁷ Nuquin Papa tantianuequidën Nuquin Papan chiaidquio chuisho tantiatsiash. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec —quepondash Esus abi chieshënquido chushcaic.

Esus chieshënquido cuënoten siantiadpambo yanaid

⁴⁸ —Nuquin Papa tantiesabombo ma mibi neyoc —Esus qesho tantiashien abi chieshënquido: —Ma mibi podobitsi icsa dapudedash neyoc. Tantiadenquio yec mibi onquec. Samadia yacnocquidobimboec icsamboshë ma mibi iqueyoc —caquien ⁴⁹ Esus: —Mabi podobitsi icsa dapudedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquio abimbo mimbi chiec,” catiadquidi mimbi ëbi: “Muec nec,” capec. ⁵⁰ “Mabi: ‘Bëdambo iquec,’ canu,” quenquio iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi cuidendac. ⁵¹ Tantia. Mibi bëdamboen chuinu. Ëmbi chiacpadomboen naquidquio unësenquio ictsiash —quepondash Esus ompoacimboen chiec. —Ëbi tantiaquido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc —quequin tantiec adondash.

⁵² —Unësenquio ictsiash —qesho tantiash Esus chieshënquido: —Ma mimbi tantiadenquio icnuc chuipayoc. Adsho: “Mayan icsa dapudedashien nec,” mibi caombi. “Ëmbi chiacpadomboen naquidquio unësenquio ictsiash,” quepequien mibi iquec. Nuquin tsusedpa Abadaun yec Nuquin Papan chiaid chuibanquido yec quequido Nuquin Papan bëdamboen isaidombo abitedi unëspampic. ⁵³ ¿Aido Nuquin Papan namiampidombo icnuc Nuquin Papan namequiaidquioda ne? ¿Mitsipadquid mibi nepe? Muequien mibi nechitec —quepondash.

⁵⁴ Adoquien Esus: —Ëmbembi: “Mabi: ‘Bëdambo iquec,’ canu,” quequin ëmbi nac icsambo ictsiash. Mimbi: “Aiduidtsëqui tantiembi,” caboedëmbini: “Nëid con Mado Esus bëdambo iquec,” quequin ëbi comapenen tantiaquin namec. ⁵⁵ “Tantiembi,” mimbi caboed Nuquin Papa ma mimbi tantienquio yoc. Ëmbien Nuquin Papa tantiaquiec. “Aid tantienquio iquembi,” quec mibi yacpadec muatsiabi. Mambi con Pa tantiaquin ambi chiacpadomboen nayoc. ⁵⁶ Mimbi: “Con tsusedpan nacpadomboen naimbi,” caboed Abadaun: “Nuquin Papa yacnuësh choash bëdambo icmianquidquio matsesbëdi tabadendac,” quequin tantiec cuishonquepadenec. Nuquin Papan tantiamiac ëbi aden tantiapadenec —quepondash Esus. ⁵⁷ Adsho tantiashun Esus chieshënquidon: —Ma mimbi min seta 50tedi matamiambo yoc. Adash ma mibi tsusiobudabi iqueyoc. Abadaunën mibi tantiatiapimbo icpampic —caquien ⁵⁸ Esus: —Abimbo caimbique. Tantiata. Abadaun tishabi icnubi ëndenquimboshë ictenebi. Nuquin Papapadquidquio nebi —quepondash Esus. ⁵⁹ Adsho tantiash nëishtanequien: —¿Icsamboenda chuipec? ¿Nuquin Papada muauapebac? —quetanquin cuënote dapa bedtanequin: —Seshunenu —cac siadenquio yec ompodanec cuempodash Esus.

9

Esusën bëshuaid bëdamiaid

¹ Yuecquio ictaniash chonoadenquio icte ushën capucuenquien Esusën dada bëshuaid istuidpondash. Anin bëshuacshobi tishnëdaid niondash. ²⁻³ Aid istuidshumbimbi: —En chui, Icho. Tantanu. ¿Atotsiëshun Nuquin Papan bëshu uapanëdash? ¿Aton papabëd ani icsasho isun Nuquin Papan cuidquin bëshu uanëdaidta nepec? —caquien: —Padenquio. Utsi icsasho isun Nuquin Papan nambo icpanëdash —quepondash Esus. Adsho tantiashun padpiden: —¿Tishabi icnubi: “Abibi icsaindac,” quequin tantiashun Nuquin Papan bëshu uanëdaidta nepec? —caondambi. Adoquien: —Padenquio. “Abibi icsaindac,” quequin

tantiashun Nuquin Papan bēshu uambo icpanēdash. “Ma con Madon comapenen tanti-
 aquin ismenu,” quequin ambi tantiacpaden Nuquin Papan bēshu uapanēdash. Adoacsho
 anin tishnēdaid nec. ⁴Nēbi ambi chiacpadomboen nanuna. “Nainabi inchēshmane,” quia-
 sh comapenec chonoadnuna. Inchēshēn matses chonoadesa –quepondash Esus. –“Con Pan
 tantiaidtedi nainabi unēsmane,” qeshun unēsabi icquin con Pan chiaidtedi nainendambi
 –quequin tantiec: –“Nainabi inchēshmane,” quia sh comapenec chonoadnuna –quiondash
 Esus. ⁵Adashic: –Matsesbēd icquin Nuquin Papa bēdamboen tantiamēquidquo nebique.
 Nēidtsen tantiamenu ⁶–quetanquin nidaidēn uicchun cuishtucatanquin nidaidbēda uic-
 chun cabiuntsēcshun bēshuaid bēbitaccapondash.

⁷Adotantquimbic: –Acte tiquidimbo icquid Sidoe caidēn bēpamēdec nid –cac nidash
 bēpamēdtanec bēdamboen isec aton shubuno nidpac caondash. Aid acte con onqueten
 Sidoe quequin buanaid caic. ⁸Aton shubuno nidshobi aton shubu anoentsēcquidon
 bēshuacboed istuidpac caondash. Adembidi utsibon: –Bēshuaid nebique. Piuccquid becho
 –quedonsetses tsadtsēscho isboedontsen istuidpac caondash. Istuidshun: –iNuqui
 isboedquibida nepec? “Beccho,” iquedoneboedquibida nepec? –cabededpac caondash.
⁹Utsi-utsiec: –Ai, aidquiobi nec –quenubi utsibo: –Padenquio. Aidbimboecquidien
 nec –quesho tantiash: –Aidi nebi –quepac caondash bēshuacboed. ¹⁰Adsho tantiashun:
 –iMitsipadec bēdano? –caquien: ¹¹–Esus caidēn bēdamioshi. Nidaidēn uicchun cuishtu-
 cacashun nidaidbēda uicchun cabiunshun bēbitaccashun: “Acte tiquidimbo icquid Sidoe
 caidēn bēpamēdec nid,” cac nidash bēpamēdec bēdanobi. Nēbi bēdamboen isembi –quepac
 caondash bēshuacboed. ¹²Adsho tantiashun: –Mibi bēdamequid i mitsimbo iquec? –cac: –
 Tsaudi –quepac caondash bēshuacboed.

Bēshuaid bēdameboed chuimiaid

¹³–Bēdamioshi –quesho tantiashun: –iAbimboda capec? Ma con chuiquidon chuimenu
 –quequin padiseyobo yacno bēshuacboed buampac caondash. ¹⁴Buanacshobien padisey-
 obon: –Chonoadenquio icte ushēn nac caosh –quequin tantiaquin: ¹⁵–iMitsipadec bēdano?
 –caquien: –Esusēn nidaidbēda uicchun cabiunshun bēbitaccac bēpamēdec bēdashun nēbi
 bēdamboen isembi –quepac caondash bēshuacboed.

¹⁶–Bēpamēdec bēdanobi –quesho tantiashien chuiquido onquecuededpac caondash.
 Utsi-utsiec: –Nuquin Papa tantiaquid icquin Nuquin Papan chiaid niac-niaquenquio ictsi-
 ash. Chonoadenquio icte ushēn nēd bēdamequin ma Nuquin Papan chiaid niac-niacpayoc
 –quenubien utsibo: –iNuquin Papa tantiesanda aden bēdamepatsiash? Ma comapenen
 tantiaquin nacnempaboc –quepac caondash. Adshumbic abitedishun: –Esus icsambo
 iquec –cainquio icquin ¹⁷bēshuacboed chuipac caondash. –Mibi bēdamequid i tsutsi mimbi
 cape? –caquien: –Nuquin Papan: “Yuecshun naden naindambi,” quequin chiaidquio
 chuiquidien nec,” caimbi –quetanec bēshuacboed nidpac caondash.

¹⁸Aid nidnubien Esus chieshēnquido: –Bēshupenquien niash. Muequien niashe. Anibēda
 amē chuimenun chomenuna –quetanquin ¹⁹⁻²⁰chomeshun bēshuacboed cain: –iMin
 madoda niosh? –capac caondash. Adoac: –Ai, con mado niosh –queshobien: –
 iBēshuacshobida tishonda? –capac caondash. Adoquien: –Ai, bēshuacshobi tishondaid nec
 –ani qeshobien: –Bēshuaid i mitsipadec bēdanosh? –capac caondash. ²¹Adoquien: –
 Tsaudi. Bēdasho isambo iccombi. iTsundambien bēdamechitash? Dada ēnden caniaid neque.
 Aidi chuime –quepac caondash bēshuacboedēn tita amēbēdi. ²²–“Nuquin Papa yacnuēsh
 choquid Esus nec,” quequido Nuquin Papan chiaid chuibante shubun puduedmenquien
 ictiad –quequin chuiquidon chiaid tantiash dacuēdec: ²³–Dada ēnden caniaid neque. Aidi
 chuime –quepac caondash.

²⁴Adoac padpiden bēshuacboed chomeopac caondash padiseyobon. Chomish: –
 “Nuquin Papan bēdamioshi. Nuquin Papa bēdambo iquec,” iquecta icco? Ma Esus Nuquin Pa-
 pan chiaid niac-niacquid neyoc. Ma icsamboshē icquid neyoc –quepac caondash. ²⁵Adsho
 tantiash bēshuacboed: –Icsamboshē icquidien Esus nechitec. Aden tantienquio iquembī.
 Mabi bēdameboc. Isenquio icboedēmbi mambi nēbi bēdamboen iseyoc. Adenuidtsēqui
 tantiemi –quepac caondash. ²⁶Adsho tantiashun: –iMitsipaden mibi bēdamiosh? –
 caquien: ²⁷–Mambi mibi chuipaboc. Ma mimbimbobi tantienquio icboc. iAtotsi quequin
 padpiden: “Ēbi chui,” cai? iEsus tantiatiadquioda icti? –capac caondash bēshuacboedēn.

²⁸Adsho tantiash nēishtanquin chushcapac caondash. –Mibi Esus tantiaquidquio nec.
 Mibi icsambo iquec. Ēbien nuquin tsusedpa Moises tantiaquidquio nec. ²⁹“Moisesien
 Nuquin Papan chuiquin namepampic,” quequin tantiemi. iTsuntsin chiac mibi
 bēdamequidēn napash? Ma mibi bēdamequid ēmbi tantiacmaidquio neyoc –quepac caon-
 dash chuiquido. ³⁰Adoquien bēshuacboed: –iAbida cai? “Dadpenquio tantiemi,” ma mibi
 quepaboc. Adboedi: “Ēmbi tantiacmaidquio nec,” iquecta ique? Mimbi tantiacmaidēmbini
 bēdamiosh. Ma bēdambo yoc. ³¹Abi icsaid ēnabi icquidēn chianesho Nuquin Papan

tantienquo ictsiash. Abi tantiaquin ambi chiacpadomboen naquidën chianiac tantiashun Nuquin Papan nashuntsiash. ³² Anin bëshuacshobi tishaid bédamenquo ictenec. Adquid bédamequid nibédpadenec. ³³ Nuquin Papa tantienquo icquin Esusën ëbi bédamenquo ictsenosh. Nuquin Papa tantiaquimbini bédamiosh. Ma Esus bédambo icquid neyoc — quepac caondash bëshuacboed. ³⁴ Adsho tantiash nëshquioshon: —Bëshuacsho tishaid yec mibi icsamboshë iquec. Icsactsëcquidën chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshënquidon bëshuacboed Nuquin Papan chiaid chuibante shubun padpiden puduedmenquo icpac caondash.

Ambi bédameboed istuidoashun Esusën chiaid

³⁵ Adnubien: —Mimbi bédameboed cuemiac caosh —quesho tantiashun Esusën ambi bédameboed istuidpondash. Istuidshumbic: —Nuquin Papan matsesmaidquiao caic: “Nuquin Papa yacnuësh choquid nec,” ¿quequinda mimbi tantiape? —capondash Esusën ambi bëshuaid bédameboed chuiquin. ³⁶ Adoaquien: —¿Tsutsi neque? Isnu —cac: ³⁷ —Ëbi nec. Mibi bédameboedi nebi —caquien: ³⁸ —Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquiao yec mibi bédamboshë iquec —quetanec ismenuec danëshën tinquebudpondash.

³⁹ Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbéd tabadec Nuquin Papa yacnuësh chondabi. Ëmbi bëshuaid bédamiac tantiesa icboedëmbi ëbi tantiasho Nuquin Papan bédamboen isec. Utsibo: “Nuquin Papa tantiaquiemi,” quec muaquidon ëbi tantiatiapimbo icquin Nuquin Papa tantienquo iquec —quepondash Esus. ⁴⁰ Adsho tantiash nëshstane: —¿Nuquin Papa tantiesabodabi nedi? —quepondash Padiseyobo. ⁴¹ Adsho tantiashien: —Nuquin Papa tantiesambo icsho ëmbi tantiamiac Nuquin Papabëdta ëbi tantiasho Nuquin Papan mibi bédamboen istsiash. “Nuquin Papa tantiaquiemi,” quec muaquin ambi chiaid bédamboen tantienquo icsho Nuquin Papan mibi bédamboen istiapimbo iquec —quepondash Esus abi chieshënquido chiec.

10

Obecabimboecquido chiaid

¹⁻² Adshumbic abi chieshënquido Esusën padpiden chuioapondash ompoachimboen chuiquin. —Tantia. Mibitedi chuinu. ¿Mitsipaden nuquin matsesën aton yua obeca dadpen dayun uaquin napec? Obeca daquënë uaidën puduedte shëcuënquiao obeca icho puduedquid. Daquënë uaid mayadec puduedquiden ampequid nendac. ³ Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icho tsibanquid obecan. ⁴ Adshobic icbon daquënë uaidën tabadquid abitedi niecumeshun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuëcne. Con icho nec,” quequin icho tsibanquid obecan. ⁵ Utsibon cuënaquien tsibanenquo yec dacuëdec cuenquid obeca. Icbouidsëqui tsibanquid obeca nec —Esus quesho tantiashien: ⁶ —Tantiadenquo yec mibi onquec —quepondash Esus chieshënquido.

⁷ Adsho tantiashun Esusën chuipondash. —Tantia. Mibi bédamboen chuinu. Obeca daquënë uaid puduedte shëcuëbimboecquid nebi. ⁸⁻¹⁰ Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiash. Ëbi tantiesain Nuquin Papa yacno puduedtiapimbo iquendac. Ëbi tantiaquido cain obeca caombi. Aido bédamboen dayun uaquin bédamboec tabadquid icmendambi. Aido unëscasho uincumeshun Nuquin Papa yacno ëbëdi tabadmendambi. Adec ëbi bédambo icnuc ampebimboecquid abi iquec. Ëbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienquo iquec. Aido Nuquin Papan cuidtequidompo nendac. Padnuen ëbi tantiaquidon mimbi chiaid tantienquo icquimbi ëmbi chiaiduidtsëqui tantientac —quepondash Esus abi chieshënquido chiec.

Ëbi tantiaquido dayun uaimbi, quequin chiaid

¹¹ Adashic Esus padpidec onqueapondash. —Obeca icbobimboecquid nebi. Ichob cudasacimboec ëbi tantiaquido cudasnuec ëbided cuidadec unësendabi. ¹²⁻¹³ Utsibon adenquo ictsiash. Piucquid bednuen obeca isquidbimboec iquec. ¿Mitsipadopaid obeca isquidën? Bëdi dapa chosho isun: “Con napenquo nec,” quetanquin badedi obeca nianquid. Obeca nianacsho bëdin acshun siaquid. Aden utsi acsho isash acshun secabi icquid niquequid obeca. Obeca isquidën icbonpenquo nianacimboen ma mimbi icsamboen

napayoc. Nuquin Papa tantiata bunquido ma mimbi Nuquin Papambo tantiamenquico iqueyoc —quepondash Esus abi chieshënquido chiec.

¹⁴⁻¹⁵ Adashic abi onquec: —Ëmbien matses bédamboen tantiamenquin ëbi tantiaquido dayun uaindac. Nuquin Papabéd ëbi tantiananacpadquieci ëbi tantiaquidobédtsen tantiananquiebi. Aden ëbi tantiaquido tantiec Nuquin Papa cuidmenquico icnuec ëbided cuidadec unësendabi. ¹⁶ ¿Nëid matses isadaidbuidtsëqui tantiectabi adec unëspadi? Padenquico. Matses utsibontsen Nuquin Papan tantiamiaido icquin ëbi tantierendac. Aidobédta nëid matses con matses caquin abitedi bédamboen dayun uaindambi. ¹⁷ Con Pan tantiamiacpadec ëbided cuidadec unësendabi. Aden ambi chiapadomboen ëmbi nasho con Pan ëbi tantiaquieci. Unësadh ëbemi uincuenendabi. ¹⁸ Matsesën ambemi ëbi unë uatiapimbo ictsiash. Ëmbi tantiacpadquiequi matsesën unës uadendabi. Adechidi uincuentiadquico yec ëbemi uincuenendabi. Aden con Pan namiacpadomboen naindambi —quepondash Esus.

¹⁹ Adsho tantiash con matses chuiquido nadec onquecuededpac caondash. ²⁰ Esus chieshënquido: —Podobitsi icsa dapuduedash tantiadempambo yec onquepec. ¿Atotsi quequin aid tantie? Aidquico tantiatiapimbo iquendabi —quenubien ²¹ utsibo: —Podobitsi icsa dapuduedashta ¿adec onquepatsiash? Bédamboequien onquiosh. ¿Podobitsi icsa dapuduedaidënda aden bëshuaid bédamepatsiash? Bédambo icquidëmbien adotsiash —quepac caondash.

¿Quidistu caidta ne? quequin chiaid

²² Yec ictanec con matses cuëdënuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido cuemenëdaid ushë tantiec cuëdëntanu,” quianec cho-chopondash. Ambo iquenuampamboec icpondash aton padibi. ²³ Iquenuampamboec icnubien Esus Nuquin Papa tabadte shubu uashunaid daquënë uaidën puduedash shubunquico puduedabi quënë cachoqui capupondash. Aid quënë cachoc: “Sadomonën nacnenaid nec,” caondash. ²⁴ Ambo Esus capusho isashien con matses chuiquido Esus natia datsidadshun: —En sebadënquico chui. Tantienquico yec tsadtiapimbo iquebique. Mimbi cuembo chuisho tantiatiadquico iquebi. ¿Nuquin Papan chomiaid Quidistu caidta ne? —capondash con matses chuiquidon. ²⁵ Adoquien Esus: —Mambi mibi chuipaboc. Ma mimbimbobi ëbi tantienquico icboc. Con Pan: “Adota,” cac comapenen tantiaquin nabandeniombi. Mibi bédamboen tantiamenuen adodeniombi. ²⁶ Adoshö isash mibi: “Ai, Nuquin Papa yacnuësh choquidien nec,” quetiadquidëmbi mimbi ëbi tantienquico iccoc. Nuquin Papan tantiamiabi yaïdo icquin mimbi ëbi tantiatiapimbo iquec. ²⁷ Con Pan tantiamiaidien ëbi tantiaquid yanendac. Adshun obecan aton icbo tsibanacimboben ëmbi chiapadomboen natiadquico yanendac. ²⁸ Aïdo unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc. Unësabi icsho: “Con na nec,” qeshun bédamboen dayun uaindambi. Ëmbi adoacsho bedshunachimboen icsambo icquidën yuaquin Nuquin Papan cuidtequido icmeoatiapimbo iquendac. ²⁹ Con Panshen ëbi tantiaquido dayun uaindac. Abipadquid utsi nibëdquiecnuc con Pan ëbi tantiaquido dayun uasho adembidi mënchictiapimbo iquendac. ³⁰ Aden ëbi bedshuntiapimbo icquin con Panshen bedshuntiapimbo iquendac. Con Papadquidquico nebi —quepondash Esus.

Cuënoten seshunetiadpambo yanoaid

³¹ —Nuquin Papapadquidquico nebi —Esus qesho tantiash nëishtanquin cuënote dapa bedshun abi chieshënquidon Esus seshunetiadquico icoapondash. ³² Adshö isash: —Sianenda. Con Pan namiacpadomboen comapenen tantiaquin nabanombi. ¿Ëmbi adobansho ishoedëmbidabi seshunep? —quepondash Esus. ³³ Adoquien: —¿Bédamboen nabanoshodambi: “Mibi seshunenu,” cadi? Padenquico. “Con Papadquidquico nebi,” quequin Nuquin Papa muauasho mambi mibi nayoc. Matses icquin mimbi aden icsamboen chuisho tantiahumimbibi mibi seshunec —quepondash abi chieshënquido.

³⁴ Adshoben Esusën: —Nuquin Papan chiaidquico nuquin tsusedpan naden dada uapampic. “Nuquin Papa nadec onquec: ‘Min matsesën ëmbi chiapadomboen nasho: Ëbipadquid nec, caombi,’ queposh Nuquin Papa,” quequin dada uapampic. ³⁵ Matses caic: “Ëbipadquid mibi nec,” quequin Nuquin Papan chuipampid isun mimbi: “Nuquin Papan icsamboen chiac,” quequin chiamo iquec. “Muesambo icquin Nuquin Papan icsamboen chuitiapimbo iquec,” qeshun mimbi chushcambo iquec. Nuquin Papa adoambobi ¿ëbida chushcai? ³⁶ Nuquin Papan namiacpadec abi yacnuësh chondaid nebi. Adquid yec: “Nuquin Papan Madombo nebi,” quioibi. Ëbi adsho tantiashun ¿atotsi quequin ëbi chushcai? ¿Nuquin Papadambi muauadio? Mambi abimbo caboc. ³⁷ Ëmbi chiaidquico tantiatiapimbo icquimbi ëmbi naidquico tantiata. Ëmbi Nuquin Papan namiacpadomboen comapenen tantiaquin nabanenquico icsho isun mimbi ëbi mua catsiac. ³⁸ Con Pan namiacpadomboen

nasho isun: “Ai, ambi chuibocpadquidshenda nepec,” ëbi cata. Ëmbi chiaiduidtsëqui tantiatiapimbo icquin adota. Adshun: “Ai, Nuquin Papapadquidquibidien Esus nec,” quequin mimbi tantiabentsiac—quepondash Esus.

³⁹ Adsho tantiash padpidec nëishtanquin abi chieshënkuidon: —Bedchitono —caqui bedadenquo icpondash. ⁴⁰ Adashic acte Odan caid potiash con shënision tauaquin mates acten mentodeneco Esus nidoapondash. Ambo ëbi chedobëdi tabadpondash. ⁴¹ Adshumbic Esusën comapenen tantiaquin ismequin ambo icquido chuibampondash. Adsho tantiashun: —Uan padon chuidenedshenda nëid nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusën adobansho isun: “Nëid chuiquinshenda Uan padon abimbo capadenec,” caimbi —cabededpondash anocquidon. ⁴² Adshumbic: —Nuquin Papa yacnuësh choquidien Esus nec —quequin Esus tantiabempondash.

11

Dasado caid unësaid

¹ Udeya yacnuësh Esus cuembon Dasado Esusën utsibimboecquid unëstiadtsëcquo yanac caondash. Shubu dadpen icquid Betania caid yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash. ² Madian aton manëdaidën ubcanquin Esus tanoshcabi icnuc adec aton utsi unëstiadtsëcquo yanac caondash. ³ Adnubien aton chuchun: —Esus chuitan —cac aton matesën Esus chuituidpondash. —Mimbi con utsi caidquid unëstiadtsëcquo yanoshe. En isec cho —catuidpondash. ⁴ Adoaquien Esus: —Chiata. ¿Unëshash chodquequionoshida Dasado nepadiash? Padenquien iquec. “Ma mates: ‘Nuquin Papa bëdambo iquec. Ambi chomiondaid aton Madombotsen bëdambo iquec,’ quenu,” qeshun naindambi —quepondash. ⁵ Adbosh Dasado aton chuchubëda tantiaquidquid yequi ⁶ badedquid nidenquo yec anobi daëdec ushpondash Esus.

⁷ Daëdec ushumbic Esusën: —Nuqui icocno Udeya caidën padpidec nidnu. Nid —capondashi. ⁸ Adoaquimbi: —Icho, ma mibi anoshon cuënoten seshunetsempondac. ¿Anobidida nidtiad? ¿Ada: “Seshunequionoshe,” cadec? —capondambi. ⁹⁻¹⁰ Adoaquien cuembo chienquid icquimbi: —Badiadën capuec tocoshquetanec uebudesa. Inchëshëmbien tocoshquetanec uebudquid —quequin Esusën chuipondashi. —Nëbi ëbi unës uatiapimbo iquec. Badiadën nidachimboen con Pan tantiaidtedi nainabi ichso ëbi unës uatiapimbo iquec. Inchëshën uebudachimboen ambi tantiaidtedi nainshobini ambi tantiacpadënkuiobi matesën ëbi unës uaindac —quequin tantiec adondash Esus.

¹¹ Adshumbic Esusën padpiden ompoachimboen chuoapondash. —Ëmbi con utsi caid Dasado ushooaccoshe. Isucumec nidnu. Nid —qesho ¹² tantiashini: —Ma ushnu. Ushash isucunquid —quepondac. ¹³ Esusën Dasado unësaid chuinubi Dasado ushe dantsëccondambi. ¹⁴ Adnubien Esusën sebadënquid chuipondash. —Dasado unësaccosh. ¹⁵ “Bëdamec nidtiadquidi niobi” ¿quepectabi ique? Padenquid. Mibi caic: “Ma nëidon ëbi bëdamboen tantianu,” qeshun Dasado unëso istanambo iccombique. Nëbi mibi ismec nidnu. Nid ¹⁶ —caquien: —Ai, abëdquibi unësec nidnu. Nid —quiampondash Tomas anin abi ushëmbi daëdpambo tishaid. Adanec abitedi nidondash.

Unësaid uincuemquidquid nebi, quiaid

¹⁷ Adashic unësacno anoentsëqui Esus chopondash. Choshon: —Unësacsho chococash daëd-daëdqieuc ushobi —quetsëcquieuc onquecuededsho tantiatuidpondash. ¹⁸⁻¹⁹ Esus choabi icnuc con mates chuiguido Dasado unësacnuësh sedenquenuec Edusaden yacnuësh cho-chopac caondash. Unësaid nëbi ictsëcnuc tedes quidometodos tionsëcquidën badedquid cho-chopac caondash. Cho-choash unësaidën chuchubëd sedenquec tabadpac caondash. ²⁰ Adnubien: —Esus choec —qesho tantiash Madta bëquedec chopondash aton chibi Madia shubuno sedenquec tsadnubi. ²¹ Choquien Esus bëquedec: —Mibi icnuc con utsi unësenquid ictsenosh, Icho. Con utsi unësosh. ²² Mimbi chiacpadomboen Nuquin Papan nëbi natsiash —quepondash Madta: —¿Ada con utsi uincuemetsia? —quequin chuitiadquid yequi. ²³ Adoaquien Esusën: —Min utsi uincuenendac —capondash. ²⁴ Adsho tantiash: —“Ai, yuecash unësaido abitedimbo uincumete ushën con utsi uincuenendac,” quequin tantiembi —quepondash Madta. ²⁵ Adsho tantiashun Esusën: —Ëbibi mates unësaid uincuemquidquid nebi. Ëmbi tantiacpadënquid uincuenendac. Aden ëbi tantiaquid unësacsho uincuemendambi. ²⁶ Ëmbi adoac Nuquin Papa yacno ëbëdi tabadendac padpidec unëstiapimbo yec. Ëmbi aden chuisho tantiash: “Ai, abimbo mimbi caindac,” ¿quequinda tantie? —capondash Esusën. ²⁷ Adoaquien Madta: —Ai, adembi tantiembi. “Nuquin Papa yacnuësh choquid Quidistu caidien mibi nec. Nuquin Papan Madombo mibi nec. Con

tsusedpabon dada uaquin chuipampidquien nec,” mibi caombi —quetanec²⁸ nidpondash aton chibi chiec. Nidshun: —Nëmbo cho, chibi. Chuinu —cac aton chibeti choshobien: —Esus chosh. Mibi iste bunoshe. En isec cho, chibi —caquien²⁹ Esus bëquednuec badedi choquin istuidpondash. ³⁰ Shubu dadpen yacnombo choabi icsho Madtan bëquedacnobi Esus tabadsho Madiantsen istuidpondash. ³¹ Adec Madia nidsho isun chococacnobi sedencaic nide danquin abëd sedenquenuequidon tsibanampac caondash. ³² Adnubien Madia Esus istuidtanec dayumbudec sedenquiampondash aton utsi tantiec. Adec shubitanec ënëdash: —Mibi unësquo iccoc, Icho. Bëdambo icquid mibi nec. Mibi icnuc con utsi unësenquo icctsenosh —quepondash Madia Esus caic.

³³ Adnubien Madia tsibanec cho-choec con matses chuiquido sedenquetuidpondash. Madiabëd sedenquecuededsho istanec: —Ai, unësquo icnuc nec —quiash Esus abitsen shubiantiadtsëcquo icpondash. ³⁴ Adec shubiantiadtsëcquo tsadacnuëshien Esus: —¿Mitsimbo mimi chococaye? En isnu. Nid —quepondash. Adoac: —En isec cho —quianec nidnubien³⁵ shubinidequi nidpondash Esus. ³⁶ Adec shubinidsho isumbien: —Ma Dasado unësquo icnuc shubieyoc —cabampondash con matses chuiquidon. ³⁷ Adnubien utsibo: —¿Atotsieshun bëshuaid bëdamiondaidëmbi Dasado unëso bëdamenquo icposh? —quepondash.

Esusën Dasado uincuemiaid

³⁸ Nidquimbi chococacno istuidequi Esus shubiantiadtsëcquo yanoaoundash. Nidaid cuënoteuidpambo icquid macuësh tsimpiduc shëcuë uaidën unësaid nauedshun cuënote dapan bëtinacnuësh shubiantiadtsëcquo iccondash. ³⁹ Adashien Esus: —Cuënote bidiacquin shëcuë shëcne —quepondash. Adsho tantiahs unësaidën chuchu Madta: —Padi. Ènden pisenashe. Chococash mabi daëd-daëdquiec ushboc —quepondash. ⁴⁰ Adoquien Esus: —Dacuëndenda. Mambi mibi chuiboc. Mimbì: “Nuquin Papan Madombobien mibi nec,” ëbi casho: “Èmbi comapenen tantiaquin nabansho mimbì isendac,” mambi mibi capaboc. En na. Baded bëcune —cac⁴¹ cuënote shëcuë bëtinaid shëcnequin bëcunepondash.

Adsho istanquimbien Esusën abuc isquin Nuquin Papa chuipondash comapenec onquequin. —Papa, ëmbi nëbi chuisho mimbì tantiec. Èmbi chuibocpadomboen mimbì naindac. Mibi bëdambo iquec, Papa. ⁴² Èmbi otacquio chianiaid mimbì tantioc. Èbi datsidadaido tantiamenuen nëbi comapenec onquequin mibi chiembi. “Mibi chuitanquin ëmbi comapenen tantiaquin nabansho isun: ‘Nuquin Papan chomiaidien nec; quequin ma nëidon ëbi tantianu,” qeshun comapenec onquequin mibi chiembi, Papa. Padi, aiddtedtsëqui mibi chiombi, Papa —quepondash Esus. ⁴³ Adtanquimbien comapenen cuënquin: —Dasado, puduenec cho —capondash. ⁴⁴ Adoquien Dasado badedquo puduanenec chopondash abi dashcute dataniacchobi. Unësascho uesquin dashcuten datanetanen dashcuten abi bëpucacchobi chopondash. Adec chosho istanquin: —Baded dashcute dachic. Ma nidnu —capondash Esusën.

Nëbien Esus unës uametiad, quiaid

(Mat 26.1-5; Mad 14.1-2; Duc 22.1-2)

⁴⁵ Aden Esusën ènden unësaidquibi uincuemesho isashien Madia tsibanec sedenquec cho-choboedo abentse-abentsec: —Nuquin Papan chomiaidien Esus nec —quiampondash. ⁴⁶ Adnubien utsin Edusaden yacno nidshun Esus chieshënquido padiseyobo chuituidpac caondash. —Esusën unësaid uincuemiosh —quepondash. ⁴⁷ Adsho tantiatanquimbien chuiquid dapan abëdtan chuiquid utsibo cho-chomepac caondash padiseyobo yec tusio dapabo yec quenuc. Aden cho-chomiahs tabadec onquepac caondash. —¿Mitsipadotiad? Nuquin matses ismequin comapenen tantiaquin dadpen nabampac caosh. ⁴⁸ Aden Esusën nabansho isun nuqui ëmiabi icsho nuquin matsesën abitedishun abi chuiquid dapa Esus icmetsiash. Adnubien nuqui yuaquido Doma yacnocquidon ambi chuiquid icmiaidquido chuiquid yansho isun nëshun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiash. ¿Mitsipadotiad Esus? —quepac caondash chieshëmënquido.

⁴⁹ Adnubien abëdtan chuiquid chuiquid dapambo aid setan icquin Caipas caidëntsen chuipac caondash. —¿Midapadotsëcquien mimbì chiendac? Tantiadentsëcquo icnuc ma mimbì chuipaboc. ⁵⁰ Tantia. Mibi bëdamboen chuinu. ¿Atotsi quec: “Abitedi unës uaindac,” mibi quepe? Ma nuquin matses abitedi unës uainquo icnueshun Esusded unës uamenuna —quepac caondash chuiquid dapambo abëdtan chuiquido chiec. ⁵¹ Aden chuiquin ambembi chiambo Nuquin Papan oncamiac Nuquin Papan chiaidquido aden chuipac caondash. —Nëid setan abëdtan chuiquido chuiquid dapambo nec —qeshun Nuquin Papan aden oncamiacqui Caipas onquepanëdash. —Matses cuidmenquo icnuc con Madoded cuidadec unësendac —qeshun Nuquin Papan Caipas aden oncamepanëdash. ⁵² Aden Caipasën chuinëdaid tantiaquin ëmbitsen chuinu. Tantia. ¿Isadaidbouditsëqui

cuidmenquo icnueta Esus abided cuidadec unëstiondash? Padenquo. —Matses utsitsen abi tantiaquid yansho isun abëdi tabadmenuec Esusded cuidadec unëspondash —quequin tantiembi. Nëbi Caipasën chuisho tantiasun tsusiobon chiaid chuinu. ⁵³ Aden Caipasën Esus unës uamete chuisho tantiasien Esus chieshënquido: —Nëbimbobien Esus unës uame-tiad —quecuededpac caondash.

⁵⁴ —Tsusiobon mibi adosh —quesho tantiatanequien chieshëmënquido ismenquo yec Esus cuempondash. Cuenequi nidaid utsin nidash masi dapa yacno anoentsëqui shubu dadpen icquid Epadain caid yacno nidpondash. Ambo tabadquin ëbi chedo Esusën chuibampondash. ⁵⁵ Epadain caid yacno tabadnubien Nuquin Papan con tsusedpabo unës uainquo icquin matamiampid inchësh tantiec cuëdëneuc Edusaden yacno con matses nidanepac caondash. Cuëdëneuc taëabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuëdëntemaid,” quedenega —quianec nidanepac caondash. ⁵⁶⁻⁵⁷ Adshumbien Edusaden yacnoshon Nuquin Papa tabadte shubu uashunaid daquënë uaidën puduedtanquin Esus iste bunquin nibëntuidpac caondash mishtemaid mishquidon. Nibëntuidshobien: —Nuqui chuiquido nadpac caosh. “Esus istuidshun ëbi chuuta. Bedshun unës uamechitonon,” quepac caosh —quesho tantiasien: —¿Ada Esus chopeba? “Unës uamenushe,” quiaish choenquien icchitec —quecuededpac caondash.

12

Madia Dasadon chuchun Esus tanoshcaid

(*Mat 26.6-13; Mad 14.3-9*)

¹ Aden mishtemaid mishquidon abi nibënbien Edusaden anoentsëqui ambi Dasado uincuemiondacno Betania yacno Esus chopondash. Seistedec ushash Nuquin Papan matamiampid inchësh tantiec cuëdëneuc taënushi niondash. ² Ambo chosho isash: —Esus bédambo iqueque. Pemenu —queshun: —Pec cho —cac puduedash tabadpondash nëidtedi. Nëidic Esus. Nëidic Dasado. Nëidic shubu icbo. Nëidic Esusbéd icquid ëbi chedobi. Nëidic Dasadon chuchu daéd. Aidtedi icpondash. Adec penuec tabadsho Madtan pete menebampondash. ³ Adnubien Madian: —Esus bédamboshë iquec. Ismenu —quetanquin bédamboshë nuadquidën Esus tanoshcapondash. Tanoshcatanquin aton manëdaidën taucpondash. Aden tanoshcaid shubu anuestsëcquiec comapenec nuadpondash. Pucquid dadpenquo menequin bedaid niondash. Sedunten cushtoaid bédambo nuadquid nado caid niondash. ⁴ Adsho isun Esus bedmequidën Udasën Madia chushcapondash. ⁵ —Padi. Mimbi uesquieque. Utsi uain nata. Nëid danoshcate meneshun piucquid dadpenquo seta abentsëc matamec chonoaidtedquobien bedtiad. Adoshombien piucquid nibédquido aid piucquid menetiad —capondash Udasën. ⁶ Adomboen chuisho tantiasun Udas bédambo icquidquido danondambi. Esusbéd icquido ëbitedishun piucquid bedshun sauedten sauedshun dayun uaquidquiemi danondac. Piucquid bédamboec dayun uashumënenquo yequi abibi ampeshumënashi adondash Udas. Aden ambi ampiad tantiequi: —Piucquid nibédquidoen menetiad —quequin muaquin Madia chushcapondash. ⁷ Adshobien Esusën: —Padi. Chushcainda. Ma nanu. Ma nuquin matsesën unësaid bédambo nuadnuc danoshcapaid yoc. “Nëbi con Mado unësendac,” quequin Nuquin Papan tantiamiacpadomboen ëbi unëso chococate tantiaquin Madian ëbi tanoshcaquin naic. ⁸ Piucquid nibédquido dadpen iquec. Nibëdenquo iquendac. Èbien mibéd icboedi nëbi nibédquido yanendac. Èbi tantiec Madia bédambo iquec —quepondash Esus Udas chiec aidi: —Abi chieshënquido Esus bedmenu —quepanuda.

Dasadotsen cuesunetiadquio yaid

⁹ Adnubien: —Betania yacno Esus choaccosh —cac Edusaden yacnuësh matses dadpen Esus isec cho-chopondash. Ambobidi Dasado Esusën uincuemiondaid icsho aidtsen isnuec cho-chopondash. ¹⁰⁻¹¹ Cho-choshon Dasado uincuemiondaid isumbien abentsëcshun abentsëcshunquien: —Comapenen tantiaquin nabanquidquido yec Nuquin Papapadquidquobidien Esus nec. Nuquin Papan chomiaidien nec —quequin Esus tantiabempondash. Esus tantiabenshumbic abi chuiquidon chiaid tantienquo yampondash. Adsho isash nëishtanequien chuiquid dapabo: —“Uincuemiaid Dasado isun Esus tantiabensh,” quioshe. Dasadotsembien unës uatiad —quianac caondash chieshëmënquiec.

Chuiquid dapa ismiacimboen Esus ismiaid

(*Mat 21.1-11; Mad 11.1-11; Duc 19.28-40*)

¹² Madian tanoshcaboc ushash Esus Edusaden yacno puduanec nidondash. Nidshobien Edusaden yacnuësh cuëdëneuc cho-choboedon: —Esus choec —quesho tantiatanquin ¹³ niste podobieccquid bedbëtsenec Esus bëquedec cho-chopondash. Esus bëquedshumbien:

—Chuiquid dapa nec —quequin ismequin ambi bedbêtsemboed uic-uiccabededpondash. Aden uic-uiccai qui:

“Mibi bédamboshê iqueque. Èbi bédamboen ista.

Nuquin Papan chomiaid yec mibi bédamboshê iquec.

Con matses isadaidbo chuiquid dapambo mibi nendac,”

quecuededpondash Esus caic. ¹⁴ Ambi podquedën choquin bedbêtsemboed cabayobitsecquidèmpi catsadtoanec Esus chosho isash adcuededpondash. Adec aid catsadte Nuquin Papan tantiamiacpadomboen con tsusedpan dada uaquin naden chuipampic. ¹⁵ “Edusaden yacnocquido chiec:

‘Dacuèdenda, Edusaden yacnocquido.

Is. Cabayobitsecquidèmpi catsadtoanec mibi chuiquid dapambo choeque,’ quepec,”

quequin Nuquin Papan chiaid dada uapampic. ¹⁶ Adec Esus catsadtoanec chosho isun aden chuipampid tantienquo iccondambi. Esus abuc nidambimbi èbitèdishun tantiabonondac. —Esus chuiquinshenda nuquin tsusedpan dada uapampic. Aidën chiacpadomboen niste podo uic-uiccaquin: “Bédambo iquec,” quequin nuquin matsesèn Esus ismebededpondash —quequin tantiabonondambi.

¹⁷ Esus cabayobitsecquidèmpi catsadtoanec choabi icnuc Esusèn Dasado uincuemesho isboedon: —Uincuemesho isombi —quequin matses dadpen chuibenepanèdash. ¹⁸ Adsho tantianshun: —Unèsaid uincuemequid Nuquin Papan chomiaidien neque. Istanu —quianec Esus bèquedec cho-choshon aden niste podo uic-uiccaquin ismepondash. ¹⁹ —Esus bédamboshê iquec. Nuqui chuiquid dapa nendac —quecuededsho tantianshien Esus chieshênquido padiseyobo: —¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

Matses utsibo: Esus isnu, quiaid

²⁰ Edusaden yacno cuèdè nec cho-chobedo matses utsibo isadaidpembotsen icpondash. ²¹ Adnubien adquido matses utsibon Esus iste bunquin shubu dadpen icquid Betsaida caid yacnuèsh caniquid Esusbèd icquid Uedipec chuituidpac caondash. —Esus istiadquido iquebi —quesho tantianshien: —Chiata. Chuitambono —quianec nidshun ²² Esusbèd icquid utsi Andedesba chuibètsenec Andedesbèd choequi Uedipec Esus chiec chopondash. —Matses utsibon mibi istiadquido iquec —caquien ²³ aid matses utsibo isadaidpembot tantiamenuec Esus comapenec onquepondash. —Nuquin Papan matsesmiondaidquido icquin nèbimbobimbi ambi chiaidtedi nainendac. Èmbi adoacsho Nuquin Papan: “Mibi bédambo iquec,” èbi caindac —quepondash Esus abi unès uate chiequi. ²⁴ Adshumbien ompoacbimboen chuipondash. —Tantia. Mibi chuinu. ¿Mitsipadquido pete èshê chococaid icpec? Chococac caniasb bacuèec bédambo icpaid yoc. Chococabi bédambo ictiapimbo iquec. Adoacbimboen chococabi yac matses bédambo icmetiapimbo iquendabi. Unèsacsho chococac matses bédambo icmequid nendabi —quepondash Esus. ²⁵ Adashic padpidec: —Ambi naiduidi naquin èmbi chiaid niacquido Nuquin Papan cuidtequido nendac. Ambi naiduidi nainquo icquin èmbi chiacpadomboen naquido èbèdi tabadtequido yanendac. ²⁶ Adquid èmbi chiacpadomboen natiadquido yec èbi yacpadec chieshtoenuquo ictsiash. Adquidquido unèsash uincuenash èbèdi tabadsho Nuquin Papan: “Nèid con Mado tantiaquid bédambo iquec,” capendac —quepondash Esus.

Esusèn abi unès uate chiaid

²⁷ Adashic abi unès uate tantiec Esus nadpondash. —Unèsquioshê yanuc: “Mimbi tantiacpadomboen natiapimbo iquebi, Papa,” ¿quectabi icti? Mabi con Pan chiacpadomboen nanuec chondac. Aden nanuec nebi —quepondash Esus. ²⁸ Adtanequien Nuquin Papa chiec: —Nuqui tantiacpadomboen nèbi nainembi, Papa. Èmbi aden nainacsho: “Nuquin Papa bédambo iquec,” matses cameta, Papa —quenubien abucuèshquo Nuquin Papa comapenec onquepondash. —Ai, èmbi namiaid mibi icsho: “Nuquin Papan namiaid nec. Nuquin Papa bédambo iquec,” matses camepombi. Nèbi padpiden adomeoaindambi —quepondash Nuquin Papa.

²⁹ Abucuèsh onquesho bédamboen tantiaibi yec utsibo: —Abu cuèdtoec nec —quenubien utsibo: —Nuquin Papan abi yacnoshon uaid mayan bédan Esus chuipash —quecuededpondash. ³⁰ Adsho tantiansh Esus: —¿Èbi tantiamenuecta onquediash? Padenquo. Mibi tantiamenuequien niosh. Aden tantianshun èmbi bédamboen chuisho tantiatia. ³¹ Nuquin Papa chieshênquid Satanasèn yuaido matses dadpenquioshê iquec. Nèbi Nuquin Papan tantiacpadomboen aido utsi-utsien Satanas bedshunendambi: “Chèn. Con na neque,” quequin. ³² Èbi abuc dectanac aden matses èbi tantiaquid icmendambi —quepondash Esus. ³³ —Èbi cuesten dectanquin unès uaindac —quequin tantiec: —Èbi abuc dectanendac —quepondash Esus.

³⁴ Adsho tantiash abi datsidadquido: —“Èbi decanendac,” quiosh. “Unèsebi,” quepequin iccosh —quiashien Esus chiec: —“Nuquin Papa yacnuèsh choquid Quidistu caid unèsesambo nendac,” quequin Nuquin Papan chiaid nuquin matsesèn chuinubi: “Unèsebi,” ¿quecta icco? “Unèsebi,” quequid Nuquin Papa yacnuèsh choquid ictiapimbo mibi iquec. “Nuquin Papan matsesmaïd nebi,” quequid ¿tsutsi mibi nepe? —quepondash Esus datsidadquido. ³⁵ Adoaquien Esusèn: —Nadquid nebi —quenquo icquin ompoacbmboen naden chuipondash. —Mibi bédamboen tantiamequid nèbi isadenquo iquendac. Aid nibèdnuc bédamboen mimbi tantienquo iquendac. Nidabi aidèn chuisho bédamboen tantiata. ³⁶ Nuquin Papan bédamboen iste tantiamequid tantiata. Adsho bédambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

Isadaïdbon Esus tantienquo yaid

³⁷ Èmbi dadpen chuiquin dada uabanacpadomboembi Esusèn comapenen tantiaquin dadpen nabansho isun con matses isadaïdbon Esus tantiatadquidi Esus tantienquo icpondash. ³⁸ Aden Esus tantienquo icte con tsusedpa Isayasèn Nuquin Papan tantiamacpadomboen chuiquin dada uapampic.

“Nuquin Papa yacnuèsh choash nadec onquendac.

‘Mimbi chiaïdquid chuibansho tantiashun: Muequien mibi nec, èbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuèsh choquidien nec, quetiadquidi adenquo iquendac, Papa,’ quependac,” quequin Esusèn chuite Isayasèn dada uapampic.

³⁹ Nuquin Papan pamumèdacbmboecnuc icmiac con matsesèn Esus tantienquo icpondash. Aden chuiquin Isayasèn padpiden dada uapampic.

⁴⁰ “Isadaïdbon èbi tantiatiapimbo icsho isun

‘Ma adembi tantienquo icpanuna,’ caimbi.

Ma adequi pabiate shècuè nibèdacbmboec icchitono.

Èbi tantiasho abi icsaïd bèpiscudquin bédamboen ismane,”

quequin Nuquin Papan ambi con matses caïdo nèishèshun chushcaïd Isayasèn dada uapampic. ⁴¹ Nuquin Papambo Esusbèd uinsadpambo yec tabadsho isondaïd icquin Isayasèn aden Esus tantienquo icte chuipampic.

⁴² Con matses dadpeshun Esus tantienquo icnubi con matses chuiquidon abentsècshun abentsècshunquien Esus tantiauidpac caondash. Adoboedi: —“Nuquin Papan chiaïd chuibante shubun puduedenda,” canushe —quiash dacuèdquin: —Esus tantiaquid nebi —quequin chuitiadquidi utsibo chienquo icpac caondash. ⁴³ —Ma con matsesèmbi èbi bédamboen isnu —quequidtsèqui tantiaquin aton matses chuitiapimbo icpac caondash. —Ma Nuquin Papan èbi bédamboen isnu. Aton Mado tantiaquid nebique —quetiadquidi adenquo yec caondash.

Cuidenquo icte chiec nebi, quiaïd

⁴⁴ Abi tantiauidboedo Nuquin Papan chiaïd isbanquido cho-choash abi datsidadacsho chuinuec Esus padpidec comapenec onquepondash. —¿Èbi tantianuequidèn èbiuidtsèquida tantiapadic? Padenquo. Èbi tantiaquidèn èbi chomiondaïtsen tantiatsiash. ⁴⁵ Adembidi con Papadquibidi èbi icsho isun: “Ai, adquibidien Nuquin Papa iquec,” quequin tantiat-siash. ⁴⁶ Nuquin Papan matses bédamboen iste tantiamenuec matsesbèd tabadec chondabi. Adec matsesash: “Èbi tantiaquido ma Nuquin Papan bédamboen isquin bédamboen tabadmenu,” quish nebi. ⁴⁷ “Èmbi aden chuisho tantiatiapimbo icquido nèbi cuidnu,” ¿quectabi icti? Padenquo. Nèbi Nuquin Papan bédamboen isquin cuidenquo icte chuinuequini nec. ⁴⁸ Nuquin Papan cuidte ushèmbien èbi tantiesabon: “Nuquin Papan chiaïdshenda chuipadenec. Aid tantienquo yec icsabudquiopobi,” quequin ambibi tantienda. Adsho Nuquin Papan cuidendac. ⁴⁹ ¿Èmbembi chuiquindambi nadi? Padenquo. Èbi chomiondaïd con Pan chiaïdquid chiequini nec. ⁵⁰ “Èbi tantiaquid èbèdi tabadendac padpidec unèsenquo yec,” qeshun Nuquin Papan chiaïduidtsèqui chiequini nec —quepondash Esus.

13

Esusèn abèd icquido tapanaid

¹⁻² Esusèn comapenen tantiaquin nabanaid chuiquin aidtedi chiombi. Nèbi abi tantiaquido tantiaquiec abided cuidadec unèsaid chuiquin unèsash abi uincuenaidtsen chuinu. Tantia. Nuquin Papan con tsusedpabo unès uainquo icquin matamiampid inchèsh tantiaquin pec tabadte ushè nèbi yanuc inchèshèn Esusbèd pec bédamboec tabadondabi. Padnuen Udas Simon Iscadioten mado Satanasèn tantiamiacpadomboen Esus bedmete

tantiec tsadpanĕdash. Adnubien Esus: —Nĕbi con Pa yacno nidebi nĕido nianec. ³ Con Pabĕd tabadec ambi tantiacpadec abĕdi abitedishun Icbombo iccondaiddi nĕbi anobiddi nidoash adquiobiddi iccoaindabi. Adquid icquin nĕido bĕdamboec tantianante ismenu —quequin tantiaquin ⁴ yuan nachimboen nadopondash. Uequin peboedi nidtotanec dashcute bĕntse icquid dachiquiditanec daucudte tsibidiquepondash. ⁵ Tsibidiquetanquin pada-padaid dapan acte cushtotanquin abĕd icquido tapambampondash. Daucudten tauchbanquin tapambanondash.

⁶ Aden tapambanquimbi: —Mibitsen tapanu —cac Petedon: —¿Icbonda yua tapampaid? Ēbi tapanenda, Icho. Padi —capondash. ⁷ Adoquien Esusĕn: —Ēmbi nasho nĕbi mimbi tantienquio iquec. Yuecshun mimbi tantienac. En tapanu —caquien: ⁸ —Padi. Mibi bĕdambohĕ icquid nec. Ēbien icsaquid nec. Yua namiacimboen mibi tapemetiapimbo iquebique. Padi —caoapondash Petedon. Adoquien: —Ēmbi tapanabi yac con yuambo mibi ictiapimbo ictsiac —capondash Esusĕn. ⁹ Adsho tantiashun Petedon: —En na, Icho. Tapantanquimbi mapinobĕdtabi ĕbi mĕpanta —caquien: ¹⁰ —Padi. Nesboed mibi nec. Taĕnouidtsĕqui bĕchishacsho tapanembi. Ēmbi bĕchish ucac mibi bĕdambo iquec. Abentsĕc icsambo iquec —quepondash Esus. —Bĕchish ucachimboen ĕmbi nasho Nuquin Papan mibi bĕdamboen isendac icsaid ucudacimboecnuc —quequin tantiec: —Ēmbi bĕchish ucac mibi bĕdambo iquec —quepondash Esus. ¹¹ —Udasĕn ĕbi unĕs uamenuen bedmendac —quequin tantiec: —Abentsĕc icsambo iquec —quepondash Esus.

¹² Aden tapambanash dasiuidash samĕdquin pebededquin abĕd icquido Esusĕn chuipondash. —Ēmbi nabod ĵada tantie? Tantia. Mibi chuinu. ¹³ “Ēbi chuiquidquio mibi nec,” mimbi ĕbi capec. Adembiddi: “Con Icho mibi nec,” mimbi ĕbi capec. Bĕdamboen mimbi chiec. Adquid nebique. ¹⁴ Ēmbi nabocpadomboen mimbitsen nata. “Ēbĕd icquid tantiaquioquin tapanquin nashunu,” qeshun naombique. Adecbiddi nashunanta. Naden tantiashun nata. “Esus tantiaquido tantiaquiembi. Con buchibimboecnuc nashunu,” quiaish nashunanta. ¹⁵ Ēmbi nabocpadomboen namenuen adombique. Mimbitsen nata. ¹⁶ En chuinu. Tantia. ¿Icbon chiacta chieshpadic? ¿“Nid,” cacta nidenquio icpadic? Icbon chiacpadomboen yuan naquid yendac. Adomboen tantiaquin ĕmbi chiacpadomboen nata. ¹⁷ Ēmbi aden chuisho tantiashun ĕmbi chiacpadomboen naic mibi bĕdambo iquendac —quepondash Esus.

¹⁸ Adashic padpidec: —Mibitedi caic: “Bĕdambo iquec,” quetiapimbo iquendabi. Tauamboen: “Nuquibi icnu. Cho,” ĕmbi caondaiddo con yuabotedi tantiembi. Abentsĕc icsambo iquec. “Aid con yuapenquio nec,” quequin ĕmbi tantiaiddi nec. Nuquin Papan tantiamiac aidĕn icsamboen nate chuiquin nuquin tsusedpan dada uapampic naden. “Ēbĕdtan planeboedĕmbi ĕbi unĕs uamenuen bedmendac,” quequin dada uapampic. ¹⁹ “‘Abi unĕs uametebi chioshi. Nuquin Papapadquidquibi icquimbien naosh,’ quequin ma tantianu,” qeshun mibi chiombi. ²⁰ Mibipadquidĕn nate mibi chuinu. Tantia. Mibipadquidĕn ĕbi chuibansho tantiash: “Ai, abimbo caic,” qeshun utsibon ĕbi tantiatsiash. Adembiddi ĕbi tantiashun ĕbi chomiondaiddo Nuquin Papatsen tantiatsiash —quepondash Esus.

Abi bedmequid Esusĕn chiaid

(Mat 26.20-25; Mad 14.17-21; Duc 22.21-23)

²¹ Adshumbien abi bedmequid Udas tantiac unĕsquo icnuc Esusĕn chuipondash. —Tantia. Mibitedi chuinu. Ēbĕd icquidĕmbi ĕbi chieshĕnquido ĕbi bedmendac —quesho ²² tantiash abĕd icquidobĕd bĕisanec: —¿Tsutsi capec? Nĕidien cachitec —quecuededpondabi otacquo tantiec.

²³ Ēbi tantiaquidquio yec con cachoetsĕqui Esus uepondash. ²⁴ Adec Esusĕn dayuntsĕqui ueshobini: —“¿Tsutsi cai?” ca —capondash Petedon mĕdquin onquenquio icquin. ²⁵ Adoquimbi cachoc isquin: —¿Tsutsi cai, Icho? —capondac. ²⁶ Adoquien Esus: —En istac. Pete cuĕshĕn ĕnĕ puntanquin menequin mibi ismenu —quetanquin pete cuĕshĕn ĕnĕ puntanquin Udas Simon Iscadioten madó menepondash. ²⁷ Adoac penubi Satanasquo Udas dapudedquopanĕdash ambi tantiaidquio namenuc. Adshobien Esusĕn: —Mimbi tantiacpadomboen baded nĕimbobi naic nid, Udas —capondash.

²⁸ Adsho tantiashini ĕbitedi: —Tantiadenquio yec onquepec. ¿Atotsi quiaish: “Baded naic nid,” quepec? —quepondac. ²⁹ Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi: —“Piucquid nibĕdquido piucquid menetan,” quepequien iccosh —quecuededpondash. ³⁰ Pete cuĕshĕmpi pesho: —Nĕimbobi baded naic nid —caquien Udas nidpondash. Inchĕshĕmbi nidpondash Esus bedmenuen chiec nidec.

Tantiananquiota, quequin chiaid

³¹ Abi bedmenuen chiec Udas nidbombien Esus: —Nuquin Papan matsesmiaidquio icquin ambi tantiaidtedi nëbimbobimbi nainendac. Èmbi nainsho isash con Pa bédambo iquendac. ³² Èbitsen bédambo icmenuen con Pan comapenen tantiaquin ismendac. ¿Yuecshun quectabi icti? Nèbimbobimbi caindac —quepondash Esus. Abi unès uatebèdta abi unèsash uincuenash Nuquin Papa yacno nidte chiec adpondash. ³³ Adashic èbi chedo padpiden chiec: —Nèbimbobi nidebique. Chuiquid dapabo èmbi chiondacpadomboen mibi chuioanu. Tantia, mado. Èbi nidacsho mimi èbi istuidenquio iquendac. Èbi nidacno mibi nidtiapimbo iquendac. ³⁴ Aden tantiaquin Nuquin Papan chiaid utsi mibi chuinu. Èbi nidan èmbi chiacpadomboen nata. Èmbi mibi tantiaquiacpadquieq tantiananquiota. ³⁵ Èbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiatsiash —quepondash Esus.

Petedo: Èmbi isacmaid nec, quete chiaid

(Mat 26.31-35; Mad 14.27-31; Duc 22.31-34)

³⁶ Adec —Nidebi —quesho tantiashun Petedon: —¿Mitsimbo nide, Icho? —capondash. Adoquien Esus: —Nèbi mibi nidtiapimbo yacno nidebi. Yuecash ambo mibitsen nidendac —quepondash Esus. ³⁷ Adsho tantiash Petedo: —¿Atotsi quetiadquio yec: “Nèbi èbèdi nidtiapimbo mibi iquiec,” quepo mibi? Mibèd nidec dacuèdenquio ictsiabi. Mibi chieshènquidon: “Unès uanu,” mibi casho tantiash: “Èbien natiad,” quetsiandabi —quepondash Petedo.

³⁸ Adsho tantiashien Esus: —“Èbien natiad,” ¿quecta icpatsia? Padenquio mibi ictsiac. Cachina bènè cuèdanabi icnuc mibi chieshtouidendac. “Èmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bènè cuèdanabi icnuc mibi adendac —quepondash Esus. Adsho tantiashini Esusbèd icquido èbitedi dacuèdcuededpondac.

14

Nuquin Papabèd tabadmendambi, quiaid

¹ Èbitedi dacuèdcuedesho isashien Esus: —Dacuèdenda. “Èbi dayun uaquid nec,” quequin mimi Nuquin Papa tantiacpadomboen èbitsen tantiaquiota. ² Mimi tantiacpadquio Nuquin Papan shubu iquiec. Quènè dadpenquioshè iquiec. Tsucustiapimbo iquiec. Adpenquio icsho mibi aden chienquio ictsiambi. Adquid tantiaquin: “Èbi tantiaquido èbèdi tabadmendambi,” quequin chiombi. ³ “Adquid iquiec,” quiaish èbia nidshun con Pa chiendambi. “Èbi tantiaquido neque. Nuquibèdi tabadmenuna,” quequin chiendambi. Adashic èbi yacno mibi buanec choindabi. ⁴ Èbi nidan èbi nidacno nidte mimi tantieq —quepondash Esus.

⁵ Adsho tantiashun Tomasèntsen: —¿Mitsimbo nide, Icho? Tantiambo iccombi. Podqued tantienquio iquembique. Èbi chui —caquien ⁶ Esus: —Nuquin Papa yacno nidte tantiamequidquid nebi. Nuquin Papan chiaiduidtsèqui chiec muesambo nebi. Adquid icquin èbi tantiaquid Nuquin Papabèd tabadmendambi. Èbi tantiesan Nuquin Papa tantiatiapimbo ictsiash. Èbi tantiaquidènuidtsèqui Nuquin Papa tantiatsiash. ⁷ Èbi caic: “Nuquin Papan Mado nec,” quequin mimi Nuquin Papatsen tantiendac. Nèbi abipadquid èbi icsho isun Nuquin Papambo isacnimboen mimi tantiendac —quepondash Esus.

⁸ Adshobien Uedipentsen: —Nuquin Papa èbi isme, Icho. Nuquin Papa iste bunebique. Aid isash bédambo ictsiabi —caquien ⁹ aidtsen Esusèn: —¿Tantienuioda ique, Uedipe? Yuec mibèdi tabadobi. ¿Mimi isacmaidtabi nedi? ¿Mibi chianenquiodambi ictio? Nuquin Papapadquidquibidini nec. Èbi adquid icsho isun: “ ‘Adquidquibidi Nuquin Papa iquiec,’ quequin Nuquin Papatsen mimi tantiendac,” quequin mibi chiombi. ¿Atotsi quequimbini: “Nuquin Papa èbi isme,” cai? ¹⁰ “Nuquin Papapadquidquid nebi,” èbi quesho tantiash: “Ai, abimbo caic,” ¿quenquioda icco? Èmbemi chienquio iccombi. Con Pan chiaidquio chiequini nec. Adembidi èmbemi nabanenquio iccombi. Èbèd tèshnanenquio icquin con Pan namiaquimbi naoc. Èmbemi nainquio iccombi. ¹¹ “Con Papadquidquid nebi,” èbi quesho tantiashun: “Ai, abimbo caic,” cata. Èmbi chiaid tantiatiapimbo icquin èmbi comapenen tantiaquin dadpen nabamboedquio tantia. Aden èmbi nabamboed tantiaquin: “Nuquin Papan chomiaidènuidtsèquien adotsiash,” quequin tantia. ¹² Tantia. Mibi chuinu. Èmbi nacpadomboen èbi tantiaquidontsen comapenen tantiaquin nabanendac. Èmbi chuibanac daèdpactsècshun èbi tantiabentsèccosh. Con Pa yacno nidshun èmbi chomiaidèn con Mayanèn namiac mibipadquidèn èbi chuibanac dadpenshun èbi tantiabenendac. ¹³ Èmbi chiacpadomboen naquidèn: “Èbi nashunta, Icho,” quesho tantiashun ambi chiacpadomboen nashunenambibi. “Nuquin Papa bédamboshè iquiec,” camenuen

14 ëbi tantiaquidën chiacpadomboen nashunendambi —quepondash Esus abëd icquido chiec.

Nuquin Papan Mayan tabadte chiaid

15 Adashic abëd icquido padpiden chiec Esus: —Ëbi abimbo tantiaquidën ëmbi chiacpadomboen natiadquio iquendac. 16 Adotiadquio icsho isun con Pabëd icquin con Pa chiendambi naden. “Nuqui tantiaquido bëdamboen tantiamenuen nuquin Mayan aidobëd tabadmenuna, Papa,” ëmbi cac Nuquin Papan con Mayan mibëdi tabadmendac. 17 Adoac mibi nianenquio yec mibëdi tëshnanenquio iquendac. Mibëd icquin ëbi chuiquin mibi abimbo tantiamendac. Aid isadenquio icsho ëbi tantiesabon aid tantiatiapimbo iquec. Mimbien aid tantiec. Con Pan ëbëd icmiaidquio nec. Ambi namiaid ëbi icsho aid tantiashumbimboen mimi tantiec. Ëbi nidan choash mibëdi tëshnanenquio yec tabadendac con Mayan. 18 ¿Shiadimpi mëyadacbitsec icnudambi mibi niampe? Padenquio. Nuquin Papan Mayan con Mayambi nec. Mibëd aid icnuc ëbëd yachimboequi con Mayan tantiadendac. 19 Nëbi ëbi nidacsho ëbi tantiesabon ëbi isenquio icnuc mimi ëbi isendac uincuenacsho. Adec uincuenaid icquin con Mayan mibëd tabadmequin mibi unësacsho uincuemeshun ëbëdi tabadmendambi. 20 Ëbi uincuenaid ushëmbi mimi naden tantiendac. “Esusën Nuquin Papa tantiaquic aidbëd tëshnanenquio icquin aidën chiacpadomboenuidi naindac. Adecbidi Esusbëd tantiananquic aidbëd tëshnanenquio icquin aidën chiacpadomboen natiadquio yec tabadebi,” quequin mimi tantiendac. 21 Ëmbi chiacpadomboen naquid ëbi tantiaquidquio nec. Ëbi tantiaquidquio mibi icsho con Pabëdtan mibi tantiaquioquin: “Adquio aton Papabëd Esus iquec,” camequin mibi bëdamboen tantiamendambi —quepondash Esus. 22 Adsho tantishun Udas utsin abi bedmequidënpnenquio: —“Nuquin Papa yacnuësh choash con matses chuiquidquio yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuësh choquid icquin ¿atotsieshun ëbiuidtsëqui tantiamen, Icbo? —caquien 23 Esus padpidec: —Ëbi tantiaquiduidtsëqui naden tantiamendambi. Ëbi tantiaquid ëmbi chiacpadomboen naquid nec. Aden nasho con Pabëdtan tantiaquioquin aidbëdi con Mayan tabadmendambi. Adoac con Mayanën tantiamiac ëbëd iquec con Pabëd iquec quiacbimboec tantiadendac. 24 Ëbi tantienquio icquidoen ëmbi chiaid niac-niacquido nendac. ¿Ëmbiuidtsëqui chiaidta adquidën niac-niacpatic? Mambi Nuquin Papan chiaidquio chuiboc. Aidën chiaidquio adquidën niac-niaquec —quepondash Esus abëd icquido chiec.

25 Adashic padpidec Esus onquiondash. —Mibi bëdiactsëc tantiamequin mibëd icquin con Pan chiaid chuibanombi. 26 Con Pa yacno nidshun ëmbi: “Nuquin Mayan aidobëdi tabadmenuna, Papa,” cac con Pan con Mayan matsesbëd tabadmendac. Adoac ëmbi naidbëdta ëmbi chiondaidtedimbo mibi bëdamboen tantiamendac. 27 Con Pa yacno nidshun con Mayan mibëdi tabadmequin dacuëdenquio icquid mibi icmendambi. Adoac dacuëdenquio yec bëdamboec tabadta. Ëbi tantiesabo dacuëdabimboec dacuëdenda. Comapenec dacuëdtanec uinte paëdtanec aido tabadnubi mibi dacuëdenquio yec bëdamboec tabadta. 28 “Nëbimbobini con Pa yacno nidendac. Adtanequic choaindabi,” quepobi mibi chiec. Ëbi adsho tantias ëbi tantiaquidombo cuishonquetsias. “Esus abi namequid aton Papabëd tabadec nidec,” quiash ëbi tantiec cuishonquetsias. 29 Nidnumbi mibi chiec nebi. “Unësash uincuenendabi. Adashic con Pa yacno nidendabi,” quiobi. “Ëmbi chiacpadec ëbi adsho isun ma nëidon: ‘Esusën abimboshenda capondash. Ambi chiondacadquid Nuquin Papan Madombo nec,’ quequin tantianu,” quiash adobi. 30 Nëbi ënquimbi chuinu. Ëbi tantiesabon icbo Satanäs ëbi unës uamenuc choec. Ambembi aidën ëbi unës uameatiapimbo iquec. 31 Con Pan tantiacpadequini unësendac. Ëbi adec unëso isash: “ ‘Nuquin Papa tantiaquin ambi chiacpadomboen naic abided cuidadec Esus unësac,’ quequin ma matses abitedishun tantianu,” quiash adebi. Nëbimbobimbi naique. Nidec nidnu. Nid —quepondash Esus.

15

Shancuinbiecquid uba caid chiaid

1 —Nidec nidnu. Nid —quetanquimbi padpiden chuipondashi ompoacimboen chuiquin. —¿Mitsipadquio shancuinbiecquid uba caid icpec? Mapictsëc ictsequi cuididipambo yanquid. Adquidic shancuin bacuëbimboec didiquequid. Uba dadan aton cuidi canimequin bëdambo icmequid. Adomboembidi ëbi tantiaquido bëdambo icmendambi. Nuquin Papain uba ichobimboecquid nec. 2 Uba aton icbon cuidi utsiuc bacuëesa icsho pateshunepaid yoc. Adoacimboen ëbi tantiauidtsëcboedon ambi icsamboen naid ëntiapimbo icsho con Pan ambi icsaido cuidacno nënendac. Uba icbombidi bëdamboen

bacuëmenuen dadpen cuidi icquid cuidi dadpen pateshun siaquid. Adomboembidi ëbi tantiaquido bédamboshë icmenuen Nuquin Papan aidon icsamboen naid ëmetsiash. ³ Ëmbi chiacpadomboen naic mibi bédambo iquec. Aden ëbi tantiasho Nuquin Papan mibi bédamboen isec. ⁴ Ëbi adembidi tantiaquin ëmbi chiacpadomboen nata. Adsho isash mibi bédamboen tabadmec mibéd iquendabi. Uba cuidi padquédaid bacuëtiapimbo iquendac. ⁵ Adecbidi ëbëdi tëshnanash matses bédambo ictiapimbo iqueque. Ëbëd tëshnanenquo yec bédamboec tabadta. Bédamboec tabadquin mimi utsibo ëbi tantiametsiac. ⁶ Uba icbon cuidi utsiuc bacuësa icsho pateshun tsindoshon nédëncapaid yoc. Adoachimboen ëbi tantiesabo unësacsho Nuquin Papan ambi icsaido cuidacno nësecaindac –quepondash Esus.

⁷ Adshumbic Esusën padpiden chuipondash. –Ëbi tantiaquin ëmbi chiacpadomboen naquidën: “Ëbi nashunta, Papa,” cac ambi chiacpadomboen Nuquin Papan nashuntsiash. ⁸ Nuquin Papan adoshonac: “Nuquin Papa bédambo iquec,” mimi catsiac. Adembidi utsibotsen: “Nuquin Papa bédambo iquec,” camenuen bédamboec tabadquin ëbi tantiameta. Mimi adosho: “Ai, ëbi tantiaquidquo nec,” caindambi. ⁹ Con Pan ëbi tantiaquiacpadomboembi mibi tantiaquiembi. Adoaid icquin ëbitsen tantiaquiquin ëmbi chiacpadomboen nata. ¹⁰ Abi tantiaquiquin ambi chiacpadomboen nashobini con Pan tantiaquiec. Adembidi ëbi tantiaquidën ëmbi chiacpadomboen nasho ëmbitsen aid tantiaquiendambi. ¹¹ “Ëbi cuishonquiacpadquiecbidi ma ëbi tantiaquiec cuishonquequiono,” qeshun aden mibi chiemi –quepondash Esus abéd icquido chiec.

Tantiananta, quequin Esusën chiaid

¹² Adashic abéd icquido padpiden chiec Esus: –Ëmbi mibi tantiaquiacpadquiec tantiananta. ¹³ Nadquiec caimbi. “Min utsi cuesnu,” cashunac: “Ëbien natiad,” quiachimboec tantiananta. Aden mibi tantiec ëbided cuidadec unësendabi. ¹⁴ Ëmbi chiacpadomboen nasho mibi con utsi caimbi. ¹⁵ Ëmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bëda icpec?” quequin aton yua chienquo icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi. ¹⁶ “Esusbéd iquec nidnu,” ¿quequinda mimbembi tantiadionda? Ëmbien mibi: “Nuquibi icnu. Cho,” caondac. “Utsibo tantiamequin ma nëidon ëbi chuibenenu. Adoac utsibotsen ëbéd tabadtequid yanendac,” qeshun mibi cho caondambi. Aden ëmbi chiacpadomboen naquidën Nuquin Papa chuiquin: “Min Mado Esus tantiaquid ëbi icsho ëmbi chiacpadomboen ëbi nashunta, Papa,” mimi cac mimi chiacpadomboen Nuquin Papan mibi nashuntsiash. ¹⁷ Ëbi adsho tantiash ëmbi chiacpadquiec tantiananta –quepondash Esus.

Esus tantiaquido chieshënte chiaid

¹⁸ Adashic padpidec Esus onquepondash. –Ëbi tantienquo icquidon chieshënac: “Aden Esusba chieshënondash,” quequin tantia. ¹⁹ Ëbi tantiesabo icsho ëbi chieshënquidon mibi bédamboen istsiandac. Adquid iccondaidi ëmbi: “Cho,” cac ëbi tantiaquid mibi yanondac. Adec ëbi tantiaquid icsho mibitsen chieshënoaindac. ²⁰ “Yuan icbon chiacpadomboen napaid yoc,” quequin ëmbi ¿chuiboedta tantie? Aden ëmbi chiacpadomboen nasho ëbi chieshënquidon mibitsen chieshënoaindac. Adembidi ëmbi chiaid tantiatiapimbo icquidën mimi chiaidtsen tantiatiapimbo icoaindac. Padnuen ëmbi chiaid tantiaquidën mimi chiaidtsen tantiendac. ²¹ Ëbi chieshënquidombi ëbi chomiondaidquo tantiaquin ëbi chieshënenquo ictsias. Ma ëbi chomiondaid Nuquin Papan tantienquo icquin aidon ëbi chieshëmpayoc. Adomboembidi ëbi tantiaquidotsen chieshënoaindac. ²²⁻²³ Ëbi chieshënquidon ëbiuidtsëquida chieshëmpadic? Ma ëbi chieshënquin Nuquin Papat-sen chieshëneyoc. Adquid icsamboshë iquec. Nuquin Papa yacnuësh choshon ambi chiaid ëmbi chiabi icnuc ëbi chieshënquido ëbi chieshënac icsainquo ictsenash. Nuquin Papa yacnuësh choshon mambi Nuquin Papan chiaidquo chuibamboc. Adnu Nuquin Papan ëbi chieshënquido: “Mibi icsamboshë iquec,” caindac. ²⁴ Adembidi Nuquin Papa yacnuësh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshënac mibi icsambo iquec,” cainquo ictsenosh. Utsibon nabanacmaidquo comapenen tantiaquin mambi nabamboc. Adosho isash ëbi chieshënquido: “Icsapenquo iquebi,” quetiapimbo iquendac. Ëmbi nabansho isun ëbi chieshënquin con Patsen chieshënac. ²⁵ “Aden matsesën ambembi ëbi chieshëmpec,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshënquidon isbanaidi nec –quepondash Esus.

²⁶ Adashic padpidec: –Ëmbi con Pa yacno nidshun: “Nuquin Mayan ëbi tantiaquidobéd tabadmenuna, Papa,” cac: “Ai,” qeshun Nuquin Papan chomiac mibëdi tabadquin

abimbo chuiquin ĕbi tantiamequiendac. ²⁷ Adoac mimbitsen ĕbi chuibanendac. “Yuec aidbĕd tabadondashun Esus tantiĕmbi,” qeshun mimbi ĕbi chuibanendac. Aden mimbi chuisho ĕbi chieshĕnquidon mibitsen chieshĕnendac. Adoac dacuĕdenda.

16

¹ “Chieshtonoshe,” qeshun mibi aden chiombi. Mibitsen chieshĕnac dacuĕdenda. Mibĕd con Mayan tabadmembique. ² Ĕbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuĕsh adendac. Adomboĕmbidi mibi chieshĕnquin utsi-utsien cuesun secash: “Nuquin Papa tantiaquidquicquid cuesun tantiaquido cuesun secaombi,” quepondac. ³ Aden Nuquin Papa ĕbĕdta tantienquido icquidcon ĕbi tantiaquidotsen chieshĕnendac. ⁴ Mibi chieshĕnac: “‘Ai, adenshenda Esusĕn chuipondash. Ĕbi tantiaquido cuesun secaindac, quepondash,’ ma nĕido quenu,” qeshun nĕbi mibi chiĕmbi. “Ĕbi icnuc ĕbi tantiaquido cuesun secadenquido iquec. Ĕbi nidambien aido cuesun secabenendac,” quequin tantiaquin ĕnden aden mibi chienquido iccondambi. “Nĕbi nidebi,” qeshun nĕbi mibi chiĕmbi –quepondash Esus.

Nuquin Papan Mayan chote chiaid

⁵ Adashic: –Nĕbi ĕbi chomiondaidbĕd tabadec nidendabi –quepondash Esus. Adsho tantiasch padequimbo tabadpondabi. Adec ĕbi padequimbo tabadsho isash Esus padpidec onquepondash. –“ĔMitsimbo nide?” Ĕquenquioda ique? ⁶ Ai, ĕmbi chuiboed tantiac unĕsqiocio icnucn mimbi ĕbi chienquido icchitec. ⁷ Ĕbi nibĕdnuc mibi bĕdambo iquendac. Ĕbi nidenquido icnuc con Mayan mibi bĕdamboen tantiamenuc choenquido ictsiash. Nidshumbimbi mibĕdi tabadmenuen chomendac. ⁸ Adoac matses ambi icسامبوĕn naid tantiamequin ĕbitsen tantiamendac. Adomboĕmbidi Nuquin Papan cuidtetsen tantiamendac. ⁹ Aden Nuquin Papan Mayanĕn tantiamiac: “Esus tantienquido yec icسامبوĕn icchitebi,” quendac matses. ¹⁰ Adĕmbidi ĕbi bĕdamboĕshĕ icquid tantiamiac: “Nuquin Papan Madombo yec Esus bĕdamboĕshĕ icquid nec. Aid abentsĕqui tantiaschoeni Nuquin Papan bĕdamboen istiasch,” quendac matses. Ĕbi isadenquido yec con Pa yacno nidan con Mayanĕn tantiamiac matses adendac. ¹¹ Adĕmbidi Nuquin Papan cuidte tantiamiac: “Matses yuaquid Satanas ambi yuaido Esus tantienquido icquidobĕdta Nuquin Papan cuidendac,” quendac matses. Con Mayanĕn tantiamiac adec matses onquendac –quepondash Esus.

¹² Adashic abĕd icquido chiec Esus: –Mibi dadpenquido chuitiadquido icquimbi nĕbi dadpen chienquido iquĕmbi. Nĕbi ĕmbi chuisho mimbi tantiatipimbo iquec. ¹³ Nuquin Papan Mayan choshombien mibi abimbo chuiquin ĕbi tantiamendac. Ambembi chienquido icquid Nuquin Papan chiaiduidi chiendac. “Nadquido iquendac. Adĕcbidi nadquid choendac,” quequin mibi dadpen tantiamendac. ¹⁴ Adĕmbidi ĕmbi naidbĕdta ĕmbi chiaidtedi tantiamequin: “Esus bĕdamboĕshĕ iquec,” camendac. ¹⁵ ĔĔbiuidtsĕqui tantiamenuenda con Mayanĕn adopec? Padenquido. Ĕmbembi chiaid mambi chiamo yoc. Nuquin Papan chiacpadamboĕnuidi naquin ambi chiaiduidtsĕquimbi chuibandenico. “Con Mayanĕn ĕbĕdta con Pa tantiamendac,” quequin tantiec: “Ĕmbi naidbĕdta ĕmbi chiaidtedi tantiamendac,” quioĕbi –quepondash Esus abĕd icquido chiec.

Abi nidte Esusĕn chiaid

¹⁶ Adashic padpidec: –Nĕbi isadenquido yanĕbi. Adashic yuepactĕc yash isadcuĕnendabi –quepondash Esus. –Nĕbi unĕsash uincuenash padpidec isadebi –quequin tantiec adondash. ¹⁷ Adsho tantiaschini ĕbitedi: –ĔAtotsi quepec? Tantiadenquido yec onquepec. “Con Pa yacno nidash ĕbi nibĕdnuc mibi tabadendac,” ma quepaboc. ĔAtotsi chuitiadquido yec: “Nĕbi isadenquido ictanec yuepactĕc yash isadcuĕnendabi,” queposh? ¹⁸ ĔAtotsi quepec nec? –quepondabi Esusbĕd icquidobĕd onquec. Esus tantiamenuendo yec sho-shoshquĕtsĕcquic onquepondabi. ¹⁹ Adsho ambembi tantiasch: –Ĕbĕd icquidcon ĕbi chuitiadquido iquec –qeshun Esusĕn: –“ĔAtotsi chuitiadquido yec nio?” quequin ĕbi chuite mibi buneque. ²⁰ Tanti. Mibi Chuinu. Ĕbi unĕso isash mibi sedenquenubi ĕbi tantienquido icquido cuishonquendac. Adec sedenqueboĕdobi mibitsen cuishonquianendac. ²¹ ĔMitsipadquido bacuĕ tishĕc chido icpec? Bacuĕ cuididiquenuc natiambosĕhĕ icboĕdi bacuĕ tishash cuishonquepaid yoc. ²² Adĕcbidi nĕbimbobi ĕbi unĕso isash mibi natiaquendac. Adboedi yuepactĕcshun ĕbi padpiden isash mibi cuishonquendac ĕnĕdenquido yec. ²³ Adnubini con Pa yacno nidendac. Ĕbi adnuc mibi bĕdambo iquendac. Ĕbi nidan: “Ĕbi nashunta,” ĕbi catiapimbo icquimbi Nuquin Papa mimbi chianendac. Ĕbi tantiaquidĕn: “Min Mado Esus tantiaquimbi. Ĕbi nashunta, Papa,” cac ĕbi tantiaquin con Pan mibi nashunendac. ²⁴ Aden mimbi Nuquin Papa chianenquido iccoc. Nĕbi adomboĕn

chianeta. “Min Mado Esus tantiaquid icsho èbi nashunta, Papa,” quequin chianeta. Mimbi adoac mimi chiacpadomboen mibi nashunquin Nuquin Papan mibi cuishoncamendac —quepondash Esus abèd icquido chiec.

Esusèn abèd icquido ènquimbi chiaid

²⁵ Adashic abèd icquido padpiden chiec: —Ompoacbimboen dadpen chuibanomi. Yuecpectsècshun: “Con Pa nadquio iquec,” quequin mibi sebadènquio chiendambi —quepondash Esus. —Uincuenshun aden chiendambi —quequin tantiec adondash Esus. ²⁶ Adashic padpidec: —Con Pa yacno èbi nidan mimi: “Min Mado Esus tantiaquid nebique. Èbi nashunta, Papa,” quequin Nuquin Papa mimbibi chianendac. “Èmbiuidtsèqui: ‘Èbi tantiaquid nashunta, Papa,’ cac èbiuidtsèqui tantiaquin Nuquin Papan mibi nashuntsiash,” ¿quectabi ique? Padenquio. ²⁷ Mibitsen tantiaquin Nuquin Papan mimi chianiac mibi nashunendac. “Nuquin Papa yacnuèsh choquid Esus nec,” quequin èbi tantiaquid mibi icsho con Pan mibitsen tantiaquiquin mibi nashunendac. ²⁸ Matsesbèdi tabadec Nuquin Papa yacnuèsh chondash nèbi con Pa yacnobidi nidendabi —quepondash Esus. ²⁹ Adsho tantiahini èbitedi: —Adquidshenda mibi nepec. Ma nèbi mimi sebadènquio chieyoc. ³⁰ Mibi: “Nèbi isadenquio yanebi,” quioc. Adashic: “Yuecpectsèc yash isadcuenendabi,” mibi qesho tantiahi mibi tantiamenquio yec sho-shoshquetsècquiec: “¿Atotsi quepec?” quecuedepobi. Mibi chuimetiadquio iccobi. Èmbi chiambobi ma mimbibi tantiapaboc. Comapenen tantiaquidquio icquin ma mimi abitedimbo tantiapayoc. Aden tantiaquid yec Nuquin Papa yacnuèsh choquid mibi nec —quepondabi èbitedi. ³¹ Adsho tantiahi Esus: —Ai, nèbi mimi èbi tantiaquiec. ³² Aden èbi tantiaquidquibi èbi chieshènquin bedsho isanec mibi niquendac èbi nianec. Mimbi niamènubi con Pan èbi nianenquio iquendac. ³³ “Èbi nidan Nuquin Papan Mayan mibèd tabadendac. Èbi tantiaquid Con Pan tantiaquiec,” quequin dadpen chuibanombi. “Èbi tantiec dacuèdenquio yec ma tabadnu,” qeshun mibi aden chuibanombi. Èmbi chiaid tantiahsun chieshèmènquido dacuèdènenda. Satanasèn: “Icsamenu,” cac icsainquio iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuèdenda —quepondash Esus abèd icquido chiec.

17

Esusèn Nuquin Papa chiaid

¹ —Dacuèdenda —qeshumbic èbi tantiamenuen abuc isquin Esusèn Nuquin Papa chuipondash. —Nuqui tantiactedi èbi naimeta, Papa. Èbi naimetanquin comapenen tantiaquin èbi bédambo icmeta. Aden mimi bédambo icmiac mibitsen bédambo icmendambi, Papa. ² Èndenquimboshè mimi èbi chiondac naden chuivin. “Nuqui matses uaidon abitedishun Icho mibi nec, Mado,” quequin mimi èbi chiondac. Mimbi adondaic icquin mimi tantiactedi matses nuquibèd tabadtequido icmendambi, Papa. ³ Matsesèn nadosho adoendambi. “Abipadquid utsi nibèdnuc Nuquin Papa iquec. Ambi chomiondaicquio Esus nec,” quequin tantiahsu nuquibèd tabadtequido icmendambi, Papa. ⁴ Mimi chiacpadomboen naquin nèbimbobimbi nainec. Èmbi adoacsho isash matses: “Ambi chomiaid tantiahsu Nuquin Papan nuqui bédamboen isec. Nuquin Papa bédamboshè iquec,” quependac, Papa. ⁵ Nuqui tantiactedi èmbi nainacsho mibi yacno nidmeshun mibèdi èbi tabadmeoata nuqui matses uabi tabadtenecpadembi. “Nuquibi abitedimbo namenuna,” èbi cata, Papa —quepondash Esus Nuquin Papa chiec.

Esusèn abèd icquido Nuquin Papa chiaid

⁶ Adshumbic Esusèn abèd icquido èbitedi chuiquin aton Papa chuioapondash. —Mimi tantiactedi mimi èbi tantiaquid icmiacsho mimi bédamboen iste chuibanombi. Aden mimi chiaidquio chiac: “Ai, adotiadquio iquebi,” quiosh, Papa. ⁷ Adembidi aidon: “Nuquin Papan namiaidquio nec. Ambembi nainquio iquec,” quequin èbi tantiaposh. ⁸ Mimi chiaid èmbi chuisho tantiahsun mimi comapenen tantiaquin nabamiaid nasho isun: “Ma Nuquin Papan chomiaidquio nepayoc,” caposhi èbèd icquidon, Papa. ⁹ Èbi tantienquio icquido mibi chienquio iquembi, Papa. Èbi tantiaquiduidtsèqui mibi chiec nebi. Mibi tantiaquido icsho mimi tantiamiac èbitsen tantiec aidon. ¹⁰ Adsho isun: “Nuqui tantiaquido nec,” caimbi, Papa. Aidon: “Mibi bédambo iqueque. Con Icho mibi canu. Mimi chiacpadec bédamboec tabadtiadquio iquebi,” quequin bédambo icmioshi, Papa. ¹¹ Mibi bédamboshè iqueque. Èbi mibi yacno nidan èbi tantiaquido dayun uata, Papa. Èbi chieshènquidon chieshtomenushe. Nèido bédamboen dayun uata. Mimi èbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma èbi tantiaquido tantiananu. Nèido bédamboen dayun uata, Papa. ¹² Aidobèd icquin mimi

chiaidquido bēdamboen chuibanquin chieshtomiambo iccombi. Aden bēdamboen dayun uaquin ēbi tantiaquido cudasēnquin Satanas yuamiambo iccombi. Udas abentsēquien Satanasēn yuatsaccosh. Mimbi chiaid matsesēn dada uapampicpadomboen ēbi bedmenuen Satanasēn Udas yuaccosh. Adoac ēbi bedmequid yanash mimbi cuidtequid iquendac.

¹³ Nēbi mibi yacno nidendabi, Papa. “Ēbi nidan dacuēdec ēbi tantiaquido chieshtonoshe,” qeshun mibi otacquio chienquio iquemi. “Ēmbi abi dayun uate chuisho tantiaish ēbi yacpadeq ma cuishonquenu,” quequin mibi otacquio chienquio iquemi, Papa. ¹⁴ Mimbi chiaidquido nēido chuibanombi. Adoac ēbi tantiaquido yansho ēbi chieshēnquidon nēidotsen chieshēmpēc. Ēbi yacpadeq mimbi chiaid niac-niacte bunenquio icshobidi nēido chieshēnquiec, Papa. ¹⁵ Aden tantiaish: “Ēbi tantienquio icquidobēdi ēbi tantiaquido tabadmenda,” ζquectabi ique? Padenquio. “Ēbi tantiaquido chieshtomenda,” caimbi, Papa. Satanasēn yuanushe. Bēdamboen dayun uaquin chieshtomenda, Papa. ¹⁶ Ēbi tantiesabo tabadacpadeq tabadenquio icquin ēmbi nabocpadomboen natiadquio iqueque. ¹⁷ Mimbi chiaidquido pausunquioquin bēdamboen tabadme, Papa. ¹⁸ Mimbi ēbi: “Matses chiec nid,” caondacpadomboen aido: “Ēbi chuibeneta,” caindambi. Adoac nēidon ēbi chuibenendac, Papa. ¹⁹ Nēido tantiaquiec nēimbobini mimbi chiacpadeq ēbided cuidadec unēsēndac. “Adomboembidi ēbi tantiaquidon ma Nuquin Papan chiacpadomboen nanu,” quiash ēbi tantiaquido min yuabombo icmenuec adebi, Papa –quepondash Esus aton Papa chiec.

Esusēn abi tantiaquid utsibo Nuquin Papa chiaid

²⁰ Adashic padpiden Nuquin Papa chiec Esus: –Ēbēd icquido mibi chuishumbic nēbi aidobēda ēbi tantiaquid utsibotsen mibi chuinu, Papa. Ēmbi chiaidbēda ēmbi naidtedi ēbēd icquidon utsibo chuibanac aidotsen ēbi tantiaquido yanendac. Adec ēbi tantiaquido dadpenquio yanendac. Ēbi tantiaquidotedi tantiaquin mibi chiec nebi, Papa. ²¹ Nuqui tēshnanenquio yacpadequi nuquibēd tēshnanenquio icquid icmeta, Papa. Nuqui tantiananquiacpadeq ēbi tantiaquidotedi shubu abentsēquēn tabadacimboecnc tantianameta, Papa. Adsho isash nuqui tantienquio icquido nadtsiash. “Esus tantiec bēdambo iquec. Aden Nuquin Papanuidtsēqui bēdambo icmetsiash. Nuquin Papan chomiaidquien Esus nechitec,” quetsiash. ²² “Mibēd ēbi tantiananquiacpadquiec ma ēbi tantiaquido tantiananquiono. Ma chieshēnanenquio icnu,” quequin mibi ēbi namiacpadomboen ēbi tantiaquido namiombi, Papa. ²³ Nuqui tēshnanenquio yacpadeq aidobēd tēshnanenquio iquendabi. “Chieshēnanenquio yec tantiananquiec ma bēdamboec tabadnu,” quec aidobēd tēshnanenquio iquendabi, Papa. Adec ēbi tantiaquido bēdamboec tantianansho isun matsesēn naden tantiatsiash. “Ambi chiacpadequid Nuquin Papan chomenēdaic icquin Esusēn abi tantiaquido aden bēdamboen tabadmec. Ambi chomenēdaic aton Mado tantiaquiacpadomboen Nuquin Papan aid tantiaquido tantiaquiec,” quequin matsesēn tantiatsiash, Papa. ²⁴ Mimbi ēbi tantiaquido icmiaido nuqui tabadacnombo tabadmeta. “Nuqui matses uabi icquin mimbi: ‘Ēmbi tantiaidquido mibi neque. Nuquibi nanuna, Mado,’ cac nuqui bēdamboeshē yec tabadtenecpadequi nuqui tabadsho ma ēbi tantiaquidon isnu,” qeshun mibi: “Nuqui yacno tabadmeta, Papa,” caimbi. ²⁵ Icsaisambo mibi icsho icsambo icquidon mibi tantiatiapimbo icnubimbi mibi tantiaquiec. Mibi yacnuēsh choquid icshobini ēbēd icquidon: “Ai, Nuquin Papa yacnuēsh choquidien nec,” quequin tantiaposh, Papa. ²⁶ Aden tantiamenuen yuec ēbēd icquidobēd tabadquin mibi naid chuibanombi. Ēbi nidan ēmbi chomiaidēn con Mayanēn adembidi ēbēd icquido tantiamendac. “Mimbi ēbi tantiaquiacpadomboen ma nuqui daēdi tantiaquiash ma tantiananquiono,” qeshun con Mayan aidobēd tabadmendambi. Adoac ēbēd icacimboec con Mayan tantiadendac, Papa –quepondash Esus Nuquin Papa chiec.

18

Esus bedmiaid

(*Mat 26.47-56; Mad 14.43-50; Duc 22.47-53*)

¹ Aden Nuquin Papa yuen chianec Esus nidpondash. Ēbi chedobēd nidquin acte Sededon caid potiash tiedno cuēte odibos caid nitsinacno ēbitedi chiec tabadtenebocnombo chopondash. ² Ambo tabadnubien Udas: –Ēbi abēd tabadtenebocno tiednoen nidchitash –quianec Esus bedmenuec ³ chopondash. Aden chieshēmēnquido chuiquid dapabo chuitanshun matses dadpen bēpondash nēidtedi. Nēidic con matses chuiquid dapabobēdtan padiseyobon namiaido sondado chedo. Nēidic con matses yuaquido Doma yacnocquido sondado dadpen. Nēidic aid sondado chuiquid. Aidedi Udasēn bēpondash. Tabotēbēda cueste sanambēdēdtsēcquiec cho-chopondash. Utsibombic chēshte.

⁴ Adec cho-chosho isash bëquedbanec nidquin: —Ëbi unës uamec —quequin tantiaquin Esusën: —¿Atotsi quec ne? ¿Ttsutsi nibëne? —cac ⁵ —Nasaded yacnuësh caniquid Esus bednuec nebi —quepondash sondado chuiquid. Adshun isac aibdëd Esus bedmequid Udas icpondash.

⁶ Adshobien Esusën: —Në iquebi —capondash. Nuquin Papapadquidquiobi icquin adoac dacuëdec: —Aucbidi cuenu —quec uebudcuededpondash bednequidotedi. ⁷ Adshobien padpiden Esusën: —¿Ttsutsi nibëne? —cac: —Nasaded yacnuësh caniquid Esus bednuec nebi —queoasho tantiaquin: ⁸ —“Në iquebi,” caombi. Èbiuidtsëqui bedta. Èbëd icquido bedenda —capondash Esusën. ⁹ —“Mimbi ëbi tantiaquid icmiaido Satanash chieshtomiambo iccombi, Papa,” quequin ëmbi Nuquin Papa chuibocpadomboen nêido chieshtometiapimbo iquebi —quequin tantiec: —Nëid bedenda —quepondash Esus.

¹⁰ Adnubien Petedon abi tsidiadaid chështe chictanquin chuiquid dapan yua abiucquo pateshunepondash. Aid yua Madco niondash. ¹¹ Adosho isashien Esus: —Padi. Chën. Min chështe naued. Nuquin Papan chiacpadec paëmbo icnuc unësendabi —quepondash Esus.

Anasën shubuno Esus buanaid

(Mat 26.57-58; Mad 14.53-54; Duc 22.54)

¹² Adshobien sondado chedon Esus bedpondash. Aden bedshun: —Cuidmenun chuiquid dapa yacno mibi buanu —catanquin catanepondash. ¹³⁻¹⁴ Aden cataneshun buanquin con matses chuiquid dapambo Caipas caidën cucun shubunoba buanondash. Aid setambi chuiquid dapambo Caipas iccondash. Esus chieshëdec: —Nuquin matstededi unës uamenquo icnuc Esusded unës uamenuna —queboed Caipas niondash. Aton cucu chuiquid dapabidi niondash. Aidi Anas niondash. Anasën shubunoba Esus buampondash. Ashunquo Caipas ismenuen buampondash.

Petedon: Èmbi isacmaid Esus nec, quequin chiaid

(Mat 26.69-70; Mad 14.66-68; Duc 22.55-57)

¹⁵ Esus buansho isun Petedobëd tan chinunondambi. Chinuntuidash nidequi Caipasën shubuno choash daquënë uaidën puduednuesho tantiaquin shëcuë isquid chidon puduedmiondashi. Ambi isondaic icsho aden puduedmiondashi. ¹⁶ Èbi puduedmequin Petedo ambi isacmaid icsho puduedmenquo icpondash. Adsho istanquin: —Èbëd icquid neque. Shëcnesun. Ma puduednu —capondambi. ¹⁷ Adoac puduedmeshun shëcuë isquid chidon: —¿Në bedboed Esusbëd icquidta mibi ne? —capondash Petedo chuiquin. Adoacien Petedo dacuëdec: —Padenquo —quepondash muequi. ¹⁸ Adnubien iquendoshon daquënë uacnoshon cuëte dëtsiadoshon sondado chedobëd anocquido yuabo cuëte cuëc tabadpondash. Adsho isashien Petedotsen cuëte cuënuec nidpondash ëbi shubunquo puduednuc.

Caipasën Esus chuimiaid

(Mat 26.59-66; Mad 14.55-64; Duc 22.66-71)

¹⁹ Adec ëbi puduednubien Caipasën Esus chuimepondash. —Mibëd icquid ¿tedtsi iquec? ¿Èbëd icquido dëniaquecta icpec? Mibëd icquido ¿mitsipaden chuibano? —capondash. ²⁰ Adoacien Esusën chuipondash. —¿Ompoquindambi chuibandio? Nuquin Papa tabadte shubu uashunaid daquënë uaidën puduedshun mambi chuibandeneboc. Nuquin Papan chiaid chuibante shubun-shubunquiec puduedcuenequin mambi chuibeneboc. Ompoquin chiambo iccombi. ²¹ Mimbi: “Icsamboen naosh,” caid ëbiuidtsëqui chuimenda. Èbëd icboedotsen chuime. Èmbi chiaid abitedi tantiaquin aidombi mibi chuitieshe. Aidotsen chuime —quepondash Esus.

²² Adsho tantiaquin: —¿Chuiquid dapada adopaid? —quetanquin sondado chuiquidën mëdanten bëcuespondash Esus. ²³ Adoacien: —¿Icsamboendambi chuidio? ¿Atotsimbi icsa uaoque? En chui. Mambi abimbo chuiboc. ¿Abimbo chuiquidta cuespaid? —quepondash Esus. ²⁴ Adondash Esus Anasën abi cataniachochi Caipasën shubuno bëac.

Petedon: Èmbi isacmaid Esus nec, quequin chuioaid

(Mat 26.71-75; Mad 14.69-72; Duc 22.58-62)

²⁵ Adnubien Petedo abi cuëte cuëc tsadsho abëd tan cuëte cuëc tabadquidon: —Esusbëd icquidien mibi nechitec —capondash. Adoacien Petedo: —Padenquo. Mabi aibdëd icambo yoc —quepac caondash. ²⁶ Adshobien chuiquid dapan yua utsin Petedon pateshuneboedën matsesën: —Esus bedacnobimbi mibi ischitoc —caquien ²⁷ padpidec: —Padenquo. Mabi ano nidambo yoc. Èmbi isacmaidquo ma Esus neyoc —quenubien Esusën chuiboedquo cachina bënë cuëdampac caondash.

Pidato caidën shubuno Esus buanaid

(Mat 27.1-2; Mad 15.1-5; Duc 23.1-5)

²⁸ Adnubien Caipas aton chuiquid utsibobëd: –Nuquin matses yuaquido ancaquid Pidato caid ismenuembien Esus buantiad. Aid Esus unës uamenuembien natiad –quecuededpondash. Badiadnubi Pidaton shubuno Esus buampondash. Buanashic: –Matses utsin shubun puduedshun mishtemaïd mishash Nuquin Papan matamiampid inchësh tantiec con matsesbëd pec tabadiapimbo icchitowane –quiash Pidaton shubun puduedenquo icpondash. ²⁹ Adnubien Pidaton aton shubunuësh pduenttanquin Esus bëquido chuipondash. –¿Atotsi quequin nëid bëo? ¿Icsamboen naquidta nepec? –caquien ³⁰ –¿Bëdambo icquidatambi mibi ismenuen bëdio? Con matses chuiquid dapa ictiadquo icquin icsamboen naoshe. Cuidquiota –quepondash chieshëmënquido. ³¹ Adoaquien Pidaton: –Mimbi cuidta. Min matsesën: “Icsamboshë icquid naden cuidquid yendac,” cacpadomboen nata –caquien: –Padi. Ëmbi cuidquin unës uacsho isash min matses chieshtonoshe. Min matsesën: “Con matsesënuïdtsëqui unës uaquin cuidaquien bëdambo ictsiash,” queshun ëbitedi chieshënušhe –quepondash Esus chieshënquido Pidatombo Esus unës uametiadquo yec. ³² Ënden abi chieshënquidon bedabi icnuc: –Ëbi cuesten dectanquin unës uaindac –quequin Esusën chiapadomboen namenuc adpondash.

³³ Adnubien aton shubun pduedtanquin Pidaton Esus chuimeoapondash. –Cho. Chuinu. ¿Min matses isadaïdbo chuiquid dapada ne? –caquien ³⁴ Esusën: –¿Mitsipadquid chuiquid cai? ¿Utsibon tantiacpadquidta cai? ¿Mibipadquidta cai? –capondash. ³⁵ Adoaquien Pidaton: –¿Isadaïdbodabi nedï? Padenquo. Ëmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? –caquien ³⁶ Esusën Pidaton bëyuc chuiboed tantiaquin: –Mibipadquid chuiquid dapapenquo nebi. Nïdaïdën con yua sondado nibëdec. Nïdaïdënuësh mibipadquid icquin con yuabo ëbi bedquido cuesun siametsenombi. Aden ëbi bedenquo ictsenosh. Mibipadquidpenquo nebi. Abucshun chuiquid dapambo nebi –quepondash Esus.

³⁷ Adsho tantiašun Pidaton: –Chuiquid dapambo nebi ¿quecta ique? –caquien: –Ai, adquid nebi. Chuiquid dapambo icnuec matsespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiate bunquidon ëbi tantiašandac –quepondash Esus.

³⁸ Adsho tantiaš Pidato: –¿Tsuštsin matses uaquid quequin abimbo chuiPATSIASH? –quetanec pduenšun Esus chieshënquido chuiOapondash. –¿Icsambo icquidta Esus nedic? Ma icsapenquo icquid neyoc. ³⁹ Nëid cuidtiapimbo icquin chuinu. Nuquin Papan matamiampid inchësh tantiate ušhën min matses quënën nauedaïd abentsëc cuemedeniøndambi. Adembidi abentsëc cuemembi. ¿Mitsicquidimbi cueme? ¿Nëid mibi chuiquid dapa Esus-tambi cuemepe? –caquien: ⁴⁰ –Padenquo. Esus nainda. Utsibi cuemeta. Badabas caïd cuemeta –quecuededpondash. Badabas caïd Doma yacnoquido cuesun siaquin cuemete bunquidquo icnuc adcuededpondash Esus chieshënquido Esus unës uamete bunquiec.

19

Esus cueshcaïd

(*Mat 27.27-31; Mad 15.16-20*)

¹ –Badabasquo cuemeta –quesho tantiatanquin Pidaton: –Në Esus cueshcanuen buan –capondash. Adoaquien buanshun sondadon canite cuëshë dëdectanquin nacneïd cueshcanten Esus comapenen cueshcapac caondash. ² Cueshcatanquin pinchuc-pinchucpambo icquid mauete nacneïd Esus mauemepac caondash. Adotanquimbic chuiquid dapan dashcutebimboecquid umucquid dasiuintanquin: ³ –Adec dasiuidquid chuiquid dapamo nec –quequin sondadon Esus mamëšnumpac caondash. Aden mamëšnshunquimbi: –Isadaïdbo matses chuiquid dapambo Esus neque. Is –quetanquin mëdanten bëcuesbanepac caondash. Adotanquin Pidato yacnobidi buanoapac caondash.

Esus unës ua, quiaïd

(*Mat 27.15-26; Mad 15.6-15; Duc 23.13-25*)

⁴ Buanoacsho istanequien Pidato padpidec pduenoash Esus bëquido chiec: –Mimbi bëboed Esus icsapenquo iquec. Icsambo icquid icsho: “Unës uata,” catsiambi badedi. Icsapenquo icquid icsho adotiapimbo iquebi. Padi. Cueshcaquin cuidombique –quepondash Pidato. Adnubien ⁵ Esus pduempondash. Pinchuc-pinchucpambo icquid mauemetanquin dashcute umucquid dasiuinac dasiuidpamboec pduenšobien Pidaton: –Is. Mimbi bëboed choeque –cac ⁶ chosho istanequien: –Cuesten dectanquin unës uata. Cuesten dectanquin unës uata –quecuededpondash Esus chieshënquido comapenec cuëdec. Adoaquien Pidaton: –Mimbi cuesten dectanquin unës uatan. Ëmbimbo adotiapimbo iquebi. Icsapenquo icquid icsho Esus unës uatiapimbo iquebi –capondash Pidaton.

⁷ Adoaquien Esus chieshênquidon: —Con matsesên: “Nuquin Papa muauaquid unês uaquid yendac,” cacpadomboen natiadquio iquebi. Esusên: “Nuquin Papan Madombo nebi,” quequin Nuquin Papa muauaoshê. Unês uaquimbien ictiad —quepondash. ⁸ —“Nuquin Papan Madombo nebi,” quiosh —quesho tantiashien Pidato dacuêdquiec yampac caondash. ⁹ Adash aton shubun Esusbêdi puduedoashun Pidaton Esus chiuoapondash. —¿Tsutsimbo ne? ¿Mitsiuêshquio chonda? —caqui Esusên êcbedenquio icpondash.

¹⁰ Aden êcbedenquio yac nêishashien Pidato: —¿Chuitiapimboda ique? ¿Tantienquioda ique? Êmbi: “Cueme,” cac mibi cuemetsiash. Êmbi: “Cuesten dectanquin unês ua,” cac mibi adotsiashe. En chui —caquien Esus: ¹¹ —¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquio icquin mimbi êbi cuesten dectanquin unês uametiapimbo ictsiac. Êbi cuesten dectanquin unês uamenuc mibi icsambo icnuc êbi bêboedo chuiquid dapabo icsamboshê iquec —quepondash Esus.

¹² Adsho tantiashien Pidato: —Esus unês uatiapimbo icchitebi. Cuemetiadquio iquebi —quetanquin padpiden Esus chieshênquido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caid: “Êbentsêqui chuiquid dapambo nebi,” quiac caosh. Aid dêniaguec Esus chuiquid dapa icte bunquiec. Esus cuemequin mibi chuiquid dapambo mimbi nêishmeque. Esus cuesten dectanquin unês ua —quecuededpondash. ¹³ Adsho tantiashun Esus pudueoatanec cuênec nacnenaid abuc tsadunaidên cuidte chuineuc tsadten tsadtopondash Pidato. Aid cuênec nacnenaid con onqueten Cabata capondash. ¹⁴ Nuquin Papan matamiampid inchêsh tantiate ushê badiadash icnuc niondash. Aid tsadten tsadtoshon Pidaton: —Nê mibi chuiquid dapa iquec —capondash iccuededquido chuiquin. ¹⁵ Adoaquien: —Cuesten dectanquin unês ua. Nêbimbobi buanshun cuesten dectanquin unês ua —quecuededpondash Esus chieshênquido. Adoaquien: —¿Mibi chuiquid dapadambi cuesten dectanquin unês uape? —Pidaton caquien Esus chieshênquido: —Mibi chuiquid dapambo Sesad caid aiduidtsêqui chuiquid dapa caimbique. Esus cuesten dectanquin unês ua —quecuededpondash Esus chieshênquido. —Nuquin Papa yacnuêsh choshon nuqui yuaquido cuemepashun —queboedobi adondash abi yuaquidi chiequi.

¹⁶ Adoaquien Esus chieshênquidon chiacpadomboen: —Esus cuesten dectanquin unês uatan —capondash Pidaton aton sondado chuiquin.

*Cuesten dectanquin Esus unês uaid
(Mat 27.32-56; Mad 15.21-41; Duc 23.26-49)*

¹⁷ Adoac buanquin: —Nêidên dectanu —qeshun sondadon cueste daêd napotiaid Esus chiadtomebidampondash. Abi dectantebi Esus chiadtomebidanec nidquimbi macuêsh mapi canite caid yacno buampondash. Aid macuêsh mapi canite cain con onqueten Cocata capondash. ¹⁸ Ambo nidshun aton dashcute dachictanquin bêchun shuin mêtoccaquinc tatoccaquinc catanquin cueste daêd napotiaid ambi bêboedêmbi Esus dectampondash. Icsambo icquid daêdpambo cuesten dectanaid uquê diadbudcuenecc diadnuc Esusquio nênantanquio dectampondash.

¹⁹⁻²⁰ Adnubien Pidaton: —Nasaded yacnuêsh caniquid yec Esus isadaidbo chuiquid dapa nec —quequin cueste pada uaidên dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesên onqueten dada uaquinc catanquin Esus dectanaid cuesten dectampac caondash. —Êmbi dada uaboe isash: “Isadaidbo chuiquid dapa icsho Esus cuidac,” ma abitedi quenu —qeshun Pidaton adopac caondash. Aden dada uashun dectanaid isashien Esus chieshênquido nêishquiopac caondash. —Shubu dadpen icquid Edusaden caid anoentsêqui Esus dectanaid icnuc matses utsin onqueten-onquetenquien dada uaid matses dadpenshun isunshê —quias ²¹ Pidato chiec nidpac caondash. —Icsamboen chuiquin ma mimbi dada uapacoc. ¿Con matses chuiquid dapada Esus nedic? Adquidpenquio nec. Utsi uain dada uata. “‘Isadaidbo matses chuiquid dapa nebi,’ quequid Esus nec,” quequin cueste cuêshê utsin dada uata —caquien ²² —Padi. Mambi êmbi tantiaboedquio dada uaboc. Utsi uain dada uoatiapimbo iquebi —quepac caondash Pidato.

²³ Adnubien Esus dectanquido sondado daêd-daêdquiec icpondash. Esusên dashcute 5ted icsho sondadon bedbanquin abentse-abentsen bedbededpondash abentsêc abi icnuc. Aid abucshun bedanquin abichobi daêdcaid tuscabi icquid niondash. ²⁴ Adquid icsho isun: —Canchenquio icquin ¿tsundanquio bedequê? Isunna —qeshun abi cuêmêdquididi dada uabanshun têchun sandoshon cadotanequin dada uaidêmpi abia puduemaiad isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “‘Abentse-abentsen con dashcute bedosh. Con dashcute utsi bednu, quequin dada uaidêmpi abia puduemaiad isunen naosh,’ quependac,” quequin dada uapampic.

²⁵ Adnubien Esus dectanaid cuate tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi Mactada yacnuësh choquid. Aidedi chido icpondash. ²⁶ Në chido tabadnuc ambobi uquëtsëc tabadondabi. Adec ambi tantiaidquio ëbi icsho isun Esusën aniba chuipondash. —Nëid con mado cata, tita. Ma mibi bédamboen dayun uanu —capondash Esusën. ²⁷ Adshumbic ëbitsen chuiquin: —Con ta tita cata. Adshun bédamboen ëbi dayun uashunta —cac con shubunobi buanondambi bédamboen Esus dayun uashunuen.

²⁸ Adboshien unësquionoshi Esus: —Con Pan chiapadomboen nainembi. Matses tantiec ëbided cuidadec unësebi —quequin tantiec con tsusedpan dada uaquin chuipampicpadec: —Acte bundobi —quepondash Esus. ²⁹ Adsho tantiashun matsun acte mucambo icquid anidquid shapu-shapupactsëcquidën punshun cuate dēdectanshun abuc sananquin ëccuëscadonetsëcquin chishmepondash. ³⁰ Adoac acte mucambo icquid chishtanequien: —Con Pan chiapadomboen nainquiombi —quepondash. Adtanequi tēdquëdbudpondash Esus unësequi.

Esus uinte masiaid

³¹ Adnubien Esus chieshënquido: —Badiadash Nuquin Papan matamiampid inchësh tantiate ushë iquec. Chonoadenquio icte ushë nec. Aidën cuesten dectanquin unës uaid chococac icsambo ictsiashe. Nēbimbobi chococamenu —qeshun Pidato chuitampac caondash. —Baded nitde podquënquin unës uame. Inchësheque —cac ³² Pidaton aden chiac sondadon nitde podquëntanondash. Esusbēda dectanaid ëquë diadquidba nitde podquënshumbic utsiuc diadquidtsen. ³³ Adotanquin isquien Esus ënden unësac. Adshobien nitde podquënenquio icpondash.

³⁴ Adotanquimbic: —Unësabi icnushe —qeshun: —Unës uaquiobono —quetanquin sondadon cudan podo ansequin Esus uinte masepondash. Adoac nua intac chididiquiondash actebēdi. ³⁵ —Adosho ëmbimbo isondambi —caimbi. —Ëmbi dada uaid isun ma Esus tantianu —qeshun abimbo chuiquin dada uaombi nëid dada uaquin. ³⁶ Nuquin Papan tantiamiac con tsusedpan: “Canite podquënenquio iquendac,” quequin dada uapampicpadomboen canite podquënenquio icpondash Esus. ³⁷ Adembidi podo ansete dada uapampic. “Ambi podo anseboed isec tabadendac,” quequin dada uapampic.

Esus unësacsho chococaid

(Mat 27.57-61; Mad 15.42-47; Duc 23.50-56)

³⁸ Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshënquido dacuëdënquin: —Esus tantiaquid nebi —quequin utsibo chienquio icboedëmbi Pidato chuitampac caondash. —Esus chococanun buanendambi —cac: —Ai —cac Esus buampondash. ³⁹ Aidbēdi Nicodemo inchëshhën Esusbēd onquiondaid nidpac caondash. Bédambo nuadquid mida adoebēda cabiunaid unësaid dabiunte bēac caondash. Nuamboshë. Yuëmbo icnuc 35 quidostembi icnuc bēac caondash. ⁴⁰ Adshumbien Osebēdëmbi Esus nua dabiunquin uesquin dataniac caondash dashcuten. Adshumbic padpiden dabiunoaquin. Adshumbic padpiden dataneoaquin. Adshumbic padpiden dabiunoaquin. Adshumbic dataneoaquin. Chococanun con matsesën adoquid. ⁴¹⁻⁴² Adashic: —Badiadash Nuquin Papan matamiampid inchësh tantiate ushën unësaid chococac icsambo ictsiashe. Badedquio chococanu —qeshun tied nëbi ictsëcquidën Esus buampac caondash. Buanshumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bētimpac caondash cuënote dapambidi.

20

Esus uincuenaid

(Mat 28.1-10; Mad 16.1-8; Duc 24.1-12)

¹ Esus chococan daēdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bētinaiud cuënote dapa bēcunepamboen shëcniac. ² Cuënote dapa bēcunepamboen shëcniacsho istanec titinguianec choquin chuituidpondashi. —Esus padoen buanchitaccosh. ¿Mitsimbo buampash? —quepondash Madia Petedobēda ëbi chuituidec.

³ Adoquini: —Istanu —quianec ⁴ titinguianec chococacno Petedobēdi nidpondac. Petedo nianec ëbia nidpondabi. ⁵ Adshumbimbi puduedenquio icquin shëcuë anshuebudshun anispondac. Adshun isquien dashcute dataniaiduidtsëqui uec. ⁶ Aden ëmbi anisnubien Petedo choequi badedi shëcuën puduedpondash. Aidëntsen dashcute dataniaiduidtsëqui istuidondash. Esus nibēdondash. ⁷ Në dataniaid uenubi uidictsëc dashcutempi bēpucaid bédamboen shëbunaid uiondash. ⁸ Aid puduedsho istanec tsyuec puduedshun ëmbitsen

isondambi. Adash: —Uincuenac. Nuquin Papan Madombobi nec —quepondabi Petedobétsèqui onquec. ⁹—Nuquin Papan tantiamiac con tsusedpabon aden Esus uincuenta chuiquin dada uapampic —quequin tantienquoico boedi adondabi. ¹⁰ Aden istanec èbi ushboconobidi chiec choapondabi.

Esusèn Madia Mactada yacnocquid ismiaid
(Mad 16.9-11)

¹¹ Adnubien èbi chuiamboed Madia chococacnobidi isec nidoapac caondash. Nidash shècuè cuèmano tsadec sedenquetuidpac caondash. Adec shècuè cuèmano tsadec sedenquetanec shècuè anshuebudshun isaquien ¹² Nuquin Papan abi yacnoshon uaido mayan bèda daèd ushumbo icquid dasiuidquid Esus uebocono tabadpec. Esus nibèdec. Mapi icbocono abentsèc tsadnuc utsi taè icbocono tsadpac caondash. ¹³ Adshumbic aidèn: —¿Atotsi quiaish sedenque, champi? —caquien: —Con Icho pado ¿midambo buanac? Istiadquoiquebi. ¿Mitsimbo buampashba? Unèsquio iquec —quetanec ¹⁴ auchbidi nidnuec bidiadshun isquien Esusquio icpec. Utsi dansho ¹⁵ Esusèntsen: —¿Atotsi quiaish sedenque, champi? ¿Tsutsi nibène? —caquien Madian tied neshcaquid danquin: —¿Con Icho padoda buano? ¿Mitsimbo buano? Èbi isme. Shècuè utsin chococanun buanu —capac caondash Madian Esusquioibi chuiquimbi.

¹⁶ Abi adoshobien Esusèn: —Èbi nebi, Madia —cac bèisquotanequien: —Esus nec. Èbi chuiquidquio nec —quetanquin con onqueten cuènquin: —Dabi —capac caondash. Adotanquimbien Esus dayumbudpac caondash unèsquio icsho. ¹⁷ Aden abi dayumbudshobien Esusèn: —Èbi dayunenda. Padpidec nidenquoico icte danquin èbi dayunenda. Èmbi chuibocpadecon Pa yacno nidabi yuec-yuecpactsec tabadtanec nidebique. Èbèd ichoedo èmbi con utsibo caboedo èmbi chuibocpadecon chuitan. “Nuquin Papa yacno nidendabi, quiosh,” catan —quepac caondash Esus. ¹⁸ Adoquien èbi chiec Madia chopondash. —Nuquin Icho Esus isombi. Uincuenaccosh. Ambi chuibocpadecon chuinu. Tantia —quequin Esusèn abi chiaidquio chuituidpondashi Madian Mactada yacnocquidèn.

Uincuenashun Esusèn abèd icquido ismiaid
(Mat 28.16-20; Mad 16.14-18; Duc 24.36-49)

¹⁹ Madian aden chuituidboed inchèshbudtsèqui shubun tabadpondabi Esusbèd ichoedobèdi. Esus chieshènquido dacuèdènquin umanucuèsh utsi puduedtiapimbo icnuc bèdamboen bètashash tabadnubien shècuènuèsh puduedtiapimbo ichoedi nuntanquioibi Esus isadcuempondash. Adtanequien: —Dacuèdenda —quepondash. ²⁰ Adtanquin abi bèchun shuin mètoccaid abi podo ansiaidbèdta ismiaquini cuishonquiampondac: —Nuquin Icho uincuenac —quiaish. ²¹ Adec cuishonquesho isashien ambi chuibocpadeconbidi: —Dacuèdenda —quetanec: —Tantia. Mibi chuinu. Con Pan: “Matses chiec nid,” èbi caondacpadomboembidi: “Èbi chuibeneta,” mibi caimbi —quepondash Esus. ²² Adtanquin èbi chedo dabushcabampondash. Dabushcabanashic: —Nuquin Papan Mayan mibèd tabadendac. ²³ Mibèd icquien Nuquin Papan tantiaidquio tantiamequin Nuquin Papan Mayanèn mibi utsibo chuibamendac. Adoac mimbi aden chuibanaido caic: “Nuquin Papan chiaid niaquec icسامو ichoedi Esus tantiaquid yansho Nuquin Papan nèid bèdamboen isec,” quequin mimbi chiacpadomboen Nuquin Papan bèdamboen istsiash. Utsien: “Nuquin Papan chiaid niaquec icسامو icho nèid Nuquin Papan bèdamboen istiapimbo iquec,” quequin mimbi chiacpadomboembidi Nuquin Papan bèdamboen istiapimbo ictsiash —quepondash Esus èbi chedo chiec. Adtanequì isadenquoico yanoaondash.

Esusèn Tomas ismiaid

²⁴ Adec Esus isadenquoico yanoanubien Esusbèd ichoed utsi Tomas abi ushèmbi anin daèd tishaid chopondash. ²⁵ Choshobi: —Esus isombi —cac: —¿Aidquioibida nepash? Utsien nechitash. Bèchun shuin mètoccaid shècuè isun aid shècuè mèdanten bèmishquinc podo ansiaid bèmishquinc caquioshombimbi: “Ai, nuquin Icho uincuenac,” quequin tantiatiac. Padambobi: “Con Icbobien niash,” quetiapimbo iquebi —quepondash Tomas. ²⁶ Tomas adbon 7tedec ushach shubu nuntambidi tabadoapondabi. Tomas chedobèdi tabadondabi. Puduedtiapimbo icnuc padpiden bètashoash tabadnubien shècuè shècniabi Esus isadcuenoapondash. Adashic: —Dacuèdenda —queoapondash. ²⁷ Adtanequien: —Is con mèdante, Tomas. Shècuè bèmishhec cho. Nè podo ansiaid iqueque. Aidtsen bèmishhec cho. Adshun: “Uincuenabien icchitash,” queboedèmbi: “Uincuenaccosh,” quequin tantiatia —caquien ²⁸ mishenquoico yec badedi: —Tso. Con Icbombo ma mibi neyoc. Nuquin Papapadquidquioibidi ma mibi neyoc —quepondash Tomas. ²⁹ Adsho tantiasien Esus: —Èbi isun: “Nuquin Papapadquidquioibidi mibi nec,” quequin mimbi èbi tantiec. Utsibombien èbi isabi: “Ai, Esus Nuquin Papapadquidquioibiden nec,” quequin èbi tantiasho

Nuquin Papan bēdambo icmendac —quepondash Esus Tomas chiec. Adtanec isadenquo yanoapondash.

³⁰ Comapenen tantiaquidquo yec abembi uincuenash Esus adpondash. Ēnden unēsabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi. ³¹ Padi, aitededi chiombi. —“Nuquin Papan chomiaidquo yec Nuquin Papan Madombobien Esus nec,” quequin aid tantiash ma Nuquin Papa yacno abē tabadtequido icpanu —quequin aitededi dada uaombi.

21

Chian cuēmanuēsh Esus isadoaid

¹ Tantia. —Edusaden yacnuēsh isadboshic chian Tibedias caid cuēmanuēshtsen Esus isadpondash —quequin mibi chuinu. ² Esus uincuenash daēdec isadan con nidaid Cadidia caid yacno nidanepondabi. Nidanias nēidtedi tabadpondabi. Nēidic Petedo. Nēidic Tomas anin abi ushēmbi daēd tishaid ěmbi caboed. Nēidic Cana yacnoquid Natanaid. Nēidic ěbēdta tishaidquo. Nēidic ěbi. Nēidic Esusbēd icboed utsi daēd. Aitededi icpondabi. ³ Adnubien Petedo: —Ēmbi bedtenecpaden nēshaidēn nuēcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabēdtoanec nēnantan nidpondabi. Adshun nēshaid dapa nēneshun yuecshun cadoshon isac nibēdec. Adshumbic padpiden nēneoashun cadoshon isac nibēdoaic. Inchēshbudtsēc tauash nuēcquid bedambobi ambi badiadpondabi.

⁴ Badiadquionobi acte cuēman masi dapan Esus nidsho istuidpondambi. Utsiembi dampondac. ⁵ Adshobini Esusēn cuēmpondash. —Con utsibo ųtedtsi bedo? —cac: —Padambo. Nibēdosh —capondambi. ⁶ Adsho tantiashun: —Mimbi nēniauc nēnenquo icquin cano utsiuc nēshaid nēne. Adoac nuēcquid bedadec —cac ambi chiauc nēshaid nēnetanquin: —Indono —cac nēshaid indotiapimbo yuēmboshē icpondash. Nuēcquid dadpen bedac.

⁷ Adsho isumbimbi: —Ma Esus neyoc, Petedo. Nuquin Icho nec —capondac. Adoquien aton tsitsumi icquiduidtsēqui icnuc abi dachiquidboed aton dashcute utsi dasiuidtanec acte nēpudunash Petedo tan-tanidec nidpondash Esus isnuec. ⁸ Ēbien utsibobēd canombi tsyuec nidondac nēshaid shoyombanec. Cuēma anoentsēqui nuēcquid bedash 100 metedos cactiōntsēc nidondabi. ⁹ Tsyuec choash pudundoshon isquien pambēdi nuēcquid cuēten shēadtsec. ¹⁰ Adnubien Esusēn: —Mimbi bedboed daēdpactsēc beccho. Penu —cac ¹¹ Petedo: —Ai, bedtanu —quianec nidash cano anidtoashon nēshaid cubu-cubuctsēcquo icquid indopondash. Acte cuēmano tsindoshon isac dadpenquishē 153tedi nuēcquid icpondash. Nuanuaic tsadquido icpondash. Nēshaid tsēditiadtsēcquo icnuc indondambi.

¹²⁻¹³ Adshumbic ambi: —Pec cho —cac cho-choash tabadsho pamba menebantanquin nuēcquidtsen Esusēn menebampondashi. Adoac: —ųTsutsi ne? —quenquo icquin: —Esus nec. Comapenen tantiaquin nuēcquid nuqui bedmish —quequin tantiondambi ěbitedishun. ¹⁴ Adec uincuenash shubu nuntan tabadnuc daēdec isadondashic chian cuēmanuēshtsen isadoapondash Esus.

Esusēn Petedo chiaid

¹⁵ Aden chian dapa cuēmashun Esusbēdtan piondambi. Adshumbic Onas caidēn mado Petedo Esusēn chuipondash. —Tantia. Mibi chuinu, Petedo. Nēidon ěbi bēdiactsēc tantianuc ųada ěbi tantiaquie? —caquien: —Ai, mibi tantiembi. Aden ěmbi tantiaid mimbi tantiec —quepondash Petedo. Adsho tantiash: —Ēbi tantiaquin con obecabimboecquido ěbi dayun uashunta —quepondash Esus. —Obeca icbon aton yua dayun uacimbioen ěbi tantiaquido ěbi dayun uashunquin ěmbi chiaidbēdta ěmbi naidtedi chuibanta —quequin tantiec adpondash. ¹⁶ Adshumbic padpiden: —ųAda ěbi tantiaquie, Petedo? —cac: —Ai, mambi mibi tantieyoc —quesho tantiashien padpidec: —Ēbi tantiaquin con obecabimboecquido ěbi dayun uashunta —queoapondash Esus. ¹⁷ Aden daēden chuishumbic padpiden Esusēn: —ųAda ěbi tantiaquie, Petedo? —cac shubiantiadtsēcquo yanondash Petedo. —Unēs uabi icnuc: “Ēmbi isacmaid Esus nec,” quequin ěmbi chuiboctedembidi Esusēn chiebi —quiash shubiantiadtsēcquo yanondash. Adashic: —Mibi con Icho nec. Ma mimbi abitedimbo tantieyoc. “Petedon ěbi tantiaquie,” quequin ma mimbi tantieyoc —quepondash Petedo. Adsho tantiash Esus padpidec: —Ēbi tantiaquin con obecabimboecquido ěbi dayun uashunta —queoapondash Esus.

¹⁸ Adashic Petedobidi chuioaic: —Tantia. Utsien chuinu. Cania yec mibibi tsisiuidondac. Adanec mibi bunacno mibi nidtedniondac. Tsusiobudtsacshoen tsiumeshun utsibon ěquē mēdimbudcuentsēcshun mibi nidte bunacnanombo mibi buanendac —quepondash Esus. ¹⁹ —Aden mimbitsen Nuquin Papan chiacpadomboenuidi nabansho ěbi chieshēnquidon

mibi unès uaindac –quequin tantiec adpondash Esus. Adashic: –Ènenquoio icquin èbi tantiaata –quetanquimbic: –Cho. Nidnu –cac èbitedi puduanec nidondabi.

²⁰ Tsyuec nidshobini Petedon bidadquin ispondash. Adshumbic: –Nèid Esusèn tanti-aidquoio nec. Esus bedmiaid inchèshèn Esus aton cachoctséqui uesho aidèn: “¿Tsutsi cao, Icho?” capondash. ²¹ ¿Mitsipadec aid unèspatsiash? –qeshun: –Ma nèid. ¿Mitsipadec unèspec? –capondash Petedon èbi unèste Esus chuimequin. ²² Adoaquien Esus: –Èbi bunacpadequi aidi unèsendac. “Èbi Nuquin Papa yacnuèsh choabi yacpadec ma unèsenquoio icnu,” èbi quiacpadec unèsenquoio ictsiash. Adecbidi: “Èbi choabi icnuc ma unèspanu,” èbi quiacpadec unèstsiash. “Nadec unèsendac,” quequin mibi chienquoio iquembique. Ènenquoio icquin èbi tantiaata –quepondash Esus. ²³ Adec: –Unèsenquoio ictsiash –Esus qesho tantiaash èbi caic: –Esusèn tantiaidquoio yec Uan unèsenquoio iquendac –quecuededpondash Esus tantiaquido. ¿Adenda Esusèn chuidiondash? Ma padenquoio iccondac. –Èbi bunacpadequi aidi unèsendac. “Èbi Nuquin Papa yacnuèsh choabi yacpadec ma unèsenquoio icnu,” èbi quiacpadequien unèsenquoio ictsiash. “Adecbidi èbi choabi icnuc ma unèsnu,” èbi quiacpadec unèstsiash –quequien iccondash.

²⁴ Aden Esusèn nabanondaid ènquin chiombi. Èmbi isondaidquoio chuiquin abimbo chuiquin aidtedi dada uaombi. ²⁵ Esusèn naidtedimbo chuiquin dada uambo iccombi. Èmbi tantiaidtedi naombi. Ambi naidtedimbo ambi chuibanaidtedimbo chuiquin dada uaqin dada uate dadpenquioshè naimbudnetsiambi. Padi. Aidtedi dada uaombi.

ESUS CHUIBENEQUIDON NAID

Esus aton Papan abuc indote

¹⁻² Ducas nebi. Mibi Esus tantiamenu, quequin ênden dada uaondambi, Teyopido. Esusên tauain ismebanaid bedanquin abi abuc indoaid dênainquin dada uaondambi. Abuc nidnun Esusên êbi chuibeneta quequin abêd icquido chuipanêdash aton Mayanên tantianubi. ³ Cuesten dectanac unêsash uincuenshun: “Uincuenobique. Is,” quequin Esusên utsi-utsien ismebampanêdash ma abimbo iquec quequin tantiaquin êbi chuibenepanueshun. Ushê abentsêc nidmequin utsi choaid abi choaqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusên chuided-chuidedpanêdash. ⁴ Aden ismequimbi Edusaden caid yacnoshon ambi êbi chuibeneta caidobêdan pec tabadquimbi Esusên nadopanêdash: —Edusaden yacno tabadquin êmbi chianeboed, con Mayan, Nuquin Papan mibi menetequid caimbudta. ⁵ Acten mentoanquid Uan pado icpondash. Padnuen êmbi chianeboed Nuquin Papan aton Mayan mibitedi menendac —quepanêdash Esus.

⁶ Adshumbic, padpidec Esusbêd icquin abêd icquidon: —Yuen matses utsibon namiaido nuquin matses nec. ⁷ Nêbimbobida mibi nuquin matses chuiquid dapa icepeque? Tantiyanu. Chui —capanêdash Esus chuiquin. ⁷ Adoaquien: —Nuquin matses chuiquid icmete ushê choaid tantiesa mibi nec. Nuquin Papanuidtsêqui tantiacpadên adquid iquendac —quepanêdash Esus abêd icquido chiec. ⁸ Aden chuishumbic: —Aton Mayan Nuquin Papan meniac aidênquio tantiamequin pausunac êbi chuibenequidquio mibi iquendac. Edusaden caid yacnoshomba mimbi êbi chuibanendac. Adshumbic, nidaid Udeya caid yacnoshontsen êbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi êbi chuibanendac —quepanêdash Esus abêd icquido chiec.

⁹ Aden chuibanquin Esusên nabanquin nainanec macuêsh yacno choacsho aton Papan Esus abuc indopanêdash abêd icquidobêdan abi tantiaquid utsibon isbedednubi. Aden isec tabadnubi abu ushun Esus bêtimpanêdash.

¹⁰ Adec Esusbêd chobedo isec tabadnubien dashcute ushumbocquid dasiuidquid daêd choash tabadec: ¹¹ —Nidaid Cadidia caid yacnoêsh choquido, *çatotsi* quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanêdash ushumbocquid dasiuidquid abuc isbededquido chiec.

Matias Esus chuibeneta quequin iccuededquidon chiaid

¹² Aden Esus abuc indosho isash abêd macuêsh Odibos caid yacno chobedo Edusaden caid yacno nidoapanêdash. Chonoadtemaid ushê nec, quec aidtointsêqui capunêdash. Aido Edusaden yacno choash abuc quênê yacno abi tabadbocno dectatoash tabadoapanêdash.

¹³ Aid quênê nuntan Esusên êbi chuibeneta caido nêidted icpanêdash: nêidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuêmêdquid, utsibic isadaidpembo namequin chuiquid bunesa, Simon cuêmêdquid, utsibic Acobo utsin mado Udas cuêmêdquid. Aidedi Esusên êbi chuibeneta caido aid quênê nuntan tabadnubi ¹⁴ utsibo Esusên tita yec Esus tantiaquid chido utsibotedi yec Esusên utsibo yec quec ambobidi iccuededquin Nuquin Papa chiec abentsêc onquiabimboec onquecuededpanêdash.

¹⁵ Adashic Esus tantiaquid 120ted iccuedednubi nênantanquio nidtoshon Esusên êbi chuibeneta caid abentsêcshun Petedon naden chuipanêdash: ¹⁶⁻¹⁷ —Udas pado chuibanu. Tantiata. Esusbêd icquin piucquid dayun uaquid icquimbi Esus chieshênquido Udasên Esus bedmepondash. ¹⁸ Aden Esus bedmeshun ambi piucquid bedboed menequin aton tiedêmpi bedashic aid tied nantanuêsh têtaniadash pobidîsquish paêdec aton pucu tishidpac caondash. ¹⁹ Pucu tishidec intac chiuidaid tied icsho tantiaquin Edusaden yacnocquidtedishun Aquedama cain aton onqueten cuêmbededpondash. ²⁰ Adembidi êdenquimboshê Udas pado tishabicnuc chuiquin Nuquin Papan Mayanên tantiamiacpadomboen tsusedpa Dabid caidên Udas cuidte tantiec cuêdênte Sadmo caid naden dada uapampic:

“Ma adequi aton shubu mosadpanuna ma aibidi aton matses nibêdquid shubu icpanuna.” Aden Udas pado cuidte chuiquin cuêdênte Sadmo caid utsitsen naden Dabid Padon dada uaoapampic:

“Aidên icsain nacpaden tanenquiocquin ma utsin bêdamboen napanuna,”

quequin Dabid padon dada uapampic —quepanêdash Petedo. ²¹ Aden chiashic abi onquec: —Udas pado nibêdnuc Esus chuibeneta quequin abentsêc nuquitedishun chuinuna. Nêid quênê nuntan nuquibêd capuquido dada dadpen iquec. Nuqui Esus chuibeneta caid

nadquid ictiad. Chuinu. Tantia. ²² Esus Uan padon acten mentosho isash niamēdenquio yec Esusbēd capucueneshun Esus indosho isquidquio icsho, Esus chuibeneta, quequin nuqui chuitiad. Adoac Esusēn ēbi chuibeneta caidobēdtan Esus uincuemiaid chuibantiad –quepanēdash Petedo iccuededquido chiec.

²³ Aden Petedon chuibanac daēd istuidash Petedobēd iccuededquido, Petedon chuibocpadquid nēid daēd iquec, quequin chuipanēdash aidon. Ambī istuidaid abentsēc Ose cashun Badsabas cashumbic Ustus, quequin cuēnaid nepanēdash. Utsibic, Matias cuēmēdquid icpanēdash. Nēid daēd Petedon chuibocpadquid nec, quesho tantiashun: –Nēnantanquio tabadec cho –cac abi daēdi choash tabadsho isash ²⁴ Nuquin Papa chiec naded iccuedquido onquepanēdash: –Nēnantanquio chomeboed nēid daēd iqueque. Is, Papa. ¿Mitsicquidimbi Esus chuibeneta, cape? Ēbitedi tantieme, Papa. ²⁵ Udas pado tauitidpambo chian anēdēnquiacno nidboedēn nauidaid namenu, quequin mimbi bēdamboen isaid abentsēc ēbi isme. Papa. Aden mimbi ismiac ma aidēntsen Esus chuibenepanuna –quepanēdash Nuquin Papa chiec. ²⁶ Aden chuitanquimbic aid daēd abi cuēmēdquid abentseabentsen dada uatempin dada uashumbic tēchun sandoshon cadotaniac dada uatempī abia puduenaid istanquin, Matias cuēmēdquid nec, quequin isbededboshic, Esusēn ēbi chuibeneta caido onseted icboedi nēbi Matiasbēd doseted yanosh, quequin chuibededpanēdash nuntan iccuededquidtedishumbi.

2

Aton Mayan Esus tantiaquidtedi menebanaid

¹ Adashic isadaidbon ambi aton tiedēn caniquid abia ēshēaid bedaid tantiaid ushē chotsēcnubi Esus tantiaquidtedi shubunuēshi iccuededoapanēdash. ² Ambo iccuededquimbi badedquio shubu nuntan cunquequid dapa choec natiambo cunquiacbimboecsho abitedishun isbededpanēdash. ³ Aden aid isbedednubi cuēte dētsisidacimbocquid budec mais-maisec Nuquin Papan Mayan matsadtocuededpanēdash abi isquidtedi. ⁴ Nuquin Papan ma aidobēd tabadnueshun aton Mayan Esus tantiaquidtedi menebanac matses utsi-utsiec onquetenquio onquecuededpanēdash ambi matsadtomiaidotedi.

⁵ Aden Nuquin Papan aton Mayan menenubien isadaidbo utsibo Edusaden yacno chochoash dadpen tabadpanēdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoēsh Edusaden yacno cho-chopanēdash. ⁶ Ambo chochoash tabadnubi Nuquin Papan aton Mayan meniaid-meniaidquiec nēmbobi choquidon onqueten-onquetenquiec onquesho tantiash nēbi cho-choboedo utsi-utsiec: ⁷ –jPadtec! Dacuēdanquiopaic. Ēbipadquiecshenda onquepec. ¿Onquequidotedi nidaid Cadidia yacnocquidoda nepec? ⁸ ¿Mitsipaden con onquete bedash onquecuededpec nec? ⁹ Ēbitedi nidaid utsi-utsiec yacnoēsh cho-choquido nebi. Padtia yacnoēsh choquido; utsibic, Media yacnoēsh choquido; utsibic, Edan yacnoēsh choquido; utsibic, Mesopotamia yacnoēsh choquido; utsibic, Udeya yacnoēsh choquido; utsibic, Capadosia yacnoēsh choquido; utsibic, Ponto yacnoēsh choquido; utsibic, Asia yacnoēsh choquido; ¹⁰⁻¹¹ utsibic, Pidiquia yacnoēsh choquido; utsibic, Pampidia yacnoēsh choquido; utsibic, Equipito yacnoēsh choquido; utsibic, Dibia Sidene uidictēcūēsh choquido; utsibic, shubu dadpen icquid Doma caid yacnoēsh choquido; utsibic, acte nēnantan nidaid nacdēquid Quideta caid yacnoēsh choquido; utsibic, Adabia caid yacnoēsh choquido. Isadaidbobēd isadaidbopadquio icnuequido Edusaden caid yacno tsusedpabon chiampicpaden nanuec cho-choboedo ēbitedi nebi. Ēbibimboec onquequidtedishun Nuquin Papan naid chuibansho tantiemi. ¹² ¿Mitsipaden tantiaquin oncamiaquien adec onquepec? –quepanēdash Edusaden yacno cho-choquid.

¹³ Adnubien: –¿Bēdamboec onquepequida onquec? Paēmboquid cubudquin acshun tantienquiocquido nepanui –queoapanēdash utsibo.

Iccuededquido Petedon chuibanaid

¹⁴ Adec onquesho tantiashun Esusēn ēbi chuibeneta caido cho-choquin Petedon nido-tonshon tantiamenu quequin naden cho-choboedo comapenec onquequin chuipanēdash: –Mimbi icsamboen tantiaid chiembique. Tantiata. ¹⁵ Ushē abuctotsēc nubi ēbitedishun paēmboquid acamboccombi. ¹⁶ Utsin-utsinqueic onqueten onquesho mimbi tantiaid Nuquin Papan ēndenquimboshē chiampicpadec onquec nebi. Tsusedpa Oedēmbi Nuquin Papan ma matsesbēd tabadnueshun aton Mayan menenun chiaid naden aidēn dada uampic:

¹⁷ Nēid nidaid naimbudnubi

Con Mayan matses utsi-utsien menendambi.

Aidon madobobēdan aidon champibontsen ěmbi yuecquio icshun nanun chiaid chuibanendac.

Adembidi caniabontsen ushquin ěmbi chiacpaden isendac.

Adembidi tsusiobontsen ushquin ěmbi chiacpaden isendac.

¹⁸ Aden con Mayan meniac ambi tantiacpadomboembidi ěmbi chuiquin namiaidon dadan chidobēdan

ěmbi yuecquio icshun nanun chiaidquiobidi chuibanoaindac.

¹⁹ Adembidi, con Mayanēn tantiamiac ěmbi yuecquio icshun nanun chiaid matsesēn chuibanubien abucuēsh uinsadpamboctequid icnubi

nidaidēnshun ismete intacimboctequidbēdtabi nēdēnquetequid cuēte pushudquidimbocctequid abembi pushudquidbēdta adquidtedi mibi ismendambi.

²⁰ Adquid icnubi badiadēn ushē chēnquenquiocnoc

inchēshacimboctequid inchēshēn ushē piu-piupambo yec intacimboecsho mimbi isbedendac.

Ěmbi ismiaidtedi icambi matses cuidte ushē choendac.

²¹ Ismequimbi con Icbombo nec ěbi caquidquio mēnchiqendambi,

quequin Nuquin Papan chuimiapaden Oedēn dada uapampic.

²² “Adembidi Nuquin Papan chomiaid icquid, Tantiata, isadaidbo. Nasaded caid yacnoēsh choquid, Esus, Nuquin Papan chomiaid icquin nadatiambocquin nabanquin ismebansho mimbi isondac. ²³ Aidi Nuquin Papan tantiampicpaden Esus bedshun mimbi isadaidpembo chuiquid menequin, Unēs uata, cac cuesten dectanquin Esus unēs uapanēdash. ²⁴ Aden mimbi nac unēsacsho icsaisa chococacno yuec ictiapimbo iquec, qeshun Nuquin Papan Esus uincuemepanēdash. ²⁵ Adembidi ěndenquimboshē tsusedpa

Dabid padon Esus chuibanquin naden dada uapampic:

‘Con Icbo abuc nidac bēyucanquid ěbēd tsadacimboecsho isec nebi.

Aidi con dayun tsadquid icsho isquin natiaic cametequid dacuēdēnquio iquendambi.

²⁶⁻²⁷ Aid unēsash uincuenta tantiec ěbitsen uincuenendabi, Papa, quec cuēdēnec bēdambo iquebi.

²⁸ Nuquin Papa yacno tabadacpadec nidaidēn tabadquin ismiac

mibi yacno nidash mibēdi tabadec bēdamboshē iquebi mimbi camiaid iquendabi,’

quequin Esus tantiaquin Dabid padon dada uapampic.

²⁹ “Adomboen tantiaquin dada uash Dabid unēsacsho chococapampid nēbi shēcuē iquec.

³⁰ Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshē yash mibi ěndenquimbo unēsampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. ³¹ Aden Nuquin Papan nanun chiaid tantiaquin Esus uincuenta isacimboen dada uaqin, Nuquin Papan Chomiaid unēsacsho chococaqui aton nami chodquenquio yec uincuenendac, quequin chuipampic Dabid padon. ³² Ai, Dabid padon chiampicpadembi Nuquin Papan Esus uincuemepanēdash. Aid uincuemiacsho isondaic icquin mibitedi chuibanec nebi. ³³ Aid uincuenash Nuquin Papan dayunquio tabadendac nēbi. Ambo choacsho matses tantiaquin Nuquin Papan Mayan ma aiddēd tabadneshun matses mimbi meneta, aton Papan capaden abi tantiaquidtedi menebanquiac onquete utsin-utsinquec onquesho nēbi mibitedishun tantiec. ³⁴ Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquio icshun nanun chiaid naden Dabid padon chuibampampic:

‘Nuquin Papa Icbo Dapa icquin abipadquid icbo cain: Nēbi ěbēdi tsadec cho.

³⁵ Mibi chieshēnquido dēniacquidquio mibi icmenun nabono. Chiata,’

quequin Nuquin Papan nanun chiaid Dabid padon dada uapampic.

³⁶ “Aden tantiaquin Dabid padon chuipampid Esus mimbi cuesten dectanquin unēs uaid uincuemequin matses icsaid bedshunash abided cuidadquid Nuquin Papan icmepondash. Adoac ěmbi chiaid abimbo iqueque. Esus tantiaquidquio icta, isadaidbo –quepanēdash Petedo.

³⁷ Aden Petedon chuisho tantiaish iccuededquido abi icsaid tantiec unēsquio yec: – Esus tantianuequin žatotsi nuqui nape? –quepanēdash utsi-utsiec Petedobēdta Esusēn ěbi chuibeneta caid utsibo chiec.

³⁸ Adoquien Petedo: –Mibi icsaid ěnshun, Esus con Icbombo nec, quequin abimbo tantiaquin acten mentometa ma ěbi icsaid Nuquin Papa bēpiscudnu qeshun. Adoacsho aton Mayan mibi menendac. ³⁹ Adembidi tantiaisho isun min tsyuecquidtsen menendac. Adembidi nidaidtedi yacnocquidēn tantiaisho isun aton Mayan meneoaindac ambi chiampicpaden –quepanēdash Petedo Esus isquidquio.

⁴⁰ Aden chuibanec: –Mimbi icsamboen tantiaid ěnta. Aden ěnash Esus tantiaquidquio icta –quequin chuibudquin Petedon ěmpañēdash.

⁴¹ Aden chuisho tantiash, Tantiaquiemi, quepanēdash utsi-utiec. Aid ushēmbi dadpen-quioshē tedes midted Esus tantiaquid yampanēdash. Adquid icsho isun acten mentobampanēdash.

Esus tantiaquido iccuededaid

⁴² Adashic, Esus tantiemi, queboedo tantiabenabi iquec Esusēn ēbi chuibeneta caidon Esus chuibansho tantiec tabadequi Nuquin Papa chiec onquedenepanēdash. ⁴³ Adec tabadcuededsho isash: —¡Padtembo! Dacuēdampambo iquec —quec utsibo tabadpanēdash. Adnubien Esusēn ēbi chuibeneta caidon nadatiambocquin nabampanēdash. ⁴⁴ Adnubien Nuquin Papan aton Mayan meniaidtedi tabadcuenequi, Con na nec, quenquicoquin aton na cudasenquicopanēdash. ⁴⁵ Aton na menequin piucquid bedshun utsin na nibēdsho isun menepanēdash. ⁴⁶ Adecbidi badiadquidēn-badiadquidēnquiec Nuquin Papa tabadte shubu uashunaid yacno nidash iccuededpanēdash. Adecbidi shubu utsi-utiec yacno nidash iccuededquin Esus unēsaid tantiaquin panēmpi cuēsh-cuēshun peded-pededpanēdash. Adem-bidi bundoshon pebededoapanēdash. Adobanequi ēbi icsaid bedshunash Esus cuidadaid tantiec bēdambo iquebi, quec ⁴⁷ Nuquin Papan naid chiec cuēdēncuededpanēdash. Adec tabadsho isash, Bēdamboquido nec, quec utsibotsen Esus tantiaquid yanash abi tantiaquid utsitedibēd iccuededpanēdash.

3

Caputiapimbo icquid bēdamiaid

¹ Adnubien abi nidteniapadēn ushē budec 3 yanuc Petedo Uambēd Nuquin Papa tabadte shubu uashunaid yacno Nuquin Papa chiec nidpanēdash. ² Ambo nidnubien caputiapim-bocquid aid shubu shēcuē Bēdaidquio caid yacno utsibon buampanēdash. Anin tishacchobi yec caputiapim-bocquid icpanēdash. Aidi badiadquidēn-badiadquidēnquien buandenequin aid shēcuē cuēmano nanded-nandedac uequimbi cho-chosho isun: —¿Adabi piucquid menetsia? —cabampanēdash. ³ Ambo Petedobēd Uan chosho isquin: —¿Adabi piucquid menetsia? —capanēdash caputiapim-bocquidēn uequin.

⁴ Adoquien Uambēd niduntidash nidquin Petedon: —Ēbi daēdi is —capanēdash caputiapim-bocquid bēisquin. ⁵ Adoquien, Ēbi menepashun, quequin abi daēdi isobien, ⁶ Petedon: —Piucquid con na nibēdec. Emi tantiadēn ēbi tantiamebocpaden naimbique. Nasaded yacno iccondaidēn Esusēn bēdamiacpadec bēdanash nidtoash nidec nid —capanēdash. ⁷ Aden chuiquin caputiapim-bocquidēn mēdante abiucquo bedtanquin Petedon nidtomiac bad-edquo nidtopanēdash caputiapim-bocquid. ⁸ Bēdambo yec nidtoash capupanēdash. Adec bēdanash Petedobēd Uan chedobēd capuashic Nuquin Papa tabadte shubu uashunaidēn puduedash, Nuquin Papan bēdamioshi, quec pudundotan-pudundotanec: —Cuishon —quepanēdash. ⁹ Adec capusho isquidon nadobededpanēdash: ¹⁰ —Nuquin Papa tabadte shubu uashunaid shēcuē, Bēdaidquio caid yacno uetsequi, Piucquid ēbi menepashun, queboedi capueque. En is. ¡Adpaide. Is! Tantiadempamboctequid nec —quequin isbededpanēdash.

¹¹ Adec capuequi Petedobēda Uan mēdinec Sadomonēn tacpan quēnē uabicquid yacno puduednubien iccuededquid tsibanash anotsen tantiadempambo yec tabadoapanēdash. ¹² Adec tabadsho isun Petedon naden chuibampanēdash: —¿Atotsi quiash padtec quequin ēbi daēdi comapenen bēise? ¿Ēbi daēdshun nacta nēid capupadic? ¿Ēbi bēdamboquid icquindambi nadio? Padenquio. Nuquin tsusedpabon Papa caidēn bēdamiaid nec. ¹³ Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidēmbi ambi nidaidēn chomiaid Esus nēbi aton Papabēd tabadoaic. Aton Papa yacno nidoabicsho Esus bedshun Pidato meniaquien, Nēid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unēs uaquimbien ictiad, quequin mibitedishun chuipondac. ¹⁴ Icsaisa nec, quequin utsin isnubi Esus bunenquicoquin icsaquid cuidenquicoquin nidme, quequin mimbī chuipondac. ¹⁵ Abia uincuentequid mibi chuiquid dapa mimbī unēs uacshobien Nuquin Papan aidi uincuempondash. Aid uincuenacsho ēbitedishun isondambi. ¹⁶ Esusēn ēbi bēdamepec, quequin tantiash nēid taē icsachodēn Esus tantiash capusho mibitedishun isec.

¹⁷ “Utsibo, Nuquin Papan chomiaid nec, quequin tantienquicoquin mibi chuiquidobēdan mimbī Esus unēs uamiondac. ¹⁸ Ēmbi matses chuiquid dapa icmenu caid matsesēn mēyanaid iquendac, quequin ambi chuimiaidtedi Nuquin Papan dada uami-ampicpaden mimbī naondac. ¹⁹ Nēbi mimbī icsamboen tantiad ēnquin Nuquin Papa tantiata ma mibi icsaid bēpiscudpanuna; adecbidi ma abēdi tabadebi, quequin tantiec mibi bēdambo icpanuna; ²⁰ adecbidi ma ambi chuiquid dapa icmiaid Esus mibi bedmenuen

chomepanuna. ²¹ Nuquin Papan abitedi icsaisa icmete ushë choabicnuc ambi chiampic-padequi nëbi Esus abuc aton Papabëd tabadec. ²² Adembidi chuiquin Moisesën dada uampid nad iqueque. Tantiata:

‘Chuiquid Dapa ëbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bëdamboen nabanta.

²³ Ambì chiaid tantiesà Nuquin Papan nësecaindac, quequin Moisesën dada uampic.

²⁴ ‘Adomboembidi Samuedën chuibampampic. Adomboembidi Nuquin Papan chuimi-aid utsibon chuibanoampic. ²⁵ Nuquin Papan chuimiaidon tsyuecquido mibitedi nec. Tsusedpa Abadauanën tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuoiaid mibitedi nec. Naden Abadauan Nuquin Papan chuipampic:

‘Mibi ëndenquimbo unësampin aton matsesbëdta matses utsi-utsien min tsyuecquidën bëdambo icmendac.’ ²⁶ Nuquin Papan Abadauan chiampicpadec aton tsyuecquid choacsho mimbi unës uapondac. Aidi Nuquin Papan uincuemiac ma isadaidbomba abi icsaid ënsho ma ambi bëdambo icmiaid icpanuna –quepanëdash Petedobëd Uan.

4

Ambi naid Petedobëdta Uan isadaidbo tsusiobon chuibamiaid

¹ Aden Petedobëdta Uanën chuibanubien isadaidbo tsusiobo cho-chopanëdash. Utsi-utsiec Nuquin Papa tabadte shubu uashunaid yacno cho-choquid bëdamboen tabadmequidquid icnubi utsi-utsiec saduseyobo icpanëdash. ² Esus unës uacsho Nuquin Papan uincuemiacpadembi matsessten unësacsho uincuemioaindac, quequin Esus chuibenequidon chuibanubi choapanëdash aid. ³ Choshon Petedo Uambëdta bedash: –Inchësheque. Badiadshun nëidën chiaid tantianush nidnu. Nid –quianec puduanquimbi Petedobëdta Uan quënen nauedmeapanëdash isadaidbo tsusiobon. ⁴ Aid daëdi bedabicnuc Petedobëdta Uanën chuibansho tantiaquido Esus tantiaquid dada dadpen sinco midted yampanëdash.

⁵ Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoësh iccuededpanëdash. ⁶ Nèidtedi icpanëdash: ancanquid dapa daëd Anasbëdi Caipas icpanëdash. Nèidic aton shubun icquido abipadquido: nëidic Uan, utsibic Adecandedo, aidtedi cho-choash iccuededpanëdash. ⁷ Iccuededshumbic Petedobëdta Uan bëmehshun nënantanquo nidtomeshun: –¿Tsutsi chuiquin caputiapimbocquid bëdamio? –capanëdash tsusiobon.

⁸ Adoquien Petedo Nuquin Papan Mayanën comapenen tantiamiac nadpanëdash: ⁹ –Caputiapimbocquid tantiaquin bëdamiaid isec ¿mitsipaden nao, quecta mibitedi tabadpe? Ancanquidbëdtabi chuiquid utsibo isadaidbo utsibo mibitedi chiembique. Tantiata. ¹⁰ Caputiapimbocquid Esuquidistu Nasaded yacno iccondaidën bëdamiaid niosh. Mimbi unës uacsho Nuquin Papan uincuemiaidën nac nëid caputiapimbocboedi nëbi nidtoash capusho mimbi isec. ¹¹ Aid bëdamequid mimbi tantienquid yaid Nuquin Papa yacno yuedanquid nec. ¹² Nuquin Papa yacno yuedanquid utsi nibëdec. Nuquin Papa yacno tabadte bunec aid tantiaquid icta –quepanëdash Petedobëd Uan.

¹³ Adec Petedobëd Uan dacuëdenquio yec comapenec onquesho tantiash tsusiobo: –Aid daëdi tsusiopenquio iquequi adecbidi Nuquin Papan chiampid tantiabenabicquid iquequi Esusbëd icquid aid daëd icquin ¿mitsipadomboen caputiapimbocquid bëdamepashba? –quec tantiadempambo yec tsusiobo tabadpanëdash. ¹⁴ Aden ambi bëdameboed aibbëdi icsho isash, Icsamboen mimbi naoc, quetiapimbo tsusiobo tabadpanëdash. ¹⁵ Adshun Petedo Uambëdta nidmiash, Tantiuan, quec onquecuededec tsusiobo: ¹⁶ –¿Mitsipadomboen aid daëd nuqui napeba? Nadatiambocquin nasho Edusaden yacnocquidtedishun isbededpash. Ad icnuc, Caputiapimbocquid bëdanambo iquec, ëbitedi quetiapimbo iquebi. ¹⁷ Dadpenshun tantianushe queshun, Esus padpiden chuibanoainda, quequin aid daëdi chuina –quecuededpanëdash tsusiobo. ¹⁸ Adshun Petedobëdta Uan chomeoashun: –Padpiden Esus chuibanoainda. Aidën chiaid chuiquin tantiamenda –capanëdash tsusiobon.

¹⁹ Adoquien: –¿Mitsicquidën chiaid ëmbi natequid icpec? ¿Nuquin Papan chiaid niacquindambi mimbi chiapaden nadi? ²⁰ Nuqui isboed nuqui tantiaboedbidi chuitequidquid iquendac –quepanëdash Petedo.

²¹⁻²² Adoquien: –Èmbi chiapaden nainquiocsho isun mibi daëdi mëyantsiambique. Baded nid cueschitomane –capanëdash tsusiobon. Abi tishaid seta 40ted icquid caputiapimbocsho bëdameapanëdash. Aid Nuquin Papan bëdamiacsho isash utsibo cuëdëncuededpanëdash. Adsho tantiash Petedobëdta Uan mëyantiadquicboedi adotiapimbo yec tabadpanëdash tsusiobo.

Isadaidbo tsusiobon chiaid Esus tantiaquidon chuoaid Nuquin Papa chiaid

²³ Tsusiobon nidmiac nidash iccuededboconombo choash puuedshun tsusiobon chuibod Petedobédta Uanén chuoapanédash. ²⁴ Adoac abentséc onquiacimboen naden Nuquin Papa chuipanédash: —Con Icbombo mibi nec. Abubédta nidaid acte chedo uashun aidénquo icquidtedimbo mimi uabampampic. ²⁵ Adembidi éndenquimboshé mimi tantiacpaden min Mayanén tantiamiac mimi chuimiaid, Dabid padon naden dada uapampic: “¿Atotsieshumbini ébi dēniactiapimbo icquidombi isadaidpembo comapenec nēishash ébi dēniacte buncuededpec? Adquiecbidi ¿Atotsi quiash émbi chomiaid icsamboen nanushbimboec isadaidbo onqueuidoapec?”

²⁶ Ancanquidobéd chuiquid utsibo émbi chomiaid aton Icbobi mëyanuec iccuededec.”

²⁷ Ai, mimi Dabid pado dada uamiampicpadembi émbi Edusaden yacno isadaidpembo ancaquid daéd Edodesbéd Ponso Pidato icnubi isadaidbo chedo iccuededquin mimi Chomiaid icsaisa Esus icsa uanuec onquecuededpondash. ²⁸ Mimi tantiampicpadembi unés uapondash, Papa. ²⁹ Adquidén Petedobédta Uan chushcacho mimi tantioc. Cuesambocquid ébitedi icmequin mimi chiaid ébi chuibame, Papa. ³⁰ Icsaisan Esusén bédamiacpaden nadatiambocquin naban, Icho —quepanédash Esus tantiaquido Nuquin Papa caic.

³¹ Adoac abi iccuededacno ishcuépanédash. Adec ishcuénué ambocquid Nuquin Papan Mayanén comapenen pausunac dacuédenquiocquin Nuquin Papan chiaid chuibampanédash.

Abentséc yacimboec tabadaid

³² Aden chuibanequi abentséc onquiacimboec tabadec Esus tantiaquido, Con na nec, quenquo yec, Nuquin Papan na nec, quec tabadcueneapanédash. ³³ Adequi tabadcuenequimbi dacuédenquiocquin, Esuquidistu uincuenacsho isombi, quequin chuibenepanédash. Adec Esus tantiaquido tabadsho utsibon bédamboen isbededquin aidén chuibansho bédamboen tantiapanédash. ³⁴⁻³⁵ Adembidi nidaid icho utsin-utsinquien aton nidaid menequin piucquid bedshun Esus chuibenequido meneapanédash. Adembidi, shubu icho utsin-utsinquien aton shubu menequin piucquid bedshun meneoapanédash. Aden meniac aton na nibédquid icscho isun Esus chuibenequidon menebanac bunenquo tabadpanédash. ³⁶ Adecbidi ambo acte nēnantanquo nidaid nacrédquid shubu uaidēnshun Chipide caid yacnoshon tishad Edusaden yacno choash Ose tabadpanédash. Aidi, Bédamboen mimi naoque. Adobanta, quedenesho Bednabe cuēmpañédash. ³⁷ Aidémbi aton nidaid menequin piucquid ambi bedaidtedimbo Esus chuibenequido meneoapanédash.

5*Ananiasbéd aton chido Sapida muaid*

¹ Adnubien dada utsi Ananias cuémédquid aton chido Sapidabédta aton nidaid menequin piucquid bedpanédash. ² Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meniachimboen meneapanédash Ananiasén. ³ Adnubien, Piucquid abitedi meniachimboen Ananiasén mua uaposh, quequin Nuquin Papan Mayanén tantiamiac naden Petedon Ananias chuipanédash: —Satanasén tantiamiaid icquin ¿mitsipaden tantiaquin Nuquin Papan Mayanén isnubi mua uaquin ébi menio? ⁴ ¿Min nidaid meniabi icnuc mitsanapenquioda nediosh? Mitsana niosh. Adecbidi, ¿aidi menequin piucquid bedaid mitsanapenquioda nediosh? Aidedi mitsana niosh. ¿Mitsipaden tantiaquin piucquid abitedi meniachimboen meniano? Aden bëquin abimbo chienquiocquin Nuquin Papambobi mimi mua uaboc ⁵ —Petedo qesho tantianec Ananias unésequi uebudpanédash. Adsho isash Esus tantiaquidtedi dacuédpanédash. ⁶ Unésacsho isun dashcute cuēshēn dataneshun buanshun caniabon chococatampanédash.

⁷ Béné chococambic ushē abuctoan unésboedén chido aton bēné unésaid tantienquo yec choapanédash. ⁸ Choasho isumbien: —¿Ada min nidaid menequin nēidtedi piucquid bedo? —Petedo qesho tantiahsien:

—Ai, aitedi bedombi —quepanédash Sapida.

⁹ Adoquien Petedo: —¿Nuquin Papan Mayanén ébi muasho tantiapec, quequin tantienquiocquinda min bēnébédtabi min piucquid abitedi meniachimboen meniano? Nēbi min bēné chococaboedon mibitsen buanendac —Petedo quenubic ¹⁰ Petedon tayumbi uebudec Sapida unésapanédash. Aidtsen unésacsho buanshun aton bēnébédtabi chococatampanédash. ¹¹ Adoac aid daédi unésaid tantiahs Esus tantiesatedi Esus tantiaquidobéd comapenec dacuédcededpanédash.

Bē-bēaidtedi bédanaid

¹² Adashic Sadomonén tacpan caid yacnoēsh Esus tantiaquido iccuedednubi Esus chuibenequidon nadatiambocquin nabampanédash. ¹³ Adomboen nabansho isash Esus

tantiesabo dacuëdec tacpan yacno chotiapimbo yequi: —Esus tantiaquido bēdamboshē iquec —quecuededpanēdash. ¹⁴ Adec tabadequi utsi-utside dadpen dadabēdi chido Esus tantiaquido yampanēdash. ¹⁵ Adec Esus tantiaquid yanshun, Daicsaido Petedon bēdamepec, quequin tantiaquin daicsaido bē-bēshun Petedo capuacno nambededpanēdash. ¹⁶ Adembidi dēuequidon Edusaden yacno daicsaid bē-bēnubi mayan icsan mēyanaido bē-bēoapanēdash. Aden bē-bēaidtedi bēdampanēdash.

Esus chuibenequido tsusiobon quēnēn nauedmiaid

¹⁷ Adnubien isadaidbo ancaquidbēd tsusio dapa utsibo saduseyobo caid isec otacquo tabadboedi matses dadpen Esus chuibenequido yacno cho-chosho isash nēishcuededpanēdash. ¹⁸ Adec nēishcuededshun Esus chuibenequido bedmeshun quēnēn nauedmepanēdash. ¹⁹ Aid inchēshēmbi Nuquin Papan uaid mayan bēda choshon quēnē shēcuē bētashaid bēcadoquin abitedi puduemec: ²⁰ —Mibi puduemimboique. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanota —quepanēdash Nuquin Papan uaid mayan bēda.

²¹ Badiadnuc Nuquin Papa tabadte shubu uashunaidēn puduedshun Esus tantiaquid abi uincuentequid chuibanotaic tabadoapanēdash aidtedi. Chuibanubien isadaidbo tsusio dapan abēd icquidobēdtambi tsusio utsibotedi cho-chomeshun: —Esus chuibanquido bedtan —cac ²² quēnēn nauedaid puduenushe quequin isquido tantiaquid isadaidbo tsusiobo: —¿Atodain nechitec? —quepanēdash Nuquin Papa tabadte shubu uashunaid isquido chuiquid chiech. ²⁵ Adnubien dada utsi choshon: —Mimbi quēnēn nauedboedon Nuquin Papa tabadte shubu uashunaid yacnoshon chuibanotaic tantiombi. ¿Ada tantio? —capanēdash. ²⁶ Adoquin quēnēn nauedaid puduenushe quequin isquido chuiquid capitan caidēn ambi namiaidobēdtan tantiec nidshun bedtanquin bēoapanēdash. Matsesēn cuēnoten ēbi senushe qeshun mēyanenquiocquin Esus chuibenequido bēoapanēdash.

²⁷ Aden bēquin Nuquin Papa tabadte shubu uashunaid nuntan tsusiobo iccuedadacno yuedpanēdash. Bēsho isash tsusio dapambo: ²⁸ —Esus chuibenenda, quequin chiambocquidēmbimboen Esus chuibanquin Edusaden yacnocquidtedi mimbi tantiamebanoc. Adoquimbic, Esus unēs uaid tsusiobon naid nec, quequin mimbi chuibanoc —quepanēdash tsusiobo. ²⁹ Adsho Esus chuibenequido utsibon tantianubi Petedonuidi: —¿Matsesēn nata caidodabi nedi? Nuquin Papan nata caid icquin nabanembi. ³⁰ Mimbi cuen dectanquin unēs uaondaic Esuquidistu Nuquin Papan padpiden uincuemepanēdash. Nuquin Papa caid tsusedpabon Papa caidquio nec. ³¹ Esus uincuemeshun aton dayunquio tsadmequin matses bēyucanquin Chuiquid abi yacno matses Puduedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bēpiscudpanuna. ³² Esuquidistun nabansho isbempondambi. Adembidi abi unēsash uincuenacsho ispondambi. Nuquin Papan Mayan icsaisan Esuquidistu tantiaquidobēd icquidēmbi adomboen ēbitedi tantiameoaic —quepanēdash Petedo.

³³ Aden Petedon chuisho tantiaquid tsusiobo: —Icsambo iquec —quiash Esus chuibenequido cuesunete bumpanēdash. ³⁴ Adnubien isadaidbo utsi padiseyobo, Nuquin Papan Moises dada uamiampid chuibanquin tantiamequid utsibon bēdamboen isaid, Camadied cuēmēdquidēn: —Chiata. Bēboedtedi buantan —cac ³⁵ buanambic: —Icsamboen nanushe qeshun bēdamboen tantiaquiota. Aido cuesunete mibi buneque. Cuesunenushē chiata. ³⁶ Èdenquio utsi Teyudas cuēmēdquid icpondash. Aidi tsusio dapa icnequin chuisho tantiaquid dada dadpen 400ted abēdi capupanēdash. Teyudas cuesuniacsho isash abēd icboedtedi udi nidaniacsho padpiden isenquio icpanēdash. ³⁷ Adashien matses tambanta caid ushēmbi utsi Udas cuēmēdquid Cadidia yacno icnēdaidbēd matses dadpen capupanēdash. Udsten cuesuniac abēd icnēdaidtedi padpidec choenquio yec adecbidi udimbo nidanapanēdash. ³⁸ Adec umanuc buamboedo chuiquid nibēdanaque. Aidbēd icboedo mishenda. Cuesunemenda. Aidēn chuibanaidbēdtabi ambi naid matsesēn naiduidtsēqui icnuq badedquio ēnēdendac. ³⁹ Aido Nuquin Papan namiac chuisho mimbi ēmetiapimbo icquendac. Nuquin Papa chieshēnushe qeshun aido nidmeta.

⁴⁰ Aden Camadiedēn chiac: —Adonona —qeshun: —Buamboedo bēoata —cac bēacsho cueshcanten cuesmepanēdash. Aden cuestanquin: —Esus chuibanotaic yec nidtan —qeshun puduemepanēdash. ⁴¹ Puduemiac Esus mēyanaid tantiec nidequi abi chuibanasho mēyanaid yec bēdambo iquebi, quec tabadpanēdash. ⁴² Adshumbic badiadquidēn badiadquidēnquin Nuquin Papa tabadte shubu uashunaid yacnoshon matses bēyucanquin

chuiquid, Nuquin Papan bédamboen isaidquio Esus nec, quequin chuibampanédash aidon. Shubu utsi-utsiec yacno nidshun adomboembidi chuibenequidédash.

6

Niante chidobo pete menebanquid icta caid

¹ Adashic badiadquidén-badiadquidénquieq Esuquidistu tantiaquid dadpen-dadpenquieq yanubi isadaidbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc —quepanédash. ² Adoquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin èntiapimbo iquebique. ³ Niantebo meneta canuen nadquidquio istuidshun chuita. Nuquin Papan aton Mayan meniac tantiamiac bédamboec tabadsho mimbi bédamboen isaidquio istuidta. Adquid 7ted istuidshun, Niante chidobo pete menebanquid icta, cata. ⁴ Aidtedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanédash Esus chuibenequido.

⁵ Adoquien: —Mimbi bédamboen chioc —quepanédash Esuquidistu tantiaquid utsibo. Aidèn chuibocpadembi aidtedi istuidpanédash. Nèidic, Nuquin Papan Mayanèn pausunaid, ambi chiacpadamboen Nuquin Papan naindac, quequin tantiaquidquio Esteban cuémédquid; utsibic, Uedipe; utsibic, Pèdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuémédquid. ⁶ Aidtedi istuidshun Esuquidistu tantiaquid utsibon aido bédamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nèidted bédamboen nameta, Papa, quequin Esus chuibenequidon chuipanédash.

⁷ Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiash utsi-utsiec Esuquidistu tantiaquid dadpen yampanédash. Adecbidi isadaidbo tsusiobo dadpen bédamboen tantiash Esuquidistu tantiaquido yampanédash.

Esteban bedaid

⁸ Adnubien Nuquin Papan Mayan meniaidènquio. ambi comapenen tantiamiaidènquio, Estebanèn nadatiambocquin ismepampanédash. ⁹ Aden nadatiambocquin ismenuc bédamboen tantienquio yec utsibo comapenec onquecuededpanédash. Nèidic, Sidene yacnoèsh choquido; utsibic, Adecandedia caid yacnoèsh choquido; utsibic, Sidisia caid yacnoèsh choquido; utsibic, nidaid Asia caid yacnoèsh choquido aidtedi Edusaden yacno cho-choash tabadec Estebambèd comapenec onquepanédash. ¹⁰ Comapenec onquequin Esteban Nuquin Papan aton Mayan meniaid icsho aidèn comapenen tantiamiac onquesho dèniaquec utsibo onquetiapimbo icpanédash. ¹¹ Onquequin dèniaciapimbo icquin utsibo naden aidon chuipanédash: —Tsujiobo naden chiec nidtan: Estebanèn nuquin tsusedpa Moises caidèn dada uampidbèdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi —cac chiec nidpanédash. ¹² Aden chiac tsusiobobèd Moisesèn dada uapampid paquiacquidobèd isadaidbo utsibotedi nèishcuededshun Esteban bedshun tsusiobo iccuededacno buanquin yuedshun ismepanédash. ¹³ Ambo abi dèniaciapimbocquidon Esteban muaquin chuita caboedon naden chuibededpanédash: —Nèid dada Nuquin Papa tabadte shubu uashunaidbèdta Nuquin Papan Moises dada uamepampid ènenquiocquin muaquin chuibanec. ¹⁴ Naden Estebanèn chioshe. Tantia: Nasaded yacno iccondaidèn, Esuquidistu caidèn Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidèn dada uampid naden nata quequin chiaid natiapimboctequid nec, quequin Estebanèn chuibanosh, quequin muaquin chuipanédash Esteban dèniaciapimbocquidon chomiaidon. ¹⁵ Aden Estebanèn chiaid muaquin chuiquin naimbudquimbi tsusiobobèdtambi comapenen Esteban bèisquin Estebanèn bètantiatie ushèbimboec ushumbo yec chènquesho isbededpanédash.

7

Estebanèn chuibanaid

¹ Adec Estebanèn bètantiatie ushèbimboec chènquesho isec tsusio dapambo Esteban chuiquin: —¿Abimboda mimbi naid chuiposh? ² —caquien yuecquio onquequin Estebanèn naden chuipanédash: —Chiembique. Tantiaquiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uèshèmba yec dasiuidteniaid matsesèn isternaid bèchomaanquieq icquid Abadauan ismepampic. ³ Aden ismec nadec onquepampic: “Min utsitedi nianec nidaid utsi yacno mibi èmbi ismenu caid yacno nidta.” ⁴ Adsho tantiash Candeyabon nidaid yacnoèsh nidashic

nidaid Adan caid yacno choash Abadauan tabadpampic. Ambo tabadashien aton papa unësan Adan yacno nëbi nuqui tabadbcno Nuquin Papan nuquin tsusedpa Abadauan chomepampic. ⁵ Aden chomeshun Nuquin Papan naden Abadauan chuihpampic: “Nëid nidaidën mibi capuacno mitsanapenquio nec. Yuceshun mibi menenun nanuna. Mimi tishmiambochoedi min chidon tishaid abentsëc min madombo nëid nidaid menendambi. ⁶ Nëid nidaid bedabi yec mimi tishmiamdën tishmiamd caidaido mates utsibon nidaidën tabadendac. Ambo tabadshobi anocquidën aido yuashun seta dadpen 400ted matamequin mëyanendac. ⁷ Adoacsho aidotsen cuidquin mëyanoindambi,” quepampic Nuquin Papa. Adashic abi Nuquin Papa onquec: “Min madon tishmiamd caidaido abi mëyanacnoësh nidashic nëid macuësh yacno choshon ëmbi chiapadomboen nabanendac.” ⁸ Aden chuishumbic, Nidaid menenun nanuna, quequin Nuquin Papan naden Abadauan chuihpampic: “Dada bacuëbëdta dada caniaidtedi shui dëbid dëtemeta. Adobansho isun, Èmbi chiaid bëdamboen naquidquo aidtedi nec, quequin ismendambi,” quepampic Nuquin Papa. Nuquin Papan chiaid tantiashun Abadauën ambia dëtemeshun datedi aidëmbidi shui dëbid dëtemeoapampic. Adoshombic yuecquo icshun Abadauën aton mado tishmeshun Isac cuënquin 7tedec ushun Isaquën shui dëbid dëtemeoapampic. Adoshombic adembi Isaquën aton mado tishacsho Acobo cuënquin aidtedecbidi ushun Isaquëmben Acobon shui dëbid dëtemeoapampic. Adoshombic, canishun Acobon tishmiamd 12ted icpampic. Abentse-abentsen tishmeshun aidtedecbidi ushun aton madon shui dëbid dëtemeoapampic. Adoquien yuecash Acobon madotedi tsusiobudnepampic –quepanëdash Esteban isadaidbo tantiamenu quequin chiech.

⁹ Aden chiech abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaidquo icsho isash nëishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnocquid Ose meneoapampic. ¹⁰ Adoac, Yuanu, qeshun natiamaid Ose icsho isun Nuquin Papan aid dayun uaqin dacuëdenquo icmequin comapen tantiaquidquo bëdamboen chuiquidquo Ose Nuquin Papan icmepampic. Adquidquo icsho isun Equipito yacnocquido ancaquidën Padaon caidën Equipito yacnocquido chuiquidquo Ose icmepampic.

¹¹ “Yuecash Equipito yacnocquido chuiquid, Ose, icnubi nidaid Equipito caid yacnocquidbëd nidaid Canan caid yacnocquido natiambo buncuededpampic. Adnubi nidaid Canan yacno nuquin tsusedpabo Isadaidbon pete nibëdquic yampampic. ¹² Adshumbic, Equipito yacno quënë uashun dayun uaid pete iquec, qesho tantiashun Osen papan Acobon ambi tishmiamd nuquin tsusedpabo chuiquin: ‘Equipito yacno pete iquec, qesho tantiambique. Bedtan,’ cac Osen utsibo aton papan chiapadec pete bedec nidanepampic. ¹³ Adanec Acobon madotedi aton utsibo Equipito yacno choacsho isun, Min utsi nëbi, quequin chienquicpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nëbi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose qesho tantienquicboedëmbi Padauën tantiabempampic. ¹⁴ Aton utsibo Padaon chuibanshumbic Osen aton utsibo chuiquin: ‘Nuquin pabëdta nuquin matses bedtan,’ capampic. Adoac bedoanec Equipito yacno choapampic. Abëd icquido 75ted icpampic. ¹⁵ Adashic, Equipito yacno yuec tabadashi tsusio budashi Acobo unëspampic. Auëshquibidi nuquin tsusedpabo Acobon madotedi adecbidi unësoapampic. Unëscasho Equipito yacno chococapampic. ¹⁶ Adashic, yuecquo yash Equipito yacnoësh nidquin unësaidon tishmiamd caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, piucquid menequin tsusedpa Abadauën tied bedshunëdacno chococapampic.

¹⁷ Aden chuishumbic Estebanën nadopanëdash: —Equipito yacnoësh tsusedpabo nidaid abi icnuc Nuquin Papan, Nidaid menenun nanuna, quequin chuihpampid ushë chote anoentsëc yanuc nuquin tsusedpabo dadpen yanec caidpampic. ¹⁸ Dadpen caidsho isun Equipito yacnocquido ancaquid utsin Ose pado tantienquo icpampic. ¹⁹ Aidëmbi mua uaqin chuiquin natiamequin nuquin tsusedpabon dada bacuë tishacsho bedtemaid nec, quequin nemepampic. ²⁰ Adnubien dada bacuë Moises tishacsho Nuquin Papan, Aid bëdaidquo iquec, quequin ispampic. Aidi icucshun ushë abentsëc choaid nidmequin Equipito yacnocquido ismenquicquin aton mado Moises anin ompopampic. ²¹ Ompoqui Moises shubisho tantiashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesec budquin tsitsanën Moises noadtsëcsho istuidshun bedash, Con mado caimbi, quepampic ancanquidën champi. ²² Bedtsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito

yacnocquidon naidtedi naquin aidèn chiaidtedi Moisesèn tantiabenquiopampic.

²³ “Adashic, Equipito yacnocquidobèd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonoadacno nidquin Moisesèn istuidpampic. ²⁴ Istuidnubi Equipito yacnocquid dada abentsècshun isadaidbo dada abentsèc mèyanquin cuesunesho isun Equipito yacnocquid cuidnuequin Moisesèn cuesuneopampic. ²⁵ Èmbi adoso isun, Equipito yacnoèsh nuqui bèyucanquin buanquid Moises nendac, quequin con matsesèn tantiapatsiash, abibi quetsècqueic nidnubi aton matsesèn tantienquo icpampic. ²⁶ Badiadash aton matses yacno padpidec nidquin aton matses daèd cuesnansho istuidshun, Èmenu, abibi quec choquimbi: ‘¿Atotsi quec min matseshèd cuesnane?’ Moisesèn catuidpampic. ²⁷ Adoaquien Moises cuèscatanec: ‘¿Èmbi nasho cuidquin èbi chuiquid tsuntsin mibi icmioshe? Chui. Tiantianu,’ quetanequi: ²⁸ ‘¿Equipito yacnocquid mimbi cuesunebocpadenda èbitsen cuesune?’ quepampic cuesunquid Moises caic. ²⁹ Aden chuisho tantiasien, Equipito yacnocquido ancaquidèn tantianushe quianec dacuèdec Equipito yacnoèsh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuè daèd tishmepampic Moisesèn.

³⁰ “Adashic, seta dadpen 40tedbidi matamec nidaid Madian caidèn tabadec cuètempiuidquo yacno matses nibèdqueic yacno macuèsh dapa Sinai caid anoentsèqui Moises chopampic. Ambobi tabadquimbi cuètempi nèdènquiacimboecquid nènantanquo Nuquin Ichoin Chomiaid tabadsho Moisesèn ispampic. ³¹ Aid istanepicien tantiadempamboctequid nepanushe. Isbono, quianec anoentsèqui Moises chosho Nuquin Ichoin naden chuipampic: ³² ‘Min tsusedpa Abadauanèn Papa cain cuènaid nebi; min tsusedpa utsin Isaquèn Papa cain cuènaidbidi nebi; min tsusedpa utsin Acobon Papa cain cuènaidbidi nebi,’ quesho tantiash dacuèdec uèdèquec istiapimbo yec Moises nidtuidpampic. ³³ Nidtuisho isec Nuquin Icho Moises chiec nadpampic: ‘Nèmbo èbi icsapenquo icquid icnuc caputemaid nidaid iqueque. Min tapucudte chichshun tantiaata. ³⁴ Min matses èbi cudasaido Equipito yacnocquidon mèyanac uèshquec shubiquisho tantiasun aido Equipito yacnoshon buanta mibi canec chobi. Nèbi Equipito yacno mibi nidmeoaimbi,’ quepampic Nuquin Icho Moises chiec.

³⁵ “Aden cuètempi nèdènquiacimboecquid nènantanquo icboedèn Nuquin Papan Chomi-aidèn isadaidbo bèyucanquin buanquid icta cac: ‘¿Èmbi naid icsho cuidquin èbi chuiquid tsuntsin mibi icmioshe? Chui. Tiantianu,’ abi caondaido bèyucanquin buanquid Moises icpampic. ³⁶ Adquid Nuquin Papan icmiac Equipito yacnoshon aton matses bèyucanquin buanquin Moisesèn nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeopampic. Adoshombic, matses nibèdqueic yacno seta dadpen 40tedbidi matamec abi tabadcueniachnoshontsen nadatiambocquin nabanquin isadaidbo Moisesèn ismeopampic. ³⁷ Aidèmbi naden chuipampic: ‘Yuecquo icshun èbipadquid mimbi tishmiaidèn tishmiaidon caidaid Nuquin Papan chuiquidquo icmendac,’ quequin Moisesèn chuipampic. ³⁸ Isadaidbo bèyucanquin chuiquid Moises matses nibèdacno isadaidbobèd macuèsh dapa Sinai caid yacno choash Nuquin Papan chomi-aidobèd Moises tabadpampic. Ashunquo Nuquin Papan abèdi tabadte tantiamenuequin cuènote pada-padamocquidèn ambi naden nata quequin dada uaid Moises menepampic. ³⁹ Aden aid dada uaid bedshun bèyucanquin chuisho tantiesha yanec nuquin tsusedpabo Moises bunenquo yec Equipito yacno nidoate bumpampic. ⁴⁰ Adashic, Moises macuèsh yacno yuecquo tabadnubi Moisesèn utsimbo Adon cuèmedquid aton matses utsibon naden chuibededpampic: ‘¿Moises nuqui Equipito yacnoshon bèyucanquin bèboed mitsi nidpash nec? Nibèdpequien iquec. ¿Atotsi quec nidpash? Nuquin Papan uacpadquiocno nacentia. Nacnenash bèyucanquin chuiquid aid iquendac,’ tsusedpabon cac ⁴¹ bacan bacuèbimbocnuc Adonèn nacnempampic. Ambi nacnenaid tantiaquin isadaidbon nidaidèn capuquid yua cuesuneshun cuèdènèmbodedpampic. ⁴² Adquid cuèdènèsho tantiash isadaidbobèd ictiapimbo iquec Nuquin Papa, Padi. Adenda, quenquo icpampic. Adquid Nuquin Papan èndenquimbo tantiaquin naden chuipampic: ‘Adomboen mimbi nacnenaid tantiec tabad.’ Adembidi Nuquin Papan yuecquo icshun nanun chiaid isadaidbo chuiquin naden dada uamepampic:

‘¿Matses utsi nibèdquo yacnoshon seta dadpen 40ted matamequin èbi tantiaquinaid nidaidèn capuquid yua cuesuneshun pambid tauidenio? Padenquo.

⁴³ Èmbi uaid badiadèn ushè, èbitedishun bèyucamembi, queshun aidpadquid nacneshun Modoc cuènquin aton shubumpi nuntan namposh.

Aidbèdtabi uspa dapatsen èbitedishun bèyucamembi, queshun aidpadquidbidi nacneshun Dempan cuènec danèshèn sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun ëmbi menenu caid nidaid yacno mibi nidmenquo icquin nidaid utsi, Babidonia caid udi mibitedi nidmeoaindambi.’

Aden ambi chiaid niacquido isadaidbo tantienquo icquidobi Nuquin Papan chuipampic –quepanëdash Esteban isadaidbo chiec.

⁴⁴ Aden chiec yuec onquebudec: –Matses utsi nibëdacnombo nidanequin tsusedpabon Nuquin Papa tabadte chichanshun buampampic. Aidëmbi Moises ismiacpadembi isadaidbon Nuquin Papa tabadte shubu uashumpampic. ⁴⁵ Adashic, tsusedpabo aid shubu uaquidotedi unësan ambi tishmiaidontsen aid shububidi adomboembidi chichanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chichanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantanquo shubu uoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic. ⁴⁶ Aidi Nuquin Papan bëdamboen isaidquo aid nidaidën tabadquin Nuquin Papa tabadte buantiapimboquid shubu uashuntiaquiocquin shubu uate bë-bëmepampic. ⁴⁷ Aid shubu uabi Dabid unësambi ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic. ⁴⁸ Aden matsesën shubu uaidën Nuquin Papa tabadenquo iquec. Adembidi Nuquin Papan chuimianaidën naden chuipampic:

⁴⁹ “Abutenquiobi con tsadte dapa iquec. Adecbidi nidaidtenquiobi ëmbi tincatequid nendac.

¿Adquid icnubidabi matsesën nidaidën shubu uashun tabadmepadic? ¿Nidaidënuidi tsadpectabi tiboquendac?

⁵⁰ ¿Tauaquiouimbi abitedi uambodambi ictionda?”

quequin Nuquin Papan chuimianaidën dada uapampic –quequin chiashic Esteban abi onquec: ⁵¹ –Pacuënëdacimboen Nuquin Papan chiaid tantiash icsaquin ënesa mibitedi nec. Aton Mayanën tantiamenu cac tsusedpabotedishun chieshëmpampicpadembi mibitedishun chieshënoaic. ⁵² ¿Nuquin Papan ambi yuecquo icshun naden nanuna quequin chiaid ambi chuimianidtedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unës uamiondac. ⁵³ Nuquin Papan chiaid ambi uaidon mayan bëdabon meniaqui Nuquin Papa chieshënquido mibi nec –quepanëdash Esteban isadaidbo chuiquin ënec.

Esteban se-siaid

⁵⁴ Adec Esteban onquesho tantiashun nëishënsun Esteban iccuededquidon chushcapanëdash. ⁵⁵ Adoaquien Nuquin Papan Mayan meniaidquo icquin Estebanën abuc isquin Nuquin Papa uëshëmbo yec matsesën istiapimbo bëchomaoanquiec ictequid abichobi dasiuidteniaid chënquenubi Nuquin Papabëd tancandaëdquiec Esuquidistu nitudidsho ispanëdash. ⁵⁶ Aden isequi: –Abuc shëcuë uaid shëcniaye. Is. Umbo Esuquidistu, matseonaid, Nuquin Papabëd tancandaëdquiec tsadsho isembi –quepanëdash Esteban.

⁵⁷ Adsho tantiash tsusiobo comapenec sidquianec pamumëdanec titinquequin Esteban bedshun ⁵⁸ cuënoten se-senuen shubu nibëdacno udi buampanëdash. Aden Esteban buanshun aton dashcute Saudo cuëmëdquidën taëno sampanëdash Esteban se-senuequidon.

⁵⁹ Sanshun se-siaquic Estebanën Esuquidistu cuënquin naden chuipanëdash: –Ëbi yued, Icbo –quiashic, ⁶⁰ danëshën sebudash comapenec nadec onquec: –Ëbi se-sequido icsaid cuidenquo yec bëpiscudta, Icbo –quepanëdash. Adec onquetanec Esteban unëspanëdash.

8

Saudon Esus tantiaquido mëyanaid

¹ Esteban se-senu caquien, Ai, adota, quiash isec uano Saudo tsadpanëdash. Esteban se-siaid ushëmbi Edusaden yacnoshon Saudon Esus tantiaquid utsi-utsien comapenen mëyanquin tauadopanëdash. Adosho isash Esus chuibenequido ambobi tabadnubien Esus tantiaquid utsibo nidaneac uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanëdash. ² Adnubien Nuquin Papan chiacpadomboen naquin Esteban chococac comapenec sedenquec shubipanëdash. ³ Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabëdtabi chido chedo bedmeshun quënën nauedmepanëdash.

Samadia yacnoshon Esus chuibanaid

⁴ Adashic Edusaden yacnoësh nidaneac shubu dadpen icquid utsi-utsiec yacno choshon abi tantiaquidon Esus chuibenepanëdash. ⁵ Adembidi niente chidobo aton na nibëdsho menequid, Uedipe cuëmëdquid nidaid Samadia caid yacno choshon adembidi Esus chuibanoapanëdash. ⁶ Aidën nadatiambocquin nabanquin Esus chuibanasho ambocquido

iccuededquin bēdamboen tantianpanēdash. ⁷ Aidēmbi nadatiambocquin nabanac mayan icsa dapuduedaid icboedi mayan icsa sidquianec cuempanēdash. Adecbidi canite icsaidbēda caputiapimboquid dadpen bēdampanēdash. ⁸ Adsho isash Samadia yacnocquido, Bēdambo iquebi, quec tabadpanēdash.

⁹ Adnubien Samadia yacno ēnden chondaid, Nadatiambocquin nabanquid dapa nebi, quequin mayan icsan tantiamiacpaden Simon cuēmēdquidēn nabampanēdash. ¹⁰ Adosho isash: “¡Eee! Abimboshenda caposh. Nēid dada Nuquin Papan ambi nadatiambocquin nabante tantiamiaid nec,” quequin anocquidobēdtan abi chuiquidon comapen-nen tantianpanēdash. ¹¹ Aden yuen Simonēn ismiac, Isnuequid dadpen badiadquidēn-badiadquidēnquieci abi yacno choash iccuededpanēdash. ¹² Adnubien, Nuquin Papa yacno puduedmianquid Esus nec, quequin Uedipen chuibanasho tantiaquid yampanēdash dad-abēdi chido chedo. Adsho aidtedi acten mentomepanēdash. ¹³ Simonsen: —Esus tantiaquid nebi —quesho acten mentoauqui Simon Uedipebēd capuquimbi Uedipen nadatiambocquin nabansho isun, Adopenshenda nabanec, quequin ispanēdash Simonēn.

¹⁴ Adashic yuecash Samadia yacnocquido Edusaden yacno nidash nadpanēdash: —Nuquin Papan chiaid Samadia yacnocquidon tantiabedec. Aden chuisho Esus chuibenequidon tantiaishun Uambēda Petedo Edusaden caid yacnoēsh nidaid Samadia caid yacnoshon nidmepanēdash. ¹⁵⁻¹⁶ Adec aid daē nidaneshun: —Esus tantiaquid acten mentoaidouidi nēitēdi nec —anocquido quesho tantiaishun: —Nēitēdi mīn Mayan mene, Papa —quec onquequin ¹⁷ Petedobēdtan Uanēn mēdanten Esus tantiaquido mamishbampanēdash. Aden mamishbanubi aidtedi Nuquin Papan aton Mayan menepanēdash.

¹⁸ Aden Petedon nasho isash Simon: —Ma adquieci mēquiadnueshun mibi piucquid menenu. ¹⁹ Mimbī matses mamishacpadembi ēmbi mamishaidtedi ma Nuquin Papan Mayan meniaid icpanuna —quepanēdash.

²⁰ Adoaquien Petedo: —¿Piucquid menecta mibi mēquiadpe? Adoquin mimbī tantianuc tauantiadpambo chian anēdēnquiacno ma mibēdi mīn piucquid icpanu. ²¹ Mimbī Nuquin Papan chiaid icsamboen tantiaquin ēmbi nacpadomboen natiapimbo mibi iquendac. ²² Mimbī icsamboen tantiaid ēnta. Aden icsaid ēnsho isash Nuquin Papa mibi icsaid bēpiscudendac. ²³ Mayan icsan yua icquin tactau tishidaid mishaid mucambo yacpadec icsamboen mimbī muaquin chuibanaido icsaindac.

²⁴ Adoaquien: —Ēbi tauantiadpambo chian anēdēnquequid nēnenushe quiash mibi Uambēd Nuquin Papa chieci bēdamboeci onquebudneta —quepanēdash Simon.

²⁵ Adec Samadia yacno tabadquin Petedobēdtan Uanēn: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsieci yacnoshontsen chuiopanēdash aidēmbidi.

Uedipe Etiopia caid yacnocquidbēd icaid

²⁶ Adeshombic, Samadia yacno Uedipe icsho Nuquin Papan uaid mayan bēdan nadopanēdash: —Nēuēshquio puduaneci nideci Edusaden datambidaneci acte dapa yacno shubu dadpen icquid Casa caid yacmī matses nibēdacno podquedēn nidash nidtuidtaneci chotan.

²⁷ Adoac nidtoaneci nidquimbi Nuquin Papan uaidēn mayan bēdan chuibocno choquin Etiopia caid yacnoēsh choquid Uedipen bēqueduidpanēdash. Ancanquid chido Candase cuēmēdquid aton na dayun uashunquid aid dada nepanēdash. Aidi Edusaden yacno nidash tabadquin Nuquin Papa chianeci ²⁸ padpideci Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid iseci onquequin chuibaneci tsadpanēdash. ²⁹ Adnubien Nuquin Papan Mayanēn: —Nidaid cano chinunta —cac ³⁰ Uedipen titinquequin chinumpanēdash.

Aden Etiopia yacnoēsh choquid dada uaid iseci onquesho isash: —¿Isbaneci onquequina tantiaquie? —quepanēdash Uedipe.

³¹ Adoaquien: —Tantiamequid nibēdneci ¿mitsipadentsimbi tantiapē? Ēbēdi antsadtoeci cho —cac Uedipe abēdi antsadtopanēdash.

³² Aidbēdi antsadtoshon Etiopia yacnoēsh choquid Nuquin Papan dada uamiampid iseci onquesho Uedipen naden tantianpanēdash:

“Obeca cuesunenuen nimbambocpadomboembidi mētaneshun nimbanoaposh Nuquin Papan chomiaid unēs uanuequin.

Adecbidi obeca bacuē abi datasnuequid icnuc cuēdenquio yacpadeci abi unēs uanuequid icnuc cuēdenquio icoaposh Nuquin Papan Chomiaid.

³³ Aidi Icsaisa icsho mēyansho iseci, Icsambocquidta neque. Isnu, quenquiocposh aton matses.

Aidi chido inesa yeci tishmiaid nibēdneci ¿Tsuntsin ambi naid chuipadic?”

³⁴ Aiddtedtsëqui abi isec onqueboed Uedipe ismeshun Etiopia yacnoësh choquidën: — Èbi isec onqueboed ¿mitsicquid chiequini onquepo? ¿Abibi chiadaidtabi isec onquepo? ¿Utsida chuibaneeque? Èbi chui. Tiantianu —capanëdash Etiopia yacnoësh choquidën Uedipe chuiquin.

³⁵ Adoaquien, Matsestedi icsaid bedshunash abided cuidadec Esus unësaid Nuquin Papa yacno puduedmianquid nec, quequin dada uapampidën chiech, quequin Etiopia yacnoësh choquid tantiamenuen chuibanpanëdash Uedipen.

³⁶ Adoanec nidquimbi Etiopia yacnoësh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanëdash.

³⁷ Adoaquien Uedipe: —Esus tantiaquidquo nebi, qesho mibi acten mentono —capanëdash.

Adoaquien: —Nuquin Papan mado Esuquidistu nec, quequin aid tantiaquid nebi —queshun Etiopia yacnoësh choquidën: ³⁸ —Niduid —cac nidaid cano nidmequidën cabayo nidtuidmian acte budshun Etiopia yacnoësh choquid Uedipen mentopanëdash. ³⁹ Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquo yequi, Esus tantiec bëdambo iquebi, quec Etiopia yacno nidoapanëdash.

⁴⁰ Adnubien Uedipe Nuquin Papan Mayanën nidaid utsi Asoto caid yacno buampanëdash. Ambo capucuenequin shubu dadpen icquid yacno-yacnomboen Esus chuibëec onquec choequi shubu dadpen icquid Sesadeya caid yacnotsen choapanëdash.

9

Saudon tantiate paucaid

¹ Adnubien Edusaden yacnoësh Esus tantiaquid utsi-utsiec nidanenubien Saudu Edusaden yacno tabadpanëdash. Ambo tabadec chushquec Esus tantiaquidtedi cuesunemeti-adquo yec isadaidbo chuiquid dapabo yacno Saudu choash ² shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caid yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquid chuipanëdash Saudon.

³ Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudu dëcatepanëdash. ⁴ Aden dëcatiac Saudu paëdash uesho isun nadec abucuësh onquec: —Saudu, ¿atotsieshun ëbi tantiaquido mimbi mëyampeba? Èbitsen mëyantiadpambocquin mimbi aido mëyanec —quepanëdash.

⁵ Adoaquien: —Icho, ¿Tsutsi mibi ne?

⁶ Adoaquien: —Mimbi mëyanaid Esus nebi. Èmbi chiaid chieshënec mibi tabadeque. Nidtoash Damasco yacno nidtan. Anoshon ëmbi nata cacpadomboen anocquid mibi chuimembique. Nidtan.

⁷ Adec abucuësh onqenubi Saudobëd cho-choquido nidtuidshun tantiequi onquequid isenquo yec tabadtuidpanëdash. ⁸ Onquec ënëdan nidtoash Saudu istiadquo iquequi bëshupanëdash. Adsho isun mëdianquin Damasco yacno buampanëdash. ⁹ Adequi Damasco yacno choash 3tedec ushec isenquo yec buna mëmunquiec Saudu tsadpanëdash.

¹⁰ Adashic, Saudu puduedash tabadacno ëdibictsëc tabadquid Esus tantiaquid Ananias cuëmëdquid icpanëdash. Aid usho Esusën: —Chuinu. Tantia —caquien:

—¿Atoda? Nëbi uebi, Icho —quepanëdash Ananias.

¹¹ Adoaquien: —Nidtoash podqued cuembocquid caid yacno nidtan. Ambo choash Udasën shubun puduedshun shubu dadpen icquid Tadso caid yacnoshon tishaid Saudu cuëmëdquid Nuquin Papa chiech onquec tsadsho mimbi istuidendac. ¹² Adec aid ushacimboc tsadsho mibi choshon aidi padpiden ismenuen mimbi mëdanten mamishac isoshe. Aidi istan —capanëdash Esusën.

¹³ Adoaquien: —Con matses dadpeshun Saudon naid icsa chuibansho tantiombi, Icho. Aidëmbi Edusaden yacnoshon mibi tantiaquido mëyamepac caoshe. ¹⁴ Aiddidi Edusaden yacnocquido chuiquid dapanquo dada uaid sananquin nëmbotsen mibi tantiaquido bedmeshun tanemenuc aidi chopac caosh —quepanëdash Ananias Esus chiech.

¹⁵ Adoaquien: —Aidi ëbi chuibeneta caidquo icmeshun ëmbi bëdamboen isaid neque. Aid dacuëdënenquo yec nidshun istanta. Aidën isadaidbo abi chuiquidobëdta isadaidpembu abi chuiquidobëdtabidi ëbi chuiben-chuibenec capuendac. ¹⁶ Èbi chuibenesho mibi mëyantequid iquendac, quequin Saudu tantiamembi —quepanëdash Esus.

¹⁷ Adsho tantianec Ananias nidash Udasën shubun puduedshun Saudu mamishec: —Con utsi, mibi podquedën chosho chuiquidën Nuquin Ichonquo, Esusën mibi padpiden

⁴⁰ Adosho isun abitedi puduemiash danëshën sebudash Nuquin Papa chiec onquetanec nidoshon unëshoed isquin: —Nidto, Dodcas —Petedon cac uincuenequi Petedo isec Dodcas badedi uëtsëdtopanëdash. ⁴¹ Uëtsëdtopanëdash isun mëdinquin nidtomeshun niantebobëda Esus tantiaquid utsibo cuënquin cho-chomeshun uincuenboed ismepanëdash. ⁴² Aden Dodcas ismesho isash aton shubuno nidanequin Dodcas uincuenaid chiac Ope yacnoquido dadpen Esus tantiaquid yampanëdash. ⁴³ Adnubien Petedo Ope yacnoquid nidaidën capuquid bitsi uashun chodcashun nacnenquid Simombëd yuec Petedo tabadpanëdash.

10

Petedo Codnedion chomiaid

¹ Adnubien shubu dadpen icquid Sesadeya caid yacno Codnedio cuëmëdquid isadaid-pembo nidaid Itadia caid yacnoësh Sesadeya caid yacno choash tabadpanëdash. Aidi sondado dadpen 100tedi chuiquid icpanëdash. ² Aidi aton shubun icquidobëdi Nuquin Papa tantiaquid icquin isadaidbo aton na nibëdquid icsho isun menebanquid icpanëdash. Adecbidi Nuquin Papa chiec onquianedenepanëdash. ³ Adquid yec ushë budtsambi tedes yanuc Nuquin Papa chiec onquequimbi ushacimboecquin Nuquin Papan uaid mayan bëda Codnedion ispanëdash. Nuquin Papan uaid mayan bëda choshon: —Codnedio —capanëdash.

⁴ Adsho tantiaquid dacuëdquin comapenen isec: —¿Atotsibi name, Icho? —quepanëdash Codnedio.

Adoquien: —Abi chiec mibi onquedenesho Nuquin Papan tantiec. Adembidi aton na nibëdquid tantiaquin menedenequid mibi icsho Nuquin Papan bëdamboen isaid mibi neque. Chuinu. Tantiata. ⁵ Nëbi Simon cuënshumbic Petedo cuënoaid ma bednu mimi namiaido Ope yacno nidmetan. ⁶ Simon utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec —quepanëdash Nuquin Papan uaid mayan bëda Codnedio chiec.

⁷ Aden chianec Nuquin Papan uaid mayan bëda nidambi Codnedion aton yua daëdbëdta sondado abentsëc chomeshun ⁸ Nuquin Papan uaid mayan bëdan chuibocpaden Petedo bedmenuen ambi namiaido Codnedion nidmepanëdash.

Petedon ushacimboec tsadquin isaid

⁹ Adashic, ushë cuembocnoc Ope anoentsëqui Codnedion nidmiaido chonobi Petedo Nuquin Papa chiec onqueneuc shubu macano pada-padapambocquid yacno decatopanëdash. ¹⁰ Adec dectatoash shubu icbon codocanubi Petedo bundoec ushacimboec tsadquimbic ¹¹ abu posonianec abi yacmi dabidiete dapabiecquid bucun dënëshbudcuenaid budsho Petedon ispanëdash. ¹² Aidënquio ambi petequid ambi petemaid chedo nidaidën capuquid tabcidën capuquidbëd podochoquid chedo antabëpanëdash. ¹³ Adnubien: —Nidoshon cuesuneshun pe, Petedo —capanëdash abucuësh onquequin.

¹⁴ Adoquien: —¿Abida cai? Ëmbi petemaid tauishun mibi shëdmetemaidquio antabëdquid nec. Adquid piamboccombi, Icho —quepanëdash Petedo.

¹⁵ Adoquien padpidec abucuësh onquec: —Nuquin Papan bëdambo icmiaid icsambo iquec cainda —quepanëdash. ¹⁶ Adotanquimbic antabëdquid abuc buanshun adomboembidi abentsëc chotsëcnuc budmequin adembidi Petedo chuishun abuc shëcuë uaid yacno badedquo buanshun pudedmeoapanëdash.

¹⁷ Adosho isash Petedo ambi isboed tantiec tsadnubi Codnedion chomiaido Simonën shubu istuidash shëcuë cuëmano choec nidtuidpanëdash. ¹⁸ Choec nidtuidash: —¿Nëmboda Simon Petedo tabadec? —quetuidpanëdash.

¹⁹ Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibëc. ²⁰ Ëmbi chomiaido neque. Budash cacuidenquio yec aidobëdi nidtan —capanëdash.

²¹ Aden chiac budshun Codnedion chomiaido isash: —Mimbi nibënaid nebi. ¿Atotsi quec cho? —quepanëdash Petedo.

²² Adoquien: —Codnedio cuëmëdquidën chomiaid nebi. Aidi sondado dadpen chuiquid bëdamboquidquio nec. Adquid icquin Nuquin Papan chiacpaden nabansho isun isadaidbun bëdamboen isaidquio nec. Aidi Nuquin Papan chomiaid mayan bëdan naden chuipac caosh. “Simon cuënshumbic Petedo cuënoaid bedmetan. Bëac chuibansho tantiata,” quequin Nuquin Papan uaid mayan bëdan ëbi chuiposh quequin Codnedion ëbitedi chuioaposh —quepanëdash Codnedion chomiaido Petedo chiec.

²³ Adoquien: —Pudued —quepanëdash Petedo.

Adashic badiadanec Codnedion chomiaidobëd Petedo nidsho isash Esuquidistu tantiaquid Ope yacnoquid utsin-utsinquin tsibanampanëdash. ²⁴ Adec nidanec Sesadeya caid yacno chopanëdash. Adnubien, Nëid ushëmbien chochitec, quequin tantiaquid Codnedion

aton shubun icquido abi isedquid chedo Petedon chuibansho tantiamenuen aton shubu nuntan iccuededmeapanēdash. ²⁵ Aden iccuededmiac tabadnubi utsibobēd choec Petedo chedo puduedsho isash, Mibi bēdamboquid icnubi adesa nebi, quequin Petedo ismec danēshēn sebudec shuebudash Petedo bēisenquio yec Codnedio uepanēdash.

²⁶ Adec uestho isash Petedo: —Mibipadquid nebique. Nidtotā —quepanēdash Codnedio caic.

²⁷ Adtanec Codnediobēd onquetanec quēnē utsin puduedshun isadaidpembo dadpen Petedon istuidpanēdash. ²⁸ Aden aido isec: —Isadaidbo nebi. Adquid yec isadaidpembobēd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ēmbi bēdamboen isaid icsambo iquec cainda, quequin ismequin ēbi tantiamiac ²⁹ mimbi ēbi bedmiaido choacsho isash, Mibēd capuesa nebi, quenquio yec chobi. Adecbidi nēmbō choash isadaidpembon shubu nec. Nēmbō puduedtiapimbo iquebi, quenquio yec puduedobi. Nēbi Tantianu. Chui. ¿Atotsieshun ēbi chomio? —quepanēdash Petedo Codnedio chiec.

³⁰ Adoaquien Codnedio: —Abentsēc choec ushanec ushē budec tedes yanubi Nuquin Papa tantiec buna mēmunc con shubu nuntanuēsh Nuquin Papa chiec onquec tsadobi. Adnubien dashcute shocosh bed-bedquiacbimboec dasiuidquid ēbi yacmi Nuquin Papan budmiac onquec: ³¹ “Codnedio, mibi Nuquin Papa chiec onquesho Nuquin Papan tantiec. Adembidi aton na nibēdquido mimbi menebansho aidēmbi bēpiscudenquio icquin tantiec. ³² Nuquin Papa bēdamboen tantianuen Simon cashumbic Petedo caid Ope yacnocquidbēd tabadquid ma chono qeshun mimbi namiaido nidmeta. Aidi Simon cuēmēdquid utsi nidaidēn capuquid bitsi uashun chodcashun nacnenquidbēd tabadec. Aidēn shubu acte cuēmambi iquec,” quec Nuquin Papan uaid mayan bēda onqueposh. ³³ Aden chiac: “Petedo bedtan,” quequin ēmbi namiaido nidmiombi. Adoac bēdamboquid yec cacuidanenquio yec badedquio mibi choc. Adec mibi choacsho isash bēdambo iquebi. Nuquin Papan nuqui isnubi ambi mibi tantiamiacpaden chuibansho tantiec tabadnuna —quepanēdash Codnedio Petedo chiec.

Codnedion shubu nuntanshun Petedon chuibanaid

³⁴ Aden Codnedion chuiban cac Petedon naden chuipanēdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nēbi abimbo tantiambi. ³⁵ Nuquin Papan chiaid tantiashun matses utsin-utsinquien chieshēnenquiocquin bēdamboen nabansho isun, Aidedi Nuquin Papan abi yacno yuedendac, quequin tantiambi. ³⁶ Ēdenquimboshē Nuquin Papan dada uamequin con tsusedpabo isadaidbon tishmiaido caidaido naden chuipampic: Esuquidistu abentsēqui matsestedi chuiquid icnubi utsibēd bēdamboec tabadendac. ³⁷ Nidaid Cadidia yacnoshon Uan padon chuibanquin acten mentoquien Esuquidistun ambi naid tuapondash. Mibitedishun aid tantiondac. ³⁸ Ma abēd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bēdamboen nabanquin abi chieshēnquidēn Satanas caidēn mēyanaido Esuquidistun bēdamebampondash. Adosho mibitedishun isbampondac. ³⁹ Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten decantan isadaidbon unēs uaqui ⁴⁰ uincuenash, Uincuenobi, quequin Esuquidistun ismebempodashi. ⁴¹ Aidi uincuenashun matsestedi ismenquiocquin aidbēdtan peshun acquidotedictsēqui Esuquidistun ismepondashi. ⁴² Abēdi icshobi, Ēbi chuibanquin matses icsaid cuidte chuibante ushē choec quequin chui, cac nebi. ⁴³ Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ēnsho isash abi icsaid Nuquin Papa bēpiscudendac. Esuquidistu chuiquin aden dada uapampic —quepanēdash Petedo Codnedion shubun iccuededquido tantiaequin chiec.

Isadaidpembo Nuquin Papan aton Mayan meniaid

⁴⁴ Aden Petedon chuibanshobi abitedi tantiaquid icsho isun Nuquin Papan ma abēd tabadnueshun aton Mayan menapanēdash. ⁴⁵⁻⁴⁶ Aden meniac isadaidpembo nēbi Esuquidistu tantiaquido yanshun abi onquiaicmaidēnquio utsin onqueten onquequin Nuquin Papa chiec cuēdēmpañēdash. Adsho tantiash Petedobēd cho-choboedo isadaidbo aton tsusedpabon nacpaden shui dēbid dētemequido: —¡Padtec! Tantiadempamboctequid nec. Isadaidpembotsen Nuquin Papan aton Mayan meniac —quepanēdash isadaidbo Petedobēd cho-choboedo.

⁴⁷ Adoquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic? ⁴⁸ Aid, acten mentometa —capanédash Petedon.

Aden acten mentoqu: —Nuquibi tabadnuna —cac Petedobéd cho-choboedo acten mentoaidobéd daédpactséc ushec tabadpanédash.

11

Isadaidbo Petedon ambi naid chiaid

¹ Adnubien utsibo Sesadeya caid yacnoësh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bédamboen tantiaish Esuquidistu tantiaquido yanosh, quequin chuipanédash. Anoshon chuibètsenec Edusaden yacnotsen choshon adomboembidi chuioapanédash. ² Aden chuisho anocquidon Esuquidistu tantiaquid utsibon tantiaish tsusedpabon chiaccpadomboen shui dèbid dètemequido yec Petedo nêmo choacsho isun, Aidi ambi nabanaid chuimenu, quequin caimpanédash. Aden cainubic Petedo choacsho isash ³ comapenec onquecuedec: —Isadaidpembon shui dèbid dètemesabo icnuc aton shubun puduedtemiaidquido nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tiantianu —quepanédash Edusaden yacno tabadquido.

⁴ Adoquien Petedon nadopanédash: —Aidobéd èbi tabadboed chuibanu. Tantiata. ⁵ Ope yacnoësh Nuquin Papa chiec onquequin ushacmbuoen naden ispombi. Abuc posonianec èbi yacmi dabidiete dapabieccquid dènëshbudcuenauid budposh. ⁶ Aidênquido nidaidên capuquid tacbidên capuquidbéd podochoquid chedo antabédsho ispombi. Aidên antabédquid nuqui petequidbéd nuqui petemaid icposh. ⁷ Adquid icsho isnubi: ‘Nidtochon cuesuneshun pe,’ caposhi. ⁸ Adsho tantiaishun: ‘Aidtedi èmbi petemaid tauiquin mibi shèdmetemaidquido nec. Adquid pesambo nebi, Icho,’ capombi. ⁹ Adoquien abucueësh padpidec onquequin: ‘Nuquin Papan bédambo icmiaid icsambo iquec cainda,’ caposhi. ¹⁰ Adomboembidi abentséc chotsécnuc tabècaido abuc buanshun padpiden budmeshun adembidi chuishun buanshun abitedi abuc puduedmeoaposh. ¹¹ Abuc buanoabombic dada abentséc chotsec Sesadeya caid yacnoësh choquido shubu shècuè cuèmano nidtuidash nidpac caosh. ¹² Aidtedi icnubi Nuquin Papan Mayan: ‘Aidobédi cacuidenquido yec nidtan,’ qesho tantiaish aidobédi nidpobi. Aidobéd Ope yacnocquido dada 6ted Esuquidistu tantiaquido puduanec nidec Codnedion shubun èbèdi puduedposh. ¹³ Puduedacsho isash Codnedio: ‘Nuquin Papan chomiaidên ambi uaid mayan bédan naden chuiposhi: Simon cuênshumbic Petedo caid Ope yacno tabadeque. Aid bedmuenen mimbi namiaido nidmeta. ¹⁴ Aidèmbi mibéd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bédan chuiposhi,’ quequin Codnedion chuioaposhi.

¹⁵ “Adoac Esuquidistu chiombi. Aden chuinubi aton Mayan èbitedi Nuquin Papan meniaccpadembi aidotsen meneoaposh. ¹⁶ Aden meniaccsho isun Nuquin Icho Esuquidistun chiondaid èmbembi tantiatsécquiec tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icho Esuquidistun. ¹⁷ ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanédash Petedo shui dèbid dètemequid utsibo chiec.

¹⁸ Aden Petedon nainquin chuibanac tantiadempambo yec tabadec isadaidbo shui dèbid dètemequido: —Isadaidpembon abi icsaid ènsho isun Nuquin Papan aidotsen abéd icquid icmeoapac —quepanédash Nuquin Papan naid chiec.

Antioquiya yacnoshomba Esus tantiaquido iccuededaid

¹⁹ Esteban cuènoten seshuniash: “Esuquidistu tantiaquido cuesunenu,” qesho tantiaish èbitsen cuesunenushie quianec Edusaden caid yacnoësh Esuquidistu tantiaquid utsi-utsiec nidanepanédash. Nidequi nidaid Penisia caid yacno choash utsi-utiec tabadnubi utsi-utsiec acte nênantanquid nidaid nactédquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidboudi Esuquidistu chuibampanédash. ²⁰ Adshumbic, utsibo Chipide caid yacnoësh Antioquiya yacno cho-choquidobédtan nidaid Sidene yacnoësh Antioquiya yacno cho-choquidon isadaidpembon Esuquidistu tantiamenuen chuibampanédash. ²¹ Aden chuibanu, qesho Nuquin Papan bédamboen tantiamiac aidon chuibanaid tantiaishun isadaidpembon: Èbi icsaid ènu, quequin ènash Esuquidistu tantiaquid dadpen yampanédash.

²² Adec isadaidpembo Esuquidistu tantiaquid dadpen yanosh, qesho tantiahsun Esuquidistu tantiaquid utsibon Edusaden yacnocquidon Antioquiya yacno Bednabe nidmepanédash. ²³ Aidi Edusaden yacnoësh puduanec nidequi Antioquiya yacno choshon anocquido Esuquidistu tantiaquido Nuquin Papan bédambo icmiaid icsho isash: —Cuishon. Bédambo iquec. Adembi tantiaquin chieshenquiocquin Esuquidistu tantiaata —quepanédash Bednabe. ²⁴ Bednabe bédambocquid icsho Nuquin Papan aton Mayan meniac Esuquidistu bédamboen tantiaquidquio icquin Esuquidistu chuibanac Esuquidistu tantiaquid utsi-utsiec dadpen yampanédash.

²⁵ Adashic Antioquiya yacnoësh puduanec Saudo bednuec nidequi shubu dadpen icquid Tadso caid yacno choshon ²⁶ Saudo istuidash Antioquiya yacno aibdëdi Bednabe choapanédash. Ambo choash seta abentsëc matamec anocquid Esuquidistu tantiaquidobëd iccuededquin Esuquidistu chuibanquin aid daëdshun tantiamepanédash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cëmpanédash.

²⁷ Bednabebëd Saudo Antioquiya yacno tabadnubien Edusaden yacnoësh Antioquiya yacno Nuquin Papan yuecquio icshun nanun chiaid chuiquido cho-chopanédash. ²⁸ Choshon abentsëqui Accabo cuëmëdquid Nuquin Papan Mayanën oncamiac: —Yuec-yuecpectsëc yash nidaidtedi yacnocquidon pete nibëdendac —quepanédash. Aden chiambic shubu dadpenquioshë icquid Doma yacnocquido ancaquid Quëdaudio cuëmëdquid icnubi pete nibëdquiec yampanédash. ²⁹ Adnubic, Udeya yacnocquidon pete nibëdec, qesho tantiahsun Esuquidistu tantiaquidon Antioquiya yacnocquidon aton piucquid adquido menunen ambi dayun uaidtedi Edusaden yacno buamepanédash. ³⁰ Esuquidistu tantiaquido Edusaden yacnocquido chuiquido nëid piucquid menetanta ma pete bunquido menenueshun, quequin ambi dayun uaidtedi Bednabebëda Saudo menequin Edusaden yacno buamepanédash Antioquiya yacno tabadquin Esus tantiaquidon.

12

Acobo cuesuniaibdëda Petedo quënë nauedaid Nuquin Papan puduemaiid

¹ Adnubien Edusaden caid yacno tabadquid domanobo ancaquid Edodes cuëmëdquidëmbi Esuquidistu tantiec iccuededquido utsi-utsien comapenen mëyanuequin bedmeshun quënë nauedmepanédash. ² Aido quënë nauedmeshun Esuquidistun ëbi chuibeneta caid abëd capucueboed Acobo cuëmëdquid chështen cuesunemepanédash. Acobon utsimbo Esuquidistun ëbi chuibeneta caid abëd capucueboed utsi Uan nepanédash. ³ Adoac, Acobo cuesuniosh, qesho tantiahs isadaidbo utsibo, Esuquidistu tantiesabo: —Bédamboen Edodesën naosh —quepanédash aido. Adec onqesho tantiahs Edodes: Isadaidbon pan bidisquesa tantiaid ushë choec, quequin Esuquidistun ëbi chuibeneta caid utsi, Petedo cuëmëdquid, bedmeshun quënë nauedmepanédash. ⁴ Aden quënë nauedmeshun Petedo cuenushe qeshun sondado 4ted quënë nuntan tabadmeshun pan nami uambocquid petequid tantiaid ushëtedi naimëdambi ambi naid icsa Petedo chuimenuequin Edodesën caimpanédash. Adnubien quënë nuntanshun Petedobëda mëtaniaid sondado daëd uenubi utsi daëdshun shëcuë ëctabëdquin Petedo isec tabadpanédash. Aid isquidotedi badiadnuc puduedshun isanec ushë abuctotsan nidnubi utsibotsen 4tedbidi choshon isanec ushë cuembocnoc nidoanubi utsibotsen 4tedbidi choshon isanec ushë buotsan nidnubi utsibotsen 4tedbidi choshon isanec inchështëcnubi badiadnuc ishoedo choapanédash. Adechidi ishoedo utsibo inchëshëmbi padpiden isec choapanédash. ⁵ Adnubien Esuquidistu tantiaquido iccuededash Nuquin Papa Petedo quënë nauedaid chiec yuec onquepanédash.

⁶ Adshumbic, Badiadshun Petedo bëmëmbi, quequin Edodesën tantianubi aid inchëshëmbi Petedo bucan mëtaniacchobi ushnubi ⁷ Nuquin Icbon chomiaid, ambi uaid mayan bëda, nibëdquiocboedi Petedon dayun choan quënë nuntan comapenec chënquepanédash. Aidën Petedon dayun choshon shictodo macuesquin: —Baded nidto —cac nidtonobi seccuduquec shocosh bucu mëtaniaid mëchiquidpanédash. ⁸ Adtanquimbien Nuquin Papan uaid mayan bëdan: —Chinëshëdtanec tapucudta —cac Petedo chinëshëdtanec tapucudpanédash.

Adsho isash: —Min dashcute bëntsecquid dasiuidshun ëbi tsiban —quianec nidsho ⁹ Nuquin Papan uaid mayan bëda nidsho isacimbocquid abimbo tantienquiocquin Petedon tsibanampanédash. ¹⁰ Adec nidquimbi sondado abëda mëtaniaidën tantienquio icnubi datanshun shëcuë isquid daëdshumbidi tantienquio icnubi aidotsen datanoashumbic umanuc puduenenubi shocosh shëcuë abembi shëcniadpanédash. Adsho isash puduenash podqued abentsëcquidën nidquimbic Nuquin Papan uaid mayan bëda abëd icboedi badedquio nidquin Petedo niampanédash. ¹¹ Abëd icboed nibëdnubien Petedo padpiden

tantiaquiec: —Edodesbéd isadaidbo, Esuquidistu tantiesabo, ëbi cuesunete bunsho isun Nuquin Papan ëbi puduemenuen ambi uaid mayan bêda chomiosh. Abimbo iccosh —quianec Petedo nidpanêdash. ¹² Adec nidequi Nuquin Papan abi puduemeboed tantiequi Uan cashumbic Madcos caidên titan shubu yacno Petedo chopanêdash. Aidên tita Madia cuëmêdquid icpanêdash. Ambobi Esuquidistu tantiaquid dadpen iccuedec Nuquin Papa chiec onquepanêdash. ¹³ Adnubien choshon Petedon shêcuê tosh-toshcacho tantiaash chido yua Doda cuëmêdquid isnuec nidtopanêdash. ¹⁴ Aid shubu shêcuê yacno choshon Petedon cuênsho tantiaash bêdamboshê iquequi shêcnenquio yec aubidi titinquec: —Petedo shêcuê yacno choash nidec —quequin iccuededquido chuituidpanêdash.

¹⁵ Adsho Nuquin Papa chiec iccuededquidon abimbo tantienquioquin: —Muequi mibi nec. Aidida isplash neba —quepanêdash iccuededquido.

Adoquien: —Ma aidquiobi nebec. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Papan uaid mayan bêda ischitashien nec —quepanêdash tantiesa.

¹⁶ Adnubi padpiden Petedon tosh-toshcacho shêcnequin isash: —¡Tso! Abimbo caic —quecuededpanêdash.

¹⁷ Adnubien mêdante uic-uiccaic Petedo: —Onquenquio yec tabadquin tantiaata. Ëbi nashunquin Nuquin Icon naboe chuibanu —quepanêdash Petedo abi quênên nauedacnoshon Nuquin Papan puduemaiad chuibanec. Aden chiash: —Ëbi puduemaiad Esuquidistun utsi, Acobobêda Esus tantiaquid utsibo chuitanta —quianec puduenanec utsi yacno Petedo nidpanêdash.

¹⁸ Adashic, badiadnubi quênê nuntan Petedobêd icboed sondadotedi: —¿Mitsimbo nuquibêda mêtaneboed icpec? Nibêdeque. Is —quec dacuêdpanêdash.

Adashic, Petedo nibêdec, quequin sondadon chiac ¹⁹ Edodesên: —Nibêntan —cac nidshun sondadon istuidenquiocsho isun quênê nuntanshun Petedo isquido ambi quênên tabadquin nabamboed chuimeshumbi aidotedi Edodesên cuesunemepanêdash.

Edodes unêsaid

Adashic, Edodes nidaid Udeya caid yacno abi tabadacnoësh puduanec shubu dadpen icquid Sesadeya caid yacno choash tabadpanêdash. ²⁰ Sesadeya caid yacno anoentsêcbidi shubu dadpen icquid Tido caid icnubi aid yacnoësh anoentsêqui shubu dadpen icquid utsi Sidon caid icpanêdash. Tido caid yacnocquidbêd Sidon caid yacnocquido Edodesbêd chushcananquido icboedi padenquio yanec tabadpanêdash. Adec chushcananenquio yec tabadquin, Sesadeya yacno Edodes choash tabadosh, qesho tantiaash Edodesên yua Bêdasto cuëmêdquidbêd onquenuec cho-chopanêdash. Cho-choshon, Ëmbi pete nibêdsho isun Edodesên menioshi. Nêbi aid chushcainquio iquemi, quiosh, quequin cho-choquidon chuituidpanêdash. Aden chiac adomboembidi Bêdaston Edodes chuiopanêdash. ²¹ Aden adomboembidi Bêdaston chuiasho tantiaashun Edodesên: —Ëmbi chiacpadên cho-choata, quiosh Edodes, quequin chuita —cac cho-choquido Bêdaston chuiopanêdash. Aden chiac Edodes onqesho tantianuec ambi chiacstedec ushash dashcute nac-nacquiocquid dasiuidash abembi onquenuec tsadten abuc tsadoash onquec taêpanêdash. ²² Aid onqesho tantiaash: —Nidaidêshun tishaid onquiaidpenquio nec. Abuc tabadquid nuquin papa caidien Edodes nechtec —quec iccuededquido comapenec cuêdcuededpanêdash. ²³ Aden chuisho tantiaash, Mimbi Nuquin Papa caidpenquio nebique. Aidi abia yampid abentsêcquiobi iqueque. Aiduidi tantiaata, quequin chuitiadquidêmbi chienquio icsho tantiaashun Nuquin Papan chomaiidên ambi uaid mayan bêdan daicsa uac chichan dadpen yanec Edodes badedi unêsapanêdash.

²⁴ Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanêdash.

²⁵ Adnubic Antioquiya yacnocquidon Esuquidistu tantiaquidon aton piucquid ambi menenun dayun uaid Bednabebêda Saudo meniac buanec Edusaden yacno choshon anocquido Esuquidistu tantiaquido menetanashic auêshquio puduanec Antioquiya yacno nidoapanêdash. Aidobêdi Uan cashumbic Madcos caid nidpanêdash.

13

Saudobêdtabi Bednabe nidmiaid

¹ Adashic, Esuquidistu tantiaquid utsi-utsiec Nuquin Papan yuecquio icshun nanun chiaid chuquido Antioquiya caid yacno tabadnubi Esuquidistu tantiamenuen chuibanquido tabadoapanêdash. Nêdic, Bednabe; utsibic, Simon, Dada Chêshê caid; utsibic, Sidene yacnoësh choquid, Dusio cuëmêdquid; utsibic, Cadidia yacnoësh choquid, tsusio dapa, Edodesên shubun icquid icboedi, Manain cuëmêdquid; utsibic, Saudo cuëmêdquid.

² Aidedishun Esuquidistuidi tantianuen buna mëmunsho Nuquin Papan Mayanën: — Saudobëdtan Bednaben aid daëdshun ëmbi chuibocpaden ma napanuna —capanëdash. ³ Adoquien, buna mëmunquin nainash Nuquin Papa chiec onqeshun abëd icquid utsibon mëdanten Saudo Bednabëbëdta mamishquin nadopanëdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanëdash abëd icquidon.

Chipide yacnoshon Esuquidistu chuibanaid

⁴⁻⁵ Esus tantiaquidon mamishquin chiaquien Nuquin Papan Mayanën nidmiac Saudobëd Bednabe Antioquiya yacnoësh puduanec nidpanëdash. Aid daëd nidsho isash Uan cashumbic Madcos cain cuënaid nidpanëdash dada uate buanshunc. Aidedi nidanec acte cuëman shubu dadpen icquid Sedusia caid yacno choash cano antabëdtoanec acte nënantanquio nidaid nactnëdquid Chipide caid yacno nidtampanëdash. Chipide yacno choash nidequi shubu dadpen icquid Sadamina caid yacno choapanëdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabëbëdtan chuibampanëdash. ⁶ Adoshombic, Sadamina yacnoësh nidquin chuibidanec Chipide cuëma utsiuc shubu dadpen icquid Pabos caid yacnotsen choash tabadoapanëdash. Ambo tabadquin isadaidbo Badesus istuidpanëdash Pabodobëd icquidon. Sataasën tantiamiaid icquin abimbo chiacbimboec, Nuquin Papan yuecquio icshun nanun chiaid chuiquidquo nebi, quequin muaquin chuipanëdash Badesusën. ⁷ Aidi Pabos yacnocquido tsusion shubun tabadpanëdash. Anocquido tsusio cobednadod caid Sedquio Paudu cuëmëdquid icpanëdash. Aidi tantiaquiono, quec tabadquin, Isedquido chosh, qesho tantias, Aidon chuibanaid tantianu, qeshun Saudobëdta Bednabe chomeshun tsusion yuedpanëdash. ⁸ Yuedac Pabado Esuquidistu chuibampanëdash. Saudo quequin isadaidbon cuënubi Pabado quequin isadaidpembon cuëmpanëdash. Aden Pabado Esuquidistu chuibanasho tantiec tsusio tsadsho isun Badesusën tantiamenquiocnuen utsi uain chuoapanëdash. Ambì ompoaid ismianesa Badesus icsho Edimus cuëmpanëdash. ⁹ Aden utsi uain chuisho tantiasshun Nuquin Papan Mayanën tantiamiac Edimus bëisequi Pabado: ¹⁰ —Satanasën bacuë yec bëdamboen naidbëdta bëdamboen chiaid tanties mibi nec. Nuquin Papan namiaid nebi, quequin ompoaid ismenquocquimbi Nuquin Papan chiaid utsi uaquin muaquin mimbi adenuidi chuibanecue. Tantia. ¹¹ Nëbi con Icbon mibi mëyanquin bëshu uaindac. Ushë chënqesho mimbi yuen isenquio iquendac —quepanëdash Pabado Edimus chiec.

Aden chuiben Edimusën ëshë cuen-cuempambo yec inchëshbudacimboec yanash: — ¿Tsuntsimbini mëdinshun buampeba? —quequin nibëdacno mishquin uëmbampanëdash. ¹² Aden Edimus bëshu uacsho isec: —Nuquin Icbon chiaid abimbo iquec —quiash tsusio Sedquio Paudu cuëmëdquid Esuquidistu tantiaquid yampanëdash.

Nidaid utsi, Pisidia caidën shubu dadpen icquid Antioquiya caid utsi yacno Bednabe Pabodobëdi choash tabadoaid

¹³ Adashic, Chipide yacnoësh puduanec nidaid Pampidia caid yacno Pabodobëd icquido canon potepanëdash. Aden potiash nidaid Pampidia caid yacno choash Pabodobëd Bednabe pudundonobi Uan cashumbic Madcos caidbidi Edusaden yacno nidoaic cuëshëdpanëdash. Adec Pabodobëd Bednabe pudundoanec nidquin shubu dadpen icquid Pedque caid ¹⁴ isbidanec nidaid Pisidia caid yacno shubu dadpen icquid Antioquiya yacno chopanëdash. ¹⁵ Ambobi tabadegui chonoadtemaid ushën Nuquin Papan chiaid chuibante shubun puduedash tabadpanëdash. Ambo tabadnubien Nuquin Papan Moises dada uamiampid isec onquequin chuibanshumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daëdi tabadacno nidshun, ¿Ëbitedi bëdambo icmenuen chuibanquin tantiametiadquido ada mibi icpe? cata —tsusion cac ambi namiaid nidshun tsusion chiacpaden Pabodobëdta Bednabe chuituidpanëdash.

¹⁶ Adoquien abi tsadacnoëshi nidtoashi Pabado: —Nuquin Papan naid mibi chiembique. Tantiaquiota. ¹⁷ Nidaid Equipito caid yacno nuquin tsusedpabo tabadshobi Nuquin Papan bëdamboen isec cudashquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquio bëyucanquin tsusedpabon tishmiaidën tishmiaid caidaido Equipito yacnoshon buanubi ¹⁸ tsusedpabon Nuquin Papan chiaid chieshëmpampic. Adoquien matses nibëdacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquin buampampic. ¹⁹ Aden buanquin nidaid Canan caid yacno buanshun anocquido isadaidpembu istuidmeshun matses utsibo utsi-utsiectsëcquiec 7tedi icquido naimbudmeshun aidon nidaidtedi nuquin tsusedpabo menebampampic. ²⁰ Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsiens icmeshumbic Nuquin Papan ambi yuecquio icshun nanun chianiad chuiquid Samued cuëmëdquid tsusedpabo chuiquid icmepampic. ²¹ Aidi isadaidbo chuiquid icnubic, Matses utsibo ancaquidpadquid bunebi, quequin tantiashun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmëdquid, isadaidbo ancaquid icmepampic. ²² Adashic, yuecash Saudo, con shënisio, Nuquin Papan chiaid tantesa uasho isun utsitsen Dabid cuëmëdquid tsusedpabo ancaquid icmeoapampic. Aidi Nuquin Papan chiacpadomboen nabanquidquio icsho isash Nuquin Papa: ‘Dabid, Isain mado, ëbi bëdamboshë icmequid, ëbi bunacpaden nabanquidquio mibi nec,’ quepampic Nuquin Papa —quepanëdash Pabado aton matses Antioquiya yacnocquido tantiamenuen chiec.

²³ Aden chiec abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanëdash. ²⁴ Aidën nadatiambocquin nabanquidquin ambi nabanaid taubicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanëdash. ²⁵ Adec onquetanequic matses acten mentobudquin nainec: ‘¿Mitsipaden ëbi isquin cuëmepsatia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ëbi icsambocquid icsho atotsieshun mibi choec? quequin chuiquidquio Nuquin Papan icmioshi, caindambi,’ quepanëdash Uan acten mentoanquid —quepanëdash Pabado.

²⁶ Aden Uan padon chiacpaden chuibanashic: —Abadauanën tishmiaidën tishmiaid caidaido nuqui icsho nuquitedi icsaid bedshunash abided cuidadec Esuquidistu unëspanëdash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanëdash. ²⁷ Padnuen, Aton madombo Nuquin Papan chomiaid Esus nec, quenquicocquin Edusaden yacnocquidobëd aton tsusio dapabo, Icsambocquid neque. Unës ua, quequin chuipanëdash. Aden chuiquin utsibëd iccuededte ushën-ushënquien abi isec onquiaid Nuquin Papan dada uamiampicpadembi aidon napanëdash. ²⁸ Esuquidistu icsaid nibëdquidquio caiqui, Icsambocquid neque. Aid unës uatiadquidi mibi nec, quepanëdash Isadaidbo Pidato caic. ²⁹ Adoquien Nuquin Papan dada uamiampicpaden nabanambien Esuquidistu cuesten dectanquin unës uacsho chicshun, Ëbi unësacsho nëidën ëbi nauedec, quequin ambi shëcuë uain nacnenaic chucanquio Osen Esus nauedpanëdash. ³⁰ Adoacsho Nuquin Papan Esuquidistu uincuemiac ³¹ capusho Cadidia yacnoësh Edusaden yacno abëd capucuenoedon aidi isbempanëdash. Aden isun aidombi Esuquidistu chuibededec. Adembidi aid isboedobëdtambi abimbo chuibanquidquio nebi —quepanëdash Pabado.

³² Aden chiashic: —Abi chiembique. Tantia. Nuquin Papan chometequid ambi chuipampid tsusedpabon isenquiocnobi ³³ Nuquin Papan uincuemiasho nuqui isondaid aidi nec. Aidi chuiquin Nuquin Papan dada uamiampid nad iqueque. Tantia. Chuinu. ‘Con madombo mibi nec.

Nëbi ëmbi uincuemiaqui ëmbi chiactedi mimbi naimbudoc.

Adosho isun ëbipadquiocnoc chuiquid dapa mibi icmemb.’

Aden ëndenquimboshë aton mado tantiaquin Nuquin Papan chiampic. ³⁴ Adecbidi ambi uincuemetequid Esuquidistun nami chodquesa icpanëdash. Aid chuiquin dada uamiampid nad iqueque. Tantiata. Chuinu.

‘Dabid chiampicpadembi mibi icsaisa icsho ëmbi bëdamboen isaid mibi nec, mado,’ quequin Nuquin Papan dada uamepampic. ³⁵ Ambi dada uamiampid utsi nad iquec:

‘Icsaisa icsho aton nami chodquesa icmenuna,’ quequin Nuquin Papan chiampic.

³⁶ ‘¿Aden dada uamequin Dabid pado chiecta onquepampic? Padenquio. Aidi Nuquin Papa bunacpadomboen naimbudquien nabanash Dabid unësacsho isun aton mëdimbon nami chodquiacono Dabid chococ aidën namitsen chodquepampic. ³⁷ Nuquin Papan uincuemetequidën namien chodquesa icpanëdash. ³⁸ Aidi icsainquocquid yec ëbitedi icsaid bedshunash abided cuidadpanëdash. ³⁹ Adoac abi tantiaquidquitsen icsaisabidi Nuquin Papan isec. Nuquin Papan naden nata quequin dada uamiampidtedi matsesën natiapimbo iquec. Aden ambi chiacpaden natiapimbo yec, Nuquin Papan bëdamboen isaid nebi, quetiapimbo icboedëmbi, Matses icsaquid icsho cuidnushe quiaish abided cuidadec Esus unëspanëdash, quequin tantiaisho, Esuspadquid icsaisa Nuquin Papan nuqui isec. ⁴⁰ Nuquin Papan chomiaid choec, quequin tsusedpabon tantienquio icampidpadquid iquenda. Aido chuiquin Nuquin Papan dada uamiampid nad iqueque. Tantia.

⁴¹ ‘Ëmbi ëndenquimboshë dada uamiampicpadembi adquid chomembi.

Ëmbi chomiaid isquidon chiac mimbi tantienquio icpec.

Adquid yec, Tantiadempambo iquec, quec mamēnshumēnquid ēbēdi tabadtiapimbo iquen-dac.

Adquid icmane qeshun tantiaquiota'

—quepanēdash Pabado iccuededquido chiec.

⁴² Aden chuibdashic Pabado Nuquin Papan chiaid chuibante shubu yacnoēsh abēd chobobōbēd puduenanec nidsho isash: —¿Iccuededte badiad utsi chonoc iccuededquin chuinuecta mibi choape? —quepanēdash iccuededquid utsibo Pabado chiec. ⁴³ Aden chianec Pabado bēd Bednabe nidsho isun isadaidbo utsin-utsinquiebēdtan isadaidpembo isadaidbopadquid icnuequid utsin-utsinquien tsibanampanēdash. Aden abi tsibanansho isash: —Nuquin Papan bēdamboen isaid yec bēdamboec tabadta —quepanēdash Pabado Bednabebēd.

⁴⁴ Adashic, chonoadtemaid ushē icnuc Nuquin Papan chiaid tantianuec Antioquiya yacnocquid dadpen iccuededoapanēdash. ⁴⁵ Dadpen iccuededsho isash isadaidbo tsusiobo: Ēmbi chuibanansho tantianuec aitedi choenquo iccosh, quequin tantiec nēishpanēdash. Adec nēishash: —Mimbi Nuquin Papan chiaid icsamboen chuibanec —quepanēdash Pabado caic.

⁴⁶ Adoaquien, dacuēdenquo yec Pabado bēd Bednabe: —Mibitedi con matses icsho, Nuquin Papan dada uamiampid chuibanu, queboedēmbi tantiesa icsho isun mibi chuibanenquo iquemi. Mibi tantiesa yec Nuquin Papabēd tabadte bunesabidi icnuc isadaidpembo Esuquidistu chuibanendambi. ⁴⁷ Nuquin Icbon naden tantiamioshibique. Tantia. Chuinu.

“Isadaidpembo ēmbi chiaid chuibanquid mibi icmēmbi

ma nidaidtedi yacno ēbi tantiaquido ēbi yacno puduedquid ma icpanuna,”

quequin chioši —quepanēdash Pabado abi chīshēnquido isadaidbo Nuquin Papan dada uamiampicpaden chiec.

⁴⁸ Adsho tantias isadaidpembo: —¡Padtec! Nuquin Papan chiaid bēdamboshē iquec —quecuededpanēdash. Adoaquien, Nuquin Papan ēbēdi mibi tabadmendambi, quequin chiaid ambi tantiamiactedi Esuquidistu tantiaquid yampanēdash.

⁴⁹ Adec Esuquidistu tantiaquid yanash auēshquo dadpen nidequi nidaid dēuequid utsi-utsiec yacno choash tabadquin aidontsen Esuquidistu chuibanapanēdash. ⁵⁰ Adosho tantias, Pabado icsambocquid nec, quequin isadaidbo tsusiobon Antioquiya yacnocquidon chidobōbēdta anocquido chuiquid dapa nēishmeshun Pabado bēdta Bednabe mēyantānquin ashunquo nidmepanēdash. ⁵¹ Aden nidta cac puduanec nidtuidash, Esuquidistu ēmbi chuisho tantiesabo aido nec, quequin nidaid putu tasequequin ismias nidanec shubu dadpen icquid Iconio caid yacno chopanēdash. ⁵² Pabado bēd Bednabe Antioquiya yacnoēsh nidan Antioquiya yacnocquid Esuquidistu tantiaquido: —Bēdambo iquebi —quecuededpanēdash. Adembidi aitedi aton Mayan Nuquin Papan menepanēdash.

14

Iconio yacno

¹ Adashic, Pabado bēd icquido Iconio yacno choash tabadpanēdash. Ambo tabadec Nuquin Papan chiaid chuibante shubu yacno nidash puduedpanēdash. Ambo puduedshun Esuquidistu chuibanac isadaidbōbēd isadaidpembo dadpen Esuquidistu tantiaquid yampanēdash. ² Aido Esuquidistu tantiaquid yanubi isadaidbo utsibo Pabado chuibanaid tantiatipimbo icquin Esuquidistu tantiaquido yuaquin chuiquin isadaidpembo utsibo nēishmepanēdash. ³ Aido nēishmiambi Iconio yacno yuec tabadquin Pabado Bednabebēdtan dacuēdenquiocquin Esuquidistu chuibanpanēdash. Aden chuibanansho isun Nuquin Papan ambi nadatiambocquin tantiadempamboctequid ismequid Pabado bēdta Bednabe icmepanēdash. ⁴ Aden icmiac aid daēdshun nadatiambocquin nasho isash, Isadaidbo tsusiobon chuibocpadec Pabado bēd Bednabe icsambocquid nec, utsi-utsiec quenubien, Ambi chiaid abimbo iquec, utsibo quepanēdash. ⁵ Aden chuishumbic, Pabado bēdta Bednabe cuestanquin cuēnoten se-senuequin Esus tantiesabo isadaidpembon aton tsusio dapabōbēdtan cainubi adembidi isadaidbon aton tsusio dapabōbēdtan cainoapanēdash. ⁶⁻⁷ Aden caimbededosh, quequin tantiaquidēn chiac cuenec nidequi nidaid Dicaonia caid yacno Pabado bēd Bednabe choash shubu dadpen icquid Disteda caid yacno choash tabadquin Pabado bēdtan Bednaben Esuquidistu chuibanpanēdash. Adtanec auēshquo puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibanpanēdash. Adtanec auēshquo puduanec nidshun dēuequiec shubu dadpen icquid utsi-utsiec yacnocquidotsen chuibanpanēdash.

Disteda yacno

⁸ Disteda yacno tabadnubien anocquid taicsaidi anin tishaid caputiapimbo icpanēdash. ⁹ Aidi Pabado Esuquidistu chuibansho tantiec, Esuquidistun ēbi bēdamēpatsiash, quec otacquo tsadpanēdash. Aden caputiapimbocquidēn tantiacpadomboen Nuquin Papan Pabadotsen tantiamiac ¹⁰ caputiapimbocquid comapenen bēisquin: —Nidto —Pabado cac badedi nidtoash taicsaid bēdanash capupanēdash.

¹¹ Aden taicsaid bēdamiac capusho isash anocquido aton onqueten cuēdcuededquin: — Disteda yacnocquidon tantiaid matsesbimboec yanash abucuēsh budoshe. Nēid daēdi isec cho —capanēdash. ¹² Adtanequi Bednabe otacquo tsadquid icsho isash ambi tantiaid abentsēc Upited icnu Upited cain Bednabe cuēnquimbi Pabado chuiquidquo icsho isun ambi tantiaid utsi Medcudio icnu Medcudio cain Pabado cuēmpañdash Disteda yacnocquidon. ¹³ Aden cuēnsho tantiaishun baca bēnē daēd bēec: Mibi daēdi tantiaquido Disteda yacnocquido nec, quequin, Ismenu, quequin ambibi tantiacbimboecnuc nacenaid Upited caid dayun uaquido baca cuesunenu, quepanēdash.

¹⁴ Aden baca cuesunenuen bēsho isun abi dasiuidaid aton dashcute bēntsecquid shoyonquin cancheuidashic iccuededquidon nēnantanquo nidash Pabado bēd Bednabe comapenec nadpanēdash: ¹⁵ —Ēbi daēdi mibipadquid matsesquo nebi. Mimbi tantiacmaid nebique. Baca cuesunenda. Chiaid bēda mibitedi naden chuinuec chobi. Nuquin Papa caid abentsēcquiobi iquec. Aidēmbi abubēda nidaid uashubiq aiēnquicquidtedi uabanampidquo neque. Aiduidtsēqui tantiaquin ambi uaidbimboecnuc matsesēn nacenaid tantiesa icta. ¹⁶ Ēndenquimbo Nuquin Papan, Adoenda, cainquiocnoc matsesēn ambi tantiacpaden nabampampic. ¹⁷ Aden, Adoenda, cainquiocquimbi, Abitedishun icbo icquin bēdambocquid nebi, quequin ismequin ue secamedenequinc, cuēte bacuēmequinc, nuqui penun tiedēn nitsimbeniaid canimequinc paquin Nuquin Papan nac bēdamboen nuquitedi pebededec. Aden nabanquin Nuquin Papan, Bēdambo iquebi. Cuishon, camiaido nuquitedi nec —quepanēdash Pabado bēd Bednabe Disteda yacnocquido chiec. ¹⁸ Aden chuido-chuidoaiqui baca cuesunenu icpanēdash Disteda yacnocquidon.

¹⁹ Adnubien Antioquiya caid yacnocquidobēd Iconio yacnocquido Disteda yacno cho-choshon, Pabado icsambocquid nec, quequin chiac Disteda caid yacnocquido nēishcuededpanēdash. Adec nēishcuededshun Pabado cuēnoten se-siash, Unēsosh, qeshun nimbanquin buanshun shubu nibēdacno Pabado netampanēdash. ²⁰ Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobēd Disteda yacno choec shubun puduedpanēdash. Badiadash puduanec shubu dadpen icquid Dedbe caid yacno Pabado bēd Bednabe nidoapanēdash.

Nidaid Sidia caid shubu dadpen icquid Antioquiya yacno choaid

²¹ Adec Dedbe yacno choash tabadquimbi Pabado bēd Bednaben chuibanac Esuquidistu tantiaquid dadpen yampanēdash. Auēshquo puduanec nidoaic padpidec Disteda caid yacno choash tabadquin, Dadpen tantiamequiono, quequin chuibanpanēdash. ²²⁻²⁴ Aden chuibanshumbic: —Natiavianquid iquendac. Adquid icnu Nuquin Papa yacno puduedash Esuquidistu tantiaquid yec ambo nuquitedi tabadendac, quec nēbi dayacquo yec tabad —capanēdash Pabado. Adotanquin ambia Esus tantiaquid utsi-utsien Pabado bēd Bednaben: —Bēdamboec tabadquin ismequin Esuquidistu tantiaquid utsibo chuiban —capanēdash. Adotanec, ambi chuiboedobēd Pabado Bednabe chedo Nuquin Papauidi tantiec buna mēmnuquin chiec onquepanēdash. Aden Nuquin Papa chuiquin naimbudquin, Nēmbocquid mibi tantiaquido bēdamboen dayun uata, Papa, quequin chianec Pabado bēd Bednabe chedo Disteda yacnoēsh nidoapanēdash. Adecbidi Iconio yacno choashun adomboembidi chuibanapanēdash. Adecbidi Antioquiya yacno choashun adomboembidi chuibanapanēdash. Antioquiya yacnoēsh puduanec nidec nidaid Pisidia caid datambētsenec nidaid Pampidia caid yacno choash nidec ²⁵ shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanēdash. ²⁶ Auēshquo cano antabēdtoanec nidec shubu dadpen icquid Antioquiya caid yacno, Nuquin Papan Mayanēn nidta, quequin chiondacnombo choapanēdash. ²⁷ Ambo choash tabadquin anocquido Esuquidistu tantiaquid utsibobēd iccuededshun Nuquin Papan tantiamiacpaden abi capucueniacnoshon ambi nabanaidtedi Pabado bēd Bednaben chuibanpanēdash. Isadaidpempo dadpen Esuquidistu tantiaquid yamposh, quequin chuipanēdash. ²⁸ Adtanequi yuec Antioquiya yacno Esuquidistu tantiaquid utsibobēdi Pabado Bednabe chedo tabadpanēdash.

15

Edusaden yacnocquido iccuededec tantianu quiaid

¹ Pabado bēd Bednabe Antioquiya yacno choabincubien nidaid Udeya caid yacnoēsh choquido Esuquidistu tantiaquid utsibo Antioquiya yacno choash tabadquin, Nuquin

Papan naden nata quequin chiaid Moises dada uamiampicpaden shui dëbid dëtemesa abi yacno Esuquidistun yuedtemaid nendac, quequin chuipanëdash. ² Adnubic Pabadobëd Bednabe Antioquiya yacno choash tabadquin aidon chiaid tantiaash: —Nuquin Papan aden chiambo iqueque. Aden chienda —quepanëdash.

Adsho comapenec cuëdquin chushcapanëdash. Adsho tantiaashun abi chuiquidon, Edusaden yacno nidshun chushcanamboed chuitanta, quequin Pabadobëdta Bednabe chuishumbic Esuquidistu tantiaquid utsibo chuioaquin aido nidmepanëdash. ³ Adoac Antioquiya yacnoësh puduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuipanëdash. Adsho tantiaash: —Aid tantiec bëdambo iquebi —quepanëdash anocquid Esuquidistu tantiaquido. Adtanec auëshquio nidequi nidaid Samadia caid yacno choash tabadquin adomboembidi chiac adquiecbidi, Bëdambo iquebi, quepanëdash anocquido. ⁴ Auëshquio puduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobëdta Bednaben chuibanapanëdash. ⁵ Aden chiac Esuquidistu tantiaquido, Nuquin Papan naden nata quequin chiaid tantiamequido: —Nuquin Papan naden nata quequin chiacpaden isadaidpembotsen shui dëbid dëtemetiaquidi nec. Nuquin Papan naden nata quequin Moises dada uamiampid nabantiadquid neoaic —quepanëdash.

⁶ Adoquien Esuquidistu ambia tantiaquido tsusiobobëd Esuquidistun ëbi chuibeneta caido: Tantiabono, quiash onquecuedpanëdash. ⁷ Adec yuec onquecueddash nidtoash Petedo nader onquepanëdash: —Chuinu. Tantiata. Ënden Nuquin Papan naden chuipondashi: “Isadaidpempo Esuquidistu tantiaquid icmete bunebique. Aidotsen chuibanta,” quequin chuipondashi. Aden ëmbi chuioasho mibitedishun tantiondac. ⁸ Ëmbi isadaidpempo Esuquidistu chiac abi tantiaquid aido yampondash. Matsesën tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniicapademi isadaidpempo meneoapondash. ⁹ Utsibo nec, quenquicoquin aidotsen tantiamequin paucoapondash. ¹⁰ Aden Nuquin Papan nasho isun, ζAtotsieshun Nuquin Papan naid icsambo iquec quiacpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? ¹¹ Padenquo icnuna. Matsestedi icsaquid icsho cuidnushe quiash abided cuidadac, quequin tantiaquiec unësash abëdi tabadendac, quequin nuqui tantiacpaden isadaidpempo Esuquidistu tantiaquido yanshun tantiec —quepanëdash Petedo.

¹² Aden Petedon chuiquin ënambic Pabadotsen Nuquin Papan tantiamiac ambi natiambocquin naquin isadaidpempo ismebanaid chuipanëdash. Adembidi Bednaben chuioapanëdash. ¹³ Aid daëdshun chuibanquin nainan Esusën utsi Acobo, Esus tantiaquido tsusio dapa, nadpanëdash: —Ëmbitsen chuinu. Tantiata. ¹⁴ Isadaidpempo tantiaquin aido Esus chuibanta, quequin Nuquin Papan chiacpaden Simon Petedon chiac isadaidpempo Esus tantiaquid yansho Nuquin Papan aidtedi nuquibëdta aton matses icmiac.

¹⁵ Adomboembidi Nuquin Papan chuimiaidën dada uampid nad iqueque. Tantiata. Chuinu: ¹⁶ “Isadaidbobëd yuec tabadenquicoboedi padpidec choash aidobëd icoaindabi. Dabid padon tsyuecquido isadenquicoboedi isadcuenendac

¹⁷ ma aton Icho matsestedishun istuidpanuna;

ma adembidi isadaidpembon ëmbi cuënaidon aidbidi istuidpanuna,

¹⁸ quec Nuquin Icho ambi ënden tantiampicpadomboen chiaid nec”

—quiashic abi Acobo onquec: ¹⁹ —Nuquin Papan chiamiid tantiaquin nuquin tsusedpabon naden nata quequin chiacpaden nata isadaidpempo cainquo ictiad. ²⁰ Nëiduidtsëqui dada uaquin isadaidpempo chuibanuna nuquibi: Nuquin Papan uaidbimboecnuc nacenaid tantiaquin pete sanaid penda; adembidi, min chidowidtsëqui chudta; adembidi, min bënëiduidtsëqui chudmeta; adembidi, Nëish têtaniaid itacchobi codocaid penda, quequin isadaidpempo chuibanuna. ²¹ Adec Moisesën dada uaid iccuededquin isec nuqui onquedenec. Aid icnuc, Adomboembidi nata, quequin isadaidpempo chuinuna —quepanëdash Acobo iccuededquido chiec.

²² Adashic Esuquidistu tantiaquido iccuededec onquec ënëdshun ëmbi dada uaid Antioquiya yacno buanuec Edusaden yacnocquid daëd nidta, quequin Pabadobëdta Bednabe nidmepanëdash. Abentsëc Udas cashumbic Badsabas cuënaid; utsibic, Sidas cuëmëquid. Aid daëdi Nuquin Papan chiaid comapenen tantiaquidquo icpanëdash. ²³ Isadaidpempo chuiquin Edusaden yacnoshon Esuquidistu tantiaquidon naden dada uapanëdash:

“Esuquidistun ëbi chuibeneta caidobëdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpempo Esuquidistu tantiaquido Antioquiya yacno tabadquidobëdta nidaid Sidia yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec onqueta. ²⁴ Èbëd icquido nëuëshquio nidash mibi yacno choash puduedshun, Isadaidbon naden nata quequin chiaid

natiadquidi mibi nec, quequin mibi icsamboen chiosh, quequin utsibon chioshi. ²⁵ Aden chuisho tantiashun nēmbocquidobēd iccuededec onquequin abentsēcshun tantiacimboen dada uaombi. Aidi nēmbocquid daēdi Pabado Bednabebēdta buantan, quequin chiembi. ²⁶ Unēsmane, quenquio yec capucuenequin Esuquidistu chuibanquido Pabado bēd Bednabe nec. ²⁷ Adquid aid daēd icsho isun aid chedobēdta Udas Sidas chedo mibi yacno nidmēmbi. Adoac ēmbi dada uacpaden ma mibitēdi chuioapanuna abimbo iquec camenuen. ²⁸ Nuquin Papan Mayanēn ēbitēdi tantiamiacpaden isadaidbon naden nata quequin chiapaden nata mibi caisa nebi. ²⁹ Nēidtedtsēqui ēbitēdishun nata caid nec: Nuquin Papan uaidbimboecnuc nacenaid tantiaquin utsibon abi yacnoshon sanaid penda; adembidi, min chidoidtsēqui chudta; adembidi, min bēnēuidtsēqui chudmeta; adembidi, mimbī nēish cuesuniad intacchobi codocashun penda. Adoac ēmbi chiapaden nabanec mibi bēdambo icpec. Padi aidtedtsēqui chiembi.”

³⁰ Aden dada uaquin nainshun ambi nidtan caboed meniac Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menapanēdash. ³¹ Aden meniac isbanash: —Mimbī bēboed dada uaid isash bēdambo iquebi —quepanēdash isadaidpembo Antioquiya yacnocquido.

³² Adnubic Udasēn Nuquin Papan chiaid chuibanquin Esuquidistu tantiaquido Antioquiya yacno tabadquido bēdamboen tantiamapanēdash. Adomboembidi chuibanquin Sidasēn tantiamapanēdash. ³³ Aden dadpen ushquin chuibanshun: —Edusaden yacno nidoaibi —caquien:

—Ai, mibi nidsho isash unēsquio icquimbi mibi chomequido yacno nidtan, mibi caimbi —quepanēdash Esuquidistu tantiaquido Antioquiya yacno tabadquido. ³⁴ Adec aido Edusaden yacno nidnubien ³⁵ Pabado Bednabe chedobēdta Antioquiya yacno tabadquin Esuquidistu tantiaquid utsibo Nuquin Papan chiaid bēdamboen tantiamenuen chuibanapanēdash.

Pabado bēd Bednabe cuēshēdaid

³⁶ Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid —quepanēdash.

³⁷ Adoquien: —Ma Madcosbidi nidoanu. Chuita —quepanēdash Bednabe.

³⁸ Adoquien: —Chieshec aidi cuēshēdondashe. Padi. Nuqui daēdtsēqui nidnu. Nid —quepanēdash Pabado.

³⁹ Adoquien Bednabe aden tantienquio yec Pabado bēd comapenec onquiash Madcosbēd cano antabēdtoa nec Chipide yacno nidoapanēdash. ⁴⁰ Adnubien Pabado Sidas abēd Edusaden yacnoēsh choboed caic: —Nuquibi nidnuna —quepanēdash.

Adec aid daēd nidnuesho isash onquid Esuquidistu tantiaquido: —Ma Nuquin Papan mibi daēd bēdamboen nidmequin ma mibi bēdamboen namepanuna —cac Pabado bēd Sidas nidpanēdash. ⁴¹ Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bēdamboen tantiamenuen chuibanapanēdash. Aden chuibeneshumbic nidaid Sidisia yacno choshon Esuquidistu tantiaquido shubu utsinshubu utsinquec iccuededacnomboec puduedcuenequin Pabado chuibanapanēdash.

16

Pabado bēd Timoteyo nidaid

¹ Adec nidec shubu dadpen icquid Dedbe caid yacno choash tabadquin adomboembidi chuibanooash nidequi shubu dadpen icquid Disteda caid yacno Pabado bēd Sidas choapanēdash. Ambo Esuquidistu tantiaquid Timoteyo cuēmēdquid tabadapanēdash. Aidēn tita isadaidbo Esuquidistu tantiaquid icnubi aidēn papa isadaidpembo quidieco mates icpanēdash. ² Timoteyo bēdamboecquid nec, quequin Disteda yacnocquidon Pabado chuibanapanēdash. Adomboembidi shubu dadpen icquid Iconio yacnocquidon chuioapanēdash. ³ Aden dadpenshun chuisho tantiash Timoteyo buante bumpanēdash Pabado. Adec, Timoteyo buano, qeshun ēbi capucueniacno isadaidbo dadpen iqueque. Aidon Timoteyo isash, Aidēn papa quidieco mates icnuc aton madobidi isadaidpembo nec, aido quenushe qeshun Pabado Timoteyon shui dēbid dētemapanēdash. ⁴ Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaquin chiaid Pabado chuioapanēdash. ⁵ Adembidi Nuquin Papan chiaid chiac ēnden Esuquidistu tantiaquidon tantiabenguiocnobi utsi dadpen Esus tantiaquid yanoapanēdash.

Ushquin Masedonia yacnocquid Pabado isaid

⁶ Adanec nidaid Sidisia caid yacnoēsh nidsho Nuquin Papan Mayanēn: —Nidaid Asia caid yacno Esuquidistu chuibanuec nidenda —cac Pabado bēd icquido nidaid Pidiqua caidtsen datambidanec nidaid Cadasia caidbidi datambidanec ⁷ nidaid Misia caid yacno

chopanēdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanēn aido tantiamēoapanēdash. ⁸ Adoac nidaid Misia datambidanec shubu dadpen icquid Todoas caid yacno ēbi tabadacnobi chopondash. ⁹ Ambo choash tabadec inchēshnuc ushquin nidaid Masedonia caid yacnocquido Pabadon ispondash. Adec ushquin isquin nidaid Masedonia yacnocquido: —Ēbitedi Esuquidistu chuibanec cho —quec onquesho Pabadon tantiapondash. ¹⁰ Aden tantias: —Nuquin Papan nidaid Masedonia caid yacnoshontsen Esuquidistu chuibanta caid nebiq. Nacnenuna —Pabadon cac buanun nacnempondash. Esuquidistu tantiaquid yanash ēbitsen Pabadobēd nidpondabi.

Didia cuēmēdquid Esuquidistu tantiaquid yanaid

¹¹ Adanec Todoas yacnoēsh puduanec cano antabēdtoanec cuebi nidequi acte nēnantanquio nidaid nacnēdquid Samotodasia caid yacno choash Pabadobēd icquido tabadtuidpondash. Badiadash auēshquio puduanec cano antabēdtoanec nidquimbi potebidanec nidaid Masedonia caid yacno ēbitedi chopondabi. Aid nidaidēn acte cuēmambi shubu dadpen icquid Niapodis caid yacno pudundoanec ¹² nidequi shubu dadpenquio icquid Pidipos caid yacno domanobo dadpenquioshē tabadacno yuec ushec tabadpondash.

¹³ Pidipos yacno tabadashic isadaidbo iccuededte badiadēn Nuquin Papa chiec ut-sibo onquedeniacno istuidnuec puduanec shubu nibēdacno nidequi acte utsi cuēmambi choapondash. Ambo choshon iccuededquido chidobo istuidshun Esuquidistu Pabadon chuibampondash. ¹⁴ Pabadon chuibanacno chido Didia cuēmēdquid shubu dadpen icquid Tiatida caid yacnoēsh choquid icpondash. Aidēn piucquid bednuec dashcute cuēshaid umu-umumbocquid menebenepondash. Aidi Nuquin Papa tantiaquid icquin Pabadon chuibanubi Nuquin Icbon tantiamiac Esuquidistu tantiaquid Didia yampondash. ¹⁵ Aidbēd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: —Esuquidistu tantiaquid mibipadquid nebiq. Con shubuno ushec cho —cac nidash Didian shubun puduedash Pabadobēd icquido tabadpondash.

Pabadobēdta Sidas quēnēn nauedaid

¹⁶ Adashic padpidec Nuquin Papa chiec onquedeniacno Pabadobēd icquido nidoasho chido yuaidēn bēquedtuipondash. Aidēn mayan icsan tantiamiacpaden yuecash nad iquendac, quequin chuisho piucquid dadpen aid chido matsesēn meniac aid chidon ambi bedaidtedi abi yuaquid meneoapanēdash. ¹⁷ Pabadobēd icquido bēquedtuishun tsibambēc choec aid chido: —Nēid dadatedi Nuquin Papan namiaidquio nec. Abi yacno puduedmianquid iquec, quequin chuibanquid nēid dadatedi nec —quec ¹⁸ badiadquidēn-badiadquidēnquiec comapenec cuēdpondash.

Adec cuēdtonesho tantiate bunenquio yec amibidi biadiadquin mayan icsa dapudedaid chido chuiquin comapenen Pabadon: —Esuquidistun nadatiambocquin naidēnquio dapudenta —cac badedquio mayan icsa dapuduempondash. ¹⁹ Aden dapuduemiac chido bēdanacsho isun abi yuaquid: —Nēbi nadquio iquendac, quequin chuiatipimbo nuquin yua iquec. Aden chienquiocquin piucquid bedtiapimboquin nuqui meneotiapimbo iquec, quequin tantias nēishun Pabadobēdta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton na bēshun utsibon sambanaid anoentsēqui abi chuiquido icsho isun chido yuaquidon Pabadobēdta Sidas ambo buampondash. ²⁰⁻²¹ Aden abi chuiquid tsadacno bēash: —Nēid dada daēd isadaidbo nec. Nēmo choshon abi chuiquidon naden nata quequin chiaid chuibanec. Ēbitedi domanobo icquin ambi chiaid ēbitēdishun natemaid icnuc matstededi chushquecuededosh —quepondash chido yuaquido abi chuiquido chiec. ²² Aden chuisho tantiaquidon chiac dadpen cho-choash iccuededquin Pabado bēquidon chiacpadomēn aidontsen chuioac abi chuiquido: —Bēboedon dashcute chicshun cueshcaten cuesta —cac sondadon cuespondash. ²³ Aden comapenen cuesmeshun buameshun quēnēn nauedmeshun ambi quēnēn nauedaid ista caid chuiquin Pidipos yacnocquido chuiquidon: —Puduenanec cuenushe qeshun nēid daēdi bēdamboen isquiota —capondash. ²⁴ Adsho tantiasnun ambi ista caidēn Pabadobēdta Sidas nēnantanquio quēnēn nauedquin tsadunshun cuate shēcuē uaidēn tausunash puduantanquin quēnē bēdamboen bēdashpanēdash.

²⁵ Aden bēdashash aton shubu dayunquiocquidēn puduedambic inchēshpotsembo Pabadobēd Sidas Nuquin Papa chiec onquepanēdash. Adecbidi Nuquin Papan naid chiec cuēdēmpanēdash. Adec cuēdēnsho utsibon tantianubi ²⁶ comapenec nidaid ishcudnubi mētaniaidtedi mēchiquidpanēdash. ²⁷ Adnubien ista caid isec tsadboedi ushtanec isucunquin isac shēcuē bēdashaid ēnden shēcniac. Adsho isash ista caid: —Quēnēn nauedaido puduenpuduempancui —quetanec: —Chuiquid dapabon ēbi cuesunemetsiashe —qeshun

siadnuequin chēshte abi tsiusudaid chicsho ²⁸ istanquin Pabado: —Quēnēn nauedaidtedi nēmbō iquebique. Seshuniadenda —quequin comapenen cuēmpañēdash.

²⁹ Adoaquien, seshuniadtsemboedēn: —Tabote bec cho —cac ambi namiaidēn tabote bedtanquin meniac tabote bedshun sananec badedi quēnēn puduedash dacuēdec uēdēquec Pabadobēd Sidas tabadacno choash danēshēn sebudec shuebudpañēdash. Mibi daēdi bēdamboquid icnubi adquidpenquio nebi, quequin tantiaquin ismepañēdash. ³⁰ Adsho isun Pabado niddomiaqui seshuniadtsemboed bēyucanec nidquin aton shubun Pabadobēdta Sidas yuedash: —¿Nuquin Icho yacno puduednush mitsipadequibi ēbi icsaid cuidadpeque? Chui. Tiantianu —quepañēdash seshuniadtsemboed.

³¹ Adoaquien Pabado: —Mibibi cuidadtiapimbo iquec. Mibēdta min shubun icquido icsaquid icsho cuidnushe quiash abided cuidadec unēsash Esuquidistu aton Papa yacno puduedash abi tantiaquido yuedquid neque. Mibi icsaid ēnash, Esuquidistu con Icho nec, quequin abimbo tiantia ³² —queshumbic seshuniadtsemboedbēd icquido Esus tantiamenuen Nuquin Icbon chiaid Pabado chuipanēdash.

³³ Adoaqui Pabadobēdta Sidas cuesaid chiuē acten bēpañshunquin nainacsho aton shubun icquido Esuquidistu tantiaquido yansho isun aidtedi Pabadobēdta Sidasēn acten mentobampañēdash. ³⁴ Aden mentobanaqui aton shubun yuedshun pemepañēdash. Adashic, Nuquin Papan chiaid bimbo tantiaquid yec ambi bēdambo icmiaido seshuniadtsemboedbēd icquido icpañēdash.

³⁵ Adashic, badiadash Pidipos yacnoquido chuiquidon: —Nauedaid shubu yacno nidshun quēnēn nauedboed daēd pudueme, quequin chuitanta —cac quēnē yacno nidshun ista caid adomboembi chuiopanēdash. ³⁶ Aden chiac ista caidēn: —Quēnēn nauedboed daēd pudueme, quequin chuiquid dapabon chiosh, quequin aidon chomiaidēn chioshibique. Dacuēdenquio yec nid —capanēdash Pabadobēdta Sidas chuiquin.

³⁷ Adoaquien Pabado: —Ēmbi naid chuimenquiocquin ēbi daēdi domanobo icsho utsibon isnubi cuesmeposhi. ¿Nēbi puduemenuen utsibo isenquiocnobida ēbi daēdi nidmepec? Padenquio caimbi. Ēbi daēdi puduemenuec ma chuiquid dapabo abibi chopanuna —quepañēdash.

³⁸ Aden chiac puduenanec nidequi abi chuiquido yacno choshon, Mimbi quēnēn nauedmeboed daēd domanobo nec, quequin chuisho tantiaish chuiquid dapabo comapenec dacuēdcuededpañēdash. ³⁹ Adec dacuēdec nidequi nauedaid shubuno choash: —Domanobo nec, quequin tantienquiocquin mibi quēnēn nauedmiombi —queshun puduemetanec: —Pidipos yacnoēsh niddan —capanēdash Pabadobēdta Sidas chuiquin. ⁴⁰ Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bēdamboen tabadmenuequin Pabado chuibanpañēdash. Aido chuibidanec Pabadobēd icquido nidoapanēdash.

17

Tesadonica caid yacnoquido isadaidbo nēishcuedaid

¹ Pidipos yacnoēsh puduanec nidequi Pabadobēd icquido shubu dadpen icquid Ampipodis caid datambidanec shubu dadpen icquid Apodonia caidtsen datambidanec shubu dadpen icquid Tesadonica caid yacno choash, Nuquin Papan chiaid chuibante shubu iquec, quesho tantiaish Tesadonica caid yacno Pabadobēd icquido tabadpañēdash. ²⁻³ Ambo tabadec isadaidbo iccuededte badiadēn abi nidteniacpadec Nuquin Papan chiaid chuibante shubu yacno choshon Pabado Esus tantiamenuen Nuquin Papan ēnden chiampid chuibanpañēdash. Nuqui icsaid bedshunash abided cuidadec Esuquidistu unēsaid ambi uincuemetequid Nuquin Papan Chomiaidquio nec. Aidi nuqui Quidistu caid neoaic, quequin chuipanēdash Pabado. Sabado 3ted matamequin adomboen chuibanpañēdash. ⁴ Aden chuibanqui Esus tantiaquid utsi-utiec yampañēdash. Nēdic, isadaidbo utsi-utiec; utsibic, Nuquin Papa tantiaquido quidieco matses dadpen; utsibic, anocquido chuiquid dapabon chido utsi-utiec aido Esus tantiaquid yampañēdash.

⁵ Aden Pabado chuibanac Esus tantiaquid dadpen yansho isash isadaidbo utsi-utiec nēishun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nēishmiac natia chushquecuededpañēdash. Adec chushquec nidequi Pabadobēdta Sidas bednuec Ason cuēmēdquidēn shubuno puduedec nidpañēdash. ⁶ Ambo choshon Pabadobēd Sidas nibēdsho isun Esuquidistu tantiaquido Asoembēd icquido bedshun abi chuiquid dapabo yacno Pabado chieshēnquidon buanec abi chuiquid dapabo yacno choash: —Nidaid utsi-utiec yacno capucuenuequin chuitemaid chuibanquido nēmbō ⁷ choacsho Asonēn aid daēd yuedaccosh. Nuqui ancaquid Sesadēn chiaid niacquin ancanquid utsi Esus cuēmēdquid iquec, quequin chuibanec —quepañēdash Pabado chieshēnquido abi chuiquido chieci.

⁸ Aden, Ancanquid utsi iquec, quequin Pabadobëdta Sidasën chiec, qesho tantiash chuiquid dapabo iccuededquidobëd comapenec chushquecuededpanëdash. ⁹ Adtanec abi chuiquid Asombëd icquido caic: —Nëbi, ¿Atotsi tantiaquin Pabadobëdta Sidas yuedo? quequin mibi chuimetiapimbo iquembi. Yuecshun mibi chomeshun chuimembi. Ëmbi chuimiabi Tesadonica yacnoësh nidenda. Ëmbi chiacpaden nanuequin piucquid ëbi mene —capanëdash Tesadonica yacnocquido chuiquid dapabon Asombëd icquido chuiquin. Adoaquien piucquid meniac bedshun: —Min shubuno nidtan —cac nidanepanëdash Asombëd icquido.

Bedeya yacnotsen tabadaid

¹⁰ Adshumbic bednushe qeshun aid inchëshëmbi Tesadonica yacnocquido Esuquidistu tantiaquidon Pabadobëdta Sidas shubu dadpen icquid Bedeya caid yacno nidmepanëdash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanëdash. ¹¹ Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ënden dada uamiampid Pabadon chuibanoasho tantiashun bëdambocquid icquin, Abimbobida chuibanoshe. Isbono, quequin Nuquin Papan chiampid isban-isbanpanëdash Bedeya yacnocquidon. ¹² Aden isbanec, Abimbo caic, quish Esuquidistu tantiaquid dadpen isadaidbobëd isadaidpembo Esuquidistu tantiaquido yampanëdash. Adecbidi isadaidpembo chuiquid dapabo quidieco matses utsi-utsiec aton chido chedobëd Esuquidistu tantiaquid yampanëdash.

¹³ Adnubien, Bedeya yacnoshontsen Pabadon chuibanec, qesho tantiash Tesadonica caid yacnocquido, isadaidbo, Asombëd icquido bedmeboedo, Bedeya yacno choshon anocquidotsen nëishmiac comapenec chushquecuededpanëdash. ¹⁴ Adsho tantiashun Esuquidistu tantiaquidon Bedeya yacnocquidon acte dapa cuëmano Pabado nidmepanëdash. Adnubi Sidasbëd Timoteyo nidenquo yec Bedeya yacno tabadnubien ¹⁵ Bedeya caid yacnoshon utsibon bëyucanquin Pabado buampanëdash. Aden buanec nidequi shubu dadpen icquid Atenas caid yacno chopanëdash. Ambo choash abia bëyucanquido: —Ëbi chobocnobidi Bedeya yacno nidoaibi —qesho tantiashun Pabadon:

—Mibi yacno choash, Badedquo Atenas yacno chota, quiosh Pabado, quequin Sidasbëdta Timoteyo chuita —capanëdash. Aden Pabadon chiaquien Bedeya yacnocquido abi yacno nidoapanëdash.

Atenas yacnotsen Pabado tabadaid

¹⁶ Abia bëyucanquido Bedeya yacno nidambi Atenas yacno Pabado tabadquin, Sidasbëd Timoteyo choec, qeshun cainec capuquimbi Atenas yacnocquidon nacnenaid isbampanëdash. Aidon Nuquin Papan uaidbimboecnuc nacnenaid dadpen tabëcaid papa cain cuënaid ambi tantiaido icsho isash, Nuquin Papa Abentsëcquiobi iquec, quequin tantiesa Atenas yacnocquido nec, quequin tantiec Pabado unësquio yampanëdash. ¹⁷ Adec unësquio yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabadon chuibampanëdash. Adembbidi anocquidon piucquid bednuen aton na sambanshun ismiacno nidshun adomboembidi Pabadon chuibanopanëdash. Isadaidbobëd onquequin Esuquidistu Pabadon chuipanëdash. Adembbidi isadaidpembobëd onquequin Esuquidistu chuioapanëdash. ¹⁸ Anoshon chuibanasho tantiash epicudeyo cuëmëdquidën chuinëdacpaden tantiaquido Pabadobëd onquepanëdash. Adembbidi tantiash estoico cuëmëdquidën chuinëdacpaden tantiaquido Pabadobëd onquepanëdash. Aido Pabadobëd onquequin Pabadon Esus chuisho tantienquo yec: —¿Atodain comapenec onquequin nëid dadan chuipash? —quepanëdash. Adnubien utsi: —Matses utsibon papa cain cuënaid chuibanec nepanui —quepanëdash. Pabadon Esuquidistu unëdash uincuenaid chuisho tantiash adpanëdash. ¹⁹⁻²⁰ Adec onqueshumbic, Utsin tantiaid tantianu, quec Adeyopaco caid yacno iccuedednuequidon bëyucanquin bëdash Pabado: —Mimbi chiaid ëmbi tantiacmaid nec. ¿Midapadquidquo mimbi chuibanecque? Tantianu. Chuiban —quepanëdash abi bëquido caic. ²¹ Abi bëquido Adeyopaco caid yacno nidash Atenas yacnocquido dadpen utsi-utsiec yacnoësh cho-choquido badiadquidën-badiadquidënquieq utsin-utsinquin ambi tantiacpaden chuibanasho tantianuec iccuededpanëdash.

²² Aden mimbi tantiacpaden chuibanta caquien nënantanquo nidtoshon naden Pabadon chuibampanëdash: —Chuibanu. Tantiata. Mimbi papa cain cuënaid mimbi tantiaid iquec, quequin tantiembi. ²³ Capucuenequin mimbi tantiaidbimboecnuc nacnenaid dadpen isombi. Mimbi papa cain cuënaid dadpen tabëcaid icnubi mimbi cuënacmaid abentsëc iccosh. Aid mimbi cuënacmaid icnuc abibimboecnuc nacnenaid nibëdosh. Aton shubumpiuidtsëqui iccosh. Mimbi cuënacmaid mimbi tantiacmaid mibi chuibanu. Tantiata.

²⁴ “Ĕmbi Nuquin Papa cain cuēnaid nidaidbēdtabi abu uashumbic aidēnquiocquidtedi uaquidquo nec. Abitedi uaquidquo yec abitedishun icbombo aidi nec. Aidi tabadmenuequin matsesēn shubu uashunaidēn tabadesa nec. ²⁵ Aidi abitedishun Icho icnuc abitedi aton na nec. Adquid icsho, Con na mibi menenu, matsesēn aid catiapimbo iquec. Aidēn tantiacpadec ēbitedi nēmbobi tabadebi. Aidēn tantiacpadec ēbitedi tiboquebi. Aidēn tantiacpaden ēbitedishun bedbanoaimbi. ²⁶ Aidēmbi bēyuc dada uampidēn tsyuecquido ēbitedi nec. Aid bēyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taēnuec ue yanendac. Adecbidi, inchēshtanec badiadoaic. Adecbidi, ushē nidash choaic. ²⁷ Aidēmbi naden tantiec: Matses tantiaquin abitedi uaquin nashundenembi. Aden ambi matses abi tantiaquin nabanaid isash matses, ζTsuntsin nabanaid nepec? queshun ēbi tantiaquin Icho ēbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. ²⁸ Aidēn nac tiboquequid ēbitedi nebi. Aidēn nac capuquidbidi ēbitedi nebi. Adembidi min matsesēn dada uampid adomboen chiaid nad iqueque. Tantia. Chuinu: Nuquin Papan bacuēbo ēbitedi nebi, quequin min mēdimbon chuipanēdash.

²⁹ “Nuquin Papan bacuēbo ēbitedi iquec tiboquequid icquin matsesēn nacnenaid tiboquesa papa cain cuēnenquoctiadquidi matses nec. ³⁰ Ĕnden matsesēn ambi nacnenaid aden cuēnsho tantiaquin Nuquin Papa, Chēn. Adoenda, quenquicochoedi nēbi, Mimbī icsamboen tantiaid ēnta, quequin chiec. ³¹ Matsesēn naid chuibante ushē chonoc matses icsaidbēdta ambi bēdamboen naid chuibanquin Nuquin Papan chomeshun matses icmlaidēn cuidbanendac. Ambi abipadquid matses icmiaid, Nuquin Papan matsesēn naid chuibanquid icmenu caid unēsacsho isun ambi chiampicpaden nanuequin Nuquin Papan uincumepondash —quepanēdash Pabado Adeyopaco yacno iccuededquido Esus tantiamenuec.

³² Adeccaid unēsacsho Nuquin Papan uincumepondash, quequin Pabodon chuisho tantiaquin utsi-utsiec mamēnshumēnubi utsi-utsiec: —Aidēn chuiboec padpiden tantianuna —quepanēdash. ³³ Adoquien, Pabado Adeyopaco caid yacnoēsh nidpanēdash. ³⁴ Adeccaid nidshun yuec ushquin chuisho tantianu quec Pabado bēd iccuededquin utsin-utsinquin padpiden-padpidemboen tantiabededpanēdash. Aden Pabodon chuibanac utsi-utsiec Esuquidistu tantiaquid yampanēdash: Nēdic, Dionisio cuēmēdquid Adeyopaco caid yacno iccuededquido chuiquid nepanēdash. Utsibic, chido Damadis cuēmēdquid adecbidi Esuquidistu tantiaquid yampanēdash. Aidobēd utsi-utsiec Esus tantiaquid yampanēdash.

18

Codinto yacno Pabado tabadaid

¹ Adeccaid Atenas caid yacno tabadash auēshquio puduanec nidec shubu dadpen icquid Codinto caid yacno Pabado chopanēdash. ² Ambo isadaidbo Aquida cuēmēdquid nidaid Ponto caid yacnoshon tishaid Pabodon istuidpanēdash. Isadaidbotedi nidaid Itadia yacnoēsh nidtan, ancanguidēn cac aton chido Pidisida cuēmēdquid bēd Codinto yacno choash Aquida icpanēdash. ³ Nidaidēn capuquid yua bitsi shubumpi nacnenquid abipadquid Aquidabēd aton chido icsho isun aidobēd tabadquin Pabodon shubumpi nacnenquid yampanēdash. ⁴ Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabodon chuibampanēdash.

⁵ Ambo tabadnubi Sidasbēd Timoteyo nidaid Masedonia yacnoēsh choambic shubumpi nacnenquocquin isadaidbo Esuquidistu tantiamenuen Pabodon chuibampanēdash. ⁶ Adsho, Aid tantiatapi, quequin isadaidbon Esuquidistu icsamboen chuisho tantiaquin abi daēd dasiuidaid bēntsecquid chicshun ishcunec Pabado: —Esuquidistu mibitedi chiombi. Aid tantiasa yec unēsash Nuquin Papa yacno puduedenquio mibitedi iquendac. Adquid Nuquin Papan cuidquin nēsecatequid nendac. Nēbi padpiden mibi chienquo iquembi. Isadaidpembon tantiatiasash, quequin aido chuibanembi —quepanēdash Pabado isadaidbo tantiasa chiec.

⁷ Aden chiashic Nuquin Papan chiaid chuibante shubu yacnoēsh puduanec aid dayuntsēqui shubu icquidēn Pabado puduedpanēdash. Aid shubu icho Usto cuēmēdquid Nuquin Papa tantiaquid icpanēdash. ⁸ Uston shubunoshon Esuquidistu Pabodon chuibanac Quidispo cuēmēdquid Esuquidistu tantiaquid yampanēdash. Aidi Nuquin Papan chiaid chuibante shubun iccuededquido chuiquid dapa icpanēdash. Aidbēd aton shubun icquidtedi Esuquidistu tantiaquid yampanēdash. Adecbidi Codinto yacnocquid dadpen Esuquidistu tantiaquid yampanēdash. Adsho adquidtedi acten mentobampanēdash.

⁹⁻¹⁰ Adashic, yuecash inchēsshēn Pabado usho Nuquin Papa: —Codinto yacnocquid dadpen Esuquidistu tantiaquid yanendac. Aden ēmbi chiac dacuēdenquocquin comapenen

chuideneta. Mibi dayun uaquidquo nebi. Aden dayun uasho ëbi tantiesabon mibi natiametiapimbo iquendac —quepanëdash Pabado caic. ¹¹ Aden chiac Codinto caid yacno seta abentsëc matamiash ushë 6ted nidmec tabadquin Nuquin Papan chiaid Pabado chuidonepanëdash.

¹² Adnubien nidaid Acaya caid yacnocquidon chushcaid chuisho tantiasahun matses icsambocsho cuidte chuiquid Cadion cuëmëdquid icnubi isadaidbon Pabado bedshun abi chushcaid Cadion chuinen buampanëdash. ¹³ Ambo bëquin puduedmiash: —Ancanquidën chiaid niacquin matsesën tantiatemaid nëid dadan chiosh —quepanëdash Pabado chieshënuquido Cadion caic.

¹⁴ Adoquien Pabado onquetsenubi Cadiomba onquedopanëdash: —Tantiata, isadaidbo. Mibi chuinu. Nëidën icsamboen nabanaid mibitedishun ëbi chuisho tantiatiambi. ¹⁵ Aden chienquo yec, Nëidi mibi onquiaidbëda min matsesën Nuquin Papa cain cuënaid icsamboen chuiquid nec, mibi quepec. Adecbidi, Mimbi natemaid chuiquidquo nëid dada nec, mibi queoapec. Aden mimbi chuisho tantiasahun, Èbi chienda caimbi. Domanobo chuiquidën naden nata quequin chiaid niaquesa nëid nec, quequin isembi. Aden ëmbi isac mibi chushquiaid mibi chuiquid yacno nidshun chuitanta. ¹⁶ Aden chuishumbic Cadionën: —Aidtedi umanuc puduemeta —cac isadaidbo Pabado bëboedo Cadionën nami-aidon puduemepanëdash. ¹⁷ Adoac puduëshumbic Nuquin Papan chiaid chuibante shubun iccuededquido chuiquid utsi Sostenes cuëmëdquid bedshun isadaidbon comapenen cuespanëdash. Adosho isun chiac Cadion, Icsamboen naic, quenquo yec otacquio tsadpanëdash.

¹⁸ Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanëdash. Abëdi Aquida aton chido chedobëd Codinto yacnoësh nidec shubu dadpen icquid Senquedeya caid yacno chopanëdash. Ambo tabadquin, Nuquin Papan ëbi dayun uaid cuidquin Edusaden yacno choshon piucquid menembi, quequin ismenuequin aton manëdaid Pabado matasmepanëdash. ¹⁹ Ambo ushë abentsëc nidmec tabadash cano antabëdtoanec acte dapa potiash Epeso yacno choshon Aquida aton chido chedobëd, Nëmbobi tabadnu, quepanëdash. Adsho tantiasahun aid daëdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanëdash Pabado. ²⁰ Aden chuibansho tantiasahun: —Adomboembidi chuibanuec ¿ada ëbëd yuec tabadtsia? —iccuededquidon caquien: —Nëbi padenquo iquebi. ²¹ Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auëshquo puduanec nidequi cano antabëdtopanëdash Pabado.

²² Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanëdash. ²³ Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auëshquo nidequi nidaid Pidiquia caid yacno choash tabadquin Esuquidistu tantiec iccuededquid dadpen bëdamboen tantiamenuen chuibanopanëdash Pabado.

²⁴ Adnubien isadaidbo Apodos cuëmëdquid shubu dadpen icquid Adecandedia caid yacnoësh Epeso yacno chopanëdash. Aidi dadpen tantiaquid yec Nuquin Papan chiampid tantiaquid nepanëdash. ²⁵ Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanëdash. ²⁶ Aidi Nuquin Papan chiaid chuibante shubu yacno nidshun dacuëdenquiocquin ambi tantiaid chuibampanëdash. Aden chuisho tantiash, Èbi yacno isec cho, qeshun Aquidan aton shubu yacno buanshun Esuquidistu choaid ambi nadatiambocquin naidbëdtabi abi unësash uincuenaid chuibampanëdash Aquidabëdtan aton chidon Apodos tantiamequin.

²⁷ Aden Esuquidistu bëdamboen tantiash Epeso yacno yuec tabadquin Esuquidistu Apodosën chuibampanëdash. Adec yuec tabadquin chuibanashic, Nidaid Acaya caid yacno nidnu, quepanëdash. Adec nidnuesho tantiasahun, naden dada uashun Apodos menepanëdash Epeso yacnocquidon: Nëid dada uaid sananquid Apodos cuëmëdquid Esuquidistu tantiaquid nec. Èmbi isaid neque. Yuedta, quequin dada uashun, Apodos Epeso yacnocquidon menepanëdash ma nidaid Acaya caid yacnocquido Esuquidistu tantiaquido Apodosën menenu, qeshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bëdamboen tantiamenuen chuibampanëdash. ²⁸ Aden chuibanquimbic isadaidbo Esuquidistu tantiesabo icsho isun abëd onquequin, Esuquidistu Nuquin Papan Chomiaid nec, quequin Nuquin Papan chiampid Apodosën chuibampanëdash.

19

Epeso yacno Pabado abèd icquido tabadaid

¹ Codinto yacno Apodos icnubi Pabado nidaid Pidiquia caid yacnoësh puduanec podquedën choec macuësh dapa dectatocuëtsenec shubu dadpen icquid Epeso caid yacno choapanëdash. Ambo choshon Esuquidistu tantiaquido istuidshun: ² —¿Esuquidistu tantiaquido icshoda Nuquin Papan aton Mayan mibitedi menepanëdash? —capanëdash Pabado.

Adoaquien: —Nuquin Papan Mayan iquec, quequin tantiamboccombi —quepanëdash Epeso yacnocquido.

³ Adoaquien Pabado: —¿Atotsi canuen mibi acten mentobampanëdash? —quepanëdash.

Adoaquien: —Uan padon chiaid tantiaquid icsho acten mentondashi —quepanëdash Epeso yacnocquido Pabado chiec.

⁴ Adoaquien: —Mibi icsaid ënta, qeshun abimbo tantiaquidtedi acten mentobanquin, Èbi tsibanec choquid Esus tantiaquid icta, quequin Uan padon chuipanëdash —quepanëdash Pabado Epeso yacnocquido chiec. ⁵ Aden chiac, Esuquidistu tantiaquid nebi, quequin Epeso yacnocquidon chuisho tantiashun padpiden acten mentomepanëdash. ⁶⁻⁷ Aden aidtedi acten mentoacsho mëdanten Pabado mamishbanac aid doseted Nuquin Papan aton Mayan menepanëdash. Aden meniac abi onquiacmaidënquo onquec Nuquin Papa chiec cuëdëmpañëdash Epeso yacnocquido.

⁸ Adashic Nuquin Papan chiaid chuibante shubun puduedshun Pabado Nuquin Papan bapbèd tabadaid chuibampanëdash. Cuembo tantiamenuequin ushë choaid 3ted nidmequin badiadquidën-badiadquidënquien dacuëdenquioocquin Nuquin Papan chiaid Pabado chuibampanëdash. ⁹ Aden chuisho tantiash pamumëdacbimboec tabadquin, Tantiatiapibi, quequin utsin-utsinquin chieshëmënquioquin Esuquidistu icsamboen chuipanëdash. Aden chiac Esuquidistu tantiaquidobèd Pabado, Nidnu, quianec Nuquin Papan chiaid chuibante shubu yacnoësh puduanec nidec Tidano cuëmëdquidën chuibante shubu yacno choshon adomboembidi tantiamenuen matsesbèd onquequin Nuquin Papan chiaid chuibampanëdash. ¹⁰ Seta daëd matamequin adomboembi chuibampanëdash Pabado. Aden chuibansho tantiash nidaneshun chiac nidaid Asia caid yacnocquidon tantipanëdash. Adoac isadaidbobèd isadaidpembo Esus tantiaquido yampanëdash. ¹¹ Epeso yacno Pabado tabadsho Nuquin Papan nadatiambocquid icmiacsho ¹² Pabado dada cuëscabon dashcute cuëshë buanshun daicsaid mishbanac bëdampanëdash. Adembidi Pabado dada cuëscabanaidën nënquid mishac bëdampanëdash. Adembidi pashuaidtsen pamishac bëdanoapanëdash. Adembidi mishac mayan icsa dapuduempanëdash.

¹³ Adnubien mayan icsa dapuduemnen Pabado chiacpaden tanquin isadaidbo utsibon: —Esus Pabado chuiboedënquo dapuduen —capanëdash. ¹⁴ Pabado tanuequido isadaidbo chuiquid Esqueba cuëmëdquidën mado 7ted icpanëdash. ¹⁵ Aden chiaquien mayan icsa: —Esus iquec, quequin ëmbe tantiaid aidi nec. Pabado iquec, quequin ëmbe tantiaidbidi aidi nec. ¿Mibitedi tsutsi neque? Tantienu. Chui ¹⁶ —qeshun nebudun dashcute chedchedcapamoen mayan icsan cuesactaniaqui shubu nuntanuësh puduanec cuempanëdash Esqueban mado. ¹⁷ Adec cuensho isquidon chiac Epeso yacnocquid isadaidbobèd isadaidpembo dacuëdcuededpanëdash. Adec dacuëdquin, Dacuëdampambo iquec. Esuquidistu bëdambocquid nec, quequin tantiabededpanëdash. ¹⁸ Esuquidistu tantiesha ichoedi Esuquidistu tantiaquid yanec dacuëdenquo yec Esuquidistu tantiaquido iccuededacno nidshun abi icsaid chuibampanëdash. ¹⁹ Adquid dadpeshun icsamenuen ambi ompoquin naid ismenquiochoedombi, Nëbi adquid ictiapibi, quequin cuëte dëtsiadotanquin ambi ompoquin tantiamiaid dada uatetedi tantianuen bedash utsitsen icsabudnushe qeshun abitedi tauipanëdash. Aden tauiboed menequin piucquid dadpen bedtsiandac, quepanëdash. ²⁰ Aden abi icsaid dada uate tauisho isquidon chuibanac Esuquidistu tantiaquid dadpen yampanëdash.

²¹ Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabdashic shubu dadpen icquid Doma caid yacnotsen nidtiadquo iquebi —quepanëdash Pabado. ²² Aden chiash Asia caid yacno abi tabadquin Masedonia caid yacno abia Timoteyobèda Edasto nidmepañëdash Pabado.

²³ Aid daëdi nidan Epeso yacno tabadquin Esuquidistu Pabado chuibanaquien tantiesabo nëishpanëdash. ²⁴ Adquid Demetedio cuëmëdquid Diana caidbimboecnuc nacnemequid icpanëdash. Aidëmbi ambi nacnemaiid menequin piucquid dadpen bedbampañëdash. ²⁵ Aden Esuquidistu tantianu quesa icquin ambi Dianabimboecnuc nacentia caidobèda abipadquid Diana nacnemequid utsibo iccuededmeshun Demetediön

nadopanēdash: —Nuqui tantiaid Dianabimboecnuc nacneshun menequin piucquid dadpen nuqui bedbanec. ²⁶ Aden nanubi nidaid utsi yacnoēsh Pabado cuēmēdquid nēmo choshon utsi comapenen chuibanac Epeso yacnocquid dadpembēdtan nidaid Asia caid yacnocquid dadpeshun tantiec. Dianabimboecnuc nacnenaid tiboquesa iquec. Adquid matsesēn tantiaid abimbo ictiapimbo iquec, quequin Pabado chiech. ²⁷ Aden chiac matses dadpeshun tantiaid Dianabimboecnuc nacnenuido icsambo iquec, queqsiash ēbitedi caic. Adecbidi, Dianabimboecnuc nacnenaiddēd abi tabadte shubu uashunaid icsambo iquec, queoapec. Adecbidi Dianabimboecnuc nacnenaid tiboquesa icsho matsesēn tantienquo ictiadquidi nec, queoapec Pabado. Aden chiac nidaid Asia yacnocquidon dadpeshun Diana tantiaobedombi padenquo yampec. Aidēmbi tantienquo yanshun aidbimboecnuc nuqui nacnenaiddēdenquo iquendac —quepanēdash Demetedio.

²⁸ Aden chiac ambi chomeboedtedi, Piucquid ēbi menequin ēmbi nacnenaiddēden matsesēn padpiden bedenquo ictsiash, quec nēishash: —Epeso yacnocquidon tantiaid Diana bēdambo iquec —quec comapenec cuēdcuededpanēdash. ²⁹ Adeccomapenec cuēdcuededsho tantiaid Epeso yacnocquid utsibo aidobēd cuēdcuededpanēdash. Adeccuēdcuededquin nidaid Masedonia caid yacnoēsh Pabado bēd choboed Cayobēda Adistadico bedshun iccuededte shubu yacno cuēdcuededquidon buampenēdash. ³⁰ Aden aid daēd bedshun buansho isquidēn chiac Pabado, Iccuededte shubu yacno nidnu, qesho tantiaishun: —Padi. Ambo nidenda —capanēdash Esuquidistu tantiaquidon. ³¹ Adembidi, anocquido chuiquid utsin-utsinquien Pabado chuiopanēdash.

³² Adnubien cuēdcuededquidon Cayobēda Adistadico bedshun buansho isash matses dadpen, ¿Atotsieshun aid daēdi bēo? quequin tantienquo yec tabadpanēdash. ³³ Adnubien, Nuqui tantiacpadomboen chuitan, quequin isadaidbon Adeccandedo cuēmēdquid nēnantanquo tsiunepanēdash. Aden tsiunequien nidtoash: —Tantia. Chuinu —quequin ³⁴ daēd pactsēc chiech onqesho tantiaish onqueboedi ēnēdash tabadnubi: —Isadaidbo aid nec —qesho tantiaish: —Epeso yacnocquidon Diana cain ambi tantiaidbimboecnuc nacnenaiddēdambo iquec —quec baded-badedquieccuēdcuededpanēdash.

³⁵ Adeccuēdcuededshobien Epeso yacnocquidon naden nata quequin chiaid dada uaquidēn ēnēdmenuequin nadopanēdash: —Epeso yacnocquidon tantiaata. Chuinu. Diana caidbimboecquid abucuēsh paēdaiddimboecnuc nacnenaiddēden nuqui comapenen tantiaidbēda abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. ³⁶ Aden utsibon tantiec, quequin tantiaquin icsamboen nanda. ³⁷ Dada daēd mimbi nēmo bēboed Diana caidēn shubun puduedamboccosh. Adembidi ampiambo iccosh. Adecbidi, Diana caid chiech icsamboec onquenquicocosh. ³⁸ Adenquo icnuc Demetediobēd icquido abi chushquiaid chuinnec Epeso yacnocquidon naden nata quequin chiaid tantiaquid yacno nidshun ³⁹ mimbi tantiacpaden chuita cuēdcuededenquicquin. ⁴⁰ Comapenec cuēdcuededec qesho tantiaish ancanquid dapan Epeso yacnocquido bēdamboen tabadmeta caid yacno nidshun chiac, Ancanquid dapan chiacpadec Epeso yacnocquido tabadenquo iqueque. Cuēdcuededquido chome, nuqui catsiash. Aden chomiaccuēdcuededte? ⁴¹ Aidēn nuqui chomenushe quiaish mīn shubuno nidaneta —capanēdash Epeso yacnocquidon naden nata quequin chiaid dada uaquidēn. Aden chiac Demetediobēd iccuededquido nidanepanēdash.

20

Masedonia yacnocquido isbidanec nidequi Quedesia yacnocquido isbidanec nidaid

¹ Natia cuēdcuededboedo nidanian Esuquidistu tantiaquido chomiash Pabado: —Nidaid Masedonia caid yacno nidoaibique. Bēdamboec tabadta —quianec Epeso yacnoēsh puduanec abēdi nidondabi. ² Auēshquico puduanec nidquin nidaid Asia caid yacnocquid utsisien chuibidanec nidaid Quedesia caid yacno choapondash Pabado. ³ Ambo choash ushē abentsēc chotsēcnuc nidmec tabadash: —Nidaid Sidia caid yacno nidnu —quepondash. Adsho tantiaishun: —Ambo nidacsho mibi cuesunenuquin isadaidbon cainec —cac nidaid Masedonia caid yacno Pabado nidoapondash. ⁴ Nidaid Masedonia caid yacno choash Pabado tabadnubien abēd capuquido bēyucanec nidaid Asia caid yacno nidpondash. Abēd capuquido nēidted icpondash. Nēidic, shubu dadpen icquid Bedeya yacnoēsh choquid Sopated cuēmēdquid; utsibo shubu dadpen icquid Tesadonica yacnoēsh choquido Adistadico cuēmēdquid bēd Secundo cuēmēdquid; utsibic, shubu dadpen icquid Dedbe caid yacnoēsh choquid, Cayo cuēmēdquid; utsibobi, nidaid Asia yacnoēsh choquido: nēidic, Timoteyo cuēmēdquid, utsibic Tiquico cuēmēdquid, utsibic Tedopimo cuēmēdquid. Aidedi icpondash. ⁵ Aidedi bēyucanec Asia yacno nidec shubu dadpen icquid Todoas caid yacno choash tabadquin Pabado caimpondash. ⁶ Aidedi nidan pan namī uainquictequid pete ushētedi tantiec tabadanec Pabado bēd cano antabēdtoanec nidec Stedec ushun bēyucamboed

istuidpondash. Ambo shubu dadpen icquid Todoas caid yacno 7tedec ushec Pabadobêd icquido tabadoapondash.

Eyutico unēsacsho uincuemiaid

⁷ Todoas caid yacno tabadequid dominco ushên Esuquidistu tantiaquidobêd iccuédquid Pabadobêd icquidon Esuquidistu unês uate tantiaquin pan cuêsh-cuêshun pebededpondash. Aden piashic Pabado, Badiadash nidebi, quiaish yuec onquepondash inchêshpotsembo yantsêcquieic. ⁸ Aid onquiacono shubu abentsêquên tacpan uaid 3tedi icpondash. Abuc tacpan yacno dectatoash quênên tabadnubi tabote dadpen chênquepondash. ⁹ Pabado onquenubi nêbi caniaid, Eyutico cuêmêdquid, iste shêcuê yacno tsadec ush-casmash ushtotanec abucuešh paêdpondash. Adec paêdsho isash bud-budshun unēsacsho isbedednubien ¹⁰ Pabadotsen budquin dayumbudec: —Unêsboedi abi tiboquianeque. Shubicuededenda —quepondash. ¹¹ Aden chiaish abuc quênê yacno padpidec dectatoashun abitedishun pebededpondash. Aden piash tabadec Pabado utsibêd onquecuededpondash badiadbudtsêcquieic. Adec badiadbudbon Pabadobêd icquido shubu nuntanuêsh puduem-puduenubien ¹² paêdboed aton shubuno utsibobêd nidpondash bêdambo yec.

Todoas yacnoêsh puduanec Mideto yacno chote

¹³ Adashic Pabado: —Podquedên nidebique. Shubu dadpen icquid Ason caid yacno nidshun anoshon êbi cainta —quianec nidpondash Pabado. Adanec aid nidnubi Todoas yacnoêsh abêd capuquid utsibobêd puduanec nidequi cano antabêdtoanec Ason yacno nidoapondabi. ¹⁴ Adec nidequi Ason yacno choshon istudac Pabado êbêdi cano antabêdtoanquin potiaish shubu dadpen icquid Mitidene caid yacno choapondash. ¹⁵ Auêshquio puduanec nidec badiadash acte nênantan nidaid nactêdquid Quio caid datambidanec nidash badiadash acte nênantan nidaid nactêdquid utsi Samos caid datambidanec shubu dadpen icquid Mideto caid yacno choapondash. ¹⁶ Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquioquin shubu dadpen icquid Epeso caid datanembi. Isadaidbon chidon bêyuc tishampid dada bacuê unêsmenquioquin matante tantiaid ushê chonoc Edusaden yacombo tabadebi quequin Epeso datanembi —quepondash Pabado.

Epeso yacnocquido tsusiobo Pabodon chuibanaid

¹⁷ Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabodon chomepondash. ¹⁸ Aden chomeshun naden aido chuipondash: —Chiembique. Tantiata. Êbi ênden nidaid Asia caid yacno choash mibêd yuec tabadquin nabanaid mibitedishun istenepondash. ¹⁹ Isadaidbo utsibon Esuquidistu tantiesa icquin cuesunete bunquin mêyampondashi. Aden mêyanaqui Nuquin Icbon êbi chuibeneta cacpaden êbi bunaid tantienquioquin ambi chiaid mibitedi chuibanondambi. Tantiesa icsho isash shubiquiondabi. ²⁰ Esuquidistu mibitedi bêdamboen tantiamenuen matses dadpen iccuédadacnoshon chuibanondambi. Adembidi shubu utsin-utsinqueic pudued-cuenequin chuibanondambi. ²¹ Nuquin Papan chiaid abimbo tantiaquin mibi icsaid ênshun aton Mado Esuquidistu tantiaquid icta, quequin isadaidbobêdta isadaidpembe chuibanondambi.

²² “Aden chuibanshobi Nuquin Icbon Mayanên: Edusaden yacno nidta, quequin chuioposhi. Aden aidên chuibocpadequi nidebi. ¿Atotsi êbi capatsiash Edusaden yacnocquidon? quec dacuêdenquio yec nidebi. ²³ Shubu dadpen yacnoshon-yacnoshonquien Nuquin Papan Mayanên êbi naden chuided-chuidedec: Mibi mêyanquid Edusaden yacno iquendac. Adecbidi mibi nauede quênê iquendac, quequin chioshi. ²⁴ Aden Nuquin Papan Mayanên chuisho tantiaish, Êbi cuesunepanundac, quenquio yec Edusaden yacno nidoaibi. Esuquidistun êbi chuibeneta cacpaden naimbudquin utsi-utsieic yacno nidshun Esuquidistu abimbo tantiaquid Nuquin Papabêd tabadte iquec, quequin chuibanembi.

²⁵ “Nêshunquio Nuquin Papan chiaid êmbi chuibansho mibitedishun tantiabendonaidon nêuêshquio êbi nidacsho mimbi isoainquio iquendac. ²⁶ Êmbi nêshunquio Esuquidistu mibitedi chuibanac, Esuquidistu chiaambo iccoshi, quetiapimbo mibitedi iquendac. ²⁷ Tantienuioctsiash, quenquioquin Nuquin Papan tantiacpaden chuibanombi. ²⁸ Aden chuibanash nêbi nidebi. Êbi nidan Esuquidistu tantiaquido nabanec tabadaid isbanta. ¿Nuquin Papan chiapadectabi tabadeque? Isnu, quequin isbanta. Adembidi Esuquidistu tantiaquid utsibo bêdamboen isban icsamboen nabanec tabadnushe queshun. Nuquin Papan Mayanên aido isbanquin chuiquid mibi icmioshe. Adota. Aido Nuquin Papa yacno tabadmenuec Esuquidistu unêspanêdash. ²⁹ Êbi nidan abimbo chiacbimboen chuiquid Esuquidistu tantiaquido chuiquid icnuec choendac. ³⁰ Adembidi mibêdi iccuédedquin utsin-utsinquien Nuquin Papan chiaid abimbo chiacbimboen muaquin chiendac. Esuquidistu tantiaquid chuiquidquio icnuequin adoendac. ³¹ Adquid Esuquidistu tantieic

icquededquido cuëshēdmequid neque. Ista. Adquid iquendac, quequin mibēdi tabadquin ĕnenquocquin chuibanondambi. Adquid choec, quequin mibitedi chiec shubiondabi.

³² ‘Bēdamboen chuibanombi, quequin tantiaquin mibi nianemi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bēdambo icmeshun abēdi tabadmendac. ³³ Mibēd tabadec, Min piucquid bec cho, quesa niondabi. Adecbidi, Min dashcute bec cho, quesa niondabi. ³⁴ Ĕmbibi shubumpi nacneshun menequin piucquid bedshun con na bedondambi. Adembidi nacneshun bedshun ĕbēd capuquido menebanondambi. ³⁵ Adembidi chonoadshun aton na bedshun natiapimbocquid meneta, quequin mibitedi ismebanondambi. Nuquin Icho Esuquidistu nidaidēn tabadec nadpanēdash: ‘Utsin natiapimbocsho menequid Nuquin Papan bēdambo iquebi camiaid nendac. Nabanenquio yec bedshumēnquidquio icsho Nuquin Papan bēdambo iquebi camenquio iquendac,’ —quequin Esuquidistun chiacpaden Epeso yacnocquido tsusiobo chuipondash Pabado.

³⁶ Aden chiashic Pabado Nuquin Papa chuinuec utsibobēd danēshēn seabducuededash onqueuededpondash. ³⁷ Aden Nuquin Papa chiec onqueshumbic nidoctuededshun abitedishun Pabado chuiboed tantiaquin Pabado dayumbededquin shubi uabededpondash. ³⁸ Ĕbi padpiden mimbi isoainquio iquendac, Pabado qesho tantiash shubicuededpondash. Adec shubiquin dayumbudash unēsquio yec Epeso yacnocquido tsusiobo Pabado bēd cano yacno nidanepondash.

21

Edusaden yacno Pabado nidoaid

¹ Epeso yacnocquido tsusiobo acte cuēman tabadnubi cano antabēdtoanec Pabado bēd capuquido nidquimbi cuebi potiaſh acte nēnantan nidaid nacnēdquid Cos caid yacno choapondash. Badiadnuc auēshquio puduanec nidec acte nēnantan nidaid nacnēdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash. ² Ambo choashic nidaid Penisia caid yacno cano dapa utsin nidnuequid istuidash antabēdtoanec Pabado bēd capuquido nidoapondash. ³ Adec nidquimbi acte nēnantan nidaid nacnēdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bēaid icho yacno buamepondash. ⁴ Aden buan-buanubi Esuquidistu tantiaquido yacno nidanec puduedash 7tedec ushec Pabado bēd capuquido tabadpondash. Ambo tabadnubi, Edusaden yacno Pabado cuesunenuequid iquec, quequin Nuquin Papan Mayanēn tantiamiac aidon, Edusaden yacno nidenda, quequin Pabado chuipondash. ⁵ Aden chiaqui cano icho nidnuesho isash padpidec cano antabēdtoanec, Nidnu, quepondash Pabado. Aid nidnuesho isash Esuquidistu tantiaquido bēnēbēdi aton chido aton bacuēbo chedo Pabado bēd acte cuēmano choash Nuquin Papa chiec onqueuededpondash. ⁶ Adec Nuquin Papa chiec onqueshun, Nidec nid, cac Pabado bēd icquido cano antabēdtoanubien Tido yacnoēsh acte cuēmano choboedo aton shubuno nidaneapondash.

⁷ Adec cano antabēdtoanec auēshquio nidec shubu dadpen icquid Todemaida yacno choash Pabado bēd capuquido tabadtuidpondash. ⁸ Adec anocquidobēd tabadec badiadash cano antabēdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niente meneta caid utsi 6tedibēd Uedipe icpondash. ⁹ Aidēn champibo 4tedi aton bēnēn bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

¹⁰ Adec Uedipebēd yuec tabadnubi Nuquin Papan naden nanun chiaid chuiquid utsi Accabo cuēmēdquid nidaid Udeya yacnoēsh chopondash. ¹¹ Adec choshon Pabado n tsiute bedash tataniadash mētaniadash Accabo nadpondash: —Nuquin Papan Mayanēn naden ĕbi chioshe. Tantiata. Chuinu. Ĕmbi nabocpadomboen isadaidbon Edusaden yacno tabadquidon nēid tsiute icho bedshun tataneshun mētaneshun buanshun, Unēs uata, quequin isadaidpempo menendac —quepondash Accabo Pabado chiec.

¹² Aden Accabon chuisho tantiash shubiquin Pabado bēd choboedon Uedipen shubun icquidobēdtan, Edusaden yacno nidenda, quequin Pabado chuioapondash. ¹³ Adoaquien: —¿Atotsi canuen shubiquin ĕbi icſambo icme? Edusaden yacno nidshun Nuquin Icho Esuquidistu chuibanſho ĕbi taneshun unēs uatsiaſh, quequin tantiaquin abi Esuquidistu chuibanuna —quepondash Pabado. ¹⁴ Adoaquien, Nidenda, caqui niacbidanec, Edusaden yacno nidebi, queoapondash Pabado.

Adec, Nidebi, qesho tantiashun: —Ma Nuquin Icho bunacpadec nidpanuna —capondash.

¹⁵ Aden chiashic Sesadeya yacnoësh puduanec Edusaden yacno Pabadobëd capuquido nidoapondash. ¹⁶ Adec nidsho isash Sesadeya yacnoquid Esuquidistu tantiaquid utsi-utsiec Pabadobëd nidquin Menason cuëmëdquidën shubu yacno buanac puduedpondash. Aid shubu icbo Chipide yacnoësh choash Edusaden yacno tabadquid Esuquidistu tantiabnquidbidi nepondash.

Pabodon Acobo isaid

¹⁷ Adec Edusaden yacno choacsho Esuquidistu tantiaquidon Pabadobëd capuquidtedi Pabadobëdtabi yuedpondash. ¹⁸ Aden yuedac tabadash badiadash Acobo isec nidoapondash. Acobobëd Esuquidistu tantiaquido tsusibotedi icpondash. ¹⁹ Adec nidec ambo puduedshun, Mibi isec chobi, quequin, Èmbi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabodon chuipondash.

²⁰ Aden chuibanac Nuquin Papan naid bëdambo iquec, quiash Pabado caic nadpondash: —Nëmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. ²¹ Adquidombo icquin, Min bacuëbon shui dëbid dëtemenda, quequin isadaidpembo Pabodon chiec, qesho tantias, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. ²² Aden chiec tabadquin mibi nëmbo choaid tantias mibi cuesunete buntsias. Mibi cuesunete bumenquio icmenuequin ¿Atotsi nuqui napeba? ²³ Naden nac bëdambo ictsiashe. Tantia. Chuinu, Pabado. Nëmbo ëbëd icquido Nuquin Papauidi tantiec tabadnuequid daëd-daëdquiec iquec. ²⁴ Nuquin Papan ëbi bëdamboen dayun uadenesho ismenu, quiash nidaid Quedesia yacnoësh, Èbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacenuequid piucquid menembi,” quepondac. Nëbimbobi Edusaden yacno mibi choaac. Nëid datedibëd Nuquin Papa tabadte shubu uashunaid yacno nidshun mimi ënden chiondacted piucquid meniäc, Pabado icsambo iquec, quequin chuiboedombi, Nuquin Papan, Naden nata, quequin chiapaden naquidquio Pabado nec, quequin tantiatsias. ²⁵ Èmbi isadaidpembo Esuquidistu tantiaquid utsibo dada uaqin naden chuioaombi: “Nuquin Papan, Naden nata, quequin chiaid dada uamiampid nëidtedictsequi mimi natequid nendac. Nëidic, Nuquin Papan uaidbimboecnuc nacenaid tantiaquidon pete sanaid penda; adembidi, min chidouidtsëqui chudta; adembidi chidon min bënëuid chudmeta; adembidi, nëish cuesaid intacchobi codocaid penda.” Aden dada uabanquin isadaidpembo chiombi —quepondash Acobo Pabado chiec.

²⁶ Aden chiaquien badiadash Nuquin Papa tabadte shubu uashunaid yacno dada 4tedbëd choash Pabado, Nëidted dadabëdtambi ëmbi Nuquin Papan chiacted piucquid meniombi, quepondash Nuquin Papa tabadte shubu uashunaid yacnoquid chiec. Aden chianec nidoapondash.

Pabado bedaid

²⁷ Adashic 7tedec ushqin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoësh choquidon isadaidbon ispondash. Aden isash Pabado bedmete bunec, Isadaidbo utsibo nëishmenu, quec: ²⁸ —Isadaidbotedishun tantiata. Nëidëmbi Nuquin Papa tabadte shubu uashunaidën puduedtemaid isadaidpembo yuedquin nëid shubu bëda icsa uameboed neque. Bednu. Uidën uaic cho —quequin abimbo chiacbimboec onquecuededpondash. ²⁹ Epeso yacnoësh choquid isadaidpembo Tëdopimo Pabadobëd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

³⁰ Aden chiac, Icsambocquid bednu, quianec titinquec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shëcuë bëtashpondash. ³¹ Aden Pabado buanec, Cuesunenu, quec cuëdcuededsho tantiasshun chuitanac ³² abi chuiquidbëd sondado cho-chosho isun Pabado cuesbededquin isadaidbon ëmpondash.

³³ Adec choshon sondado chuiquidën bedtan cac Pabado bedshun shocosh bucun mëtanemepondash. Aden mëtanemias: —¿Tsutsi nëid nepec? ¿Atotsi icsamboen naosh? —quepondash sondado chuiquid. ³⁴ Adoaquien iccuededquid utsi-utsitsëcquien chiec onquecuedednubi utsi-utsitsëcquien utsi uain chiec cuëdcuededpondash. Adec dadpen cuëdcuededsho: —Tantiatiapibi ye. Quënën nauedmenu. Buanec nid —quepondash sondado chuiquid sondado chiec. ³⁵ Aden Pabado buanec nidec nauedte shubun dectatonobi cuëdcuededquidon tsucusuededtsëcquien Pabado bednuesho isun Pabado abuc cadoanquin sondadon buampondash. ³⁶ Aden cadoanquin buansho isash cuëdcuededquido: —Aidien cuesunetiäc —quepondash sondado chuiquid chiec.

Ambi nabanaid iccuededquido Pabadoñ chiaid

³⁷ Adec abi buanec shubun puduedtsenubi Pabado: —¿Ada ëbi onquesho tantiatsia? — quepondash Quidieco matsesën onqueten Pabado sondado chuiquid chiec.

Adoquien: —¿Quidieco matsesën onqueten onquequidta mibi ne? ³⁸ Chuiquid dapa icnequin Equipito yacnocquid matses dadpen cuëte nibëdacno buanaccondaidien nechitec, qeshun mibi bedombi. ³⁹ Adoquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

⁴⁰ Adoquien: —Ai, onqueta —capondash sondado chuiquidën.

Adoc abuc decatoten nidtoash nidec, Otacquo tabad, quequin ismequin Pabadoñ mëdante uic-uiccapondash. Aden nasho isash isadaidbo otacquo tantiec tabadsho isash: —Ebedeyon, nuquin onqueten mibi chuinu —quec nadec Pabado onquedopondash:

22

¹ —Ëmbi naid mibitedi chiembique. Isadaidbo tsusiobobëdtan isadaidbo utsibon tantiata.

² Adec aton onqueten Pabado onquesho tantiash isadaidbo otacquo tantiec tabadpondash.

³ Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquo tishaqui Edusaden yacno choash canipondabi. Adec nëmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. ⁴ Aden nabanquin Esuquidistu tantiaquido Nuquin Papan chiaid niacquido nec, quequin dadabëdta aton chido chedo bedmeshun mëyamequin quënën nauedmeshun unës uamepondambi. ⁵ Ëmbi adobanquin naondaïd tsusio dapeddishun tantiec. Adondash, quequin chuitiadquo icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmenu, qesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

⁶ “Adash, ushë abuctoan Damasco caid anoentsëqui choshobi abucuësh shocosh tabote dapa bed-bedquiacimboec chënquequin dëcatepondashi. ⁷ Adec chënquequin dëcatiac nidaidën paëdshun nadec abucuësh onquesho tantiapondambi. ‘¿Atotsieshun ëbi mëyane, Saudo? Ëbi chui. Tantienu,’ capondashi.

⁸ “Adoquimbi: ‘¿Con Icbomboda mibi ne?’ capondac.

Adoquien: ‘Nasaded yacno iccondaïd mimbi mëyanaid Esus nebi,’ capondashi.

⁹ “Adnubic ëbëd icquidon shocosh bed-bedquiacimboec chënquesho isequi con Icbon chuisho tantienquo yec tabadpondash.

¹⁰ “Aden dëcatiac uequin ëmbentsëqui tantiec: ‘¿Atotsimbi nape, Icho?’ quepondabi.

Adoquien: ‘Nidtoash Damasco yacno nidtan. Anoshon ëmbi nata quequin chiaid utsin mibi chiendac,’ capondashi Nuquin Icbon. ¹¹ Adoquini nidtoquin shocosh bed-bedquiacimboec chënquequidën bëshuacsho isun ëbëd icquidon mëdinanquin Damasco yacno buampondashi.

¹² “Adec Damasco yacno choash bëshuash ëbi tsadnubi Ananias cuëmëdquid ëbi isec chopondash. Aidi isadaidbun naden nata quequin chiaid naquidquo icsho isadaidbo utsibon bëdamboen isaidquo icpondash. ¹³ Ëbi yacno choshon aidën: ‘Saudo, abuc is,’ cac cuedoquimbi Ananias ispondambi.

¹⁴ “Adsho isash Ananias: ‘Nuquin tsusedpabon Papa cain cuënaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaid, Icsa Nibëdquid mibi ismendac. Aidën chuisho mibi tantientac. ¹⁵ Aden aid isquin tantiaashun utsi-utsien dadpen mimbi isaidbëdta mimbi tantiaïd mimbi chuibenendac,’ quequin ¹⁶ chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaïd ma paucapanuna. mibi paucacimboen utsibo ismenuen acten mentemeta,’ capondashi Ananiasën.

¹⁷ “Adoquid, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacimboec tsadpondabi. ¹⁸ Adec tsadquimbi Nuquin Icho ëbi chiec onquesho isnubi nadpondash: Mimbi ëbi chuibansho tantienquocquid yec nëmbocquido mibi cuesunete buntsiashe. Edusaden yacnoësh badedquo nidtan, quequin Nuquin Icbon chuipondashi.

¹⁹ “Adoquimbi: ‘Aidon isnubi mibi tantiaquid dadpen bedmeshun quënën nauedmiondambi. Adembidi, aidon isonubi mibi tantiaquid utsi-utsien comapenen mëyamiondambi. ²⁰ Adembidi, mibi chuibanquid Esteban cuëmëdquid utsibon cuënoten se-sequin unës

uanubi se-sequidon dashcute chicshun sanacno tsadquimbi, Unës uata, capondambi. Isadaidbo tsusiohon ambobidi icquin ëbi onquesho tantiapondash. ¿Adondachobi cuesunependabi iquec? quepondabi Nuquin Icho chiec.

²¹ “Adoaquini Nuquin Icho: ‘Isadaidpembo yacno mibi nidmembique. Nidtan,’ capondash –quepondash Pabado ambi nabanaid iccuededquido chiec.

Pabado cuestsenaïd

²² Pabado ambi nabanaid chuibansho tantiec iccuededquido otacquo tabadboed, Isadaidpembo, quec Pabado onquesho tantias: –Tantiatiapibi. Adec onquequid isadaidbo utsibëd tabadenquo ictiadquidi nec. Aid unës uata –quec cuëdcuededpondash iccuededquido.

²³ Adec cuëdcuededec aton dashcute bëntsecquid canchepamboec dachiquidshun nidaid putu bedtanquin abuc secapondash Pabado chuiboed tantiatemaid nec, quequin ismequin. ²⁴ Adnubien, Cuesunenushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëid cuesunete bumpeba? Ambi naid icsa chuimenuen comapenen paëmbocnoc cuesta, quequin sondado chuiquidën chuipondash. ²⁵ Adoaquien cueste nidtsinacno Pabado buanshun cuestebëdta tanenuen podon bedshun shoyonaqui Pabado: –¿Atotsi canumbini shoyonquin nai? ¿Domanobon nidaidënshun tishaid icsho ëmbi naid chuimiabida ëbi cuese? –quepondash Pabado sondado chuiquid chiec.

²⁶ Adsho tantias sondado chuiquid puduanec nidec abi chuiquid comandante caid yacno choash: –¿Atotsi natseno? Bëboed: “Domanobon nidaidënshun tishaid nebi,” quiosh –quepondash sondado chuiquid comandante chiec.

²⁷ Adoaquien Pabado yacno nidshun comandanten: –¿Domanobon nidaidënshun tishaidta mibi nepe? –capondash Pabado chuiquin.

Adoaquien: –Ai, domanobon nidaidënshun tishaidquido nebi –quepondash Pabado.

²⁸ Adoaquien: –Domanobon nidaidënshun tishaidpenquo ëbi icsho, ¿ada adquid ëbi icmetsia? quequin piucquid meniondambi –quepondash comandante Pabado chiec.

Adoaquien: –Con tan tishaid yec domanobo nebi –quepondash Pabado comandante chiec.

²⁹ Aden Pabado chuisho tantias ambi naid chuimenuen cuestsemboedo nidanepondash. Aden chuisho tantias Domanobobi Pabado shocosh bucun mëtanemechitombi, quequin tantiec comandante dacuëdpondash.

Isadaidbo tsusioho iccuededacno Pabado buanaid

³⁰ Adshumbic, badiadshun ambi mëtanemeboed chimeshun isadaidbo tsusioho iccuededacno Pabado buamepondash. ¿Atotsi nasho isash isadaidbo nëid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nënantanquo Pabado nidtomepondash.

23

¹ Aden nidtomiaquien isadaidbo tsusiouidi comapenen isec: –Utsibo, ëmbi naid chuibanu. Tantiata. Nuquin Papan isnubi ambi naden nata quequin chiaid nabanquidquo icteniobi –quepondash Pabado.

² Aden chuisho tantias: –Muaquin chieque. Èccues –Isadaidbo tsusioho dapan Anani-asën cac Pabado dayunquo icquidën Pabado èccuespondash.

³ Aden èccuesaquien Pabado: –Mibi icsaid nibëdacbimboec mibibi tsadsho Nuquin Papan mibi èccuesmendac. Nuquin Papan naden nata quequin chiaid tantiambi, quequimbë ëbi èccuesmequin Nuquin Papan chiaid ma mimbi niacpaboc –quepondash Pabado isadaidbo tsusioho dapa caic.

⁴ Aden Pabado chuisho tantias aton dayunquiocquidquo: –¿Aden Nuquin Papan isadaidbo tsusioho dapa icta caid chiash dacuëdenquioda iquec? –quepondash.

⁵ Adoaquien: –Èmbi chuiboed Nuquin Papan isadaidbo tsusioho dapa icta caid nec, quequin tantiamboccombi. Aidi Nuquin Papan isadaidbo tsusioho dapa icta caidquo icsho ëmbi chuibocpaden chienquo ictsenombi. Mimbi abimbo chioc. Èmbi mibi chuiquid icmiaid icsamboen chienda, quequin Nuquin Papan dada uamiampic –quepondash Pabado.

⁶ Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantias: –Tantia. Chuinu. Padiseyobo nebi. Èbibi padiseyobon tishmiaid nebi. Adquid yec, Unësash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ëbi mimbi chiec –quepondash Pabado iccuededquido caic. ⁷ Aden Pabado chiaquien saduseyobo, Uincuenta nibëdendac, quequin ëmbi tantiapaden Pabado tantienquo iquec, quec comapenec onquecuedednubi padiseyobo,

Uincuenta iquendac, quequin ëmbi tantiacpaden Pabado tantiec, quec comapenec onqueuededpondash. ⁸Unësash uincuentequid nibëdec, quec saduseyobo. Adecbidi, Nuquin Papan uaid mayan bëdabëd ambi uaid utsi mayan nibëdec, queoaic saduseyobo. Padiseyobo, Uincuentequid iquec, quec. Adecbidi Nuquin Papan uaid mayan bëda, ambi uaid utsi mayambidi iquec, queoaic.

⁹ Aden ambi tantiacpaden chuibanec comapenec onquec saduseyobobëd padiseyobo natiambo cuëdcuededpondash. Adec onquec cuëdcuedednubi padiseyobo, Nëid dada bëdambocquid nec. ¿Mayanën chioshi, queshodambi muc nec capadi? Adecbidi, ¿Nuquin Papan uaid mayan bëdan chioshi, queshodambi muc nec caoapadi? Padenquo iquemb. Pabado chuiboe abimbo iquec, quepondash padiseyobo saduseyobo caic. ¹⁰ Adec comapenec onquec natiambo chushcanansho tantiahsun comandanten: —Podon shoyonquin canite dëchicnushë queshun mënchichshun shubu nuntan bëoata —cac sondadon Pabado mënchicpondash.

¹¹ Aden mënchichshun shubu nuntan sondadon yuedaquien Pabado ushash badiadash padpidec inchëshën Pabado ushshubi Nuquin Icho chopondash: —Mimbi Edusaden yacnoshon ëbi chuibanacpaden shubu dadpen icquid Doma caid yacnoshontsen mibi chuibamembique. Dacuëdenquo yec dayacquio icta —capondash Nuquin Icbon Pabado chuiquin.

Pabado cuesunenu quequin ompoquin cainaid

¹²⁻¹³ Adec Pabado bëd Nuquin Icho onquebombien badiadash isadaidbo 40ted Pabado cuesuniabi icquin buna mëmunembi, quequin abimbo chiembi, quepondash. ¹⁴ Aden nanu quiahs isadaidbo tsusiobo yacno nidash: —Pabado cuesuniabi icquin buna mëmunembi, quequin muenquicocquin chuibanombi. ¹⁵ Èbitedishun ompoquin Pabado cuesunenuquin cainubien mimbi comandante chuitanta caid naden chuimeta: Pabado naid bëdamboen tantianuna. ¿Ada padpiden isadaidbo tsusiobo iccuededte shubuno bëmeoatsia? quequin chuitan Pabado bëmeoatsiashe. Aden Pabado sondadon bësho Pabado cuesunenuna —quepondash Pabado cuesunenuquido isadaidbo tsusiobo caic.

¹⁶ Aden aidon chuishoben Pabado piaquën tantiahsun Pabado yacno nidshun chuiopondash aton piaquën.

¹⁷ Adoquien Pabado sondado 100ted chuiquid cho, cata cac nidshun aton piaquën chiac Pabado yacno sondado chuiquid chopondash. Adec chosho isun: —Nëid con piac nec. Aidi comandante chuite buneque. Aid yacno buanta —Pabado cac ¹⁸ buampondash.

Aden Pabado piac comandante yacno buanash sondado 100ted chuiquid: —Quënën nauedboed Pabado cuëmëdquidën ëbi chomeshun: “Con piac comandante chuite buneque. Aid yacno buanta,” cac bëombi —quepondash sondado 100ted chuiquid comandante chiec.

¹⁹ Aden chiaquien Pabado piac mëdinanquin uidictëc buanash comandante: —¿Atotsi ëbi chuinuëc cho? —quepondash comandante.

²⁰ Adoquien Pabado piac: —Badiadshun isadaidbon ambi namiaid mibi yacno chomec. Aden chomiaic nëmbo choshon naden chiec: “¿Ada isadaidbo tsusiobo iccuededte shubuno Pabado mimbi bëoapatsia? Aidën naid chuibansho bëdamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid. ²¹ Isadaidbon muaquin chiendac. Con cu Pabado buamenuen mibi aden chiendac. Comandanten Pabado bëmetsiash, quequin tantiaquin Pabado con cu cuesunenuquin caineque. Nidmenda. Con cu cuesunenuquid: “Pabado cuesuniabi icquin buna mëmunembi,” quiosh. Con cu cuesunenuen nëbimbobi podqued cuëmanshun ompodshon caineq —quepondash Pabado piac comandante chiec.

²² Adoquien comandanten: —Isadaidbon chiaid mimbi chuiboe utsi chienquo yec nidec nid —capondash Pabado piac chuiquin. ²³ Aden Pabado piac nidmeshun sondado 100ted icquido chuiquid daëd chomiash comandante nadpondash: —Ènden inchëshan Sesadeya yacno ma mibëdi mimbi namiaid sondado 200ted nidnu mitsana buanuequin nacnenta cata. Adomboembidi, cabayo catsadquid 70ted icquido chuiquin nacnenta, quequin chuiota. Adomboembidi shocosh sianten senuequin sananquid 200ted icquido chuiquin mitsana nacnenta, quequin chuiota. ²⁴ Adembidi Pabado bëd icquido cobednadod Pediques yacno buanun cabayo nacnenta —capondash comandanten sondado 100ted chuiquid daëd chuiquin.

²⁵ Aden chuishumbic naden comandanten dada uapondash Pediques cobednadod caid chuiquin: ²⁶ “Quëdaudio Disias nebi. Chuiquid dapa cobednadod caid, Pediques, mibi bëdambocquid icsho chuinu. Pabado ëmbi bedboed mibi yacno buamenuen dada uambique. Èmbi dada uaid isec onqueta. ²⁷ Nadquo iccoshe. Tanta. Chuinu. Pabado isadaidbon bedshun cuesunensensho isun, Aidi domanobo nec, quequin utsin chiapaden tantiahsun sondado dadpembëd choquin mënchiccombi. ²⁸ Aden mënchichshumbic, ¿Atotsieshun

Pabado cuesunete bumpec? quequin tantianuen isadaidbo tsusiobo iccuededacno Pabado buamiombi. ²⁹ Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabadon chuisho tantiashun quēnēn nauedenquiocriadquidi nauedmepondash, quequin tantiashumbi quēnēn nauedmeopombi. ³⁰ Aden Pabado quēnēn nauedmeoashumbic, Podqued cuēmanshun Pabado cuesunenuequin isadaidbon cainec, qesho tantiashun badedquio mibi yacno buamiombi. Adembidi, Pabado icsambocquid nec, quequin aid cuesunenuequido mibi yacno nidmembali. Adoac ma ambibi Pabadon naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: — Pabado bēdta nēid cobednadod Pediques menenuen buanta — capondash comandanten.

³¹ Aden comandanten dada uashun meniac aidēn chiacpaden Pabado buanec sondado aid inchēshēmbi shubu dadpen icquid Antipatidis caid yacno chopondash. ³² Ambo choash badiadshun sondado cabayo catsadquidonuidquiu Pabado buanec nidnubi sondado utsitedi aubidi nidaneoapondash. ³³ Adec Pabado buanec nidequi Sesadeya yacno choshon abi chuiquid comandanten Quēdaudio Disiasēn dada uaid bēdta Pabado Pediques menepondash cabayo catsadquidon. ³⁴ Aden meniaquien dada uaid isbanash: — *¿Mitsicquid nidaidēn icquid mibi ne? — capondash Pediquesēn Pabado chuimenuen.*

Adoquien Pabado: — Nidaid Sidisia caid yacnoshon tishaid nebi — quepondash.

³⁵ Adoquien: — Mibi icsambocquid nec, quequin chuiquido isadaidbo choacsho mimbi nabanaid chuimembali — quepondash Pediques Pabado chiec. Aden chiec onqeshumbic ēnden chuiquid dapa Edodes cuēmēdquidēn, utsibo abi chushquaiid chuimondaid shubuno Pediquesēn buamiac ashunquio Pabado nauedsho isun: — Pduenanec cuenushe ista — capondash sondado chuiquin.

24

Pediquesēn tantianubi Pabadon ambi naid chiaid

¹ Adashic, Stedec ushash isadaidbo tsusio dapa Ananiasbēd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tedtudo cuēmēdquid bēquin. ² Aido chosho isun Pediquesēn Pabado chomiacsho isun isadaidbo tsusiobon tantiacpaden chuinuequidēn Tedtudon naden Pediques chuipondash: — Mibi chuinu. Tantia. Chuiquid bēdamboquid icquin mimbi bēdamboen nabanac isadaidbo bēdamboec tabadec. ³ Mimbi aden nabansho isun, Bēdamboquid mibi nec, quequin mibi chiemi. ⁴ Aden chuishun mibi chieshmenquiocnuequin isadaidbon chushcaboed badedquio chuinu. Tantiata.

⁵ “Nēid mimbi bēmeboed Pabado caid bēd ictiapimbo iquebi. Nēid Nasaded yacno iccondaid tantiaquido tsusio nec. Aidēmbi nidaidtedi yacno nidshun ambi tantiaid chuibanquin isadaidbo comapenen chushcamequin cuēdcuededmiac cuēshēd-cuēshēdposh. ⁶ Aidēmbi Nuquin Papa tabadte shubu uashunaidēn puduedtemaid matses puduedmesho isun Pabado bēdpombi. Bedash Nuquin Papan naden nata quequin chiampicpadembi cuidte bumpobi. ⁷ Aden cuidnu quenubien comandante Disias cuēmēdquid choshon Pabado mēnchicanquin buamposh. ⁸ Pabadon ambi naid chuisho mimbi tantiashun, Isadaidbo tsusiobon abimbo chiosh. Icsambocquid nec, quequin mimbi chuioapatsiac — quepondash isadaidbo tsusiobon tantiacpaden chuinuequid Pabado icsambocquid nec, Pediques camenuc.

⁹ Aden Tedtudon chuiquin nainan isadaidbotedi, Ai, Tedtudon chiacpadeccosh, quequin chuibededpondash.

¹⁰ Adsho tantiashun, Onqueta, quequin mēdante uiccaquin Pediquesēn ismiac Pabado naded onquepondash: — Chuiquid dapan tantiata. Ēmbitsen chuinu. Dadpen seta matamequin con matses isadaidbo abi chushquaiid tantiashun mimbi bēdamboen tantiacpaden namedenioc. Adquid mibi nec, quequin tantiaquin, Ēmbi naid chuibanec bēdambo iquebi, quec dacuēdenquio yec onquebiqie. Tantiata. ¹¹ Edusaden yacno choash ambobi 12tedec ushobi. Ēbi anoshon ishoedon, Abimbo iquec, quequin nēmbi choshon mibi chuitsiash. Edusaden yacno choash Nuquin Papa shubu uashunaidēn puduedec Nuquin Papa tantianuec choapobi. ¹² Ambo puduedash utsibēd chushcananenguio yec tabadsho istuidash, Icsambocquid nec, queposh. Adembidi chuibanquin utsibo nēishmequin chushcamenquio iccombi. Pabado icsambocquid nec, quequido Pabadon chiaid abimbo iquec, quietiadquidi nec. ¹³ Ēmbi naid Tedtudon chuibanboed, Abimbo iquec, quietiapimbo iquec tsusiobo. ¹⁴ Nēiduidtsēqui abimbo iqueque. Chuinu. Tantia. Nuquin tsusedpabo chuimiapaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquio

nebi. ¹⁵ Adembidi, matses unēsacsho Nuquin Papan uincuemiac abi tantiaquid abēdi tabadnubi abi tantiesha chian anēdēnquequid nēsecaindac, quequin tantiembi isadaidbo tsusiobon tantiacpadembi. ¹⁶ Aden tantiaquin Nuquin Papan, Bēdamboen mimbi naoc, capashuni, quequin bēdamboen nabanec tabadec nebi. Adembidi, matsestedishun, Bēdamboen mimbi naoc, capashuni, quequin adomboembidi bēdamboen nabanec tabadec nebi.

¹⁷ Adequi nidaid utsi-utsiec yacno capucuenec tabadcuenequin, Edusaden yacnocquid isadaidbo bunec tabadec, qesho tantiash piucquid menenuc choapobi. Adembidi, Nuquin Papan bēdamboen dayun uabenioshi, quequin piucquid menenuc choapobi. ¹⁸ Aden menenuc abi tabadte shubu uashunaidēn puduedash ēbentsēqui capusho ēbi chushcaboedon istuidposhi. Bēdamboec tabadsho istuidposhi. ¹⁹ Ēbi capusho istuidquido isadaidbo nidaid Asia caid yacnoēsh choquido niosh. Aido, Pabado icsamboec tabadsho isombi, quepac caosh. Ambī chiaid abimbo icnuc nēshuntsen adomboembidi chuitiadquidi nec. ²⁰ Adembidi isadaidbo tsusiobon: ‘Padiseyobo yec bēdamboecquid nec,’ quequin ēbi anoshon chiacpadembidi nēshuntsen adomboembidi chuiotiadquidi nechitec. ²¹ Anoshon nēduidtsēqui chiec comapenec cuēdobi: ‘Unēsash uincuentiadquid iquec,’ quequin chuisho tantiashun, Icsamboecquid nec, quequin isadaidbo tsusiobon ēbi mibi chiec caimbi – quepondash Pabado Pediques chiec.

²² Aden Pabado chuīsho tantiash Pediques tantiauidquid iquec: –Nēbi mimbi aidtedquo chuibansho tantiembi. Comandante Disias nēmbō choan mibi padpiden chuimembi – quepondash Pediques Pabado chiec. ²³ Aden chuishumbic naden Pediquesēn sondado chuipondash: –Shubuno Pabado buanshun puduednushe qeshun ista. Abi menenucquid abi isuequid chedo chosho isun yuedta – quepondash Pediques ambi Pabado ista caid chiec.

²⁴ Adashic, daēdpactsēc ushash Pediquesbēd aton chido, Dusidia cuēmēdquid chopondash. Aton chido isadaidbo icpondash. Adec aton chidobēdi choshon abi yacno Pediquesēn bēmiacsho ambi tantiaid Esuquidistu Pabado chuibanac Pediquesēn tantiauidpondash. ²⁵ Aden chuibanquin Pediques Pabado nadopondash: Utsin abi utsibēd chushcananaid chuibanacsho Nuquin Papan chiacpaden aido nametiad, quequin chuipondash. Adembidi, Icsamane quequin Nuquin Papan chiacpadenuidi nabanta, quequin Pediques chuiopondash Pabado. Adembidi, Esuquidistu tantienquo icsho chian anēdēnquequid Nuquin Papan nēsecanushe quequin Esuquidistu tantiata, quequin Pabado chuioapondash. Aden Pabado chuīsho tantiash: –Padi. Ēmbi naid nibēdsho isun padpiden chuimenuen mibi bēmeoaimbique. Nēbi nidec nid –cac Pabado nidpondash. ²⁶ Adshumbic, adembidi abi yacno Pabado Pediquesēn bēmeded-bēmededpondash. Nidtiadquo icquin piucquid Pabado ēbi menetsiash, quequin tantiaquin Pabado bēmiash aidbēd Pediques onquepondash.

²⁷ Adashic, seta daēd matamiash Podsio Pesto cuēmēdquid cobednadod yampondash. Aidi cobednadod yanuc nidnuequin, Nidta, cainquocquin Pediquesēn Pabado shubu nuntan niampondash naden tantiaquin: Pabado shubun nauedshun ēmbi niansho isash, Bēdamboecquid nec, quequin isadaidbon ēbi cain chuibededpec, quequin Pediquesēn Pabado shubun nauedshun niampondash.

25

Pabado ambi naid Peston chuīmiad

¹ Pesto cobednadod yanash Sesadeya yacno choash 3tedec ushanec Edusaden yacno nidpondash. ² Adec Pesto Edusaden yacno choash tabadsho isadaidbo tsusiobo, Pabado chushcaquido: ³ –Ēbitedi bēdambo icmenuequin Pabado Edusaden yacno ada bēmeoatsia? –quepondash Pesto chiec. Pabado bēsho cuesunenequidon cainshun cuesunepec, quequin tantiaquin isadaidbo tsusiobon aden Pesto chuipondash.

⁴ Aden chuīsho tantiash Pesto: –Sesadeya yacnoshon nauedaid Pabado iquec. Ambo nidebi. ⁵ Pabado icsamboen naosh, quec utsi-utsiec bēdi nidshun anoshon Pabado naid icsa ēbi chuita – quepondash isadaidbo tsusiobo caic.

⁶ Adashic, 10tedec ushash Edusaden yacnoēsh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoshon Peston Pabado bēmepondash isadaidbo tabadnubi. ⁷ Aden bēmiacsho isash Pabado dēcatec isadaidbo Edusaden yacnoēsh chobedo Pabado naid chiec abimbo chiacbimboec onquecudedpondash.

⁸ Aden isadaidbon chiaquien: –Ēmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobēd puduedamboccombi. Adembidi, empedadod Doma yacno tabadquid, Sesad cuēmēdquidēn chiaid niacamboccombi – quepondash Pabado.

⁹ Adoaquien: —¿Edusaden yacno buanac anoshon adomboembidida isadaidbo tsusiobo chuiotsia? —quepondash Pesto Pabado chiec. ¿Edusaden yacno Pabado ada bëmeoatsia? quequin isadaidbon chiacpaden nanuec Pesto adpondash. ¹⁰ Adoaquien Pabado: —Domanobo ancaquidën empedadod caidën, Sesad cuëmëdquidën, Mibi yacnoquido bëdamboen tabadmequid icta, caid icquin mimbimbo chushcanaanquid bëdamboen tabadmeta. Isadaidbo icsamboen tantiaquin nainquioccombi. Abimbo Pabadon chiec, quequin mimbi tantiec. ¹¹ Icsambocquidquio iquec Pabado unës uame, qesho tantiaash, Adoanenda, quenquioctsiabi. Isadaidbon abimbo chiacbimboen chuisho tantiaash, Pabado buanshun cuidta, quetiapimbo mibi iquec. Isadaidbo yacno buanta, mibi quenuc, Empedadod ëmbi naid chuite bunebi, quequin dada uaindami —quepondash Pabado Pesto chiec.

¹² Aden Pabadon chuisho tantiaash Pesto udictsëc nidash abipadquidbëd onquiash choash: —Sesad ëmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

¿Atotsimbi Pabado napatsia? quequin Peston Aquidipa caid

¹³ Adashic daëdpactsëc ushash ancanquid utsi Aquidipa cuëmëdquidbëd aton chuchu Bedenise cuëmëdquid Pesto isedec chopondash. Sesadeya yacnoquido cobednadod Pesto yanosh, quequin chiac aid isec chopondash. ¹⁴ Adec isedec choash dadpen ushec tabadsho isash Pabado chiec Pesto nadpondash: —Pediquestën quënën nauedmiaid Pabado cuëmëdquid chuinu. Tantiata. Aidi abi iquec shubu nuntan. ¹⁵ Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

¹⁶ “Adoaquien, Mibi abëdi chushquiaid Pabadontsen chiambocnoc unës uata quetiapimbo iquebi. Domanoben naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi. ¹⁷ Aden chiac nëmbo choshon abi chushquiaid aidon chuisho tantiec tsadnuen Pabado bëmiombi. ¹⁸ Aden Pabado bëmiacsho ëmbi tantiacpaden abi chushcaquiden Pabadon naid chienquiocposh. ¹⁹ Ëmbi tantiaidpenquio Esuquidistu unësash uincuenaid Pabadon tantiaid icsambo iquec, quequin chuiposhi isadaidbo tsusiobon. ²⁰ Aden ambi tantiaidquio bëdamboen tantienquio yec nadpobi Pabado caic. Min matsesën naden nata quequin chiaid tantienquio iquembique. Edusaden yacno buamiac mimbi naid anoshon chiac bëdambo ictsiash, quequin chiombi. ²¹ Adoaquien: ‘Empedadod, Sesad yacno nidshun ëmbi naid chuitiadquio iquebi,’ queposhi Pabado. Aden chiac quënë yacnoshon aid puduedmetiapimbo iccobi. Nëmbo Pabado quënën tabadec —quepondash Pesto Pabado chiec Aquidipa tantiamenuequin.

²² Adoaquien Aquidipa: —Ëbi aidën chuibansho tantiate bunebi —quepondash.

Adoaquien Pesto: —Badiadshun aidëmbi chuisho mimbi tantienac —quepondash.

Aquidipa ambi naid Pabadon chiaid

²³ Aden Peston chiaquien badiadash bëdaidquio dasiuidash Aquidipabëd aton chuchu choash iccuedte quënën puduedash sondado chuiquid chuiquid utsibobëd aid daëdi tabadpondash. Aido tabadsho isun Peston Pabado bëmepondash. ²⁴ Bëmiac Pabado nënantanquio nidtonobi Pesto nadpondash: —Ancanquid Aquidipan mibëd iccuededquidon ëmbi bëmeboed mibitedishun isec. Aidi chuinu. Tantiata. Isadaidbon, Nëid dada icsambocquid neque. Unës uame, quequin chioshi. Ëbi Edusaden yacno choacsho isun adoposh. Adomboembidi nëshun Sesadeya yacnoshontsen aidombidi chuioposhi. ²⁵ Aden chuisho tantiaashun nëid ambi naid chuimeopombi. Aden Pabadon chiaidtsen tantiaashun, Nëid unës uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabadon chuiposhi. Adoac Doma yacno aidi buamenuna. ²⁶ Aden buamenuen çatotsimbi dada uaquin empedadod chuipatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiaashun, Naden dada uata, mimbi cac dada uatsiambi. ²⁷ Ambi icsamboen naid nibëdnuc Doma yacno buametiapimbo iquebi —quepondash Pesto ancanquid Aquidipabëd iccuededquido chiec.

26

¹ Aden Peston chiaquien: —Mibibi onquequin mimbi naid chui. Tantienu —quepondash Aquidipa Pabado caic.

² Adoaquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid chuibanec bëdambo iquebi. ³ Isadaidbon naden nata quequin chiacbëdta abi onquaid mimbi tantiec. Aden tantiaquid mibi icscho ëmbi nabanaid ëmbi chuibansho tantiata. Chuinu.

⁴ “Ēbi tishondacnoēsh canidosho con matsesēn isadaidbon istenepondashi. Nēbi caniq-uid iquec Edusaden yacno choash tabadsho adembidi aidon istenepondashi. ⁵ Ēbi padisey-obo icquīn padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquid nec. ⁶ Unēsash uincuenta iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tanti-aquid ēbi icsho isash, Icsambocquid nec, quec isadaidbo. ⁷ Nuquin tsusedpa Acobo isadaid caidēn madobon tsyuecquidon, Unēsacsho Nuquin Papan uincuemete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon. ⁸ Nuquin Papan nadatiambocquin uincuemete chiaid mimbi tantienquio icpe.

⁹ “Ēnden ěmbitsen tantiauidquin shubu dadpen icquid Nasaded yacno ictened, Esus cuēmēdquid tantiaquid icsambocquid nec, quequin unēs uamembi, qeshun adobampon-dambi. ¹⁰ Edusaden yacnoshon adquid dadpen mēyamepondambi. Isadaidbo tsusiobon, Adota, cac ěmbibi Esus tantiaquid bēdamocquid icsho bedshun quēnēn nauedmepondambi. Unēs uanu, qesho tantiaish, Ai, unēs uatiadquio iqueque. Adota, quepondabi. ¹¹ Nuquin Papan chiaid chuibante shubu utsi-utsiec yacno nidted-nidtedondabi aido mēyamenuc. Esus, Nuquin Papan madopenquio nec, aido camenuen mēyamepondambi. Adembidi nidaid utsi yacnoshontsen adquid istuidshun mēyameoapondambi.

¹² “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. ¹³ Adec nidquimbi ushē cuembo yanec ushē comapenec chēnquequidēn ěbēd icquidobēda ēbi dēcatesho isondambi. Abimbo iquec, quequin mibi chuinu. Ancanquid dapan tantia. ¹⁴ Aidēn dēcatiac ěbitedi nidaidēn uebudcuededondabi. Adec uequimbi con matsesēn onqueten ebeyon onqueten abu-cuēsh onquesho naden tantiondambi: Saudo, ¿atotsieshun ēbi tantiaquido mimbi mēyampe? Ēbitsen mēyantiadpambocquin mimbi aido mēyanec, quec onquequin chiondashi.

¹⁵ “Adoquimbi: ‘¿Tsutsi mibi ne, Icbo?’ caondac.

“Adoquien, Mimbi mēyanad Esus nebi. ¹⁶ Ēmbi namiaid mibi icmenuc chobi. Esus isombi, quequin ¿ēbi chuibeneta caid nēbi mibi yanec? Ēbi chuibenequin mimbi isaiddēda ěmbi yuecshun ismetequid chuibeneta. ¹⁷ Aden ēbi chuisho mibi cuesunete bunquid isadaidbobēd Isadaidpembo icsho mibi mēnchiquendambi. Adquid chuibanta, quequin mibi nidmembi. ¹⁸ Aden chuibanac utsin-utsinquien pashuacimbocboedēmbi tantiendac. Icsambocquid nebi, quequin tantienquiochoedi, Icsaobique. Ēbi pauc, Papa, quepondac adquid. Mayan icsan yua icboedi Nuquin Papan bacuē iquendac. Adquid yanash abi icsaid paucac Nuquin Papan bēdambo icmiāid ēbi tantiaquid utsibēd iquendac, quequin Esusēn chuipondashi.

¹⁹ “Aid abucūesh onquesho tantiaishun chieshenquiocquin chuibeniombi caimbi, mibi chuiquin Aquidipa. ²⁰ Damasco yacnoshomba chuibanondambi. Anoshomba chuiban-shumbic Edusaden yacnoshontsen chuibanoaondambi. Anoshon chuibanshumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ēnquin Nuquin Papa abimbo tantiaquin ambi chiaipaden nabanta, quequin chiombi. ²¹ Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. ²² Padnuen ēbi dayun uaquid Nuquin Papa icquīn isadaidbon cuesunetushe qeshun cudasēmposhi. Adoac nēid ushēnquio mibēdtabi mimbi namiaido mibi chuibanec nebi, ancanquid Aquidipa. Moisesēn, Nadquio iquendac, quequin dada uampicpaden chuiquid nebi. Nuquin Papan chuimiaid utsibon, Nadquio iquendac, quequin chiampicpaden chuiquidbidi nebi. Aidon chuipampid nadquio iqueque. Tantia. ²³ Nuquin Papan Chomiaid, Quidistu, mēyanac unēsash uincuenaid yec ēbi tantiaquid ěbēdi tabadendac, quequin aton matsesbēda isadaidpembo Quidistun chiendac, quequin chiampicpadec chopanēdash —quepondash Pabado iccuededquido chiec.

²⁴ Adec Pabado onquesho tantiaish: —Min tantiate icsabudash mibi onquec. Mimbi tantiaid dadpen iquec tantienquio yec onquechitequien mibi nec —quepondash Pesto Pabado caic.

²⁵ Adoquien Pabadon: —Bēdamboen tantiec onquebi. Ēmbi chiaid abimbo iquec, caimbi mibi ancaquid Pesto. ²⁶ Ancanquid Aquidipan ěmbi chuibanboed abimbo iquec quequin tantiec. Aden aidēn tantiaisho dacuēdenquiocquin aid chiembi. Ēmbi chuibanboed ompoen-quiocquin isquidon chuisho aidēmbi tantiapondash. ²⁷ Nuquin Papan ambi naden nanun chiaid dada uamiampidon chiaid chuisho mimbi tantioc —capondash Pabadon Aquidipa chuiquin.

²⁸ Adoquien Aquidipa: —¿Mimbi chuiboedtedtsēqui tantiashtabi Esuquidistu tantiaquid yampe? —quepondash Aquidipa Pabado chiec.

²⁹ Adoaguien Pabado: —Esuquidistu tantiaquid ëbipadquid mibëd iccuededquidtedibi Nuquin Papan icmepashun. Nëid ushënuquo daëdpactsëc chiombi. Aidtedsëqui chiac tantiatipimbocsho isun yuen chuibantsiambi ma Esuquidistu tantiaquid mibitedi yanueshun. Padnuen ma mëtaniaid ëbipadquid ma mibitedi iquenquiocpanuna —quepondash Pabado.

³⁰ Aden Pabadon chuibanauquien ancanquid Aquidipa nidtopondash. Nidtosho isash Pestobëd Bedenise iccuedequid utsibo chedo nidtocuedpondash. ³¹ Adec nidtocuededash puduenash onquecuededec: —Chuibamboed icsamboen nainquioccosh. Adoenquiocsho unës uainquioctiad. Adembidi ënden quënën nauedenquiocpatecnëdan —quepondash ancanquido.

³² Aden chiash: —Empedadod chuite bunebi Pabado quiambocsho quënën nauedacnoshon aidi mimbi nidmetsenosh —quepondash Aquidipa Pesto chiech.

27

Doma yacno Pabado buanaid

¹ Adashic, Nëbi mëtaniaido nidaid Itadia caid yacno buanac bëdambo iqueque. Pabadobëda mëtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100tedbëdi abi chuiquid abibi cuëmëdpondash. ² Aden buanta cac Pabadobëda utsibo bedshun acte cuëmëmano buanshun cano dapa Adadamitio cain cuënaid istuidpondash. Aid cano dapa istuidashien, Icbo, nidaid Asia caid cuëmënan shubu dadpen icquid utsi-utsiec yacno nidtuidebi, quequin chuisho tantiash Pabadobëd antabëdtopondabi. Adec antabëdtosho isash puduampondash. Pabadobëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

³ Adec cano antabëdtoanec nidquin shubu dadpen icquid Sidon caid yacno buampondash. Ambo choash, Mitsana nibëdeque. Mibi yuedquid yacno nid. Aidon mibi menetsiash, quequin Pabado bëdamboen tantiaquin sondado chuiquidën, Udion, chuipondash.

⁴ Adshumbic Sidon caid yacnoësh puduanec nidquin potesho cunquequidën bëquedtuidac ushë choacmi cuenadtanquin acte nënantan nidaid nactnëdquid Chipide caid datampondash. ⁵ Adembi nidaid Sidisia caid ëquë datanash nidaid Pampidia caid ëquëtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. ⁶ Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dadpen icquid Adecandedia caid yacnoësh choboedi nidaid Itadia caid yacno buanu caid istuidpondash. Aden aid istuidshun Pabadobëd icquido aid canontsen antabëdtomepondash. ⁷ Adec Mida yacnoësh puduanash nidquin potec dadpen ushacsho cunquequidën cano bëquedtuidpondash. Aden bëquedac bëdiactsëc nidquimbi shubu dadpen icquid Nido caid ëquëbitsen datambidanec acte nënantan nidaid nactnëdquid Quideta caid yacno buanoapondash. Uquë cuëma utsiuc Sadmon caid icpondash. ⁸ Ushë choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udictsëc shubu dadpen icquid Dasia caid iccondash.

⁹ Cunquequidën bëquedac yuenquio potiactanetsëcquien buampondash. Comapenec cunquequidën nuqui bëquedendac, quequin tantiaquin Pabadon nadopondash: ¹⁰ —Chuinu. Tantiata. Nëuëshquio puduanquin potesho cunquequid dapan bëquedshun cano chicchictsias. Acten mentoadmane quequin potenquio iquembi, quequin chuita —capondash Pabadon sondado chuiquid chuiquin. ¹¹ Aden Pabadon chiaqui sondado chuiquidën niachidanquin cano icbobëdtan cano nidmequidën nidnu quequin chiaid tantiapondash. ¹² Cunquequid dapa cunquenubi Buenos Puedtos yacno tabadec iquen uanquid dapanquio nuqui iquenendac, quiash shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

Acte dapa potesho cunquequid dapanquio cano bëquedte

¹³ Nuqui iquenendac, quequin tantiaquin bëdiactsëc cunquesho isun abi bunacpaden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash. ¹⁴ Adec nidequi uidictsëc yanshobi ushë cho-choaid ëquëtsëcshun Quideta caid nidaid mananucüësh cunquequid dapa choquin bëquedtuidquin ¹⁵ ichon cano nidmetiapimbocnobi cano buampondash. ¹⁶ Aden cunquequidën buanauquie acte nënantan nidaid nactnëdquid utsimpi Quëdauda caid ëquëbictsëc cuenadquimbi canompi cano dapan nëshun buanaid buanushe queshun anandopondash. ¹⁷ Aden canompi anandoshon cano dapa canchednushe queshun uidën uaqin datanebanshumbic cano buante dashcute abi dectante cuestebëdtabi imbudshun dashcute chicacsho cunquequidën cano

comapenen buampondash. ¹⁸ Aden cano cunquequid dapan buanubi badiadnuc acte natiambo tēccoasquesho isun ambi ansandoshon bēboed acte nēsiapondash. ¹⁹ Adshumbic 3tedec ushun bucu dēnēshun cano dashcute indotetedi nēsiaoapondash. ²⁰ Aden nēsecanec nidquimbi inchēshēn ushēbēda uispa abu chēshēn bētinaçho isenquio iccondambi. Adem-bidi badiadēn ushē isenquio iccondambi. Dadpen ushquin aitedi isenquiocondambi. Aiteded isenquiocnobi acte comapenen tēccoasapondash. Ad icsho isash, Bēnudchitequien nuqui iquec, abitedimbo quecuededpondash.

²¹ Adequi nuqui iquec, qeshun buna mēmumbededequi abitedi nidanepondabi. Adec canon nidnubi Pabado nidtoash nadpondash: —Chuinu. Tantiata. Quideta caid yacnoēsh puduanēta caombi. Adsho tantiaboshi tantienquio yec mibi puduampoc. Ēmbi chiacpaden nabanuc mimbi ansandoaidtedi abi ictsiandac. Adecbidi, Unēsebi, quenquio nuqui ictsiandac. ²² Padnuen acte tēccoasquenubi nuquitedi unēsenquio iqueque. Dacuēdenquio yec dayacquio icta. Canouidi canched-canchedendac. ²³ Nuquin Papan namiaidquio nebi. Adquid icsho inchēshēn ambi uaidēn mayan bēdan ambi chomiaidēn naden chioishi: ²⁴ “Ancanquid dapa, empedadod caid mates chushquiaid tantiec tsadte yacno mibi nidtoendac. Mibi ambo nidmequin canon mibēd icquidtedi acte yacnoshon mēnchiquembique. Dacuēdenquio yec tabad,” caposhi Nuquin Papan uaid mayan bēdan. ²⁵ Aden aidēn chiac dayacquio icta. Nuquin Papa ambi chiacpaden nabanquid nec, quequin tantiembi. ²⁶ Adem-bidi, acte tēccoasquequidēn nuqui acte nēnantan nidaid nacnēquid cuēmano buanshun cano cancheshunendac, quequin tantiombi —quepondash Pabado canon antabēdtoaido chieç.

Cano canched-canchedaid

²⁷ Adashic, Buenos Puedtos caid yacnoēsh ēnden nidboshi 14tedec ushec acte Adidia caid yacnoshon cunquequidēn buampondash. Aden acte tēccoasquequin buanubi inchēshpotsēmo yanuc, Cuēma anoentēsēquien nuqui choendac, quequin cano nidmequidon tantiapondash. ²⁸ Aden tantiaquin, ¿Tionda iqueque? Tanu, qeshun yuēmbocquid shocosh bucu dēdectanshun pumbudquin tampondash. Aden tanshun, Aidiompēnquio iquec, quequin chuipondash. ²⁹ Nidaid cuēnote dapa cunquequidēn buanquin cano semenushe qeshun cano uidēn uate dapa yuēmbocquid tsitsumi tsidectanshun acte nēnequin uidēn uash ma badiadbono quiaçh tabadpondash. ³⁰ Adec tabadnubi cano nidmequido cueneshun dēbiate yacnoshontsen cano uidēn uate yuēmbocquid dēdectanuequin abimbo chiacbimboen canompi anandoeboed nēnetsempondash. Cano dapa mentoadtsiash, qeshun pan cuēshun Pabado adopondash. ³¹ Adec aido nidtsenubien Pabado: —Cuenuequido canompin nidnuc cano dapan nidquido nuqui mentoadendac —quepondash sondado chuiquid caic. ³² Aden Pabado chiaquien abi dectante bucutedi sēnac canompi nēpāēdpondash cuenuequido nidtiapimbo yec.

³³ Adashic, badiadte anoentēsēc yanubi Pabado nadpondash: —Catodtseted ushec, Mentoatdsiabi, quequin tantiadēd-tantiadēdtsēcquin mimbi piamboccoc. ³⁴ Mibi mentoadenquio iqueque. Min manēdaid abentsēc paēdenquio iqueque. Penquiochoedi unēschitomane quenquiocquin peta —quepondash Pabado. ³⁵ Aden chuishumbic utsitedi ismequin pan bedshun Nuquin Papa chuishun pan cuēshun Pabado pepondash. ³⁶ Aden Pabado pesho isun, Nuquitsen penuna, qeshun abitedishun pebededpondash. ³⁷ Cano antabēdtoquido 276ted icpondash. ³⁸ Aitededshun peshumbic, Cuēmano nidec, quequin ambi sandoaid utsitedi tiedēn caniquid ēshē acte nēsiapondash, Cano yuēmo iquec, qeshun.

³⁹ Adshumbic, badiadnuc ambi isacmaid nidaid istuidpondash. Acte cuidiantanquid cuēmambi masi icsho isun ambo cano nidmenueshun ⁴⁰ uidēn uaid tebanac acte nēpāēdpondash. Adem-bidi, cano dēbidiadmete bucutedi seccudoashun cano dēbiateno buanquin dashcute shoyontanquimbi cadoapondash, Cunquequidēn acte daēd nac-cuēscananacno buampashuni, quequin. ⁴¹ Aden cano nidmenubi cano dēbiaten masi setu-idec dēchiquidtiapimbo yec cano dapa dētocquepondash. Adec dēchiadash acte tēccoasquequidēn cano dapa canche-canchequin tauapondash.

⁴² Adsho isash sondado, Mētaniaidtedi cuentsiashe. Cuesunenu, qesho ⁴³ tantiash Pabado cuesunenushē qeshun: —jChēn! —capondash sondado chuiquidēn. Aden chuishumbic, Acten tantanec mēquiadquido tantanec nidanenubi ⁴⁴ tantantiapimbocquido cano cuēsh-cuēshēdaid bedbanash noadec tantanquido tsibanec nidta, quequin chuipondash sondado chuiquidēn canon antabēdtoquido chuiquin. Aden ambi chiacpadquieç nidanec mentoadenquio yec abitedi nidaid yacno choash dectatocuededpondash abitedi.

¹ Adec nidaid yacno choash dectatoneshun, Nēid acte nēnantan nidaid nacnēdquid Madta caid nec, qesho tantiabededpondash. ² Ambo tabadquidon abitedi bēdamboen yuedpondash. Iquen uampamboec ue sequenubi Madta caid yacno chosho isun cuēte dētsiadoshon, Cuēec cho, quequin chuipondash. ³ Adnubic Pabadontsen cuēte tanunquiocquid bedtanquin tsindoquin masandopondash. Aden masandoaid nēdēnquiacnoēsh puduenquin nisin Pabado mēpepondash. ⁴ Aden mēpiash ēchiquidenquo yec mēdiadsho isashien anocquido: —Nisin piaid cuesunianquid nepanui. Mentoadenquo yec actenuēsh dectatoacsho nisin piac unēschitequien iquec. Abi icsaid cuidtequidien nechitec.

⁵ Adec onquecuedednubien Pabodon comapenen uicac nisi cuēte dētsiadaidēn nēpaēdpondash. Adnubien Pabado abi bēdambo icpondash. ⁶ Aden Pabodon uicac nisi paēdsho isun Pabodon mēdante mēbidisquetsiashe. Isnu, quequin isbededpondash. Aden tantiaquin yuen cainquin mēbidisquenquiocsho isash, Nisin mēpeboed utsibon papa cain cuēnaid nepanui, quecuededpondash Madta caid yacnocquido.

⁷ Madta caid yacnocquido tsusio dapan shubu anoentsēqui icpondash. Tsusio dapa Pudio cuēmēdquid icpondash. Aidēmbi aton shubu yacno canon choboedotedi yuedshun abentsēc chotsēcncuc ushquin ēbitedi bēdambo icmepondash. ⁸ Adnubien Pudion papa chumbo yec pienec aton madon shubu nuntan uepondash. Adec Pudion papa uec qesho tantiaash Pabado aid isec nidshun ashunquibi Nuquin Papa chuishumbic Pudion papa damishquin bēdamepondash Pabodon. ⁹ Pudion papa bēdanacsho isash Madta caid yacnocquido nēnquidbēd daicsaid chedo cho-chopondash. Ēbitsen bēdametsiashe, quiaish cho-chosho aidotsen bēdamepondash Pabodon. ¹⁰ Adosho isun canon choquido bēdamboen tabadmepondash anocquidon. Nidnuesho tantiaashun menebampondash mitsana nibēdec quequin.

Doma yacno Pabado choash tabadaid

¹¹ Adashic ushē 3ted nidmiash Madta caid yacnoēsh puduampondash. Madta caid yacno choash cano icbo, Iquenoampamboec icnuc nēmbo tabadnuna, quiaish tabadash: —Nidnu. Nid —quianec aton cano antabēdtosho isun Pabado bēd icquido sondado chuiquidēn antabēdtomepondash. Aid cano shubu dadpen icquid Adecandedia caid yacnoēsh chopondash. Cano icbon papa cain cuēnaid daēd ambi tantiaidbimboecncuc cano dēdectanquin nacnenaid icpondash. Ambi papa cain cuēnaid abentsēc Castod icnuc utsi Podus icpondash. Adembidi aton cano cuēmpondash icbon. ¹² Aidēn puduanec nidequi acte nēnantan nidaid nacnēdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash. ¹³ Ambo tabadash puduanquin aid acte nēnantan nidaid nacnēdquid cuēma anoentsēqui potequi nidaid Itadia caid cuēmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cinquequidēn buanec badiad utsin shubu dadpen icquid Puteyodi caid yacno chopondash. ¹⁴ Ambo choshon Pabado bēd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobēd tabadashic auēshquio puduanec podquedēn nidequi shubu dadpenquo icquid Doma caid yacno chopondash Pabado bēd icquido. ¹⁵ Podqued Apio caidēn choec, quequin chuituidac Esuquidistu tantiaquid Doma yacnocquid utsi-utsiec Pabado bēquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsēc chotsec quequin cuēnaid yacnocquido Pabado bēquedoic nidaneopondash. Aido cho-chosho isashien, Ēbi dayacquo icmenuen nēidtedi mimbi chomioc, Papa, quec dayacquo iquebi, quiampondash Pabado. ¹⁶ Adec aido bēquedec choash auchidi nidec Pabado bēd Doma yacno choapondash. Doma yacno choacshobien Pabado quēmēn nauedenquiocquin shubun tabadmepondash sondado abentsēcshun abēd tabadquin isnubi.

Doma yacnoshon Pabodon Esuquidistu chuibante

¹⁷ Adec aton shubun tabadec 3tedec ushun isadaidbo tsusiobo chuinuequin, Aido chome, capondash. Aido chomiachsho isun Pabodon nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid niamambo iccombi. Adoenquiocshobi Edusaden yacnoshon nuquin matsesēn bedshun domanobo chuiquid meniondashi. ¹⁸ Aden meniac domanobo chuiquidēn, Mimbi naid chuiban, cac chuibanondambi. Aden chuibansho tantiaash, Unēs uainquioctiadquidi mimbi naic, quepondash domanobo chuiquid ēbi caic. ¹⁹ Aden domanobo chuiquidēn tantianubi nuquin matses tsusiobon, Unēs uatiad, quequin chiac, Empedadod, Sesad yacno nidshun ēmbi naid chuite bunebi, quequin chuipondambi, Con matses icsambo iquec, quenquiocquin. ²⁰ Ēmbi chuiboed mibi chuinuequin mibitedi chomiombi. Unēsash uincuenta nec, quequin tantiaquin nuquin matsesēn cainacpaden cainquid icsho mētaniaid nebi —quepondash Pabado isadaidbo tsusiobo chieci.

²¹ Adoquien: —Nidaid Udeya caid yacnoshon mimbi naid chuiquin dada uaid b-damboccombi. Adembidi, Edusaden yacnoësh choquido, Pabado icsambocquid nec, quequin chienquioccosh. ²² Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec —quepondash isadaidbo Doma yacnocquido tsusiobo Pabado caic.

²³ Aden Pabaton tantiaid tantianuec, Nēidted ushash padpidec choindabi, quianec nidanepondash tsusiobo. Adecec nidaniash ambi chiacdedec ushash Pabado tabadacno choapondash isadaidbo tsusiobobēd utsibo dadpen. Adecec cho-choash tabadsho isun: —Matses icsaquid icsho Nuquin Papan cuidnushe quiash abided cuidadec Esuquidistu unēspaneđdash. Aid tantiaquid yec Nuquin Papabēd tabadendac, quequin Pabaton chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbēdtabi Nuquin Papan naden nanun chiaid ambi utsibo dada uamiampid chuibampondash Pabaton. Ambidi dada uamiampidēn chiaid Nuquin Papan madombo Esuquidistu nec, quequin badiadnubi chuiquin tauashun inchēshbudtsēqui chuiquin ēmpondash Pabaton. ²⁴ Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. ²⁵ Aden abentsēc tantiacimboen tantiatiapimbo yec comapenec onquesho tantiashien Pabado nadpondash. —Nuquin Papan Mayanēn Isayas dada uamequin nuquin tsusedpabo naden chuipampic:

²⁶ “Isadaidbo caid yacno nidshun naden chuita.

Mibitedishun tantiaded-tantiadedquimbi abimbo tantienquo iquendac;

Adembidi Ęmbi nadatiambocquin nabanaid isted-istedquimbi abimbo isenquo iquendac.

²⁷ Bēdamboen tantiaboedobi nēbi min matses pamumēdacimboec tabadec; pashuacimboen tantiec tabadoaic; ushacimboecbidi tabadoaic.

Adecec tabadenquiocquin Ęmbi nabansho mimbi istsiac. Adembidi Ęmbi chiaid mimbi tantiatsiac. Aden tantiashun mibi icsaid mimbi Ęntsiac.

Adquiduidi Ęmbi bēdambo icmiaid nendac.”

²⁸ Adesa mibi icnuc isadaidpembo Esuquidistu chuimembi. Aden aidi chuisho aidon tantiendac —quepondash Pabado ²⁹ Nuquin Papan dada uamiampicpaden chuiquin isadaidbo Doma yacnocquido tantiamenuec. Aden chuisho tantiash isadaidbo nidanepondash.

³⁰ Adembidi seta daēd matamec tabadquin Pabaton Esuquidistu chuibampondash. Aton shubun tabadquin abi isedec choquidtedi Pabaton yuedpondash. ³¹ Utsi, Chēn, quenquiocnobi dacuēdenquiocquin, Nuquin Papabēd tabadte iquec, quequin huibampondash. Adembidi Esuquidistu tantiamenuen chuibampondash Pabaton.

Padī. Esuquidistun, Ębi chuibeneta, caidon naid chuibanquin aitedi dada uaombi, Teyopido.

DOMA YACNOCQUIDON ISTE

Tauamboen chiaid

¹ Esuquidistun yuambo Pabado nebi. Aidën: —Ëbi chuibeneta —caidquio nebi. Adem-bidi Nuquin Papan: —Con Mado chuibeneta —caidquio nebi. ² Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. ³ Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec. ⁴ Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuemepac caondash. Aidquiobi Nuquin Icho Esuquidistu nec. ⁵ Aidën: —Pabadon chuibeniac isadaidpembon matses utsibontsen ma ëbi tantiaquin ëmbi chiacpadomboen nanu —quequin ambi naid chuibenequidquio Esusën icmepondashi. ⁶ Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. ⁷ Aden: —Unësqiuo iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

Doma yacnocquido iste Pabado bunaid

⁸ Tanta. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “Doma yacnocquido Esus tantiec tabadosh,” quequin nidaid utsi-utsiec yacno chiac caosh,” quiosh. Mimbî nac aido bëdambo iquec, Papa —quequin Nuquin Papa chianembi. ⁹ Aden mibi bëshunenquio icquin Nuquin Papa chianembi. ¿Muectabi nepe? Padenquio. —Pabadon abimbo chiosh —quetsiash Nuquin Papa abi tantiaquidquio icquin ëmbi aton Madon naid chuibenenuc. ¹⁰ Nadembidi Nuquin Papa chianembi. —Doma yacnocquido istantiaquio iquebi. Mimbî nidmiac nëbi nidtsiabi, Papa —quequin chianembi. ¹¹ Aden mibi istantiaquio iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiamiacpadomboen chieshtoenquio icquin Esus tantiaquionona —quequin mibi chuibantsiambi. ¹² —“Chieshtoenquio icquin Esus tantianuna,” quec chuinanec bëdamboec tabadec aidobëd bëdambo ictsiabi —quiash mibi iste bunebi.

¹³ Tanta, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —queshobi Nuquin Papan nac nidenquio iccobi. —Ëmbi Esusën naid chuibanac matses utsibon dadpeshun Esus tantiabeneapadomboen ma Doma yacnocquidon utsibontsen Esus tantianu —quiash mibi yacno nidtiadquio iquebi. ¹⁴ Esuquidistun chiacpadomboen ambi naid matses abitedi chuibantiadquio iquebi. —Dadpen tantiaquidobëdtabi tantienquio icquidotsen chuibenenu. Adem-bidi dada uaquidobëdtabi dada uainquio icquidotsen chuibenenu —quiash nebi. ¹⁵ Aden chuibenequi shubu dadpen icquid Doma yacno nidshun mibitsen Esusën naid chuibantiadquio iquebi.

¹⁶ Esusën naid chuibenec bëdambo iquebi naden tantias. —Nuquin Papan tantiacpadec matses cuidmenquio icnuec Esus abided cuidadec unësad caondash. Aid tantiasho Nuquin Papan matses cuidenquio iquec. Abia chiaidon isadaidbon Esus tantiasho cuidenquio icquin isadaidpembon matses utsibontsen Esus tantiasho Nuquin Papan cuidenquio iquendac —quiash Esusën naid chuibenec bëdambo iquebi. ¹⁷ Esusën naid chuisho tantiasho nuqui naden tantiec. —Nuquin Papan chiaid niac-niacboedombi Esus tantiasho Nuquin Papan nuqui bëdamboen isbenec ambi chiaid niac-niacacmaidbimboecnuc —quequin nuqui tantiapec. Adem-bidi chuiquin Nuquin Papan isadaidbo tsusedpa dada uamepampic. “Nuquin Papa ambi chiacpadomboen naquidquio nec,” quequin abi tantiec tabadquid Nuquin Papan bëdamboen isec,” quequin dada uamepampic.

Matses utsibo icsamboec tabadaid

¹⁸ —Abi tantiasa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadte bunquin matses dadpeshun Nuquin Papan cuidte tantiatiapimbo iquec. ¹⁹ Abi tantiametequid ambi uaid isun Nuquin Papa tantiatiadquidi Nuquin Papa tantiate bunenquio matses icpec. —Adquidshenda Nuquin Papa nepec —matses camenuen Nuquin Papan abitedi uapampic. ²⁰ Nidaid uaquinc cuëte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nëid uaquidien nadquio icchitec. Nibëdantiapimbo icquidien nechitec. Abipadquid utsi nibëdnuc comapenen tantiaquin nabanquidquio yec abitedishun Ichoen nechitec —quetiadquidi adenquio matses iquec. Adquid Nuquin Papan cuidendac.

²¹ *Ambi uaid isash:* —Nëid uaquid bédambo iquec. Aidëmbien ëbi nashunchitec —quetiadquidi pamumëdabimboecquin Nuquin Papa tantiatiapimbo matses iquec. ²² —Dadpen bédamboen tantiembi —quequimbi tantienquoio matsesën iquec. ²³ Aden unëstiapimbo icquid Nuquin Papambo tantiatiapimbo icquimbi unësquid-uidquoio tantiaquin aibimboecnuc nacnenshun papa quequin chianec. Utsibon matsesbimboecnuc nacnenshun: —Ëbi bédamboen ista, papa —quequin ambi nacnenaid chiech. Utsibombic aben icquid nidaidën capuquidbimboecnuc nacnenshun adembidi chiech. Utsibombic uicchun podochoquidbimboecnuc nacnenshun adembidi chiech. Utsibombic aben icquid tacbidën siuidquidbimboecnuc nacnenshun adembidi ambi nacnenaid chiech. Ènden adquoio matses yampicpadomboembidi nëbi adomboembidi matsesën naic.

²⁴ *Adsho isash Nuquin Papa:* —Ma bédamboec tabadnu —queuidboedi icsamboecuidi matses tabadsho isash: —Ma ambi tantiacpadequi icsamboec tabadpanu —quiampampic. Adnëdambic nëbi abi bunacpadeq icsamboec tabadec utsin chido chudteuidi bunquiec dada. Adecbidi aton bënëpenquoio chudmeteuidi bunquiech chido. ²⁵ —Abitedi uaquidquoio Nuquin Papa nec —quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. —Nuquin Papambobien bédamboshë iquec —quequin ënenquoio icquin chuitiadquidi aidon padenquoio icpec.

²⁶ *Adsho isash:* —Ma abi bunacpadeq icsamboec tabadpanu —quiampampic Nuquin Papa. Adnëdambic nëbi icsabudquiech dada bunenquoio yequi chido daëdi dachudnanec. ²⁷ Adecbidi chido bunenquoio yequi dada daëdi chichudnante natia bunquiopec. Aden ambi chiaid niac-niaquec icsamboec tabadsho Nuquin Papan cuidendac.

²⁸ *Adec abi tantie bunenquoio icsho isash:* —Ma bédamboec tabadnu —queuidboedi Nuquin Papa: —Ma abi icsate bunacpadequi tabadpanu —quiampampic. Adnëdambic nëbi pabiate shëcuë nibëdabimboecquin Nuquin Papan chiaid niac-niaquec icsamboec tabadpec bédambo ictiadquidobi. ²⁹ Nadquido icsamboec tabadquido nec. Nëidic aton chidopenquoio chudquido. Nëidic aton bënëpenquoio chudmequido. Nëidic icsamboshë icquido. Nëidic aton na dadpen bedteuidi bunquido. Nëidic chieshquido. Nëidic matses utsibobimboec icte bunec chieshëmënuquido. Nëidic cuesunianquido. Nëidic chieshëmënuquido. Nëidic muaquido. Nëidic icsa uate bunquido. Nëidic utsibo icsaiduidi chuiquido. ³⁰ Nëidic ambenquioibi chuishunquin chieshënuquin muauaquido. Nëidic Nuquin Papa chieshënuquido. Nëidic mamënuquido. Nëidic utsibo nashunquoio icquin aton nauidi naquido. Nëidic: —Ëbiuidtsëqui bédambo iquebi —quequido. Nëidic: —¿Icsaquin atotsimbi utsi nape? —quec icsate bunquido. Nëidic anibëdtan amën chiaid niac-niaquido. ³¹ Nëidic piushbimboecquin Nuquin Papan chiaid tantienquoio icquido. Nëidic aton matses tantienquoio icquido. Nëidic nëishash baded nëish bédanenquoio icquido. Nëidic utsibo bédamboen istiapimbo icquido. Adquidtedi Nuquin Papan chiaid niac-niaquec icsamboec tabadquid nendac. ³² —Abi icsaid ëntiapimbo icquido Nuquin Papan cuidquin chian anëdënquiacno nësecaindac —quequin tantiequi ënëdenquoio yec icsaded-icsadedquiech. Utsibotsen icsasho isash cuishonquec. —Bédambo iquec. Èbipadquidquoio nec —quepec.

2

Matsesën naid Nuquin Papan abimbo chuite

¹ Aden icsamboec tabadaid ëmbi chuisho tantiash: —Adquid icsamboshë iquec —¿quecta ique? —Aden naic aid icsa —queboedi mibitsen adecbidi icsapec. —Icsaquidpenquoio nebi —quec mibi muaic. ² Nuquin Papambien matsesën naidtedi tantiaquid icquin: —Nëido icsambo iqueque. Icsano nidmenu —quequin abimbo chiendac. ³ —Matses utsibo icsambo iquec —queboedombi mimbitsen Nuquin Papan chiaid niac-niacpec. Adash: —Nuquin Papan nuqui cuidenquoio iquec —¿quecta ique? Mibitsen Nuquin Papan cuidendac. ⁴ *Ambi uaido matses abitedi icsambo icsho isash unësquio icquin matses bédamboen iste bunquin icsaidobi Nuquin Papan baded cuidenquoio iquec.* —“Icsaboedi nëbi Nuquin Papan chiacpadeq bédamboec tabadtiadquio iquebi,” quequin ma matsesën ëbi tantianu —queshun Nuquin Papan matses baded cuidenquoio iquec. Abi icsaid ënenquoio icsho isun cuidendac. ¿Adsho tantiashta mibi nadpe? —Mua. Nuquin Papan ëbi cuidtiapimbo iquec. *Ambi chiaid niaquesambo nebi —¿quecta ique? Adec onquec mibi muapec.*

⁵ —Nuquin Papan chiaid niaboedëmbi ënta —caqui: —Padi. Èmbi naiduidi naic bédambo iquebi —quequin ënenquoio icquin Nuquin Papan chiaid niac-niacbudec icsamboecuidi mibi tabadec. Aden mimbi Nuquin Papan cuidmendac. Nuquin Papan matsesën naidtedi chuite ushëmbi mimbi icsamboen naidtedi chuishun Nuquin Papan mibi cuidendac. ⁶ *Matsesën naidtedi tantiaquin matses cuidendac. Bédambo icquido abëdi tabadmequin icsaido icsano nidmendac Nuquin Papan.* ⁷ *Abi tantiec bédambo icquido: —“Mibi bédambo iquec,” mabi Nuquin Papan canu —quiash abëd tabadte bunec Nuquin Papan chiacpadeq*

bédamboec tabadec nec. Aido unēsacsho Nuquin Papan abēdi tabadmendac padpidec unēstiapimbo icnuc. ⁸Icsaquidoen Nuquin Papan chiaid chiaqui tantiate bunenquo icquin aton nauidi naic icsamboecuidi tabadsho Nuquin Papan comapenen cuidendac. ⁹Adoac icsamboec tabadquido abitedi natiacuededec tabadendac. Shubiquiendac. Con matses isadaidbo Nuquin Papan chiaid ambia tantiaimpidi icsasho cuidquin matses utsibotsen icsasho Nuquin Papan cuidendac. ¹⁰Abi tantiec bédamboec tabadquido unēsacsho abi yacno tabadmeshun: —Nēid bédamboec tabadquid niondash —quequin utsibo tantiamequin Nuquin Papan bédambo icmendac. Ambia Nuquin Papan chiaid tantiondaido Isadaidbo abi tantiaquid icsho abēdi tabadmequimbi matses utsibotsen abi tantiaquid icsho Nuquin Papan abēdi tabadmendac. ¹¹Icsamboec tabadquido icsano nidmequin bédamboec tabadquido abēdi tabadmendac. —Isadaidbouditsēqui bédamboen isembi —quenquo icquin adoendac.

¹²Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiaishi aidēn chiaid niac-niaquec icsamboec tabadsho adembidi cuidendac. ¹³Ambi: —Naden nata —quequin chiaid tantiaashumbic adomboen naisa bédamboen istiapimbo icquin ambi chiacpadec tabadquid Nuquin Papan bédamboen istsiash. ¹⁴¿Ada Nuquin Papan chiaid tantiacmaidon matses utsibon bédamboec tabadte tantienquo iccuededpec? Ma bédamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bédamboen naic Nuquin Papan chiaid tantiaashumbimboen. ¹⁵Adec bédamboec tabadec: —Bédambo iquebi —quequin ambembi tantiec. Icsamboec tabadec: —Icsachitobi —quequin adembidi ambembi tantiec. ¹⁶—Adec matses abitedi bédamboec tabadte tantiequi adqueic tabadenquo iquec —qeshun Nuquin Papan chiacpadēn Esuquidistun matses cuidendac. Matsesēn otacquo tantiaidbēda matsesēn ompoquin naidtedi ambembi tantiaashun Esusēn matses cuidendac. Esus chuibanquin aden aidēn cuidte chiombi.

Isadaidbon Nuquin Papan chiaid niac-niacaid

¹⁷Tantia, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidēn tsyuecquid icsho Nuquin Papan ēbi bédamboen isec. Utsibon Nuquin Papa tantienquo icnubi Nuquin Papan con matsesbēdtambi bédamboen tantiembi. Bédambo iquebi —mibi quepec. Adboedi mibi icsaic. ¹⁸Nuquin matses tsusiobon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiacpadec utsibo bédamboec tabadsho isash: —Aido bédamboec tabadec —queboedi mibi bédamboec tabadenquo icpec. ¹⁹Adecbidi: —Nuquin Papan chiaid tantiacmaido Nuquin Papan chiaidquo chuibanquid nebi. Paposhquiachimboecnuc tantiamequidquo nebi —mibi quepec. Adboedi aidēn chiaid niaquec mibi icsaic. ²⁰—Chuisho tantiabi icquido nēbi tantiabentsēcquidobēda Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquo chuibanquid nebi —mibi quepec. ²¹Adec: —Nuquin Papan chiaid niac-niaquenda —queboedēmbi aidēn chiaid mimbi niac-niaquec. —Ampenda —queboedēmbi mimbitsen ampepec. ²²—Utsin chido chudenda —queboedēmbi utsin chido mimbitsen chudpec. Papa quequin matsesbimboecnuc matses utsibon nacnenaid isash: —Nuquin Papa tantienquo yec nēid nacnenguid icsambo iquec —queboedēmbi aidēn nacnenaid tantiate shubun puduedshun mimbi ampepec. ²³—Nuquin Papan ambi chiaid con tsusedpa Moises dada uamepampid bedshun con matses isadaidbonuidtsēqui Nuquin Papa tantiec —queboedēmbi ambi chiaid niac-niaquec mibi icsamboec tabadec. ²⁴Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caidtembien icsambo icchitec,’ capendac,” quequin dada uamepampicpadqueic mibi icsamboec tabadsho isun matses utsibon Nuquin Papa bédamboen tantienquo iquec.

Nuquin Papa tantiaquidquo icte chiaid

²⁵—Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuēbo shui dēbid dēteshun secaic. Adonēdaid ambi chiaid niac-niaquenquo yec bédamboec tabadsho Nuquin Papan bédamboen istsiash. Isadaidbo utsibon ambi chiaid niac-niacsho Nuquin Papan bédamboen istiapimbo iquec ambi con matses cacmaidobimboecnuc. ²⁶Nuquin Papan con matses cainquo icpampido matses utsibon ambi chiacpadec bédamboec tabadsho Nuquin Papan bédamboen istsiash ambi: —Con matses nec —caidobimboecnuc. ²⁷Adec matses utsibo Nuquin Papan chiacpadec bédamboec tabadsho isash isadaidbo nadec chiadpec. —Matses utsibo bédamboec tabadnubi Nuquin Papan Moises dada uamepampid isban-isbanshumbi isadaidbon Nuquin Papan chiaid niac-niacpec. Isadaidbo matses dadpen icsambo iquec —cadpec. ²⁸¿Shui dēbid dēteshun

secaquido isadaidbotedi Nuquin Papa tantiaquidomboda nedic? Padenquio. ¿Matses ismenuen Nuquin Papan chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquio. ²⁹ ¿Ambi Moises dada uamepampiduidi èmbimbo nanuequid Nuquin Papa tantiaquidquioda nedic? Padenquio. Nuquin Papa tantiaquidquien aton Mayanèn tantiamiacpadec bédamboec tabadec. Adquid: —Mibi bédambo iquec. Con matses mibi canu —capec Nuquin Papan matsesèn adoenuico icnubi.

3

Nuquin Papan isadaidbo tantiec, quequin chiaid

¹ Aden: —Abi tantiec bédamboec tabadquid Nuquin Papan con matses catsiash —quequin èmbi chuisho tantia: —¿Isadaidbo yecta icsambo icpec? —¿iquecta ique? —Padenquio iquec —caimbi. —¿Ada aido ambi con matses caido Nuquin Papan nashunac? —¿iquecta ique? ² Ai, aido nashunquiac. —Èmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic. ³ Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquin nainquico icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquico icpatsiash? ⁴ Padenquio. Ma ambi chiacpadomboen naquidquido Nuquin Papa neyoc. Muesambo nec. Matses abitedimbo muaquidquido icnuc Nuquin Papan abimbo chuiquidquido nendac. Aden chuiquin Nuquin Papan con tsusedpa dada uamepampic.

“Nuquin Papa abimbo chuiquidquido nec.

‘Nèid bédambo iquec. Nèid icsambo iquec, quequin Nuquin Papan abimbo chuibanendac, quequin ma matsesèn tantianu,’ quequin

Nuquin Papan: ‘Mibi icsaoc,’ quequin èbi chuibodè chiombi,’

quequin dada uapampic.

⁵ Èbi adsho bédamboen tantiata. Icsamboen tantienda. —Nuquin Papan chiaid niacniaquec èbi icsasho isash: “Adquidpenquico Nuquin Papa nec. Icsaisambo nec,” quetsiash con matses. Adec icsaquimbi èmbi con matses Nuquin Papa bédambo icte tantiameshobi Nuquin Papan èbi cuidac icsambo ictsiash —quequin icsamboen tantienda. ⁶ Matsesèn naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bédambo iquec. Mibi cuidenquico iquembi —quetiapimbo Nuquin Papa iquec. Muesambo nec. ⁷ Nadembidi icsamboen tantienda. —Èbi muaquidquido icnubi: “Adquidpenquico Nuquin Papa nec. Bédamboshè iquec. Muesambo nec,” quetsiash con matses. Adec muaquimbi Nuquin Papa muainquico icte con matses tantiametsiambi. Aden èmbi abi tantiameshobi Nuquin Papan èbi cuidac icsambo ictsiash —quequin icsamboen tantienda. ⁸ Aden icsamboen chiec nuqui nadsiac. —Nuquin Papa tantiamenequico icsaquionona —nuqui quetsiac. ¿Adendambi chuidio? Padenquio. —Pabado chedo: “ ‘Nuquin Papa tantiamenequico icsaquionona,’ quiosh,” quequin mibi muauaosh —quequin chuituidoshi. Èbi muauaquido Nuquin Papan cuidchitoshon.

Matses abitedi icsaquido nec, quiaid

⁹ Tantia, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuidi Nuquin Papan chiaid niac-niaquesa icpe? Padenquio. Nuquin Papan chiaid niaquesamboen nibèdec. Matses utsibo con matses isadaidbòdè abembi bédamboec tabadtiapimbo iquec. Abitedimbo icsamboec tabadquido nec. Aden mibi chiombi. ¹⁰ Aden chuiquin Nuquin Papan dada uamepampic naden.

“Nuquin Papan chiaid niaquesambo nibèdec.

Abitedimbo icsaquido nec.

¹¹ Nuquin Papa tantiaquin ambi chiacpadomboenuidi naquidquido nibèdec.

Nuquin Papa tantiate bunquidquido nibèdec.

¹² Bènudshun podqued tantienquico yacimboen Nuquin Papa tantienquico icquin matses abitedishun ambi chiaid niac-niaquec.

Adsho isun Nuquin Papan: ‘Abitedimbo icsambo iquec,’ capec.

Ambi chiaid niaquesambo nibèdec.

Abitedimbo icsapec.

¹³ Nadquico iquec. Nèid icsamboec chuishumènquido. Unèsaid ènden chococacno shèdec: ‘Pisenac,’ quequin tantiacimboen adquido onquesho tantia: ‘Icsambo icquido nec,’ quequin matsesèn tantiec.

Nèidic muaquido.

Nèidic nisin pequin icsa uacimboen icsa uate bunec icsamboec onquequido.

¹⁴ Nēidic nēishash chieshēmēnec: ‘Unēschitoshon,’ quequin icsamboenuidi chuiquido.

¹⁵ Nēidic intac mēyamec badedquo cuesunianquido.

¹⁶ Nēidic abēd icquido natiamec chieshēmēnquido.

¹⁷ Adquidtedi cuesnante bunec bēdamboec tabadtiapimbo iquec.

¹⁸ ‘Nuquin Papan cuidnushe,’ quenquo icquid Nuquin Papa tantiesabo nec,” quequin dada uamepampic.

¹⁹ Aden ambi: –Abitedi icsambo iquec –quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiashun: –Icsaquidpenquo nebi –quequin isadaidbon Nuquin Papa chuitiapimbo iquec. –Icsaquido abitedi nec –quequin Nuquin Papan matses utsibo abitedibēdtabi isadaidbotsen chiac: –Abimbo chiec –quiash dacuēdec ēcbedanenquo tabadendac matses abitedi. ²⁰ Aden ambi chiaid niaquesambo nibēdnuc: –Ambi chiaid niaquesa icsho Nuquin Papan nuqui bēdamboen isec –quequin nuqui abimbo chuitiapimbo iquec. Nuquin Papan chiaid isash: –Ambi chiaid niac-niaquec icsamboequien nuqui tabadchitec –quequin nuqui tantiapec.

Nuquin Papa matses bēdamboen ismete chiaid

²¹ Aden ambi chiactedi natiapimbo yec matses icsasho isun Nuquin Papan abi matses bēdamboen ismete chuiquin isadaidbo tsusedpa Moisesbēdta tsusedpabo utsibo dada uamepampic ēndenquimbo. Aden ambi dada uamepampicpadomboen nēbi Nuquin Papan abi matses bēdamboen ismequid matsesmpac caondash. ²² Adoac Nuquin Papa abi tantiaquido bēdamboen ismenuec Esuquidistu abided cuidadec unēspac caondash. Nēbi aidquo tantiaquo Nuquin Papan matses bēdamboen isec. Isadaidbobēdtambi matses utsibontsen Esus tantiasho adoendac. ²³ Adec matses abitedi Nuquin Papan chiaid niac-niaquec icsaquido yec Nuquin Papapadquid icsaisambo nibēdec. ²⁴ Adquid bēdamboen istiapimbo icquin matses bēdamboen iste bunquin aton Mado Esuquidistu abided unēs uamequin Nuquin Papan cuidpac caondash. Nēbi abided cuidadaid Esus tantiasho nuqui bēdamboen isec icsaisabimboecnuc. ²⁵ –Icsaido cuidquid icquimbi nuqui cuidenquo icnuen Nuquin Papan nac –nuqui camenuen Nuquin Papan nuqui icsaid bedshumequin Esused unēs uamequin cuidpac caondash. Esus tishabi icnuc Nuquin Papan abi tantiaquido cuidenquo icpampic: –Yuecshun con Madoded cuidendambi –quequin tantiaquin. ²⁶ Nēbi adecbidi: –Icsaido cuidquid nebi –quequimbi Nuquin Papan ambi chiacpadec nuqui icsaid bedshunec abided cuidadaid Esus tantiasho adembidi nuqui bēdamboen isquin cuidenquo iquendac.

²⁷ Ēmbi aden chuisho tantiash: –Ambi chiacpadomboenuidi nasho Nuquin Papan bēdamboen isebe –quequin mimbi abimbo chuitiapimbo iquec. Matsesēn Nuquin Papan chiacpadomboenuidi natiapimbo icsho bēdamboen istiapimbo icboedi nēbi Esus tantiasho Nuquin Papan nuqui bēdamboen isec. ²⁸ Aden matsesēn ambembi naquin Nuquin Papa bēdamboen ismetiapimbo iquec. Padnuen utsin: –Matsesash ēbi icsaid bedshunec abided cuidadaid tantiasho Nuquin Papan ēbi bēdamboen isec –quequin Esus tantiasho Nuquin Papan bēdamboen isec. ²⁹ Ĵsadaidboudida Nuquin Papan bēdamboen ispatsiash? Padenquo. Matses utsibo isadaidpembobi Nuquin Papan bēdamboen istsiash. ³⁰ Matses abitedi uaquid icquin ambi chiacpadomboen isadaidbon Esus tantiasho Nuquin Papan bēdamboen isec. Adembidi matses utsibon Esus tantiasho Nuquin Papan bēdamboen isec. ³¹ Adoaido: –Nuquin Papan chiaid niac-niaquec icsamboec tabadnuna –Ĵquecta icpec? Padenquo. Esus tantiaquido icquin Nuquin Papan chiacpadomboen natiadquo nuqui yanec.

4

Nuquin Papan Abadauan bēdamboen isaid

¹ Tantia. Aden Nuquin Papan bēdamboen iste chuiquin isadaidbo tsusedpa Abadauan caid ēnden icpampidtsen mibi chuinu. ĴAtotsieshun Nuquin Papan Abadauan bēdamboen isbempampic? ² Bēdamboecuidi tabadsho Nuquin Papan bēdamboen isaid yec Abadauan: –Bēdamboecuidi tabadquin Nuquin Papa bēdamboen ismembī –quetsempampic. Abadauan bēdamboecuidi tabadambo. Adsho: –Bēdamboecuidi tabadsho Abadauan bēdamboen isembi –quenquo icpampic Nuquin Papa. ³ Nuquin Papan tantiamiac naden Abadauanēn nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bēdamboen isendambi,’ qeshun Nuquin Papan bēdamboen isbempampic icsaisabimboecnuc,” quequin chuipampic. ⁴ Matsesien adenquo iquec. –Ambi chiacpadomboen nasho ichon yua bēdamboen isquid –nuqui quepec. ⁵ Nuquin Papambien nadotsiash. Matses icsaboedi: –Bēdambo icquid icquin ambi chiacpadomboen Nuquin Papan naindac –quequin abi tantiasho Nuquin Papan

bédamboen isbentsiash icsaisabimboecnuc. ⁶ Adembidi Nuquin Papan tantiamiac ambi bédamboen iste chuiquin con tsusedpa Dabidén dada uapampic naden.

⁷ “ ‘Ambi chiaid niac-niacboedëmbi: Bédambo icquid icquin Nuquin Papan ambi chiacpadomboen naindac, quequin abi tantiasho Nuquin Papan ëbi bédamboen isec ëbi icsaid bëpiscudacimbioen. Icsaisabimboecnuc ëbi bédamboen isquin ëbi cuidenquo iquendac,’ quiash matses bédambo yec cuishonquec.

⁸ ‘Abi tantiaquid icsho isash ëbi icsaid bëpiscudash:

Ëmbi chiaid mimbi niac-niaccoque. Mibi cuidnu, Nuquin Papan ëbi cainquo iquendac,’ quiash matses bédambo iquec,”

quequin Dabidén chuiampic ëndenquimbo.

⁹ ¿Shui dëbid dëteshun secaido isadaidboudida Nuquin Papan bédamboen ispec? Padenquo. Matses utsibotsen bédamboen istsiash. Tantia. Ëmbi chuiboedbidi chuiuanu. Abi tantiaquid icsho Nuquin Papan Abadauan bédamboen isbempampic ambi chiaid niac-niacacmaidbimboecnuc. ¹⁰ ¿Ambi chiacpadomboen shui dëbid dëteshun secacshoda Nuquin Papan Abadauan bédamboen isbempampic? Padenquo. Shui dëbid dëteshun secabi icsho Nuquin Papan Abadauan bédamboen isbempampic. ¹¹ Bédamboen isbenshumbic: —Abadauan, ëmbi chiacpadomboen nabenta. “Nuquin Papan bédamboen isaido nebi. Aid bëshunchitomane,” qeshun min matsesti shui dëbid dëteshun secabanta —capampic Nuquin Papan. Adoac Abadauanën nabempampic. Aden shui dëbid dëtiammaid icquin Abadauanën Nuquin Papa tantiacpadomboen nëbi shui dëbid dëtiammaidon Esus tantiasho Nuquin Papan bédamboen isendac ambi chiaid niac-niacacmaidbimboecnuc. ¹² Abadauanën tsyuecquido isadaidbo Abadauambimboecquido Nuquin Papa tantiaquido abi iquec. —Shui dëbid dëtemenëdaid icsho Nuquin Papan bédamboen isebe —quenquo icquin Nuquin Papabëda Esus tantiasho isadaidbo Nuquin Papan bédamboen isaido abi iquec.

Nuquin Papan Abadauan chiaid

¹³ Ëndenquimboshë Nuquin Papan Abadauan naden chuiampic. —Abadauan, mibi nibëdanan yuecshun min tsyuecquid abentsëcshun utsibo bédambo icmendac. Nidaid utsi-utsiec yacno tabadquido adoendac —quepampic Nuquin Papa. —Min tsyuecquid abentsëqui tantiasho matses bédamboen isendambi —quequin otacquo tantiaquin Nuquin Papan adopampic. ¿Ambi chiacpadomboenuidi Abadauanën nashoda Nuquin Papan aden chuiampic? Padenquo. Nuquin Papan chiac: —Ai, abimbo caic —qeshoen Abadauan bédamboen isbenshun Nuquin Papan adopampic. ¹⁴ ¿Nëbi: —Moisesën chiaid niaquesa icsho Nuquin Papan bédamboen isebe —quec muaquidoda Nuquin Papan bédamboen ispadic? Padenquo. Adec muaquidobi bédamboen isquin ambi Abadauan chiaid niactsiash. Adotiapimbo icquin ambi chiacpadomboen Abadauanën tsyuecquid tantiaquidoen bédamboen isec. ¹⁵ —Moisesën chiaid niaquesambo nebi —queboedombi aidën chiaid niac-niacsho isun Nuquin Papan cuidendac. Ambi chiaid niaquesambo nibëdec. Nuquin Papan: —Bédamboec tabadta —quequin chiaid nibëdnuc mibi aden chiaid matsesën niactiapimbo ictsiash. Ambi: —Bédamboec tabadta —quequin chiaid abi iquec. Aid niaquesambo nibëdec.

¹⁶ Nuquin Papan naden Abadauan chuiampic. —Abadauan, ëmbi chuiho tantiasho: “Mimbi abimbo caic,” qesho mibi bédamboen isquin min tsyuecquido bédambo icmendambi —quequin chuiampic. Nëbi ambi chuiampicpadomboen naquin Esus tantiaquido Nuquin Papan bédamboen isec. Nuquin Papan ambi chiaid dada uamepampidën Moisesën tsyuecquido isadaidbon Esus tantiasho Nuquin Papan bédamboen isec. Abadauanën Nuquin Papa tantiacpadomboen matses utsibotsen Esus tantiasho adembidi bédamboen isec. Esus tantiaquidtedishun papabimboecquid Abadauan nec. Ambi Nuquin Papa tantiacpadomboen nuqui tantiec. ¹⁷ Ambi aden Abadauan chiampid chuiquin Nuquin Papan isadaidbo tsusedpa naden dada uamepampic. “Mibi unësan yuectaneshun min tsyuecquido nidaid utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoquien: —Abimbo mimbi caic —quequin Nuquin Papa Abadauanën tantiapampic. —Comapenen tantiaquin unësaid uincemequidquo icquin ambi chiacpadomboen ëbi bacuë tishmendac —quequin Abadauanën Nuquin Papa tantiapampic. Nëbi ambi Nuquin Papa tantiacpadomboen Esus tantiaquido: —Nuquin papabimboecquid Abadauan nec —quepec.

¹⁸ Nuquin Papan: —Min tsyuecquido dadpenquo iquendac —cac: —¿Mitsipadoac aitedi con tsyuecquido icpec? Ma con bacuëbo nibëdpayoc. Tsusiombo icquin bacuë tishmetiapimbo iquebe —queuidboedi Abadauan nadpampic. —Ai, abimbo mimbi caic —quepampic aton mado nibëdnubi. Adshun tsusioctscëquo icquimbi aton mado tishmepampic. Nëbi aton tsyuecquido dadpenquo iquec Nuquin Papan chiampicadequi.

19 —Con seta dadpenquoio 100tedi icnuc tsusiobudtsēcshun ěmbimbo bacuē tishmetiapimbo iquebi. Con chido ěndenquoio machobudtsēccondaid icquin bacuē usundotiapictścquoio iquec —quequin tantiequi: —Nuquin Papan abimboen caosh —quepampic. ²⁰⁻²¹ —Nuquin Papa mue nec —quenquoio yec: —Nadatiambo icquid icquin ambi chiacpadomboen Nuquin Papan naic —qeshun Nuquin Papa tantiatsēcboeděmbi aid tantiaquiopampic. Adshun: —Mibi bědamboshě iquec, Papa —quequin Nuquin Papa chuipampic. ²² Adsho tantiashun Nuquin Papan bědamboen isbempampic icsaisabimboecnuc.

²³ Aden Nuquin Papan ambi Abadauan bědamboen isaid isadaidbo tsusedpa dada uamepampic. ¿Abadauaněn naiduidi tantiamenuenda aden dada uamepampic? ²⁴ Padenquoio. Nuquitsen Nuquin Papan ambi bědamboen iste tantiamenuen aden dada uamepampic. Nuquin Icho Esusbědta abi uincuemquid Nuquin Papa tantiasho nuquitsen bědamboen isec. ²⁵ Nuquin Papan tantiacpadec nuqui cuidmenquoio icnuec nuqui icsaid bědshunec abided cuidadec Esus uněspanědash. Aden Nuquin Papa abi tantiaquido bědamboen ismenuen uněsash uincuempanědash Esus.

5

Esus tantiaquido Nuquin Papan bědamboen isaid

¹ Aden Esus tantiasho Nuquin Papan bědamboen isaideo yec abi cuidte dacuěěnenquoio yec abědi nuqui bědamboec tantiananec. ² Ěmbi chuibocpaden abi tantiaquido nuqui cuidmenquoio icnuec abided uněsquin Esusěn Nuquin Papa nuqui bědamboen ismepec. Adoac nuqui nadpec. —Nuqui bědamboen isquin uněsacsho nuqui abipadquid icsaisa icmequin Nuquin Papan abědi nuqui tabadmendac —quec nuqui cuishonquec. ³ Nadectsen nuqui cuishonquec. —Esus tantiaquid icsho utsibon chieshěnaqui Esus tantiatsēcboedi chieshtoenquoio icquin Esus tantiaquidquo yanebi —quectsen nuqui cuishonquec. ⁴ Aden chieshtoenquoio icquin Esus tantiasho Nuquin Papan nuqui bědambo capec. Adoac: —Esus tantiaquid icsho Nuquin Papan ěbi bědambo icmec. Uněsacsho abi yacno ěbi tabadmendac ambi chiacpadomboen —quepec nuqui. ⁵ Adec: —Abi yacno ěbi tabadmendac —quequin Esus tantiaquid ¿ada Nuquin Papan cacumepec? Padenquoio. Aton Mayan nuquiběd icmiac paposhquiabimboen nuqui naden tantiec. —Nuquin Papan ěbi bědamboen tantiaquin abi yacno ěbi puuedmendac —quequin nuqui tantiec.

⁶ Aden matses tantiaquiec Nuquin Papan tantiacpadec Esus nadpanědash. Matses abitedi abembi bědamboec tabadtiapimbo icsho isun Nuquin Papan uesquin cuidtsenubi abi tantiaquido cuidmenquoio icnuec abided cuidadec Esus uněspanědash. ⁷ ¿Ada adquid matses icpadic? Padenquoio. ¿Cuesanquiděn matses bědambo icquid caic: —Cuesno —quesho tantiashunda dadpeshun: —Aid cuesenda. Ěbiquien cuesta —capatsiash? Padenquoio. Bědamboshě icquid cuesmenquoio icnuen: —Něid cuesenda. Ěbiquien cuesta —cachitembien ictsiash abentsēcshun. Icsambo icquid icshoen aden chienquoio ictsiash. ⁸ Padnuen matses abitedi icsamboecuidi tabadnuc nuqui cuidmenquoio icnuec Esuquidistu abided cuidadec uněspanědash. —Nuquin Papan ěbi tantiaquiec —matses camenuen Nuquin Papan aden Esus namepanědash.

⁹ Něbi abided cuidadaidquoio Esus tantiasho Nuquin Papan nuqui bědamboen isec icsaisabimboecnuc. Aden bědamboen isquin Nuquin Papan nuqui cuidtiapimbo iquendac. ¹⁰ Matsesěn abi chieshěnsho isun aido cuidte bunenquoio icquin Nuquin Papan aton Madoded cuidpanědash. Aden aton Madoded cuidash něish bědanshun Nuquin Papan aton Mado tantiaquid bědamboen isec. Něbi Nuquin Papan uincuemědaid icquin Esusěn nuqui bědamboen tabadmec. ¹¹ Adembidi aiděn tantiamiacpadomboen nuqui: —Ěbi cuidenquoio icnuen aton Madoded cuidquid bědamboshě iquec —quequin Nuquin Papa tantiec nuqui cuishonquec.

Adaněn naidbědta Esusěn naid chiaid

¹² Nuqui bědamboen ismequid Esus tishabi icnuc abia matses uaiděn Adaněmbo Nuquin Papan chiaid niac-niaquec icsasho cuidquin aidba Nuquin Papan uněsquid icmepampic. Adembidi Adaněn tsyuecquido matses abitedi Adan icsacpadecbidi icsate tantiaquimbi Nuquin Papan uněsquidoidquoio matses icmepampic. ¹³ Nuquin Papan: —Adec icsaında —quequin ambi chiaid Moises dada uamiabi icnubi matses abitedi icsapampic. —Ěmbi Moises chuimiaiě mimi niac-niaquec —Nuquin Papa quetiapimbo icnubi matses icsapampic. ¹⁴ Nuquin Papan chuiboedquobi niaquec Adamba icsasho Nuquin Papan cuidac uněsec taěpampic. Adan uněsambic aiděn nacpadomboen nabi icsa utsi naiqui matses abitedi icsasho adembidi uněsquidoidquoio Nuquin Papan icmepampic. —Naden nata —quequin Moises dada uamequin Nuquin Papan chiaibi icnubi aiděn chiaid niactiapimbo yec utsi

naic icsashobi adompampic. Ambia Nuquin Papan chiaid niacampid Adampadquidpenquo Esuquidistu nec.

¹⁵ Matses abentsëcshun Adanëmba Nuquin Papan chiaid niacsho cuidquin aidba unësquid icmeshun aton tsyuecquido matses unësquidouidquio Nuquin Papan icmepampic. Adecbidi Nuquin Papa matses bëdamboen ismequid abentsëc iquec. Esusuidtsëqui abi tantiaquidotedi cuidmenquo icnuec abided cuidadec unëspac caondash. Nëbi aid tantiasho Nuquin Papan nuqui bëdamboen isec. ¹⁶ Adanën nacbimboen Nuquin Papa matses bëdamboen ismequidën nambo. Adan abentsëqui icsaquin Nuquin Papa cuidmiac abi unësapadquiec matses abitedi unësquidombo yanac. Nuquin Papa bëdamboen ismequidëmbien matses icsaid bedshunec abided cuidadquin Nuquin Papa abi tantiaquidotedi bëdamboen ismec icsaisabimboecnuc. ¹⁷ Ambi chuihoedi niacquin Adanën Nuquin Papa cuidmiash unësquid yanacpadece matses unësquidouidquio iquec. Esuquidistunuidtsëqui nac Nuquin Papan matses bëdamboen isendac. Nëbi aid tantiasho Nuquin Papan nuqui bëdamboen isquin bëdamboec tabadquid icmendac. Adec bëdamboec tabadec unëssh Esusbëdtan Nuquin Papan namiacno bëdamboshë yacnombo nuqui tabadendac.

¹⁸ Adec matses abentsëqui icsasho aidbëdta aton tsyuecquido matses abitedimbo cuidquin Nuquin Papan unësquidouidquio icmepampic. Padnuen Nuquin Papan chiacpadece abentsëqui abided cuidadaidën Nuquin Papa abi tantiaquido bëdamboen ismequin Nuquin Papa yacno tabadmendac. ¹⁹ Nuquin Papan chiaid niac-niaquec Adan icsaic taëambic aton tsyuecquido abitedimbo icsaquidouidquio yanac. Padnuen Nuquin Papan chiaid niaquesambo icquin Esusën Nuquin Papa nuqui bëdamboen ismec. ²⁰ ^zMatses bëdamboen isnuenda Nuquin Papan ambi: —Bëdamboec tabadta —quequin chiaid Moises dada uamepampic? Padenquo. Matses abi icsaid tantiamenuen ambi chiaid Moises dada uamepampic. Aden chiaid chuisho tantiash: —Icsaobi —quequin tantiaquin abided cuidadaid tantiasho Nuquin Papan matses bëdamboen isec. ²¹ Taëec matses icsasho cuidac unësquidouidquio yanac. Adsho isun matses bëdamboen isnuen Nuquin Papan ambi chiaid niaquesambo Esusded cuidac. Nëbi Nuquin Icho Esuquidistu tantiasho Nuquin Papan nuqui bëdamboen isec icsaisabimboecnuc. Nuqui unësascho abëdi tabadmendac padpidec unëstiapimbo icnuc.

6

Esus tantiaquid bëdamboec tabadquid, quiaid

¹ Nuquin Papan bëdamboen iste ëmbi chuisho tantiashun naden tantienda. —Icsaido cuidmenquo icnuec abided Esus cuidadec unëspanëdash. Aid tantiasho Nuquin Papan bëdamboen isquin nuqui cuidtiapimbo iqueque. Aden bëdamboen isaqui icsaquionona —quequin tantienda. ² Esus tantiaquido adesambo nec. Esus tantiec icsateuidi nuqui bunenquo yanec. ³ ^zTantienquioda ique? Naden chuiquin mimbi acten mentomiac. —Ëbi cuidmenquo icnuec abided cuidadec unësaid Esus tantiaquid nebique. Ambi chiacpadece tabadtiadquio iquebique. Utsibo ismenu —quequin mimbi acten mentomiac. Adec Esus unësaid tantiequi icsaboedobi icsate bunenquo nuqui yanec. ⁴ Aden Esus abided cuidadec unësaid tantiasho Nuquin Papan utsiacbimboecnuc nuqui icmec. Esus unësascho comapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan utsiacbimboecnuc nuqui icmec. Adoac icsateuidi bumboedobi adte bunenquo yanec Nuquin Papan chiacpadequi nuqui bëdamboec tabadcuenec.

⁵ Adec abided cuidadec unësaid tantiec icsate bunenquo yanquid yec Esus uincuemi-acbimboen comapenen tantiaquin Nuquin Papan utsiacbimboecnuc icmiaidtsen nuqui nec. ⁶⁻⁷ Esus tantiabi yec icsaquido ichoedi matses icsaid bedshunec Esus unësaid tantiec nuqui icsate bunenquo yanec. Mëtanaiad abibi mënchiquidtiapimbo yachimboec matses abemi icsaic ënëdtiapimbo iquec. Adboedi Esus tantiec nuqui icsate bunenquo yanec.

⁸ Adec Esus unësaid tantiec icsainquo yanec nuqui nadpec. —Nuquin Papan uincuemi-aidën Esusën nuqui bëdamboen tabadmec. Unësascho Nuquin Papa yacno abëdi nuqui tabadmendac —nuqui quepec. ⁹ Nuquin Papan uincuemi-ac Esus padpidec unëstiapimbo iquendac. Aton dada unësquid ichoedi unëstiapimbo icquid yanac. ¹⁰ Matses icsaido cuidmenquo icnuec abided abentsequi cuidadec Esus unësaac caondash padpidec unësenquo yec. Adsho uincuemi-ac Nuquin Papan chiacpadomboen nabanec aidbëd tëshnanenquo yec tabadec.

¹¹ Ëbi adsho tantiash nadta. —Ëbi cuidmenquo icnuec abided cuidadec unësascho uincuemi-ac Esus ëbëdi iquec. Aid tantiec icsainquo yanebi. Ambi nacpadece tabadtiadquio iquebi —queta. ¹² Icsamboec tabadenquo icnuna. Nuqui icsate bunaid nainquo icnuna. ¹³ —Icsaquionona —qesho tantiash: —Padi —quenuna. Unësaacbimboen Nuquin Papa tantienquo ictenedëmbi uincuenacbimboen Nuquin Papa nuqui tantiabenondaque.

Ambi chiacpadec bēdamboequien tabadtiad. ¹⁴—Nuquin Papan ambi: “Bēdamboec tabadta,” quequin chiaid Moises dada uamiactedi naquin ěmbimbo Nuquin Papa bēdamboen ismembi —quenquo icquin Esus tantiasho Nuquin Papan nuqui bēdamboen isec. Ambi bēdamboen isaido yec nuqui icsate bunenquo nuqui yaneque. Bēdamboec tabadnuna.

¿Tsuinsin yuabo Esus tantiaquido icpec? quequin chiaid

¹⁵—Aden Nuquin Papan nuqui bēdamboen isec —quequin ěmbi chuisho tantiashun naden icsamboen tantienda. —Nēbi abided cuidadaid Esus tantiasho ěbi bēdamboen isec. Ěbi cuidtiapimbo iqueque. Ambi chiaid niac-niaquec icsabudquionona —quequin tantienda. Esus tantiaquid adesambo nec. ¹⁶ ¿Tantienuioda ique? Icbon chiacpadomboen yuan naquid. Icsamequidēn tantiacpadomboen icsamboen naquid aton yua nendac. Aidēn yua icquin icsaid ěntiapimbo yec unēsash icsano nidendac. Nuquin Papan yuain ambi chiacpadec bēdamboec tabadcuendac. ¹⁷ Mibi adec tabadsho isun: —Esus chuibanac icsaid ěntiapimbo ichoedi Esus tantiabenash Doma yacnocquido bēdamboec tabadcuenac. Aden namec mibi bēdambo iquec, Papa —quequin Nuquin Papa chiombi. ¹⁸ Satanasēn yua icquin mimimbo mibi icsaid ěntiapimbo icsho Nuquin Papan nac ambi chiacpadquiec mibi bēdamboec tabadcuenac.

¹⁹ —Mates icquin: “Nuquin Papan chiaid tantiadenquo iquec,” canushe —quequin bēdamboen tantiamenuen mimbi tantiaid yuan naid mibi chiombi. Satanasēn yua yec icsateuidi bunquiec mibi icsaded-icsadedondac. Adec icsamboshē iccondaidi nēbi Nuquin Papan chiacpadequien bēdamboec tabadtiad. ²⁰ Satanasēn yua yec icsaqueic Nuquin Papan chiacpadec bēdamboec tabadtiapimbo mibi iccondac. ²¹ ¿Ada bēdamboec tabadonda? Ma mibi chieshēmēnquiec tabadteneyoc. —Ěbi chieshēmēnquiec tabadondaid tantiashun: “Mibi icsambo iquec,” ěbi canushe —queshun mimbi naondaid ma mimbi chienquo iccondac. Icsaid ěnabi yec unēsash icsano mibi nidtsenac. Adecbidi icsaid ěnenquo icquido unēsash icsano nidendac. ²² Nēbi nuqui Esus tantiasho Nuquin Papan aton yuabo nuqui icmiac. Adoac icsaid ěntiapimbo ichoedi nēbi nuqui bēdamboec tabadcuenec. Adquid unēsacsho Nuquin Papan abēdi tabadmendac. ²³ Isaido cuidquin Nuquin Papan icsano nidmendac. Abided cuidadec unēsaid Esuquidistu Nuquin Icho tantiasho Nuquin Papan nuqui bēdamboen isquin unēsacsho abēdi tabadmendac.

7

Bēdamboec tabadte chuinen chido bēnēchoquid Pabadon chiaid

¹ Con utsibobimboecquido mibi neque. Tantia. Padpiden mibi chuinu. Naden chiaid mimbi tantianēdac. —Nuquin Papan dada uamiac Moisesēn chiampicpadomboen masesēn naquid. Unēsun aidēn chiaid natiapimbo iquec —quequin mimbi tantianēdac. ² Nuquin Papan chiacpadomboen inaidēn aton bēnē nianesa. Dada utsi chudmesa chidon. Bēnē unēsambien niante dada utsin bedadquid. ³ Bēnē unēsabi icnubi aton bēnē nianquin dada utsi bedanec cuenacsho: —Icsambo iquec. Nuquin Papan cuidtequid nec —cabededtsiash. Bēnē unēsambien dada utsin bedadquid chido. Aden bedacsho Nuquin Papan: —Mibi cuidnu —cainquo ictsiash.

⁴ Adecbidi ambi chiaid niac-niacsho Nuquin Papan cuidtsenaido nuqui iccondac. Adondaidi abided cuidadec unēsaid Esus tantiasho Nuquin Papan: —Mibi cuidnu —nuqui cainquo iquendac. Aden Nuquin Papan uincuemēnēdāidēn Esusēn aton yua nuqui icmequin bēdamboec tabadquid icmenuen nuqui icsaid bedshumpanēdash. ⁵ Esus tantiabi yec nuqui bunacpadeuidi nuqui icsapadenec. —Adenda —quequin Nuquin Papan chiaid tantiashi: —Adequi icsaquionona —quiash nuqui icsaquiodenec. Adquid yec unēsacsho icsano nidmequin Nuquin Papan nuqui cuidtsenēdash. ⁶ Esus tantiabi yec nuqui nadondac. —Moisesēn chiacpadec bēdamboec tabadsho Nuquin Papan nuqui bēdamboen istsiash. Ambi chiaid niac-niacsho nuqui cuidendac —quiondaidi nēbi Esus tantiecu nuqui adenquo iquec. Nēbi Nuquin Papan Mayanēn tantiamiacpadec nuqui bēdamboec tabadec.

Icsaquid nebi, quequin Pabadon chiaid

⁷—Nuquin Papan ambi chiaid Moises dada uamepampid icsambo iquec —¿quectabi ique? Icsapenquo iquec. Nuquin Papan ambi chiaid Moises dada uamiaid isun: —Nuquin Papan chiaid niac-niaquec icsachitobi —quequin nuqui tantiec. “Utsin na isash: ‘Con na adquid nibēdec,’ quec chieshēmēnenda,” quequin Nuquin Papan Moises dada uamiaid isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin tantienquiēmbi ictsenchtiondac. ⁸ Utsin na isash: —Adquid con na nibēdec —quiash chieshēmēntsēchoedi Nuquin Papan: —Adenda —quequin chiaid tantiashi icsaquid yec utsin na comapenec

bunquiec chieshēmēnquiondabi. Nuquin Papan chiaid nibēdnuc: —Adec icsachitobi — quequin tantienquo ictsenondambi. ⁹ Nuquin Papan chiaid tantiabi yec Nuquin Papan cuidte dacuēdēnenquo yec: —Bēdambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi. ¹⁰ Adquid Nuquin Papan cuidendac —nuqui quianondac. —Ma bēdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bēdamboec tabadenquo iccobi. Icsachitobi. Adquid Nuquin Papan cuidendac —nuqui quianondac. ¹¹ —Ambi chiacpadomboenuidi nashobini Nuquin Papan bēdamboen isec —quec muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac. ¹² Aden nuqui abimbo tantiamequid Nuquin Papan chiaid bēdambo iquec. Icsaisambo icquin Nuquin Papan bēdamboen chuipampic.

¹³ *¿*Nuquin Papan chiaid isbanashta matses Nuquin Papan cuidtequido yanactic? Padenquo. Matses Nuquin Papan cuidtequido yanambic Nuquin Papan ambi chiaid dada uamepampic. —Nēid isash: “Icsamboequini tabadchitec,” ma matses quenu —qeshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchitec. Nuquin Papan nuqui bēdamboen istiapimboen icchitec. Èbien cuidchitec —nuqui quianondac. ¹⁴ Nuquin Papan Mayanēn tantiamiacpadomboen con tsusedpan Nuquin Papan chiaid dada uapampic. Adembidi aton Mayanēn namiac Nuquin Papan chiacpadec nuqui bēdamboec tabadtsiac. Aidēn namiabi mētaniaid abibi mēnchiquidiapimbo yacimboben icsaquido icquin Nuquin Papan chiacpadomboen natiapimbo nuqui iquec. ¹⁵ —Nuquin Papan chiacpadomboen nanu —queboedombi natiapimbo nuqui iquec. Adechidi: —Utsibo icsacpadec icsainquo iquendabi —queboedobi nuqui adec icsachitec. Adash: —*¿*Atotsieshumbimbi adopoba? —quepec nuqui. ¹⁶ —Nuquin Papan chiaid bēdamboen icchitec. Aidēn chiaid niacte bunenquo iquebi —queboedēmbi aidēn chiaid niac-niaquec: —Bēdamboen chiaidimbi niac-niacchitec —quebi. ¹⁷ Bēdamboecuidi tabadtiadquidini icsaquid yec èbemi icsadenechitec. ¹⁸ —Bēdamboec tabadnu —queboedi icsaquid yec èbemi bēdamboec tabadtiapimbo iquebi. Icsaquidini nec. ¹⁹ —Bēdambo icte bunebi —queboedi èbemi bēdamboec tabadtiapimbo iquebi. —Icsate bunenquo iquebi —queboedi èbenquiobi icsaded-icsadedebi. ²⁰ Icsate bunenquo icboedi icsaquid yec èbemi bēdamboec tabadtiapimbo iquebi.

²¹ —Adquid nebi. Nuquin Papan chiacpadec bēdamboec tabadtiadquidi badedquo icsaded-icsadedebi —quequin tantiembi. ²² —Nuquin Papan chiaid bēdambo iqueque. Ambi chiacpadec èbemi bēdamboec tabadnu —queboedi ²³ icsaquid yec èbemi bēdamboec tabadtiapimbo iquebi. Mētaniaid abembi mēnchiquidiapimbo yacimboben èmbi naid èntiapimbo iquebi. —Nuquin Papan chiacpadec bēdamboec tabadnu —queboedi bēdamboec tabadtiapimboeni icchitec. ²⁴⁻²⁵ Adquid yec shubitiadquio icchitebi. Icsaquid yec: —*¿*Mitsipadequini bēdamboec tabadpeba? —queboedi: —Abi tantiasho Esuquidistumbini bēdamboen tabadmec —quianondabi. Adshun Nuquin Papa naden chiembi. —Èbi bēdamboen tabadmequid Esus mimbi èbi tantiamiac. Mibi bēdambo iquec, Papa —quequin Nuquin Papa chiembi.

8

Nuquin Papan Mayanēn namiaid

¹ Aden matses bēdamboen tabadmequid Esuquidistu tantiasho: —Mibi icsambo iqueque. Cuidnu —cainquo iquendac Nuquin Papan. ² Icsaquido yec bēdamboec tabadtiapimbo icsho Nuquin Papan cuidtequido icboedēmbi Esus tantiasho Nuquin Papan aton Mayan meniac aidēn tantiamiacpadec nuqui bēdamboec tabadanendac. ³ —Moisesēn chiacpadec bēdamboec tabadec unēsash Nuquin Papa yacno tabadebi —queboedi icsaquido yec abembi bēdamboec tabadtiapimbo matses iquec. Adsho isun matses bēdamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unēsānēdash. ⁴ —Abided cuidadaid con Mado Esus tantiasho bēdamboen isquin con Mayan matses menendambi. Adoac aidēn tantiamiac èmbi Moises chuimiampicpadec bēdamboec tabadendac. Matses abi icsate bunacpadec icsainquo yec bēdamboec tabadendac —qeshun Nuquin Papan Esused cuidpac caondash.

⁵ Adec Nuquin Papan Mayanēn tantiamiaid Esus tantiaquid Nuquin Papan tantiacpadec bēdamboec tabadte bunec. Padnuen icsaquid: —Èbi bunaid nanu —quequin ambibi tantiacpadec icsaic. ⁶ Aden abi bunaidquio naic icsamboec tabadquid Nuquin Papan cuidendac. Padnuen Nuquin Papan Mayanēn tantiamiacpadec tabadquid Nuquin Papan cuidte dacuēdēnenquo yec bēdambo yec unēsash Nuquin Papa yacno tabadendac. ⁷ —Icsate bunquidēn èbi chieshēnec. Ambi naiduidtsēqui naquin èmbi chiacpadomboen natiapimbo

iquec —queshun Nuquin Papan cuidendac. ⁸ Adquido chuiquin: —Mibi bēdambo iquec —catiapimbo Nuquin Papa iquec.

⁹ Esus tantiaquidien adesa nec. Esus tantiaشو Nuquin Papan aton Mayan nuqui meniac aidēn tantiamiacpadec nuqui bēdamboec tabadendac. Nuquin Papan aton Mayan meniacmaid Esus tantiesha nec. Nuquin Papan Mayan Esusēn Mayambidi nec. ¹⁰ Abided cuidadaid Esus tantiaشو bēdamboen isquin Nuquin Papan aton Mayan meniaid yec abēd tabadtequido nuqui nec. Icsaquido yec matses abitedi unēsquidombo icnubi Esus tantiaquid unēsacsho Nuquin Papan abēdi tabadmendac. ¹¹ Esus uincuemequidēn Nuquin Papan ambi aton Mayan meniaido unēsacsho nuqui uincuemequin nuquin dada utsi uaindac. Aton Mayan nuquibēd tabadsho isun nuqui aduencac.

¹² ¿Ēbi adsho tantiashta Esus tantiaquid abi bunacpadequi icsapec? Padenquio. Bēdamboec tabadte bunec. ¹³ Utsiboen abi bunacpadeq icsamboecuidi tabadec unēsacsho cuidquin Nuquin Papan icsano nidmendac. Nuquin Papan Mayanēn tantiamiacpadec tabadquin nuqui icsaid nuqui ēnec. Adash unēsash Nuquin Papa yacno nuqui tabadendac.

¹⁴ Aden aton Mayanēn bēdamboec tabadmiaido Nuquin Papan: —Con mado nec. Con champi nec —capendac. ¹⁵ ¿Icbo icsambo icquidēn yua dachuēdmicbimboenda Nuquin Papan Mayanēn nuqui dachuēdmeq? Padenquio. Nuqui bēdambo icmec. Aidēn tantiamiacpadom-boen Nuquin Papauidsēqui papa nuqui capec. ¹⁶ Aden Nuquin Papan Mayanēn: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec. ¹⁷ —Con mado nec. Con champi nec —queshun nēbi Nuquin Papan nuqui bēdamboen isquin unēsacsho abēdi tabadmequin nuqui bēdamboshē icmendac. Utsibon chieshēnac chieshtoenuqio yec unēsacsho Nuquin Papan abēdi tabadmequin Esus bēdamboshē icmiac. Adembidi Esus tantiaquid icsho utsibon chieshēnaqui chieshtoenquo icquin Esus tantiequi unēsacsho Nuquin Papan abēdi tabadmequin nuqui bēdamboshē icmendac. Nuquin Papa yacnombo Esuquidistun natedi nuquin na nendac.

Nuquin Papan bēdamboshē icmete chiaid

¹⁸ Adec Nuquin Papa yacno nuqui bēdamboshē icte tantiaquin nuqui nidaidēn natiac tabadaiduidi ma nuqui tantiatiapimbo iqueyoc. ¹⁹ Aden Nuquin Papan nuqui bēdamboshē icmete tantiec ambi uaid utsitedi nidaidēn icquidtedi aben icquidtedi: —Nēbimbobi bēdambo icmepashuni —queded-quededec tabadec. ²⁰ Abia matses uaid Adan icsasho cuidquin ambi uaid nidaidēn icquidtedi Nuquin Papan unēsquiduidquo icmepampic aidon: —Padi —catiapimbo icnuc. ²¹ —Yueshun ēmbi Esus tantiaquido uincuemequin aton dada utsi uacpadēn ēmbi uaido utsi nidaidēn icquidtedi chodquete icboedi utsi uain bēdamboshē icmendambi —quequin tantiaquimbi unēsquiduidquo icmepampic. Aden Nuquin Papan chiaid tantiaquin ambi uaidon nidaidēn icquidtedishun aton dada abi bēdambo icmete tantiaquin cainec tabadec. ²² Unēstiapimbo icte bunec unēsquid yec: —¿Tedecksishun Nuquin Papan nuqui utsi uapeba? Nēbimbobi Nuquin Papan utsi uapashuni —queded-quededec Nuquin Papan uaidtedi. Bacuē tishquid bacuē paēmbo icnuc: —Badedquio tishmepashuni —quiachimboec adpec. ²³ Nuquin Papan meniaidēn aton Mayanēn tantiamiacpaden nuquitsen naden chiec. —Con dada utsi uaquin unēstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaquin Nuquin Papan unēstiapimbo icquid icmendac —queded-quededquin nuquin dada utsi uate tantiaquin nuqui cainec. ²⁴⁻²⁵ —Esus tantiaquido unēsacsho Nuquin Papan nuquin dada utsi uaindac —quequin tantiaquin nuqui Esus tantiabonondac. Nuquin dada utsi uabi icnubi: —Nēbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquo iquendac.

²⁶ —Aden aton dada utsi uate tantiaquin yuen cainec chieshtonoshe —queshun Nuquin Papan Mayanēn nuquibēd icquin bēdamboen tantiamec. —¿Mitsipadembimbi Nuquin Papa chuipeba? —quec nuqui shubitiadquio icsho isun Nuquin Papan Mayanēn abi chiec. Unēsquio icnuc onquenquo icquin chiec: —Mimbi tantiacpadomboen aid matses bēdambo icmeta, Papa —quequin Nuquin Papan Mayanēn nuqui comapoben chuided-chuidedec. ²⁷ Aden Nuquin Papan: —Ma Esus tantiaquido bēdambo icnu —quequin tantiaidbidi aton Mayanēn onquenquo icquin chuisho Nuquin Papan tantiec. Otacquo tantiaidtedi tantiaquid icquin Nuquin Papan aden aton Mayanēn chiaid tantiec.

Nuquin Papan nuqui bēdambo icmiaid

²⁸ Aden tantiaشun nuqui naden tantiec. Ambi tantiamiacpadomboen abi tantiaquido bēdambo icmete bunquin Nuquin Papan bēdamboen nashunec. Unēsquio yec tabadsho aden naic. Natiambo icsho adembidi naic. Cuishonquesho adembidi naic. ²⁹ Endenquimboshē

nidaid uabi yequi Nuquin Papa nadpampic. —Ēmbi tantiatedi ebēda con Mado tantiaquid icmequin Esuspadquio icnuc bēdambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquio icnuc bēdambo icmenuen Nuquin Papan naic. ³⁰ Ēndenquimboshē nidaid uabi yec: —Yuecshun naindambi —abi quiampicpadomboen Nuquin Papan nuqui Esus tantiamiac. Adoac nuqui cuidmenquo icnuc abided cuidadaid Esus tantiasho Nuquin Papan nuqui bēdamboen isec isaisabimboecnuc. Nuqui bēdamboen isquin nuqui bēdamboen tabadmec. Unēsacsho nuqui unēstiapimbo icquid icmeshun abēdi tabadmendac.

³¹ ¿Embi aden chiaidtedi tantiashta Esus tantiaquido dacuēdpec? —Nuqui cudasquin Nuquin Papan nuqui bēdambo icmendac. Ēbi chieshēnquidēn: “Cuid,” cac Nuquin Papan ēbi cuidenquo ictsiash —quec nuqui dacuēdenquo iquec. ³² Nuquin Papan nuqui tantiaquie. Aton Madombo cudasenquo icquimbi nuqui cuidenquo icnuen aton Madoded cuidquin unēs uamepanēdash. Adshumbic Esus tantiasho ēnenquo icquin bēdamboen isquin nēbi bēdambo icmequin unēsacsho abēdi tabadmequin nuqui bēdambohē icmendac. ³³ ¿Nuquin Papan nuqui bēdamboen isquidēmbida nuqui cuidpec? Padenquo. ¿Utsibo nuqui caic: —Icsambo iquec —queshobida Nuquin Papan nuqui cuidpec? Padenquo. ³⁴ ¿Esusēmbida nuqui cuidpec? Abi tantiaquido cuidmenquo icnuc abided cuidadec Esus unēsac caondash. Unēsacsho Nuquin Papan uincuemiāc Nuquin Papa yacnoshon aidēmbi abi tantiaquido chianec. —Ēbi tantiaquido bēdamboen isquin cuidenda, Papa —quequin Nuquin Papa chianec tabadec. ¿Adquidēnquibida nuqui icsano nidmequin cuidpec? Padenquo. ³⁵ Nuqui bēdamboen isquin ēnenquo icquin Esusēn nuqui tantiaquie. ¿Shubisho isunda Esusēn nuqui tantienquo icpec? Padenquo. ¿Dacuēdshoda Esusēn nuqui tantienquo icpec? Padenquo. Adembidi nuqui tantiaquie. Utsibon chieshēnsho bēdamboen isquinc pete natia bunsho bēdamboen isquinc nuquin dashcute nibēdsho bēdamboen isquinc nuqui Esusēn caindac. —Ēbi acshunendac —quesho bēdamboen isquinc chieshēmēnquidon: —Cuesunenu —casha bēdamboen isquinc nuqui caindac Esusēn ēnenquo icquin. ³⁶ Aden utsibon Esus tantiaquido chieshēnte chuiquin Nuquin Papan dada uamepampic naden. “Mibi tantiasho ēbi: ‘Cuesunenu,’ caded-cadedec uimanēmēnquidon. Aben icquidbimboecnuc: ‘Cuesunenu,’ caded-cadedebi, Papa,” quequin Nuquin Papan chiaid dada uapampic Esus tishabi icnuc.

³⁷ Aden utsibon nuqui chieshēnsho Esuquidistun nuqui bēdamboen tantiaquie. Shubisho abi nuqui tantiamec. Adoac Esus tantiatsec shubiquimbi chieshtoenquo icquin nuqui Esus tantiaquie yanendac. ³⁸⁻³⁹ Nuquin Papantsen ēnenquo icquin nuqui tantiaquie. Nuquin Icho Esus tantiasho Nuquin Papan nuqui bēdamboen isec. Unēsacsho nuqui bēdamboen tantiashtash. Unēsabi icsho nuqui bēdamboen isec. ¿Nuquin Papan abi yacnoshon uaid mayan bēdan: —Aid tantienda —cashoda nuqui Nuquin Papan tantienquo yampatsiash? Padenquo. Adembidi nuqui tantiaquotsiash. ¿Podobitsi icsabon icho Satanasēn: —Aid tantienda —cacta Nuquin Papan nuqui chieshēmpatsiash? Padenquo. Adembidi nuqui tantiaquotsiash. Nēbi nuqui bēdamboen tantiec. Yuecshun adembidi nuqui bēdamboen tantiadec. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquotsiash. Abuc nidacsho Nuquin Papan nuqui bēdamboen tantiashtash. Nidaid uquēducquio nidacsho adembidi nuqui bēdamboen tantiashtash. Nuquin Papan uaid utsi abitedishun nuqui caic: —Aid tantienda —caqui adembidi Nuquin Papan nuqui bēdamboen tantiashtash ēnenquo icquin.

9

Pabaton aton matses isadaidbo chiaid

¹⁻² Aden con matses isadaidbo tantiaquid Nuquin Papa nec. —Aden abi tantiaquidi con matsesēn bēdamboen tantienquo iquec —quiash shubitiadquio iquebi. Muainquo iquebi. Esus tantiaquid icsho Nuquin Papan Mayanēn tantiamiaid icquin abimbo chiembique. Tantiata. ³ Con matses isadaidbo tantiec unēsquo yec tsadebi. Nuquin Papan: —Min matses abidedi cuidenquo icnuc mibiuidtsēqui Esusbēd tabadmenquo icquin icsano nidmequin cuidnu —capatecnēdani. Adoac: —Ai, con matses cuidenquo icnucn ēbided cuid —quetsenondabi. ⁴ Con matses tsusedpa Acobo caid Nuquin Papan Isadaid caidēn tsyuecquidotedi isadaidbo tantiaquin Nuquin Papan nadopampic. —Con matses mibi caimbeque. Mibēdi tabadebique. Mibi ismenu —quequin con matses tabadacno abu ushu bēchamauanqueicquid chomequin ismepampic. Adashic nadpampic. —Ēmbi chiacpadeb bēdamboec tabadsho mibi bēdamboen isquin bēdambo icmendambi. Mibi nianenquo iquen-dambi —queshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquo ictequid chuiquin: —Mibi bēdambo icmendambi —quequin Nuquin

Papan con matses chuiampic ëndenquimboshë. ⁵ Abadauan chuiquinc Isac chuiquinc Acobo chuiquinc capampic. Ambi chiacpadomboen Isadaidbon chidon tishac Esuquidistu matsesac caondash. Nuquin Papapadquidquibi yec abitedishun Icho yec matsesac caondashe. Esus chuiquin: —Nuquin Papa padquibi yec mibi bëdamboshë iquec —canuna ënenquo icquin.

⁶ Ëmbi chiacpaden Esus tantienquo icsho Nuquin Papan con matses dadpen bëdamboen istiapimbo iquec. ¿Aden tantiashtabi nadpe? —Nuquin Papa muapampic. Ambi chiacpadomboen nainquo icquin con matses bëdamboen istiapimbo iquec —¿quectabi ique? Padenquo. Nuquin Papan abimbo chuiampic. Isadaidbo dadpenshun Nuquin Papa bëdamboen tantienquo iquec. Ambi tantiatedishun abi tantiasho ambi chiacpadomboen Nuquin Papan bëdamboen isec. ⁷ Ëndenquimboshë con tsusedpa Abadauanën mëdaidtedi ademvidi Nuquin Papan bëdamboen isambo. Abadauanën mado abentsëqui Isac caic: —Aidën tsyuecquido ëmbi mibi cuënacpadomboen con matses caindambi —quequin Nuquin Papan chuiampic. ⁸ ¿Abadauanën bacuëbotedishun tsyuecquidotedida Nuquin Papan con matses caido nepec? Padenquo. Ambi chiacpadomboen Isaquën tsyuecquido Nuquin Papan con matses caido nec. ⁹ Naden Nuquin Papan Isac tishte chuiampic. “Ëmbi tantiacpadën choashun ëmbi namiac Sadan min chidon dada bacuë tishendac,” quepampic Nuquin Papa Abadauan chiech.

¹⁰ Aden ambi: —Adoendambi —quequin chiacpadomboen naquidquo Nuquin Papa nec. Aden Nuquin Papan Isaquën bacuë abi ushëmbi daëd tishte chuiampic. Adnubien con tsusedpa Isaquën aton chido Debeca caid bedshun chudquin dada bacuë daëd usundomepampic Nuquin Papan chiacpadomboen. ¹¹⁻¹² Aid dada bacuë daëd tishabi icshobi Nuquin Papan ani naden chuiampic. “Ëmbi tantiacpadquid min madon utsimpi bëyucquidimbocquid nendac,” quepampic. Aid daëd tishabi bëdamboec tabadtiaimbo icnubi: —Tishacsho ëmbi tantiacpadembi tsyuec tishtsaidëmpi abentsëqui bëdamboen isendambi —quequin tantiec adpampic Nuquin Papa. ¹³ Ademvidi Isaquën mado chuiquin Nuquin Papan ambi chiaid dada uamepampic. “‘Acobouidtsëqui tantiaquiquin aton buchimpi Esau bëdiatsëc tantiatendambi,’ quepampic Nuquin Papa,” quequin dada uamepampic.

¹⁴ ¿Ëmbi aden chuisho tantiashtash: —Nuquin Papa icsambo iquec —quecta mibi ique? Ma Nuquin Papa icsapenquo icquid neyoc. Icsaquido yec matses abitedi ambi cuidtequido icsho Nuquin Papan ambi tantiatedi bëdamboen isec. ¹⁵ Aden Nuquin Papan con tsusedpa Moises chuiampic.

“Embi tantiatedi matses bëdamboen isendambi. Aidedi cuidenquo iquendambi,”

quequin chuiampic. ¹⁶ ¿—Ëmbembi nasho Nuquin Papan bëdamboen istiashtash —quec matses bunacpadenda Nuquin Papan matses bëdamboen ispec? Padenquo. Ambi tantiatedishun abi tantiashtash Nuquin Papan bëdamboen isendac. ¹⁷ Aden ambi tantiacpadomboen ambi naid Nuquin Papan Equipito yacnocquido chuiquid dapa padaon caid chuiampic. “‘Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icho yec nadatiambo icquidquo nec, ma ëbi canu,’ quequin mibi chuiquid dapa icmiondambi. Mibi icsasho pacuënëdabimbocnuc mibi icmembimbi,” quequin Nuquin Papan padaon chiaid Moisesën dada uapampic. ¹⁸ Aden ambi tantiacpadomboen utsitsien icsaido pacuënëdabimbocnuc icmequin abi tantiamenquo iquec. Ademvidi utsitsien bëdamboen isquin abi tantiamen.

¹⁹ ¿Ëbi adsho tantiashtash mibi nadpe? —¿Atotsieshun Nuquin Papan matses cuidpec? ¿Abitedishun Icho icquin Nuquin Papan namiacta matsesën nainquo icpadic? —¿quecta ique? ²⁰ ¿Matses icquinda minmibi Nuquin Papa chushcapatsia? ¿Ambi uaido icquimbida nuqui nadope? —¿Atotsieshun ëbipadquid matses uao, Papa? —¿capenda nuqui ique? ²¹ ¿Ada abi nacnenquid matsun chushcapadic? Padenquo. Matsu nacnenquidën ambi tantiacpadomboen nacnenendac. —Nëid nidaid tëshë tëchu bëdambo icquid acte uetequid nacnenu. Nëid nidaid tëshë matsumpi icsactsëcquid opa acmete nacnenu —quequin matsu nacnenquid. Aden ambi tantiacpadomboen nidaid tëshun nacnenquid.

²² Ademvidi nuqui uaquid Nuquin Papan ambi tantiacpadomboen naindac. —Abitedishun Icbombo yec comapenen tantiaquidquo nebi. Adquid icquin icsaido cuidquid nebi. Ismenu —queboedëmbi ambi cuidtequido baded cuidenquo iquec. Ambi ëndenquimboshë tantiacpadomboen aido icsano nidmendac. ²³ —Ma ëmbi bëdamboen isaidon naden tantianu. “Icsaisambo icquin matses bëdamboen iste bunquin Nuquin Papan icsaido badedi cuidenquo iquec,” quequin ma tantianu —queshun icsaido badedi cuidenquo iquec. Ambi ëndenquimboshë tantiacpadomboen ambi bëdamboen isaido abëdi tabadmendac.

²⁴ Aden ambi tantiacpadomboen Esus tantiasho Nuquin Papan nuqui bédamboen isec. Isadaidbon abi tantiasho bédamboen isquinc isadaidpembe matses utsibon abi tantiasho bédamboen isquinc nuqui caindac. ²⁵ Ambi matses utsibotsen aden bédamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ëmbi con matses cacmaidobi con matses cabenendambi.

Adembidi ëmbi bédamboen tantiacmaidobi matses utsibo bédamboen isbenendambi,”

quequin Nuquin Papan chiaid dada uashun ²⁶ nadentsen dada uapampic.

“Matses utsibo ambi con matses cacmaidobi ambi tantiacpadën aido abentse-abentsen Nuquin Papan bédamboen isendac.

Bédamboen isquin: ‘Con mado nec. Con champi nec,’ caindac,”

quequin Nuquin Papan matses utsibo bédamboen iste chuiquin dada uapampic.

²⁷ Ambi con matses caidombi abi tantiatipimbo icsho isash Nuquin Papa chushquiaid con tsusedpa Isayasën naden dada uapampic. “Masitedi dadpenquo caidnëdaido isadaidbo daëdpactsëcshun abi tantiasho bédamboen isquin aidtedtsëqui Nuquin Papan cuidenquo iquendac. ²⁸ Ambi chiacpadomboen ambi tantiacpadën matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasën dada uapampic. ²⁹ Nuquin Papan chiaid padpiden dada uquin isadaidbo cuidte Isayasën chuiquampic naden.

“Shubu dadpen icquid Sodoma caid yacnocquidobëda shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibëdquieic iquendac.

Adembidi con matses Nuquin Papan uesquin cuidtsempanëdash.

Abitedishun Icho icquin con matses nibëdquieicnuc cuidtsempanëdash. Dadpen cuidquin daëdpactsëc cuidabi icpanëdash,”

quequin dada uapampic Isayasën.

Isadaidbo bédamboen istiapimbo icte chiaid

³⁰ Aden Isadaidbo dadpenshun abi tantienquo icsho Nuquin Papan bédamboen istiapimbo iquiec. Padnuen matses utsibo: —Mabi Nuquin Papan bédamboen isnu. Ambi chiacpadec bédamboec tabadnu —quesabobi: —Ëbi cuidmenquo icnuec abided cuidadec unësaid Esus bédamboshë iquiec —quesho Nuquin Papan bédamboen isec icsaisabimboecnuc.

³¹ Isadaidboen: —Moisesën chiampiduidi ëmbembi nasho Nuquin Papan bédamboen isebi —queboedombi nainquo icsho Nuquin Papan bédamboen istiapimbo iquiec. ³² ¿Atotsieshun Nuquin Papan isadaidbo bédamboen istiapimbo icpec? —Ambi chiacpadomboenuidi ëmbembi naquin Nuquin Papa bédamboen ismembimbi —queboedombi adotiapimbo icquin Nuquin Papa bédamboen ismequidquo Esus chieshëne. Adsho Nuquin Papan bédamboen istiapimbo iquiec. ³³ Esus tishabi icnuc isadaidbon Esus chieshënte chuiquin Nuquin Papan con tsusedpa naden dada uamepampic.

“Buintad bédambo icquid istuidash: ‘Nëidquo shubu uanun nitsinembimbi,’ quiacbimboen

Edusaden yacno ëbi bédamboen ismequidquo isadaidbobëd tabadmendambi.

Adec tabadsho anocquidon chieshënenadac.

Aid chieshënquid nadquo iquendac. ‘Cuëte mabud iquiec,’ quequin tantienquo yec nidec tocoshquetanec uebudacimboec

ëbi bédamboen ismequid tantienquo yec unësash icsano nidendac.

Aid tantiaquido: ‘Nëid tantiasho Nuquin Papan abi yacno nuqui tabadmendac,’ quequin unësacsho ëbi yacno tabadmendambi,”

quequin Nuquin Papan ambi chiaid dada uamepampic.

10

¹ Con matses isadaidbo tantiac unësquo icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bédamboen ista, Papa —quequin Nuquin Papa chianiombi. ² Esus tantiabi ëmbi chuidenecpadomboen chiec: —Nuquin Papan chiacpadomboenuidi naquin Nuquin Papa bédamboen ismembimbi —quetsëcboedombi con matsesën Nuquin Papa bédamboen ismete tantienquo iquiec. ³ —Abided cuidadaid Esus tantiasho Nuquin Papan bédamboen isebi —quetiadquidi icsamboen tantiec. —Nuquin Papan: “Bédamboec tabadta,” quequin chiaid Moisesën dada uactedi naquin Nuquin Papa bédamboen ismembimbi —quequin icsamboen tantiaquin Nuquin Papan tantiacpadomboen nainquo icquin Esus tantienquo iquiec. ⁴ Esusuidtsëqui Nuquin Papan: —Bédamboec tabadta —quequin chiaid Moisesën dada uactedi naquidquo nec. Adec icsaisa yec matses icsaid bedshunuec abided cuidadec unësac caondash. Nëbi Esus tantiasho Nuquin Papan matses bédamboen isec icsaisabimboecnuc.

⁵ Nuquin Papan chiaid dada uaquin Moisesën chuiampic naden. “Ambi chiacpadomboenuidi naquid Nuquin Papan bédamboen isquin abédi tabadmetsiash,” quequin Nuquin Papan chiaid Moisesën dada uapampic. ⁶ Aden ambi chiacpadomboenuidi natiadquidombi natiapimbo icsho Nuquin Papan matses bédamboen istiapimbo icpanédash. Nēbi abided cuidadaid Esus tantiasho nuqui bédamboen isec. Adoac Esus tantiaquido nadenquio iquec. —Nuquin Papa yacno nidshun ¿tsuntsin Nuquin Papa nuqui bédamboen ismepatsiashba? —quenquio nuqui iquec. —Esusquio Nuquin Papa bédamboen ismequidquio nec —quequin nuqui tantiec. ⁷ Aden tantiec: —¿Tsuntsin Nuquin Papa bédamboen ismequidquio uincuemepatsiashba? —quenquio nuqui iquec. —Abided cuidadec unēsacsho Esus uincuemiac caondash —quequintsen nuqui tantiec. ⁸ Aid tantiasho Nuquin Papan nuqui bédamboen isec. Ambi bédamboen iste chuiquin Nuquin Papan naden dada uamepampic. “Nuquin Papan chiaid chuiho tantiash: ‘Abimbo chiec. Aid tantiambi,’ qesho Nuquin Papan matses bédamboen isendac,” quequin dada uamepampic. Nēbi Nuquin Papan chomiaid abided cuidadaid Esus tantiasho Nuquin Papan nuqui bédamboen isec. Aden nuqui bédamboen ismequid Esus chuibenequid nebi. ⁹ —Nuquin Papan uincuemiaid Esus abitedishun Icho neque. Con Icho Esus canu —quequin chuiho Nuquin Papan nuqui bédamboen isquin cuidenquio iquendac. ¹⁰ —Ēbi cuidmenquio icnuec abided cuidadaid Esus tantiambi —quequin otacquo tantiaquidēn: —Esus tantiaquid nebi —quequin utsibo abimbo chuiho bédamboen isquin Nuquin Papan cuidenquio iquendac.

¹¹ Ambi chiaid Nuquin Papan dada uamiapaden: “Aid tantiec: ‘Nēid tantiasho Nuquin Papan abi yacno nuqui tabadmendac,’ quequid unēsacsho ēbi yacno tabadmendambi.”

¹² Isadaidbo yec matses utsibo yec quequido Esus tantiaquidtedi adoendac. Aden abitedishun Icho icquin abi tantiaquidtedi Esusën bédambo icmendac. ¹³ Aden Esusën nate chuiquin con tsusedpan Nuquin Papan chiaid dada uapampic. “ ‘Abitedishun Icbombo icsho mibi tantiaquid nebiqec. Ēbi bédamboen ista, Icho,’ qesho bédamboen isquin cuidenquio iquendac,” quequin dada uapampic.

¹⁴ ¿Mitsipaden matsesën Esus tantiabempec? ¿Esusën naid chiabi yacta matsesën tantiapec? Padenquio. Esusën naidquio chuibanaquien tantiendac. ¿Esusën naid chuiho tantiash: —Mua —quequidta Esus tantiaquid nepadic? Padenquio. —Abimbo caic —qeshun: —Min Mado Esus tantiambique. Ēbi bédamboen ista, Papa —quequidien Esus tantiaquid nec. ¹⁵ ¿Mitsipadoaidēn Esusën naid chuibampec? ¿—Chuita —cacmaidēnda chuibampec? Padenquio. Nuquin Papan: —Con Mado chuibeneta —caidien Esusën naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bédamboen iste chuibanquid chosho isash: ‘Bédambo iquec,’ quec matses cuishonquendac,” quequin dada uamepampic.

Isadaidbo dadpeshun Esus tantienquio yaid

¹⁶ Adquidēn Esusën naid chuibanac isadaidbo dadpeshun Esus tantienquio iquec. Daédpactsēcshun tantiec. Abi tishabi icnuc aden abi tantiesabo Esusën chuite Nuquin Papan con tsusedpa Isayas caid dada uamepampic naden. “Mimbi chiaidquio ēmbi chuibansho ¿tsuntsin tantiapec, Papa? Daédpactsēcshun: ‘Abimbo mimi chiec. Mibi tantiaquin mimi chiacpadomboen naimbi,’ ēbi caindac, Papa,” quequin Esusën aton Papa chuite Isayasën dada uapampic. ¹⁷ Aden Esusën naid chuibansho tantiashun: —Abimbo caic —qeshun utsibon Esus tantiec.

¹⁸ ¿Esusën naid chuiho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan Papan chomiaidēn naid chuibanquidēn chuibanendac.” Aden chuibansho ma con matsesën tantiaboc. ¹⁹ Aden Nuquin Papan chiaid chuiho tantiash: —Tantiadenquio yec onquec —¿quepecta icnédash con matses? Padenquio. Tantiashi abi bédamboen tantiate bunenquio icsho isun matses utsibo bédamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidboudi ēmbi bédamboen iste mimi danubi ēmbi con matses cacmaidobi matses utsibo bédamboen isbenendambi.

Ēmbi matses utsibo bédamboen iso isash: ‘¿Atotsieshun Nuquin Papan matses utsibo bédamboen ispec?

Icsambo iquec,’ quec mibi chushquendac.

Matses utsibobi ēbi tantiabi icquido ēbi tantiamendambi.

Aido bédamboen isquin mibi nēishēmendambi,”

quequin Nuquin Papan Moises dada uamepampic. ²⁰ Adembidi dacuēdenquio icquin Isayasën Nuquin Papan matses utsibo bédamboen iste dada uapampic.

“ ‘Nuquin Papa tantiatadquio iquebi,’ quenquio icquidombi ēbi tantiabenosh.

‘¿Mitsipadembimbi Nuquin Papa bēdamboen ismepeba?’ quesabobi ěmbi bēdamboen iste tantiamiombi,”

quequin Isayasēn Nuquin Papan chiaid dada uapampic. ²¹ Isadaidbotsen chuiquin Nuquin Papan chiaidquiobidi Isayasēn naden dada uapampic. “ ‘Mibi tantiac unēsquio iqueque. ěbi bēdamboen tantiata,’ cadeniaqui: ‘Padi, mibi tantiatipimbo iquebi,’ quequin ěnenquio icquin ěmbi chiaid mimbi niac-niacpec,” quequin Nuquin Papan chiaid Isayasēn dada uapampic.

11

Ambi chixedi isadaidbo Nuquin Papan bēdamboen isaia

¹ ¿Ambi chiaid niac-niacsho isadaidbotedida Nuquin Papan chieshēmpic? —Con matses catiapimbo iquebi —¿quecta iquec? Padenquio. Isadaidbombo nebi. Ěndenquimboshē con tsusedpa Abadauan campidēn baban tishmiad Benaminēn tsyuecquidon tsyuecquid yec isadaidbombo nebi. Adquid icsho Nuquin Papan chieshēnenquio iquebi. ² Ěndenquimboshē nidaid uabi icquimbi Nuquin Papan: —Con matses caindambi —quequin con matses isadaidbo tantiapampic. Adshun abitedi chieshēnenquio iquec. ¿Ediasēn chiampid tantienquioda iquec? Aton matses isadaidbo nēishēnshun Nuquin Papa naden chuiampic. ³ “Mimbi con matses caidotedi icsamboshē icquec, Papa. Mimbi chiaid chuibanguidobi cuesun secac. Papa quequin mibi menequin ismete cuēnote nacnenaid uesquin chic-chicpac, Papa. Icsamboshē iquec. Ěbiuidtsēqui bēdambo iquec. Mimbi chiaid chuibansho tantianshun ěbi cuesunetiadquio iquec, Papa,” quequin Ediasēn Nuquin Papa chuiampic. ⁴ Adoac ¿mitsipadomboen Nuquin Papan chuiampic? “Ěbi tantiaquido abi iquec. Ěmbi namiacpadomboen isadaidbo dadpenshun 7000tedishun ěbi tantiec. Ěbi tantiesabon papa quequin nacnenaid Bad caid tantienquio icquin ěbi tantiec,” quequin Nuquin Papan Edias chuiampic. ⁵ Adembidi nēbi con matses isadaidbon ambi tantiactedishun Esus tantiasho Nuquin Papan bēdamboen isec. ⁶ ¿Ambembida con matsesēn Nuquin Papa bēdamboen ismepec? Padenquio. —Ěmbi chiacpadomboenuidi nasho matses bēdamboen isembi —¿quecta icpec Nuquin Papa? Padenquio. Aden naquid nibēdsho bēdamboen istiapimbo icboedēmbi ambi tantiactedishun icsaboedon Esus tantiasho Nuquin Papan bēdamboen isendac.

⁷ Isadaidbon ambi tantiactedishun Esus tantiasho Nuquin Papan bēdamboen isec. Isadaidbo utsiboen bēdamboen istiapimbo iquec. Aido: —Nuquin Papa bēdamboen ismete bunquin ambi chiacpadomboenuidi ěmbimbo nanu —queboedombi nainquio icsho Nuquin Papan bēdamboen istiapimbo iquec. Abi bēdamboen ismequidquio Esus chieshēnsho Nuquin Papan pacuēnēdacbimboecnuc isadaidbo icmepanēdash. ⁸ Aden ambi isadaidbo pacuēnēdacbimboecnuc icmete chuiquin Nuquin Papan dada uamepampic naden.

“Nuquin Papan pacuēnēdacbimboecnuc icmiac Nuquin Papan chiaid chiaqui tantiatiapimbo iquec,”

quequin dada uamepampic. ⁹ Adembidi ambi isadaidbo pacuēnēdacbimboecnuc icmete chuiquin Nuquin Papan con tsusedpa Dabid naden dada uamepampic ěndenquimboshē.

“ ‘Ěbi bunaiduidi naic ěbibi bēdambo iquebi,’ quequidēmbi Nuquin Papa bēdamboen tantienquio iquec.

Adsho Nuquin Papan cuidpashun.

Cuidadnushi abimbo chiaid danec: ‘Ěmbembi naic bēdambo iquebi,’ quendac.

Adec abi tantienquio yec icsasho Nuquin Papan cuidpashun.

¹⁰ Pacuēnēdacbimboecnuc icmequin Nuquin Papan abimbo tantiamenquio icpashun.

Natiamequin shubimepashun,”

quequin Nuquin Papan chiaid Dabidēn dada uapampic.

Nuquin Papan matses utsibo bēdamboen isbenaid

¹¹ ¿Aden pacuēnēdacbimboecnuc icmiac Esus tantiatiapimbo icsho isadaidbo padpiden bēdamboen tantiametiapimboda Nuquin Papa icpec? Ambi tantiacpadomboen bēdamboen tantiamendac. Nēbi isadaidbo dadpen bēdamboen istiapimbo icquimbi matses bēdamboen iste bunquin Nuquin Papan matses utsibo Esus tantiamequin bēdamboen isbenec. —Ěmbi adosho isash isadaidbotsen ma nadnu. “Nuquin Papa bēdamboen ismete bunquiebique. Ěmbitsen Esus tantianu,” ma quenu —queshun Nuquin Papan aden matses utsibo ambi bēdamboen iste tantiamiac. ¹² Ambi chomiaid Esus tantienquio icsho isadaidbo dadpen bēdamboen istiapimbo icquimbi matses utsibon Esus tantiasho ambi con matses caido

isadaidbobimboecnuc Nuquin Papan bédamboen isbenec. Ambi tantiacpadën ambi tantiamiacpadomboen isadaidbo dadpeshun Esus tantiabensho Nuquin Papan bédamboen isendac. Adshumbic matses utsibobëdta isadaidbo Nuquin Papan bédamboshë icmendac.

¹³ Tántia, matses utsibo. Mibitsen chuinu. Nuquin Papan icmiacpadomboen matses utsibo Esusën naid chuibenequidquio nebi. Èmbi chuibeneboed con matses isadaidbo chuibanombi naden. —Esusën naid èmbi chuibeniac matses utsibon Esus tantiabenosh. Adsho Nuquin Papan aido bédamboen isbenosh —quequin con matses chiombi. ¹⁴ — Aden Nuquin Papan matses utsibo bédamboen isaid èmbi chuisho tantiashe Nuquin Papa bédamboen ismete bunquin Esus tantiatsiash. Adsho Nuquin Papan bédamboen istisash —qeshun con matses aden chiombi. ¹⁵ Aden isadaidbon Esus chieshësho isun Nuquin Papan matses utsibo Esus tantiamequin bédamboen isbenac. Ambi tantiacpadëmbi isadaidbontsen Esus tantiashe Nuquin Papan bédamboen isbenendac. Isadaidbontsen Esus tantiabedesho isumbic Nuquin Papan matses unësaidotedi uincuemendac. ¹⁶ Con tsusedpa Abadauan abi tantiaquidquio icsho Nuquin Papan bédamboen isquin: —Con matses mibi caimbi. Adembidi min tsyuecquidotsen èmbi chiactedi con matses caindambi —quequin ambi chiacpadomboen isadaidbotedi Nuquin Papan con matses caindac. Ambi nitsinaid cuète caniacsho: —Tapunuidtsëqui con na nec. Dada con napenquio nec —¿capenda icbon iquec? Padenquio. —Abichobi con na nec —caquid. Adembidi Nuquin Papan isadaidbotedi con matses caic. Caniec taëquid cuète tapumbimboecquid abia con matses caid Abadauan nec. Cuète cuidibimboecquido Nuquin Papan con matses caidobidi Abadauanën tsyuecquido isadaidbo nec.

¹⁷ Aden ambi con matses caidombi ambi chomiaid chieshësho cuète cuidi utsi pobinun pateshuniacimboen Nuquin Papan isadaidbo dadpen bédamboen istiapimbo iquec. Matses utsibo Esus tantiamequin cuète dada utsi pobiacimboen aton matses icmequin èbipadquid isadaidbo ambia Esus tantiaquidobëdta Nuquin Papan mibi bédamboen isec. ¹⁸ Adoac icsamboec onquenda. —Isadaidbo dadpen bédamboen isenquio icquin Nuquin Papan èbien bédamboen isec. Isadaidbo icsambo iquec. Èbien bédambo iquec —quequin icsamboen chienda. Aden icsamboen chuitiadquio icquimbi nëid chiaidtsen tantiatia. Cuète tapunabi icnuc dada yec podo yec quec cuète ictiapimbo ictsiandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibëdtsempampic. Isadaidbo nibëdnuc isadaidbon chidon Esus tishenquio ictsempanëdash. Èmbi aden chiac isadaidbo chiec icsamboec onquenda.

¹⁹ ¿Èbi adsho tantiashta mibi nadpe? —Ambi con matses caido chieshëmësho isun cuète cuidi pateshuniacimboen nèbi isadaidbo dadpen Nuquin Papan bédamboen isenquio iquec. Èbipadquid matses utsiboen bédamboen isbenac —¿queceta iquec? ²⁰ Abimbo mimbi caic. ¿Atotsieshun Nuquin Papan isadaidbo bédamboen istiapimbo icpec? Ambi chomiaid Esus tantienquio icsho Nuquin Papan aido bédamboen istiapimbo iquec. Padnuen Esus tantiashe mibi bédamboen isec. Adoac: —Èbi bédambo icnubi isadaidbo icsambo iquec —quenda. —Esus tantienquio icsho isadaidbo cuidacpadomboen èbitsen Nuquin Papan cuidpanundac —quequin Nuquin Papa Esusbëdta tantiaquiota. ²¹ Ambi con matses caidon Esus tantienquio icsho Nuquin Papan bédamboen istiapimbo iquec. Adembidi matses utsibon Esus tantienquio icsho Nuquin Papan mibi bédamboen istiapimbo iquec. Esus tantiaquiota.

²² Aden Esus tantiashe nadec onqueta. —Esus tantiashe bédamboen isquid yec Esus tantienquio icsho isun cuidquid Nuquin Papa nec —cata. Esus tantienquio icsho cuète cuidi pateshuniacimboen cuidquin isadaidbo bédamboen isenquio iquec. —Esus tantienquio yansho adembidi èbitsen cuidpanundac —qeshun chieshtoenquio icquin Esus tantianuna. ²³ —Padi, aid tantiatiapimbo iquebi —queboedombi isadaidbon Esus tantiabensho abëdi tabadmenuen Nuquin Papan bédamboen isendac. Ambi cuète cuidi pateshuneboedi abibidi pobioacimboen padpiden bédamboen isendac. ²⁴ Min matses abitedi Nuquin Papa tantiesabo icnëdash. Nèbien cuète icsan cuidi pateshuniac pobiacimboen Esus tantiamequin Nuquin Papan mibi bédamboen isec. Adoac Esusbëdta Nuquin Papa mimbi bëdiactëc tantiatsec. Con matses isadaidbo tsusedpabo Nuquin Papa tantiaquido dadpenquio icpampic. Nuquin Papan tantiamiac Esus chote chuiquin ènden dada uapampic. Ambi tantiacpadën ambi cuète bëda cuidi peteshuniac abibidi pobioacimboembi Esus tantiamequin Nuquin Papan con matses isadaidbo bédamboen isendac. Adoac cuëshëduidboedombi Nuquin Papabëdta Esus bédamboen tantiaquendac.

Ambi chiacpadën Nuquin Papan isadaidbotsen bédamboen isoaid

²⁵ Tántia. —“Isadaidbo icsambo iquec,” quequin chuinushe —qeshun mimbi tantiacmaid Nuquin Papan chiaid mibi chuinu. Nuquin Papan pacuënëdacimboecnuc

icmiac con matses dadpen tantiante bunenquoio iquec. Daëdpactsëcshun Esus tantiec. Nuquin Papan tantiactedishun matses utsibo dadpenshumba Esus tantiambic²⁶ paposhquiachimboen con matses isadaidbo dadpenshun Esus tantiendac. Aden tantiasho Nuquin Papan con matses bédamboen isendac. Aden ambi isadaidbo bédamboen iste chuiquin Nuquin Papan naden dada uamepampic. “Icsambo icquidobi cuidmenquoio icnuec Nuquin Papa yacnuësh choquid isadaidbon chidon tishaid iquendac.

Aidëmbi isadaidbo Nuquin Papa tantiaquid padpiden icmendac.

²⁷ ‘Aden ëmbi chiacpadomboen ëmbi chomiaid tantiasho abi icsaid bëpiscudquin isadaidbo bédamboen isendambi,’ quependac Nuquin Papa,” quequin ambi chiaid Nuquin Papan dada uamepampic.

²⁸ Nëbi Esus chieshënsho isadaidbo bédamboen istiapimbo icquin Nuquin Papan matses utsibo mibi Esus tantiamiac. Ambi nëbi bédamboen istiapimbo yaido isadaidbo unësquoio icnu Nuquin Papan tantiaquiec. —Ëmbi aton tsusedpabo chiampicpaden aido con matses caimbi —qeshun adoec. ²⁹ Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic. ³⁰ Min matsesën isadaidpembon Nuquin Papa tantienquoio yachimboen nëbi isadaidbon Nuquin Papa tantiamequid Esus tantienquoio iquec. Aden Esus tantiatiapimbo icsho isun Nuquin Papan Esus tantiamequin matses utsibo bédamboen isbenac. ³¹ Con matsesëmbien abided cuidadaid Esus chieshënquin Nuquin Papan chiaid niac-niacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bédamboen isendac. ³² Aden matses abitedishun ambi chiaid niac-niacsho isun: —Abitedimbo icsaqueic —quequin matses bédamboen istiapimbo icboedëmbi nëbi Esus tantiasho Nuquin Papan bédamboen isendac isadaidbo yec matses utsibo abitedi yec quenuc.

³³ Aden Nuquin Papan bédamboen iste chuisho tantiash nadnuna. Nuquin Papa bédamboshë iquec. Abipadquid utsi nibëdec. Matsesën naidtedi tantiaquidquoio nec. Abitedimbo tantiaquid icquin ambi natiapimbo ictequid nibëdnuc bédamboen naquidquoio nec. ¿Ada adquid icsho Nuquin Papan naidtedi matsesën tantiapadic? Padenquoio. Ambi naidtedi matsesën tantienquoio iquec. ³⁴ “¿Nuquin Papan otacquoio tantiaidtedida matsesën tantiapadic? Padenquoio. ¿Mimbi tantienquoio iquec. Ëmbi chiacpadomboen nata,’ quequinda matsesën Nuquin Papa chuipadic? Padenquoio. Ambi tantiacpadomboembien Nuquin Papan naindac.” ³⁵ “¿Ada matsesën Nuquin Papa menepadic? Padenquoio. ‘Në. Con na bedquin matsana ëbi cuidquin mene, Papa’ ¿quequinda Nuquin Papa chuipadic? Padenquoio. Matsesën: ‘Con na nec,’ caidtedi Nuquin Papan na nendac.” ³⁶ Abitedimbo uaquidquoio yec abitedishun Icbombo Nuquin Papa nec. —Uesadec nibëdanushe —quequin abitedimbo isquidquoio nec. Aton na abitedi nec. Adec abitedishun Icbombo icsho: —Nuquin Papa bédamboshë iquec —canuna ënenquoio icquin.

12

Esus con Icho cain ambi chiacpadomboen naid

¹ Con utsibobimboecquido mibi neque. Tantia. Mibi chuinu. Nuqui cuidmenquoio icnuec abided cuidadaid Esus tantiasho Nuquin Papan nuqui bédamboen isequie. Nuquin Papa bédamboen tantiatiaquidquoio icquin nadozona. —Ëbi bunaid nainquoio yec mibi bédambo icmenuec mimbi chiacpadec bédamboec tabadtiadquoio iquebique. Min yuambo ëbi icme, Papa —quequin Nuquin Papa chuinuna. ² Esus tantiesabon nacpadomboen nainquoio icquin Nuquin Papan Mayanën pausunacpadomboen Esus tantiaquin nuqui icsate bunaid ënuna. Aden nuqui icsate bunaid ënquin Nuquin Papa bunacpadec bédamboec tabadquin nuqui tantiendac. Aden naic nuqui bédambo iquendac.

³ Tantia. Nuquin Papan tantiamiacpadomboen mibi chuinu. Nadenda. —Ëbiuidtsëqui bédambo iquebi. Utsibo abitedi icsambo iquec —quenda. Nuquin Papan Mayanën tantiamiacpadec mibibi datatiadec: —Adquid nebi —quequin abimbo chuita. ⁴ Nuquin Papan Mayanën tantiamiacpadomboen naquid Esus tantiaquidën. Adquid yec ¿ada Esus tantiaquido abitedi chuiquid dapa yampatsiash? Padenquoio. ¿Mitsipadquoio min dada icpec? ¿Abichobida bedantequid icpec? Padenquoio. Mëdanteuidtsëquien bedantequid iquec. ¿Abichobida istequid icpec? Padenquoio. Èshëuidtsëquien istequid iquec. ¿Abichobida shëdtequid icpec? Padenquoio. Dëbiatëuidtsëquien shëdtequid iquec. ⁵ Min dada yachimboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidotedi yec bédamboec tantiananquin nashunanquido yanec. ⁶ —Ma utsibo nashunu —qeshun Nuquin Papan Mayanën namiaid nec Esus tantiaquido. ¿Atotsi naquid Nuquin Papan Mayanën mibi icmiac? Nuquin Papan ambi

tantiaidquio oncamiaid iquendac. Adquid icquin Nuquin Papan Mayanën tantiamiaiduidi chuibanta. ⁷Utsibic: –Utsibo nashunquid icta –caid iquendac. Adquid icquin bédamboen nashumbanta. Utsibic Nuquin Papan: –Ëmbi chiaid bédamboen tantiaishun chuibanta –caid iquendac. Adquid icquin Nuquin Papan chiaid tantiatsëcquido bédamboen tantiameta. ⁸Utsibic: –Chieshtoenquio icquin Esus tantiec bédamboec tabadnuna –quequin bédamboec tabadquio ismequid iquendac. Adquid Nuquin Papan icmiaid icquin Esus tantiaquido bédamboec tabadte tantiameta. Utsibic aton na nibëdquido aton na menequid Nuquin Papan icmiaid iquendac. Adquid icquin cudasenquio icquin menianeta. Utsibic: –Esus tantiaquido chuiquid dapa icta –caid iquendac. Adquid icquin Esusën namiacpadomboen Esus tantiaquido bédamboen nameta chieshenquio icquin. Utsibic dada icsaido yec isedanquido yec aton shubu nibëdquido yec aton pete nibëdquido yec macho yec tsusioctëc yec qesho bédamboen nashunquid iquendac. Adquid icquin Esusën chiacpadomboen chieshtoenquio icquin nashumbanta.

Esus tantiaquidon nadoquid, quiaid

⁹–Mibi tantiac unësquio iquec –quequin utsibo chuiquin abimbo chuinuna. Muainquio icquin utsibo tantiaquionona. Chieshëmënenquio yec bédamboec tabadnuna. Utsibon: –Icsanuna –caqui: –Padi –quiash icsainquio yec bédamboec tabadnuna. ¹⁰–Ëbëdtan Esus tantiaquido con utsibobimboecquido nec –quiash bédamboec tantiananuna. –Nëid con buchibimboecquid bédambo iquec. Aidën chuisho bédamboen tantianuna –canuna nuquibëdtan Esus tantiaquido chuiquin. ¹¹Nuquin Papan chiacpadomboen naic chieshtoenda. Nuquin Papan Mayanën tantiamiacpadec Esus tantiec chieshtoenquio yec bédamboec tabadnuna. ¹²–Unësacsho abi yacno Nuquin Papan ëbi tabadmendac –quec cuishonquenuna. Esus tantiaquido icsho utsibon chieshënaqui chieshtoenquio icquin Esus tantianuna. ¿Atotsi natiamiante utsi icpec? Adquid tantiec shubiquimbi chieshtoenquio icquin Esus tantianuna. Baded-badedquien Nuquin Papa chian-chianuna. ¹³Nuquibëdtan Esus tantiaquido aton na nibëdsho isun nuquin nabi menenuna. Isedanquido bédamboen isnuna. Pemequinc nuquin shubun ushmequinc canuna. ¹⁴Esus tantiaquido yec nuqui chieshënquidobëdi chieshënanenquio icnuna. Chieshënanenquio icquin Nuquin Papa naden chuinuna. –Ëbi chieshënquido bédamboen tantiameta. Chiesh bédameta, Papa –quequin Nuquin Papa chuinuna. ¹⁵Utsi bédambo yec cuishonqesho isash aidbëdi cuishonquenuna. Utsi unësquio icnuc shubisho isash aidbëdi shubinuna. ¹⁶Cuesnanenquio yec chieshëmënenquio yec bédamboec tabadnuna. –Con nauidsëqui naimbi –quenquio icquin utsibobëdtan bédamboen nanuna. –Ëbiuidtsëqui bédambo iquebi. Ëmbi tantiacpadomboenuidi naimbi. Utsibon chiaid natiapimbo iquebi –quenquio yec bédamboec tabadnuna. –Chuiquid dapabëduidsëqui onquequid nebi –quenquio yec matses abitedibëd onquec bédamboec tabadnuna.

¹⁷Chieshënaqui cuidnanenda. –Ma utsibo: “Bédamboec tabadquido nec,” quenu –quiash bédamboecuidi tabadnuna. ¹⁸Uimanëmënuquido icsasho isun aid chuiquin: –Bédamboecquien tabadtiad –canuna. Adquidobëd chieshënanenda. ¹⁹Ëmbi tantiaido mibi neque. Tantia. Chuinu. Nuqui chieshënuquidobëdi cuidnanenquio icnuna Nuquin Papan naden chiaid tantiaish. “Matses cuidnanac icsambo iquec. Ëbentsëcquibini icsaido cuidquid nec,” quequin Nuquin Papan chiaid dada uapampic. ²⁰Nuqui chieshënuquidobëdi cuidnanenquio icquin bédamboen isnuna. “Pete bunsho pemequinc acte bunsho acmequinc canuna. Nuqui chieshënuquido: ‘Bédambo icquidi chieshënec icsachitobi,’ quiash ma nëish bédanu,” quiash ²¹adec cuidnanenquio icquin nuqui chieshënuquido bédamboen isnuna.

13

Chuiquid dapan chiacpadomboen Esus tantiaquidën naquid

¹Aton matses chuiquid dapan chiacpadomboen Esus tantiaquidën naquid. Adembidi aton nidaid pais caidën tabadquidodeti chuiquid dapabon chiacpadomboen naquid. –Nuquin Papan adquid chuiquid dapa icmiabi yac nibëdtsiash. Nuquin Papan chuiquid dapa icmiaidien aido nec –qeshun aidon chiacpadomboen naquid Esus tantiaquidën. ²Nuquin Papan chuiquid dapa icmiaidën chiaid niacquid Nuquin Papan chiaidbidi niacquid nec. Aden ambi chiaid niacacsho chuiquidon cuidquid. ³Bédamboec tabadquidon chuiquid dapan cuidte dacuëdëntiapimbo iquec. Adquido cuidenquio icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bédamboec tabadta. Adsho isun: –Mibi bédamboec tabadec –catsiash chuiquid dapabon. ⁴–Ma matses bédamboec tabadnu –quequin Nuquin Papan chuiquid dapa icmiaidën mibi bédamboen tabadmetiadquio iquec. Nuquin Papan icmiac icsambo icquido cuidquid nec. Adquid icnuc: –Icsasho chuiquid dapan ëbi cuidpanundac –quiash icsaquid dacuëdendac. ⁵Ëbi

adsho tantiashun chuiquid dapabon chiacpadomboen nanuna. —Cuidnushe —qeshun adonona. —Pabiate cuembo icquin Nuquin Papan chiacpadomboen natiadquio iquebi —qeshun adonona.

⁶ Bëdamboen tabadmenuen Nuquin Papan chuiquid dapa icmiaidon: —Ëmbi chiacpadomboen nata —cac naquid Esus tantiaquidën. ⁷ Aden chuiquid dapan chiacpadomboen nanuna. Aid bëdamboen isnuna. Aidën: —Nata —cac nanuna chieshenquio icquin.

Utsibo tantiaquionona, quiaid

⁸ —Ëmbi nashumbocpadomboen ëbi cuidquin nashunenquio iquec —camenda. Abi nashunquidobëd cuidnanquid Esus tantiaquid. Esus tantiaquidbidi bëdamboec tantiananquid. Adec bëdamboec tantiananquin Nuquin Papan Moises chiampicpadomboen nuqui bëdamboen natsiac. ⁹ “Ambi naiduidtsëqui nainquio yec abibi datantiadacimboec ma matses bëdamboec isnanu,” quequin Nuquin Papan Moises naden dada uamepampic. “Min chidopenquio chudenda. Adembidi min bënëpenquio chudmenda chidon. Cuesunenda. Ampenda. Utsin na isash: ‘Adquid con na nibëdosh,’ quec chieshëmë nec tabadenda,” quequin Nuquin Papan con tsusedpa Moises dada uamepampic. Aidën chiacpadomboen natiadquio icquin nuqibi datantiadacimboen utsibotsen tantiaquionona. ¹⁰ Utsibo bëdamboen isquin aido icsa uatapiombo nuqui ictsiac. Aden utsibo bëdamboen tantiasho Nuquin Papan: —Aden naic ëmbi Moises chiacpadec bëdamboec tabadec —caindac.

¹¹ —Nëbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushacimboen nainquio icboedi nëbi ushash isucunacimboec dayacquio yec chieshtoenuio icquin Nuquin Papan chiacpadomboen nanuna. Esus tantiabenash: —Yuecashien Esus choec —quiondaidi: ¹² —Nëbien Esus chochitec —quedonetsëcquiec bëdamboec tabadnuna. —Satanasën yuanushe —qeshun Esus tantiaquin nuqui icsaid ënshun bëdamboen nanuna. ¹³ Icsainquio yec: —Bëdambo iquebique. Ma isnu —quiash bëdamboec tabadnuna. Tantiadenuen actequid paëmo icquid aqenquio icquinc utsin chido chudenquio icquinc utsin bënë chudmenquio icquinc chido utsi mëisemenquio icquinc canuna. Adecbidi utsin na isash: —Con na adquid nibëdec —quiash chieshëmë nec tabadenquio icnuna. Adembidi utsin mibi bunaid nasho isash: —Aden ëbi namenquio icpec —quec chieshëmënenquio icnuna. Icsainquio yec bëdamboec tabadnuna. ¹⁴ —Icsate bunchitebi. ¿Mitsipaden naiquini icsape? —quenquio yec Esus tantiaquiec abi tabadacpadquiec bëdamboec tabadnuna. Nuqui icsate bunaid ënquionona.

14

Esus tantiaquido utsibo bëdamboen isaid

¹ Nuquibëdtan Esus tantiatsëcquidon nuqui nacpadomboen nainquio icsho bëdamboen isnuna. Ambi chiaidquio chuiquin Esus tantiaquidon natetedi Nuquin Papan uesquin chiabi iquec. —Naden nac bëdambo iquec. Naden nac icsambo iquec —quequin uesquin chiabi iquec. Aden Nuquin Papan chiacmaid chiec nuquibëdtan Esus tantiatsëcquido: —Ëmbi natemaid nec —qeshobi: —Icsamboen chiec —cainquio icnuna. ² Esus tantiaquidquio: —Pete abitedi pambidbëdta pesho Nuquin Papan nëshënenquio iquec —quenubien Esus tantiatsëcquid: —Padi. Pambid pesho isun Nuquin Papan nëshënenushe. Esus tantiaquidën nitsinaid pequid. Pambid isuidquid —quepec. ³ Pambid pequidobëdtan pambid isuidquidombi Esus tantiasho Nuquin Papan aid daëdi bëdamboen isec. Padnuen pambidbëdta pete utsi abitedi pequidën pambid isuidquid mamënsnunac icsambo ictsiash. Adembidi pambid isuidquidën: —Pambid pequid icsambo iquec —cac icsambo ictsiash. ⁴ ¿Icbonpenquioda: —Yua icsambo iquec —capadic? Icbombien adoquid. Adembidi: —Mibi bëdambo iquec —caquid icbon. Nuquibëdtan Esus tantiaquid Nuquin Icbon yua icsho: —Ëmbi nacpadomboen nainquio yec mibi icsambo iquec —cainquio icnuna. —Nëid icsambo iquec. Nëid bëdambo iquec —quequin Nuquin Icho Esusën ambentsëqui abi tantiaquido chiendac. Aidën namiacpadomboen abi tantiaquidon bëdamboen naindac.

⁵ Esus tantiaquido utsi-utsiac: —Aid badiadquidënuidsëqui Esus tantiec cuëdënac bëdambo ictsiash —quenubien utsibo: —Badiadquidën badiadquidënuiec Nuquin Papa Esusbëdta tantiec cuëdënebi —quecuededpec. Adquid daëd icsho Nuquin Papan nëshënenquio iquec. Esus tantiaquid ambi tantiacpadënuioibi cuëdënac bëdambo ictsiash. ⁶ Aden Esus tantiaquin nac bëdambo ictsiash. Adembidi Esus tantiaquin: —Mimbi pete uaid bëdambo iqueque. Aid penu, Papa —quequin pambid pequido iquendac. Utsibombic adembidi Nuquin Icho tantiaquin: —Mimbi pete uaid bëdambo iqueque. Aid penu —qeshun utsi pequimbi pambid isuidquid iquendac.

⁷ ¿Esus tantiaquid ambi naid-uidi naquidta nedic? Padenquio. ¿Ambi tantiacpadën unësquidta nedic? Padenquio. ⁸ Nuquin Icho Esusën chiacpadomboen natiadquio yec

nuqui tabadec. Ambi tantiacpadën nuqui unësendac. Unësabi yec tabadec Esusën yuambo icboedi unësash adecbidi aton yuambo nuqui iquendac. ⁹ Adec Nuquin Icho icnuec abided cuidadec unësash Esus uincuempanëdash. Unësabi yec nuqui tabadnuc Nuquin Icbombo icboedi nuqui unësan adecbidi Nuquin Icbombo iquendac.

¹⁰ —Adquid Nuquin Icho iquec —quesho ζtantiaishunda nuquibëdtan Esus tantiaquid mamëshuntiad? Padenquio. ζNuquin Papan chiacmaid chiec: —Ëmbi nacpadomboenuidi nainquio yec icsambo iquec —quequinda chushcatiad? Padenquio. Nuquin Icho Esusbëdtan Nuquin Papanuidtsëqui matsesën naidtedi chiendac. —Nëid bëdambo iquec. Utsi icsambo iquec —quequin chiendac matses abitedishun tantianubi. ¹¹ Adote chuiquin Nuquin Papan ambi chiaid naden dada uamepampic.

“Tantia. Abimbo caimbique.

Naden matses abitedishun ëbi chiendac.

‘Abitedishun Icbombo mibi nec.

Bëdamboshë icquidquio mibi nec.

Abitedishun naid tantiaquid icquin mimbiuidtsëqui: Nëid icsambo iquec. Nëidien bëdambo iquec, quequin abimbo chiendac,’ quequin matses abitedishun ëbi chiendac,” quequin Nuquin Papan dada uamepampic. ¹² Aden ambi cuidte ushën Nuquin Papan: —ζEnda? ζMitsipadec tabado? —cabanac nuquitedishun nuqui naidtedi chuibanendac.

Utsibo icsamenquio icnuna, quiaid

¹³ Ëbi adsho tantiaishun Nuquin Papan: —Adoenda —quequin chiacmaid nuqui tantiaid chienquio icnuna. —Ëmbimbo natemaid naic aido icsambo iquec —nuquibëdtan Esus tantiaquido cainquio icnuna. Adenquio icquin nadonona. —Ëmbi ambi natemaid nasho isash chieshtoshon Esus tantienquio yanushe. Ambi natemaid naquin ismenquio iquembi —queshun Esus tantiaquidtedi bëdamboen isnuna. ¹⁴ Nuquin Icho Esuquidistu tantiaquidquio icquin ëmbien naden tantiec. —Nëbi Nuquin Papan: “Petemaid nec,” caid nibëdec —quequin tantiembi. Ëbi adnubi utsibo: —Petemaidquio nec. Aid pec icsamane. Aid petiapimbo iquebi —queshumbi adquid pec: —Icsachitobi —quetsiash. ¹⁵ Adsho tantiaishun aido bëdamboen tantiaquin ambi petemaid nuqui pemenuo ictsia. Ambi petemaid pemequin mimbi aido tantienquio iquec. —Ëmbi petemaid piash icsachitobi —quequin Esus tantienquio yanushe. Ambi petemaid pemenda. —Nëid petemaid nec —quequido aidotsen tantiaquin cuidmenquio icnuec abided cuidadec Esus unësaque. Aido tantia. ¹⁶ —Nuquin Papan chiaid niaquenquio icquin Esus tantiaquido utsibon: “Aden naic icsatsiash,” caid naimbi. Ëmbi tantiacpadomboen naimbi —queshun mimbi tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ëmbi natemaid naique —camenda. ¹⁷ ζ—Nadquid petemaid nec. Nadquid actemaid nec —quequin petebëdta acteuidi tantiecta Nuquin Papan chiacpadec Esus tantiaquido bëdamboec tabadpatsiash? Padenquio. Aton Mayan nuquibëdi tabadmiac chieshëmënenquio yec cuishonquec Esus tantiaquido bëdamboec tabadendac. ¹⁸ Adec Esuquidistun chiacpadec tabadsho isun Nuquin Papan: —Bëdambo iquec —caindac. Matsesënsen: —Aido bëdambo iquec —caindac.

¹⁹ Ëmbi chiacpadec chieshëmënenquio yec bëdamboec isnanuna. —Esus tantiec chieshtoenquio yec bëdamboec tabadnuna —quec chuinanuna. ²⁰ —Nuquin Papan bëdamboen isaidon Nuquin Papa Esusbëdta tantienquio yanushe —queshun utsibon petemaid pequin aido chieshtomenda. Nuquin Papan: —Matsesën petemaid nec —caid nëbi nibëdnubi Esus tantiaquido icsamemane —queshun ambi petemaid pambid penquio icquinc ambi actemaid acte paëmbo icquid aquenquio icquinc ambi natemaid utsi nainquio icquinc cac bëdambo ictsias. ²² Nuquin Papan: —Matsesën natemaid nec —cacmaid tantiaquin: —Ëmbimbo petequid nec. Ëmbimbo actequad nec. Ëmbimbo natequid nec. Aden nasho Nuquin Papan ëbi cuidenquio iquec —quequin mimbi tantiaid caic: —Natemaid nec —quequido naden chienda. —Ëmbi nacpadomboen nainquio yec mibi icsambo iquec —cainda. Ademibidi aidon: —Ëmbi natemaid nec —caboed naquin ismenda. Chieshtonoshe. ²³ Adquid ambi: —Aid pesho Nuquin Papan nëishëchitembini ictsias —caboed piash —Icsachitobi —quetsias. Adsho Nuquin Papantsen: —Ai, adec icsaic —catsias. —Aden naic icsachtequini ictsia —nuqui caidtedi naic nuqui icsatsia.

15

Nuqui bunaiduidi nainquio icnuna, quiaid

¹ Esus tantiaquidënquio Esus tantiaquid chieshëmënenquio icquid. —Natemaid nec —quequin Nuquin Papan chiabi icnubi Esus tantiaquid: —Esus tantiaquin ëmbimbo

natemaïd nec —quesho tantiashun ambi natemaïd naquin ismequin chieshtomenda. Aid tantiaquin ambi natemaïd nainquïo icquin nuqui bunaiduidi nainquïo icnuna. ² — Esus tantiatsêcboedëmbi ma Esus bédamboen tantiabenquïono —quequin nuquibédtan Esus tantiatsêcquidën natemaïd nainquïo icnuna. —Aden naic mibi bédambo iquec —camenuen ambi natemaïd nainquïo icnuna. ³ Esuquidistun ambi naiduidi nainquïo icquin Nuquin Papan chiacpadomboenuidi naic abi chieshënquïdo yacnoibi chopanédash. Esus tishabi icnuc Esusën chuite chuiquin Nuquin Papan con tsusedpa naden dada uamepampic. “Mibi chieshëncapadomboen chieshënquin ëbi icsamboen chuishunec, Papa,” quequin Esusën abi chuite Nuquin Papan dada uamepampic. ⁴ Aden con matses isadaïdbobédta matses utsibo abitedi bédamboen tantiamenuen Nuquin Papan ambi chiaïd dada uamedenepampic. — Nêïd isban-isbanquin ëbédta Esus ënenquïo icquin tantiec ma matses bédamboec tabadnu. Adec bédamboec tabadec: “Unêsash Esusbëdi Nuquin Papa yacno tabadendabi,” ma matses quenu —qeshun ambi chiaïd dada uamepampic. ⁵ Aden matses chieshtoenuïo icnuc bédamboen tabadmequid Nuquin Papa mibi chianëmbi. —Chieshtoenuïo icquin Esus tantiaquid icmequin dayacquïo yacimboecnuc matses bédamboen tabadmequid mibi nec, Papa. Adquid icquin Doma yacnocquidon Esus tantiasho bédamboec isanquid icmeta, Papa. ⁶ Mimbï adoac: “Nuquin Papa chuinuna,” cac aidon abitedishun: “Ai, adonona,” qeshun mibi naden chuitsiash, Papa. “Con Icho Esuquidistun Papa mibi nec. Mibi bédamboshë iquec,” quequin mibi chuitsiash, Papa —quequin Nuquin Papa mibi chianëmbi.

Nuquin Papan matses utsibo Esus tantiamiaïd

⁷ Tanta. Padpiden mibi chuïnu. —Nuquin Papa bédambo iquec —nuqui camenuen Esuquidistun nuqui bédamboen iseque. Bédamboec isnanuna. Isadaïdbo yec isadaïdpembo yec quec bédamboec isnanuna. ⁸ Esuquidistu matses abitedi bédambo icmenuec matsesbëd tabadpanédash. Esus chote chuiquin Nuquin Papan dada uamepampicpadec isadaïdbobëdi tabadquin Esusën aïdo nashumpanédash. —Nuquin Papan abimbo chuipampic —quequin tantiamenuen adopanédash. ⁹ —“Icsaboeombi Esus tantiasho Nuquin Papan bédamboen isquin cuidenuïo iquec. Nuquin Papa bédambo iquec,” ma isadaïdpembo matses utsibo quenu —quecbidi Esus matsespanédash. Aidën abi chuite chuiquin Nuquin Papan naden dada uamepampic.

‘Isadaïdpembo matses utsibobédtan mibi naden chiendambi.

‘Nuquin Papa bédambo iquec,’ caindambi mibi.

Adecbidi mibi bédamboen tantiec cuëdënendabi,”

quequin Esusën abi chuite Nuquin Papan dada uamepampic. ¹⁰ Nadëmbidi isadaïdpembon matses utsibon abi tantiabente chuïquin Nuquin Papan con tsusedpa dada uamepampic.

“Matses utsibo isadaïdpembo mibi chuïnu.

Nuquin Papan con matses caïdobëdi cuïshonqueta.

‘Nuquin Papa bédambo iquec,’ quec cuïshonqueta,”

quequin Nuquin Papan chiaïd dada uapampic. ¹¹ Nuquin Papan chiaïdbidi con tsusedpan padpiden naden dada uapampic.

‘Isadaïdpembo matses utsi abitedi mibi chuïnu.

‘Nuquin Papa bédambo iquec,’ cata.

‘Nuquin Papa bédambo iquec,’ quec cuëdëncuededec tabadta,”

quequin dada uapampic. ¹² Adëmbidi isadaïdpembon matses utsibon Nuquin Papabédta Esus tantiabente chuïquin Nuquin Papan con tsusedpa ysayas naden dada uamepampic.

“Dabidën papa Isai caïd ënden unêsampidën tsyuecquid yuecash iquendac.

Nidaïd utsi-utsiec yacno tabadquidodetedi chuïquid dapa icquin bédamboen namendac.

Aid caic: ‘Nëïdën nuqui cuidmenquïo iquendac,’ quependac isadaïdpembo matses utsibo,” quequin dada uapampic.

¹³ Aden chiampid mibi nec. Nuquin Papa Esusbëdta tantiaquïdo icsho mibi Nuquin Papa chianëmbi. —Mibëdi matses tabadmequidquïo mibi neque. Mibi tantiamëquin Doma yacnocquïdo cuïshoncameta, Papa. Adëmbidi dacuëdenquïo icnuc bédambo icmeta. Aden min Mayan aïdobëdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianëmbi.

Matses utsibo Esus chuïbanquid nebi, quiaïd

¹⁴ Con utsibo mibi caïmbique. Tanta. Mibi chuïnu. —Nuquin Papan Mayanën tantiamiacpadec bédamboec isnanec bédamboec tabadtiadquïo icquïdien nec. Aidën tantiamiacpadomboen Nuquin Papan chiaïd bédamboen tantiec: “Nuquin Papan chiacpadec bédamboec tabadnuna,” quec chuïnanquïdien nec —quequin mibi tantiombi. ¹⁵ Aden tantiash: —Nëishënshe —quenquïo icquin: —Bédamboec tabadta —quequin chuïquin nëïd

dada uaimbi. Nuquin Papan: —Esus chuibeneta —caid icquin mimbi ënden tantiaidbidi Esusën naidquo bédamboen mibi tantiamenuen dada uaimbi. ¹⁶ Nuquin Papan icmiacpadquid Esusën naid chuibenecquidquo nebi. Adquid icquin isadaidpembro matses utsibo Esus tantiaquido Nuquin Papan bédamboen iste chuibeniombi. Adoac matses utsibon Esus tantiabensho isun aton Mayanën bédamboen tabadmesho: —Bédambo iquec —caindac Nuquin Papan.

¹⁷ Aden: —Esuquidistu bédamboshë iquec —quequin matses utsibo dadpen Esusën naid chuibeniombi. ¹⁸⁻¹⁹ Esuquidistun ëbi namiaiduidtsëqui mibi chiec nendabi. Aidëmbi namiac matses utsibo Esusbëdtan Nuquin Papan naid chuibenecquimbi Nuquin Papan Mayanën tantiamiacpadomboen comapenen tantiaquin nacnenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquo yanosh. Shubu dadpen icquid Edusaden yacnuësh ënapen nidash nidaid utsi Ididico caid yacno nidshun chuibeniombi. Ambo nidtanec choaobi Edusaden yacnobidi. ²⁰ Esusën naid chiacmanouidquo Esusën naid chuibenetiadquo iquebi. Utsibon Esusën naid chuibanacro nidiapimbo iquebi. Esusën naid chuisho tantiacmaido Esus chuite bunquiebi. ²¹ Aden nate chuiquin Nuquin Papan con tsusedpa naden dada uamepampic. “Nuquin Papan chomiaidën naid chuisho tantiacmaidon tantiabendac. Adshun paposhquiacimboen bédamboen tantiendac,” quequin dada uamepampic. ²² —Aden Esusën naid chiambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusën naid tantiash —quiaish mibi yacno nidabi iccobi. Nëbi mibi yacno nidiadquo iquebi.

Mibi yacno nidiadquo iquebi, quiaid

²³ —Nëbi Ididico yacno Esusën naid uesquin chuibeniac —quiaish mibi yacnotsen nidiadquo iquebi. Èndenquimbo taëc mibi yacno nidte bunondaidi seta dadpen matamiashic adi nëbi mibi iste bunquiebi. ²⁴ Nidaid utsi Espania caid yacno nidquimbi mibi isbidanendambi. Doma yacno nidash mibëdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibëdi nidendac —ëbi caindac mimbi. Aden tantiec mibi yacno isbidantiadquo iquebi. ²⁵ Nëbini Edusaden yacnoba nidendac. Anocquido Esus tantiaquido utsibon meniaid menenuc nidendabi. ²⁶ —Edusaden yacnocquido Esus tantiaquido utsi-utsiec aton piucquid nibëdeque. Nuquin nabi na buanshunu. Menenuna —queshun Esus tantiaquido icquin Acaya yacnocquidobëdtambi Masedonia yacnocquidon: —Con na buanshun meneta —caphosi. ²⁷ Aden ambi tantiacpaden nasho: —Bédambo iquec —caombi. Edusaden yacnoshon Esusën chiac isadaidbomba Esus tantiaapanëdash. Adshumbic aidon chuibeniac matses utsibontsen Esus tantiaapanëdash. Aden abi nashunquin chuiquido Edusaden yacnocquido caic: —“Piucquid nibëdec,” quiaic caoshe. Menenuna —quesho: —Bédambo iquec —caombi. ²⁸ Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibëdquido menebanash nidaid utsi Espania yacno nidquin mibi isbidanendambi. ²⁹ Mibëdi tabadquin ëmbi Esus tantiamequin chuisho Esusën nuqui bédambo icmendac.

³⁰ Èmbi tantiaidombo mibi neque. Tantia. Chuinu. Nuquin Icho Esuquidistun aton Mayambëdtan tantiamiacpadec nuqui bédamboec tantiananec. Èbi tantiaquin Nuquin Papa chianeta. —Ènenquio icquin Esus tantiamequin mimbi chiacpadomboen Pabado name, Papa. ³¹ Udeya yacno nidsho Esus chieshënkquidon Pabado cuesnushe. Bedmeta, Papa. Piucquid buanacsho Edusaden yacnocquido Esus tantiaquido bédamboen bedmeta, Papa. “Matses utsibon isadaidpembon meniaid bedtemaid nec,” quequin bedenquo icnushe. Bédamboen bedmeta, Papa —quequin Nuquin Papa chianeta. ³² Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bédamboec tabadendac Esus tantiamenac. ³³ Aden mibi tantiaquin: —Nuqui dacuëdenquo icnuc bédambo icmequid Nuquin Papa mibëd icpashun —caimbi.

16

Mibi unësquio iquec, quequin chiaid

¹ Nuquibëdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bédamboen ista. Shubu dadpen icquid Senquedeya caid yacnoshon utsibo bédamboen nashunquidquo nioshe. ² Pebe bédamboen ista. Utsibobëdta ëbitsen bédamboen nashunoshe. —Nuquibëdtan Esus tantiaquid nec —queshun bédamboen isquin aidën: —Èbi nashunta —cacadomboen aid nashunta.

³ Aquida caidbēda aton chido Pidisida caid chuiquin: —Mibi caic: “Unēsquo iquec,” quiosh Pabado —cata. Aidon ebēdtan Esusēn naid chuibeniondashe. ⁴ Aden Esusēn naid chuibenesho: —Cueschitomane. Aden chienda —Esus chieshēnquidon caqui aidon adembidi ebēdtan Esusēn naid chuibeniondash. Adsho isun: —Mimbi bēdamboen naoc —caondambi. Adembidi aidon chiondaidon isadaidpembon chiondash. ⁵ Aquidan shubuno Esus tantiec cuēdēnec cho-choquidotsen chuita. —Mibi caic: “Unēsquo iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabenondayid ēmbi tantiaidquio Epeneto caidtsen adembidi chuita. ⁶ Nēidtedi chuiquin: —“Mibi unēsquo iquec,” quiosh Pabado —cabanta. Nēidic Madia caid mibi nashunquidquio. ⁷ Nēidic con matses isadaidho Andedonico caid. Nēidic con matses Unias caid. Aidon ebēdtambi Esusēn naid chuibenesho chieshēmēnquidon bedshun quēnēn nauedondash. Aidombien ambia Esus tantiabempac caondash ēmbi padabi icnubi. Adsho aidoba Esusēn: —Ēbi chuibeneta —cac chieshtoenquio icquin Esus chuibenquido nec.

⁸ Nēidteditsen chuiquin: —“Mibi unēsquo iquec,” quiosh —cata. Nēidic Esus tantiaquid utsi Ampidias caid ēmbi tantiaidquio. ⁹ Nēidic Esusēn naid chuiquid utsi Udbano caid. Nēidic ēmbi tantiaidquio utsi Estaquis caid. ¹⁰ Nēidic Apedes caidtsen. Utsibon chieshēnaqui chieshtoenquio icquin Esus tantiaquidquio nec. Nēidic Adistobudo caidēn shubun icquidotedi. Aidedi: —Mibi caic: “Unēsquo iquec,” quiosh Pabado —cabanta. ¹¹ Nēidotsen adembidi chuita. Nēidic con matses utsi Edodion caid. Nēidic Nadsiso caidēn shubun icquido Esus tantiaquidtedi. ¹² Nēidic chido Tidipena chedo Tidiposa caidbēdi. Aido Esus tantiec dayacquo icquin ambi chiacpadomboen nabanquido nec. Nēidic chido utsi Pedsida caid con chu iccobimboecquidquio. Aidtsen Esus tantiec dayacquo icquin ambi chiacpadomboen naquidquio nec. ¹³ Nēidic Dupo caid Nuquin Papan Esus tantiamiaidquio. Nēidic aton tita con tabimboecquidquio. ¹⁴ Nēidic Asinquidito caid. Nēidic Pedeconte caid. Nēidic Edmes caid. Nēidic Patēdobas caid. Nēidic Edmas caid. Nēidic abēd icquido Esus tantiaquido. ¹⁵ Nēidic Pidodoco caid aton chido Udiabēdi. Nēidic Nedeyo caid aton chuchubēdi. Nēidic Odimpas caid. Nēidic abēd icquido Esus tantiaquido. Aidedi chuiquin: —Mibi caic: “Unēsquo iquec,” quiosh Pabado —cabanta.

¹⁶ Esus tantiaquido yec bēdamboec isnanta. —Mibi tantiēmbi —cananta. Nēmbō icquido Esus tantiaquidtedi mibi caic: —Unēsquo iquec —quiosh. ¹⁷ Ēmbi tantiaido mibi neque. Tantia. Mibi chuinu. ¿Ada mibēdtan Esus tantiaquido chieshēmequin cuēshēdequido icpec? ¿Ada Nuquin Papan chiaid mimbi tantiaid chienquio yec mibi icsamenuec muaquido icpec? Adquidobēd onquec tabadenda. ¹⁸ Nuquin Icho Esuquidistun chiacpadomboen nainquio icquin ambi petequid-uidtsēqui aidon chieque. Aidon: —Mibi bēdambo iqueque. Ēmbi chiaid tantia —quequin ambi chiacpadomboen namequin Esus tantiatšēquid icsamec. ¹⁹ —Doma yacnocquido abi tantiec Esusēn chiacpādec bēdamboec tabadosh —quequin mimbi naid chuibenesho dadpenshun tantiac caosh. Adsho tantiašh bēdambo iquebi. Adebidi Nuquin Papan chiaid tantiec bēdamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quiash aidbēdi icsainquio icta. ²⁰ Nuqui bēdamboen tabadmequid Nuquin Papa nec. Aidēmbi matses icsamequidquio Satanas chedo comapenen cuidendac. Nēbi Satanasēn mibi icsametiadquio icsho tantiašhun: —Satanas yuamenquio icnuen Nuquin Icho Esusēn abibi tantiamequiopashun —mibi caimbi.

²¹ Nēmbō icquidtedishun mibi tantiec. Mibi caic: —Unēsquo iquec —quiosh Timoteyo ebēdtan Esusēn naid chuibenquidquio. Adembidi con matsesēn chiosh. Dusio caid yec Ason caid yec Sosipated caid yec quec adosh.

²² Pabadon —Naden na —cac nēid dada uaquidquio Tesio caid nebi. Esus tantiaquid icquin ēmbitsen mibi tantiēmbi. Padi. Aidedtsēqui ēmbimbo tantiaquin chuishun Pabadon chiaidbidi dada uaoaimbi.

²³ Nēidteditsen mibi caic: —Unēsquo iquec —quiosh. Nēidic Cayo caid. Aidēn shubun ushobi. Adnuc Esus tantiaquido iccuedednuec aton shubun pudued-puduedosh. Nēidic Edasto caid. Aid nēmbocquidon bedtequid bedbeneshun dayun uaquid nec. Nēidic nuquin utsibimboecquid Cuadto caid. Aideddishun mibi aden tantiosh. ²⁴ Doma yacnocquido mibi tantiaquin: —Nuquin Icho Esuquidistun bēdamboen isquin mibi bēdamboen tabad-mepashun —caimbi.

²⁵ —Nuquin Papa bēdambo iquec —canuna. Esuquidistu chuibanquin ēmbi: —Aid tantiašho Nuquin Papan mibi bēdambo icmendac —quequin chiacpadomboen Esus tantiamequin Nuquin Papan mibi bēdamboen tabadmetiadquio iquec. Ēndenquimboshē Esus tishabi icnuc matsesēn Esus chote bēdamboen tantiambo icpampic. ²⁶ Adnubien Nuquin Papan unēsambo icquin con tsusedpabo utsi-utsien Esus chote chuiquin dada uamepampic. Nēbi: —Esusēn naid chuisho tantiaquin ma nidaid utsi-utsiec yacno tabadquidon Esusēn

chiacpadomboen nanu —qeshun Nuquin Papan Esusën naid chuibenequido icmiac.
²⁷ Aden namec Nuquin Papa bēdambo iquec. Abipadquid utsi nibēdec. Ambi nati-
apimbo ictequid nibēdec. Abitedimbo tantiaquid nec. Nuqui cuidmenquoio icnuec abided
cuidadaid Esuquidistu tantiasho Nuquin Papan nuqui bēdamboen isequē. —Nuquin Papa
bēdambo iquec —canuna ēnenquoio icquin. Padi. Aidedi chuiquin dada uaombi.

CODINTO YACNOCQUIDON ISTE 1

Pabadon Codinto yacnocquidon iste dada uaid

¹ Pabado nebi. Nuquin Papa bunacpadomboen Esuquidistun ëbi chuibenecquid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec. ² Aïdbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quïash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

³ Matses icsaquid icsho cuidnushe quïash abided cuidadec Esuquidistu unëspanëdash, quequin abimbo tantïasho isun Nuquin Papan bëdamboen isaidquïo nuqui nec. Adquïdo yec utsibobëd bëdamboec ma tabadpanuna.

Mibi tantiaquin Nuquin Papa chuided-chuidedaïd

⁴ Mibi tantiaquin Nuquin Papa naden chuided-chuidedembi. Matses icsaquid icsho cuidnushe quïash abided cuidadec Esuquidistu unësaid chuibanac abi tantiaquido Codinto yacnocquido yanacsho bëdamboquidbimboecnuc mïmbi isec, quec bëdambo iquebi, Papa, quequin chuided-chuidedembi. ⁵ Aden Nuquin Papan bëdamboen isaido icquin ambi bëdamboen tantïamïaidobidi mibitedi nec. Matses icsaquid icsho cuidnushe quïash abided cuidadec Esuquidistu unësaid mibi Nuquin Papan tantïamïac nëbi mibitedi bëdamboec tabadquin Esuquidistu chuïbanoaic.

⁶ Esuquidistu tantïesabo iccondaidi ëmbi Esuquidistun naid chuïbanac tantiaquid mibitedi yanondac. Adquïdo yanash bëdamboec tabadquin ismequïdo mibitedi nec. ⁷ Adquïdo yec Esuquidistu choate caïmbudec Nuquin Papan abi bëdamboec tabadaïd tantïamïabi iccoshi quetiapimbo mibitedi iquec. ⁸ Aden abi bëdamboec tabadaïd tantïamequin Nuquin Papan mibitedi chïeshenquïo icmec ma Esuquidistupadquïd icnu quequin mïmbi caïmbudacpadquïo icpanuna aid padpïdec choanuc. ⁹ Adquïd mibitedi icmequin ambi Esuquidistubëd icquïdo icta caïdo ambi cuëmbanaido Nuquin Papan mibitedi icmïac. Adoshon mibi badedquïo Esuquidistupadquïd yanenquïocsho isun chïeshëbi, quesa Nuquin Papa icquin abi mibitedi bëdamboquïd icmebanec.

Esuquidistu tantiaquid cuëshëdacbimboec chushcananquïdo

¹⁰ Adembidi chuïnu. Tantiata. Esuquidistu tantiaquid nebi quec Nuquin Papan bëdambo icmïaïd ënacbimboec tabadenda. Adec tabadec Esuquidistu tantiaquid utsitedi tantïananec ma cuëshëdacbimboec chushcananesa yampanuna. ¹¹ Esuquidistu tantiaquido Codinto yacnocquido chushcananec quec. Chïdo, Quëdoen shubunöesh choquïdo nëmbo ëbi isec choshon aden chïec. ¹² Mibi onquïaïd chuïnu. Tantïa. Pabadon tantïamïaïd nebi, quec chushquïacbimboec utsi-utsïec tabadnubïen; Apodosën tantïamïaïd nebi, quec chushquïacbimboec utsi-utsïec tabadnubïen; Esuquidistun tantïamïaïd nebi, quec chushquïacbimboec utsi-utsïec tabadec.

¹³ ¿Esuquidistu tantiaquïdo cuëshëdmenuenda ëbïpadquïdon chuïbandïondash? Padenquïo. Naden chuïnu. Tantïa. ¿Matses icsaquid icsho cuidnushe quïash ëbïda cuidadec unëspanëda? Padenquïo. Adembïdï ¿Esuquidistu tantiaquid nebi quequin ëbi mïmbi chuïshodambi mibitedi acten mentobandïonda? Padenquïo. ¹⁴ Esuquidistu tantiaquid icsho Quidispobëdta Cayo aid daëdtsëqui naondambi quec tantiec tsadebi. ¹⁵ Utsï padenquïo iccondambi ma Pabadon ëbi acten mentondacsho aid tantiaquid nebi, quetiapimbo ma mibitedi icpanuna. ¹⁶ Ai, Estepanasën shubun icquïdobïdï acten mentondambi. ¿Utsïdambi acten mentoponda? Padenquïo iccondambi. ¹⁷ Èbi tantiaquïdo acten mentoban, Esuquidistun cainquïo yaqui Matses icsaïd bedshunec abided cuidadec Esuquidistu cüesten dectanac unëspanëdash quequin chuïbeneta, Nuquin Papan cac aden chuïbenec nebi. Èmbïbi tantïaïd chïenquïocquin ma matses icsaquid icsho cuidnushe quïash abided cuidadec Esuquidistu cüesten dectanac unëspanëdash quequin ma utsïbontsen tantïapanu queshun chuïbenec nebi.

Esuquidistu abitedi tantiaquïdquïo nadatïambocquin nabanquïdquïobïdï

¹⁸ Nuquin Papabëd icquïdo icmenuc matses icsaquid icsho cuidnushe quïash abided cuidadec Esuquidistu unëspanëdash quequin chïac, ¿Adpecta iquec? quequin tantïesa yec Nuquin Papa yacno puduedtiapimbo iquec. Adec adquïdo onquenubi nuquïen Nuquin

Papa yacno puduedtequido yec Nuquin Papan nadatiambocquin nac matses icsaquid icsho cuidnushe quiash abided cuidadec Esuquidistu unëspanëdash quequin tantiec. ¹⁹ Abi yacno puduedtemaido chuiquin Nuquin Papan dada uamiampid nad iquec:

“Comapenen tantiaquidon ambibi dadpen tantiaidtedi ëmendambi.

Adquidon tantiatipimbo yacpadembi natiamequin nabanendambi,”

quequin Nuquin Papan dada uamiampid aidëmbi nëbi naid nec.

²⁰ Esuquidistu tantiesa ambibi tantiaidtedi naimëdan ðmitsimbo adquido tabadpec? ðNidaid abubëd aidën icquidtedimbo mitsipadquidquio icpec? quequin isbanquin, Nadquio icpec, quequin comapenen adquidën tantiec. Aden tantiashic ambi tantiaid Nuquin Papan ëmiac ðmitsimbo adquido tabadpec? ðMidaquidën bëdamboen tantieque? Adquidën tantiaid tantianu, quec onquecuededquid ðmitsimbo tabadpec Nuquin Papan aidon tantiaid ëmiac? Adquidon dadpen tantiaquimbi matses icsaquid icsho cuidnushe quiash abided cuidadec Esuquidistu unëspanëdash, quequin utsin-utsinquien tantiauidec. ðAdsho isun Nuquin Papan abi yacnoda puduedmepadic? Padenquio iquec. ²¹ Nuquin Papan nadatiambocquin nac matses icsaquid cuidnushe quiash abided cuidadec Esuquidistu unëspanëdash quequin chuisho ambibi dadpen tantiaquidon tantiauidec. Èmbi tantiaidpenquio tantiatipibi quequin tantiatipimbo iquec. Adquido tantiatipimbo icnubi ëbi yacpadquidon Esuquidistu chuibanac abi tantiaquid utsibo yanec. Nuquin Papa yacno puduedtequidtedi adquido nendac. ²² Adquidon aden tantianubi Nuquin Papan nadatiambocquin nabantequid iste bunquin isadaidbon tantiauidec. Quidieco matsesëmbien, Èbi ënden tantiec papuduedaid daëd uanu queboedëmbi Nuquin Papan chiaid tantiauidoaic. ²³ Adec tabadnubi matses icsaquid icsho cuidnushe quiash abided cuidadec Esuquidistu cuesten dectanac unëspanëdash, quequin ëbi yacpadquidon chuibanoc. Adoaquien, Nuquin Papan chomiaid nec, quequin isadaidbon cuesten dectanenquioctsenëdash, quequin tantienquio yec tabadec. Isadaidpembo, Esuquidistu mimbi chuibocëdëmbi tantiacpadpenquio iquec. Adoac mimbi Esus chuibanaid ëmbi ënden tantiaidbëda daëd uatiapimbo iquebi quec tabadec. ²⁴ Adquidon tantiaidnubi isadaidbo utsi-utsiec adecbidi isadaidpembo utsi-utsiec Nuquin Papan cuëmbanaido icquin naden tantiec: Nuquin Papan tantiampicpadquiequi matses icsaquid icsho cuidnushe quiash abided cuidadec Esuquidistu cuesten dectanac unëspanëdash. Aidi matses icsaquid icsho cuidnushe quiash abided cuidequid icmequin Nuquin Papan nadatiambocquin naid nendac, quequin nuqui tantiec. ²⁵ Abitedi tantiaquidquio icquin ambi abentsëc tantiaid Nuquin Papan chiac dadpen tantiaquidën dëniactiapimbo iquec. Adecbidi, Nuquin Papan nadatiambocquin nainquiocquin bëdiactsëc natsëcnubi adomboen tantiaquin matsesën dëniactiapimbo iquec.

²⁶ Utsibo, ðmitsipadquidquio mibi icponda? Nadquid mibi icpondaque. Chuinu. Tantia. Daëdpactsëc tantiaidsëcquido mibi icpondac. Namequidpenquio mibi icpondac. Chuiquid dapan bacuëpenquio mibi dadpen icpondac. Adquid icsho Nuquin Papan mibitedi tantiaquin, Con bacuë caid nec, quequin mibi cuëmbanodash. ²⁷ Ai, daëdpactsëc tantiaidsëcquido Esuquidistu tantiaquido icsho Nuquin Papan cuëmbanaido mibitedi nec. Adquid ambi cuëmbanaido icnubi dadpen tantiaquid iquequi Esuquidistu tantiesa icsho Nuquin Papan cuëmbantemaid nebi quequin tantiec natiaic ma shubiquiopanuna. ²⁸ Adembidi utsibon tantiauidtsaido Nuquin Papan cuëmbanaido neoaic. Adecbidi, ðAda matses utsi iqueque? Isnu quenquiocquin matsesën tantiambo yaid Nuquin Papan cuëmbantequid icnuc ²⁹ ëmbi comapenen tantiaquin nabansho Nuquin Papan cuënoshi quequin matsesën chuitiapimbo iquec. ³⁰ Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papa bëdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided cuidadec unësaid isun Nuquin Papan cuidiapimbo nuqui iquec. Icsaisa icsho Nuquin Papan aid bëdamboen isquin adomboembidi nuquitsen isoaic. Adecbidi, aidi abi yacno bëyucanec puduedash tsadacpadec adecbidi nuquitsen tabadoindac. ³¹ Aden nuqui tantiaquin Nuquin Papan dada uamiampipaden, Èbibi bëdambo ictiapimbocquid icsho mimbi bëdambo icmiaid nebi, Icho, quequin ëmbi naid chienquiocquin Esusën naidquio chuibanuna nuquitedi.

2

¹ Adembidi chuinu. Tantia. Mibi yacno nidshun dadpen tantiembi quenquiocquin daëdpactsëqui cuembo chuibanondambi. ² Esuquidistubëdta abi cuesten dectanaid chuinu quequin aiduidi mibitedi chuibanondambi. ³ Codinto yacnocquido dacuëdampambo iquec quequin uëdëequimbi mibi chuibanondambi. ⁴ Èmbibi dadpen tantiacpadomboen chuibanenquioccombi. Nuquin Papan Mayanën tantiamiacpadomboen ëmbi chuibanubi aidëmbi

nadatiambocquin mibitedi tantiamiondash ⁵ ma Pabadon tantiamiacpadomboen tantiamioshi, quetiapimbo mibitedi icpanuna.

Nuquin Papan Mayanën tantiamiaid

⁶ Nuquin Papan tantiamiac comapenen tantiaquin ëbi yacpadquidon chuibanoaic. Aden chuibeniac Nuquin Papan chiaid tantiabene papuduedquidon bédamboen tantiec. Aden Nuquin Papan ëbi yacpadquid tantiamiaido matsesën ambibi comapenen tantiacpaden chuibanesambo nuqui nec. Adembidi matses chuiquid dapabon comapenen tantiacpaden chuibanesambo ëbi yacpadquido nec. Matsesën dadpen tantiaid uesadendac. ⁷ Adnubien Nuquin Papan comapenen tantiaquin, Esuquidistu chuibeneta, quenquiocpampidëmbi nëbi, Chuibeneta, cac Esuquidistu ëbi yacpadquidon chuibanec. ⁸ Ushë uabi tabadquin matses bédambo icmequid com mado nendac, quequin Nuquin Papan tantiapampic. ⁹ Esuquidistu nuqui bédambo icmetequid Nuquin Papan chomiasho adquid nec quequin chuiquid dapabon tantienquiocpanédash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanengui ictsenédash. ¹⁰ Aidpadquid chuiquin Nuquin Papan ëndenquimboshë dada uamiampid nad iquec:

“Nuquin Papan abi tantiaquido ambi cuëmbanaido abi yacno tabadmenun nacnenaïd bēda tantiesan istiapimbo iquec.

Adecbidi Nuquin Papa yacno nadquio ictsiash, quetiapimbo matses iquec.”

¹¹ Adnubien Nuquin Papan Mayanën Nuquin Papan abi yacnoshon bédamboec tabadte nacnenaïd iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquiec tabadaid nuqui tantiamieoaic. ¹² Matsesën ambi tantiacpaden chiabi yac utsin tantienquio iquec. Adembidi Nuquin Papan ambi tantiacpaden chiambocnoc matsesën tantiatiapimbo iquec. Abipadquid aton Mayanënuidquio tantiec. ¹³ Con mayan ëbipadquidquio menenu quetiapimbo matses iquec. Nuquin Papambien abipadquid aton Mayan nuqui menec ma aidënquio abi yacno bédamboec tabadaid nuqui tantiamepanuna. ¹⁴ Aden aidënquio tantiamiac adomboembidi ëbi yacpadquidon chuibanoaic. Embibi tantiacpadpenquiocquin Nuquin Papan Mayanën tantiamiacpadomboen chuibanembi. Adomboembidi ëbi yacpadquidon chuibanoaic. Aden Nuquin Papan chiaid chuibanac Nuquin Papan aton Mayan meniaïdon tantiaquiec. ¹⁵ Nuquin Papan abipadquid meniacmaïdon aidën chiaïd tantiatiapimbo iquec. Aden Nuquin Papan Mayanën chiaïd tantiatiapimbo icquin Nuquin Papan matses bédambo icmenu qeshun Esuquidistu chomiash matses icsaquid icsho cuidnushe quiash abided cuidadec cuesten dectanac unëspanédash quequin aidon tantiatiapimbo icoaic. Embi tantiacpadomboen Nuquin Papan chienquio iquec, quendac Nuquin Papan abipadquid meniacmaïdo. ¹⁶ Nuquin Papan Mayanën tantiamiaïdombien naden utsibo tabadaïd tantiec. Matses bédamboec tabadsho isun, Nuquin Papan Mayanën tantiamiacpadec tabadquidquio nec, quequin nuqui tantiec. Adembidi utsi icsamboec tabadsho isun, Nuquin Papan Mayanën tantiamiacmaïd nec, quequin nuqui tantiec. Nuquin Papan Mayanën Nuquin Papan chiaïd tantiamiacmaïdon nuqui naic tabadaïd isash Nuquin Papan chiacpadquiec tabadquid nec quetiapimbo iquec adquid. Adecbidi Nuquin Papan chiacpadpenquio yec tabadquid nec quetiapimbo Nuquin Papan Mayanën tantiamiacmaïdo iquec. ¹⁷ Nuquin Papan chuimiampid nad iquec:

“Nuquin Papa Abia Yampid yec abitedi tantiaquidquio nec.

¿Adquid Nuquin Papa icsho abi chuiquin ismequid mitsicquid icpec? Adquid nibèdec.”

Nuquin Papan tantiacpadomboen aton Mayanën tantiamiaïdo icquin Esuquidistun tantiacpadomboen nuqui tantiabane.

3

¿Esuquidistu tantiaquid utsi icsambo iquec, quecta ique?

¹ Adembidi chuinu. Adembi tantia. Mibi yacno tabadquin Nuquin Papan chiaïd tantiabenebicquid mibitedi icsho daëdpactsëc chuibanondambi. Codinto yacnocquido bacuë uidënabi yacnimboecquido nec qeshun Nuquin Papan chiaïd daëdpactsëc mibitedi chuibanondambi. ² ¿Nëbi tishaidënda pambid pepec? Padenquio. Mibitedi adquid-bimboecsho tantienquio icnushe qeshun Nuquin Papan chiaïd daëdpactsëc chuibanondambi. Enden iccondacpadquiobi mibitedi adquibidi icoapec. ³ Esuquidistu tantiesia yec tabadnacpadec mibi tabadoaic. ¿Esuquidistu tantiaquid utsi icsambo iquec, quecta ique? Nuquin Papan Mayanën tantiamiacmaïdpadquid yec nëishec chushcananec mibi. ⁴ Pabadon tantiamiaïd nebi, quec utsi-utsiec chushquenubien; Apodosën tantiamiaïd nebi, quec chushqueoaic utsi. Adece chushquec Nuquin Papan Mayanën tantiamiaibi yacnimboecquido mibitedi nec.

⁵ ¿Mitsipadosho mimbi ëbi isponda? Ademibidi, ¿Mitsipadosho mimbi Apodos isoaponda? ¿Ëmbembidambi mibi chuibanponda? ¿Ambembida Apodosëntsen chuibanpanëdash? Padenquio. Tantia. Chuinu. Nuquin Papan chiacpadomboen Esuquidistu chuibenequid ëbi daëdi nebi. ¿Pabadon chuibanubi Nuquin Papan Esuquidistu tantiamiondashi quequinda mibitedishun tantiape? Ai, ëmbi adobanubi Nuquin Papan Esuquidistu mibitedi tantiamiondash. ⁶ Tiedën caniquid ëshë siabi yac dëyuctiapimbo yacbmboecquid icquin Codinto yacnocquido Nuquin Papan chiaid dadpen tantiatiapimbo iquec, qeshun matses icsaquid icsho cuidnushë quiash abided cuidadaid Esuquidistu nec quequin adquid chiaidba mibitedi chuibanondambi. Yuecash Apodotsen mibi yacno chopanëdash. Adec choshon tiedën caniquid dëyuctsash tanunquiocnoc canitiapimbo yacbmboecquido Codinto yacnocquido icnushë qeshun Apodosën chuibanoapanëdash. ⁷ Tied nitsinshun taneshcain tiedën caniquid canimesa icho nec. Adquiobidi Nuquin Papan chiaid chuibanquid matses tantiamesa nec. Nuquin Papambien tantiamec. ⁸ Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Ademibidi con tied taneshcaic cho cac nashunoaic. Ademibidi abi neshcashunquid cuidoaic. ⁹ Nuquin Papan chiacpaden Esuquidistu chuibenequid Apodos nendac. Ademibidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tiedbimboecquid mibitedi nec. Nuquin Papan shububimboecquidbidi mibitedi nec.

¹⁰ Nuquin Papa tabadte shubu uashunun buintad teshun abia tabëcacbmboen Esuquidistuba chuibanondambi ma matsesën tantianueshun. Buintad tabëcacbmboen Esuquidistu ëmbi chuibanan utsibon adomboembidi aiddibi chuibeneoaic. Bëdamboen chuibeneneuequin ¿Nuquin Papan tantiacpadomboendambi chuibaneeque? Tiantianu, qeshun Nuquin Papan chiaid isted-istedtiad ambi chuibeneta caidon. ¹¹ Shubu uashunquidën shubu uidën uatequid nitsinan shubu uashunquid utsibo adomboen tabëcoanu quesa nec. Adquiecbidi Nuquin Papa tabadte uashunu qeshun buintad tabëcacbmboen Esuquidistu ëmbi chuibanan adquid nec, quequin utsi chuibantiapimbo utsibon iquec. ¹² Buintad tabëcaid tabadachimboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic. ¹³ Adashien yuecash Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac. ¹⁴ Aden nëdëncuquin tanac Nuquin Papan chiaid bëdamboen chuiquidon chuibanac Esuquidistu tantiaquidombo yec buintad taidacmaid nidachimboec abi nidendac. Adsho isun abi bëdamboen chuibanquido Nuquin Papan menetequid nendac. ¹⁵ Adomboembidi utsibon abipenquio icnuc chuibanac Esuquidistu tantiatiapimboecquido taidaid bescashun secachimboen secatequid nendac. Adnubi abipenquio icnuc chuibanquido taidtsenachimboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaïdo nendac.

¹⁶ Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatiapimboda mibitedi icpe? ¹⁷ Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ënenquiocquin comapenen cuidendac. Abi tabadtequid Nuquin Papan cuëmbanaido ambi bëdambo icmëbanaidobidi nec. Esuquidistu tantiaquido Nuquin Papa tabadtequid nec caindac.

¹⁸ Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuc Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota. ¹⁹ Esuquidistu tantiesan tantiacpadquiec tsadquidën ëbi yacno tabadte tantiatiapimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ënabi icnubi icho unësendac.” ²⁰ Adecbidi: “Adquidën tantiaidbidi ënëdtequid nec,” quequin Nuquin Papan tantiec. ²¹ Ad icnuc, Pabadon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. ²² Aidën bacuëbo icquin mibitedishun con utsi ëbi caic. Ademibidi Apodotsen mimbi adoaic. Ademibidi Petedotsen mimbi con utsi caoaic. Nidaid abubëdta uashumbic aidënquiocquidtedimbo uabanquid yec aiteddishun icho Nuquin Papa nec. Adecbidi aton bacuë mibitedi icnuc aiteddimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aitedi mitsanabidi nec. ²³ Mibitedishun icho Esuquidistu nec. Esuquidistun icho, Edoen, aton Papa nec.

Esuquidistu chuishunquido

¹ Icho Esuquidistu chuibenecuid Pabado nec. Adquidbidi Pabado yacpadquidtedi nec, quequin mimbi tantiata. Ènden Abia Yampidèn Nuquin Papan Esuquidistu chuibeneta, quenquiocpamidèmbi nèbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiata. ² Nuquin Papan, Esuquidistu chuibeneta, cacpadomboen niaquenquiocquin èbipadquidon chuibenetiad. ³ Nuquin Icbon, Èbi chuibeneta, caid èbi icnuc ¿Pabodon bédamboenda chupec? quequin tantianuna, ¿mimbi cactabi dacuèdpe? Padenquo. Adembidi, Nuquin Papan chiacpadomboen chiombi, quetiapimbo iquebi. ⁴ Ambi chiacpaden niaquenquo iccombi, quetiapimboconobi abitedi isquidquo abitedi tantiaquidquo Nuquin Icho icquin èbi chuibanec bédamboec tabadsho isun aidèn chiendac. Adembidi èbi chuibanec icsamboec tabadsho isun chiendac. ⁵ Icsamboen natsiash, quec tsadenda. Nuquin Icho choashun icsamboecuid cuidendac, quequin cainta. Aidèmbi choashun matses icsamboen ismec tabadaid abi ompoec tabadaidbèdta chuibanshun cuidendac. Adembidi, matsesèn èquèducshun tantiaid chuibanquin cuidendac. Adembidi, utsibo bédamboec tabadaid chuibanquin chuiòaindac, Bédamboen mimbi naoc, quequin.

⁶ Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantiabanec, Pabadopadquid utsi nibèdec, quesa ma icpanuna. Adecbidi, Apodospadquid utsi nibèdec, quesa ma utsibotsen icpanuna. Nuquin Icbopadquid utsi nibèdec, quequin tantiec tabad. Adecbidi, Codinto yacnocquidopadquid utsi nibèdec, quenda. ⁷ ¿Mitsicquidèn adquid mibi icmebampashba? ¿Abembida mibi adquid icpeba? Nuquin Icbon tantiamiac nabanash, ¿atotsi quiash, èmbi tantiacpaden naombi, quepe mibi?

⁸ Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nèbi mibitedishun tantiauidpec. ¿Adpecta Nuquin Papan bédambo icmiaido tabadpadic? Nuquin Papa yacno ènden puuedacimboc yash chuiquid dapa nebi, quiacimboc mibitedi tabadpec mibi Esuquidistu chuibanquidtedi adec tabadiapimbo icnubi. Mibitedibèd èbi yacpadquido èbi chedo ènden chuiquid dapa yacpadquido icmiondac, Cuishon, quetsiabi. ⁹ Adecbidi, Bédambo iquebi, quec mibi tabadnubi naden tantiec tsadebique. Tantiata. Chuinu. Èmbi chuibeneta caido unèsequè. Is, Nuquin Papa quiacimbocnuc ambi abi yacnoshon uaido mayan bédabobèdttan matstedishun isbededacimbocquid nebi, quequin èmbi tantiec tsadebi aden isbededec aid tabadenquionobi. ¹⁰ Esuquidistu chuibenecuid chuibancho tantiauidash, Pabiate icsachitashien nec, quequin mamènshumbededashic Codinto yacnocquidon ambibi tantiaquin chuibancho tantiaquidquo nec, quepec Esus tantiesabo. Adecbidi, utsibo dacuèdampambo iquec, quiaish uèdèequin Esuquidistu chuibenecuid Nuquin Papan chiaid chuibanubi cuesambo yacimboc mibitedishun chuibanpec. Esuquidistu tantiesan yuedaido mibitedi icnubien utsin yuedtemaid Esuquidistu chuibenecuid nec. ¹¹ Esuquidistu chuibenecuid yequi pistèc petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactècquid dasiuidquid nebi. Adquiecbidi Esuquidistu chuibenecuid utsibo iquec. Utsin mèyanded-mèyandedaid nebi. Quenenash iquenquo icquin capucuenquin Esuquidistu chuibenec nebi. ¹² Con pete bednequin shubumpi nacenquidquo iquec chonoadsho isquin utsibon mamènshunaid nebi. Aden mamènshunubi chonoadebi. Adecbidi Pabado icsambocquid nec, quequin chiaqui aid cuidenquiocquin bédamboen ista, Papa, quequin aid chiembi. Utsin mèyanaqui dayacquo yec cacuidanesa nebi. Adquidbidi Esuquidistu chuibenecuid utsibo nec. ¹³ Adembidi, utsin èbi mua uaqin chiaqui cuidnanenquiocquin bédamboen chiembi. Adembidi èmbi Esuquidistu chuibenecuid icsactècquid nec, quequin ambi secanu caidimbocnuc èbi ispec. ¹⁴ Adecbidi, Bédambo iquebi, quec mibitedi tabadnubi mèyamboc tsadebi. Adec èbi tabadaid èmbi chiac Codinto yacnocquido unèsquio yampec, quenquiocquin èbi tabadaid mibitedi tantiamenuen dada uaombi. Pabodon chiaid abimbo iqueque. Bédamboec tabadnuna mibi camenuen dada uaombi, con bacuèbo. Mibi tantiac unèsquio iquec. ¹⁵ Mibi chuibanquid utsi dadpen nèbi icnubi Esuquidistu èmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid èbia yanshun Esuquidistu chuibanac mibitedi Esuquidistu tantiaquido yampondac. Èmbi chuibanacpaden chiaid tantiaquido con bacuèbo èmbi caidtedi nec. Adquid mibitedi icnuc papa nebi. ¹⁶ Èmbi nacpadomboen naic tabadta quequin mibitedi chiembi. ¹⁷ Mibi èmbi nacpadquiecbidi tabadte tantiamenuequin Timoteyo mibi yacno nidmembi. Aidi èmbi chuibanac Esuquidistu tantiaquid icpondash. Adquid iccondacsho èmbi con mado caid aid nec. Aidi Esuquidistu tantiaquidquo icquin utsi-utsiec yacnoshon èmbi chuibenecuid padomboen chuibanocquin Timoteyon mibi padpiden tantiamendac. Esuquidistu tan-

tiaquid utsibo iccuededacnoshon chuibanacpadomboen ismequin chuibanquid aidbidi nec.

¹⁸ Mibi utsi-utsiec Pabado choainquio iquec quequin abimbo tantiacbimboen chuibanec. ¹⁹ Aden adquidon chuinubi Nuquin Papa bunuc badedquio mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi. ²⁰ Nuquin Papa tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec. ²¹ ¿Mibi yacno puduedshun atotsimbi adquid napeque? Chui. ¿Cuesnu quiacimboendambi adquid comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

5

Esuquidistu tantiaquid ambi chudtemaid chudquid cacumeta caid

¹ Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpembo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. ² Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash unësquio icquimbi aidi cacumepatecnëdan. ³ Mibëd ictiapimbo yequi mibëd yacimbocquequin dada uaquin icsaquid cacumetiadquidi mibi nenëdac quequin chuibanombi. ⁴ Esuquidistu tantiaquid nuquitedi nec, quec mibitedi iccuededec Nuquin Icho Esuquidistun tantiamiacpadomboen Pabadon naden natsiash quequin ⁵ icsaquid nidme ma Satanasën mëyanac icsa bunesa yanacsho Nuquin Icho Esuquidistu choashun ma abi yacno yuedpanuna.

⁶ Esuquidistun ënden bëdambocquid icmiaidtedi nebi, quenda. Icsaquid abentsëc mibëd tabadquin abi icsamboec tabadaid ismiac acte maisacimboc mibitedi adquibidi ictsiac. ⁷ Ënden mibitedi Esuquidistu tantiesabo yec icsaquin ismec maisaccondacpadec maismane qeshun icsaquid nidmeta. Ëbi cuidmenquiocnoec abided cuidaced Esuquidistu unëspanëdash, quiash aid icsaisa yacpadquiec tabadta. ⁸ Aden ambi naid tantiec icsaondacpadpenquo yec ma tabadpanuna. Aidquio tantiembi, quec abimbo tantiadonec ma tabadtenepanuna.

⁹ Ambi chudtemaid chudquidbëd iccuededenda, quequin ënden dada uaondambi. ¹⁰ Esuquidistu tantiesabëd iccuededenda, quenquiocquin Esuquidistu tantiaquid adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesa dadpen iquec. Adecbidi, utsin na bunquin mua uain bedquid dadpen iquec. Adecbidi, matsesën Nuquin Papan uaidbimboecnuc nacnenaid tantiaquid Esuquidistu tantiesa dadpen iquec. ¿Adquido ismane quiash mitsimbo mibi tabadpe? Nuquin Papa yacno adquid nibëdec. Nuquin Papa yacno nidash icsaquid isenquo yec mibi tabadendac. ¹¹ Esuquidistu tantiaquid nebi, quequid icsadenesho isash adquidbëd iccuededenda caimbi. Esuquidistu tantiaquid nebi, qeshun ambi chudtemaid chudquin ënesabëd iccuededenda. Adecbidi, muaquin bedbanquidbëd iccuededenda. Adecbidi, Esuquidistu tantiaquid nebi, qeshun matsesën Nuquin Papan uaidbimboecnuc nacnenaid tantiaquin ënesabëd iccuededenda. Adecbidi, Esuquidistu tantiaquid nebi, qeshun ambi tantiacpadpenquiocquidën chuisho mamëshumënquin ënesabëd iccuededenda. Adecbidi, Esuquidistu tantiaquid nebi, qeshun cuesanquin ampequin ënesabëd iccuededenda. Adecbidi, Esuquidistu tantiaquid nebi, quiash ëmbi chuibocpadquid icsaquidbëd iccuededenda. Adembidi aidobëdtan penda.

¹² ¿Esuquidistu tantiesa abi icsaid chuiquin cacumeta, quequindambi chuipe? Padenquo. Esuquidistu tantiaquid mibëd icquid icsadenequin ënenquiocsho isun Nuquin Papan chiaid comapenen tantiaquin mibi icsaid ënta, quequin chui. ¹³ Nuquin Papambien Esuquidistu tantiesa icsaid chuiquin cuidendac. Mimbi Esuquidistu tantiaquid icsadenequid cacumeta.

6

Ëbi chushcananaid tantiashun mimbi tantiacpaden chui caid

¹ Esuquidistu tantiaquid daëd nëishash chushcananec, queoac. Adquid chuinu. Tandia. Nëishash chushcananash Esuquidistu tantiesa yacno nidshun, Ëbi chushquiaid chuisho tantiashun ¿midapaden mimbi chieque? Ëbi chui, quequin mimbi chuipec. ¿Atotsi quiash Esuquidistu tantiaquid yacno nidiadquidi Esuquidistu tantiesa yacno nidshun mimbi adquid chui, cape? ² Yuecshun, ¿Midapaden mimbi Esuquidistu tantiesan naid chieque? Tantanu. Chui, abi tantiaquido Nuquin Papan caquien ¿nuqui chiacpaden aido Nuquin

Papan cuidendac, quequin tantienquioda mimbi icpe? Yuecshun tantiesan naid chiembi, qeshun ¿Atotsieshun Esuquidistu tantiaquidbéd chushcananash tantiesa yacno nidshun mimbi chuibampe? ³ Yuecshun, ¿Èmbi uaido mayanèn naid midapaden mimbi chieque? Tantaranu. Chui, Nuquin Papan caquien ¿nuqui chiapaden aido cuidendac, quequin tantienquioda mimbi icpe? ⁴ Adquidon naid èmbi chiapadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daéd nèishash chushcananasho tantiashun, Esuquidistu tantiesa yacno nidshun, Èbi chushquiaid chiacsho mimbi tantiacpaden èbi chui, mimbi capec? ⁵ ¿Esuquidistu tantiaquid utsibo nibédpecta ictic? ¿Esuquidistu tantiaquidèn icsamboen chuinushe qeshunda Esuquidistu tantiesa yacno nidshun, Èbi chushquiaid chiacsho mimbi tantiacpaden chui, mimbi capec? ¿Bédamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiape? ⁶ Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesa yacno nidshun utsibéd chushcananaid mimbi chieque. Adenda.

⁷ Èbi chushcananaid èbi daédshun chiacsho tantiashun mimbi tantiacpaden chui. Tantaranu, quequid mibéd icnuc Nuquin Papan bédambocquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nèishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiash nèishash chushcanampe? ⁸ Cuidnante bunec mibi adpec. Naden natiad. Èbéd chushcananquid Esuquidistu tantiaquid nec, quec abi cuidte bunenquo yec abi yacno nidshun abi icsaboed tantiaquid Nuquin Papan chiaid chuiban.

⁹ ¿Icsadenequin ènesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquiec tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin ènesa Nuquin Papa yacno yuedtemaid nendac. Adembidi, Nuquin Papan uaidimboecnuc nacenaid tantiaquin ènesa abi yacno yuedtemaido nendac. Adembidi, ambi inacmaid chudquido abi yacno yuedtemaido nendac. Adembidi, aton bènèpen chudmequin ènesa, adecbidi dada daéd chichudnanquin ènesa, adecbidi chido daéd dachudnanquin ènesa Nuquin Papa yacno yuedtemaido nendac. ¹⁰ Adembidi, ampequin ènesa Nuquin Papa yacno yuedtemaid nendac. Adembidi, muaquin utsin na bedquin ènesa, adembidi, ambi tantiacpadpenquiocquidèn chuisho mamènshunquin ènesa, adembidi, cuesunianquin ampequin ènesa. Adquido Nuquin Papan ambi abucshun nacenaidèn tabadtemaido nendac. ¹¹ Ènden mibi adquo iccondaiddi nèbi utsi-utsiec padenquo icsho isash Nuquin Papa mibi cuidenquo yec mibi icsaid bèpiscudac. Adembidi, Nuquin Papan mibitedi bédambo icmehanuequin abipadquid aton Mayan mibitedi meniac. Aidi meneshun Esuquidistu icsapenquiocquid isacpaden Nuquin Papan mibitedi isoaic.

Èmbi chudtemaid chudmane qeshun adquid isuidteneta quiaid

¹² Èmbi natemaid naden nata caid nibèdec qeshun naic bédambocquid ictiapimbo iquebi, quiaish padenquo yec tsadebi. Aden nabanquin èntiapimbo icmane quiaish padenquo iquec tsadebi. ¹³ Matsesèn chebudaidd pucu yacno budash dada bédambo icmianquid nec. Yuecash matsesèn dada chodquetequid nendac. Padnuen, èbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquidbéd Nuquin Papa iquec. Ad icnuc mimbi chudtemaid chudquid icta, quenquo Nuquin Papa icpampic. Ambi chudtemaid chudquid Nuquin Papa tabadte ictiapimbo iquec. Aden naquid chian anèdènquequid nèsecatequid nendac. ¹⁴ Nadatiambocquin Esuquidistu Nuquin Icho Nuquin Papan uincuemepanédash. Aidèmbi nuquitsen abi tantiaquid icsho uincuemendac. ¹⁵ ¿Abi tantiaquid icquin, Esuquidistubéd daédash tabadquid nebi, quequin tantienquioda mimbi icpe? Ai, aiddèdi daèdtequid nuqui nec. ¿Adquidbéd daédashtabi icsaquidbéd daèdoape? Padenquo iquebi. ¹⁶ ¿Dadpen chudmequid chudash daèdacimboecquid nec, quequin mibitedishun tantienquioda icpe? Aid daèdi dada abentsèc yacimboecquid nec, quequin Nuquin Papan dada uamiampid nec. ¹⁷ Nuquin Icbobéd daèdaiidien Icbon tantiacpadquiec tabadquid nec.

¹⁸ Èmbi inacmaid chudmane qeshun chido utsi isuidteneta. Padenquo yec icsaquidbéd daèdquid mibi iquendac. Ambi chudtemaid chudquid aton namibéd èquèducùesh daèdaid nec. Nami unamanucùesh icsaid namibéd daèdtiapimbo iquec. ¹⁹ Nuquin Papan Mayan tabadtequid Esuquidistu tantiaquido nec. ¿Nuquin Papan èbéd tabadmiad abipadquid nec, quequin tantienquioda mibitedishun icpe? Èbibi nuquin icbo nec, quetiapiimbo matses iquec. Adecbidi, Con icbo nibèdec. Èmbi tantiacpaden naimbi, quetiapiimbo mibi iquec. ²⁰ Nuquin Icho cuesten dectanac matses icsaquid icsho cuidnushe quiaish abided cuidadec unèsquid Nuquin Papan icmiac abi tantiaquid yec aidèn na mibitedi nec. Adoaidi ambi chiacpaden ismec bédamboec tabadteneta.

7

Dada chidobēdi daēdaid

¹ Nēbi mimbi dada uabed isombi. Aid isun ěmbi tantiacpaden chiembique. Tantiata. Chido inquid dadatedida ictiad quequin mimbi tantiapec. Padnuen, Chido bendenquio iquembi, qesho chido inta cainda caimbi mibi. ² Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiaish chido abentsēc inquid dada ictiad. Adecbidi dada abentsēcshun inaid chido ictiad. ³ Con chido ěmbi inaid nec, quequin aiduidi chudquid icta. Adecbidi con bēnē ěbi inquid nec, quequin aiduidi chudmequid chido nec. ⁴ Chidon dada daēdash aton bēnēn dadabidi nec. Adecbidi dadan dada chidon dadabidi nec. ⁵ Aid daēdi daēdabi yacimboec, Padi, quenda. Adboedi, Nuquin Papa chuinuec nēidtedi ushquin padenquio nuqui iquec, qeshun ěnta. Aidtedec ushquin padenquiocshon, ěmbi yuen ěntiapimboesho isun Satanasēn icsamenushe qeshun padpiden nata. ⁶ ěnta quenquio iquebi. Nēidtedi ushquin padenquio iquembi quiaish mibi daēdi aidtedecuidi ushec ěnēnta caimbi. ⁷ Padnuen, chido inesa ěbi yacpadec dadatedi icpashun. Dada utsi-utsiec Nuquin Papan icmiacpaden chido inquid icnubi utsi-utsiec chido inesa iquec.

⁸ Chido inesa ěbi tabadacpadec dada utsitedi tabadec bēdambo ictsiash. Adecbidi dadan inaidpen bēdambo ictsiash chido. Dada bēnua adecbidi bēdambo ictsiash. ⁹ Adquid icquin isuidtiapimbo yec comapenec chudte bunquin chido inta. Adecbidi chido bēnua dada isuidtiapimbo iquec dadan inaid icta.

¹⁰ Daēdash niamēnenda. ěmbibi chienquiocquin Nuquin Icbon aden chuineđadacpadembi chiembique. Tantiata. ¹¹ Min bēnē nianash utsin inaid iquenda. Dadan inaid icnu quec mimbi niamboedēn inaid icoata. Adembidi chido inquid min chido bunenquiocquin abi icsaid dada uashun ismequin nidmenda.

¹² Nēbi Nuquin Icbon naden chuiban cainquiocnobi ěmbia Esuquidistu tantiaquid icquin Esuquidistu tantiaquid utsibo ěmbi chuibocpadembi mibitedi chuiioambique. Tantiata. Dada aton chidobēdi Esuquidistu tantiesa icboedi aton bēnē Esuquidistu tantiaquid yanuc aton chido padenquio yec, Con bēnē nianu, quenquio ictsiash. Adquid icsho isash. Con chido icsambocquid nec, quenquio yec abēdi tabadquid bēnē. ¹³ Adecbidi chido utsi aton bēnēbēd Esuquidistu tantiesa icboedi aton chido Esuquidistu tantiaquid yantsiash. Aden Esuquidistu tantiaish, Con bēnē icsambocquid nec, quenquio yec bēnē nianec nidesa chido. ¹⁴ Esuquidistu tantiabi yec daēdacpadec aton chido Esuquidistu tantiaquid yanash aidbēd abentsēc yacimboec tabadec bēnē. Adec bēdamboec tabadsho isun Nuquin Papan chido bēdamboen tabadmequin bēnētsen bēdambo icmebampec. Chido Esuquidistu tantiaquid icquin aton bēnē padenquiocnobi aton bacuēbo tantiec, Icsambocquidēn bacuēbo nec, utsibo quenushē quiaish bēnēbēd abentsēc yacimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuēbo tantiec aton chido Esuquidistu tantiesabēd tabadquid dada. Adec abentsēc yacimboec tabadsho isun, Bēdamboquidēn bacuēbo nec, quequin utsibon ispec.

¹⁵ Utsimbic ambi bedboedēn aton chidon Esuquidistu tantiaisho isun aton chido nidta catsiash. Adoaquien, Mibēd tabadte bunebique. ěbi nidmenda, quetsiash chido bēnē caic. Adoaqui, Nidec nid, cac cacuidenquio yec nidquid chido. Chido utsibic aton bēnē Esuquidistu tantiaquid yansho isash, Mibi nianu, quetsiash. Adoaquien, Mibi unēsquio iquec, quetsiash bēnē. ¹⁶ Adnubien dadan nidta caid aton chido Esuquidistu tantiaquid yec bēdamboquid icsho isash Esuquidistu tantiaquidtsen yantsiash bēnē. ¿Adquid yantsiash, quequin tantienquioda mimbi icpe? Adecbidi, chidon nianu caid aton bēnē bēdamboquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimbi icpe?

¹⁷ Mibi Esuquidistu tantiaquid yanash Nuquin Papan tantiacpadec tabadnu quiaish adequi tabadta. Adomboembidi Esuquidistu tantiec iccuededquid utsibo chuibanombi. ¹⁸ Esuquidistu tantiesa shui dēbid dēteshunaid yec Esuquidistu tantiaquid yanash ěbi shui dēbid dēteshunacmaidimboecnuc nacnemenū quenquio yec tabadta. Adecbidi, Esuquidistu tantiesa shui dēbid dēteshunacmaid yec Esuquidistu tantiaquid yanash shui dēbid dētemenu quenda. ¹⁹ Shui dēbid dēteshunaidta nec, quenquio yec Nuquin Papa tsadec. Adecbidi, Shui dēbid dēteshunacmaidta nec, quenquio yec Nuquin Papa tsadec. Adquid nec quenquio yec, ěmbi chiacpadomboen nadenequidta nec, quec Nuquin Papa tantiec tsadec. ²⁰⁻²¹ Adec Nuquin Papa tantiec tsadnuc yua Esuquidistu tantiaquid yanash yuapen icnu quenquio yec tabad. Adecbidi, utsin yuapenquio yec utsin yua icnu quenquio yec tabadoa. ²² Yua Esuquidistu tantiesa icboedi Esuquidistu tantiaquid yansho isun, Yua nec, cainquio icquin Nuquin Icbon cuēnendac. Adembidi, utsin yuapenquio Esuquidistu tantiesa icboedi Esuquidistu tantiaquid yanash Nuquin Icbon namiaidquio nendac. ²³ Matses icsaquid

icsho cuidnushe quiaish abided ciudadec unēsquid Esuquidistu Nuquin Papan icmiac aid tantiaquid iquec, Con icbo nec, quiaish utsin yuaid iquenda. ²⁴ Adembidi chuinu. Tantiata. Nuquin Papan mibi cuēnuc matses yec Esuquidistu tantiaquid yanash, Ēbēd tabadquid con Icho nec, quec matses yec bēdamboec tabadta.

²⁵ Chido inesa bēdta dadan inacmaid chuita quequin mimbi dada uaid isun aidotsen chiemi. Aido tantiaquin naden chuita Nuquin Icbon cainquo yaqui Nuquin Icbon ēbi chuibeneta caid icquin naden mibitedi chiembique. Tantia. ²⁶ Natiatequid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido. ²⁷ Chido inquid yec chido inesa icnu quenda. Adecbidi, chido inesa yec chido inu quenda. ²⁸ Chido inesa icboedi chido inquid yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobēdta con bacuēbo bēdambo icmepeba? quec chido inquid tabadec. Chido inesain aden tantienquo yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiemi ma natiamianquec quenquo yec ma mibi tabadnueshun.

²⁹ Ēmbi chuiboed mibi bēdamboen tantiamembique. Tantia. Nidaidēn yuec tabadnu, quetiapimbo nuqui iquec. Nuquin Papa chieshēte ušē chonoc abi tantiaquid dadpen mēyansho isash Esuquidistu chote anoentsēqui yaneque. Abi yacno utsibo puduedtiapimbo icnushe qeshun min chido icnubi Nuquin Papa bunacpadomboen nabanec tabadta. ³⁰ Adecbidi, unēsquo yec shubiquimbi Nuquin Papa bunacpadomboen nabanec tabadta. Adecbidi, bēdambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquo yec Nuquin Papa bunacpadomboen nabanec tabadta. ³¹ Yuecshun ēmbi nidaidēnshun bedaid Nuquin Papan ēmendac, quequin tantiaquin ambi chiaicpadomboen nabanec tabadta.

³² Natiatequid nibēdpashun, qeshumbic natiamiantequid iquendac, quequin tantiemi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu qeshun aden nabanec tabadpec. ³³ Chido inquidien, Nuquin Papan tantiacpadenuidi nanu quiaish, ¿mitsipadentsimbi con chidobēdta con bacuēbo bēdambo iquebi camepeba? quec tabadec. ³⁴ Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bēnēn bēdamboen istsiashi, quec tabadec. ³⁵ Aden mibi chuibanquimbi chido inesa chido bednu qesho, Chēn, caisa nebi. Nuquin Papan chiaicpadomboen nabamboedēmbi utsi uain tantianushe qeshun ēmbi tantiaid chuibanec nebi. Nuquin Papan tantiacpadomboen bēdamboen tabadmenuequin aden tantiaquin chuibanec nebi.

³⁶ Adembidi, Min champi bednu queboed chudte bunec mēmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuē tishatiapimbo yantsiash, quiaish, Con champi inec cho, quiaish icsatiapimbo adquid icoaic. ³⁷ Adecbidi, min champi inu queboedi, Bedenquo iquemi, qesho tantiaquin menenda. Aden bedmenquo yec mibi bēdambo icpec. ³⁸ Con champi bedec cho, qeshun bedmiash, Bēdambo iquebi, quenubi, Con champi dadan inacmaid iquec quec bēdamboshē utsi icpec.

³⁹ Dadan inaid icquin min bēnē nianenda. Min bēnē unēsan utsin inaid icnu quiaish adta. Esuquidistu tantiesan inaid iquenda. ⁴⁰ Bēnua utsin inacmaid icnu quiaish bēdamboshē iquec aid. Ēmbi tantiacpaden ēmbi chuiboed Nuquin Papan Mayanēn tantiamiacpaden chiaid nec.

8

Nuquin Papan uaidbimboecnuc nacnenaid tantiaquin pambid dasanaid

¹ Nēbi Nuquin Papan uaidbimboecnuc nacnenaid tantiaquin pambid dasanaid chuinun naden chiembique. Tantiata. ¿Matsēsēn nacnenaidta nuqui tantiaid ictic? Padenquo. Aden tantiaquin ēmbi tantiacpadpenquo icquid utsibo nec quequin mamēnshumpec. Aden tantiaquin mamēnshunquin utsi tantienquo iquec. Utsien, Naden nabanquindambi utsibo bēdamboen tabadmepeba, quequin tantiaquidquo nec. ² Ēmbibi tantiemi quequid tantiababictēcquid nec. ³ Nuquin Papa tantiaquidien Nuquin Papan tantiaidquo nendac.

⁴ Aden chuishun ¿Nuquin Papan uaidbimboecnuc matsēsēn nacnenaid tantiaquin pambid dasanaidambi pepe? quequin mimbi chuiquin dada uaboed isun chuinu. Tantiata. Nuquin Papan uaidbimboecnuc matsēsēn nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibēdquiec. ⁵ Nidaidēn samēdquid papa cain utsin cuēnaid dadpen iquec. Adembidi abuc samēdquid Papa cain utsin cuēnaid

dadpen iquec. ⁶ Papa cain nuquin cuënaidien Abia Yampidquio nec. Adquid utsi Nuquin Papa cainquio nuqui iquec. Aidi abitedimbo uabampampidquio nec. Aidquio tantiec nuqui tabadec. Adembidi Nuquin Icho cain cuënaidquio Esuquidistu nec. Aidëmbi aton Papabëdtan abitedimbo uabampampid nec. Aidi cuesten dectanac abided cuidadac nuqui cuidtiadquid icnubi Nuquin Papan cuëmbanaido yec ambi tantiaido nuqui nec.

⁷ Adembidi aid abentsëqui nuqui tantiaidquio icnubi Nuquin Papan uaidbimboecnuc matsesën nacnenaïd utsibon tantiaïd iquec. Aden nacnenaïd tantiaquin pambid dasanaïd aidon pepec. Aden peboedëmbi Esuquidistu tantiaquid yanshun nacnenaïd tantiaquin pambid dasanaïd ëmbi pesho isun, Icsaosh, Nuquin Papan canushe, qeshun adquid petiapimbo yanebi. ⁸ Nuqui piaïd Nuquin Papa tantiamianesa nec. Ad icnuc Nuquin Papan uaidbimboecnuc matsesën nacnenaïd tantiaquin pambid dasanaïd penquiocsho isash, Aid bëdamboquid nec, quenquio Nuquin Papa iquec. Adecbidi, nacnenaïd tantiaquidën dasanaïd pesho isash, Aid bëdamboquid nec, quenquio icoaic Nuquin Papa.

⁹ Padnuen Nuquin Papan uaidbimboecnuc matsesën nacnenaïd tantiaquin pambid dasanaïd ëmbi bedshun pesho isash, Esuquidistu comapenen tantiaquidën tantiaïd nacnenaïd nec, Esuquidistu tantiabnabictsëcquid quenushe qeshun padenquio iquembi. ¹⁰ Aid pesho isash, Nacnenaïd papa cain cuënaïd nepec, qeshun, Aid tantiaquin ëmbitsen pambid dasanaïd penu, quetsiash Esuquidistu tantiabnabictsëcquid. ¹¹ Padnuen ëmbi piaïd Nuquin Papa tantiamianesa nec quequin mimbi tantiec. Aden tantiaquin nacnenaïd tantiaquin pambid dasanaïd mimbi pec. Aden tantiaquin mimbi penubi Esuquidistu tantiabnabictsëcquidën Nuquin Papa tantiamiantequid nacnenaïd tantiaquin pambid dasanaïd nec, quequin pec. Esuquidistu comapenen tantiaquid mibi icquimbi nacnenaïd tantiaquidën dasanaïd ëbi icsainquio ictequid nec quequin pequin Esuquidistu tantiabnabictsëcquid mimbi icsameyoc. Mimbi icsamaïdo tantiec Esuquidistu unëspaneïdash. ¹² Ad icnuc Esuquidistu tantiabnabictsëcquid mimbi icsameyoc Nuquin Icbon chiacpadomboen niacquid mibi neyoc. ¹³ Padnuen Esuquidistu tantiaquid utsibon icsamboen tantiaquin penushe qeshun padpiden penquio iquembi ma icsainquio icpanu qeshun.

9

Esuquidistu tantiaquidon natequid

¹ Esuquidistu chuibeneta cacmaïd Pabado nec quequidotsen chuïnu. Tantia. ¿Matsesën nata caïdtabi nedi? Padenquio. Esuquidistun ëbi chuibeneta caïd nebi. ¿Adquidida nepeba quecta mibi icpe? ¿Nuquin Icbon chiacpadomboen ëmbi chuïbanac mibitedi abi tantiaquido yanenquioda ictionda? ² Ai, ëmbi Esuquidistu chuïbanac Esuquidistu tantiaquid mibitedi yanonda. Utsi-utsiec yacnocquid ëmbi chuïbanacmaïd icnubi, Ëmbi chuïbanaido mibitedi nec, quequin tantiembi. Ëmbi chuïbanac Esuquidistu tantiaquid mibitedi yanshun, Esuquidistun ëbi chuibeneta caïdquio nebi, quequin Pabado chïad abimbo iquec, quequin bëdamboen tantiaquidquio mibi nepec tantesa uainquiocquin.

³ Aden ëmbi Esuquidistu chuïbanac abi tantiaquid mibitedi icquimbi utsin-utsinquien ëbi icsamboen chiec. Naden ëbi chieque. Tantia. Pabado Bednabebëdtan chuïbancho pemenuictiad, quequin chiec. Aden chiec onquequid ëmbibi tantiaquin naden aïdo chiembique. Tantia. ⁴ ¿Esuquidistu chuïbanec bundoenquiodabi icpe? ⁵ Adembidi, Esuquidistu chuïbanec utsibo aton chïdo Esuquidistu tantiaquid buanec capucuenesho isash, Bëdambo iquec, mibi quec. Adembidi utsibon aton chïdo buanubi Petedon aton chïdo buansho isash bëdambo iquec quiashic Esuquidistu chuïbanec ëbëd capuquimbi Bednaben aton chïdo buansho isash, Icsambo iquec, quec mibi. ¿Esuquidistu chuïbanec ëbëd capuequi aton chïdo buante bunenquioda Bednabe icpadic? ⁶ Adembidi, ¿Mibi pemembique. Penuequin nabanenda, capenda Esuquidistu chuïbenequid utsibo mimbi ique? Bednabebëdta ëbi chiec, ¿Penun daëdshun shubumpi nacentiad, quepecta mibi ique?

⁷ Ad yenquio utsibo iqueque. Tantia. Chuïnu. ¿Sondado icquinda aton na buanshun pepec? Padenquio. Abi nashunquidombien pemeshun acmec. ¿Icho abi nashunquid aton tiedën caniquid pemesada nepadic? Padenquio. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid. ⁸ ¿Aden chuïquin ëmbibi tantiaïdtambi chuïpo? Padenquio. Nuquin Papan Moises dada uamiampid ëmbi chïaid nec. ⁹ Nad iqueque. Tantia. Chuïnu: “Min tiedën caniquid ëshë chicnueshun min baca tsuc-tsucmequin dëpuquenda ma penu,” quequin Nuquin Papan chïaidquio nec. ¿Bacanuidi ma penu quequin Nuquin Papan chïaidta nepadic? Padenquio. ¹⁰ Matsesëdtambi ma penu quequin Nuquin Papan chïaidquio nec. Adembidi ambi piaïd tantiaquin nabanquido icho nec. Penuequin tiedën caniquid icbon taneshcaic. Adembidi, penuequin ëshëacsho bedquid icho nec. ¹¹ Adembidi, ¿Nuquin Papan chïaid mibi paquiacquid yec pete bec cho quenquiotiadquidtabi nedi? ¹² Mibi chuïbanquid utsibo menebanquimbi ëbia mibi

chuiquidquo icsho menetiadquidi menianenquo mibi icpoc. Aden ëbi menenquo yaqui ëmbi chiaid tantienquo icnushe quiash, Bec cho, quetiapimbo iquebi mibi caic. Aden chuibanec bundoquiec capuecuenec nebi. ¹³ Nuquin Papa tabadte shubu uashunaid yacnoshon nashunquidën ashunquo peshun aquec. Adembidi ashunquid nashunquid utsibon matsesën Nuquin Papa menenun bëaid tauishun pambid tëshë bedshun peshun aquec. ¿Aden peshun acpec, quequin tantienquioda mimbic icpe? ¹⁴ Adomboembidi Esuquidistu chuibansho abi tantiaquidon yuedec, quequin Nuquin Papan chiaid nec.

¹⁵ Èbi yuedtiadquidi nec, quequin tantiequi ¿adabi pemenun yuedpec? quesa nebi. Adembidi, Èmbi dada uaid buamiacsho isun ëbi yuedtsiash, quequin dada uainquo iccombi. Bunquiec unësbudec mibi caic, Bec cho, quenquo iquendabi. ¹⁶ Èbibi Esuquidistu chuibenenu quenquioccobi. Abi ëbi chuibeneta cac Esuquidistu chuibenec nebi. Abi chiesa yanash unësqüo ictsiabi. ¹⁷ Èmbibi, Esuquidistu chuibenu, quiash, Bec cho, quetsiandabi. Esuquidistun ëbi chuibeneta caid yec ambi namiaidquo nebi. ¹⁸ Esuquidistu chuidenesho isash, ¿atotsi Pabaddon bedpash, quepecta mibi ique? Naden Esuquidistu chuibenec nebiqec. Tantia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bédambo iquebi.

¹⁹ Bec cho, quesa yec utsin yuacmaid nebi. Adquid yequi utsibo chuinec nidanec shubu utsin puduedcuenequin aidon namiaidbimboecquin aibdëd tabadquin chuibanec nebi. Adec tabadquin ëmbi chiac ma aidotsen Esuquidistu tantiaquido yampanuna. ²⁰ Adecbidi, isadaidbo Esuquidistu chuibanec aibdëd tabadquin mimbic natemaid ëmbi natemaidpenquo nec, quenquiocquin ambi natemaid nainquo iquembi. Adquiec tabadquin ëmbi chuibanac ma isadaidbotsen Esuquidistu tantiaquido yampanuna. ²¹ Adecbidi, isadaidpembro chuibanec aido tabadacpadec abëdi tabadquin Esuquidistun chiacpadec niaquenquo yec tabadec nebi. Èmbi adoac isadaidpembotsen ma Esuquidistu tantiaquido yampanuna. ²² Adecbidi, Esuquidistu tantiabnabictscëquido chuibanuec ëmbi tantiabnabi iccondacpaden bëyuc tauain chiaidquo tantiamenuen chuibanec nebi. Èmbi adoac ma aidotsen Esuquidistu tantiabnquidquo yampanuna. Adequi tabadquin Esuquidistu chuibanec nebi. Èmbi adoac utsibo ma Esuquidistu tantiaquidquo yampanuna. ²³ Adec tabadequi ma ëmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

²⁴ Titinguecuededquido icnuc bëyuc abia titinguec choquid iquendac. Adquid icsho isun, Mibi badedquo titinguoc, quequin titingueta quequidën titinguec abia choquid menendac. Adembidi, Nuquin Papan menete bëda iquec. Aid bednu, qeshun Icbon chiacpadomboen nabanta, caimbi mibi. ²⁵ Badedquo titinguenuequid bedte bunaid chodquetequid icnuc, Aid bednu, qeshun abi bëdiactscëc titingamete pete icsa actequad icsabëdta isuidec titinguenuequid iquec. Nuquien chodquetemaid bednequin icsaid isuidec. ²⁶ Utsien, Bednu, quenquo yec titinguec. Adembidi, Bednu, quenquo yec utsibëd mëdanten senanu quequin nibëdacnoshombi mëdanten seded-sededec. Aden tantiaquin naisa nebi. ²⁷ Utsibon ma tantianu qeshun Esuquidistu chuibeniash unëscasho Nuquin Papan menete bëda bedtiapimbo icmane quiash icsaid mëmunec tsadebi.

10

Isadaidbon chieshampicpadec tabadenda quiaid

¹⁻² Abi yacno abi tantiesa chosho puduedmenquo icchitoshë quiash Nuquin Papan chiaid chieshënenquo yec bédamboec tabad, quequin tantiamenuen, Nadec nuquin tsusedpabo tabadpampic, quequin chiembique. Tantiata. Equipito yacnoshon ambi mënichaidobëd Moises puduanec Nuquin Papan bëyucamiai abu ushu tédion nidanequin tsusedpabon Acte Piu potepampic. ³ Adec nidaniash yuecash aitedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic. ⁴ Adembidi acte bundoacsho isun cuënote cuesquin acte chomiaid acash, Èbi bédambo icmequin Nuquin Papan ambi yuecshun chometequid Quidistubëditan nadatiambocquin naid nec, quequin tsusedpabon utsin-utsinquein tantiabempampic. ⁵ Aden tantiabnubien abëd icquid utsibon padenquo icpampic. Aden tantiesa Nuquin Papan nidaid Canan caid menenu caid yacno niduidequi unësbudnepampic adquitedi.

⁶ Tsusedpabo chieshampicpadquid icnushe qeshun Nuquin Papan aido chuiquin dada uamepampic. ⁷ Ad icnuc tsusedpabon Nuquin Papan uaidbimboecnuc nacneshun papa cain tantiapicpaden tantienda. Naden Nuquin Papan aido chuipampic. Bacabimboecnuc ambibi nacnenaid tantiaquin peshun acash baidacuededpampicpaden tantiaquin nainda. ⁸ Adembidi, tsusedpa utsibon ambi chudtemaid chudampicpaden chudenda. Aden nasho abi ushëmbi tsusedpabo dadpen 23,000ted Nuquin Papan cuesunemepampic.

⁹ Adecbidi, ¿Ambi chiaid niacshodabi Nuquin Papan cuidpeba? quiampicpadec adenda. Aden tantiaquido nisin pabedecad unèsbudnepampic. ¹⁰ Adecbidi, Equipito yacnoshon mēnchicaido abi mēnchicquid chieshec nadpampic. Equipito yacno iquec bēdambo iccondaidi nēmbō choash bunec capuebi. Anobidi tabadec nidebi, queded-quededsho ambi abi yacnoshon uaid mayan bēdambo Nuquin Papan budmiaidēn aittedi cuesunepampic.

¹¹ Abi tsibanquido tantiamenequin tsusedpabo tabadnēdaid icsa Nuquin Papan chuiquin dada uamepampid ěmbi chuiboed nec. ¹² Tsusedpabo Nuquin Papa chieshēnec icsapampicpadec icsamane quequin mibi tabadte tantiata. ¹³ Ēnden tsusedpabo chieshēmete icpampid abi iquec. Adaid natiatequid icnuc chieshēnushe qeshun Nuquin Papan mibi tantiaquin uidēn uac mibi icsainquio yec chieshtoenquio yec dayacquio iquendac.

Nuquin Icho Esuquidistu unēsaid tantiaquin acshumbic mayan icsa tantiaquin mimbi actiapimbo iquec quaid

¹⁴ Nuquin Papan chiaid niacmane quiash, Nuquin Papan uaidbimboecnuc matsesēn nacnenaid tantianu, quenda. Dacuēdec cuenacimboec aid nanacno nidenda. ¹⁵ Tantiabenquid icsho mibi chiec nebi. Pabardon chiaid abimbo iquec quequin tantiec aid nanacno nidenquio yec Esuquidistu chuibansho tantiec iccuededteneta. ¹⁶ ¿Iccuededquin sicaid acnun Nuquin Papa chiec onqeshun acted-actedquin matses icsaquid icsho cuidnushe quiash abided cuidadec Esuquidistun intac chididiquaid tantien icquinda nuqui acti? ¿Adembidi, pete cuēsh-cuēshun Nuquin Papa chiec onqeshun aton dada mēyanaid tantien icquinda nuqui pedi? ¹⁷ Esuquidistubēd abentsēc yachimboecquido nebi, quequin tantiaquin pete cuēsh-cuēshun meniac abentsēcshun piachimboen abi tantiec iccuedquidon pabedecad.

¹⁸ Aden nuqui pabedecadimboen isadaidbo icsaid cuidnuen nidaidēn capuquid-ded cuesuniaid pambid tauiquin Nuquin Papan shēdtequid pambid bedshun cuesunequidbēdtan nidaidēn capuquid icbon pepanēdash. ¹⁹ Aden ěmbi chiac ¿atotsi Pabado ěbi tantiamete bumpec, quepecta mibi ique? Mibi naden tantiamembique. Tantia. ¿Nuquin Papan uaidbimboecnuc matsesēn nacnenaid tibopecta iquec? Padenquio. ²⁰ Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesēn nacnenaid yacnoshon pambid dasanec. Aden aid pambid penu, qeshun mayan icsabēd yachimboecquid nebi, quequin pec. Adquidbēdtan penda. ²¹ Nuquin Icho Esuquidistu unēsaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unēsaid tantiaquin pete peshun mayan icsa tantiaquin pambid petiapimbo iquec. ²² ¿Aid tantiaquin acshun pequin Nuquin Papa nēishmenquioda mimbi icti? Ai, abitedi tantiaquidquio icquin abitedi isquidquio icquin Nuquin Papan mibi cuidendac.

Ēmbi natemaid naden nata caid nibēdec, quiash nanueboedi Esuquidistu tantiaquid utsi icsamemane quiash nainquiocte chiaid

²³ Nēid mishtemaid nec. Nēid petemaid nec. Nēid actemaid nec, quequin ěmbi chuitequid nibēdec, quiash Esuquidistu tantiaquid utsi icsamemane quiash nainquio yec tsadebi. Matsesēn ambi nacnenaid tantiaquin pambid dasanaid ěmbi tantiacmaid nec, quiash pambid dasanaid petiadquio iquequi Esuquidistu tantiababictscquidēn, Nēid nacnenaid nuquin papa caid nec, quequin penushe quiash penquio yec tsadebi. ²⁴ Utsi tantienquocquin nacnenaid pambid dasanaid piash bēdambo iquebi, quenda. Naden natiad. Matsesēn nacnenaid pambid dasanaid ěmbi pesho isun utsibon icsamboen tantiatsiash, quequin penda.

²⁵ Aton na sambededacno nidshun pambid bednuequin, ¿Nuquin Papan uaidbimboecnuc matsesēn nacnenaid pambid dasanaid bedaidta nec? quenquicquin bedta. ²⁶ Abu nidaidbēdta uashun aidēnquio icquidtedi Nuquin Papan uampidquio nec. Aidedimbo aton na nec. Nacnenaid yacnoshon pambid sambededaid aton na nec. Aidēn bacuēbo iquec aid pambid pequido mibi nec. ²⁷ Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesēn nacnenaid tantiaquin pambid dasanaid bedaidta nec, quenda. ²⁸ Adnubien mibi puduedacno isedquid utsi Esuquidistu tantiababictscquid tsadquin, Matsesēn nacnenaid papa cain cuēnaid tantiaquin dasanaid nēid pambid nec, cac aid pambid penda. ²⁹ Ēmbi papa cain cuēnaid nec, quequin utsin tantianushe qeshun aid pambid penda. Matsesēn nacnenaid con pa nec, quequin cuēnaid tantiesa icquin ¿atotsieshumbimbi matsesēn nacnenaid tantiaquin pambid dasanaid penquio iqueque? Chuinu. Tantia. ³⁰ Nuquin Papa ěmbi tantiaidquio icnuc penun aidi chuisho isash ¿atotsieshun matsesēn nacnenaid papa cain tantiaquin pepec utsibo quepec? ³¹ Edoen utsibo tantiamenuen bēdamboen nabanec tabadteneta. ³² Aden naic, Esuquidistu tantiaquid isadaidbo isadaidpembobēdta Esuquidistu bēdamboen tantiabemequiono, quec bēdamboec tabadta. ³³ Naden naic ěmbi bēdambo iquebi, quenda. Naden ěmbi nabanuc ěbēdi

utsi bédambo ictsiash, quequin tantiata ma Nuquin Papa yacno puduedtequid utsibo yanu qeshun.

11

¹ Ambia tantiaquidēn Esuquidistun icmiacpadquieq tabadec nebi. Adecbidi ěmbi chuiquin ismiacpadquieq tabadteneta mibitedi.

Nuquin Papa tantiaquid iccuededquin naid

² Mimbia tantianēdaidquio mibi nec, quequin mimbi chiaid tantiaquin nabanec nebi, quequin mimbi dada uashun bēmiaid isash bédambo iquebi. Adembidi, Esuquidistu tantiabēnēdaidon chuibanoid mimbi chiacpadomboen tabadec, quequin mimbi dada uaid bēmiaidon chuibansho tantiash bédambo iquebi.

³ Mimbi natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi Esuquidistu chuiquid aton Papa, Nuquin Papa caid, Edoen nec. ⁴ Adquid Nuquin Papa nec, quequin, Aid chuinu, qeshun aton mauete chicquid dadan. Aid chuinen mauet tabadquin, Ěbi chuiquidpenquio Esuquidistu nec, quiacbimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec. ⁵ Chidoen, Ěbi chuiquid Esus nec, quequin ismec mapucudash tsadec. Adec mapucudenquio yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquio ictiad. ⁶ Ěbi chuiquid nibēdec, quiacbimboec tabadsho matasmetiad. Matasmiash ma mapucudpanu chido. ⁷ Nuquin Papa aton madobēd onquec: Nuquimbimboecnucn matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ěbi chuiquid Abia Yampid nec, quequin ismenuet aid chieq onquec mauete mauesa dada nec. ⁸⁻⁹ Dadaba Nuquin Papan uapampic. Dadabēd icquid uanuna qeshun dadan shictodo chicshun chido uashun, Mibēd nashunanquid nec, quequin dada menepampic. ¹⁰ Adquid icmiac dada ěbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bédabo abi chuiquid chieshēnenquio yec Icbon chiacpadquieq tabadec. ¹¹ Nēid chido nec. Nēid utsi dada nec, quenubi nashunanquid abi daēdi nec. ¹² Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec. ¹³ ¿Nuquin Papa chuinuec ěbi chuiquid nibēdeque. Matasadnu quiash chido bédamboda icpadic? ¹⁴ Chido isadacpadec isadnu quec icsambo dada ictsiash. ¹⁵ Chido isadacpadec dada icsho isash, Chido nec, quetsiash. Dada isadacpadec chido isadenquio iquec. ¹⁶ Ěmbi chuibōed tantiash, Icsamboen chiosh, quetsiash. Adquid naden chuinu. Tantia. ¿Ěmbentsēquidambi aden chie? Padenquio. Ěbipadquiocquin chuibenequidon adomboembidi chuibanec. Adembidi Esuquidistu tantieq iccuededquid utsibon tantiabedec.

Nuquin Icho unēsash uincuenaid tantiaded-tantiadedta quiaid

¹⁷ Adecbidi, Mimbi naidtedi bédambo iquec, quetiapimbo iquebi. Adquid chuinu. Tantiata. Esuquidistu tantiabenuid utsibo icmenu, quenquio yec mibi iccuededec. ¹⁸ Abentsēc yacimbōec iccuededesa Esuquidistu tantiaquido Codinto yacnocquido nec, quiosh. Adsho tantiash, Abimbo capec, quiobi. ¹⁹ Nēidtedi ěmbi bédamboen isaído nec. Utsitedi ěmbi icsamboen isaído nec, quiash cuēshēdabimboec mibi tabadcuēdedec. ¿Adec tabadshoda Nuquin Papan mibi bédamboen ispec? Padenquio. ²⁰ Adec tabadquin Esuquidistu unēste tantienquocquin utsin-utsinquien peshun acted-actedec. ²¹ Utsibo cainenquocquin abia choquidon nua pebededec. Adoac utsibo choash bunec tabadnubi abia choquido paēmbocquid nua acash tantienquio yec tabadec. ²² ¿Min nuntan pete nibēdpecta iquec? Mitsana iquec. Adec mitsana min shubuno icnuq ¿Esuquidistu unēste tantieq utsibobēd iccuedednu, quenquiocquinda mibia choshon pebededpe? ¿Natiāmiāquieq pete nibēdchitec pete nibēdquid camenuenda mimbia pebedede? Aden pebededquido ¿atotsimbi chuipe? ¿Bédamboen mimbi nabanec quepectabi ique? Padenquio. Aden naquin Esuquidistu unēsaid tantienquocquin mimbi pec.

²³ Nuquin Icbon chiacpadomboen mibitedi chuibanondambique. Tantiata. Chuinu. Nēid inchēshēmbi ěbi chieshēnquido ēbēd icquidēn ěbi bedmendac, quequin Esuquidistun abi unēste tantiaquin nadopanēdash. Pete bedshun ²⁴ Nuquin Papa chuishun cuēsh-cuēshun naden abēd icquido chuipanēdash: “Pete cuēshaid bedash matses icsaquid icsho cuidnushe quiash ēbided cuidadec unēste tantiaquin pebededta,” quepanēdash Esuquidistu. ²⁵ Aden chuishumbic aid pebededsho isun pete utsi pebededquin nainshun adembidi dēshote bedshun sananquin naden Esuquidistun chuipanēdash: “Esuquidistu unēsquin ěbi chian anēdēnquiacno nēsecatequid icsho mēnchictequid Esuquidistu iquec, quequin tantiaquin sicaid abcededta. Sicaid acquin ěbi mēnchictequid iquec quequin tantiaquin acban.”

²⁶ Aden Esuquidistun ismenädacpadomboen pete cuëshëmpi pebededshumbic sicaid acbeddedta. Nuquin Icho unësaid tantiaded-tantiadedquin aid padpidec choabincuc adobanta. ²⁷ Abi unëste tantienquiocquin pete cuëshun peshun acquin Esuquidistun chiaid niacquid nec. ²⁸ ¿Pete cuëshëmpi penun Esuquidistubéd tabadacpadquiectabi tabadpe? quequin mibi utsibéd tabadte tantiata. ²⁹ Esuquidistu unësaid tantienquiocquin peshun acquid Nuquin Papan cuidendac. ³⁰ Aden adquidon peshun acac utsi-utsiec padishec; utsi-utiec daicsambo yanec; utsi dadpen ënden unësaid. ³¹ ¿Adabi Nuquin Papan chiaid niaquenquio yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unësaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenquio iquendac. ³² Adesa icsho Nuquin Papan natiaic camiaid mibi iquendac. Abi tantiesabëdta chian anëdënquequid nësecadenquio mibi icmenuen Nuquin Papan mibi natiaic camec ma ëmbi chiapadomboen nabamenuequin. ³³ Adembidi Esuquidistu unësaid tantianuec iccuedequin utsibo choabi iquec quequin aido cainta. ³⁴ Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unësaid tantianuequin naden nata quequin chiombi. Mibi yacno nidash puduedshun ëmbi chuiboed daëd uain chiendambi.

12

Nuquin Papan Mayanën tantiamiaid

¹ Nuquin Papan Mayanën tantiametequid chuinu. Tantiata. ² Ënden mibitedi Esuquidistu tantiesa yec Nuquin Papan uaidbimboecnuc ambi nacnenaaid matsesën ismec, Nëid papa cain cuënaid nec, qesho tantiaquido mibitedi iccondac. ³ Adquid iccondaidi Esuquidistu tantiaquid mibi yanacsho naden chiembique. Tantiata. Nuquin Papan Mayanën tantiamiaido: Esus Nuquin Icbopenquio, Nuquin Papan Chomicmaid nec, quetiapimbo adquido iquec. Adecbidi, Nuquin Papan Mayanën tantiamiacmaido: Esuquidistu con Icho nec, quetiapimbo icoaic.

⁴ Nuquin Papan Mayanën, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsëcquiobi tantiamianquid Nuquin Papan Mayan nec. ⁵ Adecbidi, utsi nashunquido Esuquidistu tantiaquido icnubi utsi nashunquidon Icho abentsëcquiobi Esuquidistu nec. ⁶ Adecbidi, nadatiambocquin nabanquid utsi-utsiec icnubi Nadatiambocquin namianequid abentsëcquiobi Nuquin Papa iquec.

⁷ Esuquidistu tantiaquid utsibéd tantiananquin namenu, quequin aton Mayan Nuquin Papan nuqui menec. ⁸ Nuquin Papan Mayanën tantiamiac ambia comapenen tantiaquidquio icquin chuibanquid utsi-utsiec iquec. Nuquin Papan Mayanën tantiamiac ambi tantiaid chuibanquid utsi-utsiec iquec. ⁹ Nuquin Papan Mayanën tantiamiacpaden ëmbi chiapadomboen Nuquin Papan naic, quequin tantiaquid utsi-utsiec iquec. Nuquin Papan Mayanën tantiamiac bédamequid utsi-utsiec iquec. ¹⁰ Nuquin Papan Mayanën tantiamiac nadatiambocquin nabanquid utsi-utsiec iquec. Nuquin Papan Mayanën tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanën tantiamiac matses bédamboec tabadsho isash, Nuquin Papan Mayanën tantiamiaid nec, quequin tantiaquidquio utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanën tantiamiac nidaidën icquid onquiacmaidën onquequid utsi-utsiec iquec. Adembidi Nuquin Papan Mayanën tantiamiac nidaidën icquid onquiacmaidën onquesho tantiaquidën tantienquiocsho isun aidon onqueten chuibanquid utsi-utsiec iquec. ¹¹ Aden Nuquin Papan Mayanën tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanën aden tantiamec.

Dada abentsëc yacpadquiec Esuquidistu tantiaquidtedi iquec

¹² Uidënaid dadpen icnubi matsesën dada abentsëc iquec. Adquiobidi Esuquidistu tantiaquid dadpen icnubi ambi tantiaid abentsëcquiobi Esuquidistu iquec. ¹³ Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meniaido nuqui nec.

¹⁴ Matsesën dada abentsëqui icnubi uidënaid dadpen iquec. ¹⁵ ¿Mëdantepadquidpenquio yec matsesën dada uidënacmaidta taë icpec? Padenquio. Dada uidënaid taë iquec. ¹⁶ Adecbidi, ¿ëshëpadquidpenquio yec matsesën dada dëccuësquiacmaidta dëbiatë icpec? Padenquio. Dëbiatë dëccuësquequid iquec. ¹⁷ Matsesën dada ëshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? ¹⁸ Nuquin Papan tantiampicpadquiequi matsesën dada uidënaid nec. ¹⁹ Dëccuësquequid abentsëc icnuc dada

nec quetiapimbo iquec. ²⁰ Uidënaid dadpembëd dëccuësquequid dadpen icnuc matsesën nami abentsëqui iquec.

²¹ Matsesën dada ad icnuc, ¿Médante bédambo icnubi ëshë padenquo iquec, quepecta mibi ique? Padenquo. ²² ¿Isadesa uidënaid uquëducquid nibëdnuc matsesën dada bédamboda icpat-siash? ²³ Uidënaid uquëducquid ismenquiocquin ompoaidquio utsi nec. ²⁴ Nami isaidquio ompodesa nec. Nuquin Papan tantiampicpadquequid ompoaid nibëdnuc matses cuëdenquo yec unësec. ²⁵ Ad icnuc, Icsambo icmianeque. Tësnu, quetiapimbo icho iquec. Ompoaid ompodesa aidbëdi iquec bédambo yec nashunanquid aidtedi nec. ²⁶ Abentsëc paëmbo iquec matsesën dada bédambo iquenquo iquec. Adquidtedi bédambo iquec matsesën dada abichobi paëpenquo iquec. Adecbidi, Esuquidistu tantiaquido abentsëc yac bimboec iquec abentsëc icsacsho isash abitedi unësqüio iquec. Abentsëc, Bédambo iquebi, quenuc aidbëd abitedi bédambo iquec.

²⁷ Adquidtedi matsesën dada abentsëc yapadqueic Esuquidistu tantiaquidtedi aidën dada abentsëc yac bimboecquid nuqui nec. Abi tabadtequid iquec. ²⁸ Abi tabadtequid nadquid iqueque. Chuinu. Tántia. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icsho isun naded tabad quequin chuibanquin ismequid utsi iquec. Nadatiambocquin nabanquid utsi iquec. Bédamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiamaidën onquequid utsi iquec. Adquidtedi nuqui iquec abentsëc yac bimboec nuqui tabadec. ²⁹ ¿Esuquidistu tantiaquidtedida ambi ëbi chuibeneta caid icpadic? Padenquo. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquo. ¿Esuquidistu tantiaquidtedida, Naded tabad, quequin ismequid icpadic? Padenquo. ³⁰ Adecbidi, ¿Esuquidistu tantiaquidtedida bédamequid icpadic? Padenquo. ¿Esuquidistu tantiaquidtedida abi onquiamaidën onquequid icpadic? Padenquo. ¿Utsi onquiamaidën onqesho tantiaquidën tantienquiocsho isun aidon onqueten onquequin chuibanquidtedida icpadic? Padenquo. ³¹ Nuquin Papan Mayanën tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuen quëmbi abia chuibambocpadquid icte bunquiota.

Utsi tantiaquidquo

Ëmbi chuiboedtedi Esuquidistu tantiaquido Nuquin Papan Mayanën tantiamete bédambo iquec. Padnuen ambi tantiamequin bédamboshë icmetequid iqueque. Aid tantiauidquidba chuiboshombic aid tantiaquidquo chuinu. Tántiata.

13

¹ Matses utsi-utsiecquid onquiapadqueic anquiadquid, adecbidi Nuquin Papan abi yacnoshon uaid, mayan bëda onquiapadqueic onquequid icquimbi utsi tantiesa icquin chuibansho abipenquo chuisho utsibon tantiendac. ² Utsibic, Nuquin Papan Mayanën tantiamiac chuibanquid adembiti Nuquin Papan chienquo icampid Nuquin Papan Mayanën tantiamiac tantiaquid aidi niosh. Aidëmbidi Nuquin Papa nadatiambocquin naquidquid nec, quequin tantiaquin, Mananuc macuësh dapa icboedi acte nantan nënitsinoa, Papa, cac-padomboen nënitsinoac nidquid isquid icquimbi utsi tantiesa icsho, Bédambocquid mibi nec, Nuquin Papan catiapimbo iquec. ³ Utsibic, aton na nibëdsho menedquid niosh. Adem-bidi, Esuquidistu tantiesa nebi cata, cac padenquiocsho mëyanaid niosh. Adquid icquimbi utsi tantiesa icsho, Bédamboen mimbi naoc, Nuquin Papan catiapimbo iquec. ⁴ Padnuen Nuquin Papan Mayanën bédamboshë ictequid tantiamiaid nadquio iqueque. Chuinu. Tántia. Utsi tantiaquidquo utsi tantiamequionuec chushcanesa nec. Utsi tantiaquidquo nashundenequid nec. Utsi tantiaquidquo utsin na isash adquidquio con na bëpashun quesa nec. Utsi tantiaquidquo dëniacanquidquio yec dëniacanquidquio nebi abibi quesa nec. Utsi tantiaquidquo ëbentsëqui tantiaquidquio nebi quiac bimboen nabanesa nec. ⁵ Utsi tantiaquidquio utsi icsamboen tantiaquin nabanesa nec. Utsi tantiaquidquio, Ëmbentsëqui tantiapadomboenuidi utsidedishun nabantiad, quesa nec. Utsi tantiaquidquio badedquid nëshesa nec. Utsi tantiaquidquio abi icsamboen nasho cuidesa nec. ⁶ Utsi tantiaquidquio utsi icsambocsho isash, Unësqüio iquebi, quec tsadquid nec. Adecbidi, utsi bédambocsho isash, Bédambo iquebi quec tsadquid neoaic. ⁷ Utsi tantiaquidquio utsi icsaid chienquo yec tabadquid nec. Utsi tantiaquidquio ambi nanaid nibëdsho isash ampiash badedquid quenquo yec ¿mitsimboembi nampoba? quec onquequid nec. Utsi tantiaquidënquo utsi icsadenesho isun, Tantiamiac Nuquin Papan chiacpadomboen natsiash, quequin chuibanendac. Aden chuishun bédamboen nasho isnuen cainquid nec. Mëyanahui chieshenquo yec dayacquo yec tabadtenequid utsi tantiaquidquio nec.

⁸ Utsi bédamboen tantiaid ènèdtiapimboctequid nec. Nuquin Papan chiaid chuibantsaidien ènèdendac. Adecbidi, matses onquaidtedi ènèdendac. Adecbidi Nuquin Papan ambi uaidtedi èmiac matsesèn isquin tantiaid ènèdoaic. ⁹ Nabanaidtedi tantiabenabictsècquidquid nuqui nec. Adecbidi Nuquin Papan chiampidtedi tantiabenabictsècquidquid nuqui neoaic. ¹⁰ Nidaidèn tabadquin aidtedi tantiabenabictsècquidquid nuqui icboedi Nuquin Papa yacno puduedash abitedi tantiaidquidquid nuqui iquendac. ¹¹ Bacuè yec bacuèmpi onquiacpadec onquepadenebi. Adembidi, bacuèmpin tantiabenabi yacpaden tantiapadenembi. Adquid icquin caniaidèn tantiapadpenquiocquin tantiapadenembi. Adquid icboedi caniaish bacuèmpin tantiapadpenquiocquin tantiabenondambi. ¹² Nèbi isnanten bèisadquin Nuquin Papabimboecquid nuqui isec. Yuecshun abi yacno puduedshun aidquiobi Edoen Nuquin Papa nuqui bèistuidendac. Nèbi Nuquin Papa isenquiocquimbi ambi chiaid tantiatsembi. Ambi tantiapaden yuecshun bèisquin nuqui tantiabenendac aid.

¹³ Nidaid ènèdnuc nèidtedi ènèdtemaid iueque. Chuinu. Tantia. Ambi chiacpaden nabanquidquid Nuquin Papa nec, quequin tantiaid ènèdtemaid nec. Adecbidi Nuquin Papa yacnoèsh abipadquid bédamboecquidquid iquendabi, quequin cainquin tantiaid ènèdtemaidquid nendac. Adecbidi, utsi tantiaid ènèdtemaidquid neoaindac. Aidtedi ènèdtemaid icnuc nidaidèn tabadquin, Utsi tantiembi, quequin ismiac utsi dadpen Esuquidistu tantiaquid yanash mibèdi Nuquin Papa yacno tabadendac. Adquid bédamboshècquid nec.

14

Mimbi chiaid chuibanquid èbi icme, Papa, quaid

¹ Utsi tantiaquid icta. Nuquin Papan Mayanèn adquid icmiosi, quequin ambi tantiamete utsi bunquiebique. Adec bunsho mimbi chiaid comapenen bédamboen chuibanquid èbi icme, Papa, quequin chuiban. ² Aden tantiamiac tantiamenu qeshun tantianuequidèn onqueten chuiban. Aton onqueten onquenuiocsho aidon tantienquo iueque. Padnuen onquaidtedimbo Nuquin Papan tantieque. Aden nidaidèn icquid onquiacmaidènquo Nuquin Papan Mayanèn tantiamiacpadec onquequin Nuquin Papa chiec onqueta. ³ Ma Esuquidistu utsibon tantiabenu, qeshun Nuquin Papan chiaid chuibanec. Adembidi matses ma bédamboec tabadnu qeshun chuibanec. ⁴ Nuquin Papan Mayanèn tantiamiac nidaidèn icquid onquiacmaidèn onquequin onquequiduidtsèqui tantiabenquid yanec. Padnuen Nuquin Papan chiaid Nuquin Papan Mayanèn tantiamiac Esuquidistu tantiaquid ma Nuquin Papan chiaid tantiabenu qeshun chuibanec. ⁵ Nuquin Papan Mayanèn tantiamiac nidaidèn icquid onquiacmaidèn Esuquidistu tantiaquidtedi onquepashun. Aden chuishumbic adec onquenuiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidèn icquid onquiacmaidèn chuibanac tantianuequidèn tantienquo iquendac. Aden tantienquiocsho isun abi daèdi onquaid tantiaquin chuibanquid nibèdnuc nidaidèn icquid onquiacmaidèn chuibanenda caimbi.

⁶ Adembidi chuinu. Utsibon tantia. ¿Mibi yacno choash puduedshun nidaidèn icquid onquiacpadec onquenuiocquin èmbi chuibansho tantienquo yec, Bédambo iquebi, quecta mibi tabadpe? Padenquo. Nuquin Papan chiaid dada uamiampid min onqueten èmbi chuibansho mimbi tantiabampec. Min onqueten chuibanenquo yec èbibi onquiacbimboecsho mimbi tantienquo ictsiandac. ⁷ Shoncatempi abibi shoncadtiapimbo iquec. Adembidi, aid shoncaisen shoncasho tantiatipimbo utsin iquec. Adembidi aid cuèdèmesan tentencate cuèdèmesho tantiaish, Adomboen cuèdèmenquo iccosh, quec. ⁸ Adembidi, utsibo yacno ma cuesnanu qeshun chomenuequin sondadon tantiabocpadpenquiocnoc shoncac choenquo iquec. ⁹ Adecbidi, utsi onquiacmaidèn onquequin chuisho ¿mitsipaden tantiapatsiaish? Utsibon tantienquo iquec. Aden chuibanec nibèdacno onquiacbimboec onquepec. ¹⁰ Onquete utsi-utsiec dadpen iquec. Aton onqueten onquequin chuibansho matsesèn tantiec. ¹¹ Utsin onqueten chiac tantiatipimbo yec, Onquequin chuibanquid con matsespenquo nec, quequin tantiec. ¹² Ad icnuc, Nuquin Papan Mayanèn èbi tantiamepc, qeshun, Esuquidistu tantiaquid ma tantiabenquido yampanu qeshun mimbi chiaid chuibanquidquid èbi icme, Papa, quequin Nuquin Papa chuifa.

¹³ Nidaidèn icquid onquiacmaidèn onquequid nebi, quequin tantiec. Adec onquequin chuibanquin iccuededquidon onquetenquo èmbi chuiboed chuoiaquid icme, Papa, ma tantiapanu, quequin Nuquin Papa chuifa. ¹⁴ Nuquin Papa chiec èbi onquiacmaidèn onquesho utsibon tantienquo iquendac. ¹⁵ Aden abi onquiacmaidèn onquequin utsibon tantienquo icsho ¿mitsipadentsimbi tantiamepe? Naden naimbi. Iccuededquido onquiacmaidèn onquequin Nuquin Papa chuishumbic tantiamenun iccuededquidon onqueten onquequin chuibanoanuna. Adecbidi, iccuededquid onquiacmaidèn Nuquin Papan naid

chiec cuëdënashic tantiamenuc iccuededquidon onqueten cuëdënoanuna. Adembidi abi onquiacmaidën onquequin chuibanshun iccuededquidon onqueten chuibanoatiapimbo icquin abi onquiacmaidën onquequin chuibanenuquo iquembi. Adecbidi abi onquiacmaidën cuëdënenquo iquebi. ¹⁶ Iccuededquido onquiacmaidën onquequin Nuquin Papa chuibanuc ζmitsipadec, Ai, abimbo iquec, quepec aido? Aton onqueten onquequin Nuquin Papa chuibanasho tantiash, Mibi bédambo iquec, Papa, quequin chiendac. ¹⁷ Abi onquiacmaidën onquequin Nuquin Papan naboed chuibanac Esuquidistu tantiadonequidquido mibéd iccuededquido yantiapimbo iquec.

¹⁸ Èbibi utsin-utsinquec onqueten onquequidquido icnubi mibitedi adesa nec. Padnueni adec onquec bédambo iquec, Papa, quequin chuided-chuidedembi. ¹⁹ Padnuen chuinuic Esuquidistu tantiaquido iccuededacno puduedash ma tantianu quiash aton onquete daédpactsëc tantiash anquiadquid icquin aidtedictsëqui chiendambi aido onquiacmaidën onquenquiocquimbi.

²⁰ Adembidi chuinu. Utsibon tantia. Bacuëbo tantiabeniabictsëcquid yacpadquiec icsaid tantiesa icta. Ènden caniaidën tantiabenshun ismiacpaden bédamboec tabadquin ismeta.

²¹ Nuquin Papan chiampid nad iqueque. Tantia: “Èmbi chuiban cac aton matsesën chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin èmbi chiacpadomboen nate bunenquo icoaposh,” quequin Nuquin Papan dada uamiampid nec.

²² Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenuid Esuquidistu tantiaquid icmetiapimbo iquec. Padnuen adec onquequin chuibanasho tantiash, Nuquin Papan naid nec, quequin Esuquidistu tantiesa icboedi abi tantiaquid yantsiash. ²³ Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidën abitedi onquecuedesho tantiash, Aidon tantiate icsabudpash, quepec. ²⁴ Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsëcshun-abentsëcshunquien Nuquin Papan chiaid chuibanasho tantiash, Icsaobi. ²⁵ Nèbi èbi bédambo icmequid Esuquidistu tantiate bunebi, qeshun abi icsaid ambi chienquiochoed Nuquin Papa chiashic, Nëmbo iccuededquidobéd mibi iquec, Papa, quequin chuibanamec Esuquidistu tantiaquid yanshun.

Abentsëcshun-abentsëcshunquien chuiban, quequin chiaid

²⁶ Adembidi chuinu. Adembi tantia. Esuquidistu tantiaquid iccuededec cuëdënu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidënquo onquequin chuinu, utsi quenubien; mibi onquiacmaidën chuisho tantiombique. Min onqueten chuinu, utsi quetsiash. ²⁷ Aided, Chuinu, qesho ζmitsicquid chuita nuqui cape? qeshun naden chiac bédambo ictsiash. Chuinu. Tantia. Mibi onquiacmaidën onquequin chuinuequid daéd icnuc bédambo ictsiash. Abentsëc chotsëcnuc adecbidi bédambo ictsiash. Aided icquin abentsëcshun-abentsëcshunquien onquequin chuiban, cata. Aden abentsëcshun onquequin chuisho abi onquaid tantiaquidën iccuededquidon onqueten chuibanta, cata. ²⁸ Padnuen abi onquaid tantiaquin chuibanuequid nibédnuc, Tsadquin Nuquin Papauidi otacquiocquin chuita, cata.

²⁹ Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daéd icnuc bédambo ictsiash. Abentsëc chotsëcnuc adecbidi bédambo ictsiash. Aided icquin abentsëcshun chuibanubi, ζNuquin Papan Mayanën tantiamiacpadomboenda chuibanec? Isnu, quequin chuibanuequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon.

³⁰ Abentsëcshun chuibanubi Nuquin Papan Mayanën tantiamiac utsi: Èmbitsen chuibanu, qesho tantiashun ma aidën chuibanu quiash ambia chuibanquid ènéd. ³¹ Adquidën iccuededquidtedi tantiamenuequin abentsëcshun-abentsëcshunquien chuibanta. Aden chuibanasho tantiash ma chieshenquo yec bédambo icpanu. ³² Nuquin Papan Mayanën tantiamiaid utsibéd bédamboec tabadquid nec. ³³ Nuquin Papan tantiamiacpadequi utsi onquenubi onquenquo utsibo tabadec. Onquenu, utsi quenuc, Ai, onqueta, qeshun onquenquiocquin cainec tabadec chuibanuequid utsibo. Esuquidistu tantiec iccuededquido utsi-utsiec yacnocquido adecbidi tabadquido nec.

³⁴ Esuquidistu tantiaquido iccuededacno otacquido tabadquid chido. Chuibanacnoësh onquenu, quenda chido. Nuquin Papan chiacpadec èbi chuiquid dada nec, quec chido.

³⁵ Anoshon chiaid tantienquo yec tsadquin cainec shubuno nidash, Tantienquo iccombique. Nuqui tantiaboed èbi chui, qesho tantiashun chiec aton bënën. Tantienquiocquin cainenquo iquec chido icsambo iquec. ³⁶ ζMimbia Nuquin Papan chiaid chuibanquidoda ne? Padenquo. ζChuibanac Esuquidistu tantiaquido mibitedictsëquida yanondac?

Padenquio. ³⁷ Nuquin Papan chiaid chuibanquidquio nebi, mibi quenuc, Nuquin Papan tantiamiacpaden Pabadon chuibanquin dada uaid nec, mibitedi quepec. ³⁸ Aden mimi tantianubi, Pabadon dada uaosh, quenquio utsibo icpec. Aido Nuquin Papan tantiamiacmaido iquec. Adquid icsho isun, Pabadon dada uaid nec, quequin tantiamenu, quenda.

³⁹ Adembidi chuinu. Adembi tantiata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi onquiacmaidën onquequin chuinessho, Ai, cata. ⁴⁰ Adecbidi, Nuquin Papan Mayanën tantiamiac chuibanuequid dadpen icnuc utsibo bēdamboen tantiamenuquin abentsēcshun-abentsēcshunquien chuibanta.

15

Esuquidistu uincuenaid

¹ Adembidi chiembique. Tantia. Matses icsaquid icsho cuidnushe quiash abided ciudadec Esuquidistu unēsaid ěmbi chuibansho tantiaash, Ai, abimbo iquec. Aid tantiembi, mibi quiampondac. Aden tantiadonec chieshenquio yec mibitedi tabadec. ² Aid tantiabenu, qesho Nuquin Papan mibitedi bēdambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bēdambo icmebanacmaid nec. Adecbidi, ambi yuednu cacmaidquio adquid nec.

³ Utsin ěbi tantiamiacpaden mibi chuibanondambi. Adembidi chuinu. Tantia. Nuquin Papan chiacpadomboen matses icsaquid icsho cuidnushe quiash abided ciudadec Esuquidistu unēsapanēdash. ⁴ Unēsacscho shēcucē nacnenaidën nauedshun bētashacsho daēdec ushtanquin ambi chiampicpaden Nuquin Papan uincuen uapanēdash. ⁵ Aden uincuemiac choquin, Uincuenobi, quequin Petedo Esuquidistun ismepanēdash. Adshumbic adembi abēd 12ted icquido ismeoapanēdash. ⁶ Adshumbic adembi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanēdash. Aid uincuenacscho isquido dadpen abi tabadnubi utsi-utsiec padenquio iquec. ⁷ Aden aitedi ismeshumbic aton utsi Santiacsotsen Esuquidistun ismeoapanēdash. Adshumbic, ambi ěbi chuibeneta caidtedi ismeoapanēdash. ⁸ Aden aido ismequin nainshun yuecshun ěbitsen ismeoapondashi. Icsactsēcquiocquid nec, quenquiocquin ismebenondashi tsyuecquio. ⁹ Abi tantiaquid mēyanquin cuesunemequidquio icboedi abi tantiaquid yanacscho Esuquidistun, ěbi chuibeneta, cainquioctiadquidēmbi adquid icta caid nebi. ¹⁰ Esuquidistu tantiaquid yansho isun ěbi chieshaid cuidenquio yac Nuquin Papa bunacpadomboen Esuquidistu chuibenequid nebi. Adquid Nuquin Papan icmioshi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenenuiocnobi. ¿Ěmbentsēcquidambi chuibenedio? Aton Mayan Nuquin Papan meniac aibēd icquin chuibeniombi. ¹¹ Adembidi, ěbi yacpadquidon Esuquidistu chuibanac utsitsen abi tantiaquido yampondash.

Matses unēsash uincuenaid

¹² Adec Esuquidistu unēsash uincuenondash, quequin chuinubi ¿mitsipaden tantiec uincuenta nibēdec quec utsi-utsiec onquepec? ¹³ Uincuenta nibēdnuc Esuquidistu uincuenenquio ictsempanēdash. ¹⁴ Esuquidistu uincuentequid icmiambocnoc abi chuibanquid muambo ictsiandac. Esuquidistu tantiaquid nebi, quiaidbidi muambo ictsiandac. ¹⁵ Nuquin Papan naid chuibanquidtedi muaquidquio icoatsiandac. Aden tantienquiocquin ěbi yacpadquidon chuibanendac. Unēsash uincuentequid nibēdnuc ěbitedishun Nuquin Papan Esuquidistu uincuen uapanēdash quequin chiaid abipenquio ictsiandac. Unēsash uincuenta nibēdnuc Nuquin Papan uincuemiaid nibēdtsiandac. ¹⁶ Unēsash uincuenta nibēdnuc Esuquidistu uincuentiapimbo ictsempanēdash. ¹⁷ Aid uincuenambo icnuc matses icsaquid icsho cuidnushe quiash abided ciudadquid Esuquidistu nec, cainquio mimi ictsiandac. Matses icsaquid icsho cuidnushe quiash ciudadquid nibēdtsiandac. ¹⁸ Aid uincuenambocnoc abia tantiaquido tsusedpabo Nuquin Papa yacno puduedtiapimbo ictsempanēdash. ¹⁹ Nidadidēnuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquio ictsiandac.

²⁰ Ěmbi chuiboedtedi adtiapimbo iquec. Esuquidistu Nuquin Papan uincuen uapanēdash, quequin chiaid abimbo iquendac caimbi. Nuquin Papan ambi abia uincuemiaid abi yacno puduedmequin ambi uincuemetequid dadpen iquendac, quequin chiaid abimbo iquec. ²¹ Unēstequid bēyuc dada yanampicpadec matsestedi adecbidi iquec. Adecbidi, unēsash uincuentequid Esuquidistu yanacpadec abi tantiaquidtedi adquiobidi iquendac. ²² Bēyuc dada Adan caidën tsyuecquidtedi adecbidi unēstequido nec. Esuquidistun bēdambo icmiaid uincuentequido neoaic. ²³ Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac. ²⁴ Aden bedoanquin abi tantiaquidtedi bēyucanec choquin Nuquin Papa

Edoen caid ismequin, Nēidtedi min shubu abentsēquēn tabadquido nec, quequin chiendac abi chieshēnquidtedi chēn quetiapimboconoc. Aido ambi nebudacimboecquido iquendac. ²⁵ Abi chieshēnquido utsitedibēd chuiquid icquin abi chieshēntiapimboecquid aido Esuquidistun icmebanendac. ²⁶ Adoshombic ēnquimbi unēstequid nibēdquidquido Esuquidistun icmeoaindac. ²⁷ Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquo aton Papa iquec. ²⁸ Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsēcquibi nendac.

²⁹ Unēsash uincuentequid nibēdnuc, ¿atotsieshun, Ēnden unēsaid uincuenendac, quequin tantiembi quequin utsibon acten ambibi mentomepec? ³⁰ Adecbidi unēsash uincuentequid nibēdnuc ēbi unēs uate utsibo comapenec buncuededsho isun ¿atotsieshun, Uincuentequid iquec, quequin ēbi yacpadquidon chuibampec? ³¹ Unēsash uincuentequid iquec, quequin tantiembi. Aden tantiaquin Esuquidistu, Nuquin Icho, ēmbi chuibanac Esuquidistu tantiaquido mibidedi yampondac, quequin tantiembi. Aden tantiaquin unēsmane quenquocquin Esuquidistu unēsash uincuenta iquec, quequin chuibenec nebi. Aden badiadquidēnbadiadquidēnquien chuibanubi ēbi unēs uate utsibo bunec. ³² Uincuentequid nibēdnuc, ¿atotsi quenuequini Epeso yacnoshon, Uincuenta iquec, quequin chuibansho mēyanaqui chieshenquo yec dayacquo tsadpe? quetsiabi. Adecbidi uincuenta nibēdnuc: “Unēsash nibēdquieq iquebi, quequin nua peshun aquembi,” quetsiabi. ³³ Aden tantienquo iquembi. Adembidi tantienda. “Uincuenta nibēdec quequidbēd capuenda aidēn tantiacpadec icmane quish.” ³⁴ Adquidpadquid icquin mimbi icsamboen tantiaid ēnquin Nuquin Papan chiaidquido tantiata. Esuquidistu tantiec mibēd iccuededquid utsi-utsiec, Nuquin Papa nadatiambocquin uincuemianquidquido nec, quequin tantiesa nec. ¿Adquid mibēdi icnuc Nuquin Papan bēdambo icmiaido mibitedida icpe? Padenquo.

Uincuemequin dada chuca meniaid

³⁵ ¿Mitsipadec unēsaid uincuempec? utsi quepec. Adecbidi, ¿mitsipadquid uincuentequidēn dada icpec? utsi queopec. ³⁶ Adquidēn icsamboen tantieque. Chuinu. Tantia. Mimbi tiedēn chococaid tauibēd ēshē chococatequid napi dēyuctequidpadpenquo iquec. ³⁷ Mimbi tiedēn chococaid utsi-utsiec iquec. Adecbidi mimbi tiedēn siaid utsi-utsiec iquec. Mimbi chococaid mimbi siaidbidi dēyuctequid utsi-utsiec iquec. ³⁸ Nuquin Papan tantiampicpadec aton dada yanec. ³⁹ Abipadquidpenquo ambi uaidtedi iquec. Abipadquidquido matstedidi iquec. Abipadquidquido nidaidēn capuquidtedi iquec. Abipadquidquido podochoquidtedi icoaic. Abipadquidquido acten icquidtedi icoaic. ⁴⁰ Abuc tabēcaid icnubi nidaidēn icquid iquec. Abuc tabēcaid abipadquid chēnquesho isec nidaidēn icquid tabadec. ⁴¹ Badiadēn ushē comapenquieq chēnquenubi inchēshēn ushē dauebduidquid chēnquec. Aid daēdi nua isadnubi uispa pistsēc isadoaic. Uispa utsi-utsiec iquec. Abi bedquec chēnquetequid utsi-utsiecibidi iquec.

⁴² Aidtedi ēnēdendac. Adecbidi tishac matses unēsacsho chococac nami chodquec. Adec nami chodquian Nuquin Papan tantiacpadec uincuentequidēn dada chuca chodquesa nendac. ⁴³ Tishac icsaquid matses iquec. Adsho uincuemequin ambi icsaisa icmiaid nendac. Nidaidēnshun tishac chonoadec uimabudquid matses nec. Yuecash unēsacsho uincuemiac uimabudenquiocquin nabanendac. ⁴⁴ Nidaidēnshun tishac daicsambo yanash unēsacsho uincuemequin dada chuca icmetequid nendac. Nidaidēnshun tishac matsesēn tantiacpadquid icboedi Nuquin Papan uincuemiac aidēn tantiacpadquid iquendac.

Nidaidēnshun tishac matsesēn tantiacpadquid icboedi abuc buanac anocquidēn tantiacpadquid iquendac. ⁴⁵ Adembidi Nuquin Papan chuiquin dada uamiampid nad iquec: “Bēyuc matses Adan caid nacenshun Nuquin Papan bushcac taēec tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. ⁴⁶ Nuquin Papan matsesēn tantiacpadquidba icmiac Esuquidistu tantiaquid icsho isun abipadquid meniac icbon tantiacpadquid yanec. ⁴⁷ Bēyuc matses uanu, qeshun nidaid putu bedshun nacenaid nepampic. Bēyuc matses Adan caidēn tsyuecquid Nuquin Papan abi yacnoshon budmiaid nepanēdash. ⁴⁸ Nidaid putu bedshun bēyuc matses nacenshun nidaidēn tabadquid icmepampic. Adquiecbidi abipadquid matstedidi yanec. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aido iquendac. ⁴⁹ Adecbidi bēyuc matses isadacimboecquid nidaidēn tabadquidtedi nec. Nuquin Papan abucshun chomiaid isadacimboecquid abēd icquido iquendac.

⁵⁰ Adembidi chuinu. Tantiata. Matsesēn dada nami intacchoquid chodquetequid icnuc Nuquin Papan shubu abentsēquēn tabadtiapimbo adquid iquec. Chodquequid chodquetemaid ictiapimbo iquec.

⁵¹ Nuquin Papan chienquocpampid chuinu. Tantia. Abi tantiaquid unēsabicquidbēdta ēnden abi tantiaquid tsusedpabo dada chuca Nuquin Papan menendac. ⁵² Ambi nami-aidēn abucshun shoncanubi ēshē badedquio bēbedquiacbimboecnuc badedquio unēsamesambo Nuquin Papan abi tantiaquido icmendac. ⁵³ Chodquetequid icboedi chodquesa yanendac. Unēstequid icboedi unēsesa yanendac. ⁵⁴ “Adquid icmiac unēstequid nibēdquidendac.

⁵⁵ Ad icnuc ŷmitsishunquio unēstequid istuidpec? Adembidi, ŷmitsishunquio unēsmetequid istuidpec?”

⁵⁶ Icsaquid unēstequid nec. Nuquin Papan nadomboen nata quequin chiaid niacquid icash unēstequid matses yanac. ⁵⁷ Adquid nuqui icsho isun Nuquin Papan Nuquin Icho Esuquidistu chomeshun nuqui cuidentquiocquin aidi icsaisa cuidquin nuqui bēdambo icmehanec. Adoac abi yacnoēsh icsaisa unēsamesambo nuqui iquendac. Aden Nuquin Papan naindac, quequin, Bēdamboquid mibi nec, Papa, quequin nuqui chuided-chuidedendac.

⁵⁸ Adembidi chuinu. Tantiata. Adenuidi tantiaquin utsi uaquin utsin chuisho tantienquio yec tabad. Adec tabadquin Nuquin Papan chiacpadomboen naban Esuquidistupadquid Nuquin Papan ēbi icmendac, quequin tantiaquin.

16

Utsibo menenun piucquid bedbanaid

¹ Nuquin Papan bēdambo icmehanaid utsibo menenun mimbi piucquid bedbanaid chuiquin dada uaimbique. Isec onqueuededta. Nidaid Cadasia caid yacnocquido Esuquidistu tantiaquido ēmbi chuibanacpadomboen mimbitsen nabanta. Naden Cadasia yacnocquido chiombi. ² Abentsēchshun-abentsēchshunquien mimbi bedaid musucbudcuenshun dominco ushēn mimbi musucacted dayun uata. Aton na daēdpactsēc icquidēn daēdpactsēc dayun uanubi mitsana dadpen icquidēn dadpen dayun uata. Aden musucbudcuenshun mimbi dayun uaid icnuc ēbi choacsho isash, ŷTedsimbi menepeba? quenquio mibitedi iquendac. ³ Ēbi choshombic utsibo bēdamboen tantiaquin piucquid dayun uaidtedi mimbi menenun buantan caido isun, Ēmbi isaïdo neque. Yuedta, quequin dada uashun aido menembi ma buanueshun. Aden ēmbi meniac buanquin utsibo ismetuidpec. ⁴ Adecbidi ambo nidtiadquio iquebi, ēbi quenuc mimbi menenun buantan caido ēbēdi nidendac.

Utsi-utsien chuibanaid

⁵ Nidaid Masedonia caid yacno Esuquidistu tantiec iccuededquid utsi-utsiec yacno isedbēquimbi mibi isbētsenembi. ⁶ Aden isedbēequi mibi isedash tabadebi. Iquenoanquid chonobi mibēd tabadtsiabi. ŷAid ēnēdan nidnu, qesho, adabi utsi yacno mimbi nidmepatsia? ⁷ Nēbi mibēdi yuec tabadtiapimbo iquebi, quiash mibi yacno nidenquio iquebi. Yuecash mibēdi yuec tabadnuec mibi yacno nidebi. Nuquin Papa bunuc adendabi. ⁸ Nēbi padenquio iquebi. Epeso yacnocquidobēd iquebi. Nuquin Papan abipadquid aton Mayan matses meniaid ushē tantiate choan nēuēshquio nidebi. ⁹ Nēmo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantianpanueshun. Aden chuibanasho tantiauidash utsibo ēbi chieshēnquido nēmo iquec.

¹⁰ Mibi yacno ēbi nidenquio icnubi Timoteyo mibi yacno nideque. Aid bēdamboen ista. Pabado yacpadquiocquid Nuquin Papan namiaidquibidi Timoteyo nec, quec chieshesa icta. ¹¹ Nuquin Papan namiaidquibidi Timoteyo icsho, Ēbēd icquidta nec, quenquiocquin yuedta. Yuedac tabadash, Nidnu, qesho, Ai, nidec nid. Mibi nidsho isash unēsquio iquebi, quequin nidme ma ēbi yacno choanu. Utsibobēd Timoteyo choaic quequin cainec tsadebi.

¹² Nēbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobēdta istanta, quequin Apodos comapenen chiombi. Adoac, Nēbi Codinto yacno nidte bunenquio iquebi, quioash aid. Yuecash Codinto yacno nidec bēdambo ictsiash, quiash yuecash aidi mibi yacno nidendac.

¹³ Icsamane quequin chieshenquiocquin Nuquin Papan chiaid tantiadoneta. Esuquidistu tantiabēnquido yanta. Adecbidi, natiatequid icnuc chieshtoenquio yec dayacquo yec tabadteneta. ¹⁴ Adec tabadquin utsi bēdamboen tantiaquin nabanta.

¹⁵ Adembidi chuinu. Tantia. Nidaid Acaya caid yacno Estepanasēn shubun icquido abia Esuquidistu tantiaquido icpondash. Adquid yanshun, Esuquidistu tantiaquid ut-sibo nashumbanquido nuquibi iquendac, qeshun adobanec. ¹⁶ Aidon namiaïdo icta. Adembidi, comapenen nashumbanquidtedishun namiaïdo icta. ¹⁷ Codinto yacno Esuquidistu tantiec iccuededquidtedi ēbēdi ictiapimbocnobi mibi yacnoēsh nēidtedi chosh. Estepanas yec Podtunato yec Acaico yec quec choash puduedsho isash bēdambo iquebi. ¹⁸ Mibitedi chuibanquin aidon unēsquiocquidi bēdambo icmiosi. Mibi yacno padpidec nidash puduedshun chuibanquin adembidi mibitedi bēdambo icmendac aidon. Aido mibi

yacno choacsho isun, Pabado chuibanquin mimbi bēdambo icmiacpaden nabanec tabadta, quequin chuiban.

Esuquidistu tantiaquidon mibitedi tantiaquin chuibanaid

¹⁹ Codinto yacnocquid mibitedi tantiec tabadebi, quequin dada uaquin chuita, nidaid Asia caid yacno Esuquidistu tantiec iccuededquidon cac chiemi. Adembidi, Aquidan aton chido Pidisdabēdta chui cac chuioaimbi. Adembidi, aidon shubun Esuquidistu tantiec iccuededquidotedishun chui cac adembidi chuioaimbi. ²⁰ Aden utsibon chiaid chuishumbic, Esuquidistu tantiaquid utsibotedibēd bēdamboec tabadta, caimbi.

²¹ Ēmbi chuibanac ēmbi chiaid utsin dada uashumboed nec. Nēshun bedanquin dēnainquin dada uaimbique. Tanta.

²² Nuquin Icbo tantiesa nēbimbobi ma Nuquin Papan comapenen cuidquin ma nēsiatequid icpanuna. Adecbidi abi tantiaquido bednuec badedquio Esuquidistu chopashun, quec tsadebi.

²³ Ēbi icsaquid icsho cuidenquiocquin Nuquin Icbo Esuquidistuded Nuquin Papan cuidpanēdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

²⁴ Esuquidistun shubun icquido nuquibi icsho ēmbi bēdamboen isaido mibitedi nec. Padi aiteddada uaombique. Isec onquecuededta.

CODINTO YACNOCQUIDON ISTE 2

¹ Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ęmbi dada uaid mibitedishun isbanshun utsibo meneta ma isnueshun.

² Matses icsaquid icsho cuidnushe quiash abided cuidadec Esuquidistu uněspanědash, quequin tantiaquioso isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

Bědambo icmianquidquio Nuquin Papa

³ Nuquin Papa nad iqueque. Tantia. Chuinu. Ębi uněsquo icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna. ⁴ Natiamiaid icsho tantiaquin chieshtomenquiocquin aiděmbi nuqui dayacquo icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. ⁵ Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquo icmiacpadomboen Esuquidistu tantiaquid utsi tantiaquin chieshtomenquiocquin dayacquo nuqui icmendac. ⁶ Adembidi ěbipadquidobědan Esuquidistu chuibanho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquo icmec, quec tabadta. ⁷ Utsin měyanaid icquimbi Esuquidistu tantesa uainquo iquec, quequin mibi tantiec tsadebi. Ębi měyanacpaden mibi měnyansho isun Nuquin Papan bědambo icmiaid mibi iquendac.

⁸ Nidaid Asia caid yacnoshon ěbi natiamboed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocon natiamioshi. Adoac, Uněsebi, quiobi. ⁹ Uněs uatiad, utsibo qesho tantias, Ębibi měnchiquidtiapimboquimbi matses uněsacsho uincumequiděn ěbi měnchictsias, quequin tantiec tsadobi. ¹⁰ Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictenec. Uněs uatsensho isun ěbi měnchicacpaden ěnenquiocquin napashun, quequin tantiec tsadebi. ¹¹ Ębi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho tantiasun mimbi Pabado měnchicoc. Mibi bědambocquid nec, Papa, quequin ma dadpenshun ambi naid chuipanuna.

Něbi mibi yacno nidenquo iquebi, quiaid

¹² Bědamboec tabadquin ismequid nebi, quequin tantiec bědambo iquebi. Adaid chuinu. Tantia. Nuquin Papan ěbi tantiamiacpaden ismec utsiboběd bědamboec tabadobi. Adquiecbidi mibědi tabadobi. Matsesěn tantiamiacpadpenquo yec tabadobi. ¹³ Ma tantiamenueshun abimbo chuiquin mibi dada uashunec nebi. Ęmbi dada uaid bedshun isec, Pabado bědamboec tabadec, quequin ěnenquiocquin tantiapashun mibitedishun. ¹⁴ Ęběd Pabado bědamboec tabadosh, quequin tantiec bědambo iquebi, quec utsi-utsiec. Adecbidi, Codinto yacnocquido utsi-utsiec bědamboec tabadosh, quequin utsibon chuisho tantias bědambo iquebi. Esuquidistu choanuc adquiequi Codinto yacnocquido tabadpashun, quec tsadebi.

¹⁵ Aden ěbi bědamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bědambo iquebi, quepashun, caimbi mibi. ¹⁶ Mibi isbidanec nidaid Masedonia caid yacno nidashic padpiden mibi isbětsenec choaibi. Aden isbětsenemi, qesho tantiasun nidaid Udeya caid yacno mimbi ěbi nidmetsiac, quequin mibi chiombi. ¹⁷ ¿Uquěducshun, Nidenquo iquebi, quequin muaquindambi chuidio? Adenquiocquin chiombi.

¹⁸ Ambi chiacpadomboen nabanquidquio Nuquin Papa nec. Aid chuinu. Tantia. Abimbo chuiquidquo yec utsi yantiapimbo iquec. Adquidquio icquin ambi, Esuquidistu chuibeneta, caidquo yec adomboen chuiquid nebi. Utsi uain chuinu, quesa nebi. ¹⁹ Ambi chiacpadomboen nabanquidquio Nuquin Papan Madombo, ěmbi chuibeniaid, Esuquidistu nec. Aidi Sidasěn chuibeniaidbidi nec. Aidi Timoteyon chuibeniaidbidi nec. Esuquidistu abimbo chuiquidquo yec utsi yantiapimbo iquec. Abi chuibenequidquio adquidbidi nec. ²⁰ Con Madon naden naindac, quequin Nuquin Papan chiacpadomboen Esuquidistun ěnden nabanac. Aden abi nabanec. Ambi chiacpadomboen naquidquio Esuquidistu nec, quequin tantiaquin ambi naid ěbipadquidon chuibanec. Aden chuibanac abi tantiaquidquio yanash, Abimbo iquec. Esuquidistun ambi chiacpadomboen naindac, quec tantiec nuqui

tabadec. ²¹ Nuquin Papan tantiamiac: Esuquidistu tantiaquid nebi, quiash, Tantiesa nebi, quetiapimbo nuqui iquec. Adquid icmiac aton Madombo chuibanquid nuqui nendac. ²² Adembidi aton bacuë icmiaid nuqui nec. Adembidi aton Mayan Nuquin Papan meniaid nuqui nec. Èbèd tabadquid aido nendac, quequin tantiamenuen Nuquin Papan aton Mayan meniac ma aidèmbi nuqui bédambo icmepanueshun.

²³ Nuquin Papan tantianubi mibi yacno nidnu quiobi. Adashic, chushcachitomane quiash mibi yacno nidenquio iccobi. ²⁴ Èmbi Esuquidistu chuibanac abi tantiaquid dadpen iquec. Aidon icbopenquio nebi. Aidon icbopenquiobidi Esuquidistu chuibanquid utsibo nec. Esuquidistu tantiec bédambo iquebi ma quenu, quequin chuibenequidquio nebi. Esuquidistu tantiaquid nebi, abimbo quequin aid tantesa uainquio mimbi iquendac.

2

¹ Aden tantiaquin comapenen chuiquin unèsquio icmenush quec mibi yacno nidenquio iquebi caombi. ² Mibi unèsquio èmbi icmiac ¿tsuntsin èbi bédambo icnepatsiash? ¿Èmbi icsambo icmeboedènda èbi bédambo icmepadic? Padenquio. ³ Aden tantiaquin mimbi iste dada uaombi ma èbi bédambo icmequid unèsquio icmetiapimbo iquebi, qeshun. Bédambo iquebi, quequin èbi tantiec adquiobidi mibi icoatsiac, quequin tantiombi. ⁴ Unèsquio yec shubiquimbi mibi dada uashun, Meneta, caondambi. Unèsquio icmenu, quenquiocquin mibi comapenen tantiaquin dada uaondambi.

Abi icsaboed bèpiscudnueshun yued quiaid

⁵ Anocquidèn èbi unèsquio icmedenequimbi adembidi comapenquiec unèsquio mibi icmeoaosh. Aidi mibi chiondambi. ⁶ Aidi mibi dadpenshun cacumiac abi icsaid ènosh quec. ⁷ Adoachso abi icsaid bèpiscudshun aidi yuedoquin bédambo icme. Yuedenquio yac natiamianquiec unèstiadquio yantsiash. ⁸ Nuquibi iccuedednuna, quequin aid tantiaquin yued caimbi. ⁹ ¿Èmbi chiapadomboen nabanquidioda neque? Isnu, quequin icsaquin cacumeta, quequin dada uaondambi. ¹⁰ Aden èmbi dada uacpaden mimbi cacumiac abi icsaid ènsho isun abi icsaid nibèdacbimboec bèpiscudshun yued. Adsho tantiahsun adomboembidi naimbi. Aidbèdi abentsèc yacimbocquido yanosh, qesho tantiahsun abi icsaid bèpiscudebi Esuquidistun tantianubi. ¹¹ Nuquí chieshèngquidèn Satanasèn aidi icsamenush qeshun abi icsaid èmboed yuedta. Yuedenda, Satanasèn quequin tantiamiac onqesho tantienda.

Nuquin Papan con Mayan meniaid adquid èbèdi tabadtequid nec, quiaid

¹² Esuquidistu chuibanuec shubu dadpen icquid Todoas caid yacno èbi chonoc, Tiantianu, quec cho-choquid dadpen icpondash. ¹³ Adquid dadpen icnubi èmbi con utsi caid, Tito, mibi yacnoèsh choabi icnuc ambo yuec tabadtiapimbo iccobi. Adash, Bèquednu, quianec nidaid Masedonia caid yacno nidoapobi.

¹⁴ Bédambocquid mibi nec, Papa. Mimbi Esuquidistu tantiaquid èbi yacpadquido icmeshun mimbi, Esuquidistu chuibeneta, caid èbitedi nec. Èmbi chuibanaid noadte bédabimboecquid nec. Noadte bèda pushudec noadsho uano-uanoec tabadquidon shèdec. Adembidi, Esuquidistu èbi yacpadquidon chuibenesho uano-uanoec tabadquidon tantiec. ¹⁵⁻¹⁶ Esuquidistu chuibanac noadte bédan danoshquiaid shèdacbimboen utsibon tantiec. Adembidi, Esuquidistun èbi chuibeneta caido Icho isachimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ènèdenquio yec abèd icquido aidtedi iquendac. Aden nuqui isquin Esuquidistu tantiesa icsho Nuquin Papan nèsiatequid iquendac. ¿Tsutsi Esuquidistu-padquidquio icpec? Adquid nibèdec. Adesa icsho ambi, Èbi chuibeneta, caidquio nebi. Adquid icquin chuibenenubi ¹⁷ piucquid bedte bunquin utsin-utsinquin Esuquidistu chuibanec. Adesa èbipadquido iquec. Piucquid bednuequin èbi yacpadquidon Esuquidistu chuibanenuquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

3

¹ ¿Pabado bédamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bédamboec tabadquin Esuquidistu Pabado chuibanosh, quequin dada uata, èmbi cac mimbi dada uaidtambi buampe? Padenquio. ² Mibèdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chèshèten pinchuquèn tansiachimboecnuc paucudtiapimboecnoc Nuquin Icbon tantiamioshi. Adembidi icsamboec tabadboedi nèbi bédamboec tabadsho isun Pabado Esuquidistu chuibanaido Codinto yacnocquido nec, quequin adomboembidi tantiabededec utsibon. ³ ¿Abi tantiaquid icsho

isun bēdamboec tabadmenuequin ambi cuēnote bedshun dada uampicpadquidta mibi meniondash? Padenquio. Esuquidistu tantiaشو isun unēstiapimbocquid aton Mayan abipadquidquo mibitedi meniondash.

⁴ Nuquin Papan tantiacpadomboen Esuquidistun, Ēbi chuibeneta, cac chuibanac Esuquidistu tantiaquid mibitedi yanacsho tantiec ěmbi chuibanaido aidtedi nec, quequin tantiembi. ⁵ Ēmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiembi. ⁶ Ēmbibi Esuquidistu chuitiapimbo icsho Nuquin Papan Mayanēn tantiamiac Esuquidistu chuibenequidquo nebi. Ambi, Nadomboen nata, quequin dada uamiampicpadomboen chuibanta caidpenquo nebi. Ambi nadomboen nata, quequin dada uamiampidtedi natiapimbo yec aidbēdi matses tabadtiaquid iquec. Aton Mayan meniaidbēd tabadtequid nec.

Abi tantiaquido bēdambo icmetequid aton Mayan

⁷ Nuquin Papan nadomboen nata quequin chiaid cuēnoten dada uacpaden nainquo yec matses abi yacno tabadtiaquid iquec, quequin dada uampid meniac abi chēnquiacpadec Moisesēn bētantiante comapenec bēchomauanquiec chēnqueboedi macuēsh budec bēdiambo chēnquesho isadaidbon bēstiapimbo icpampic. ⁸ Nēbi Esuquidistu tantiaquid bēdambo icmequid aton Mayan abipadquid meniaid ěnēdenquiocquidquo nec. ⁹ Ēmbi nadomboen nata quequin chiaid niacquid ěbēdi tabadtiaquid iquec, quequin dada uaid Nuquin Papan meniac buanshun Moisesēn aton matses ěnēdenquiocnoc tabadmetiapimbo icambien matses icsaid bedshunash icsaisa abided cuidadec unēsash uincuenquidēn abi tantiaquido ěnēdtiapimbocnoc tabadmendac. ¹⁰ Nēbi Esuquidistu unēsaid tantiaquid ěnēdtiapimbocquid nec, quequin chiac ambi dada uaid meniampid ěnēdabimbocquid nendac. ¹¹ Ai, nadomboen nata quequin chiaid Moisesēn bedshun meniaid ěnēdtequid icnubi bēdambo icmiantequid Nuquin Papan chomiaid icsaisa ěnēdtiapimbo iquec.

¹² Aden tantiaquin, Esuquidistu nuqui tantiaid icsaisa yec ěnēdtiapimbocquid nec, quequin chuibenquid nebi. ¹³ Moises Nuquin Papabēd onquec bēchomauanquiecboedi auēshquo nidec ushma-ushmactšēcquo yanash matses ismenquiocnuec bēpucudpampic. Adesa icquin ompoenquiocquin utsibon ma tantianu, quequin Esuquidistu chuibenequido nuqui nec. ¹⁴ Nuquin Papan dada uaid Moisesēn bēaid tantiate bunesa abēd icquido icpampic. Adquibidi pamumēdabimboc isadaidbo abi tabadec. Nuquin Papan cuēnoten dada uacpadquid isec onquec nēbi adquibidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamiaido nendac. ¹⁵ Nadomboen nata quequin dada uaid Moises menepampid isec onquec pamumēdabimbocquid isadaidbo utsi-utsiec iquec. ¹⁶ Esuquidistu tantiaquid icsho Nuquin Papan Mayanēn paucquin tantiamiaid nendac. ¹⁷ Nuquin Icho icsaisa icquin ěnden nadomboen nata quequin dada uapampicpaden naquidquo nec. Adquid Esuquidistu nec, quequin tantiaquin chuibenec nebi. ¹⁸ Paucac, Ēbi icsaid bedshunash Esuquidistuded cuidadpanēdash, quequin nuqui tantiec. Aidēnquio icsaisa icquin abipadquid nuqui meniac aton Mayanēn adquid nuqui icmebanec.

4

Nuquin Papan nadatiambocquin nadenequin Esuquidistu chuibenemiaid

¹ Aden Nuquin Papan nuqui tantiaquin, Esuquidistu chuibanta, caidquo icquin chieshenquiocquin aidi chuibanec nuqui nec. ² Icsash ompodquid icboedi nēbi muesa icquin Nuquin Papan chiaid utsi uainquo yec nuqui bēdamboec tabadec. Nuquin Papan isec, quec adequi nuqui tabadec. Adece tabadec ěbipadquid utsi yansho isash Nuquin Papan chiaid tantiate utsibo bunquiopec. ³ Esuquidistu chuibansho utsin-utsinquien bēdamboen tantiatiaquid iquec. Adquid Nuquin Papabēd tabadtiaquid iquec. ⁴ Nuquin Papapadquid Esuquidistu tantiaquid icnushē qeshun icsamianuequidēn Satanasēn pamunacimboben utsi-utsien tantiamenquo iquec. ⁵ Ēmbibi naid chiesa nebi. Matsesēn Icho Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi. ⁶ Abitedi uanuna, qeshun, “Inchēshquo icboedi uēshēmo yanquiota,” capampic Nuquin Papan. Adomboembidi Nuquin Papan chiaid pamumēdabimboben tantienquiocboedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec.

⁷ Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenequid icmiondashi. ⁸ Aden chuibansho mēyanaqui abi chuibenec nebi. Padpiden-padpidemboen natiamiaqui, ¿Atotsimbi napeba? qesho Nuquin Papan dayacquo icmedenebi. ⁹ Ēbi chieshēnquid dadpen icnubi ěbi bēdambo icmequid aidi iquec. Comapenen cuestanec, Unēsec, qeshun nianaqui abi Esuquidistu chuibenembi.

¹⁰ Esuquidistu mëyanquin unës uacpaden mëyanquin unës uatsen-unës uatsenshobi dayacquio icmedenioshi. Adoacsho uincuenaidën dayacquio icmedeniad nec, quequin utsibon isbededebi. ¹¹ Adembi Esuquidistu chuibansho unës uatsiashi, quequin chuibenec nebi. Aid chuibansho unës uatsenaqui abipadquid unësesa yanebi, quec bëdamboec tabadebi. ¹² Aden tantiaquin aid chuibanac abi tantiaquid yanash aidbëdi tabadec unësesa mibitedi yanendac. ¹³ Ambi chiapadamboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. ¹⁴ Aden tantiaquin Nuquin Papan Esuquidistu uincuemiacpaden aidbëdi tabadmenuen mibitedibëdtabi ëbëd icquidtedi uincuemendac, quequin chiombi. ¹⁵ Aid tantiaquid ma mibi icpanueshun chuibansho mëyanaid nebi. Mëyanahui utsi dadpen Esuquidistu tantiaquido ma yanu qeshun chuibenec nebi. Aden chiac abi tantiaquid icsho isun, Mimbi naidtedi bëdambo iquec, Papa, quequin ma Nuquin Papa utsibon chuiapanuna.

¹⁶ Aden tantiec dayactiapibi quenquo iquebi. Tsusio budquimbi badiadquidën-badiadquidënquien Esuquidistu tantiadonequidquio yanebi. ¹⁷ Natiamiantequid ënëndendac. Natiamiaid yashic Nuquin Papa yacno tabadec bëdamboshë iquendabi. Esuquidistupadquid icsaisa yec unësesa yanash ënëndtiapimbo iquendabi. ¹⁸ Aden tantiec, Èbi natiamiaid iquec, quiashic, Nuquin Papabëd tabadendabi, quequin comapenen tantiec tsadebi. Èmbi isaidtedi ënëndendac. Nuquin Papa yacnocquid ëmbi isacmaidtedibëd ënëndtemaid iquendabi.

5

Nuquin Papabëd tabadte iquendac quiaid

¹ Con nami shëniбудash unësash nibëdnuc Nuquin Papabëd tabadec nami chuca uaid iquendabi. Nami chuca uaid ënëndtemaid matsesën nachnenacmaid nec, quequin tantiembi. ² U abucquio nidabi yec uëshquequid nebi. Adquiocsho nami chuca uaid ënden meniondac, Cuishon, quetsiabi. ³ Aden meniac ëbibimboec isadsho isendac, quec tsadebi. ⁴ Nami chodquequid icnuc uëshquec nuqui tabadec. Nami chuca uaid chodquesa menepashuni mabi unësesa icpanu quec nuqui tabadec. ⁵ Con Mado Esuquidistu tantiaquid ëbëd abuc tabadmenuen ëbipadquid unësesa icmenu, quequin Nuquin Papan aton Mayan menetequid nuqui nec.

⁶ Aton Mayan meniaid iquec nami chodquetequid abi iquequi chieshenquio yec dayacquio yec nuqui tabadec. Adec tabadash abuc Nuquin Icbobëd tabadendabi, quequin nuqui tantiec. ⁷ Aton Mayan meniac nuqui isacmaid Esuquidistu cainec nuqui tabadec. Èmbi isaid ëmbi caintemaid nec. ⁸ Aden aid cainsho nami chodquesa badedquio menepashuni. Aden meniac Nuquin Icbobëd iquendabi, quequin nuqui tantiec. ⁹ Aden tantiec nidaidën tabadequi Nuquin Papa bunacpadquieci tabadnuna. Abuc nidash tabadec abi bunacpadquieci tabadoaindabi, quequin tantiembi. ¹⁰ Adembiidi abi tantiaquidtedishun naid ambi chuibante ushë chonoc Nuquin Icbon chuibanendac, quequin tantiembi. Utsi-utsien, Mimbi bëdamboen nabanoc, quequin chuibanendac abitedishun naid cuidquin.

Ma utsibotsen abi tantiaquid icpanu quequin chuibanaid

¹¹ Aden ambi tantiacpaden nabansho, Bëdamboen mimbi nabanoc, Nuquin Icbon ëbi caindac, quequin tantiaquin ma utsibotsen Esuquidistu tantiapaneshun mibi chuibenec nebi. Aid tantiaquin nabanec bëdamboec tabadsho Nuquin Papan tantiec. Ai, adec Pabado tabadsho ispombi, quequin adembiidi mimbi chuiplashun, quec tsadebi. ¹² Aden tantiaquin, Mibi bëdambo iquec, ëbi camenuen mibi dada uashunenquio iquembi. Èbi chienquiocquin, Bëdamboec tabadquin ismiacimbocquidën ëbi icsamboen chuisho aido chuita, quequin mibi dada uashunembi. ¹³ Aido, Pabadon tantiate icsabudosh quec. Adembiidi, Nuquin Papan chiapadamboen ëmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu qeshun aid chuibenec nebi utsibon chuibenenquiocnobi. ¹⁴ Chian anëdënquequid icsambocquid nësianushe quiash matses icsaid bedshunash abided cuidadec icsaisa Esuquidistu unëspaneđdash, quequin ma utsibon tantiapaneshun chuibenec nebi. ¹⁵ Ma ëmbi naid chiac ëbi tantiaquido ma ëbëdi icpanu, quiash unësash uincuempaneđdash Esuquidistu.

¹⁶ Adec unësash Esuquidistu uincuempaneđdash, quequin matses unësash uincuenta iquec, quequin abi tantiaquidon tantiec. Ènden, matsesquio Esus nec, quiondaidi nëbi, Nuquin Papan Chomiaid yec matses tantiec unësash uincuempaneđdash, quequin tantiembi. ¹⁷ Abi tantiaquid ambi tantiamiaid nec. Ènden matsesën tantiacpadquieci icboedi Esuquidistuntiacpadquieci bëdamboec tabadec abi tantiaquidquio. ¹⁸⁻¹⁹ Nuquin Papan ëndenquimboshë tantiampicpaden Esuquidistun naid nec. Nuquin Papan chiaid niacquid nuqui icboedëmbi matses icsaid bedshunash abided cuidadec Esuquidistu unëspaneđdash, quequin tantiaquin ma aidquio utsibon tantiapanu qeshun ambi naid nuqui chuibenec. ²⁰ Nuquin Papan

Esuquidistu chuibeneta cac nebi. Adquid icquin chiac abi tantiaquid yanash, Ēbi icsaid bedshunash Esuquidistuded cuidadpanēdash, quequin abēd icnuequin aid tantiaquiota. ²¹ Ambi cuidtiadquid nuqui icnubi Esuquidistu icsaisaded Nuquin Papan cuidpanēdash ma Esuquidistu ambi cuidaidpadquid tantiaquidtedi icsaisa yampanueshun.

6

¹ Matses bēdambo icmenu, quequin Nuquin Papan chiaid bēpiscudmane qeshun ambi tantiamiacpaden nabanec tabadta. ² Nuquin Papan chiampid chuinu. Tantia. “Mibi bēdambo icmete ushē chonoc cuēnsho tantiombi. Tantiesa icboedi nēid ushēnquio mibi tantiamiombi.” Aden Nuquin Papan chiampicpadomboen bēdamboen tantia. Nēbi Nuquin Papan bēdambo mibi icmenu cac, Ai, cata. Nēid ushēnquio ambi aton bacuē icmete ushē nendac.

Pabado natiamiaid

³ Icsamboec tabadquimbi Pabado Esuquidistu chuibansho, Tantiatiapibi, utsibo quetiapimboec bēdamboec tabadec nebi. ⁴ Nuquin Papan chuimiaid yec naded tabadebi: Chieshenquo yec dayacquiocquin ambi chiaid chuibenec bēdamboec tabadec nebi. Natiamiaid yec adequi tabadebi. ⁵ Utsin cuesaqui adequi bēdamboec tabadebi. Quēnēn nauedaqui adequi bēdamboec tabadebi. Nuquin Papan chiaid ěmbi chuibanac cuesnanubi padenquo yec bēdamboec tabadebi. Natia chonoadbudequi adequi bēdamboec tabadebi. Utsi tantiaquin nabanec natia ushcasequi adequi bēdamboec tabadebi. Bunquiec bēdamboec tabadebi. ⁶ Icsainquo yec bēdamboec tabadebi. Nuquin Papan chiaid tantesa uainquo yec bēdamboec tabadebi. Tantiatiapimbo yec utsibo tabadsho isun adembi Nuquin Papan chiaid chuibenec nebi. Naden chiac tantiatsiash, qeshun chuibenembi. Adembi, Nashunquin chiac tantiatsiash, quequin adquid nashunembi. Nuquin Papan Mayanēn tantiamiaid yec bēdamboec tabadebi. Muainquiocquin utsi abimbo tantiec adecbidi tabadebi. ⁷ Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiapadomboen nabanec nebi ma utsibon abi icsaid ěmpanueshun. ⁸ Ēbi chiec: Pabado bēdambo iquec, quenubi adequi tabadebi. Utsin ěbi chuioaic: Pabado icsambo iquec, quenubi adequi bēdamboec tabadebi. Ēbi icsamboen chuinubi adequi bēdamboec tabadebi. Ēbi bēdamboen chuinubi adequi bēdamboec tabadebi. Muaquid nec, quenubi abimbo chuiquid nebi. ⁹ Ēbi isquidēmbi, Ēmbi isacmaid Pabado nec, caqui ěmbi chuibansho tantiaboedo nec caimbi. Ēbi unēs uate bunubi abi chuibanec capucuenebi. Mēyanaqui unēsabi yec nidebi. ¹⁰ Unēsquo icmiaqui Esuquidistu tantiec bēdambo iquebi. Con na nibēdsho isun adembi Esuquidistu chuibanec nebi ma Esuquidistu tantiec utsibo bēdambo icpanueshun. Con na nibēdsho isash Nuquin Papan bacuē yec aton natedi con na nec, quequin tantiec tsadebi.

¹¹ Chuitiapibi, quenquiocquin ěbi natiaboedtedi mibi chuibanombi. Mibi comapenen tantiaquin ěmbi nabanaid mibi chuibanombi. ¹² Mibi tantiaquioquin chuibanquid ěbi icnubi ěbi tantiaquin chienquo mimbi iquec. ¹³ Pabado con bacuēbo caido nebi, quequin mimbi naid mimbi tantiaidbēda ompoenquiocquin ěbi chuiban, caimbi mibi.

Esuquidistu tantiesabēdtambi icsain nainda quiaid

¹⁴ Esuquidistu tantiesabēdtan icsamboen nainda. Adembi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, qesa aton papa. ¿Nuquin Papan bēdambo icmiaidēnda ambi chiaid niacquidbēdtan nabampadic? ¿Nuquin Papan Mayanēn tantiamiaidēnda Icho chieshēnquidbēdtambi chieshēmpadic? ¹⁵ ¿Esuquidistu Satanaspadquidta nedic? Padenquo. ¿Esuquidistu tantiaquid abi tantiesapadquidta nedic? Padenquo. ¹⁶ ¿Nuquin Papan ambi uaidbimboecnuc matsesēn nacnenaid tantiaquidta aton Mayan Nuquin Papan meniaid icpadic? Padenquo. Abi tantiaquid aton Mayan menec. Nuquin Papan dada uamiampid dada uanu. Ista.

“Ēbēd icquidbēd iquendabi;

Aidbēdi capuebi;

Aton papa nebi;

Con matses adquido nec,

¹⁷ Con matses icquin ěbi tantiesan ěmbi chiaid niacacpadomboen nainda.

Adecbidi aid icsacpadeb tabadenda.

Adecbidi icsainquo yec tabad.

Adquid ěbēd iquec cho caindambi.

¹⁸ Adquidon papa iquendabi;

Adquid ěmbi con madobēd con champi caid iquendac, quec Nuquin Papa.” Abi tantiaquido nadatiambocquidēn aden chiec.

7

¹ Naden nanuna, quequin Nuquin Papan chiac nuqui naid icsatedibēdtabi nuqui tantiaid icsatedi ēnu, quequin Nuquin Papan chiacpadomboen nabanec tabadtenenuna.

Unēsquo icboedi mimbi naid tantiaish bēdamboshē iquebi quiaid

² Adembidi, ēbēdtabi ēbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi. ³ Pabado tantienquoio yec icsaobi mibi camenuen nēid chuiquin dada uainquo iccombi. Mibitedi tantiec tsadebi, quequin padpiden chiembi. Abimbo caimbi. Unēssequi mibi bēshuntiapimbo iquendabi. ⁴ Mimbi chiacpadpenquiochoedēmbi naosh, quequin choquidēn chioshi. Aden chuisho tantiaishun, Nuquin Papan chiacpaden nabanquidquoio nec, quequin mibi chiec nebi. Unēsquoio icboedi mimbi naid tantiaish bēdamboshē iquebi. Utsin natiamiaid icshobi bēdambo iquebi, mimbi ēbi camioc.

⁵ Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedēmbi tantesa uatsiash, quec quenenenquoio iccobi. ⁶ Unēsquoio icsho ēbi tantiaquin Nuquin Papan Tito padpiden chomiosh ēbi bēdambo icmeoanuen. ⁷ Choashun mimbi aid tantiaquin nabanaid Titon chioshi. Adembidi, ēbi iste mibi bunaid chioshi. Mimbi dada uaid isash unēsquoio icquin, Codinto yacnocquidon mimbi chiacpaden nabanosh, quequin Titon chioshi. Aden chiac bēdamboshē yanobi ad yenquoio icboedi.

⁸ Mimbi dada uaid isash Codinto yacnocquido unēsquoio iccosh, qesho tantiaish, Icsambo icchitobi, quenquoio iquebi. Aden dada uaic icsambo iccobi, quetiapiambo yequi mibi unēsquoio yacpadequi unēsquoio iccobi. Yuec mibi ad yenquoio iccoc. ⁹ Adecbidi nēbi bēdambo iquebi. Ēmbi mibi unēsquoio icmiac mibi icsaid ēnquin Nuquin Papan chiacpaden nabanec, quec utsibo. Aden chuisho tantiaquin mibi unēsquoio icmequin mibi icsabudmiambo iccombi. Unēsquoio icmiaqui mibi bēdambo yanoc. ¹⁰ Unēsquoio icmiac, Nuquin Papan chiaid niaccombi, quiash unēsquoio icquin mibi icsaid mimbi ēnac. Adsho isun Nuquin Papan ēnēdtiapimbo cnoc aīdbēd mibi icmendac. Aden unēsquoio icmiaqui, Bēdambo iquebi, mibi quendac. Adecbidi mibi icsapadec icsainquoio mibi icpendac. Padnuen Nuquin Papan chiacpaden niacquin ēnesa abi natiamiaiduidi tantiec Nuquin Papa yacno puduedtiapimbo iquendac. ¹¹ Padnuen mibi unēsquoio icmiac nēbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chuipoc. Nuquin Papan cuidnushe quequin mibi icsaid mimbi ēnoc. Adembidi, Ēbi padpiden bēdamboen is, quequin Nuquin Papa mimbi chioc. Icsashun chienquiochoedēmbi nēbi cuembo bēdamboen chuinu, quequin mimbi chuibanoc. Aden mibi icsaid ēnacsho isun mibitedi icsaquin ēntiapimbo icquidēn nacpaden naisa nec, quequin tantiembi. ¹² Icsaquid ambi icsa uanaidbēdtabi chuinuven mibitedi dada uainquoio iccombi. Abentsēc icsash abitedi unēsquoio iquec. Adquiecbidi ēbi unēsquoio icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin ¹³ ēmbi tantiacpaden naquin mimbi bēdambo iquebi camiaid nebi.

Adembidi Tito yuedquin mimbi bēdambo iquebi camiaidbidi niosh. Ēbi yuedenquioctsiash queboedi niosh. Yuedoshi, Tito qesho tantiaish bēdamboshē iquebi. ¹⁴ Mibi nidmembī, Tito, qeshun, Ēbi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ēmbi chuibocpadomboen mimbi nashunac. Aden tantiaish, Abimbo chiombi, quepobi. Ēmbi mibi muainquiocquin chuibanacpadec adquibidi mibi nabanec tabadaid abimbo iccosh. Adomboembidi Titon mibi isbanosh. ¹⁵ Ēbitedi chushcatsiash, quequin mibitedishun Tito yuedpanēdac. Aden yuedac, Naden nata, quiosh Pabado, cac cacuidanenquiocquin mimbi nabanoc, quec Tito. ¹⁶ Adoaidi ambia tantiaquid icquin ēmbi chiac mibitedishun nabanendac, quequin tantiembi. Aden tantiec bēdambo yec tsadebi.

8

Aton na nibēdquid icsho aton na dadpen icquid menequid

¹ Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nēbi bēdamboen nabanec tabadaid chuinu. Tantia. ² Natiamiaqui bēdambo iquebi quec aido tabadec. Adec tabadquin Esuquidistu tantiaquid utsibo tantiaquin menuequin aton na daēdpactsēc musucshun dayun uaosh. ³ Ēmbi, Meneta, cainquiocnobi aton na bedtequid naimbudtsēcquien menuequin bedbanosh. ⁴ Esuquidistu tantiaquid utsibo, nidaid Udeya caid yacnocquido, aton na nibēdec natiaic, quequin chiac Masedonia caid yacnocquidon, Aido menenuna, quequin comapenen chuiposhi. ⁵ Mitsana daēdpactsēc icnuc utsibo mimbi menetiapiambo icpec, quequin chuinu quenubi Nuquin

Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi. ⁶ Adomboen menenun bedbamposh. Adosho isun Tito nadombi. Mimbi ënden nidaid Udeya caid yacnocquidon natiaid chuiabanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ⁷ Ambichiactedta bedbanoshe? Isnu, qeshun istanta, quequin Tito chiombi. ⁸ Naden naquid Codinto yacnocquido nec, quequin mibi tantiemi. Nuquin Papan Mayanën tantiamiaidquio yec comapenen Esuquidistu tantiaquido nec. Esuquidistu tantiaquin aid chuiabanec. Nuquin Papan chiaid ambia tantiaquidquio Pabado nec, quequin tantiaquin, Naden nata, quequin ëmbi chiacpadomboen badedquio comapenen naquidquio mibi nec. Adembidi ëbi tantiaquin naquido nec. Adquid mibi nec, quequin, Natiamiaido menenun bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

⁸ Meneta, quenquio iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi. ⁹ Nuquin Icho Esuquidistu abuc tabadec abitedishun Icho ichoedi nuquitsen abuc abëdi tabadmenuec matesash nidaidën tabadnuc aton na nibëdpadene. Aidën matses tantiaquin nabanacpaden utsibo tantiaquin nabanta.

¹⁰ Ëmbi tantiacpaden mibi adembi chuinu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaquin mimbi tauapondac. ¹¹ ¿Aden nanuna, qeshun mimbi chiacted ënquinda bedshun dayun uao? Padenquiocquin adota. ¹² Mitsana daëdpactsëc icnuc daëdpactsëc musucshun menesho isash, Dadpen meneta, quenquio Nuquin Papa iquec.

¹³ Aton na nibëdquid icsho, Natiacquin meneta, quenquio iquebi. Aton na nibëdquid icsho aton na dadpen icquidën menec. ¹⁴ Mitsana dadpen icquid mimbi musucshun meniac aton na nibëdquid bëdambo iquebi, quepec. Aden meniac mibëdi aton na nibëdquid bëdambo iquendac. ¹⁵ Nuquin Papan dada uamiampid nad iquec. Chuinu. Tantia. Petequidëmpi Nuquin Papan mana caid meniaid chuiquin: “Shubun tabadquid dadpeshun aitedaidtedquien bedbanshun peshun napi uaid nibëdosh. Adecbidi, aton shubun daëdpactsëc tabadquidon aited bedbanshun peshun napi uaid nibëdosh.” Adec Nuquin Papan meniaidëdi bëdambo yampicpadec aton na dadpen icquidbëdi ambi meniaido bëdambo yampec.

Tito Codinto yacno nidte

¹⁶ Nëbi Tito mibi chuinu. Tantia. Ëbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bëdambo iquec, Papa, quec tsadebi. ¹⁷ ¿Codinto yacno tsutsi nidpatsiash? quequin ëmbi chiac, Èbibi nidebi, quiosh Tito. ¹⁸ Tito mibi yacno nidnuesho tantiashun nuqui con utsi caid utsi Titobëdi nidta caombi. Aidi Esuquidistu chuiabanquid nec, quequin utsibon chiec. Bëdamboquid nec. ¹⁹ Nidaid Masedonia caid yacnocquidon, Esuquidistu tantiec iccuededquidon ëmbi dayun uaid Pabadobëdtan buanec nid caidbidi Titobëd nidquid nec. ²⁰ Aid daëd ëbëdi nidsho isash, Nuqui na buanquin ampetsiash, quetiapimbo utsibo iquec. ²¹ Nuquin Papan tantiamiacpaden aidobëdtambi bëdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobëdtambi buanshunembi.

²² Tsyuec nidebi, quequin utsibobëdta Tido mibi yacno nidmembali. Ëmbi nata cac bëdamboen nabanquid aitedi nec. Mimbi chiacpadomboen nashunquido Codinto yacnocquido nec, quec aido mibi yacno nidec. ²³ Mibi nashunquin ëbëdtambi Esuquidistu chuiabanquid Tito nec. Aidbëdi Esuquidistu tantiaquid utsi nidec. Esuquidistu tantiec iccuededquidon nëuëshquio putuanec Codinto yacno nidta caboedi Titobëd nidec. ²⁴ Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Ëmbi chiacpadomboen nashumbanta ma mimbi nashumbanacsho aido nidmequidon Masedonia yacnocquidon tantiapanuna.

9

¹ Ënden Esuquidistu tantiaquid utsibo tantiaquin nashunta quequin ëmbi chiac, ² Adonona, qeshun mitsana bedbanquin mimbi tauaondac. Adsho isun nidaid Masedonia yacnoësh Esuquidistu tantiec iccuededquido mimbi menueququin chuibocpadomboen chiombi. Abentsëcshun-abentsëcshunquien menebanquin dayun uanuna, quequin seta utsin mimbi chuibocpadomboen ëmbi chiac Masedonia yacnocquidotsen, Adomboembidi nabanembi, queoposh. ³ Aden aidon chuisho tantiashun nuqui con utsi caido mibi yacno nidmembali mimbi chiondapaden bedbanambo icnushe qeshun. ⁴ Nidaid Masedonia caid yacnoësh Esuquidistu tantiec iccuededquido ëbëdien tsyuec mibi yacno nidchitec. Aidobëdi mibi yacno choshon ëmbi chiacpaden mimbi bedbanambocsho isash, Abimbo

chiachimboen chuichitombi, quec natiac bëpiutsiabi. Adquiecbidi mibi icoaic. ⁵ Adquo icnushe qeshun utsiboba mibi yacno nidmembali. Aido mibi yacno choacsho mimbi chiondacted bedbanquin dayun uaid mimbi ismetsiac, Abimbo chiombi, quequin. Aido chonoc mimbi chiacted bedbanquin dayun uambochoedëmbi nëbi mimbi bedbampec. Aden mimbibi bedbanquin mibi menete bunacteduidtsëqui mimbi menec. Utsimbic, Menetiapibi, queboedëmbi utsin, Bec cho, cac aton piucquid tantiec unësquo icquin menetsiash. Aden tantiaquin menenda.

Nuquin Papan na dadpen bedmiadën aton na nibëdquid menequid

⁶ Nuquin Papan chiaid chuinu. Adembi tantiata. Tied icbon daëdpactsëc nitsinac caniaash ëshëacsho aiddtedtsëcbidi bedpec; dadpen ambi nitsinac caniaash ëshëacsho dadpen bedpec. ⁷ Adquibidi aton na icquid iqueque. Tantia. Chuinu. Nëidted meneneuquin ambi chiacted menequid. Ëmbi meniaid tantiash bëdambo iquebi, quepec adquid. Utsimbic, Menetiapibi, queboedëmbi utsin, Nëidted bec cho, cac menepec. Aden utsin chiacted meniash, Bëdambo iquebi, quetiapimbocquin menec. ⁸ Mitsana menete bunquin mimbi chiacted menesho isun Nuquin Papan uesadmenquocquin mimbi bedmec ma utsi-utsien menebampaneshun. ⁹ Nuquin Papan dada uamiampid adomboembidi chiaid nad iquec: "Nuquin Papan dadpen bedmioshi, quequin tantiaquin aton na nibëdquid utsi-utsien menebanec.

Aden menequid tantiaquin ënenquocquin ambi naboe Nuquin Papan chuibanendac."

¹⁰ Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid tiedën caniquid ëshë abentsëc siaid dadpen yanec. Matsesën petequid adquiecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpaneshun. Aden mimbi dadpen menebanac aidontsen ambi bedaid musucshun utsi meneopec. ¹¹ Aden mimbi meniac utsibotsen, Bëdambo iquebi, quec tabadec. Adec tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

¹² Nuquin Papa tantiaquid icquin aton na nibëdquid Esuquidistu tantiaquid dadpen icsho menebanquin mimbi bëdambo icmiaid dadpen iquendac. Adembidi, Nuquin Papa bëdamboshë iquec, quequin aidon chuibanendac. ¹³ Meniacsho isash, Esuquidistu tantiaquid nebi, quequin abimbo chuiquidquo aid nec, quequin mimbi meniaidbëdtambi utsibon mibi chuibanendac. ¹⁴ Adquidquo nec, quequin utsibon mibi chiec. Mimbi tantiamiacpadomboen nabanquidquo Codinto yacnoquid nec. Aido bëdambo icme, Papa, quequin mimbi meniaidon adomboembidi chiendac. ¹⁵ Aden aidon chuinubi naden nuqui Nuquin Papa chiec. Mimbi chomiaid Esuquidistu ëbi bëdambo icmenuc ëbi icsaid bedshunash abided cuidadec unësash uincuempañëdash. Aidpadquid utsi nibëdec, Papa, quequin nuqui chiec.

10

Ëmbi dada uacpaden mibi yacno choshon adomboembidi nabanembi quiaid

¹ Comapenec chushquenquocquin matses bëdamboen tabadmenuequin chuibanquid Esuquidistu icpañëdash. Mibi yacno choshon Esuquidistupadquid icnequin ëbi chieshënquid bëdamboen tabadmenuequin chuibanendambi. Ëbi chieshënquido nadeq onquequin ëbi naden chiec, quec. Nuquibëd tabadquin dacuëdacimbocquin comapenen Pabado chushcainquid iquec. Utsi yacno nidshun dada uaquin comapenen chushcaic, quiosh. Mibi chiec adosh. ² Adsho tantiash mibi yacno choash tabadquin chushcante bunenquid icquimbi, Ambibi tantiacpaden nabanquid Pabado nec, quequido bëdamboen chuibanembi. ³ Esuquidistu tantiaquid yanshun icsaquidën tantiacpaden nabanesa nebi. ⁴ Mibi yacno choshon matsesën tantiacpadpenquocquin Nuquin Papan tantiamiacpaden ëbi chieshënquido Satanasën icsamboen tantiamiaido Nuquin Papan chiaid chuibanendambi. ⁵ Satanasën tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibëdec, qeshun ëmbibi tantiacpaden naic bëdambo iquec, quequin tantiamiaido nec. Aden tantiaquid icsho isun ambi icsamboen tantiec pamumëdacimboc yaid ëmenu quequin Nuquin Papan chiaid ëmbi chuibanubi abi pamumëdacimboc yaid padpidec pausdtiapimbocnoc pauchanshun ambi tantiacpaden Nuquin Papan pausunendac ma ambi chiacpadomboen nameneuquin. ⁶ Aden chuibanshun Nuquin Papan chiacpadomboen utsin-utsinquien abi icsaid ënabicsho isun comapenen cuidendambi.

⁷ Ambi isaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsëcquid isadtsec, quepec aido. Aden chuiquid, Esuquidistu tantiaquid nebi, ëbi qesho tantiash, Muec nec, quetiapimbo iquec. ⁸ Abi

tantiaquid ëbi yansho, Esuquidistun, Ëbi chuibeneta, cashumbic abi tantiaquido abi tantidonequid icmenuequin chuibanquidbidi icmiondashi. Adquid icmiac ambi chiaid ëbi chieshënkuido tantiamenuen chuibanubi aidon tantiaid icsa paucshun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmoshi, quequin tantiec, Adesa nebi, quetiapimbo iquebi. Aden tantiaquin ëmbi chiapaden naimbi mibi yacno choshon caimbi. ⁹ Adquid nebi, quequin, Dacuëdampamboquid Pabado nec camenuen dada uainquo iquemb. ¹⁰ Mibi aden dacuëdmenu, quenquo icnubi ëmbi dada uaondaid bedshun isun naden utsin ëbi chiosh quec. Chuiquidën comapenen chushquequin chiapadomboen Pabado dada uaic. Nëmbo choshon ambi dada uaquin chiapaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istsëccombi. Tantiatiapimbo noc chuibanondash, quequin aidon ëbi chiec. ¹¹ Aden ëbi chiec onquequidën bëdamboen tantiaata. Chuinu. Ëmbi dada uacpaden mibi yacno choshon adomboembidi nabanembi caimbi.

¹² ¿Esuquidistun, Ëbi chuibeneta, caid nebi, quepecta ëbi chieshënkuido iquec? ¿Adenda Esuquidistun, Ëbi chuibeneta, caidënkuido utsi icsamboen chuipec? ¿Esuquidistun, Ëbi chuibeneta, caid nebi, quequin abimbo chuiquidquio yec muaquin chuiquidpadquid nebi, quepectabi ique? Padenquo iquebi. Esuquidistun, Ëbi chuibeneta, caid nebi, quec muaid chuiquin abipadquid utsibëdtambi icsamboen nabanash, Nuqui bëdamboen naoc, cananec. Ambia icsamboen nabanquidën chuibanquin ismiac ambibi tantiacpaden nabanec abipadquid yanquidon. ¹³ Ëbien Nuquin Papan tantiamiacpaden chuibanquid nec. Ambi tantiamiacpaden mibitëdi chuibanquid nebi. ¹⁴ Codinto yacno nidshun anouidi tabadquin Esuquidistu chuiban, Nuquin Papan cac mibëd tabadquin chuibanondambi. ¹⁵ Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquo iquebi. Mibëdi tabadquin ëmbi chuibanac aid tantiaquid mibitëdi yanondac. Adsho isash Esusquidistu tantidonequidquio yampashun, quec mibi tantiec tsadebi. ¹⁶ Esuquidistu ëmbi chuiban-chuibanac aid tantiadonequiec mibitëdi tabadsho isash Esuquidistu utsin chuibanacmanombo chuibanoaic nidendabi caombi. ¹⁷ Aden Esuquidistu chuibanac, Ëbibi bëdambo ictiapimboquid mimbi bëdambo icmiaid nebi, Papa, quequin ma Nuquin Papa Esuquidistu tantiaquidtedishun chuipapana. ¹⁸ Bëdamboen nabanombi, abibi quesho Nuquin Papan bëdamboen istiapimbo iquec. Amb, Bëdamboen mimbi naoc, cauidi ambi bëdamboen isaidquio nec.

11

Pabado muesa icnubi muaquido

¹ Nëbi ëmbi dada uaid isash, tantiesa onquiacimboen mamëmenuequin Pabado chiec, quenquiocpashun caimbi mibi. Aden tantiatiasash, quequin abi dada uaimbi. Nëid bedash ëmbi abia dada uaondaid isec mibi onquiacpadec nëbi nëid mimbi iste dada uaid isec onqueta. ² Nuquin Papan tantiamiacpade mibitëdi cudasquidquio nebi. Adec cudasquin aton champi utsin, Bednu, cashunac utsin, Bednu, cac Bedadenda, quequin amën aton champi chiacimboen, Esuquidistun bednu caid yec icsamenuequidën, Bednu, cac, Bedadenda, caimbi. Esuquidistu ëmbi chuibanaido mibitëdi bedec choeque. ³ Ëmbi chuibanac Esuquidistu tantiauidquimbi nisi bëdambo isadachimboecquidën muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi. ⁴ Adec ëbi tsadnubi Codinto yacno choshon utsin Esuquidistu ëmbi chuiboed utsi uain chuisho badedquio tantiec aidon. Adembidi, Mayan utsi iquec, quesho tantiasash, Ëbi mene, quec mibi. Adembidi, Mibi bëdambo icmequid Esus utsi iqueque. Aid tantiaata, quequin ëmbi chiaid utsi uain chuisho, Abimbo iquec, quequin tantiec mimbi. Aden utsibon ëmbi chuiboed utsi uain chuisho tantiec, quesho tantiasash Esuquidistu tantesa uatsiasash, quec tsadebi. ⁵ Esuquidistun ëbi chuibeneta cac Nuquin Papan tantiamiacpaden chuibenec nebi. Aden chuibenenubi mibi, Bëdamboenshë utsibon chuibanacpaden Pabado chuibanenquo iquec, quesho tantiasash, Icsamboen chiombi, quetiapimbo iquebi. ⁶ Utsibon bëdamboenshë chiacpade Pabado onquenquo iquec, mibi quenuc Esuquidistun, Ëbi chuibeneta, quequin ambia tantiaquidën tantiamiacpadomboen mibitëdi chuibanombi bëdamboen tantiaquin.

⁷ ¿Codinto yacnocquido ma Esuquidistun bëdambo icmepanueshun chuibanequi, Bec cho, quenquo yectabi icsape? ⁸ Mibi Esuquidistu chuibanu quiash Esuquidistu tantiec iccuëdquid utsibon na ampiacimboec tabadobi. Aidon aton na meniaqui aido nashunenquo yec mibi yacno nidash tabadquin mibi nashunquin Esuquidistu chuibanondambi. ⁹ Adec mibi yacno tabadquin Esuquidistu chuibanec bunec tsadec, Bec cho, quenquo iccondabi.

Nidaid Masedonia caid yacnoësh choquidëmbini meniondash. Aden ënden, Bec cho, mibi cainquio iccondacpadec nëbi adquecbidi tsadebi. ¹⁰ Esuquidistun chuimaidquio nebi. Adquid icquin adquid nebi quequin chiembi mibëdi nidaid Acaya caid yacnocquid utsitedi, Padi. Aden chienda, quetiapimboconoc. ¹¹ ¿Atotsi quiashini, Bec cho, quenquio icpe? ¿Mibi tantienquiocquindambi mibi, Bec cho, cainquio icpe? Mibi tantiec tsadebi. Codinto yacnocquido Pabodon tantiaid nec, quequin Nuquin Papan tantiec. ¹² Aden mibi tantiaquin, Bec cho, cainquiocquin Esuquidistu chuibenec nebi mimbi bëdamboenshë chuibanquid caid: Pabado nabanec tabadacpadec tabadebi, quetiapimbo icnubi.

¹³ Aido Esuquidistun ëbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec. ¹⁴ Aido tantiamequin ismequid Satanas nec. Nuquin Papan abi yacnoosh uaid mayan bëda aibëdi tabadquido icsaisa yacpadquid nebi, quequin abipenquiocnoc chuiquin ismequin tantiamiac ¹⁵ adquecbidi ambi namiaidtedi bëdambocquidbimboec capucededec. Cuidte ushë chonoc aido icsaid Nuquin Papan comapenen cuidquin chiendac.

Pabodon abi mëyanaid chuibanaid

¹⁶ Adembi di chuinu. Tantia. ¿Mamëmenuequin tantiesa onquiacbimboendambi ëbi icaid chuibandio? ¿Utsin aden chuibansho tantianu, quepecta mibi ictsia? Aden chuibanenquiocquin ëbi icaid chuibanuna, ¹⁷ Chuita, Nuquin Icbon cainquiocnobi. ¹⁸ Abi icaid utsin-utsinquin chuibanec, quequin tantiaquin adomboembidi ëbi icaid chuibanuna. ¹⁹ Bëdamboen tantiaquidquio nebi, qeshun mamëmenuequin ambembi chiacbimboen chuisho tantiec mimbi. ²⁰ Ambembi chiacbimboec, Yuanu, qesho tantias icsamboen tantiaquidbimboec mibi yuadete bumpec. Ambembi chiacbimboec, Bec cho, qesho icsamboen tantiaquidëmbimboen menebanec mimbi. Muaquin chuiquin mitsana bedshunaqui cacuidenquio yec tabadec mibi. Aden mitsana ambembi isash, Mibi chuiquid nebi, qesho tantias, ¿Tsuntsin mibi adquid icmiosh? quenquiocquin aidën chiacpaden nabanec mimbi. Aton yuabimboecnuc mibi mëyanauqui, Min yuapenquio nebi, quenquio iquec mibi. ²¹ Nuquin Papan yua icta cac, Padi, quetsias, quequin aden mibi chuitiadquidëmbi chienquio iccondambi.

Mibi yuanuequidon ambembi abi icaid chuibanac. Adomboembidi Pabodon abi icaid chiec, Codinto yacnocquido quetsias, quequin tantiaquin ëbi icaid chuibanu. Tantia. ²² ¿Mimbi bëdamboen chuiquid nec caid, Isadaidbo nebi, quepecta iquec? Adembi di, Èbi isadaidbo nebi, caimbi. ¿Abadauanën tsyuecquid nebi, quepecta aido iquec? Adembi di, Èbi Abadauanën tsyuecquid nebi, caimbi. ²³ ¿Esuquidistu chuibanquid nebi, quepecta aido iquec? Èbibi Esuquidistun ëbi chuibeneta caidquio nebi. Esuquidistu chuibanquid ëbi yacpadquid utsi nibëdec. ¿Mibi mamënsnumenuequindambi aden chuijadi? Padenquio. ¿Èbi yacpadquid utsida iqueque? Tantiata. Chuibanu. Utsi bëdiactšëc chonoadnuc comapenec chonoadobi. Adecbidi quënën nauedaidd utsi icnubi quënën nauedeniaid nebi. Adecbidi utsi bëdiactšëc cuesaid icnuc yuen cuesto-cuestoaidd nebi. Mëyanac nëstsenobi, utsi quenubi aden mëyanac unëstsen-unëstsemboedi nebi. ²⁴ Isadaidbon cueshanten 39ted tambanquin cacuestoniondashi. Yuecshun aidtedembidi. Yuecshun aidtedembidi. Yuecshun aidtedembidi. Yuecshun aidtedembidi yuenquio cacuestonioshi. ²⁵ Adembi di cuesten cuesoshi. Yuecshun padpiden. Yuecshun padpiden. Adembi di cuënoten se-sioshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bidiadec mentoadan abentsëc ushec cano cuëshë bedash mentoadmane quiash noadpondabi. ²⁶ Adecbidi quenenuquio yec capucenuequin Esuquidistu chuibeniombi. Adec utsi-utsec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpembo adquidbidi icposh. Matses dadpen yacno adquidbidi icposh. Unës uachitoshe, quenquio yec matses nibëdacno capuceniobi. Adecbidi acte dapan capuceniobi. Esuquidistu tantiaquid nebi, quequin abimbo chiacbimboen chuiquidën unës uachitoshe, quenquio yec capuceniobi. ²⁷ Con na bednuec chonoadec uëshquiobi. Padpiden-padpidemboen ushenquio icquin chuibanombi. Piasac acte bunquin adembi di Esuquidistu chuibanombi. Iquenquimbi chuibanombi. Dashcute icsactšëcquid dasiuidquimbi chuibanombi. Yuedenquio yaqui adembi di chuibudombi. ²⁸ Èmbi chuiboeed Esuquidistu tantiabenebicquido icpec, quequin capucenuequin chuibeniombi. Utsi yacno nidshun, Èmbi chuiboeedo bëpiscudnushe qeshun mibitedi chuiquin dada uaombi. ²⁹ Esuquidistu tantiaquid chieshec dayactiapimbo icpec. Adquibidi iccobi, quequin tantiec tsadebi. Esuquidistu tantiaquid icsaosh, qesho tantias unësquio yec, Nëbimbobi icsamianquid comapenen cuidta, Papa, quec tsadebi.

³⁰ Aidedt ëbi icaid icnuc chieshenquo yec ëbi dayacquo yaid chuiabanombi. Nëbi ëbi cuenonndaichuinu. Tantia. ³¹ Abia Yampidën, Nuquin Icho Esuquidistun Papan nabanaid ënenquiocquin chuitequidquo iquec. Aidën nabanaid chuiabanec muesa Pabado nec, quequin ëbi cuenonndaichuinu Papan tantiec. ³² Ëbi cuenonndaichuinu nad icpondashe. Chuinu. Tantiata. Damasco yacnocquido ancanquidën Adetas cuëmëdquidën Pabado Damasco yacnoësh puduensho bedta quequin shubu dadpen daquënë uaid dapa shëcuëtedi sondado ëctabëdmepondash. ³³ Adec daquënë uaid shëcuë cuëmanquo uaid dapa tabadnubi bednushe queshun abuc daquënë uaid iste shëcuëshun tsitsan dapa antsadunshun daquënë uaid cachoc budmepondashi. Budmiac ancanquidën bedadiapimbo yec cuempondabi.

12

Nuquin Papan Pabado ismiaid

¹ Ëbi icaid chuiabanquin ëmbi dada uaid isbanash, Esuquidistun ëbi chuiabeneta caidquo Pabado nec, quequin Codinto yacnocquidon tantiatsiash, quequin adobamboedtedi chuiabanquin dada uaombi. Ëbi icaid chuiabanquin ëmbi dada uaid isash, Abi natiamiaid dadpen icpec, quetsiash, quenquiocquin dada uaombi. Adembidi Nuquin Papan ëbentsëqui ismiondaichuinu. Tantia. Nad iccondashe. ² Endenquimbo seta 14ted matamequin Nuquin Papan bëdamboshë yacno indopondashi. Intacchobi abuc indopondashi, quetiapimbo iquebi. Tantienuo iquemb. Adecbidi ëmbi tantiateuidi indoac, quetiapimbo icoaibi. Tsaudi, tantienquo iquemb. Nuquin Papambien tantiec. ³ Abuc bëdamboshë yacno indopondashi, quequin abimbo chiemi. ⁴ Abucshun utsi chütemaidquo tantiapondabi. Ëmbi tantiondaichuini tantiapimbo icpebi. ¿Mitsipadentsimbi ëmbi abucshun tantiaobed con onqueten chuiatsiaba? ⁵ Bëdambocquid icsho Nuquin Papan abi yacno indondashi, quetiapimbo iquebi. Natiamientequid dadpen icnuc ambo abuc nidabi yec bëdambocquid nebi, quetiapimbo iquebi. ⁶ Abuc nidshun ëmbi isonndaichuinan dada uaid isash, Bëdambocquid Pabado nec, quequin tantianushe queshun padenquin iquemb. Ëbi bëdamboec tabadsho isash, Pabado bëdamboec tabadec, quesho tantiaish bëdambo ictsiabi. Adecbidi chuibansho tantiaish, Abimbo chuiquidquo Pabado nec, quesho tantiaish adecbidi bëdambo ictsiabi.

Satanasën natiamiaid

⁷ Bëdambocquid yansho Nuquin Papan abuc indoshon ismiondashi, quequin Pabado chuinushe queshun Satanasën chomiaidën ëbi natiameded-natiamededshe isash, Chën, quenquo Nuquin Papa iquec. Satanasën chomiaidën natiamiac pinchuquën siadaid namïn nidaëdaid chictiapimbo yachimboec con dada bëdanenquo iquec. ⁸ Adec con dada bëdantiapimbo icnubi, Ëbi natiamequid cueme, Icho, quequin chiondambi. Adshumbic, padpiden. Adshumbic padpiden adomboembidi chuided-chuidedondambi. ⁹ Adoaquien, Padi. Bëdambocquid icmenuequin naid nec. Mibi dayacquo icmequid con Mayan mibëdi iquec, quequin Nuquin Icho chiondashi. Adoaqui, Bëdanambo icsho Nuquin Icho ëbi dayacquo icmec quequin tantiec bëdambo iquebi, quec tsadebi. ¹⁰ Aden tantiec con dada icsambo icnubi Esuquidistu chuibenec capuebi. Ëbi icsamboen chuiquin mamëshunaqui adecbidi Esuquidistu chuibenec capuebi. Utsin natiamiaqui adquecbidi Esuquidistu chuibenec capuebi. Utsin mëyanaqui adquecbidi Esuquidistu chuibenec capuebi. Adquid icnuc natiapimbo icsho isun Nuquin Papan ëbi dayacquo icmiac tsadiapimboquin chuibenec capuebi.

Esuquidistu tantiabemenuen chuiabanombi quiaid

¹¹ Ëbi yacpadquid utsi nibëdec, quequin chienquioctadquidi niobi. Esuquidistu chuiabanquid utsibon chiaid tantiatequidquo iquec, queshun mibëdicquidon ëbi icsamboen chiosh quesho tantiaishun Pabado Esuquidistu chuibenequid nec, quenquo utsibo iccosh, quesho tantiaishun ëbi icaid chuiabanquin dada uaombi. Bëdamboen tantiacimboen chuiabanquid dadpen iquec. Aidon icsactsëcquo isadtsec, quequin ëbi chiec onquenubi Esuquidistu chuibenequidquo nebi. ¹² Natiamiaqui chieshenquiocquin Esuquidistu ëmbi chuibansho mibitedishun tantiapondac. Adembidi nadatiambocquin ëmbi nabansho mibitedishun isbededpondac. Adosho isun Esuquidistun ëbi chuiabeneta caidquo Pabado nec, quequin chuitiadquidëmbi padenquo mimbi icpondac. ¹³ ¿Esuquidistu tantiec iccuëdquido utsi tantiaquin nashunquimbi mibi padenquiodambi ictio? Utsibon meniaid niondabi. Mibëdi tabadec bunec, Bec cho, quenquo iccondabi. ¿Bec cho, queshoda ëbi bëdamboen mimbi tantiatsemponda? ¹⁴ Enden mibëdi tabadondabi. Yuecash padpidec mibëdi tabadoapondabi. Nëbi padpidec mibi yacno nidendabi. Mibëdi tabadec adecbidi, Bec cho, quenquo iquendabi. Mitsana bunesa nebi. Esuquidistu tantiaquidquo ma icpanu

quequin mibēdi tabadquin chuibanendambi. Aton bacuēbo tantiaquin amēn anibēdtan ambia tantiaquid icquin tied uaic adembidi shubu uaic bacuēmpibon nabantiapimbo icnubi. ¹⁵ Adquibidi mibitedi tantiec Esuquidistubēd icquido yampec quec chonoadec tsusiobudquimbi chuibenendambi. ¿Ēmbi mibitedi comapenen tantiasho isunda mimbi ēbi tantienquo yampe? ¹⁶ Bec, cho, quenquo yec mibēdi tabadondabi. Adsho isash, ¿Piuquid bedenquo icpecta Pabado tabadash? Muaquin chuiquin bedpash icnui, quec mibi. ¹⁷ ¿Mitsipadentsimbi bedpa? ¿Ēmbi mibi yacno nidmiadonda muaquin chuiquin mitsana bedpash? Padenquo. ¹⁸ Titobēdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquo icboc. Aidbēdi abentsēc yacchimboen tantiaquidquo nebi. Aduidequi tabadquid ēbi daēdi nebi. ¹⁹ ¿Pabado ampesa nec mibi camenuendambi dada uaqin chuibampo? Padenquo. Esuquidistu tantiaquid icquin mibi aid tantiabemenuen chuibanombi. Ēmbi chuibanaid abimbo iquec, quequin Nuquin Papan tantiec. ²⁰ Mibi yacno choash ēbēdi abentsēc yacchimboen tantienquo icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibēdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquo chuisho tantiamane qeshun adembidi dada uaimbi. Bēdambo icquid ēbi icnubi utsi padenquo iquec qesho tantiamane qeshun adembidi dada uaimbi. Mimbi tantiapdenquiodquid icsho isash comapenec cuēdcuededsho tantiamane qeshun adembidi dada uaimbi. ²¹ Ai, mibi yacno choashun adquid icsho isun, Ēmbi Esuquidistu chuibanaiido nec, quequin Nuquin Papa chuitiapimbo yec natiaic bēpiuacimboc tsadmane qeshun dada uaimbi. Icsadenequidēn abi icsaid ēnabi icsho isash aido unēsacimbocquid nec, quaiush unēsquo icmane qeshun dada uaimbi. Aidon naid utsin istemaidquo nec. Ambibi ambi chudtemaid chudtedchudtedec icsambo yequi, Bēdamboquid nebi, quec muacuededec.

13

Icsaid ēnesa chuiquin cuidendambi quiaid

¹ Mibi yacno daēdec puduedashic padpidec puduedendabi. Choshon, Icsadenequid iquec, quequin daēdshun-daēdshunquien chuisho tantienambi. Abentsēcshun: Icsaquid iquec, quequin chuisho tantiatiapimbo iquendabi. ² Tauamboec puduedshun Esuquidistu chuibanac abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ēnta, cac padenquiocsho padpidec puduedoashun Nuquin Papan tantiamiacpadomboen mibi adquid utsibobēdta comapenen chuiquin cuidembi, quequin chiondambi utsitedishun tantianubi. ³ Esuquidistun tantiamiacpaden Pabado dada uaid nec, quequin ¿mitsipadentsimbi tantiape? quequid comapenec onquequin chuibanembique. Tantaquiota, caimbi. Esuquidistun nadatiambocquin nacpaden ēmbi nasho mibitedishun ispondac. Aidēn tantiamiac padpidec puduedshun adomboembidi mibi ismeoaimbi. ⁴ Aidi matesash nadatiapenquo icquidimbocsho isun cuesten declampañēdash. Adoacsho Nuquin Papan uincuemiac unēsesa yanquopanēdash. Aid tantiaquidquo icquimbi ēmbibi nadatiambocquin nabantiapimbo icpebi. Abi chuiquid Nuquin Papan icmiosi. Aidēmbi ēbēdi icquin icsadenequid comapenen chuiquin naquidbidi ēbi icmeoaindac.

⁵ Esuquidistu tantiaquid nebi, qeshun ¿mitsipadentsimbi aid tantiape? Adecbidi, ¿Ambi chiacpadectabi tabadpe? qeshun tantiabono, quequin Nuquin Papan chiaid isbanta. Aden isbanshun, Ambi chiacpaden niac-niaccombi, qeshun Esuquidistu ēbēd ictiapimbo iquec, quequin tantiatia. Aid mibēd icnuc ambi chiaid niac-niaquenuquo mimbi iquendac. ⁶ Adecbidi, Pabado Esuquidistun ēbi chuibeneta caidta neque. Isnu, quequidēn ēbi nabanec tabadsho isun, Pabado abimbo chiosh, capashuni mimbi. ⁷ Aden tantiaquin Codinto yacnocquido bēdamboen tabadmeta, Papa, quequin chuided-chuidedembi. ¿Mibi bēdamboec tabadsho isash, Pabado chuibanaiido nec, quequin mibi isquidon chuitsiash, quequindambi Nuquin Papa chuided-chuidedpadi? Padenquo. Esuquidistun ēbi chuibeneta caid Pabado nec, quequin tantiesha utsi-utsiec icnubi, Nuquin Papan chiacpadomboen nabanquidquo Codinto yacnocquido nec, quequin utsibon chuisho tantiatiaquid iquebi. ⁸ Nuquin Papan chiaid abimbo iquec, quequin ambi chiaidquo chuibanquidquibidi nebi. Ambi chiaid utsi uain chiesa nebi. ⁹ Mibi bēdamboec tabadsho isash bēdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi. ¹⁰ Aden mibi tantiec tsadquin mimbi iste dada uaimbi. Mibi yacno nidabicquin dada uaimbi ma puduedshun icsaquid nibēdsho isun comapenen chienquo icpanu quequin Esuquidistun tantiapaden

Nuquin Papan nua pausunaid ma icpanueshun chuibanec nebi. Mibi comapenen chuiti-
apimbo iquebi. ¹¹ Nēbi ēnquin dada uaimbi. Icsaisa icnu quec Nuquin Papan chiacpadec
bēdamboec tabadta. Ĕmbi dada uain chiaid isquin adobanta. Abentsēc yacbimboen
tantiaquin nabanec tabadteneta. Adec tabadsho isash tantianquidquo utsibēd bēdamboec
tabadquidquo Nuquin Papa mibēdi iquendac. Aidēnquo mibi adquidquibidi icmendac.
¹² Ĕbi isec cho cananta. ¹³ Mibi tantiec tabadebi, quec nēmbo tabadquido Nuquin Papan
bēdambo icmebanaido. ¹⁴ Nuquin Icbo Esuquidistun bēdambo icmiaido nebi, quequin
mibitedishun tantiaquiota. Adembidi, Nuquin Papan tantiaid nebi, quequin tantiaquiota.
Adembidi aton Mayan ēbēd iquec, quequin tantiaquiota.
Padi. Aidedi dada uaimbi.

CADASIA YACNOCQUIDON ISTE

Pabado tauamboen chiaid

¹ Pabado nebi. Esus chuibenequidquo nebi. Matsesën: —Adquid icta —¿caidtabi nedi? Padenquo. Esuquidistun: —Ëbi chuibeneta —caidquo nebi. Aid uincuemenedaid Nuquin Papantsen: —Con mado Esus chuibeneta —caidquo nebi. ² Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquo iquec. Adembidi tantiec nëmbo icquido Esus tantiaquidtedi: —Unësquo iquec —quiosh. ³ Mibi tantiaquin Nuquin Papa chianembi naden. —Mín Mado Esuquidistubédetan bédamboen isquin Cadasia yacnocquido bédambo icmeta, Papa —quequin Nuquin Papa chianembi. ⁴ Matses bédambo icmequid Esus nec. —Ëbi tantiesabo tabadacimboec icsamboec tabadboedëmbi ëbi tantiasho bédamboec tabadquid icmendambi —quiash Nuquin Papa chiapadec abi tantiaquido cuidmenquo icnuec abided cuidadec Esus unëspac caondash. ⁵ Aidën Papa tantiaquin: —Nuquin Papa bédamboshë iquec —canuna ënenquo icquin.

Esusuidi tantienquo yanaid

⁶ —Esus tantienquo yanosh —quequin mimbi naid chuisho tantias shubitiadquo iccobi. ¿Ëbi chonobida badedquo Esus tantienquo yano? Nuquin Papan tantiamiac abided cuidadec unësaid Esus tantiec mibi tabadondac. Aden Nuquin Papa aton Mado Esusbédta tantiaboedëmbi ¿nëbida Nuquin Papa tantienquo yano? Utsibon icsamboen chiaquien mimbi Esus tantienquo yanac. ⁷ ¿Aidon chiaidta bédambo icpec? Aidon chiaid ma Nuquin Papan chiaidpenquo neyoc. Esusquo chienquo icquin muaquin chuisho tantiasahun: —Abimboen cachitec —queshun mimbi Esus tantienquo yampac. ⁸ —Aton Mado Esusuidtsëqui tantiasho Nuquin Papan nuqui bédamboen isec —quequin abimbo chiondambi. —Nuquin Papan chiaid abimbo chienquo icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bédantsen muaquin chuisho tantiasahun aidtsen: —Nuquin Papan cuidpashun —catsiambi. Utsibontsen muaquin chuisho tantiasahun aidtsen: —Cuidpashun —quiobi. ⁹ Tanta. Adembidi mibi chuinu. Ëmbi chuibanac mimbi Esus tantiabonondac. Mimbi tantiondaid Esusquo chienquo icsho: —Nuquin Papan cuidpashun —caimbi mibi muauaquin chuiquido. ¹⁰ —¿Matsesën: “Mibi bédambo iquec,” mabi canu —quequindambi aden chuibampadi? Padenquo. Nuquin Papan chiapadomboen mambi natiadquo yoc. —Bédambo iquec —Nuquin Papa camenuen mambi chuibampaboc. Matsesën chiapadomboenuidi natiapimbo iquebi. Adenuidi naic Esuquidistun yuambo ictiapimbo ictsiabi.

Esusën chiaidquo chiec nebi, quiaid

¹¹ Tanta, con utsibo. Mibitedi chuinu. —Esus tantiasho Nuquin Papan matses bédamboen isbentsias —quequin ëmbi chuiboed amben chiaidpenquo nec. ¹² Matsesën chiaibi Esuquidistun tantiamiac ambi chiaidquo chuibanombi.

¹³ Tanta. Aden Esusën ëbi tantiamiondaid mibi chuinu. Con matses isadaidbon chiapadomboenuidi natiadquo icquin Nuquin Papa tantiesabo danquin Esus tantiaquido comapenen chieshënnquin cuesun secatiadquo icpadenebi. Ëmbi adodened ëmbi chuisho mimbi tantiondac. ¹⁴ Nuquin Papa tantiatiadquo icquin con matsesën chiaid abitedimbo natiadquo ictenebi. Èbédta tishaidon caniabon bédiactsec natiadquo icnubi con tsusedpabon chiaiduidi natiadquo ictenebi. Adquid icquin Esus tantiaquido comapenen chieshëndenenbi. ¹⁵ Adshobini Nuquin Papan aton Mado Esus tantiamiondash. Ëbi tishabi icnubi ëbi caic: —Con Mado Esus tantiameshun bédamboen isquin ¹⁶ Pabado: “Matses utsibo isadaidpambo con Mado Esus chuibeneta,” caindambi —quequin ambi chiapadomboen Esus tantiamiondash. Adoac: —Esusën chiaid ëbi chui —quequin matses chiambo iccondambi. ¹⁷ Shubu dadpen icquid Edusaden caid yacnocquido Esusbéd icnëdaido ambia Esus chuibanëdaido chuitanambo iccondambi. Utsibo chienquo yec nidaid utsi Adabia caid yacno matses nibëdacno badedquo nidanondabi. Adashic yuec-yuecpambo ictanec auëshquo choec shubu dadpen icquid Damasco caid yacnobidi choaondabi.

¹⁸ Adashic ambo nidash seta abentsëc chotsecnuc matametane Edusaden yacno Petedo isec nidanondabi. Adec nidash 15tedec ushec aibéd tabadondabi. ¹⁹ Ambobi Nuquin Icho Esusën utsi Acobo caid isondambi. Esusbéd icnëdaid utsi isambo iccondambi. Aid daédtsëqui isondambi. Utsibo padambo. ²⁰ Abimbo chuiquin nëid dada uaic nebi. Ëmbi aden chuibanasho tantias: —Ai, abimbo caic —quec Nuquin Papa.

²¹ Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auëshquo nidshun nidaid utsi Sidisia caid yacno istanondambi.

22 Nidaid utsi Udeya caid yacno Esusbëd icnëdaido yacno yuec tabadambo iccondabi. Adsho anocquidon Esus tantiaquidon isabi iccondashi. ²³ Ëmbi naid chuishouidi tantiapac caondash. —Nuquipadquid Esus tantiaquido cuesun secatiadquio icnëdaidëmbi Esus tantiabenshun Esusquio chuibeniosh —quequin ëmbi naid chuishouidi tantiapac caondash. ²⁴ Aden ëmbi naid chuisho tantias: —Nuquin Papan nac Pabado bëdambo iquec. Adomboen Pabado tantiamec Nuquin Papa bëdamboshë iquec —quepac caondash Udeya yacnocquido.

2

Edusaden yacno nidoaid

¹ Yuecash seta 14ted matamiash Edusaden yacnobidi nidoapondabi. Ëbëdi Bednabe caid nidpondash. Titotsen buanondambi. ² Adec Nuquin Papan tantiamiacpadece ambo nidshun Esus tantiaquido chuiquid dapabo caiduidtsëqui cho-chomeshun ëmbi nabode chuibanondambi. —Ëmbi chiabi yac aidon: “Muequi neque. Pabado chuisho tantienda,” canushe —qeshun naden chiondambi. —Nuquin matsespenquio isadaidpembo matses utsibo Esusquio chuibeniosh. “Esusuidi tantiasho Nuquin Papan nuqui bëdamboen istsiash,” quequin chuibeniosh. ¿Adembidida mimbi tantiape? —capondambi Esus tantiaquido chuiquid dapabo chuiquin. Ëmbi adoac: —Ai, adembidi tantiemi —quepondash aid. ³ Ëbëd icquid Tito caid isadaidpembo icshobi: —Shui dëbid dëteshune —cainquio iccondash chuiquid dapabon abi utsibon: —Adotiad —canubi. ⁴ Adec: —Shui dëbidien dëteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsëqui tantiasho Nuquin Papan nuqui bëdamboen isec,” quequin con tsusedpan chiaid niacsho tantianu —quiash ëbi yacno puduedpondash. Adec puduedshun tantiasic: —Mimbi icsamboen chieci. Nuquin tsusedpa Moisesën chiampidtedi nasho Nuquin Papan bëdamboen istsiash —quepondash. ⁵ Adec aid: —Nuquin tsusedpan chiampicpadomboenuidien nametiad —qesho: —Padi. Mimbi icsamboen chieci —quequin aidën chiacpadomboen nainquio iccondambi. —Ma matses utsibon: “Esusënuidtsëqui Nuquin Papa ëbi bëdamboen ismec,” quequin ma Esusquio tantianu —qeshun nainquio iccondambi.

⁶ Aden Esus tantiaquido chuiquid dapa caidon Esus tantiaquidën natequid utsi chienquio iccondashi. —Esus tantiabenascho isun nuquin tsusedpan chiacpadomboentsen nameta —quequin chienquio iccondashi. ¿Esusbëd icnëdaidën: —Moisesën chiaidtsen nameta —cactambi nametsemponda? Padenquio ictsenondambi. ¿Atotsi Nuquin Papan aid capec? —Esusbëd icnëdaidquio neque. Bëdamboen isnu —¿capenda iquec? Padenquio. ⁷ Naden Petedo chedon chiondashi. —Nuquin Papan chiacpadomboen mimbi matses utsibo isadaidpembo Esusën naid chuibeniac. Nuquin Papan chiacpadomboembidi Petedon nuquin matses isadaidbo Esusën naid chuibeniosh. Petedon nacpadomboen mimbi bëdamboen nac —capondashi. ⁸ —Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbisen matses utsibo dadpen Esus tantiamiac ⁹ —qeshun bëdamboen ispondashi. —Adembidi nanuna. Mimbi isadaidpembo Esusën naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquio mibi nec —qeshun chuiquid dapabon Bednabebëdta mëdimbampondashi. Nëidic Petedo. Nëidic Acobo. Nëidic Uan. Aidtedishun chuiquid dapabo icquin adondashi. ¹⁰ Nadentsen chuipondashi. —Aton na nibëdquido bëdamboen isnuna —capondashi. Adsho tantias: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹ Adash yuectaniash ëbi iccondacno shubu dadpen icquid Antioquiya caid yacno Petedo chopondash. Auëshquio icsashobimbi bëisquiquin chushcapondac. ¹² Abëdtan Esus tantiaquido matses utsibon codocaid pec bëdamboec tabadboedi aton pete isuidanec aidobëd cuëshëdec Petedo icsapondash. Ambo choash Esus tantiaquido con matsesëmpenquio codocaid pec bëdamboec tabadondash. Adnubien Acobon: —Ambo istan —cac con matses Moisesën chiampid tantiaquido cho-chopondash. Aid cho-chosho isash: —Moisesën chiampid niacquin matses utsin codocaid pesho chushcanushe —quec dacuëdquin isadaidpembon pete meniaid isuidampondash Petedon. Adec abëdtan Esus tantiaquido matses utsibobëd cuëshëdec icsapondash. ¹³ Adsho isash anocquido isadaidbotsen abëdtan Esus tantiaquido matses utsibobëd tabadenquio yec cuëshëdpondash. Adsho isash ëbëd icquid Bednabetsen adecbidi cuëshëdec icsapondash. ¹⁴ Adec icsaquin Esusën chiacpadomboen nainquio icshobimbi Petedo chushcapondac Esus tantiaquidtedishun tantianuc. —¿Ada mimbi bëdamboen naoque? Tantia. Chuinu. Isadaidbo tsusedpan chiaid matses utsibo

mimbi namec. Isadaidbo icquimbi matses utsibon codocaid pec aibëdi mibi bédamboec tabadoc. Aidon piaid pec bédamboec tabadboedi nēbi aibëd mibi cuëshëdoc. Adsho isash mimbi nianaïdo: “Petedon matses isadaidbo tabadacimboec tabadshouïdien Nuquin Papan nuqui bédamboen ischitotsiash,” quepec icsamboen chiec. Aden mimbi icsamboen tantiamèque. Tantia. ¿Atotsiequin mimbi naoque? –capondambi Petedo chushcain.

Nuquin Papan bédamboen iste chiaïd

¹⁵ Naden con matses Petedo chiondambi. —“Moisesën chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dëbid dëteshun secanëdaïdo nec. ¹⁶ Adquid icquin: “Moisesën chiaïduïdi naquin Nuquin Papa bédamboen ismembï,” quedenedi nēbi nuqui utsien chiec. “‘Abided cuidadaïd Esusënuïdtsëqui Nuquin Papa ëbi bédamboen ismec,’ quequin Esus tantiaho Nuquin Papan nuqui bédamboen isec,” quequin nuqui tantiec. Adshun matses utsibobëdambi nuqui Esus tantiaquiec. “Moisesën chiaïd niaquesa nibëdsho isun Nuquin Papan matses abitedi bédamboen istiapimbo iquec,” quequin tantiahsun nuqui bédamboen ismequid Esus nuqui tantiabonondac —quequin Petedo chiondambi.

¹⁷ Adashic Petedobidi chui-oaic: —“Esusuidi tantiaho Nuquin Papan nuqui bédamboen istsiash,” qeshun Esus tantiabonondacsho nuquin matsesën icsambo capondashi. “Nuquin tsusedpan chiapadomboen nainquo yec mibi icsambo iquec matses utsibobimboec,” capondashi nuquin matsesën. ¿Ada Esuquidistun matses icsambo icmepec? ¿Ambi chiapadomboen naicta nuqui icsape? Padenquo. ¹⁸ “Nuquin tsusedpan chiampicpadomboen nashoen Nuquin Papan nuqui bédamboen isec,” quequin nuquin matsesën chiaïd nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaïduïdi naquin Nuquin Papa bédamboen ismembï,” qeshun abi bédamboen ismequidquo Esus tantienquo yequini icsambo icchitotsiac. ¹⁹ Con tsusedpa Moisesën chiaictedi natiadquo ictenebi. Adquid bédamboen iste danquin abitedi natiadquo icquimbi abitedi nainquo iccondambi. Adshun: “Moisesën chiaictedi ambembï matsesën natiapimbo iquec,” qeshun ëmbimbo naid ënondambi. Nēbini Esus tantiec Nuquin Papan chiapadec tabadec. ²⁰ “Ambi con tsusedpa Moises chuiamiactedi nashouïdi Nuquin Papan nuqui bédamboen istsiash,” quedenedi Esus tantiec adenquo yanondabi. Nēbi ëmbi tantiaïdquo nainquo yec Esuquidistubëdi cuëshëdenquo yec bédamboec tabadebi. “Ëbi tantiec ëbi cuidmenquo icnuec abided cuidadec unësac caondash,” quequin tantiahoeni Esusëmbi bédamboec tabadquid icmec. ²¹ “Abided cuidadaïd con Mado Esusuidi tantiaho matses bédamboen isendambi,” quequin Nuquin Papan chuipanëdash. Aden Nuquin Papan chiaïd niactiapimbo iquebi. Moisesën dada uapampid ambi chiaïd niaquesa icsho Nuquin Papan bédamboen istsenac. Ambi chiaïd niaquesa nibëdec. Adquid Nuquin Papan chiaïd niaquesa icnuc: “Matses cuidmenquo icnuec ëbided cuidadec unësnu,” queboedi Esus tantienquo ictsempañëdash —capondambi Petedo chuiquin.

3

Nuquin Papan aton Mayan tabadmiaïd

¹ Tantia. —Cadasia yacnocquido piushbimboecquin tantienquo yanosh —quequin chuïsho tantiahsun mibitedi chuïnu. ¿Tsuntsin: —Tantienda —cac Esus tantienquo yano? —“Cuesten decanac abided cuidadaïd Esusënuïdtsëqui Nuquin Papa nuqui bédamboen ismec,” quequin Esus tantiaho Nuquin Papan nuqui cuidenquo iquec —quequin mibi chuïbanondambi. ¿Esus tantiatiapimboda ique? ² Mimbi tantiaïd ëbi chui. Tantanu. ¿Atotsi quiash Nuquin Papan Mayan mibëdi tabadanondash? ¿Nuquin Papan ambi chiaïd Moises dada uamepampid mimbi nabanuda mibëd tabadanondash? Padenquo. Ëmbi chiondaïd Esusquo mibi tantiabensho isashien mibëd tabadanondash. ³ ¿Pabiate shëcuë choquidida mibi nendac? Tantia. ¿Atotsieshun tantienquo ique? Mibëdi tabadquin Nuquin Papan Mayanën mibi bédamboec tabadquid icmec. ¿Nēbi Esus tantienquo yanecta mibi bédamboec tabadpatsia? Mibembï bédamboec tabadtiapimboen mibi iquec. ⁴ ¿Aden Nuquin Papan aton Mayan mibëdi tabadmiaïd icquimbida Esus tantienquo yano? ⁵ Nuquin Papan aton Mayan mibëdi tabadmequin comapenen tantiaquin nacnenquin mibi ismiondash. ¿Atotsieshun Nuquin Papan aton Mayan mibëdi tabadmec? ¿Con tsusedpa Moisesën chiampid nashoda Nuquin Papan aton Mayan mibëdi tabadmec? Padenquo. Ëmbi chiondaïdquo Esusquo tantiaho Nuquin Papan aton Mayan mibëdi tabadmec.

Nuquin Papa tantiaquidquo Abadauan chiaïd

⁶ ¿Tsutsi Nuquin Papa tantiaquidquo icpampic? Abadauan nepampic. Nuquin Papan chiaic Abadauan: —Abimbo mimbi caic —qesho: —Adquid bédamboen isembï —qeshun

Nuquin Papan bédamboen isbempampic. ⁷ Adec Abadauan: —Nuquin Papan abimbo caic —quequin tantiapampicpadomboen nēbi matsesēn Esus tantiaشو Nuquin Papan bédamboen isendac ambi Abadauan ispampicpadomboen. ⁸ —Esus tantiaquido iquendac —quequin naden Nuquin Papan Abadauan chuipampic ēndenquimbo. “Abadauan, mibi unēsān yuecquimbo ictaneshun min tsyuecquid abentsēc tantiaquidtedi bédambo icmendambi. Nidaid utsi-utsiec yacno tabadquidon min tsyuecquid abentsēc tantiaشو tantiaشو bédambo icmendambi,” quequin Nuquin Papan chiaid con tsusedpan dada uapampic. ⁹ Abi tantiaquidquo icsho ambi Abadauan bédamboen isampicpadomboen nēbi aton Mado Esus tantiaشو Nuquin Papan nuquitsen bédamboen isec.

¹⁰ Utsiboen Nuquin Papan cuidtequido nendac. —Moisesēn chiampicpadomboenuidi nasho Nuquin Papan bédamboen istiasiashi —quequidēmbi abitedimbo nainquo icsho Nuquin Papan cuidendac. Aden ēnden Nuquin Papan chiaid dada uapampic. “Ambi chiactedi nainquo icsho Nuquin Papan cuidendac,” quepampic. ¹¹ —Ambembi Moisesēn chiampicpadomboenuidi nasho matses bédamboen isendambi —¿quecta icpanēdash Nuquin Papa? Padenquo. Ambi chiaid niacquidoidquo icsho bédamboen istiapimbo icquin Nuquin Papan naden chuiquin dada uamepampic. “ ‘Nuquin Papa ambi chiacpadomboen naquidquo nec,’ quequin abi tantiec tabadquiden Nuquin Papan bédamboen isec,” quequin dada uamepampic. ¹² ¿Ēmbembi Moisesēn chiactedimbo nanuequidta Nuquin Papan tantiec tabadpec? Padenquo. “Moisesēn chiactedi naquid Nuquin Papan tabadendac,” quequin chiampicpaden ambembi matsesēn natiapimbo iquec. Natiapimbo icsho Nuquin Papan bédamboen istiapimbo iquec.

¹³ Aden Nuquin Papan matses abitedimbo bédamboen istiapimbo icnuc Esuquidistu: —Ēbided cuidshun ēbi tantiaquido ma con Pan cuidenquo icnu —quiaash abided cuidadec unēspac caondash cuesten dectanac. Aidquo chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquo nec,” quequin Nuquin Papan chiaid dada uapampic. ¹⁴ Adec matses utsi-utsien abi tantiaquido cuidmenquo icnuc abided cuidadec Esus unēspac caondash. Ēndenquimbo con tsusedpa Abadauan chiec: —Yuecshun bédambo icmendambi —quequin Nuquin Papan chuipampicpadomboen abi tantiaquido bédambo icmequin aidobēdi aton Mayan tabadmenuec Esus unēspac caondash.

Abadauamba chuishun Moisesetsen Nuquin Papan chiaid

¹⁵ Tantia, con utsibo. Mibitedi chuinu. Min matsesēn nadoquid. —Naden naindambi —quequin dada uashun: —“Abimbo chiaidquo nec,” ma isquidon canu —queshun abi cuēmēdquidtsen dada uaquid. Aid dada uaid dada uaquidbēdtambi utsintsen utsi uatiapimbo icquid: —Chuiquidēn cuidnushe —queshun. Adembidi ambi chiaid utsi uatiapimbo icquid icquin ¹⁶ Nuquin Papan: —Nadomboen naindambi —quequin Abadauan chuipampic. —Mibi nibēdanān yuecquimbo ictaneshun min tsyuecquid abentsēcshun matses bédambo icmendac —quepampic. —Min tsyuecquid abentsēc tantiaquidtedi bédamboen isendambi —quequin tantiec adpampic. Esus caiqui: —Min tsyuecquid abentsēc —quec adpampic. —Min matses tsyuecquido dadpen —quenquo icpampic. ¹⁷ ¿Ada tantie? Ēndenquimboshē Nuquin Papan Abadauan chuiquin: —Min tsyuecquidēn matses bédambo icmendac —capampic. Adshumbic yuecquido ictaneshun seta dadpenquo 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquo icquin Nuquin Papan ambi chiaid utsi Moises dada uamepampic. Muenquo icquin Abadauan chuipampic. ¹⁸ ¿—Ēmbi chiaid ēmbi Moises dada uamiacpadomboen nashouidi mibi bédamboen isembi —queshunda Nuquin Papan Abadauan bédamboen isbempampic? Padenquo. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bédamboen isbempampic. Adashic: —Yuecshun min tsyuecquidēn matses bédambo icmendac —quepampic. Aden ambi ēndenquimboshē chiampicpadomboen nēbi matses bédambo icmequin Esus tantiaquido Nuquin Papan bédamboen isec.

¹⁹ ¿Atotsieshun Nuquin Papan ambi chiaid Moises dada uamepampic? —Ēmbi chiaid isash: “Icsamboequien nuqui tabadchitec,” quequin ma matsesēn tantianu —queshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bédabon Moises chuuiampampic. Adoac Moisesēn aton matses Nuquin Papan chiaid chuibampampic. ²⁰ Nuquin Papanquo Abadauan chuipampic. Abadauan caic: —Chuitan —cainquo icquin Nuquin Papanquo Abadauan chuipampic.

Matses abi icsaid tantiamete chiaid

²¹ Aden Nuquin Papan Abadauamba chuishumbic Moisesetsen chuipampic. ¿Ambi: —Min tsyuecquid tantiaquido bédamboen isendambi —quequin Abadauan chiampid niacquinda

Nuquin Papan Moises chuipampic? Padenquo. ¿Matses bēdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquo. —Matses bēdamboen isnu —qeshun ambi chiaid Moises dada uameshun ambi chiaid niaquesa bēdamboen isun unēsacsho abēdi tabadmetsiash. —Ēmbi chiaid niaquesa nibēdendac —quequin tantiaquin ambi: —Naden nata —quequin chiaid Moises dada uamepampic. ²² —Ēmbi chiaid isun: “Nuquin Papan chiaid matses abitedishunquien niac-niacchitec. Mētaniac abembi mēnchiquidtiapimbo yacimboc abembi bēdambo ictiapimboen icchitec,” quequin ma matsesēn tantianu —qeshun Nuquin Papan Moises dada uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadomboen naquin Esuquidistu tantiaquiduidtsēqui Nuquin Papan bēdamboen isec.

²³ Esus choabi icnuc nadquo matses icpanēdash. Moisesēn chiapadomboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yacimboc aidēn chiapadec bēdamboec tabadtiapimbo icpanēdash. Nuquin Papan Esus tantiamiabi icnuc adquo matses icpanēdash. ²⁴ Aden: —Ambi chiaid niaquec icsamboec tabadsho Nuquin Papan ēbi bēdamboen istiapimbo iquec. ¿Nuquin Papa bēdamboen ismequidta nibēdepa? —nuqui camenuen ambi chiaid Moises dada uamepampic. Aden nuqui icsaid tantiameshun Esutsen tantiamiac: —Esus tantiasho Nuquin Papan nuqui bēdamboen isec icsaisamboecnu —nuqui quendac. ²⁵ Aden tantiec: —Isadaidbo tsusedpan chiacledi nashouidi Nuquin Papan matses bēdamboen istisash —quenquo nuqui iquec. —Esus tantiasho Nuquin Papan nuqui bēdamboen isquin bēdamboen tabadmec —quequin nuqui tantiec.

Nuquin Papan con mado con champi caido

²⁶ Aden Esus tantiasho Nuquin Papan: —Con mado mibi nec. Con champi mibi nec —nuqui capec. ²⁷ Adec: —Esus tantiaquid nebi —qesho acten mentoaid yec Esuspadquo ictiadquo nuqui iquec. ²⁸ Aden Esus tantiasho Nuquin Papan nuqui bēdamboen isec. Isadaidbo yec isadaidpembe yec matses yuaido yec matses yuapenquo yec dada yec chido yec quequin Esus tantiasho nuqui bēdamboen isec. —Matses utsibo bēdamboen istiapimbo iquebi —quenquo icquin matses utsibombi aton Mado Esus tantiasho Nuquin Papan bēdamboen isec. ²⁹ Adembidi abi tantiasho ambi Abadauan bēdamboen isampicpadomboen Esus tantiasho Nuquin Papan nuqui bēdamboen isquin bēdambo icmec ambi Abadauan chiampicpadomboen. Adec Abadauanēn tsyuecquidobimboecquido nuqui nec.

4

Yuabimboecquid isadaidbo yaid

¹ Tantia, con matses. Mibitsen chuinu. Aton na dadpen dayun uaquidēn nuquin matsesēn nadoquid. —Ēbi unēsān con madon con na abitedi bedendac. Bacuē icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidēn amēn aton mado aden chuiquid. Aton papa unēsān caniabi yec utsibon yuabimboec aton mado iquec. ² Caniabi icquin utsibon chiapadomboen naindac aton madon. Adashic aton papan chiapadec canishun aton papan na bedash yuabimboecboedi adquidpenquo yanendac. ³ Adquo yuabimboecquido con matses isadaidbo icpanēdash. Tsusedpabon yuabimboecquido icquin Nuquin Papan bēdamboen iste bēdamboen tantienquo icpanēdash. —Tsusedpabon chiapadomboen Nuquin Papan: “Naden nata,” quequin chiaiduidi nanu —quiashi abembi bēdamboec tabadtiapimbo icpanēdash. ⁴ Adnubien ambi ēndenquimbo tantiampicpadēn Nuquin Papan Esus chomepanēdash. Isadaidbon chidon tishaid icquin Nuquin Papan: —Naden nata —quequin chiaid naquidquo Esus nepanēdash. ⁵ Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanēdash. Adsho isash matses cuidmenquo icnuc abided cuidadec Esus unēsac caondash. Nēbi Esus tantiasho: —Con mado mibi nec. Con champi mibi nec —quequin Nuquin Papan nuqui bēdamboen isec.

⁶ Adec: —Con bacuēbo nec —qeshun Nuquin Papan nuquibēdi Esusēn Mayan tabadmec. Adoac bacuēn amē: —Ēbi, papa —cacimboc Nuquin Papa nuqui chianec. ⁷ Esus tantiabi Moisesēn dada uapampiduidi namenuequido yuabimboecquido icboedi nēbi Esus tantiasho Nuquin Papan: —Con bacuēbo nec —nuqui capec. Aden nuqui bēdambo icmec ambi Abadauan chiampicpadomboembi.

¿Utsin yuameteda bumpe? quiaid

⁸ Tantia. Nēbi matses utsibo mibi chuioanu. Ēnden Nuquin Papambo tantiesa icquin matses uaquidpenquiobi utsi mimbi tantiapandac. Papa quequin mimbi tantianēdaidēn

yuabo yec mētaniacimboecquido mibi icpanēdac. ⁹ Nēbi Nuquin Papa mimi tantiabenondac. ¿Mimbembida adonda? Padenquoio. Aidēmbi mibi tantiamepanēdash. Aidēn tantiamiaidombo icquin ¿atotsiequin aid tantienquoio yanoai? ¿Moisesēn dada uapampiduidi namenuequido tanshoda Nuquin Papan mibi bēdamboen ispec? Padenquoio. Adquid mētaniacimboecquid nec. ¿Mētaniacimboecquid icoatiadquioda ique? ¹⁰ Aden Nuquin Papa tantienquoio icquin mimi icsamboen chiec. —Aid badiadēn adenda. Aid inchēshēn ushēn adenda. Aid setambi adenuidtsēqui nanuna. Nuquin Papan cuidnushe —quequin mimi icsamboen chiec. Mimi chiacpadomboen naquid Nuquin Papan bēdamboen iste danquin mimi icsamboen chiec. ¹¹ Mibi caic: —Adosh —quesho tantiaish shubitiadquio iquebi. —¿Ēmbi chiondaidonda Esus tantienquoio yampash? —quequin tantiaic mibi unēsquoio iquec.

¹² Con utsibimbocquido mibi neque. Tantia. Mibitedi chuinu. Isadaidpambo yec mibi: —Moisesēn chiampiduidi nanu —quenquoio yacimboec yanondabi. —Ēmbemi Moisesēn chiampid naquin Nuquin Papa bēdamboen ismembī —quedenedi ēnēdondabi. Nēbi Esusuidi tantiaquid nebi. Adembidi Esusuidi tantiatā.

Ēbi adsho tantiaish chieshenda. Tauamboen ēmbi Esus chuisho mimi ēbi chieshēnenquoio iccondac. ¹³ Mibi yacno tauamboec choshon daicsabudtsēcshumbi mibi Esusēn naid chuibanondambi. ¹⁴ Istiapicpambo yec daicsabudacshobi mimi ēbi cacumenquoio iccondac. Ēbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bēda choacimboecnuc mibi cuishonquiondac. Nuquin Icho Esuquidistu choacimboecnubidi mibi adondac. ¹⁵ —Min ēshē chishun ēbi mene —ēmbi cac mimi ēbi menetsenondac. Aden ēbi mimi tantiaquiondac. Adondaiddi ¿atotsi quiaish chieshcueno? ¹⁶ ¿Nēid abimbo chuiquindambi mibi chieshēmpē? Padenquoio iquembī. ¿Aden chuisho mimbīdabi chieshēmpē?

¹⁷ Ista. Esus chienquoio icquidon ambi chiacpadomboen mibi nametiadquio iquec. ¿Mibi tantiaquioquin bēdamboen namenuenda mibi chuipec? Padenquoio. Ēbi chieshēmenuembien ambi chiacpadomboen mibi nametiadquio icchitec. Mibi abibi tantiamenuen naic. ¹⁸ Ēmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimi ēmbi chiaidquio tantiabenondac. Ēbēd icquimbī Esus bēdamboen tantiaboedombi ēbi nidtsēcnubi mimi badedi utsi tantiac. ¹⁹ Aden mimi naid tantiac mibi unēsquoio iquec. Anin bacuē tantiacimboen mibi tantiaquiembī. —Esusbimboec icpashun. Aid tantiec ambi chiacpadec bēdamboec tabadpashun —quequin mibi tantiembī. ²⁰ Mibēd icquin bēisquioquin mibi chuitsiambī. Mibēd iquenquoio icquimbī mibi bēisquioquin chiacimboen dada uaquin mibi naden chiebbi. —¿Atotsieshun Esus tantienquoio yanoao? —caimbi.

Abadauanēn mado daēd chiaid

²¹ ¿—Moisesēn chiacpadomboenuidi naquin Nuquin Papa bēdamboen ismembī —quequido icquinda mimi Moisesēn chiampid bēdamboen tantieque? Tantia. Mibi chuinu. ²² Naden chuiquin Moisesēn dada uapampic. Abadauanēn madombo daēd icpampic. Aton chidon yuaid chido bedshun tishmiaid abentsēc icnuc aton shanunquoio aton chidon tishaid abentsēcbidi icpampic. ²³ Abadauanēn chudac badedquio bacuē usundoshon chido yuaidēn aton mado tishpampic. Abadauanēn chidombo naido icsho: —Mimbi bacuē tishendac —quequin ambi chiacpadomboen Nuquin Papan naidopenquoio icmiac aton mado tishpampic. ²⁴⁻²⁵ Aidi Sada nepampic. Chido yuaid Acad nepampic. Aidēn tishaid yec aton mado yuabidi nepampic. Icbon chiacpadomboenuidi nepampic. Yuaidēn madobimboecquido Moisesēn dada uapampiduidi namenuequido nec. Adquobidi Edusaden yacnocquido iquec. Esus tantienquoio yec Moisesēn chiaiduidi tantiate bunquiec. Nidaidd utsi Adabia caid yacno macuēsh dapa Sinai caidēnshun Nuquin Papan ambi chiaid Moises dada uamepampic. Aid macuēsh matses utsin Acad capec. Aden tantiaquin: —Chido yuaid Acad caidēn madobimboecquido Moisesēn dada uapampiduidi namenuequido nec —caombi. ²⁶ Edusaden caid utsi iquec. Nuquin Papa tabadacnombo Edusaden coapec. Ambo Esus tantiaquido yec nuquibi tabadendac. Yuaidēn madobimboecquido Moisesēn dada uapampiduidi namenuequidoen padenquoio iquendac. ²⁷ Nuquin Papan ambi chiaidd dada uamepampicpadec Esus tantiaquido dadpenquoio iquendac. Naden dada uamepampic.

“Tantia, chido. Naido icsho mibi chuinu.

Bacuē tishtiapimbo yequi bēdambo icta.

Bacuē paēmo icnuc tishacmaid yequi cuishonqueta.

Bēnē choquidēn bacuē dadpen tishquidēn bacuēn tsyuecquido daēdpacktsēc yanubi

Bacuē nibēdquidēn min matses dadpenquioshē yanendac,”

quequin ambi chiaidd Nuquin Papan dada uamepampic.

²⁸ Tanta, con utsibo. Mibi chuinu. ¿Ada Nuquin Papan Abadauan chiampid tantie? — Min chido naido iccondaidên tishaid Isac cuêmêdquidên tsyuecquid tantiaquido bédamboen isendambi — quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin Papan: —Con mado nec. Con champi nec —nuqui caindac. ²⁹ Ènden Nuquin Papan naidopenquo icmiampidên mado chieshênquin chido yuaidên madon aton utsibi chieshêmpampic. Adembidi Nuquin Papan Mayanên tantiamiaido Esus tantiaquido Moisesên dada uapampiduidi namenuequidon chieshênendac. ³⁰ Aden Abadauanên mado bÿyucquidên aton utsi chieshênsho isun çatotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobêdtabi cueme. Min mado utsi Sadan madon tsyuecquido dadpenquo caidmequin bédamboen tabadmembî. Yuaidên madoembî padenquo iquendac,” quequin Nuquin Papan Abadauan chiaid dada uapampic Moisesên. ³¹ Sada caidên mado Isac caidpadquid yuapenquo nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusênuidsêqui Nuquin Papa ëbi bédamboen ismec —quequin Esusquo tantiaquid yec: —Èmbembî Moisesên chiactedi naquin Nuquin Papa bédamboen ismembî —quenquo icnuna.

5

Esus tantiasho Nuquin Papan bédamboen iste chiaid

¹ Aden: —Esusênuidsêqui Nuquin Papa ëbi bédamboen ismec —matses camenuc abided cuidadec Esus unÿspac caondashe. Aidquido tantiata. Muaquidên: —Moisesên chiampic-paden nasho Nuquin Papan nuqui bédamboen istiashe. Aidên chiacpaden nanuna —quequin chuisho tantienda. Aden muaquin chiacpaden naic isadaidbo tsusedpan yuabimboec mibi yantsiaque.

² Mimbî isondaid Pabado nebiqe. Tanta. Mibitedi chuinu. Moisesên chiactedi naqid Nuquin Papan bédamboen iste danquin Esus tantienquo yanec muaquidên chiacpadec shui dëbid dêteshuniadacsho isun Esusên Nuquin Papa mibi bédamboen ismetiapimbo ictsi-ashe. Adenda. ³ Aden Moisesên chiaid abentsêc natsêcshun aidên chiaid utsitedi nainquo icsho Nuquin Papan mibi bédamboen istiapimbo ictsi-ashe. Moisesên dada uapampiduidi namenuequido tanenda. ⁴ Aido Esus tantiesabo nec. Aden abi bédamboec ismianquid Esus tantienquo icsho Nuquin Papan aido bédamboen istiapimbo iquec. ⁵ Esus tantiaquidoen Nuquin Papan Mayanên tantiamiacpaden naden tantiec. —Esus tantiashouidi ambî chiaid niac-niacacmaidimbboecnuic bédamboen isquin Nuquin Papan: “Mibi bédambo iquec,” nuqui caindac —quequin nuqui tantiec. ⁶ Shui dëbid dêteshunaidên Esus tantiasho Nuquin Papan bédamboen isec. Adembidi shui dëbid dêtiamaidontsen Esus tantiasho Nuquin Papan bédamboen isoaic. Aden Esus tantiabenash: —Ambî chiacpadomboen Nuquin Papan matses tantiaquid ëbi icmendac —quequin aden utsibo tantiasho isun Nuquin Papan: —Adquid con Mado tantiaquid nec —caindac.

⁷ —Bednu —quequin nadancacimboben aiduidtsêqui tantiaquin mimbî Esusquo tantiondac. ¿Tsuntsin muaquin chiac Esus tantienquo mimbî yanoape? ¿Atotsiequin abimbo chiaid niacpe? ⁸ ¿Nuquin Papan nacta Esus tantienquo yano? Padenquo. Ma aidëmbî mibi Esus tantiametiaquido yoc. ⁹ Muaquido tantienda. Nadquido aid iquec. Tosho bedquid abentsêcshun bedmebanac abitedi toshoqueuededec. Adembidi muaquid abentsêcshun chiac matses dadpenshun abimbo tantienquo yantsiashe. Muaid tantienda. ¹⁰ —Nuquin Icho Esusên tantiamiac ëmbî chiacpadomboen Cadasia yacnocquidon tantiatsiash —quequin mibi chiec nebi. Mibi muaquin chuquid Nuquin Papan cuidendac.

¹¹ —“Con tsusedpan chiacpaden shui dëbid dêteshunaiduidtsêqui Nuquin Papan bédamboen istsiash,” queposh Pabado —quequin çtsundanquieni muauapac caosh? ¿Adendambi chuidio? Aden ëmbî chuisho adembidi chuquidon chieshênquo ictsenoshi. Esus chienquo icsho ëbi chieshênquo ictsenoshi. Abi tantiaquid cuidmenquo icnuec abided cuidadec unÿsaid Esusuidi chuisho mabi chieshêmpaboc. ¹² Mibi muaquin chuquido Moisesên dada uapampiduidi namenuequido caic: —Auêshquo cuemepashun —caimbî.

Esus tantiaquido bédamboec tabadte chiaid

¹³ —Èbî cuidmenquo icnuec abided cuidadec unÿsaid Esusquo tantiasho Nuquin Papan ëbi bédamboen isec —camenuen Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Èbî icsate bunaid nanu —quenda. Nëbi Esus tantiaquin mibi icsate bunaid ênquin mëmunta. Esus tantiaquido yec tantiananqueic nashunanta. ¹⁴ Adomboen Nuquin Papan Moises naden chuimiapadomboen mimbî natsiac. “Mibibi min dada datantiadacimboben utsibotsen bédamboen tantiaquiota,” quequin

Nuquin Papan ambi chiaid Moises dada uamepampic. ¹⁵—Opa penantiadpambo yacimboc nēishnanash chushcananosh—quiosh mibi caic. Aden naic mibi icsacuededeque. Esus tantienquo mimbi yaneque. Bēdamboec tabadta.

Nuquin Papan Mayanēn bēdamboen tabadmete

¹⁶ Nuquin Papan Mayanēn tantiamiacpadomboen naic bēdamboec tabadta. Aden mibi icsate bunaid mimbi nainquo ictsic. ¹⁷ Nuqui icsate bunaid naiqui Nuquin Papan Mayanēn tantiamiacpadec bēdamboec tabadiapimbo nuqui ictsic. Nuquin Papan Mayanēn tantiamiacpadomboen nuqui icsate bunaid ēnquin nuqui mēmumtsiac. ¹⁸ Nuquin Papan Mayanēn tantiamiacpadomboen tantiec: —Esusēnuidsēqui Nuquin Papa ēbi bēdamboen ismec—qeshun: —Moisesēn chiactedimbo naquin ėmbimbo Nuquin Papa bēdamboen ismēmbi—quequin tantienquo nuqui iquec.

¹⁹ Nadquo icsateuidi bunquid matses iqueque. Tantia. Chuinu. Nēidic aton chidopenquo chudquido. Nēidic aton bēnēpenquo chudmequido. Nēidic dada daēd chichudnanquido. Nēidic opabimboec chudnante bunquin matses ismequin adoquido. Nēidic tsienbēdta shui chuibudquin icsamate bunquido. ²⁰ Nēidic Nuquin Papan chiaid niacniacquin ambi matsesbimboecnuc nacenaidi papa caquido. Nēidic nēnēchoquido. Nēidic dauē icsa bedash icsa uanquido. Nēidic chieshēmēnquido. Nēidic chieshēmēnec chushcananquido. Nēidic cudasquido. Nēidic nēishēmēnquido. Nēidic ambi naiduidi naquido. Nēidic abitedi cuēsh-cuēshēdmianquido. Nēidic: —Utsin chiaid tantiatiapimbo iquebi. Ėmbentsēqui bēdamboen chiēmbi—quequido. ²¹ Nēidic utsin na natiambo bunec chieshēmēnquido. Nēidic tantiadenuen paēmbo icquid acquido. Inchēshēn ushenquo icquin adoquido. Adquidtedishun icsamboen naic. Adec abi icsaid ėntiapimbo yec unēsash Nuquin Papa yacno tabadiapimbo iquec. Aden mibi chuibanondambi ėnden.

²² Padnuen Nuquin Papan Mayanēn namiaid yec nadquiec tabadquid. Nuquin Papanēdta matses tantiaquiec tabadquid. Esus tantiec cuishonquec tabadquid. —Nuquin Papan ēbi bēdamboen isec—quec bēdambo yec dacuēdenquo yec tabadquid. Utsibon chieshēnaqui chieshēmēnenquo yec tabadquid. Nēishēmēnenquo yec tabadquid. Bēdamboen isquin utsibo nashunec tabadquid. Muainquo yec tabadquid Nuquin Papan namiaid.

²³ —Con naidi naimbi. Ėbiuidtsēqui bēdambo iquec—quenquo icquin utsibo bēdamboen tantiec tabadquid. Abi icsate bunaid ēnquin mēmumec tabadquid. Adquo yec Nuquin Papan Mayanēn namiaido Esus tantiaquido bēdamboec tabadtsiash. ¿Adec bēdamboec tabadsho isunda: —Adec tabadenda—quequin Nuquin Papan Moises dada uamepampic? Padenquo. —Icsamboec tabadenda—quequin icsamboec tabadquid chuipampic. Nuquin Papan Mayanēn tantiamiacpadec tabadquin aden chuipampid nuqui niaquenquo iquec. ²⁴ Adoenquo icquin cuesten decetan abided cuidadec unēsaid Esus tantiaquin nuqui icsate bunaid ēnquin nuqui mēmumtsiac. ²⁵ Aden icsamboen nainquo yec bēdambo icnuna. Nuquin Papan Mayanēn Esus tantiamiaid icquin aidēn tantiamiacpadomboen nanuna.

²⁶ —Ėbiuidtsēqui bēdambo iquec—quenda. Adenquo yec nuqui chuiquid dēniacte bunenquo yec bēdamboec tabadnuna. —Ėbi bunacpaden ēbi namianenquien icchitec. Utsien namechitec—quec chieshēmēnec tabadenda. Nēishnanenquo yec bēdamboec tabadnuna.

6

Esus tantiaquido bēdamboec isnante chiaid

¹ ¿Nuquin Papan Mayanēn tantiamiacpadomboen bēdamboen tantiaquidta icpec? Adquidēn abēdtan Esus tantiaquidēn icsamboen nasho isun: —Padi. Esus tantiaquid adesambo neque. Bēdamboec tabadta—caquid yendac. —Nēishēc ėbitsen icsamane—qeshun nēishenquo icquin aden chuiquid yendac. Abibi datantiadec: —Icsaquid nebi. Esus bēdamboen tantienquo yec adecbidi icsatsiabi—quequin tantiec: —Bēdamboec tabadta—quequid yendac. ² Adec bēdamboec isnanec: —Bēdamboec tabadnuna—quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimbi natsiac.

³ Utsien: —Utsibēd onquetiapimbo iquebi. Ėbiuidtsēqui bēdambo iquebi—quec abibi muauadquid icsambo iquec. ⁴ Adenquo yec mibibi datantiadta. —¿Nuquin Papan chiacpadectabi bēdamboec tabadpe?—quec mibibi datantiadta. Adashic: —Ai, Nuquin Papan chiacpadec tabadēbi—quiash adecbidi bēdambo icta. —Utsitedi icsambo icnubi ėbiuidtsēqui bēdambo iquebi—quenda. ⁵ ¿Mimbi utsibon naid chuibanshoda Nuquin Papan: —Mibi bēdambo iquec—capatsiash? Padenquo. Mimbi bēdamboen naid isun: —Mibi bēdambo iquec—catsiash.

⁶ Esus tantiaquidon nadoquid yendac. Nuquin Papan chiaid abi chuibanquid nashunquid yendac. ⁷ Piacbo sequidbimboec matses iquec. Tantienquo icquidēn icbompin

uestsaidi siac canienquo ictsiash. Padnuen tantiaquidēn ēshē bēdaidquo siac bēdamboec canitsiash. Tantienuquo icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unēsash Nuquin Papa yacno nidti-apimbo iquec. Padnuen Esus tantiaquid ambi chiapadomboen naic unēsash Nuquin Papa yacno nidendac. Ēbi adsho tantiash: —Icsaido Nuquin Papan cuidenuquo ictsiash —quec muaic tabadenda. Ambi chiapadomboen mibi cuidendac. ⁸ Ambi chiaid niac-niaquec abi icsate bunaiduidi naquid cuidendac. Nuquin Papan Mayanēn tantiamiapadomboen naquidien bēdamboec tabadec unēsash Nuquin Papa yacno tabadendac. ⁹ Ēmbi aden chuisho tantiash bēdamboec tabadta. Bēdamboec tabadec chieshtoenuquo icsho isun ambi tantiapadēn Nuquin Papan abēdi nuqui tabadmendac. ¹⁰ Adec bēdamboec tabadquin utsibo bēdamboen isquin nashununa. Aden utsibo bēdiactšéc tantiec Esus tantiaquido yec tantiananquec nashunanquionona. —Shubu abentsēquēn tabadquidobimboec Esus tantiaquido iquec —qeshun adonona.

Pabadon ēnquimbi chiaid

¹¹ Is. Nua-nua icnuc dada uaquin ěmbimbo ēnquimbi dada uanu. ¹² Muaquin chuiquidon mibi con tsusedpan chiapadomboenuidi nametiadquo iqueque. Aidon chuisho tantienda. Con matses isadaidbo: —Mibi bēdambo iquec —camenuen mibi adometiadquo iqueque. —Esusuidi chuisho con matsesēn chieshēnquin cuidnushe. Moisesēn chiapadomboen namenu —quequin mibi shui dēbid dēteshunemetiadquo icchitec. Aido muasho tantienda. ¹³ Aden mibi: —Adota —caquidombi Moisesēn chiactedi nainquien icchitec. Adquid yec: —Is. Bēdambo iquebique. Ēmbi chiapadomboen nēidon naosh —quenuembien mibi shui dēbid dēteshunemetiadquo icchitec. Aidon chiapadomboen nainda. ¹⁴ Ēbien adtiapimbo iquec. Esus tantiesabimboec: —Ēbibi bēdambo iquebi —quetiapimbo iquebi. Esusuidtsēqui bēdambo iquec. Abi tantiaquid cuidmenquo icnuec abided cuidadec unēsac caondash cuesten dectanac. —Aidquo tantiec bēdambo iquebi —caimbi. Aden Esus tantiec: —Ēmbimbo Moisesēn chiactedi naquin Nuquin Papa bēdamboen ismembī —quec ēnēdondabi. Adechidi Esus tantiec ēbi bunaid ēnash icsate bunenuquo iquebi. ¹⁵ —Moisesēn chiactedi naquiduidi Nuquin Papan bēdamboen istsiash —quetiapimbo iquebi. Shui dēbid dēteshunaidēmbi Esus tantienquo icsho Nuquin Papan cuidtsiash. Adembidi shui dēbid dētiacmaidēn Esus tantienquo icshobidi cuidtsiash. Nuquin Papan Mayanēn chuca uaidien Esus tantiaquid Nuquin Papan bēdamboen isquin bēdamboen tabadmec. ¹⁶ Ēmbi aden chuisho tantiash: —Āi, abimbo mimbi caique. Adonona —quesho: —Aido Nuquin Papan bēdamboen isquin bēdambo icmepashun —caimbi. Adquido Nuquin Papan: —Con matsesquio nec —caindac.

¹⁷ —Abimbo chienquien icchitec —ēbi cainda. Esusēn chiaidquo chiombi. Aidquo tantiaquin ambi chiapadomboen nabanta. Ēmbi Esusēn chiapadomboen nasho isun chieshēnquin cuesaniondashi. Cuesondaid bish abi iquec. ¹⁸ Tantia, con utsibo. Mibi Nuquin Papa chianembi naden. —Mimbi nabocpadomboen con Icho Esuquidistubēdtan Cadasia yacnocquido bēdamboen ista, Papa —quequin Nuquin Papa chianembi. Padi. Aidtedi chuiquin dada uaombi.

EPESO YACNOCQUIDON ISTE

¹ Pabado nebi. Nuquin Papa bunacpadomboen Esuquidistun, Èbi chuiheneta, caid nebi. Adquidquo icquin mibitedi Nuquin Papan bédambocquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onquecuedta.

² Aden Nuquin Papan bédambocquid icmenu caidombo icquin ma Nuquin Papan Nuquin Icho Esuquidistubédtan ènenquiocquin èbi bédamboen isec, quequin mibitedishun tantiapashun. Adembidi, Nuquin Papan bédambo icmenu caido yec abéd iquebi, quequin tantiapashun mibitedishun.

Nuquin Papan abéd abuc bédamboec tabadacpadquiocnoc icmiaid

³ Edoen, Nuquin Papa, Nuquin Icho Esuquidistun Papa bédambocquid nec. Esuquidistu adquidquibidi neoaic. Aid tantiaquid icsho abéd abuc bédamboec tabadacpadquidquo nuquitedi icmiac. Adoaid yec, Mibi bédambocquid nec, Papa, quequin chiec nuquitedi onquedenec. ⁴ Nidaid abubédta uabicquin aidénquiocquitedi uabicquin, Nèdtedquo Esuquidistu tantiaquido icsho èmbi cuèmbanaido iquendac, quequin Nuquin Papan tantiapampic. Ambi tantiampicpaden ma nuqui icsaisa icmepanuna. Aden nuqui tantiaquin ⁵ abi bunacpadomboen Nuquin Papan, Esuquidistu tantiaquido con bacuèbo icmendambi, quaiampicpadomboen nèbi adobanec. ⁶ Esuquidistu tantiaquid nuqui icsho abéd icquid nuqui icmenuen Nuquin Papan abi yacpadquidquo icmebanec. Adoac, Bédambocquid mibi nec, Papa, quequin Nuquin Papa nuqui chuidenec. ⁷ Matestedi icsaid bedshunacsho Nuquin Papa cudasaidquo Esuquidistu icsambocquidbimboecnuc cuesten decantanquin unès uapanédash. Adosho isash, Nèbi Esuquidistu tantiaquid èmbi bédamboen isaidquid nec. Mibi cuidenquo yec mibi icsaid bèpiscudobi, quec Nuquin Papa. ⁸ Naden nanuna, quequin ambi tantiampicpadomboen aton bacuè icmebanac abéd icquido nuqui nec. ⁹ Abi bunacpadomboen, Icsaquid cuidte bedshunash unèsquid con Mado Esuquidistu iquendac, quequin ambi matses tantiamenquo icpampid nèbi ambi cuèmbanaido Nuquin Papan tantiamebanec. ¹⁰ Adoaid iquec con mado abun icquido nidaid yacnocquidobéd chuiquid abentsèqui iquendac, quequin Nuquin Papan tantiampicpadquioibi adquidquo icmenu caidquo Esuquidistu iquendac.

¹¹ Esuquidistu tantiaquid icsho isun ambi tantiampicpadomboen, Con bacuè icmiaido nec, quequin Nuquin Papan cuèmbanaido ¹² abia tantiaquido nuqui bédamboec tabadsho isash, Nuquin Papa bédambo iquec, quequin chiec ma utsibo cuèdèmpanuna. ¹³ Mibi icsaid bedshunash abided cuidadec Esuquidistu unèsapanédash, quequin chuibanac abi tantiacquido mibitedi yansho isun, Esuquidistun na nec, quequin aton Mayanabi mieniaid abi iquec. ¹⁴ Aidèmbi mibi bédambo icmiac Nuquin Papabéd tabadendac. Mibitedi bédamboec tabadsho isash Nuquin Papa bédambo iquec, quequin chiec ma utsibo cuèdèmpanuna.

Nuquin Papa chiec onquianaiaid

¹⁵ ¿Bédamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abéd icte bunanec iccuededec, quequin chuisho tantiapombi. ¹⁶ Aden tantiashun mibitedi bèpiscudenquiocquin badiadquidèn-badiadquidènquien naden Nuquin Papa chian-chianembi. ¹⁷ Esuquidistun Papa, icsaisambo, tantiaquidquo mibi cadoque. Mibi bédamboen tantiaquid yacpadquiocnoc min bacuèbo Epeso yacnocquido min mayan icmeban, Papa. Adquido min Mayanèn icmiac mibi tantiadonequidombo ma icpanuna. ¹⁸ Adecbidi, Abuc èbèdi mibi iquendac, quequin mimbi chiacpaden tantiamenquin pausunac mibéd icnuequin cainquidombo Epeso yacnocquido ma icpanuna, Papa. Aidèn tantiamiac, Mibi yacno Esuquidistu tantiaquid utsibobéd bédamboec tabadendabi, quequin Epeso yacnocquidon ma tantiapanuna, Papa. ¹⁹ Aden tantiamiac Nuquin Papan nadatiambocquin nabanquin Esus unèsacsho uincuemenèdacpaden èbi uincuemen-dac. Adembidi nadatiambocquin nabanquin Esus tantiaquid èbi icmiac. Adembidi èbi bédambocquid icmebanec, quequin ma Epeso yacnocquidon tantiaquiopanuna, Papa. ²⁰ Esuquidistu unès uacsho uincuemeshun mibi yacno aidi indoshon min dayunquo mimbi tsadumpanédac, quequin tantiec Nuquin Papan nadatiambocquin naidquo nec, quequin adomboembidi èbi indoapec, quequin tantiacpadomboen ma Epeso yacnocquidon tantiapanuna, Papa. ²¹ Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibèdec, quequin Esuquidistu

min dayunquo tsadunquin utsibo mimbi ismepanēdac, Adquid nebi, chuiquid utsi queti-apimboconoc. Nuquin Papan nadatiambocquin nac ĕnenquocquin abitedi chuiquidquō Esuquidistu iquendac, quequin Epeso yacnocquidon ma tantiaquiopanuna. ²² Abitedishun con icbo caidquō Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquō nec. ²³ Ambi ĕndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsēcquiobi Esuquidistu icquin abēd icquido nua pausunaido yec abi yacpadquō ictequid yec abentsēc yacximboec abēdi nuqui tabadendac.

2

Nuquin Papan Esuquidistubēd icmiaido

¹ Mibi icsaquid yec Nuquin Papabēd ictiapimbo iccondac. Adboedi nēbi aidēmbi ĕnenquocquin abēd icquido mibitedi icmiac. ² ĕnden Nuquin Papa chieshēnquin mimbi tantiacpadomboen nabanondac. Adquid icsho Nuquin Papa chieshēnquid dapan Satanāsēn yuaido mibi iccondac. Aidēn Nuquin Papan chiaid niacacpadomboen mibitedishun niacbededpondac. ³ Adquiduidquō yec nuqui tantiacpadec icsadenec nuqui tabadpadenec. Adec tabadquin Nuquin Papan chiaid niactenepondac nuqui. Aden niacsho isun adquid utsibobēdta Nuquin Papan cuidnu caido nuquitedi icpondac. ⁴ Adec cuidnu queboedēmbi nuqui tantiec unēsquocquin Nuquin Papan comapenen nuquitedi tantiampepondash. ⁵ Ambi cuidnu caido icsaquido yec abēd ictiapimbo nuqui tabadpondac. Adec tabadsho Esuquidistu tantiaquido nuqui icmebanquin abēd icquido Nuquin Papan nuquitedi icmiac. ⁶ Esuquidistu nuqui icsaid bedshunacsho abided cuidquin unēs uapanēdash. Unēsacsho isun uincuemeshun abi yacno Nuquin Papan indopanēdash. Adshun abi tantiaquidtedi abuc Esuquidistubēdta ambi indoacximboecquido icsho Nuquin Papan nuqui bēdamboen isec. Adecbidi abuc Esuquidistubēd icquid nendabi, quequin tantiec nuqui tabadec. ⁷ Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquocquin Esuquidistubēd icquido nuqui icmec. Ma adquid icsho isash utsibo, Nuquin Papan naid nec, ma quepanuna. ⁸ Nuquin Papan, Cuidnu, quenquocquin Esuquidistu nuqui tantiamiac abi tantiaquidombo nuqui yanondac, ĕmbibi tantiembi, quetiapimbo nuqui icnubi, Mibi tantiamiomique. ĕbi cuidquin mene, quenquocquin Nuquin Papan nuqui tantiamiosh. Adoac Esuquidistu tantiaquid yec abēd icquido nuqui nec. ⁹ Icsaquido icquin bēdamboen naic nuqui icsaid cuidatiapimbo nuqui iquec. Bēdamboen naic cuidadpebi, quiaish abi icsaquid yequi, Bēdamboquid nebi, quec tabadsho isun utsibon icsamboen tantianushe queshun Nuquin Papan icsaisa aton Madoded cuidpanēdash. ¹⁰ Nuquin Papan uaido nuqui nec. Aidēmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanueshun.

Esuquidistubēd abentsēc yacximboecquido

¹¹ Nuquin Papan, Cuidnu, quenquocquin comapenen tantiamiaidquō mibitedi icquin mibi ĕnden tabadaid tantiaata. Shui dēbid dētemesa isadaidpembo nec, quequin isadaidbon shui dēbid dētemequidon mibi cuēnondash. Nuquin Papan matsesquō nebi, quequin shui dēbid dētemequidquō isadaidbo nec. ¹² Adquidquō isadaidbo icnu, Nuquin Papan chomiaid choec, quequin tanties mibitedi icpondac. Adquido yec Nuquin Papan matses nebi, isadaidbo quiacpadec adtiapimbo mibitedi iccondac. Adecbidi, ĕbi yacno yuedanquid iquendac, quequin Nuquin Papan chiaid tanties mibitedi icpondac. Adecbidi, Abēdi ĕnēdenquō yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tanties mibitedi icpondac. ¹³ Adec aid tanties yec icsaquid yec, Nuquin Papa yacno pudednu, quetiapimbochoedi, Matses icsaid bedshunash abided cuidadec Esuquidistu unēsapanēdash, quequin tantiaquid icsho aidēnquō abi yacno yuedendac. Nēbi aid tantiaquid yec abi tantiaquid utsibobēd abēdi tabadacximboecsho Nuquin Papan nuqui bēdamboen isec.

¹⁴ Isadaidpembo isash isadaidbo, ĕbēd icquidpenquō nec, quequin tantiec datamēncuenepondash. Adecbidi isadaidbo isash adquiecbidi isadaidpembo datamēncuenepondash. Adquido icboedi ĕbi icsaid bedshunash Esuquidistu unēsapanēdash, quequin isadaidbo utsin-utsinquin tantiec. Adembidi isadaidpembo utsin-utsinquin aid tantiec. Adec aid tantiaquid yanash datamēncuenquō yec matses abentsēc yacximboecquido yanac. ¹⁵ Esuquidistu matsesash nidaidēn tabadquin isadaidbo icquin isadaidbon, Naden nata, quequin chiacpadomboen utsitedishun natiapimboconobi Esuquidistun uesquin nabampanēdash icsainquocquin. Adec tabadquin naimbudsho icsaquidximboecnuc unēs uapanēdash. Aden unēsmesho isec Nuquin Papa, Padi. Chēn,

quenquo icpanēdash. Ēbi yacno isadaidbo isadaidpembobēdtabi con madon yuedendac, qianash chēn quenquo icpanēdash. Datamēncueneboedi aido Esuquidistu tantiaquid yanash datamēnenquo yanac. ¹⁶ Naden nata, quequin chiaidtedi nuqui natiapimbocon nuqui icsaid bedshunash Esuquidistu unēsapanēdash, quequin tantiaquido isadaidbobēdi isadaidpembo yanac. Ambi tantiaid Esuquidistu yanash datamēncueneboedi adec datamēnu quetiapimbo yanec Esuquidistun shubun icquido yanoaic. ¹⁷ Matsesedi bēdamboen iste Nuquin Papa bunec quequin ambi chuibeniacpadec abided matses icsaid bedshunash unēsquin isadaidbo isadaidpembobēda Nuquin Papan bēdamboen isaido icmepanēdash. ¹⁸ Adoac nēid isadaidbo nec. Nēidic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton Mayan meniac. Aden meniac aidēn tantiamiac, Mimbi ēbi tantiec, quec Nuquin Papa chiec Esuquidistu tantiaquidombo onquedenec.

¹⁹ Aden chiec onquec ambi yuedtiapimbo icboedi nēbi Esuquidistu tantiaquido yanash Nuquin Papan shubun ēnden icnēdaidobēd tabadtequid mibitedi iquec. ²⁰ Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquo isadeque. Chuinu. Tantia. Esuquidistu abia yampid abi yacno yuedanquidquo yec abia nitsinaid cuestas nidquidimbocquid nec. Nuquin Papan chiaid chuibampampidobēd Esuquidistun ēbi chuibeneta caido shubu nitsinaidimbocquid neoaic. ²¹ Aided abia icquid icnuc isadaidbobēd isadaidpembo Esuquidistu tantiaquid dadpen yansho Icbon tabēcshun tanebanaidimbocquido neoaic. Abi tabadte Icbopadquid icsaisa yampec. ²² Mibi Epeso yacnocquido Esuquidistu tantiaquid utsibobēd Nuquin Papan Mayan meniaid yec Nuquin Papa tabadtebidi mibi nendac.

3

Isadaidpembo Esuquidistu chuibenequid Pabado

¹ Isadaidpembobēdi ma Nuquin Papa tabadte icnu quequin Esuquidistu chuibenesho quēnēn nauedaid icquin aidēn chiacpadomboen mibi chuibanquidquo nebi.

² Isadaidpembo yacno nidshun Esuquidistu chuibeneta Nuquin Papan cac nebi. Esuquidistu chuibenequid Pabado nec, quequin mimbi tantiec. ³ Ēbi yacno yuedanquid Esuquidistu iquec, quequin Nuquin Papan tantiamiacpaden ēnden dada uaquin mibi chiondambi. ⁴ Ēmbi dada uaondaaid bēdamboen isec onquequin Nuquin Papan ēbia Esuquidistu tantiamiacpaden mimbi tantiapec. ⁵ Ēndenquo Nuquin Papan Esuquidistu nidmēmbi, quequin chienquiocpampidēmbi nēbi ambi, Esuquidistu matses tantiameta, caid aton Mayan nec. Adoac Nuquin Papan, Esuquidistu chuibeneta, caidtedi ambi naden nanuna, quequin chienquiocpampidēmbi aton Mayanēn tantiamiac. ⁶ Ambi nēbi tantiamiaid nad iqueque. Tantia. Chuinu. Isadaidpembo Esuquidistu tantiaquido isadaidbo Esuquidistu tantiaquidobēd Nuquin Papa yacno ēnēdenquo yec tabadtequido nendac.

⁷ Nuquin Papan, Cuidnu, quenquiocquin nadatiambocquin ēbi ismiaid yec ambi Esuquidistu chuibeneta caid ambi namiaid icsho ambi nadatiambocquin nabamiaidquo nebi. ⁸ Esuquidistu tantiabicquid utsi bēdiactsēc icsaquid icnubi comapenec icsaquidquo icsho Nuquin Papan Esuquidistu tantiaquid icmeshun Esus bēdambo yaidbēdtabi abēd tabadte bēdaidquo tantiamenuequid pondashi. Adembidi ambi, Esuquidistu chuibeneta, caidquo nebi. Adquid icquimbi Esuquidistun matses bēdamboen tabadmenu, quequin tantiaid dadpen icnuc aidtedi uesquin chuitiapimbo iquebi. Aidtedi matsesēn bēdamboen tantiatiapimbo icoapec. ⁹ Ēbēdtambi abitedi uampidquo Esuquidistu aid tantiaquido ēbi yacno yuedquid iquendac, quequin Nuquin Papan tantiamenuequid nēbi matses tantiamenuen Esuquidistu chuibeneta caidquo nebi. ¹⁰ Aden ēbipadquid Esuquidistu chuibeneta icsaquid icboedi Esuquidistu tantiaquid dadpen yanac. Adsho isun aidtedi Nuquin Papan Esuquidistubēd abentsēc yacimbocquid abipadquid ambi tantiampicpadomboen icmēbanec. Aden icmēbansho isun abi yacno tabadquin namequidon tantienquiocboedēmbi nēbi tantiadec. Nuquin Papan, Yuecshun naden nanuna, quequin ambi bēdamboen tantiampicpadomboen nabanac nēbi abēd icquid dadpen iquec, quequin Nuquin Papan abi yacnoshon uaidon tantiec. ¹¹ Matses bēdambo icmetequid Esuquidistu iquendac, quequin ambi tantiampicpadomboen Nuquin Papan Esuquidistu Nuquin Icho icmepanēdash. ¹² Aton mado Esuquidistu ēbi icsaid bedshunash unēsash uincuenash Nuquin Papan dayunquo iquec, quequin tantiec dacuēdenquo yec Nuquin Papa chiec nuqui onquec. ¹³ Adecbidi, Esuquidistu chuibenesho bedshun Pabado quēnēn nauedac, quequin tantiec chieshenquiocquin Esuquidistu tantia, Epeso yacnocquido mibi caimbi. Ēmbi chuibanac Esuquidistu tantiaquid yansho Nuquin Papan abēdi tabadmenuequin Nuquin Papan ambi, Bēdamboquid icmenu, caid mibitedi neque. Chieshenda. Adembidi

Pabadon chiac ëbipadquid isadaidpembo utsi-utsiec dadpen Esuquidistu tantiaquid yamp-pec, quequin tantiec tabadta.

Epeso yacnocquido tantiec Nuquin Papa chiec Pabado onquiaid

¹⁴⁻¹⁵ Nuquin Papan isadaidpembo Esuquidistu chuibeneta cac, chuibenesho quënën nauedaid icquin ëmbi chiac Esuquidistu tantiaquid isadaidbobëd isadaidpembo Nuquin Papan matses yanash aton shubun icquido nec. Nuquin Papan cuëmbanaido nec, quequin tantiec danëshën sebudash aid naden chiec onquebi. ¹⁶ Mibi icsaisa icquin mimbi tantiacpaden Epeso yacnocquido nua pausun, Papa, ma natiamantequid icnuc Esuquidistu tantiesa yanenquioapanuna. ¹⁷ Aden pausunac ma aido Esuquidistu tantiadonequidombo icpanuna. Aido mimbi tantiamiac ënëdenquio yec utsibëd tantiananec tabadquid ma Epeso yacnocquido icpanuna. ¹⁸ Aden pausunac, Èbi utsibobëdta comapenen tantiaquid Esuquidistu nec. Ambi bëyuc matses uaid tantiaquinc, aidën tsyuequidic ënden icpampido tantiaquinc, nëbi tsyuec tishaido tantiaquinc, tishabicquido tantiaquinc caquin aidtedi icsaid bedshunacsho Nuquin Papan cuidpanëdash, quequin ma Epeso yacnocquidon tantiaapanuna, Papa. Adembidi abuc bëdamboshë yacno icboedëmbi matses icsaid bedshunacsho Nuquin Papan cuidpanëdash, quequin ma Epeso yacnocquidon tantiaquioapanuna, Papa. ¹⁹ Aden tantiaquidquio yec Esuquidistu unësnëdash, quequin tantiec papudedash Esuquidistun matses tantiacpadquidquio Nuquin Papan ma mibitedi icmebampanuna.

²⁰ Nadquid Nuquin Papan ëbi icmetsiash, quequin nuqui tantiatiapimbofnobi nadati-ambocquinc nabanquin ambi tantiacpadomboen abi yacpadquidquio nuqui icmebanendac. ²¹ Adoac ma abi tantiaquidon ënenquioquin Nuquin Papan Esuquidistubëdta naid chuibampanuna. Ma aidon tsyuequidontsen adembidi chuiopanuna. Ma nuquin tsyuequidontsen adembidi chuiopanuna. Ambi uaid utsitedi naimëdec, quenubi ma adombombidi Nuquin Papan Esuquidistubëdta naid matsesën chuibanoapanuna. Ai, ma ënenquioquin adopanuna.

4

Abentsëc yachimboecquido Esuquidistu tantiaquido

¹ Nuquin Papan isadaidpembo Esuquidistu chuibeneta cac chuibenesho bedshun quënën nauedaid icquin naden mibi chiembique. Tantia. Esuquidistu tantiaquido aton shubun icquido yec icbo bëdamboec tabadacpadquiec tabadteneta. ² Utsi icsambochso isun, Icsaisa Nuquin Papapadquid yanabicquid nebi, quequin tantiaquin abëd onquequin abi icsaid ëmenuequin chuiban. ³ Nuquin Papan Mayanën abi utsibëd bëdamboec tabadaid tantiamiacpadquiec Esuquidistu tantiaquid utsibobëd bëdamboec tabadteneta. ⁴ Esuquidistu tantiaquidtedi abentsëc yachimboecquid nec. Abentsëcquiobi mibitedi meni-aid aton Mayan iquec. Adquiecbidi Nuquin Papa yacno nidash aidbëd tabadec abipadquid yec icsaisa iquendabi, quequin abuc indotequid mimbi caintequid abentsëcquiobi iquec. ⁵ Abentsëcquiobi mibitedishun con Icbo caid iquec. Abentsëcquiobi mibitedishun tantiaidquio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yachimboecquid nec. ⁶ Abia yampid Nuquin Papa Esuquidistun Papambo abentsëcquiobi iquec. Abitedi uaquidquio yec abitedi Chuiquid Dapambo nec. Aidbidi Esuquidistu tantiaquido bëdambo icmequid neoaic. Aidëmbi Esuquidistu tantiaquidobëd tabadnuequin abipadquid meniac nuquibëd aton Mayan iquendac.

⁷ Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac. ⁸ Èndenquio chiampicpadembi nëbi pausumbanec. Naden ënden chiampid neque. Tantia. Chuinu.

“Nuquin Papan abucquio indoac, Èbi tantiaquidtedi ëbëdi tabadendac, quequin Esuquidistun bedbanshun buanachimboecquido aido nec.

Nadquidquio iquendac, quequin ambi tantiacpadomboen pausumbanac,”

quequin ënden chiampid nec. ⁹ “Abucquio indoac,” quequin çmitsipadomboen tantiampampiba? mibi quepec. Aidquio chuinu. Tantia. Esuquidistu abia yampid yec abucquio tabadboedi, Matses icsaid bedshunash ëbided cuidadnu, quianacsho nidaidëshun chidon tishpanëdash. ¹⁰ Aid nidaidëshun tishacsho unës uacsho uincuemequin Nuquin Papan aidquio abuc abi yacno indoshon abitedi chuiquidquio Esuquidistu icmepanëdash. Adquid icmiac ma ëbi tantiaquidobëd icpanueshun abipadquidquio aton Mayan aido menebanec. ¹¹ Aden aid menebanac aidënquio Esuquidistu tantiaquido utsi-utsien nadquid icmebanec: Esuquidistu chuibenequid utsi-utsien icmebanquimbi, Nuquin Papan naden nanuna, quequin chiaid chuibanquid utsi-utsien icmebanoaic. Adquid icmebanquin utsi-utsien Esuquidistu chuibenequidon, Esuquidistu chuibanta, caidbidi aido icmebanquin utsi-utsien abëd iccudedquido isbanquin chuiquin tantiamequid icmebanoaic. ¹² Bëdamboec

tabadtenequido ëbi tantiaquidtedi icmeta, cac aidën tantiacpadomboen adquido icmebanac¹³ ma shubu dapan icquid dadpen yanec abentsëc yacimboc abi tantiadonequido icpanuna. Aden Nuquin Papan mado tantiadonec ambi uesquin pausunaidquio yec abipadquidquio iquec icsaisa iquendac.

¹⁴ Ambi pausunaidquio icquin abimbo chiacbimboen utsibon chuisho tantiabenicquidën badedquio tantiacpaden tantienquio nuqui iquendac. ¹⁵ Tantianec abimbo chuinanquido Esuquidistu tantiadonequido icmiac chuiquid Esuquidistupadquid yanash abëdi abentsëc yacimbocquid nuqui yanendac. ¹⁶ Ëbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abëdi abentsëc yacimbocquid nuqui iquec. Esuquidistun pausunacpadomboen abentsëcshun-abentsëcshunquien nabanequi tantianquiec abi tantiaquidtedi Esuquidistupadquidquio abëdi abentsëc yacimbocquid yanendac.

Esuquidistun nua pausunacpadquiec tabadteniaid

¹⁷ Esuquidistubëd abentsëc yacimbocquid abi tantiaquidtedi iquendac, quiash, aidpadquid icnu, quec ënden icsamboec tabadnëdacadquiec tabadenda caimbi mibi. Esuquidistun ëbi chuiheneta caidquio icquin dada uaquin mibitedi aden chiemi. Esuquidistu tantiesan ambibi tantiacpadomboenuidi tantie. Adecbidi ambibi tantiacpadomboen nabanec. ¹⁸ Pashuachimboen tantienquio iquec. Nuquin Papabëd tabadte iquec, utsibo qesho tantiesha yec, Tantiatiapibi, quepec aido. ¹⁹ Icsaquid nebi, quequin badedquio chienquio aidon iquec. Adquid icsamianquidën yuaid yec, Icsanu, quiacpadec tabadec. Adec icsasho utsin istemaid nec. ²⁰ Adpenquio Esuquidistun tantiamequin pausunaid iquec. ²¹ Esuquidistu chuibansho Epeso yacnocquidon tantiaposh, quequin chuisho tantiapondambi. Mibi, Aid tantiaquid nebi, qesho tantiasun Esuquidistu chuibenequidon, Abëd icquid yec abipadquid yanebi quec adquiecbidi tabadteneta, quequin mibi chuipondash. ²² Adoac mimi tantianëdacadec tabadoaında. Mibi ënden icsamboec tabadacadquiequi mibi icsaded-icsadedondac. Icsaquid yequi, Bëdamboquid nebi, quec mibi muadenepondac. ²³ Mibi icsate bunaid ënta. ²⁴ Adsho isun ma Esuquidistun tantiacpadomboen tantiapanu qeshun Nuquin Papan Mayanën mibi nua pausunendac. Adoac adomboembidi mimi tantiapec. Adecbidi aid bunacpadquiec bunoapec. Adoaid yec mibi bëdamboquid icnuec icsaisa yanec mibi bëdamboec tabadtenendac. ²⁵ Adquid icnuec Esuquidistun shubun icquido nebi, quec muainquio yec Esuquidistu tantiaquid ut-sibobëd abimbo chuinanquidombo icta. ²⁶ Nëishëc icsaında. Nëishash abi ushëmbi bëdanta. ²⁷ Satanasën yuanushe quiash badedquio bëdanta. ²⁸ Ampequid icboedi Esuquidistu tantiaquid yanshun ampëda. Adquid icboedi chonoadquin mitsana bedshun utsin na nibëdsho isun menequid icta.

²⁹ Icsaquid onquiacbimboec onquenda. Utsi tantiaquin bëdamboquid icmenuequin chiech onqueta ma Nuquin Papan aidtsen bëdambo icmepanu quiash. ³⁰ Esuquidistu tantiaquid mibi icsho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquio yampec. Aid unësquio icmenda. ³¹ Utsi icsamboen chuinu, quequin tantiaid ënta. Adecbidi comapenec nëishash bëdanta. Utsi cuestiadquio yec nëishboedi adecbidi bëdanta. Nëishash chushqueboedi adecbidi bëdanta. Utsi icsamboen tantiaquin chuiboedi adecbidi bëdanta. Utsi icsamboen tantiaid adembidi ënoata. ³² Adembidi bëdambo icmenuequin utsi bëdamboen tantiaquin nabanta. Adecbidi utsin chieshënquin mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unëso isash Nuquin Papa mibi icsaid bëpiscudacadquiec utsi icsaid bëpiscudoata.

5

¹ Nuquin Papan bacuëbo yec ² tantianec tabadteneta. Nuquin Papan chiampicpadquiec Esuquidistu nuqui tantiaquin nuqui icsaid bedshunash abided cuidadec unëspanëdash. Adquidquio icsho isun Nuquin Papan bëdamboen isaidquio Esuquidistu icpanëdash.

³ Esuquidistu tantiaquid yec, Mimbi inacmaid isec chudnu, quesambo icta, dada. Adecbidi, Ëbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda. ⁴ Adecbidi, Esuquidistu tantiaquid yec tsienbëdta shui icsamboen chiech onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bëdamboec onquequid utsi uain chuiquin mamëshuneshambo icta. ⁵ Chudtemaid chudnu, quequinuidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquec. Adecbidi, Bednu, quequinuidi bedquid yec Nuquin Papa yacno

Esuquidistun shubun icquid ictiapimbo iquec. Aden nabanquid Nuquin Papabëd Esuquidistu con icbo nec, quetiapimbo icoaic. ⁶ Ambembi chieç onquaid tantiesä icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac. ⁷ Adquidbëd icsainda.

⁸ Ènden Esuquidistu tantiesä icquin inchëshquiocnoc isacimboben tantienquo icboedi nëbi Esuquidistu tantiaquid mibitedi yansho ambi tantiamebaniaido icquin badiadnuc isucunacimboben tantiaquimota. Aden tantiec Nuquin Papan bacuëbo yec Nuquin Papan tantiamiacpadquiec bëdamboec tabadteneta. ⁹ Esuquidistun ambi tantiacpadomboen pausunac abi yacpadquiec nuqui bëdamboec tabadtenendac. Adembidi aid yacpadomboen abimbo chuidenequid icta. ¹⁰ ¿Nadec tabadshodabi Nuquin Papan bëdamboen istiashe? Tanu, quequin adomboen nabanec tabadteneta. ¹¹ Utsibëd icsainda. Utsi icsadenenubi mibi bëdamboec tabadtenesho isun abi icsaid utsin ëmpec. ¹² Icsaquidën ompoquin naid chuitemaïd nec. ¹³ Adquidën Esuquidistu tantiaquid bëdamboec tabadtenesho isun, Icsambocquid nebi, qeshun Esuquidistu tantiabempec. ¹⁴ Bëdamboec tabadquin ismedeniac icsambochoedëmbi bëdamboen tantiabentsiash. Esuquidistu tantiaquido chuiquin dada uaid nad iqueque. Tantiä. Chuinu.

“Unësaçimboben tantienquicoeboedi isucunshun tantiabenaçimbobec bëdamboec tabadta.

Adquid icsho Esuquidistun mibi nua pausunendac.”

¹⁵ Adec bëdamboec tabadnuec Esuquidistun tantiamiacmaid tabadacpadec tabadenquo yec Esuquidistun tantiamiacpadquiec tabadteneta. ¹⁶ Icsaquid dadpen iqueque. Aidpadquid iquenda. Esuquidistun pausunaid mibitedi bëdamboec tabadtenesho isec ma Esuquidistu tantiesä icboedi abi tantiaquid yampanuna. ¹⁷ Mimbi icsamboen tantiacpaden nabanenda. ¿Atotsi mimbi ëbi namepatsia? quequin Nuquin Papa chui. Aden abi chuisho Nuquin Papan mibi tantiamiacpaden adobanta. ¹⁸ Icsachitomane quequin nua paëmbocquid aquenda. Aden aquec icsaindac. Icsate bunenquicoquin Nuquin Papan Mayanën tantiamiacpadomboen nua pausunaid icquin bëdamboen nabanta.

¹⁹ Adec icsate bunenquicoquin Esuquidistu tantiaquid utsibobëdan Nuquin Papan chiaïd chuiquinc, chuiquid dapa Dabidën dada uampid sadmo caïd utsi-utsien chuiquinc, cuëdente utsi chuiquinc cain chieç cuëdënteneta. Adec cuëdënquin Nuquin Içbon naid chuideneta. ²⁰ Esuquidistu tantiaquid icsho Edoenën Nuquin Papan bëdambo icmiaïdtedi yec aidën naid chieç onquedeneta.

Utsi tantiaquin nashunta quiaïd

²¹ Esuquidistu con icbo nec, quequin ambi chiaïd niacmane qeshun utsi tantiaquin nashunta.

²² Adembidi Esuquidistun chiacpadomboen dadan inaidën min bënën chiacpadomboen nabanta. ²³ Adembidi abi tantiaquidtedi chuiquidquo Esuquidistu nec. Abi yacno indoshon ënëdenquo yec icsainquiocnoc tabadmendac. Adembidi aton chido chuiquidbidi aton bënë nec. ²⁴ Esuquidistun chiacpadomboen abi tantiaquidon nabanacpadomboen aton bënën chiaïd naquidquo aton chido neoaic.

²⁵ Esuquidistu abuc tabadboedi abi abuc bëdamboec tabadtequid tantienquo yec unës uanushe quenquo yec matses tantiec nidaidënshun tishaid yec matses icsaid bedshunash abided cuidadec unëspaneðash. Abuc ëbëdi abentsëc yacimbocnuc tabadmenu, quec unëspaneðash. ²⁶ Adecbidi, Èbi tantiaquido icsaisa icmenu, quiaish abided cuidadec unëspaneðash. ²⁷ Adecbidi, icsaid nibëdquid bëdaïdquo abi tantiaquido icmeshun Nuquin Papa yacno yuedshun, Èmbi yuedboed min shubun ictequid nendac, quequin ismembì, quec Esus unëspaneðash. ²⁸ Adomboembidi chido inquidën abibi tantiadacpadomboen ma con chido tantiaquin, Bëdambocquid icmenu, quequin nashundeniash ma aidbëdi bëdambocquid icsho Nuquin Papa yacno Esuquidistun yuedpanuna. Aton chido tantiaquid abibi tantiaquidbidi nec. Aidbëdi abentsëc yacimbocnuc neoaic. ²⁹ Abibi chieshëmëdesa dada nec. Bunquioquin peshun aquec. Adembidi iquenquin cuëte cuëc. Esuquidistun abi tantiaquid abëd icquido icsho aïdo tantiaquin nabanacimboben ³⁰ dadan abëd icquid aton chido icsho aïdi tantiaquin nashunquid. Dadaba uashun aidën shictodobi chichshun chido uapampic. Aidoshon dadan nami aton canitebëda chido uashun daëd uac abentsëc yacimbocnuc aid daëdi yanac. ³¹ Nuquin Papan ënden dada uampid nad iqueque. Tantiä. Chuinu. “Aidbëd icnu, qeshun bedash aton papa aton titabëda nianacimbocnuc daëdash aton chidobëdi abentsëc yacimbocnuc tabadtenec.” ³² Adec dada aton chidobëd daëdash abentsëc yacimbocnuc ambi icmiampicpadec Esuquidistu tantiaquido aton shubun icquido abentsëc yacimbocnuc tabadendac, quequin chieç. ³³ Nëbi adomboembidi chido inquid ambi inaidbëda chuiqoimbique. Tantiata. Mibibi tantiadacpadomboen min chido bëdamboen tantiata dadan. Con bënë ëbi chuiquid nec, quequin aidën chiaïd tantiata chidon.

6

Bacuëbobëdta bacuëchoquid tantiamequin chuibanaid

¹ Bacuëbon Esuquidistu tantiaquid icquin papan chiacpadomboen chieshenquiocquin nabanta. Titan chiacpadomboembidi chieshenquiocquin nabanoata. Aidon, Nata, quequin chiaid cacuidenquiocquin nata. ² Nuquin Papan, Naden nata, quequin ambi chiaid cuënoten dada uaid Moises meniampid abentsëc nad iqueque. Tantia. Chuinu: “Ëbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic: ³ “Amën anibëdtan chiacpadomboen naquid Nuquin Papan bëdambo iquebi camiaidquio iquendac. Adecbidi nidaidën yuec tabadnuequin adobanta,” quepampic.

⁴ Amën anibëdtan con bacuëbo chieshmemane qeshun bëdamboen chuiquin tantiamequin isme. Adembidi, aido pemeshun acme. Adembidi, Ëmbi chiacpadomboen ma nabampanuëshun Nuquin Icbon chiaid tantiamenu, quequin adobanta.

Utsin yuaido yuaquidobidi tantiamequin chuibanaid

⁵ Yuan mimbi Esuquidistun chiacpadomboen nabanacpadomboembidi mibi yuaquidën chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidën chiacpadomboen nabanta. ⁶ Min icbon chuishun isnuc ambi chiacpadomboen bëdamboen mimbi nabanacpadomboembidi min icbon isenquiocnoc nabanoata. Esuquidistu con Icho nec, quequin aidën chiacpadomboen nanuna, quequin nidaidënshun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac. ⁷ Min Icho Esuquidistun aton Papan chiacpadomboen chieshenquiocquin nacpadomboen nidaidënshun min icbon chiacpadomboen chieshenquiocquin nabanta. ⁸ Bëdamboen nabanquido yuacmaidbëdta yuabo Nuquin Papan bëdamboen cuidquin menendac, quequin tantiaquin bëdamboen nabanta.

⁹ Yuaquidon min yuabo chieshënenquiocquin bëdamboen chuibanta. Mibi cuesnu, quenquiocquin ancata. Min Icho abucquio tabadquid min yuabon Icbobidi nec. Aidën abitedi isec: Nëdic yua icsho daëdpectsëc pausunembi. Utsibic, abi yuaquid icsho nua pausunembi, quesa Nuquin Papa nec. Yuaquid isacpadomboen yua isec.

Satanas cuemetequid dasiuidaid

¹⁰ Nuquin Icho nadatiambocquin nabanquid iquec, quiash aidënquio nua pausunaid icta. ¹¹ Satanac cacumetequid dasiinu, quiash, Nuquin Papa mibi nua pausunesho, Ai, cata Satanasën mua uaquin bedchitoshe qeshun. ¹² Matses isadacpadpenquio nami intacbëd isadesa Satanasbëd icquido nec. Aidtedi Nuquin Papan abi tabadaid tédion tabadmec. Aido icsamianquido nec. Matses yuanuequid Satanac nec. Nuquin Papan uaid tantiaish bëdambo mibi iquendac, quequin muaquin aidon chiec. ¹³ Aden muaquin chuiquid aidtedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatequid ushë chonoc Satanac mibi icsamenuec choacsho bëcuniacbimboen cacumec abi mibi nidtoash Esuquidistu tantiaquid yec nidendac. ¹⁴ Aid cacumec abi nidquid icnuec Nuquin Papan abimbo chiaidquio nacrëshëdadbimboec tabadteneta. Adembidi, Nuquin Papan abi bëdamboec tabadtequid shictoncacbimboec tabadteneoata. Adec tabadec abi nidtoash mibi nidendac. ¹⁵ Adecbidi, Esuquidistu tantiaquid ëbëd icquid iquendac, quequin Nuquin Papan tantiamequin pausunaidën tapucudacimboben adomboembidi chuibenequin Satanac cacumec nidacimboc abi mibi nidendac. ¹⁶ Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidënquio dëcatemënquiash abi mibi nidendac. Aden Nuquin Papan tantiamequin pausunaidënquio dëcatemënquiash Satanasën abi tantiamenequin pian sedo-sedoacimboben pausntemaid yec abi mibi nidendac. ¹⁷ Adecbidi, Esuquidistu tantiaquid ëmbi yuedtequid nendac, quequin Nuquin Papan tantiamiac utsin machictiapimbo yec shocosh mauete uaid mauiacimboc tantiec tabadteneta. Aden pausunac tabadquin Satanac, Esuquidistu mibi bedec choenquio iquendac, qesho cacumiash abi nidquin mimbi ënenquiocquin, Esuquidistu choate cainembi, quequin abi mimbi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanën tantiamiaidquio icquin mimbi chuisho tantiaish Satanac cuenendac. ¹⁸ Adecbidi, Nuquin Papan chiaid aton Mayanën tantiamiaid icquin utsibo tantiaquin baded-badedquic Nuquin Papa chiec onqueta. Satanac icsamenushe quiash Esuquidistu tantiaquid utsibo Nuquin Papa chiec onquedeneta.

¹⁹ Èbitsen tantiaquin Nuquin Papa chuoata. Dacuëdenquiocquin Nuquin Papan tantiamiacpadomboen Esuquidistu abi yacno yuedanquidquio nec, quequin Pabado chuime,

Papa, quequin ëbitsen chuioa. ²⁰ Esuquidistun chuibeneta caid icquin abi chuibenesho mêtaneshun quënën nauedaïd nebi. Adoaid ëbi icnuc mimbi tantiacpaden chuibanquid Pabado icme, Papa, quequin chuioata.

Ënquin chiaïd

²¹ Nëbi ëbëd icquid chiembique. Tanta. Tiquico mibi yacno nidec. Aidbidi Esuquidistu tantiaquid icsho nuqui con utsi caid nec. Nuquin Icbon chuimaidquio aidi nec. ²² Mibi yacno puduedshun ëmbi naidtedi ëbi tabadaïdbëdta mibi chuibanendac. Ëbi mimbi chuïsho tantïash, Bëdambo iquebi, quependac Epeso yacnocquido, quequin Tiquico mibi yacno nidmembi.

²³ Mibëd icquido Esuquidistu tantiaquid utsibobëd ma bëdamboec tabadpanuna caimbi mibitedi. Esuquidistun Nuquin Papabëdtan abi tantiamiantequidbëdta utsi tantiatequid pausunaid ma icpanuna caimbi mibitedi. ²⁴ Ënenquiocquin Nuquin Icbo tantiaquidtedi ma abipadquid icpanuna.

PIDIPOS YACNOCQUIDON ISTE

Pabadon tauamboen chiaid

¹ Esuquidistun yuambo Pabado nebi. Esusën yuabidi Timoteyo caidbêd iquebi. Aidbêd icquin shubu dadpen icquid Pidipos yacnocquido Esus tantiaquidtedi mibi chuiquin dada uaambi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi. ²—Con Icho Esusbêdan Pidipos yacnocquido bêdamboen isquin bêdambo icmeta, Papa—quequin mibi Nuquin Papa chianembi.

Pabadon Nuquin Papa chianiaid

³ Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mibi bêdamboen namiaido nec. Aden namequid yec mibi bêdambo iquec, Papa—quequin chianembi. ⁴ Aden mibi tantiaquin Nuquin Papa chiec bêdambo yec cuishonquebi. ⁵ Ênden êmbi chuibanac Esus tantiabênquin mimbi êbi piucquid meniondac. —Esusën naid ma Pabadon matses utsibotsen chuibanu—queshun meniondashumbic nêbi adembidi êbi menete mimbi bêmeoac. Aden mimbi bêmeoaid isash mibi tantiec cuishonquebi. ⁶ Nuquin Papan tantiamiac mimbi Esus tantiabênondac. Adembidi Esus tantiamequin Nuquin Papan mibi bêdamboen tabadmec. Esus padpidec chote ushên abêdi tabadmenuen Nuquin Papan adembidi mibi bêdamboen tabadmendac. Adembidi mibi tantiec cuishonquebi. ⁷—Êbêd tantiananquidombo nec—quiash adebi. Esus chuibenesho quênên nauedondashi. Aden quênên nauedacsho: —Mimbi icsamboen naid chiec cho—cac nidshun: —Abimbo chuibanombi—quequin chuiquid dapa chuideniondambi. Aden chiac puduemenquio icquin abi quênên tsadunebi. Adquid icsho chieshênquio icquin mimbi êbi bêdamboen tantiec. Nuquin Papan êbi icmiacpadquid chieshtoenquio icquid icquin mimbi êbi adoc. Adsho mibitsen tantiembi. ⁸ Esusën matses tantiacpadomboen mibi tantiac unêsquio iquec. Mibi istiadquio iquebi. Êbi adsho tantiash Nuquin Papatsen: —Abimbo caic—quendac. ⁹ Aden mibi tantiaquin Nuquin Papa chianembi. —Aido bêdiactsêc tantianansho comapenen tantianamequio, Papa. Adembidi mibimbo tantiamequinc Esus tantiamequinc mimbi chiaid tantiamequinc cata. ¹⁰ Aden tantiamiac: “Nadec tabadec bêdambo ictsiabi. Adec tabadenquio yec icsambo ictsiabi,” quequin bêdamboen tantien dac, Papa. Aden tantiaquid yec chieshtoenquio icquin Esus tantiec bêdamboec tabadendac. Adsho abi chote ushên Esusën: “Icsambo icquid mibi nec,” catiapimbo iquendac. ¹¹ Adec con Icho Esus tantiec bêdamboec tabadsho isun: “Bêdamboen tabadmec Nuquin Papa bêdambo iquec,” quetsiash utsibo, Papa—quequin Nuquin Papa chianembi mibi tantiaquin.

Utsibon Esus chuibeniaid

¹² Quênên nauedac êmbi Esus chuibenetiapimbo icnubi utsibon chuibeniac utsinutsinquien Esus tantiabênac caosh. ¹³ Nêshun shubu dadpen icquid Doma yacnoshon: —Quênên nauedaid cuenushe—quequin êbi isquido sondadon: —Esusën naid chuibanansho Pabado quênên nauedac—quequin tantiec. Aidon chiac nêmbi icquido utsitedishun adembidi tantiec. ¹⁴ Quênên nauedaqui dacuêdenquio iquebi. Êbi adquio icnuc: —Pabadon nacpadomboen dacuêdenquio icquin Esusën naid chuibanembi—quepac caosh Esus tantiaquido dadpen. Adshun dacuêdboedombi dacuêdenquio yanquin Nuquin Papan chiaidquio chuibeniac caosh.

¹⁵⁻¹⁶ Aidon êbi bêdamboen tantiaquin Esusën naid chuibenec. —Pabado tantiembi. Esusën naid chuibenesho bedshun quênên nauedac aidên natiapimbo icnuc êmbiquien nanu—quequin êbi bêdamboen tantiaquin Esusën naid chuibeniac caosh. Utsibombien êbi chieshênquimbi Esusën naid chuibeniac caosh. —Quênên tsadunac ma Pabado mëyadbudchitono. ¹⁷ Aidên chuibantiapimbo icnuc êmbiquien nanu. Aden êmbentsêqui chuibanac dadpeshun tantiahsun: “Mibi bêdambo iquec,” êbi catsiash—quequin Esusquio tantienquio icquimbi Esusën naid chuibenec. ¹⁸—Êbi chieshênec—¿quiash tabi nêishpe? Padenquio. —Êbi chieshênquidon êbi bêdamboen tantiaquidobêdtambi Esusën naid chuibanac matses utsibo utsi-utsiec Esus tantiaquido yanec—quiash bêdambo yec cuishonquebi. Adechidi cuishonquebi: ¹⁹—Pidipos yacnocquidon Nuquin Papa êbi chianiac caosh—quiash. —Mëyadsho Pabado chieshtomenda, Papa. Abi quênên nauedquidon puduemequin nidmeta, Papa—quequin mimbi chiacpadomboen namenuen Nuquin Papan Esuquidistun Mayan menequin cuesambo icmiac chieshtoenquio iquendabi. Adembidi aidên nac quênên tsadenquio iquendabi. ²⁰ Êmbi naondacpadomboen dacuêdenquio icquin Esusën naid chuibantiadquio iquebi. Chieshtotiapimbo iquebi. —Ma utsibon:

“Esuquidistu bédambo iquec,” canu —quiash aduidequi iquebi unésabi yec. Utsin: —Cuesunechitono —caqui adecbidi chieshtoenquo ictsiabi.

²¹ Unésabi Esuquidistu tantiec bédambo iquebi. Unésash Esusbéd tabadequic bédamboshê ictsiabi. ²² ¿Mitsipadtebi bumpeba? ¿Unéstedabi bumpeba? ¿Unésenquo yec tsadtedabi bumpe? Unésabi icquin èmbi Esusèn naid chuibanac utsibon Esus tantiabentsiash. ²³ Nuquin Papa yacno nidash Esus isec bédamboshê ictsiabi. Esus iste bunquiebi. ²⁴ Aden tantiequi: —Unésabi yec Pidipos yacnocquido Esus tantiaquido Esus bédamboen tantiamec ano nidtsiabi —quequin tantiec unéstiapimbo icoaibi. ²⁵ Unésabi yec mibi yacno nidoatsiabi. Aden tantiec: —Nuquin Papan nèbi èbi unés uamenquo iquec —queoai. Mibéd tabadquin Esusèn naid bédamboen chuibantsiambi. Adoac bèdiactsèc Esus tantiatsècboedombi Esus tantiaquieci mibi bédambo ictsiac. ²⁶ Èbi choacsho isash: —Pabado padpidec chomequid Esus bédamboshê iquec —mibi quetsiac. Adec mibi cuishonquetsiac.

Chieshtoenda, quequin Pabodon chiaid

²⁷ Èbi ano nidtiapimbo icnuc Esusèn chiapadec chieshtoenquo yec bédamboec tabadta. Quènèn èbi nauedboedèn puduemiac mibi yacno nidshun mibi bédamboec tabadsho isash: —Pidipos yacnocquidon èmbi chiapaden naic —quetsiandabi. Nèbi mibi yacno nidtiapimbo iquebi. Adnuc mibi istanquidon: —Chieshtoenquo icquin Esus tantiec cuèshèdenquo yec Pidipos yacnocquido bédamboec tabadosh. ²⁸ Esus chieshènquidon: “Esusèn naid chienda. Cueschitomane,” caqui dacuèdenquo icquin Esusèn naid adembi chuibanosh —quequin mimbi naid chuisho tantiash bédambo ictsiabi. Adec cuesambo yec nuqui: —Nuquin Papan icmiapadec dacuèdenquo iquebi. Èbi dacuèdenquo icmequidèn ambi chiapadomboen èbi chieshènquido unésacsho icsambo icquido cuidacno nidmendac. Ambi chiapadec Esus tantiaquid yec unésashini Nuquin Papa yacno tabadendac —quequin nuqui tantiatsiac. ²⁹ —Con Mado Esus tantiasho utsibon chieshèntsiandac —quequin Nuquin Papan tantiaquidomboen utsibon mibi chieshènendac. ³⁰ Èbi nacpadomboen mibi chieshènoaic. Mimbi isnuc èbi chieshènondash. Adembidi èbi chieshènoaic nèbi. Nèid dada uaid isquin: —Pabado padpiden chieshènoac —quequin mimbi tantiendac.

2

Utsi tantiec tabadta, quiaid

¹ Tanta, con utsibo. Mibitedi chuinu. ¿Mitsipadquio Esus tantiaquido icpec? Esuquidistu tantiaquic dayacquio yacnimboec iquec. Adecbidi Esusèn tantiaindo yec bédambo icmiaido nec. Adecbidi Nuquin Papan aton Mayan abèd icmequin bédamboec tabadquid icmiaidobidi nendac. Adoaido matses tantiaquidombo nec. ² —Adquidbidi nebi —quec adquiecbidi bédamboec tantianancuededa. Èbi cuishoncamenuc adta. Abitedi: —Esusèn chiapadomboen nanuna —quecuededec chieshènanenquo yec bédamboec tabadta. ³ Nadec onquec tabadenda. —Èbiuidtsèqui bédamboshê iquec. Con nauidtsèqui nanu. Con nauidtsèqui bednu —quec mibiuidtsèqui tantiadec tabadenda. —Èbi bédapabi icnuc utsibo bédamboshê iquec. Aido nashuntiaquido iquebi —quec bédamboec tabadta. ⁴ Mimbi tantiaquidomboenuidi nainquo icquin utsin tantiaquidomboentsen nata. Mitsanauidi tantienquo icquin utsibo nashuntetsen tantiata.

⁵ Esuquidistun nacpadomboen naid mibi bédamboshê ictsiac. Aidèn chieshtoenquo icquin Nuquin Papan chiapadomboenuidi napanèdash.

⁶ Aton Papa Nuquin Papapadquidquio yec Esus abitedishun Icbombo nepanèdash. Aton Papabéd yec bédamboshê ichoedi: —Padi icnuna. Nuquiabi namec bédambo iquebi —quenquo yec Nuquin Papan chiapadomboen naic auèshquio chopanèdash.

⁷ Adec aton Papan yuabimboecquid yanash ambi chiapadec matsespanèdash chidon tishac.

⁸ Adashic matses yec aton Papan chiapadequi abided ciudadec unèspac caondash. Matses icsamboshê icquido cuidacnimboen cuesten dectanquin icsaisambobi Esus unès upac caondash.

⁹ Aden ambi chiapadomboenuidi Esusèn nasho isun Nuquin Papan uincuemeshun abi yacno chomeashun abèdi Esus tabadmepanèdash.

Aden abitedishun Icbombo icmeoapanèdash.

¹⁰⁻¹¹ —“Nuquin Icbombo Esuquidistu bédamboshê iquec,” ma abitedi quenu —queshun aden Nuquin Papan abitedishun Icbombo Esus icmeoapanèdash.

—Èmbi èbi yacnoshon uaido mayan bédabo yec nidaidèn tabadquido matses yec unésacsho uincuemiaido yec quequido: “Nuquin Icho Esuquidistu bédamboshê iquec. Abi abitedishun Icho icmeoquid Nuquin Papatsen bédamboshê iquec,” ma quenu —queshun adopanèdash.

Utsibo Esus tantiamete chiaid

¹² Mibi tantiaquiembique. Tantia, con utsibo. Mibitedi chuinu. Esusën nacpadomboen mimbisen bédamboen nata. Èbi mibéd icnuc mimbi nadeniondacadomboen èbi nibédnuc ademvidi bédamboen nata. —Nuquin Papa dacuédampambo icquidën chiaid niacmane —quiash ambi chiacpadomboen naic aibdèdi tabadnush bédamboec tabadta. ¹³ —Ma bédamboec tabadnu —quequin Nuquin Papan ambi chiacpadec tabadte bumequin nuqui bédamboec tabadmeque. Bédamboec tabadta.

¹⁴ Adec bédamboec tabadec chushcananenda. Adecbidi: —Bédamboen nanuna —cac chieshec tabadenda. ¹⁵ —Esus tantiaquido icsambo iquec —utsibo quenushe. Adenda. Nuquin Papan: —Con mado nec. Con champi nec —caido yec bédamboec tabad. Matses dadpenquo icsamboshè icnubi adequi bédamboec tabad. Adec bédamboec tabadquin icsambo icquido mimbi Esus bédamboen tantiametsiac paposhquiabimboecnuc. ¹⁶ Mimbi adoac utsin: —Esus tantiasho Nuquin Papan èbi bédamboen isec. Nèbi bédambo yanec unèsashini aibdèd tabadendac —quequin tantiatsiash. Aden mimbi chuibanaido Esus tantiaquido yansho isash cuishonquetsiabi. Esuquidistu nidaidën padpidec chote ushën bédambo ictsiabi. —Èmbi chuibanondaido Pidipos yacnocquido ambi Esus tantiamiaidobèd choeque. Is —quec bédambo ictsiabi. ¹⁷ —“Bédambo mibi iquec,” Nuquin Papan mabi canu —qeshun Esus tantiaquin mimbi bédamboen nac. Utsibo nashunquin Esusën naid chieshtoenuo icquin mimbi chuibanac. Mimbi adoaid chuisho tantiashun: —Mibi unès uanu —caquini bédambo ictsiac. —Aido bédambo iquec —qeshun mibi tantiec bédambo yec cuishonquetsiabi. ¹⁸ Èbi unès uaid chuisho tantiash adecbidi bédambo icta. —Esus tantiec chieshtotiapimbo icsho Pabado unès uac —quiash bédambo icta.

Pabadon Timoteyo chiaid

¹⁹ Con madobimboecquid èbèd icquid Timoteyo mibi yacno nidmetsiambi. —¿Midapadquiec Pidipos yacnocquido tabadeque? Istan, mado —quequin nidmetsiambi. Esuquidistun ademvidi tantianuc adotsiambi. Adoac istanshun chuituidac bédambo ictsiabi. ²⁰ Timoteyopadquid utsi nibèdec. Aid abentsëcshumbi èmbi nacpadomboen mibi tantiaquiec. ²¹ Utsibombien aton nauidtsèqui tantiaquin Esuquidistun chiacpadomboen natiapimbo iquec. ²² —Timoteyo bédamboen naondash —quequin mimbi tantiec. Mimbi tantianubi èbèdtan Esusën naid chuibanondash con mado icbobimboecquin. Aid bédambo iquec. ²³ Adquid icsho mibi yacno: —Istan —catiadquo iquebi. Èbi quènën nauedquido èbi caic: —Unès uanu —qesho tantiabono. Tantiashun: —Èbi quènën nauedquidon chiaid Pidipos yacnocquido chuitan, Timoteyo —catsiandambi. ²⁴ Èbitsen nèbi mibi yacno nidtiadquo iquebi. Èbi caic Nuquin Icho: —Ma nidnu —quenuc anobi nidtsiabi.

Epapadodito chiaid

²⁵ Epapadodito con buchibimboecquid mimbi: —Pabado nashuntan —cac Pidipos yacnuësh chonèdaid nèmo iquec. Utsibon chieshènnubi dacuèdenquo icquin èbèdtan Esusën naid chuibanondash. Adondaiddi nèbi: —Mibi iccondacno tabadec nid, buchi —caombi. ²⁶ Aid mibi tantiec unèsquo yec tsadposh. —Èbi unèsstsemboed con matses chuinuec Pidipos yacno nidaccosh —quiash mibi ismete bunquiec shubiantiadtsècquio tsadposh. Adsho isun: —Min shubuno nidec nid —caombi. ²⁷ Adec unèstsenquiondash. Adshobien Nuquin Papan bédamboen isquin bédamepondash. Èbitsen bédambo icmenuen Nuquin Papan adopondash. Epapadodito unèsquo icnuc èbi shubiec tsadsho isash: —Aid unèsan unèsquo icnuc Pabado mèyadnushe —qeshun Nuquin Papan Epapadodito bédamepondash. ²⁸ Adoacsho mibi yacno aid badedquo nidmetiadquo iquebi. Aibdèd iquec mibi bédambo ictsiac. Mibi yacno nidsho isash èbitsen bédambo ictsiabi. ²⁹ Epapadodito nidacsho bédamboen ista cuishonquequin. —Nuquin Ichon mibi bédamiac. Aid bédambo iquec. Mibitsen bédambo iquec —quequin chuita matses dadpen tantiamenuen. Adquid Esus chuibanquido utsibo mibi yacno nidacsho ademvidi bédamboen ista. ³⁰ Esuquidistun chiacpadomboen naic èbèdi tabadec Epapadodito chondash. Chieshèmènkido dadpen icnubi èbi nashunec tabadec daicsabadash unèstsenondash. Chotiapimbo icquin mimbi: —Pabado nashuntan —cac choash nibèdantsenondashe. Mibi yacno nidacsho bédamboen ista.

3*Esuidtsèqui tantiasho Nuquin Papan bédamboen isaid*

¹ Nuquin Icho Esus tantiec cuishonquenuna. Aduidequi icac bédambo ictsiash. Tantia, con utsibo. —Tantienquo yanushe —quequin èmbi chiondaid dada uaquin padpiden mibi chiuoanu. ² Muaquidon chuisho tantienda. Aidon: —Shui dèbid dèteshun secaidoditi

Nuquin Papan bédamboen istsiash —quequin chuisho tantienda. Aden chiec icsa uanquidombo neque. Uimanēmēnquidoen nechitec. ³ —Shui dēbid dēteshun secaid nec —žqeshunda Nuquin Papan nuqui bédamboen ispec? Padenquo. Aidon Esus tantienquo icsho bédamboen isenquo icquin aton Mado Esus tantiaquidoen Nuquin Papan bédamboen isec. Aton Mayanēn tantiamiac: —Nuquin Icho Esuquidistu bédamboshē iquec. Abided cuidadec unēsaid tantiano Nuquin Papan nuqui bédamboen isec. Ĕmbembi naquin Nuquin Papa bédamboen ismetiapimbo iquebi —quequin nuqui tantiec. ⁴ Matsesēn tsusedpan chiaiduidi tantiasho Nuquin Papan bédamboen iste icnuc nadtsiabi. —Tsusedpan chiaid utsibon daēdpactsēc nanuc Ĕmbimbo naquin dadpenquo nabanombi. Aden Ĕmbimbo dadpenquo nasho Nuquin Papan Ĕbi bédamboen isec. Adembidi isadaidbombo icsho Ĕbi bédamboen isoaic —quetsiabi. Nēbi adtiapimbo iquebi. ⁵ Isadaidbo nebi. Isadaidbon chidon tishacsho sietetedec ushun Moisesēn chiampicpadomboen shui dēbid dēteshunenēdaidquo nebi. Con matses tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aidēn onqueten onquequid nebi. Moisesēn chiampid namequidquo padiseyobo caid niondabi. ⁶ Adquid icquin icsambo icquido danquin Esus tantiaquido cuesun secatiadquo iccondabi. Nuquin Papan chiacpadomboen natiadquo iquequi adondabi. Moisesēn chiampiduidi nate bunquiondabi.

⁷ Adquid icquin Esus tantiabi: —Ĕmbimbo naic bédamboshē iquebi —quequin icsamboen tantiapondambi. Adondaidi Esus tantiabenash: —Ĕmbimbo naiquini icsambo icc. ⁸ Nēbi con Icbombo Esuquidistu tantiec bédambo iquebi —quequin tantiabendonambi. Aiduidtsēqui tantiatadquo icquin icsa secacimbombo Ĕmbimbo naid ēnondambi. ⁹ Esus tantiate bunquiebi. Adquid yec: —Moisesēn chiampicpadomboen Ĕmbimbo naiquini bédambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bédamboen isquin Ĕbi bédamboen tabadmec —quequin tantiabendonambi. ¹⁰ Aden tantiabenshun Esusuidtsēqui comapenen tantiatadquo iquebi. —Comapenen tantiaquin Nuquin Papan uincuemaiid icquin Esusēn bédamboen tabadmetsiashi —quec Esus tantiate bunquiebi. —Nuquin Papan chiacpadomboenuidi nasho mēyanac Esus unēsac caondash. Adembidi Nuquin Papan namiacpadomboen nasho mēyanac chieshtotiapimbo ictsiabi. ¹¹ Unēsambo icsho Esusēn bédamboen tabadmetsiashi. Unēsacsho Nuquin Papan uincuemetsiashi —quec adec Esus tantiate bunquiebi.

Nuquin Papan chiacpadomboenuidi nate bunaid

¹² Tanta, con utsibo. Mibitedi chuinu. —Nuquin Papan chiaid niaquesambo nebi —žquectabi ique? Padenquo. Adquo ictiadquidi adquo yenquieni ichitec. —Bédamboshē icmenuen Esuquidistun yuapondashi —quequin tantiec bédamboshē icte bunquiebi. ¹³ Adec bédambo yanabi yec: —Ĕmbi naboed naic bédamboshē iquebi —quenquo icquin Esusquo tantiaquin ambi chiacpadomboen natiadquo iquebi. ¹⁴ —Bēdnu —quequin bedteuidtsēqui tantiec titinquiabimboen Esusquo tantiaquiec ambi chiacpadquiec bédambo ictiadquo iquebi. —Adec tabadec unēsacsho Nuquin Papan abi yacno Ĕbi tabadmec —quec bédambo icte bunquiebi.

¹⁵ Nuquin Papan chiacpadomboen natiadquo icquin Ĕmbi chuibocpadomboen mimbi tantiatasiac. Utsien: —Padi. Pabadon chiaid abitedi nainquo icquin abentse-abentsen naindambi —qesho Nuquin Papan ambi tantiaid bédamboen tantiametsiash. ¹⁶ Nēbi nuqui icbocpadquiec tantiananquiec bédamboec tabadnuna.

¹⁷ Ĕbi yacpadquiec bédamboec tabadta. Ĕmbi chiacpadomboen utsibon nasho isun adomboembidi bédamboen nata. ¹⁸ Ĕmbi chuideniondacadpadomboen mibi padpiden chiembi shubiquimbi. Mibi yacno utsi-utsiec icsamboec tabadpec. —Abided cuidadec cuesten dec tamēdaid Esus tantiaquid nebi —quetsēchoedi icsamboec tabadec. Adquido Esus tantiaquidpenquo nec. ¹⁹ Peteuidtsēqui tantiec icsambo yequi: —Bédambo iquebi —quec tabadec. Nuquin Papa tantienquo icquin nidaidēn icquiduidtsēqui tantiec. Unēsash Nuquin Papa yacno nidtiapimbo yec icsambo icquido cuidacno nidendac. ²⁰ Padnuen Nuquin Papan bédamboen isaído yec aibdēd tabadtequido nuqui nec. Abi yacno buanuec abucuēsh Nuquin Icho Esuquidistu chosho isnuec nuqui tabadec. ²¹ Choshon aidēmbi nuquin dada chuca uaindac aton dada chuca uacpadomboen. Adoac unēstiapimbo icquiduidquo nuqui iquendac. Abitedishun Icbombo icquin ambi chiacpadomboen abitedi namequidquo icquin aden nuquin dada chuca uaindac.

¹ Ēmbi aden chuisho tantiaŝ Nuquin Icbon chiaid niaquenquo yec bēdamboec tabadta. Mibi tantiaquin mibi istiadquo iquebi. Mibi caic: –Ēmbi chuibanondaido Esus tantiabənash bēdambo ictiadquo iccondash –quec bēdambo iquebique. Adquiec chieshtoenquo icquin Esus tantiec bēdamboec tabadta.

² Tantia. Nēbi chido daēd Ebodia caid Sintique caidbēdtatsen chuinu. Amicananenda. Esus tantiaquido yec: –Ai, Nuquin Icho Esusēn tantiacpadomboembi natiad –quec tabadta. ³ Tantia, buchi. Ēbēdtan Esus chuibanondaid icsho mibitsen chuinu. Aid chido daēd chuiquin: –Bēdamboec isnanta –cata. Utsibon chieshēnubi ēbēdtan aid daēdshun Esusēn naid chuibeniondashe. Adembidi Quedemente caidētsen ēbēdtan chuibanondash. Adembidi utsibontsen. Adquidotedi Nuquin Papan: –Esusbēdta ēbi tantiaquido mibi neque. Ēbēd tabadec cho –caindac.

⁴ –Nuquin Icho Esus tantiaquiec bēdambo yec cuishonquenuna –caimbi. Esus tantiaquiec cuishonquenuna. ⁵ –Ma utsibo: “Esus tantiaquido chieshēmēnenquo yec bēdambo iquec,” ma quenu –quiash bēdamboec tabadnuna. Nēbi Nuquin Icho Esus choeque.

⁶ Adecbidi chishpiquec tabadenda. –Ĵatotsimbi napeba? Ĵatotsimbi pepeba? ĴNēbida con matses unēspeba? –quequin uesquin tantienda. Padenquo icquin nuqui dacuēdquin tantiaidtedi Nuquin Papa chuinuna. –Ēbi nashunquin utsibotsen nashunna, Papa. Aden nashunec mibi bēdambo iquec, Papa –quequin Nuquin Papa chuinuna. ⁷ Aden nuqui chiac aidēmbi nuqui bēdambo icmec dacuēdenquo icnuc. Adoac bēdambo icnuc utsibo: –ĴMitsipadec dacuēdenquo yampash? –quetsiash. Nuquitsen: –ĴMitsipadequini bēdambo yampo? –quetsiac. Adec: –Nuquin Papan ēbi nashunquidquo nec –quequin Nuquin Papa chianequin Esus tantiaquiec nuqui dacuēdenquo yec bēdamboec tabadtsiac.

Bēdamboshē iquec, caiduidi tantiata, quiaid

⁸ Tantia, con utsibo. Nēidtsen chuinu. ĴAtotsi abimbo chiaid icpec? Adquid tantiata. ĴAtotsi bēdambo icpec? ĴTsutsi bēdamboec tabadquid icpec? Adquidtsen tantiata. Aden: –Bēdambo iquec –caidtedi tantiata. ⁹ Adembidi ēmbi chuisho mimbi tantiondac. Aden ēmbi chiondaid tantiaquin ēmbi naondacpadomboen nata. Adsho isash mibi dacuēdenquo icmequid Nuquin Papa mibēd iquendac.

Pidipos yacnocquidon bēmiaid

¹⁰ Nēbi mimbi bēmiaid bedash bēdambo iquebi. Ēnden mimbi aden menianiondashumbic yuectaneshun nēbi ēbi tantiaquin mimbi meneoaid bēacsho bedombi. –Nuquin Icbon tantiacpadomboen padpiden Pidipos yacnocquidon ēbi ma menuequin piucquid bēmiac –quiash bēdambo iquebi. ĴĒbi tantienquioda mimbi ictionda? Ēbi tantiaquin ėnden bēmetiadquidi tsundan bētiaambo icnuc mibi nepanēdac. ¹¹ –Con na nibēdeque. Beccho –Ĵquectabi ique? Padenquo. Adtiapimbo iquebi. Con na icnuc bēdambo ictsiabi. Con na nibēdnubi adcebidi bēdambo ictsiabi. ¹² Con na dadpen icnuc bēdambo ictsiabi. Con na nibēdnubi adcebidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adcebidi bēdambo ictsiabi. Peten cubudash adcebidi bēdambo ictsiabi. Buna natiambo icnubi adcebidi bēdambo ictsiabi. ¹³ ĴĒbenquiodabi adti? Padenquo. Esusēn namiaquini adquo iquec. Aidēmbi namiac ambi chiacpadomboen naimbi. ¹⁴ Adnuc: –“Mēyadec,” quioŝ –qeshun mimbi ēbi ma menuequin bēmiaid bēdambo iquec.

¹⁵ Min nidaid Masedonia caid yacnuēŝ nidsho Esus tantiaquido shubu utsinquidon uanocquidon menenquo iccondashi. Adnubi tauamboen menequin mimbiuidtsēqui ēbi meniondac. Esus tantiabentsēcshun mimbi adondac. ¹⁶ Adoquini shubu dadpen icquid utsi Tesadonica caid yacno nidondac. Ambo yuec tabadnubien: –“Pabado aton na nibēdec,” quioŝ –qeshun mimbi piucquid bēmiaccondac. Yuectaneshun adembidi. Adshumbic padpiden. ¹⁷ –Mimbi bēmiaid bēdambo iqueque. Utsi beccho –Ĵquequindambi aden chuipe? Padenquo. –Pidipos yacnocquido Esus tantiaquido bēdambo iquec –Nuquin Papa camete bunquin: –Mimbi bēmiaid bēdambo iccosh –caimbi. ¹⁸ Utsi-utsien bedshumbeneshun mimbi bēmiaid Epapadoditon bēacsho bedondambi. Mimbi bēmiaidbēd daēdash ēbi bunaid dēniaquec con na dadpenquo yanac. –Mibi bēdambo iquec –Nuquin Papa camenuen mimbi bēmenēdac. Adsho isash Nuquin Papa: –Adquido bēdambo iquec –quependac. ¹⁹ Abitedishunquo Icho Nuquin Papa nec. Comapenen tantiaquin Esuquidistu tantiaquido bēdamboen isquin nashunquidquo nec. ĴAda mitsana nibēdnuc mēyadacnimboec tabadpe? Adec mēyadsho isun Nuquin Papan mitsana icmendac. Unēsquo icsho aidēmbi mibi bēdambo icmendac. Adecbidi: –Chieshtotiadquo icchitebi –quesho Nuquin Papan nac mibi chieshtoenquo iquendac. –Aid nibēdnuc unēsēbi –mimbi caid Nuquin Papan icmendac. ²⁰ Ēbi adsho tantiaŝun: –Bēdamboshē mibi iquec, Papa –quequin Nuquin Papa chuinuna ēnenquo icquin.

Pabadon ěnquimbi chiaid

²¹ Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. ²² Adembidi němbo Doma yacnoshon Esus tantiaquido abitedishun mibi tantiec. Chuiquid dapa Sesad caiděn shubun icquido Esus tantiaquido icquin adembidi mibi tantiec. ²³ Mibi tantiaquin: —Con Icho Ēsuquidistubědtan Pidipos yacnocquido bědamboen isquin bědambo icmeta, Papa —quequin Nuquin Papa chianembi. Padi. Aidtedi chuiquin dada uaombi.

CODOSAS YACNOCQUIDON ISTE

¹ Pabado nebi. Nuquin Papa bunacpadomboen Esuquidistun ëbi chuiheneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec.

² Aidbëdtambi ënenquocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquocquin ambi bëdambocquid icmebanaid nebi, quequin tantiec mibitedi Codosas yacnocquido adquiec ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

Nuquin Papa chuidoniaid

³⁻⁴ Nuquin Papa, Nuquin Icho Esuquidistun Papa chiec naded onquebi. Bëdambocquid icquin mibipadquiocnoc Codosas yacnocquido Esuquidistu tantiaquido bëdambocquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuisho tantiash bëdambo iquebi, Papa, quequin mibitedi tantiec Nuquin Papa chiec onquedenebi. ⁵ Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. ⁶ Ëbi icsaid cuidtiadtsëcquio Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquin Esuquidistu tantiaquid yanshun abi bëdamboec tabadaid adembiti ismebanoaic. Adoac nidaid utsin-utsinquec tabadquidon Esuquidistu tantiashun adomboembidi ismebanoaic. ⁷ Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec. ⁸ Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioshi.

⁹ Aden Epapadasën chiac mibi tantiec baded-badedquiec Nuquin Papa chiec onquian-onquianebe. Mimbi tantiacpadomboen min Mayanën pausunacsho Codosas yacnocquido bëdamboen tantiambe, Papa, quequin chian-chianembi. ¹⁰ Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiash utsibo ismenuec bëdamboec tabadec. Adec Codosas yacnocquido tabadsho isash, Bëdambo iquebi, ma Esuquidistu quepanuna. Adec bëdamboec tabadquin nabanquidquio utsi iquendac. Adec tabadquido mibi tantiadonequido yanendac, Papa. ¹¹ Adembiti mimbi dayacquo icmenu caid Codosas yacnocquido iquec natiatquid icnuc aido chieshenquio yec abi tantiec mibi nidendac. Aden chieshenquiocnoc mimbi nidmiac, Bëdambo iquebi, Papa, quec, Cuishon, quec aido mibi chiec onquedenendac, Papa. ¹² Mimbi bëdambocquid icmebanac icsaquid nibëdacno mibi tantiaquid utsibobëd mibëdi tabadendabi, Papa, quequin tantiec, Bëdambo iquebi, quec ma Codosas yacnocquido mibi chiec onquepanuna, Papa.

¹³ Ënden adquidpenquio yec Satanasën yuaido yec, Nuquin Papa tantianu, quesu nuqui iccondac. Aidën yuaido icsho Nuquin Papan nuqui mënichpondash. Aden nuqui mënichquin abi cudasaidquio aton Madombo Esuquidistu icsaisapadquid nuqui icmenuquin aidi Nuquin Papan nuqui tantiambepondash. ¹⁴ Abipadquid icmenuc matses icsaid bedshunash abided cuidadec unëspanëdash. Adoacsho Esuquidistu tantiaquid icsho cuidenquio yec mibi icsaid bëpiscudendabi, quequin Nuquin Papan tantiampicpadquiequi bëpiscudendac.

Abia yampidquio iquec abitedishun icombo Esuquidistu nec quiaid

¹⁵ Nuquin Papa isadesa icnubi abipadquidquibidi matsesash Esuquidistu nuqui isendac. Abitedi uabi yec Esuquidistu aton Papabëdtsëqui Abia Yampid icquin utsi abitedi ambi uaid nec. Ambi uaidtedi aton na nec. Aidon icho Esuquidistu nec. ¹⁶ Nidaid abubëdtabi uashun aidënenquocquidtedi uanu quequin ambi uaido nec. Matsesën isaidtedi matsesën isacmaidtedibëd Esuquidistun uampidquio nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icho nebi, quepec. Adecbidi matses queoaindac. Aidotedi Esuquidistun uaido nec. Aidotedishun icho Esuquidistu nec. ¹⁷ Esuquidistu abia yampidquio iquec. Aidëmbi, Ëmbi uabanaido namebanu, quequin ambi chiacpadomboen namebanec. ¹⁸ Nidaid utsi-utsiec

yacnocquido abi tantiec iccuededquidtedi chuiquidquio Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unēsspanēdash. Adsho Nuquin Papan abia uincuemeshun abi tantiaquidtedi chuiquid abentsēcquiobi abipadquid icmepanēdash. ¹⁹ Utsi abipadquid ictiapimbo iquec. Aidēn nabanacpaden natiapimbo utsi iquec. Ēbipadquidquid con mado nec, quiash, Bēdambo iquebi, quec Nuquin Papa tsadec. ²⁰ Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ēbided cuidadec unēspebi, abi quiampicpaden matsesēn cuesten dectanac unēsspanēdash. Adoacsho isun ambi bēdamboen istiapimbochoedi Esuquidistu tantiaquid yansho isun aidtedi Nuquin Papan bēdamboen isec.

²¹ Ēnden Nuquin Papan matsespenquio mibitedi iccondac. Icsamboen tantiec icsaquid yec Nuquin Papa chieshēnquido mibitedi iccondac. ²² Adquid icboedi, Ēbi yacno yuednu qeshun Esuquidistu tantiaquidotedi cuidenquio yec abi icsaid bēpiscudquid Esuquidistu icsaisapadquiocnoc aido isembi, quec Nuquin Papa tsadec. ²³ Ēnenquiocquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ēnenquiocquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

Esuquidistu tantiadoneta, quequin Pabadon chuibanaid

²⁴ Ēbi tantiaquid Nuquin Papan bēdamboen isendac. Aden isac, Ēbēd icquido iquendac, quequin Esuquidistun ambia chuibansho matsesēn mēyampanēdash. Adomboembidi Esuquidistu chuibansho mēyamposhi. Adoaqui, Cuishon, quebi. Ēnden abi tantiaquid yanacsho isun, Ēbi chuibeneta, quequin chuishumbic, Ēbi chuibansho mibi mēyante dadpen iquendac, quequin Esuquidistun chuioapondashi. Aden aidēn chiondacpaden mēyanaid nebi. Ma abi tantiaquid dadpen yanu quequin chuibenembi ambi tantiatedi mēyante yanuc. ²⁵ Ai, Nuquin Papan, Esuquidistu ambi naiddēta chuibeneta, caidquio nebi. Abi chuiquidquio nebi. ²⁶ Nuquin Papan ambi tantiampicpaden chienquicochoed nēbi aid tantiamiac Esuquidistu tantiaquido yanec. ²⁷ Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ēbi yacno ēbēdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuibeneta caid nebi.

²⁸ Aden ēbēdan ēbipadquidon Esuquidistu chuibeniāc Esuquidistu tantiaquid yansho isash, Esuquidistu tantiec bēdamboec tabadteneta, quequin Nuquin Papan chiacpadomboen chuibenec nebi ma abi yacno chosho adquidquio Nuquin Papan yuedpanu qeshun. ²⁹ Badiadquidēn-badiadquidēnquien aton Mayanēn nadatiambocquin nac natiatequid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

2

¹ Aden dayacquiocquin Nuquin Papa chuiquin mibitedi tantiembi. Adembidi chuibanquin Daudiseya yacnocquido tantiembi. Adembidi utsi-utsiec yacno iccuededquido ēbi isacmaidobi Nuquin Papa chuiquin tantiembi. ²⁻³ Esuquidistu tantiadonequido ma yampanueshun dayacquiocquin chuibenec nebi. Abentsēc yacnimboec tantiananquidquio ma yampanueshun dayacquiocquin chuibenec nebi. Adquidquio yanshun utsin abimbo chuisho tantias, Abimbo chuiquid nec, quequin ma bēdamboen tantiananuna. Adembidi, abimbo chiacimboen chuisho tantias, Icsamboen chiec, quequin ma tantiaquiopanuna. Nuquin Papan tantiamenquicochoed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuibenec nebi. ⁴ Comapenen tantiaquid icquin, Utsi tantiata, quequin Esuquidistupenquio chuisho ma tantienquio mibitedishun icpanu, quequin aden mibi tantiaquin chiec nebi. ⁵ Mibēd icte bunquiequi mibi yacno nidtiapimbo yequi mibitedi tantiec tsadtenebi. Adec tsadnubi, Esuquidistu tantiaquido yanshun ēnēdenquio yec iccuededquin aiduidtsēqui tantiadonec, quequin mibi yacnoēsh choquidon chuisho tantias bēdambo iquebi.

Esuquidistu tantiaquid iquec utsin chiacpaden naic abuc nidendabi, quequin tantienda.

⁶ Adebidi Esuquidistu tantiaquid yec abēd icquido iquec, Aidi con Icho nec, quec ambi chiacpadquiec tabadteneta. ⁷ Adec tabadquin cuēte tapun uquēducquiocquidēn cuēte uidēnash canidoacimboen Esuquidistu tantiaquid icquin tantiadonequota. Aden Esuquidistu chuiquin ēbipadquidon mibitedi chuipondash. Aid tantiadonequid icquin, Mibi tantiaquiec bēdambo iquebi, quequin baded-badedquien Esuquidistu chuidoneta.

⁸ Adembidi aid tantiadonequid icquin aid tantiesan êndenquio ambembi chiec onquiampic-paden nèbi icquidên adomboembidi chuisho Nuquin Papan chiacpadomboen chiesa nec, quequin tantiaquiota.

⁹ Matsesash Nuquin Papapadquidquibidi Esuquidistu icpanêdash. ¹⁰ Esuquidistubêd icquid icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibêd icquid Esuquidistu nec. ¹¹ Aidên, Êbêd icquid nec, quequin mimbi tantiaid icsa cuête cuidi pateshuniacimboen mibi êmebanec. Chêshsten tiacimboen nainquiocquin bédamboen tantiaequin aton Mayanên mibi icsaid êmendac. ¹² Adembidi Esuquidistu unêsascho chococacimboecnuc abi tantiaquid paucnu quiacimboen acten mibitedi mentobanondash. Adembidi Nuquin Papan Esuquidistu uincuenêdacimboecnuc icsaisa icmenu, quequin acten mentotanquin mibitedi cadobampondash.

¹³ Ênden Nuquin Papan matsespenquio icquin mimbi tantiaid icsa icnuc unêsacimboec icquin Nuquin Papan ênden, Naden nata, quequin chiaid tantienquiocquin niacquido mibitedi iccondac. Adquid ichoedi Esuquidistu tantiaquid icsho isash, Con madobêd icquido nec, quec Nuquin Papa nuqui icsaidtedi bêpiscudac. ¹⁴ Ênden, Matses icsaid bêpiscudnu, quenquiocquin, êmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanêdash. Adquid icshobi icsaquidimboecnuc matsesên unês uaquin cuستن dectanac matses icsaidtedi bedshunash abibi ciudadec unêsapanêdash. Aid unêsô isun, Matses icsaid cuidosh, quequin abi tantiaquidquio icsaid ambi naden nata quequin dada uamiaid ucacimboen tantiec bêpiscudtenec Nuquin Papa. ¹⁵ Esuquidistuidi Nuquin Papan naden nata quequin chiaid niaquesa yec matses icsaid bedshunash abided ciudadec unêsash uincuenquin Nuquin Papan chiaid niacquido mayan icsabo dêniaquec Esuquidistu abitedi chuiquid yampanêdash. Aden dêniaschun, Nêidtedi êbi tantiaquido chuiquid ictiapimbo iquec, quequin bedshun mêtaneshun buanacimboen Nuquin Papa Esuquidistun ismepanêdash.

¹⁶ Aden chuiquid utsitedi dêniasquid Esuquidistu nec, quequin tantiash, Nadquid peshun nadquid utsi acsho Nuquin Papan êbi bédamboen isec, quenda. Adembidi, Nêid ushêmbi abi tantiec iccuededsho isun Nuquin Papan êbi bédamboen isec, quenda. Adembidi, ushê chuca choaid usudsho isec cuêdênsho Nuquin Papan êbi bédamboen isendac, quequin tantienda. Esuquidistuidi tantiaquidquio icsho Nuquin Papan êbi bédamboen isec, quequin tantiata. ¹⁷ Matses icsaquid yec ambi naidênquio abembi bédantiapimbo iquec, quequin tantiamenuequin Nuquin Papan ambi, Naden nata, quequin chiaid Moises menepampic. Êmbi bédamboen isaidquio matses bédambo icmequid choendac, quequin tantiaquin ambi naden nata quequin chiaidba Moises menepampic. ¹⁸ Esuquidistun bédambo icmiaid nebi, qeshun utsi icsamboen chiec onqesho tantienda. Ambibi chiec onqesho tantiashun Esuquidistu tantesa uaindac. Adquidbêd Esuquidistu ictiapimbo iquendac. Adquidên, Mibi chuiquidpenquio nebi, qeshumbic ambia tantiaquidimboecquin ambi tantiaid Nuquin Papan uaid mayan bêda mibi tantiamenuequin chuibansho tantienquiocquin nadota. ¿Tsuntsin mibi adquid icmepash? cata. Aden chiaquien, Ushquin adquid isombique. Chuinu. Tantia, quequin ambembi chiec onqesho tantienda. ¹⁹ Adquidên Esuquidistu abi tantiaquidon icbombo nec, quequin tantienquio iquec. Adecbidi Nuquin Papan tantiacpadquiec Esuquidistu tantiaquid dadpen yanash aton utsibobêd tantiananec nashunanec aton icbopadquid yanec, quequin tantiesa adquid nendac.

²⁰ Tantianu. Êbi chui. ¿Atotsi quiash Esuquidistu tantiaquid yanash êbi icsaid cuidnuec Esuquidistuded unêsash uincuenacimboec bédamboec tabadebi, qeshumbic, ²¹ Nêid bedtemaid nec. Aid bedsho mayanên mibi cuidendac, quequin utsi chuisho mimbi tantiape? Adembidi ¿atotsieshun mimbi tantiaid icsa unêsascho chococabi yacimboen, Nêid petemaid nec. Aid pesho mibi cuidendac, qesho mimbi tantiape? Aden Esuquidistu tantienquio icquidêmbimboen, Nêid mishtemaid nec. Aid misho mibi cuidendac, qesho mimbi tantiapec. ²² Nadquid petemaid nec. Nadquid mishtemaid nec, quequin matsesên ambibi chuiquin tantiamete nec. Ambi petemaidbêdi ambi mishtemaid ênêndac. ²³ Matsesên bédamboen tantiacimboen chiaid aitedi nec. Nêid êmbi tantiaid nec, qeshun aid bédamboen ismenuen naden nanuna, quequin matsesên chiec. Aden ambibi tantiashun, Naden nata, quequin mibi chuitiapimbo iquebi, qeshumbic namenuequin comapenen adquidên chuibanec. Adecbidi, Damêyamêdsho êmbi tantiaidên êbi bédamboen istiasch, quequin ambibi tantiash damêyamêdec. Adec damêyamê-dashic abi bunaiduidi tantiaquin ambi inacmaid dadan isuidtiapimbo iquec. Adecbidi abi inesa chidon isuidtiapimbo iquec.

3

Bêdamboec tabadaid chiaid

¹ Esuquidistu tantiaquid yec abia uincumenêdac abuc nidash Nuquin Papa yacno icsate bunquid nibêdacno tabadacpadquiec tabadteneta. Adec tabadec, Nuquin Papan dayunquo Esuquidistu tsadec bêdambo iquec, quequin abêd icte bunquin Esuquidistu tantiadonec tabadta. ² Abuc abêdi êbi icnuc aton na con na iquendac, quequin tantiaquin nidaidênshun bednu, quequinuidi tantienda. ³ Esuquidistu unêsaid tantiaquin aidbêdtabi mibi icsaid chococashunacimbociec icsatiapimbo yec nidaidên tabadta. Adecbidi Esuquidistu uincuenash abuc Nuquin Papa yacno nidash, Êbi tantiaquidtedi bêdaidquio iquec. Aido êbi cudasaidquo nec, quequin aidên dayun uaid nuqui nec. ⁴ Aidên padpidec choshon abi yacno buanac abipadquidquo bêdaidquio nuqui iquendac.

⁵ Adec abi yacnoêsh abêdi bêdaidquio iquendabi, quequin mibi icsaidtedi cuesun se-cacimbocên êmbanta. Êmbi inacmaid chudnu, quenquiocquin ênta dadan. Adembidi, Êbi inesa chudmenu, quenquiocquin ênta chidon. Adembidi, Chudnu, quequinuidi tantiaid ênta dadan. Adembidi, Chudmenu, quequinuidi tantiaid ênta chidon. Adembidi mibi bunaid icsatedi ênta. Adembidi aton na daêdpectsêc icquidêmba ma bednu, quenquiocquin, Êmbia bednu, quequin tantiaid ênta. Aden ênshun, aton na daêdpectsêc icquidêmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaidbimboecnuc matsesên ambibi nacnenaid tantiacbimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatipimbo iquec. ⁶ Abi bunaid icsabêdta ambi tantiaid icsa ênesa icscho matsesên naid chuibante ushê choan adquidtedi Nuquin Papan comapenen cuidendac. ⁷ Adquid icboedi ⁸ nêbi adenquiocquin ênash bêdamboec tabadteneta. Adecbidi comapenec nêishboedi adenda. Adecbidi, cuesanti-adquo yec nêishboedi adenda. Adembidi, utsi icsambo icmeboedêmbi adoenda. Adecbidi, utsi icsamboen chuiboedi adoenda. Adecbidi, tsienbêdta shui chedo chiec icsamboen tantiec onqueboedi adenda. ⁹ Adecbidi, mua uanamboedi ênêdta. Adquid icboedêmbi icsactsêcquid niachimboen mibi icsaid ênta. ¹⁰ Min tantiate chuca uachimboecnuc abi tantiadonequidquo icnuequin mibi tantiamequid tantiadted-tantiadedta. ¹¹ Adquid Nuquin Papan icmiac Esuquidistu tantiaquid utsibo naden mimbi tantienquo iquendac. Nêid isadaidno nec. Nêidic isadaidpembo nec, quequin tantiesa mibi iquendac. Adecbidi, nêid shui dêbid dêtemequid nec. Nêid shui dêbid dêtemesa nec, quequin tantiesa mibi neoaic. Adecbidi, Nêid chotac nec. Nêidic mayu nec, quequin tantiesa mibi neoaic. Adecbidi, Nêid yua nec. Nêidic yuaquid nec, quequin tantiesa mibi neoaic. Adquid Esuquidistu tantiaquid icnuc abêd icquid aton matses nec. Abi tantiaquidtedi chuiquid dapa abentsêcquiobi Esuquidistu nec.

¹² Aden Nuquin Papan cuênaido yec ambi bêdamboecquid icmebanaidobi abi cudasaido yec ambi tantiamiaid nêbi, quiash bêdamboecquid isadacimboc naded tabadteneta. Utsibo natiamiaid icscho isun bêdambo icmenuequin nashumbanta. Adecbidi, Mimbia bedan bedembi, quequid icta. Adecbidi, Mibia nashunu, quequid icta. Utsi icsaid êmenuec comapenec chushquenquiocquin bêdamboen chuiban. Tantesa uasho isun ismeded-ismededta. ¹³ Mimbi nacpadomboen utsibon natiapimboesho isun, Padi, quenquiocquin abi tantiameban. Adecbidi utsin mibi icsamboen nasho isash cuidnanenquo yec bêpiscudta. Nuquin Papa êbi icsaid cuidenquo yec bêpiscudosh, quec adta. ¹⁴ Adec tabatnec tantiananta. Adec tantiananec Esuquidistubêd abentsêc yacimboc icsaisa mibitedi yanendac.

¹⁵ Adec Esuquidistubêd abentsêc yacimbocnuc icmiaid nêbi, quequin tantiec bêdamboec tabadtenenu, quec mibitedi tabadteneta. Adec tabatnecquin, Mibi bêdambo iquec, Papa, quequin chuideneta. ¹⁶ Nuquin Papan Esuquidistu tantiadonemiaido icta. Adquido yec abi tantiaquid utsibobêd Esuquidistu chuinanec, Bêdamboec tabadta, quec adquecbidi tabadec ismenanta. Aden naic chuiquid dapa Dabidên dada uampid sadmo caidbêdta cuêdênte utsi Nuquin Papan mibi bêdambo icmiaidbêdtabi ambi naid utsi chiec cuêdêncuededta. ¹⁷ Adec tabadquin Esuquidistu tantiaquid nêbi, quequin Esuquidistun chiapadomboen nabanta. Adecbidi, ambi chiaiduidi chiec tabadteneta. Adec tabadquin, Esuquidistun tantiamiaid yec bêdambo iquebi, Papa, quequin Nuquin Papa chuideneta.

Aton shubun icquidbêd tabadaid

¹⁸ Bêdamboec tabadnu, qeshun nadota. Chidon min bènên chiapadomboen nabanta. Esuquidistu tantiaquid icquin adobanta.

¹⁹ Chido inquidên, Con bènêbêd tabadec bêdambo iquebi, camenuen yuachimboecquin aid chuiquin min chido namenda. Mibibi tantiadquinuidi min chido namenda.

²⁰ Bacuëbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, titan chiacpadomboen nabanoata. Adosho isashien, Cuishon. Bëdambo iquebi, quependac Nuquin Papa.

²¹ Anibëdtan min bacuëbo namenuc comapenen cuëdquin chieshmenta.

²² Yuan mibi yuaquidën chiacpadomboen nabanta. Aidën aden chuishun isnuc adobanta. Aden chuishun min icbon isenquiocnoc adomboembidi nabanta. Aden nabansho mibi bëdamboen isendac. Nuquin Icho, Esuquidistu tantiaquid nebi, qeshun adobanta. ²³ Con Icho Esuquidistu nashunu, quiacbimboen mibi yuaquidën chiacpadomboen chieshenquiocquin bëdamboen nabanta. ²⁴ Con Icho Esuquidistun abi yacno ëbi nidacsho isun ëmbi bëdamboen nabanaid cuidquin ambi ismiambo yaid menendabi, quequin tantiaquin adobanta. Nidaidënsnun abi nashunquid mibi neque. Adobanta. ²⁵ Min icbon chiacpadomboen nata. Abi chieshënuquid icbon cuidendac. Adembidi Nuquin Papan Esuquidistu tantiaquid nebi, qesho abi chieshënesa menequin bëdamboen cuidendac. Abi chieshënuquid menenquiocquin comapenen cuidendac. Adenuidi tantiaquin cuidendac.

4

¹ Yuanquidën, mimbi yuaido ambi nabanacpaden bëdamboen menebanta. Abuc con Icbombo iquec, quequin tantiaquin mimbi yuaido bëdamboen menebanta.

Chuibanaid utsi

² Esuquidistu tantiaquid utsibo natiateguidbëd abi icsaid iquec, quequin tantiec badedbadequic Nuquin Papa chiec onquedeneta. Aden chiec onquequin, Mimbi ëbi tantiaquin nabanaid tantiec bëdambo iquebi, Papa, quequin Nuquin Papa chuideneta. ³ Adecbidi ëbipadquid utsibobëdta ëbi tantiec Nuquin Papa chiec onqueta. Mimbi chienquiocnëdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Èbi chuibeneta, cac aid chuibenesho bedshun mëtaniaid nebi. ⁴ Pabado isun onqueten onquesho cuembo chuime, Papa, ma aidontsen tantiapanu, quequin Nuquin Papa chuideneta. ⁵ Esuquidistu tantiesan ëbi tabadaid istenec, quequin tantiec bëdamboec tabadteneta. Adecc tabadquid Esuquidistu tantiesatsen tantiamenucquin Esuquidistu chuideneta. ⁶ ¿Mitsicquid mimbi tantiaid icpec? quetsiash tantiesa. Adsho tantiashun mibi onquiaidbëd sa batambo iquec daëdacbimboecnuc Esuquidistu mimbi tantiaid utsibo chuita ma aidon tantiapanu qeshun.

Abëd icquid chuibanaid

⁷ Nëbi ëbëd icquid utsi-utsien chuibanu. Tantiata. Mibi yacno nidshun Tiquicon ëbi tabadaid mibitedi chiendac. Aid Esuquidistu tantiaquidquico icsho ëmbi con utsi caid nec. Aid Nuquin Icho nashunquid neoaic. ⁸ Èbëd icquid utsibo naic tabadaid mibitedi tantiamenucquin aidi mibi yacno nidmembu. Adoac mibi yacno nidash puaedshun ëbi naic tabadaidbëdtabi Nuquin Papan chiaid chuibanac mibitedi ëbi tantiec unësqiuoçoedi cuishon queta. ⁹ Onesimobëd Tiquico mibi yacno nidec. Onesimo nuqui con utsi caidbidi nec. Onesimo mibi yacnoshon tishaid nec. Aidi chieshenquiocquin ëbi nashunquid nec. Aid daëdshun ëbëd icquidon nabamboed mibitedi chuibanendac.

¹⁰ Nëbi mibi yacno nidesa chuinu. Tantiata. Adistadico ëbëd icnuc abembi quënën naedadondaid nec. Aidëmbi, Codosas yacnocquido tantiec tsadebi, quequin chuisho tantiashun dada uaimbi. Adomboembidi Madcosën chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta. ¹¹ Esus cashumbic Ustus caidën, Codosas yacnocquido tantiec tsadebi, quequin chiacpadomboen dada uaimbi. Adistadico yec Madcos yec Ustus yec quec aidtedtsëqui isadaidbo nec. Aidon ëbëdtambi Esuquidistu chuibanquïn ëbi bëdambo icmequido neoaic. ¹² Epapadas mibi yacnoshon tishaid Esuquidistu chuibanquidquico nec. Aidëmbidi, Codosas yacnocquido con utsibo tantiec tsadebi, quequin chiacpadomboen dada uaimbi. Icsamenucquid icnuc mibi bunacpaden tantiadonemenucquin mimbi Codosas yacnocquido abi tabadme, Papa, quec badiadquidën-badiadquidënquic Nuquin Papa chiec onquec Epapadas. ¹³ Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquico yec Esuquidistu tantiadonequidombo ma icpanu quiash mibitedi chiec onquedenec. ¹⁴ Adembidi Ducasën dauëchoquidën Demasbëdtan, Codosas yacnocquido tantiec tabadebi, quequin chiacpadomboen dada uaimbi.

¹⁵ Codosas yacnocquidon nëid ëmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuioata. Adomboembidi chido Nimpas cuëmëdquidën shubun Esuquidistu tantiec iccuededquido chuioata. ¹⁶ Adembidi, nëid ëmbi dada uaid isec onquequin mibëd iccuededquido tantiameshun Daudiseya yacno iccuededquido tsusiobo menequin, Nëid Pabado dada uaid

isec onquequin mibëd iccuededquido tantiameoa, quequin chui. Adembidi ëmbi Daud-iseya yacnocquido tantiaquin dada uaid bedshunshun isec onqueshun mibëd iccuededquido tantiameoata.

¹⁷ Adembidi Adquipo naden chuita. Nuquin Icbon Esuquidistun chiacpadomboen naimbudta, quequin chuita.

¹⁸ Mibitedi tantiaquin ëmbibi nëid dada uaombique. Ëbi tantiec nidtiapimbo yec Pabado quënën tsadeque. Aid puduemetata, Papa, quequin Nuquin Papa chiec onquedeneta. Nuquin Papan ma mibitedi bëdamboen ispanu, quec tsadebi.

Padi. Aitedi dada uaombi.

TESADONICA YACNOCQUIDON ISTE 1

Pabadon tauamboen chiaid

¹ Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icho Esus tantiaquido mibi chuiquin dada uaic nebi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

Tesadonica yacnocquidon Esus tantiaid

² Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboshē iquec, Papa. ³ “Aidon Esus tantiaquin ambi chiapadomboen matses tantiaquin nashumbanosh. ‘Abi yacno abi tantiaquido buanuec Nuquin Icho Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi. ⁴ Con utsibobimboecquido mibi neque. Tantia. Mibitedi chuinu. Mibi tantiaquin ambi tantiacpadomboen Nuquin Papan mibi Esus tantiamenēdash naden. ⁵ Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn tantiamiacpadomboen: —Abimbo caic —qeshun mimbi Esus tantiabonondac. Adembi Esus tantiamenuec Sidbanochedobēd bēdamboec ēbi tabadsho isun: —Adquid abimbo chuiquid nendac —quequin mimbi ěmbi chuisho tantiondac. ⁶ Aden Nuquin Papan Esus tantiamiaido yec ēbi Nuquin Icho yacpadec chieshtoenquo icsho isash mibitsen chieshtoenquo iccondac. Ěmbi Nuquin Papan chiaid chuibanac Nuquin Papan Mayanēn namiacpadec cuishonquequin mibi Esus tantiondac utsibon: —Padi. Chēn —quequin comapenen chieshēnquionobi. ⁷ Adec mibi bēdamboec tabadaid chuisho tantias min nidaidēn icquido Masedonia yacnocquido Esus tantiaquido mibi yacpadquiec tabadtiadquo icpac caosh. Adembi tantias nēid nidaid Acaya caid yacno tabadquidotsen adtiadquo icpac caosh. ⁸ ¿Anocquidonuidida mibi Esus tantiec bēdamboec tabadaid tantiapash? Padenquo. Mimbi chieshtoenquo icquin Esusēn naid chuibanac nidaid utsi-utsiec yacno tabadquidon tantiac caosh. Adashic aido mibi caic: —Nuquin Papa tantiaquidombo nec —quecuededac caosh. Aden mimbi naid chuisho tantiasun: —Tantias —qeshun nēmbō icquido mimbi naid chienquo iccombi. ⁹ Mimbi naid naden chuisho tantiombi. —Pabado chedon Esus chuibansho tantias: “Nuquin Papapadquid utsi nibēdec,” qeshun Nuquin Papabēdta Esus tantiabonac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiapadomboen natiadquo yanac caosh —quequin chiohi. ¹⁰ Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquo iquec. “Ēbi cuidmenquo icnuec abided cuidadec unēsacsho Nuquin Papan uincuemaiid Esus choec,” qeshun aid istiadquo iquec —quequin mimbi naid chiohi.

2

Pabadon bēdamboen chuibanondaid

¹ Mibi yacnoshon tauamboen ěmbi chuibanac Esus tantiaquid yanshun mibitsen utsibo Esus chuibanondac. ² Shubu dadpen icquid Pidipos caid yacnoshon quēnēn nauedac ēbi mēyadec tsadboedi pduemeshun nidmiac mibi yacno nidshun Esusēn naid mibi chuibanondambi. Utsibo dadpenshun chieshēnubi Nuquin Papan namiacpadomboen cuesambo icquin mibi Esus chuibanondambi. ³ ¿Ěmbi naidquo namenuendambi adodi-onda? Padenquo. ¿Ěbi tantiamenuendambi chuibandionda? Mambi padenquo iccondac. ¿Ambembi chiaidtambi mibi chuibandionda? ⁴ Mambi mibi abimbo chuibampondac. Matsesēn naidtedi tantiaquidēnquo Nuquin Papan: —Aidēn abimbo chuibantsiashe. Con Mado Esusēn naid chuibenquid icmenu —caidquo nebi. Adquid yec matses: —Mibi bēdambo iquec —cameteuidi bunenquo iquebi. Nuquin Papa: —Mibi bēdambo iquec —camenuembimbi ambi chiapadomboen naic. ⁵ Ěmbi tantiacpadomboen mibi namenuec: —Mibi bēdambo iquec —quenquo iccondabi. Min piucquid bednuen mauquin chiambo iccondabi. Nuquin Papan isnubi abimbo chiondambi. ⁶ ¿—Pabado bēdambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusēn naid tantiamenuembimbi bēdamboen chuibanondac.

⁷ —Ěbi chuibeneta —Esuquidistun caidquo nebi. Adoaid icquin tsusio dapan chiacimboen: —Nata —quequin ¿ancabudquindambi mibi chuibandionda? Mambi padenquo

iccondac. Anin bacuë nêishmenquo icquin bédamboen namiacbimboembimbi nêishmenquo icquin mibi chuibanondac. ⁸ Mibi tantiaquoquin chieshtoenquo icquin Esusën naid chuibanec yuec mibéd tabadondabi. Aden naic tabadec bédambo iccondabi. ⁹ ¿Ada tantie, con utsibo? Aden Esusën naid chuibanquin nidaidën capuquid yua bitsibi tuscaquin shubumpi nacnendeniondambi. Mibi caic: —Ëbi menianiac aton piucquid naimëdnushe —quash con piucquid bednuec chonoadteniondabi. Mimi isnubi adondabi.

¹⁰ Mibéd yec Nuquin Papan chiaid niaquenquo yec bédamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanëdashi. ¹¹ Amën aton mado: —Naden na —quequin nêishmenquo icquin chiacbimboen mibi abentse-abentsen bédamboen chuibanquin ¹² mibi bédambo icmepondambi. —Nuquin Papan: “Icsatiapimbo icquid icmequin ëbëdi tabadmendambi,” quequin Esus tantiamiaido mibi nec. Adquid Nuquin Papan chiacpadec bédamboec tabadquid neque. Ambi chiaid niaquenquo yec bédamboec tabadnuna —mibitedi cadeniondambi.

¹³ Aden Nuquin Papan chiaidquo chuibanac: —¿Ambembida chuidiosh? Nuquin Papan chiaidquo ma Pabadon chuiboc —mibi quianondac. Aden Nuquin Papan chiaidquo tantiash Esus tantiaquido yanash aidquobidi chuisho tantiash mibi bédambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bédamboen tabadmequid yec mibi bédamboshë iquec, Papa —quequin Nuquin Papa chianembi. ¹⁴ Nidaid Udeya caid yacnocquido yapadquiech chieshtoenquo icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquo icquin chieshënac chieshtoenquo iccondash. Adomboembidi aid matses mibi yacno tabadquin chieshënac mibi chieshtoenquo iccondac. ¹⁵ Isadaidbombidi Nuquin Papan chiaid chuibanquido cuesun secapampic. Adembidi Nuquin Icho Esus unës uapac caondash. Adomboembidi chieshëquin mibi yacnoshon cuemepondashi. Aden Nuquin Papa chieshëquinc matses abitedi chieshëquinc caquin ¹⁶ isadaidbon matses utsi isadaidpembö ëbi chuimetiapimbo icpondash. —Esus tantiasho Nuquin Papan bédamboen isquin mibi cuidenquo iquendac —quequin ëmbi chuisho: —Padí. Aid chienda. Cueschitomane —capondashi. Aden ambi chiaid ënenquo icquin niac-niacsho Nuquin Papan aido cuidquendac.

Pabado istante bunaid

¹⁷ ¿Mibi yacnoshon aden chieshëmënenquidon cuemiach mibi tantienquiodambi ictionda? Mibi unësquo icnuc mibi istantiadquo iccondabi. ¹⁸ Adec: —Padpiden istanu —quesho Satanasën nac padenquo iccondabi. Padpidec: —Nidnu —quesho adembidi. Padpidec: —Nidnu —quesho Satanasën nacbidi padenquo iccondabi. Nëbi adecbidi mibi istantiadquo iquebi. ¹⁹ Nuquin Icho Esuquidistu choan aibéd tabadquin ¿tsutsimbi ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ëmbi chuibanac Esus tantiabenondaido neque —capatsia? Mibibimbi caic. ²⁰ —Esus tantiec bédamboec tabadosh —quesho tantiash mibi tantiec cuishonquebi. Adembidi mimbi naid isun: —Mimbi bédamboen naondac. Mimbi chuibanac ëbi tantiabenondash —ëbi caindac Nuquin Icbon.

3

Istan, quequin Timoteyo chiaid

¹ Aden mibi tantiec: —“¿Mitsipadec tabadpec?” quequiduidtsëqui tantiec tsadtiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ëbéd icquid utsi Sidbano chuiquin: —Timoteyo nidan nuquiduidtsëqui icnuna —caondambi. ² Ëmbi: —Nid —caonaid Timoteyo Esus tantiaquid yec nuquin utsi nec. Ëbëdtan Esus chuibeneguidquo nec. Adquid icsho nadopondambi. —Tesadonica yacno nidshun Esus bédamboen chuibantan. Adembidi: “Esus tantiec chieshtoenquo yec nadquiech tabadquid nendac,” quequin bédamboec tabadquin ismetan, Timoteyo. ³ Aton matsesën comapenen chieshënac chieshtoshon Esus tantienquo yanushe. Chuitan —caondambi. Aden chieshënte mibi chiondambi. —Nuquin Papan tantiacpadomboen Esus tantiaquid chieshënenac —quequin mibi chiondambi. ⁴ Aden mibéd icquin chuideniondambi. Adsho ëmbi chiacpadomboen nuqui chieshënondash. ⁵ —“Ëbi nidan chieshënac ¿adecbidida Tesadonica yacnocquido chieshtoenquo icpatsiashba?” quequiduidtsëqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidën Satanasën namiach chieshtoshon Esus tantienquo yanushe. Istan. ¿Ada ëmbi Esus chuibanondaido bédamboec tabadeque? —caondambi Timoteyo chuiquin.

Timoteyon chuituidaiaid

⁶ Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquio yamposh —quequin chuiposh Timoteyon. Adashic: —“Pabado chedo bēdambo iccondash. Aido padpiden istiadquio iquebi,” quiosh Tesadonica yacnocquido —queposh Timoteyo. Adembidi mibi istantiadquio iquebi. ⁷ Timoteyon chuiboed tantiaish bēdambo yanobi. Nēmo icquidon chieshēnac shubiantiadtsēcquio iccobi. Adboedi mibi caic: —Chieshtoenquio icquin Esus tantiosh —quesho tantiaish bēdambo yanobi. ⁸ Mimbi aden naid tantiaish dayacquio yac bimboec iquebi. ⁹ Aden tantiaishun Nuquin Papa chianembi naden. —“Tesadonica yacnocquido bēdambo iccosh,” quesho tantiaish cuishonquebi, Papa. Mimbiuidtsēqui namiac chieshtoenquio iquec. Aden namec mibi bēdamboshē iquec, Papa. ¹⁰ Aido istiadquio iquebi. Mimbi chiaid bēdiactsēc tantiaish aidobēd tabadquin bēdamboen chuibantsiambique. Ēbi ano nidmeta, Papa —quequin Nuquin Papa chianembi.

¹¹ —Nuquin Icho Esusbēdan Nuquin Papan nēbimbobi ambo nidmepashuni —caimbi. ¹² Adec mibēd ictiadquio icquin Nuquin Papa mibi chianembi. —Ēmibi aido tantiaquicpadomboen utsibobēd tantianameta, Papa. Bēdiactsēc tantianantsēcboedobi comapenec tantianamequiota, Papa. Adembidi utsibotsen bēdamboen ismeta. ¹³ Aden bēdamboec tabadquid icmeta, Papa. Mimbi adoac chieshtoenquio yec bēdamboec tabadtsiash. Adsho mimbi mibi yacnoshon uaido mayan bēdabobēd nidaidēn padpidec choshon con Icho Esusēn: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mimbi ictsiac, Papa —quequin Nuquin Papa chianembi mibi chuiquin.

4

Chidobēd bēdamboec tabadte chiaid

¹ Tanta, con utsibo. Chiaid utsitsen mibi chuinu. —“Bēdambo mibi iquec,” Nuquin Papa camenuc bēdamboec tabadta —quequin ěmibi chiondacpadquiec tabadta. Nuquin Icho Esus tantiaquiec adta. —Bēdamboec tabadosh —quesho tantiaishun: —Adqueiqui tabadta —caimbi mibi. ² Nuquin Icho Esusēn namiac aidēn chiaidquio mibi chuibanondambique. Aid tantiaquiec bēdamboec tabadta. ³ Nuquin Papan tantiamiacpadquiec tabadquidēn nadoquid yendac. Utsin chido chudenquio icquin aton chidouidtsēqui chudquid yendac. Adembidi chidon dada utsi chudmenquio icquin aton bēnēuidtsēqui chudmequid yendac. ⁴ Adec Nuquin Papan chiaid niaquenquio yec abi bunaid mēmunc dada ambi inaidquio aton chidouidtsēqui chudec aidbēd bēdamboec tabadsho: —Bēdambo iquec —catsiash Nuquin Papan. ⁵ Nuquin Papa tantiesabimboec tabadenda. Esus tantiesambien comapenec tsien bunquin aton chidopenquio chudendac. Adembidi Nuquin Papa tantiesa icquin chidon utsin shui bunquin aton bēnēpenquio chudmendac. Adec tabadenda. ⁶ Bēnē nidan aton chido abentsēqui uequid istuidshun chudenda. Adoquid Nuquin Papan cuidendac ěmibi chiondacpadomboen. ⁷ —Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquio. —Ma bēdamboec tabadnu —quequimbien Esus tantiaquido nuqui icmiaque. Bēdamboec tabadnuna. ⁸ Aden chuiquin aton Mayan nuqui menequidēn Nuquin Papan chiaid chiec nebi. Aden ěmibi chuiboed niacquin Nuquin Papan chiaidquio mimbi niactsiac.

Adecbidi tantiananquiota, quequin chiaid

⁹ —Bēdamboec tantiananta —quequin padpiden chienquio iquembi. Nuquin Papan tantiamiac Esus tantiaquido yec mibi tantiananec. ¹⁰ Min nidaid Masedonia caidēn tabadquido Esus tantiaquido utsibotedi mimbi tantiec. Mibi yacpadquiecbidi tantiananquioquin utsibotsen tantiaquiota. ¹¹ Ēmibi chiondacpadquiec chieshēmēnenquio yec bēdamboec tabadta. Utsi icsaiduidi chienquio yec bēdamboec tabad. Chieshenquio yec dayacquio yec chonoadta. ¹² Adash bunenquio mibi ictsiac. —Con na nacnenambo iccombique. Mitsana becho —mibi quenquio ictsiac. Mibi adquio icsho isash Esus tantiesabo: —Esus tantiaquido bēdamboec tabadec —quetsiash.

Esusēn abi yacno abi tantiaquido buante chiaid

¹³ Tanta, con utsibo. —“Esusēn abi tantiaquido uincuemendac,” quequin chuisho mimbi tantiabi icnushe —queshun mibi bēdamboen chuinu. Esus tantiesabo: —Ēmibi tantiaidquio padpidec isadenquio iquec —quec yuecquio shubiacbimboec shubienda. —Ēbipadquid Esus tantiaquid Nuquin Papa yacno istuidendambi —quec ma yuecquio shubianenquio icnueshun Esusēn uincuemete mibi chuinu. ¹⁴ —Unēs uaqui Esus uincuenacpadecbidi nuquitsen uincuenendac. Esus tantiaquido unēsacsho uincuemeshun Nuquin Papan abi yacno aton Mado Esus buamendac —quequin nuqui tantiec. ¹⁵ Tanta. Nuquin Icho Esusēn chiaidquio mibi chuinu. Nuquin Icho Esus nidaidēn padpidec chonoc aid istuidec Esus

tantiaquido unēsabi icquido abia nidenquio iquendac. ¹⁶ Padenquio icnubien Nuquin Papa yacnuēsh choec Nuquin Icho Esusba nua cuēdtuidendac. Adnubien Nuquin Papan abi yacnoshon uaido mayan bēdabo chuiquid dapatsen nua cuēdtuidoindac. Adnubien Nuquin Papan chiapadomboen utsin nua shoncatuidendac. Adnubien Esusēn abi tantiaquido unēsaidotedi abia aton dada chua uaquin uincuemendac. ¹⁷ Adoquien aidobēdi Esus tantiaquido unēsabi icquido tsidadash aidotedi abuctoendac Nuquin Papabēd tabadec nidec. Abitedi abuctoquimbi abi bēquedec Esus chosho istuidendac. Adash Esusbēd Nuquin Papa yacno nidash anobi nuqui quenendac. ¹⁸ Ēbi adsho tantiaashun nadota. Aton matses unēsaid tantiec shubiquido bēdambo icmenuen ěmbi chuiboed chuīta.

5

Esus chote chiaid

¹ Tantia, con utsibo. Mibi chuīnu. —Nēidtedec ushash Esus padpidec choec —quequin chuitiapimbo iquebi. Adembidi: —Nēidted seta matamiash choec —quequin dada uatiapimbo iquebi. Tantienuio iquembi. Naden mibi chiondambi. ² —“Nēid inchēshēmbi ampequid choec,” quequin tantiatiapimbo yacimboec: “Aid ushēn Nuquin Icho choec,” quequin tantiatiapimbo icnuc Esus choaīndac —quequin mibi chiondambi. ³ Esus tantienquio yequi matses dadpen: —Cuesnanenquio yec nuqui bēdamboec tabadec —qeshobien ambi: —Ēbi cuidendac —cacmaidēnquio padpidec choshon cuidquīndac. ¿Mitsipadquio chido bacuē usunquid icpec? —Aid ushēnquio tishembi —quequin tantiatiapimbo yequi badedquio nēcuenec. Adecbidi ambi: —Choec —cacmaid Esus badedquio chosho abi tantiesabon cuenēntiapimbo iquendac. ⁴ ¿Esus chonoda nuqui dacuēdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nēbien Esus chochitec —quec bēdamboec nuqui tabadnubi Esus chonoc nuqui dacuēdenquio iquendac. ⁵ ¿Pacuēndacimbocquidoda nuqui nedi? Padenquio. Pabiāte paposhquiacimbocnuc Esus bēdamboen tantiamiaido yec bēdamboec tabadquido ma nuqui neyoc. Adecbidi bēdamboec tabadnuna. ⁶ Ushquin pabiāten tantienquio yacimboen utsibon Nuquin Icho Esus tantienquio iquec. Adece tabadenquio icnuna. —Esus tantienquio icmane —qeshun nuqui icsate bunaid nainquio icquin mēmūnuna. Nuquin Icho chosho istiadquio yec bēdamboec tabadnuna. ⁷ Esus tantiesaboen inchēshēn ushquin tantienquio yacimboec iquec. Adquiecbidi tantiadenuen acte paēmbō icquid acquido nec. ⁸ Adquidpenquio yec Esus tantiaquido yec bēdamboec tabadnuna. Nuqui icsate bunaid nainquio icquin mēmūnuna. Sondado: —Shocosh tsasimbo icquid shictonquenu. Sicsenushe —quiacimboc icnuna. Satanasēn Esus tantiamenquio icnushe. Esus tantiaquioquin matsesēn tantiaquionona. Adecbidi sondado: —Masenushe. Shocosh tsasimbo icquid mauete mauenu —quiacimbocēcbidi icnuna. Satanasēn icsamboen tantiamequin chieshtomenushe. —Esus tantiacho cuidenquio icquin Nuquin Papan abi yacno ēbi tabadmendac —quequin bēdamboen tantianuna. ⁹ ¿Cuidnuenda Nuquin Papan nuqui Esus tantiamediac? Padenquio. Abēdi tabadmenuen Nuquin Icho Esuquidistu nuqui tantiamiac. ¹⁰ Aidi abi tantiaquid cuidmenquio icnuec abided cuidadec unēsac caondash. Aidēn padpidec choshon abi tantiaquidotedi buanshun abēdi tabadmendac. Unēsaid uincuemiaidobēda unēsabi icquidotedi adoendac. ¹¹ Ēbi adsho tantiaashun mimbi nabocpadomboembidi Esus tantiec bēdambo icnuec ěmbi chuiboed chuīnanquīota. Adecbidi bēdamboec tabadec: —Adequi tabadnuna —cananta.

Bēdamboec tabadte Pabadon chiaid

¹² Esus mibi chuībanquido bēdamboen ista. —Nuquin Icbon chiapadomboen chieshtoenquio icquin nuqui chuīquidēn nuqui bēdamboen chuībanec —quequin aido bēdamboen tantia. Mibi nashunquidombo neque. Aidon: —Nuquin Papan chiaid niaquenquio yec bēdamboec tabadnuna —quequin chuīsho bēdamboen tantia. ¹³ —Nuquin Papan chiaid bēdamboen tantiaquidombo nec —quequin bēdamboen ista. Adece chieshēmēnenquio yec bēdamboec tabadta. ¹⁴ Mibēd icquido naden chuīban. Chieshquid icsho: —Mibitsen chonoada —cata. Dacuēdsho: —Dacuēdenda —cata. Esus bēdiactēc tantiatēcsho bēdamboen chuīquin Esus tantiamequīota. Dada padishquio icsho nashunta. Aden nēishenquio icquin abitedi bēdamboen ista. ¹⁵ Utsin chieshēnac cuidnanenquio yec bēdamboec tabadta. Mibēdtan Esus tantiaquidobēd bēdamboec isnanquin utsibotsen bēdamboen ista.

¹⁶ Aden Esus tantiec ēnēdenquio yec cuishonquianeta. ¹⁷ Adembidi Nuquin Papa chianequin: —Ēmbi chiapadomboen ēbi nashunquin utsibotsen nashunta, Papa, —quequin chianeta. ¹⁸ ¿Mimbi chiapadomboen Nuquin Papan nasho isunuīdida mimbi: —Nuquin Papa bēdambo iquec —cape? Nadoac bēdambo ictsiash. Bēdamboec tabadquin: —Mibi bēdamboshē iquec, Papa, —cac bēdambo ictsiash. Daicsabudshumbec adembidi nac bēdambo

ictsiash. Paëmbo icnubi adembidi. Mitsana icnuc adembidi. Mitsana nibëdnubi adembidi. Utsibon chieshënaqui adembidi: —Mibi bëdamboshë iquec, Papa —cac bëdambo ictsiash. Aden Nuquin Papan: —Ma Esus tantiaquidon adono —quequin tantiacpaden mimbi natsiac. ¹⁹ Nuquin Papan Mayanën Nuquin Papan chiaid tantiamiac pamumëdacbimboec tabadenda. ²⁰ Aden Nuquin Papan Mayanën tantiamiac utsibontsen chuisho: —Mue nec —badedquo cainda. Chuishoba tantiata. —Nuquin Papan chiaidquo chuinu —quesho mamënsnunenda. ²¹ Adenquo icquin: —¿Nuquin Papan chiaidquiobida chuibaneque? Tantiabono —cata. Aden tantiashun Nuquin Papan chiaidquo isbanta. Aden isbanquin abimbo chuisho tantiashun: —Ai, Nuquin Papan chiaidquo chiec —queshun aidën chuisho bëdamboen tantiata. ²² Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquo chiec —queshun aidën chuisho tantienda. Aidën chiacpadomboen nainda.

²³ Mibi Nuquin Papa chianembi. —Matses bëdambo icmequid icquin mimbi chiacpadomboen aido name, Papa. Mimbi chiaidquo bëdamboen tantiamequin bëdamboen tabadme, Papa. Mimbi adoac bëdamboec tabadnuc choashun con Icho Esusën: “Aido bëdambo iquec,” catsiash, Papa —quequin Nuquin Papa chianembi mibi. ²⁴ Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquo iquendac. ²⁵ Nuquin Papa ëbi chianeta. —Abëd icquidobëdta Pabado bëdamboen nameta, Papa —quequin Nuquin Papa chianeta. ²⁶ Ambocquido Esus tantiaquidotedi chuiquin: —Pabado chedon nuqui tantiaquiec —quequin chuiban. ²⁷ Nuquin Icbon tantiacpaden chuiquin dada uaombique. Ëmbi dada uaboed nëid isquin ambocquido Esus tantiaquidotedi chuiban. ²⁸ —Nuquin Icho Esuquidistun bëdamboen ispashun —quequin mibi tantiembi. Padi. Aidedi dada uaombi.

TESADONICA YACNOCQUIDON ISTE 2

Pabadon tauamboen chiaid

¹⁻² Pabado nebi. Tesadonica yacnocquido Nuquin Papabëdta Nuquin Icho Esus tantiaquido mibi chuioaquin dada uaimbi. —Nuquin Papan Esuquidistubëdtan bëdamboen isquin bëdambo icmepashun —caimbi mibi. Èbëd icquin Sidbanobëdtan Timoteyon: —Nuquin Papan adopashun —quequimbidi mibi tantiec.

Nuquin Papan Esusbëdtan matses cuidte chiaid

³ —Esus tantiaquidën: “Aden naic mibi bëdamboshë iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bëdiactscë tantiatcëboedombi nëbi Esus tantiabededosh,” quiosh, Papa. “Adecbidi bëdiactscë tantianamboedi nëbi comapenec tantiananosh,” quiosh. Aden aido bëdambo icmec mibi bëdamboshë iquec, Papa —quequin chianembi mibi. ⁴ Mimbi aden bëdamboen naid Esus tantiaquido utsibo chuibeniombi. —Dadpeshun chieshënaqui chieshtoenquio icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

⁵ Adec chieshtoenquio icquid icquin nuqui naden tantiec. —Èbi chieshtomenquio icquid abitedishun naid tantiaquidquio nec. Adquid icquin icsambo icquido cuidquin bëdambo icquido Nuquin Papan bëdamboen isec —quequin nuqui tantiec. Adec chieshtoenquio icquin Esus tantiasho Nuquin Papan: —Adquido ëmbi namiacnombo chomeshun ëbëdi tabadmendambi —nuqui caindac. ⁶ Nuqui chieshënquidon naidtsen tantiaquid icquin Nuquin Papan aido cuidendac. ⁷ Aden nuqui chieshënquido cuidquin aidon nuqui natiamiaid nuqui bëpiscudmendac. Abi yacnuësh mayan bëdabo ambi comapenen tantiaquin namiaidobëd choshon Nuquin Icho Esusën adoendac. ⁸ —Icsaisambo yec matses cuidquid nebi —quequin tantiamenuc bëchamauanquec choshon Nuquin Papa tantiesabo cuidendac. —“Nuquin Icho Esus tantiasho Nuquin Papan mibi bëdamboen istsias,” quequin chuisho tantiatipimbo iquebi —quequin abi tantienquio icsho Esusën cuidendac. ⁹ Cacumiachimboen abi yacno puduedmenquio icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icho yec bëdamboshë isadsho isec tabadtiapimbo iquendac. ¹⁰ Aden ambi icsaido cuidte ushëmbi Esus chosho abi tantiaquido: —Èbi cuidmenquio icnuec abided cuidadaid Nuquin Icho bëdamboshë iquec —quequin aton Icho isec tabadendac. Èmbi Esus chuibanac aid tantiabonndaico icquin mimbitsen Esus chosho isendac.

¹¹ —Aidbëdtambi Esus isendambi —quequin mibi Nuquin Papa chianembi naden. —Mimbi Esus tantiamiaido Tesadonica yacnocquido bëdamboen tabadme, Papa. Aido: “Esus tantiaquin ambi chiacpadomboen natiadquio iquebi,” qesho ambi chiacpadomboen name, Papa. Comapenen tantiaquidquio mibi neque. Adota, Papa. ¹² Aden mimbi con Icho Esuquidistubëdtan bëdambo icmiac Esus tantiec bëdamboec tabadtsias, Papa. Adec bëdamboec tabadsho isash utsibo mibi caic: “Abi tantiaquid icsho Esusbëdtan Nuquin Papan aden bëdamboen tabadmec. Aton Icho Esuquidistubëd Nuquin Papa bëdamboshë iquec,” quependac utsibo, Papa —quequin Nuquin Papa chianembi mibi tantiaquin.

2

Icsamboshë icquidba chote chiaid

¹ Tantia, con utsibo. Mibitedi chuinu. —Abi yacno tabadmenuen buanuec Nuquin Papa yacnuësh Nuquin Icho Esus ënden choac —qesho tantias ² dacuëdtanenda. Mibi yacnoshon ¿tsuntsin adec muaquin chuiposh? Aidon: —Tantia. Nuquin Papan Mayanën tantiamiacpadomboen chuinu. Nuquin Icho Esus ënden choac —quec muapash. Ambembi chiaidien chuichitash. —Naden Pabadon chiaid iquec —quequin ëmbi dada uaidbimboecquid isquimbien chuichitash. ³ Adec muaid tantias: —Abimboen cachitosh —quenda. ¿Nuquin Icbobada chopadic? Padenquio. Utsibain choendac. —Nuquin Papa caidën chiaid tantiatipimbo iquebi —quec matses icsamboec tabadnubien Nuquin Papa chieshënquidquio icsamboshë icquidba choash matses dadpenquio chuichuid dapa iquendac. Aid Nuquin Papan cuidtequidquio nendac. Aidba choabi icnuc Esus choenquio iquendac. Icsamboshë icquidbain choendac. ⁴ Aid chuichuid dapa yanashic Nuquin Papa dëniacte bunquec Nuquin Papa tabadte shubu uashunaidën puduedshun: —“Comapenen tantiaquin ëbi nashunquidquio nec,” quequin mimbi Nuquin Papa caid nibëdeque. Èbiuidtsëqui tantia —caindac matses abitedi chuiquin.

⁵ Aden mibi chuideniondambi. *¿Tantienquioda ique?* ⁶ Nuquin Papan tantiacpadênquio chomenuen uidênacu icsamboshê icquid nêbi choenquio iquec. Nuquin Papan tantiacpadênquio choendac. Êmbi chiondacadquid abi chomenquio icquid mimbi tantiec. ⁷ Nêbi isadenquio icquidên Satanasên namiac matsesên Nuquin Papan chiaid niac-niacbededec. Padnuen icsamboshê icquid choabi iquec. Aid chomenquio icquid nidabi icnubi icsamboshê icquid chuquid dapa yantiapimbo iquendac. Abi chomenquio icquid nidmiambien ⁸ icsamboshê icquid matses chuquid dapa iquendac. Adnubien Nuquin Icho Esusên: — Êbien matsesên Icbombo nec — quequin matses abitedi tantiamenuc choshon icsamboshê icquid: — Unêsta — caquinuidtsêqui unês uashunendac.

⁹ Adec Esus choabi icnu icsamboshê icquid chuquid dapa yanendac. Adquid yanshumbic Satanasên tantiamiacpadomboen comapenen tantiaquin dadpenquio nabanquin ismendac. — Comapenen tantiaquidquio nebique. Istac — quequin ambembi chiaid tantiamenuen aden nadatiambo icquin nabanquin ismendac. ¹⁰ Adec icsauidequi tabadquid yec comapenec muasho tantiaish: — Abimbo caic — quependac Esus tantiesabo Nuquin Papan cuidtequido yec. Aidon Esus chuibenquidên Nuquin Papa yacno tabadte abimbo chuisho pamumêdacimboen tantiatiapimbo icquin ambembi chiaiduidtsêqui tantiadac. ¹¹ Aden ambi chiaid niac-niacuidequi icsho Nuquin Papan: — Abi bunaidquio ambembi chiaidquio chuisho ma tantiapanuna — quequin namiac: — Mue nec — quequin tantienquio iquendac. Utsi muasho tantiaish badedi: — Abimbo chiec — quetsiash tantienquio yec. ¹² Aden ambi chiaidquio tantiatiapimbo icquin aid niac-niaquec icsateuidi bunsho Nuquin Papan cuidquidac.

Nuquin Papan tantiamiaid

¹³ Nuquin Icbon mibi tantiaquiec. Êndenquimboshê matses uabi Nuquin Papa nuqui caic: — Êbi yacno tabadmenuen Esus tantiamequin aido bédambo icmendambi — quepampic. Adshumbic aidên chiacpadomboen aton Mayanên namiac Nuquin Papan chiaidquio tantiaish Esus tantiec mibi bédamboec tabadcuendac. — Adquibidi iccosh — qesho tantiaishun Nuquin Papa chianembi naden. — Aden aido bédamboen namequid yec mibi bédamboshê iquec, Papa — quequin chianembi mibi tantiaquin. ¹⁴ Nuquin Papan chiaidquio êmbi chuibanac mimbi Esus tantianbenondac. Abi yacnoshon Nuquin Icho Esuquidistupadquio bédamboshê icmenuen aden Nuquin Papan mibi Esus tantiamiac. ¹⁵ Êbi adsho tantiaishun êmbi chiondacadomboen chieshtoenquio icquin Esus tantiaata. Êmbi mibi bêisquin chiondaidbêdta êmbi dada uaquin abimbo chiondaid bêpiscudenda.

¹⁶ Nuquin Icho Esuquidistubêdta Nuquin Papan nuqui tantiaquin bédamboen isec. Adembidi: — Nuquin Papa yacno Esusbêd iquendabi — quequin tantiamequin dayacquo yacnimboecnu nuqui icmec. ¹⁷ Adquid icsho chianembi naden. — Tesadonica yacnocquido chieshtomenquio icquin Esus tantiamequin bédamboec tabadquid icme, Papa. Adembidi bédamboec chuinanquid icmequin nashunanquid icme, Papa — quequin Nuquin Papa chianembi mibi tantiaquin.

3

Nuquin Papa êbi chianeta, quiaid

¹ Tantia, con utsibo. Mibi chuinu. Nuquin Papa êbi chianeta. — Nidaid utsi-utsiec yacno nidmeshun Pabado chedo matses dadpenquio Esusên naid bédamboen chuibame, Papa. Mimbi bédamboen chuimiác êmbi Esus tantibenondacadomboen utsibon dadpenshun Esus tantiabentsiash, Papa. ² Aden Esus chuibansho isun Esus tantiesabo chieshêmênquidon: “Pabado cueschitono,” casho cuesmenda, Papa — quequin Nuquin Papa êbi chianeta. ³ Nuquin Icho bédambo iquec. Muesambo icquin ambi chiacpadomboen nuqui bédamboen dayun uaindac. — Êbi tantienquio yanushe — qeshun nuqui chieshtomenquio icquin Satanás nuqui yametiapimbo iquendac. ⁴ — Aden Nuquin Icbon bédambo icmiác êmbi chiacpadomboen naboedi adembidi Tesadonica yacnocquidon naindac — quequin tantiombi. ⁵ Aden mibi tantiaquin naden Nuquin Papa chianembi: — Con Icho Esuquidistun tantiamiacpaden: “Nuquin Papan êbi tantiaquiec,” quequin Tesadonica yacnocquido tantiameta, Papa. Esusên chieshtoenquio icquin nacpadomboembidi aido chieshtoenquio icquid icmeta, Papa — quequin Nuquin Papa chianembi.

Esus tantiaquido uspuenquio icquid

⁶ Tantia, con utsibo. Nuquin Icho Esuquidistun: — Êbi chuibeneta — caidquio icquin mibi chuinu. Esus tantiaquido utsi-utsiec êmbi mibi chiondaid niac-niaquec chieshuidequi icsho isash aibêd chieshec tabadenda. ⁷ — “Êbêd iquec Pabado dayacquo iccondacadquiec chieshenquio yequien tabadtiad,” quiosh — quiosh mibi caic. Abimbo mimbi cac. Mibêd

yec dayacquio iccondabi. Chieshenquo yec chonoadteniondabi. ⁸ Mimi pete meniac ꝥcon piucquid mibi menenquiodambi ictionda? Bedquin mambi mibi menianepondac. — Ębi meniac aton na naimēdnushe —quiash con piucquid bednuec chonoadteniondabi. ⁹ — Esus tantiaquidon abi chuibanquid menenquo icquid —ꝥquetabi ique? Padenquo. Esusēn naid chuibanquid ambi chuibanaidon meniaquien bēdambo ictsiash. —Chieshenquo icquin ěmbi nacnensho isun ma adembidi Tesadonica yacnocquidontsen nanu —quiashini chonoadteniondac. ¹⁰ Mibēd tabadquin naden chiondambi. —Aton na nacnenenquo yec chieshuidequi icsho pemenuio icquid —quequin chiondambi.

¹¹ Mibi caic: —Utsi-utsiec chieshuidequi tabadosh. Utsi icsaiduidquo chiec tabadosh —quetuidosh. ¹² Uspun tantia. Nuquin Icho Esuquidistun chiaid mibi chuinu. Chieshuidequi tabadenda. Mitsanabi penuec chonoadta. ¹³ Nuquin Papan chiacpadomboen naic chieshtoenda. Chieshtoenquo icquin bēdamboen-uidi nata. ¹⁴ Nēid dada uaquin ěmbi chiaid niacniacsho ista. Adec icsasho isash: —“Icsamboen naombi,” quequin ma tantiabenu —quiash abēduidi iquenda. ¹⁵ Aid chieshēnenquo yequi adta. Mibipadquid Esus tantiaquid icsho naden chui. —Esus tantiaquid adesa ye. Padi. Bēdamboequien tabadtiad —quequin chuita.

Pabadon ěnquin chiaid

¹⁶ Mibi tantiaquin Nuquin Papa chianembi naden. —Bēdambo icmianquidquo icquin Con Ichonquo ma aido dacuēdenquo icquid icmepanuna, Papa. Aidobēd ma Esus tēshēdenquo icpanuna, Papa —quequin Nuquin Papa chianembi. ¹⁷ —Ista. Ęmbimbo dada uaid nēid neque —quequin ěmbi nēidtedpactsēc dada uaid isun: —Pabadon chiaidquo nec —quequin mimi tantiendac. ¹⁸ —Nuquin Icho Esuquidistun bēdamboen ispashun —caimbi mibi. Padi. Aidtedi dada uaombi.

TIMOTEYON ISTE 1

Tauamboen chiaid

¹ Pabado nebi. Nuquin Papa yacno yuedanquidën Esuquidistun: —Ëbi chuibeneta —caidquo nebi. Aton Mado tantiasho nuqui bédamboen isquidën Nuquin Papan: —Con Mado Esus chuibeneta —caidquo nebi. ² Ëmbi chiondac Esus tantiabenash con mado icbobimboecquid mibi neque. Mimbi iste nêid dada uanu. Mibi tantiec: —Nuquin Papan aton Mado Nuquin Icho Esuquidistubêdtan con mado bédamboen isquin bédambo icmepashun —quiobi.

Chiaid utsi chienda, quequin chiaid

³ Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquo chuinu —queboedombi aidquo chienquo icsho naden chuita. —Nuquin Papan chiaid chuiquimbi chiaid utsibêda nactsusuaquin Nuquin Papan chiaid chienda —cata. ⁴ Nadembidi chuibanta. —Tsusedpabon ambembi chiampiduidi chiec tabadenda. Adem-bidi utsibon: “Nuquin matsesën mado nepampic. Aidën bababic nadec cuëmêdpampic. Aidën tsyuecquiduidtsëqui bédambo iquec,” quequin dadpenquo ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimbi Nuquin Papan chiaidquo bédamboen tantiamepe? Adenuidi chuiquin mimbi Esus tantiamenquo iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bédamboen chiec,” quec mibêdi chushcananeque. Nuquin Papan chiaidquien chuitiad —cata. Nuquin Papan chiaid bédamboen chienquo icquido aden chuita. ⁵ Adshumbic aidobidi naden chuita. —“Matses ma bédamboec tantiananu,” quequin Nuquin Papan chiaidquo chuita. Adoac bédamboen tantiashun Esus tantiec bédamboec tabadec matses bédamboec tantianantsiash —cata, mado. ⁶ Mimbi aden chiacpadomboen nainquo icquidoen Nuquin Papan chiaid bédamboen tantienquo yec abembi onquec. ⁷ Adquidon: —Nuquin Papan ambi chiaid Moises dada uamepampid bédamboen tantiembi. Moisesën chiampicpadomboen namenuc aid chuibanquid icte bunebi —queboedombi Nuquin Papan chiaid bédamboen tantienquo icquin icsamboen chiec.

⁸ —“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chie? Padenquo. Ma aidi bédambo iqueyoc. —Nêid tantiashun ma abi icsaid ënu —qeshun aid abimbo chiac bédambo ictsiash. ⁹ ¿Bédambo icquid chuiquinda Nuquin Papan Moises dada uamepampic? Padenquo. Icsambo icquido chuiquimbien adopampic nadquido chuiquin. Nêidic Nuquin Papan chiaid niac-niacquido. Nêidic aton chuiquidën chiaid niac-niacquido. Nêidic Nuquin Papa tantiesabo. Nêidic Nuquin Papa mamênshunquido. Nêidic anibi cuesunequido. Nêidic amêbi cuesunequido. Nêidic cuesunianquido. ¹⁰ Nêidic aton chidopenquo chudquido. Nêidic aton bënêpenquo chudmequido chido. Nêidic aton chido bunenquo yec dada daêd chichudnanquido. Nêidic matses utsi bedshun yuaquido. Nêidic muaquido. Nêidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic. ¹¹ Adembidi Esus chuibenequidon: —Adquid icsambo iquec —quequin chiec. Bédamboshê icquin Nuquin Papan aden Esus chuibenequido chuimec. Esus chuibenequidibidi icquin adembidi chiembi.

Nuquin Icbon Pabado bédamboen isbenaïd

¹² Tantia, mado. Mibi chuinu. Nuquin Icho Esuquidistun: —Pabodon ëbi bédamboen chuibantsiash —quequin tantiashun: —Ëbi chuibenequid icta, Pabado —qeshun ëbi bédamboen namec. Adoaid icquin: —Ëbi namequid yec mibi bédamboshê iquec, Icho —quequin Nuquin Icho Esus chianembi. ¹³ Ënden adenquo iccondabi. Nuquin Papan Madopenquo danquin Esus icsamboen chuishunondambi. Abi tantiaquido chieshênquin cuesun secate bunondabi. —Aton Mado Esus tantiasho Nuquin Papan ëbi bédamboen istsiash —quenquo icquin adopondambi. Adshobini: —Pabodon abimbo tantiabi iquec —qeshun Nuquin Icbon cuidenquo icpanêdash. ¹⁴ Adec icsambo icquid icsho Nuquin Icbon tantiamiac: —Abi tantiasho ëbi bédamboen isbentsiash —quequin Esusquo tantiabenondambi. Esus tantiaquin matsetsen tantiaquiembi.

¹⁵ Tantia, mado. Naden chiaid bédambo iqueque. —Icsambo icboedën abi tantiasho cuidmenquo icnuec Esus matsesac caondash —quequin chiaid bédambo iquec. Ëbibil icsamboshê icpondabi. Utsibon Nuquin Papan chiaid bêdiactsec niac-niacnubi ëmbimbo comapenen niac-niaccondambi. ¹⁶ Adec ëbi yuec icsambo icsho Nuquin Icho Esusën baded

cuidenquo icquin abibi tantiamequin bédamboen isbempondashi. —Pabado bédamboen isaid chiaç utsiibo: “Pabado icsambo icboedi Nuquin Papan bédamboen isbenac. Adembidi Esus tantiasho Nuquin Papan èbitsen bédamboen isendac,” quequin èbi tantien dac. Adquid unèsascho èbi yacno tabadmendambi —qeshun abi tantiamequin Esusèn bédamboen isbempondashi. ¹⁷ Aden tantiaquin nadoembi. —Nuquin Papa ambiuidtsèqui abitedi namequid yec abitedishun Ichombo nec. Unèstiapimbo icquid nec. Isadenquo icquid nec. Adquid abentsècquiobi icnuc abipadquid utsi nibèdec. Adquid icsho abitedishun: “Mibi bédamboshè iquec, Papa,” capashun ènenquo icquin —caimbi.

Matsesèn mibi chiondacpadombota, quiaid

¹⁸ Mibi con mado icbobimboecquid neque. Èmbi chiacpadomboen Nuquin Papan chiaidquo chuibanta, mado. Ènden mibi Esus chuibanquid yanabi icnuc Nuquin Papan oncamiac nuquibèdan Esus tantiaquidèn mimbi chuibante chuipondash. —Esus bédamboen chuibanquin Timoteyon Esus tantiaquido bédamboen namendac —quequin mimbi chuibante chuipondash. Aidèn chiacpadomboen chieshtoenquo icquin Nuquin Papan chiaidquo chuibanta. ¹⁹ Aden Nuquin Papan chiaid niaquenquo icquin Esus tantiaquieç bédamboec tabadta. Utsiboen adenquo iquec. Icsamboec tabadquin Nuquin Papan chiaidquo niac-niacquin Esus tantienquo yanosh. ²⁰ Adecandado caidbèdan Imeneyo caidèn aden Esus tantienquo yanosh. Aid daèdshun Nuquin Papa muauaquin icsamboen chuisho nadopombi. —Adquid Satanasèn natiambo icmepashun —qeshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —qeshun adopombi.

2

Nuquin Papa bédamboen chianete chiaid

¹ Tantia. Utsibotedi chinu. Matses abitedi tantiaquin Nuquin Papa chianenuna. —Matses abitedi min Mado Esusbèda mibi bédamboen tantiamequin bédamboen ista, Papa. Matses nashunquidquo yec mibi bédamboshè iquec, Papa —quequin Nuquin Papa chianenuna. ² Adembidi Nuquin Papa chuiquin: —Chuiquid dapambo pedesidente caidte-dibèda chuiquid dapa utsibotedi bédamboen tantiameta, Papa. Adoac aidon bédamboen namiac cuesun secananenquo yec matses abitedi bédamboec tabadtsiash. Adnubi abi chieshènquido nibèdnuc Esus tantiaquido abi tantiec bédambo ictsiash, Papa —quequin Nuquin Papa chianenuna. ³ —Con matses Esus tantiameta, Papa —quequin nuqui aden chianesho tantias: —Bédamboen chieç. Èbi bunaidquo chieç —quendac Nuquin Papa nuqui cuidenquo icquin abèd tabadmequid. ⁴ Matses abitedimbo cuidenquo icnuc matses bédamboen iste bunquid yec: —Ma èmbi chiaid tantiasun abided cuidadec unèsaid ma tantiapanu —quec Nuquin Papa. ⁵ Nuquin Papan chiaidquo tantiasun nuqui naden tantiec. —Nuquin Papa matses uaquid abentsèqui icnuc abipadquid utsi nibèdquieç. Abèd icboedi matsesun: “Nuquin Papapadquid icquin aid tantiamequid nebi,” quequin aton Madon matses chuipanèdash. Adechidi aton Papa matses bédamboen ismequid yampañèdash Esus. Aid abentsèqui Nuquin Papa bédamboen ismequid nec. ⁶ Abi tantiaquid cuidmenquo icnuc abided cuidadec unèspac caondash —quequin chiaidquo nuqui tantiec. Nèbien Nuquin Papan tantiacpadomboen matsesèn aden chiaidquo chuibenchuibenec. ⁷ Adomboembidi Esus chuibenequidquo nebi. —Matses utsibo isadaidpembo èbi chuibeneta —Esusèn caonaid nebi. Adoaid icquin: —Ma Esus tantianu —quequin Nuquin Papan chiaidquo chuibenec nebi. Abimbo caimbi. Adquid nebi.

Esus tantiec cuèdènacnoshon nate chiaid

⁸ Tantia. Dadatedi chinu. Cuèdènacno puduedshun Nuquin Papa chinuuec bédamboequien tabadtiad. Nèish bédanash chieshènanenquo icquimbien Nuquin Papa chuitiad. ⁹ Chidobotsen chinu. Esus tantiec Esus tantiaquido cuèdènacno nidnuc: —Mabi isnu —quequin tantienquo yec bédamboec dasiuidta. Bédamboec tabadquid dasiuidacimboec dasiuidta. Chido chishpidabimboec dasiuidenda. —Mabi isnu —quenquo yec Esusquido tantianuec Esus tantiaquido cuèdènacno puduedta. ¹⁰ —Mabi isnu —quequin tantienquo yec: —Nuquin Papa tantiaquidquo nebi —quec utsibo nashumbanec bédamboec tabadta.

¹¹ Esus tantiaquido cuèdènacnoshon dadan Nuquin Papan chiaid chuibansho tantiaquid chidon. —Aidèn chiacpadomboen natiapimbo iquebi —quequin tantienquo yec bédamboen tantiec otacquo tabadquid chido. ¹² Esus tantiaquido cuèdènacno puduedshun dada chuibanesa chidon. Adembidi dada ancaisa chidon. —Otaçquien tabadquid chido —caimbi. ¹³ Dada Adan caidba Nuquin Papan matses uapampic. Adshumbic aton chido Eba caidtsen. ¹⁴ Aden dadabèda chido nacnenacsho isumbien Satanasèn: —Icsamequin

tanu —qeshun mauuac icsaquin chidomba Nuquin Papan chiaid niacpampic. Adan padabi. Aden tantiaquin: —Dadan chido chuibanquid —caimbi. ¹⁵ Adec abia icsasho isun Nuquin Papan cuidac paëmbo icnuc bacuë tishquid chido abitedi nec. Nèbi Esus tantiaquid yanash ambi tishaido bédamboen namequid nendac. Esusèn chiacpadomboen natiadquo icquin matses tantiaquid nendac. Nuquin Papan chiaid niaquenquo icquid nendac. Aton bènèuidtsèqui chudmequid yendac Esus tantiaquid chidon. Adquid Nuquin Papan bédamboen isquin abèdi tabadmendac.

3

Esus chuibanquid chiaid

¹ Tantia. Utsiten mibi chuinu. —Esus chuibanquid ictiadquo iquebi —qesho: —Bédamboen nate mibi bunec —cata. ² —Nuquin Papan chiaid chuibanquid nadquinen ictiad —quequin anocquido chuita. —Bédamboec tabadquid nec —utsibon caidquo Nuquin Papan chiaid chuibanquid nendac. Adquid chido abentsèc inquid nendac. Abi bunaid ènshun mèmunquidquo nendac. —Bédamboen tantiaquidquo nec —utsibon caidquo nendac. Isedanquido bédamboen isquid Nuquin Papan chiaid chuibanquidèn. Nuquin Papan chiaid bédamboen tantiamequin chuibanquid nendac. ³ Tantiadenuen acte paëmbo icquid aquenquo icquid nendac. Badedquo nèishenquo icquid nendac. Uimanèmènenquo icquid nendac. Chushcananteuidi bunenquo icquid Nuquin Papan chiaid chuibanquid. Piucquid bedteuidi bunenquo icquid nendac. ⁴ Aidèn chiacpadomboen aton chidon aton bacuëbòbdtan naquid. Chieshenquo icquin aton papan chiacpadomboen naquid aton bacuëbon. ⁵ ¿Ambi chiacpadomboen aton chidobèdta aton bacuëbo bédamboen namenquo icquinda Esus tantiaquido bédamboen namepatsiash? Padenquo ictsiash. ⁶ Ènden Esus tantiabonndaic chuiquin: —Èbi chuibanquid icta. Èbi bédamboen chuiquin èbi bédamboen nameta —Esus tantiaquidon cac bédambo ictsiash. Nèbimbo Esus tantiabonquid aden chienda. Chuibanquid icmiac adquidèn Nuquin Papan chiaid badedquo niactsiash. Satanashimboec: —Èbiuidtsèqui bédamboshè iquebi —quetsiashe. Adquid: —Èbi chuibanquid icta —cainda. ⁷ Ènden Esus tantiabonndaic mibi chuibanquid icmenun Esus tantiesabon: —Bédambo icquid nec —casha tantiaata. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mamènshuntsiash. Adquid Satanashèn badedi yuatsiashe. —Icsambo icquid nec —caid: —Èbi chuibanquid icta —cainda.

Esus tantiaquido nashunquid chiaid

⁸ Tantia. Esus tantiaquido nashunquidtsen chuinu. —Nuqui chuibanquidèn chiacpadomboen èbitedi nashunquid icta —quequin nadquid chuita. Utsibon: —Bédambo icquid nec —caidquo nendac. Muesambo nendac. Tantiadenuen acte paëmbo icquid aquenquo icquid Esus tantiaquido nashunquidèn. Piucquid bunquin ampenquo icquid nendac. ⁹ Nuquin Papan chiaid bédamboen tantiaquinc Esus tantiaquinc caic bédamboec tabadquid Esus tantiaquido nashunquid. Adquid bédambo ictsiash. ¹⁰ Esus tantiaquido nashunquid icmenun: —¿Bédambo icquidida nèid nec? —quequin chuimiac utsibo: —Ai, bédambo icquid nec —abitedi qesho tantiasun: —Esus tantiaquido nashunquid icta —cac bédambo ictsiash. ¹¹ Adquidèn chido: —Bédambo icquid nec —utsibon caidquo nendac. Utsi icsaiduidi chienquo yec bédamboec tabadquid adquidèn chido. Tantiadenuen acte paëmbo icquid aquenquo icquid aton chidon. Ampenquo yec bédamboec tabadquid. Adquidquo Esus tantiaquido nashunquidèn chido bédambo ictsiash. ¹² Esus tantiaquido nashunquidèn chido abentsèqui inquid. Ambi chiacpadomboen aton chidon naquid. Adembi aton bacuëbon. ¹³ Abi nashunquidèn Esus tantiaquido bédamboen nashunsho isun utsibon bédamboen isendac. Adoaidèn dayacquido icquin abi utsibo nashumbanquin dacuëdenquo icquin Esuquidistu tantiamendac. —Esus tantiaquido nashunquid adquidquo iquendac —quequin ènquin chiombi.

¹⁴ Tantia. Utsi mibi chuinu. Mibi yacno nèbi nidtiadquo iquebi. —Nidenquo icmane —qeshun nèid dada uaic nebi. ¹⁵ Èbi mibi yacno badedquo nidabi icnuc: —“Esus tantiaquidon nadoquid,” quequin Pabodon chiacpadomboen nanuna —cata. ¿Tutsi tantiaquido nuqui nepe? Unèstiapimbo icquid Nuquin Papambo nec. Aid tantiaquido yec shubu abentsèquèn tabadquidobimboec nuqui iquec. Adquid icquin Nuquin Papan chiaidquo tantiaquin nuqui Esus chuibenec. ¹⁶ Èndenquo abi bédamboen ismequid ambi tantiamiabi icnèdaidi nèbi Nuquin Papan tantiamiaid Esus bédamboshè iquec.

Aid Nuquin Papan matsempañédash.

Nuquin Papan Mayanèn: “Nuquin Papapadquidquo icsaisambo Esus nec,” quequin tantiamec.

Matsesën unës uaqi uincuenaid yec Nuquin Papan abi yacnoshon uaido mayan bédabon isaidquio Esus nec.
 Abi chuibenequidën nidaid utsi-utsiec yacno nidshun chuibeniác utsin-utsinquier Esus tantiabenac caosh.
 Aidquiobi Nuquin Papan abuc nidmeshun abëdi tabadmeoapanëdash.

4

Utsibon icsamboen chiaid

¹ Tantiá, mado. Nuquin Papan Mayanën tantiamiaid mibi chuinu. —Esus chote nëbi icnuc abi tantiaquidon utsin-utsinquier Esus tantienquio yanendac. Satanasën yuabo podobitsi icsabon muaquin pausnac matsesën chuisho tantiahsun Esus tantienquio yanendac —quequin Nuquin Papan Mayanën abimbo tantiamioshi. ² Aden muaquidon: —Abimbo caimbi —quequin bédambo icquid damianquier aden muaquin chiendac. —Nuquin Papan cuidnushe —quequin tantienquio iquendac. ³ Adquidon naden chiendac. —Dadan chido bedenda. Chidon dada bedmenda. Padenquio yec tabadta —quequin icsamboen chiendac. Adembidi: —Aidquio petemaid neque. Penda —quequin pete abentse-abentsen chiendac aid pete bédambo icnubi. ¿Atotsi quequin Nuquin Papan pete uapampic? —Ëmbi chiaidquio bédamboen tantiahsun Esus tantiaquidon: “Nuquin Papan pete uaid bédambo iquec,” quequin ma penu —quequin Nuquin Papan pete uampic. ⁴⁻⁵ Aidën pete uaidtedi bédamboshë iquec. —Ëmbi pete uaid bédambo iqueque. Ma penu —queshun Nuquin Papan pete icmiaid ma petequid neyoc. —Mimbi pete uaid bédambo iquec, Papa —queshun pete isuidenquio icquin penuna.

Esus chuibanquid icquin bédamboen nata, quiaid

⁶ Esus tantiaquido ëmbi chuibocpadomboen chuibanquin mimbi bédamboen natsiac, mado. Bacuëctšescho min matsesën Nuquin Papan chiaidquio mibi chuibanëdash. Aidën chiaid tantiaquid icquin Esusën chiacpadomboen nate bunquin ëmbi chiacpadomboen mimbi chuibantsiac. ⁷ Con tsusedpabon ambembi chiampidbëdta nëbi matsesën adembidi ambembi chiaid tantienda. Nuquin Papan chiaidquio niactiapimbo yec bédambo icte bunquiota. ⁸ Aton dada uidënquio icmenuec titinguetanequid nuquin matses nec. Esus tantiaquido bédambo icnuec ¿mitsipadquio icpec? Nuquin Papa tantiaquiec ambi chiaid niaquenquio yec bédamboec tabadquid nec. Adquid unësash Nuquin Papa yacno nidash bédamboshë icquid iquendac. ⁹ Èbi adsho tantiash: —Abimboen caic —queta. ¹⁰ Adec: —Abi yacno abëdi tabadendabi —quequin Nuquin Papan chiacpadomboen ënenquio icquin nanuna. —Esus tantiaquid unësascho cuidenquio icquin unëstiapimbo icquidën Nuquin Papan abëdi tabadmendac —quec chieshtoenquio yec bédamboec tabadnuna.

¹¹ Ëmbi chuibloed chuibanta, mado. —Nuquin Papan chiacpadomboen nanuna —quequin chuibanta. ¹² Mibi nëbi caniaid neque. Bédamboec tabadta, mado. Ènden caniaidën: —Nëbi caniaid icquin Nuquin Papan chiaid mimbi tantienquio iquec —canushe. Bédamboec tabadta. —Esus tantiaquido utsibotsen ma ëbi yacpadec bédamboec tabadnu —quiash adta. Bédamboen chuibanquinc matses tantiaquinc Esus tantiaquinc Nuquin Papan chiaid niaquenquio icquinc caic bédamboec tabadta.

¹³ Èbi ano nidabi icnuc Nuquin Papan chiaid adenuidi chuibanta. —Nuquin Papan chiacpadec bédamboec tabadnuna —quequin Nuquin Papan chiaid isbanquin matses chuibanta. Aden bédamboen tantiameta. ¹⁴ Ènden mibi mamishquin chiondaid ¿ada tantie? Ènden Esus tantiaquido icquin tsusio dapabon mibi mamishbededondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bédamboen chuibanquid Timoteyo iquendac —quequin chuipondash. Chieshtoenquio yec adquid icta, mado. ¹⁵ Ëmbi dada uaquin chuibloedtedi isbanshun ënenquio icquin ëmbi chiacpadomboen bédamboen nabanta, mado. —Ëmbi adosho isun ma ëmbi chuibanaidon: “Nuquin Papan chiaid chuibanquidquio yanosh,” ma ëbi canu —queshun bédamboen chuibanta, mado. ¹⁶ —Nuquin Papan chiaid niacmane —quec mibibi bédamboec tantiadta, mado. —¿Adabi bédamboec tabadpeba? ¿Adambi Nuquin Papan chiaidquio muainquio icquin chuibampoba? —quec mibibi tantiadta. Bédamboec tabadquin Nuquin Papan chiaidquio ënenquio icquin chuibanta. Aden Nuquin Papan chiacpadomboen naic aibbéd mibi tabadendac. Mimbi chuibanaidobidi adoaindac.

5

Esus chuibanquidën bédamboen chuite

¹ Nuquin Papan chiaid chuibanquid icquin dada ënden caniaid chushcainda, mado. —Esus tantiaquidën nadoquid yendac —quequin bédamboen chui: —Con pabimboecquid nec

—quequin. Nēbi caniquid: —Con utsibimboecquid nec —quequin ademvidi bēdamboen chuiban, mado. ² —Con tabimboecquid nec —qeshun macho bēdamboen chuiban. Chido machobudabi icquidtedi chibibimboecnuc isquin: —Nēid chudtiadquo icchitebi —quenquo icquin Nuquin Papan chiaidquo chuibanta, mado.

Chido niantembo chiaid

³ Tanta, mado. Esus tantiaquidon abēdtan Esus tantiaquid icsho niantē nashunte chuinu. Niantē aton matses nibēdquid: —¿Tsuntsimbini nashumpatsiashba? —quequid Esus tantiaquidon nashunquid. ⁴ ¿Ada nianten tishaido icpec? Aidēmbi ani nashuntsiash. ¿Ada aton baba icpec? Aidēmbi aton chichi nashuntsiash. Aidēmbidi aton shanuachotsen nashuntsiash. —Ēbi nashundened neque. Nēid nashunu —qeshun nashuntsiash. Aden ambi chiapadomboen nasho isash: —Bēdamboen naic —quetsiash Nuquin Papan. ⁵ Padnuc aton matses nibēdquidēnquo nianten Nuquin Papan chiaequid: —Nuquin Papan ēbi nashuntsiash —qeshun. —Mimbi ēbi tantiaquieque. Ēbi nashunta, Papa —quequin Nuquin Papan chiaequid niantē icsho abēdtan Esus tantiaquidon nashunquid. ⁶ Niantē utsimbien ambi tantiauidi naic. Petebēdta acteuīdi tantiaquin abi bunaidi naic. Adquidēn unēsacimbboecquin Nuquin Papan tantienquo iquec. Adquid Esus tantiaquidon nashunquo icquid. ⁷ Ēmbi aden niantē nashunte chuiboed Esus tantiaquido utsibotsen chuita, mado. —Aton matses nibēdquid niantē nashunenquo icsho: “Esus tantiaquido icsambo iquec,” utsibon canushe —qeshun chuita. ⁸ Aton shubun icquidotsen Esus tantiaquidon nashunquid. Abēd icquido menenquo yec pemenquo yec quec nashumēnenquo icquid icsamboshē iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niac-niaquec aton matses nashunenquo icquid icsamboshē iquec.

⁹ —Nēidtedi chido Esus tantiaquido nashunquidombo iquec —quequin abi cuēmēdquid abi cuēmēdquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquo 60ted matamec machobudaidquo. Aton bēnēuidtsēqui chudmedenedquo. ¹⁰ —Matses nashunquid nec —utsibon caid. Bacuē bēdamboen caniuadened machon. Isedanquido bēdamboen isquid. Esus tantiaquido nashundenequid. Matses daicsabudacsho nashunquid. Adec bēdamboec tabadquid: —Esus tantiaquido nashunquid icta —cata.

¹¹⁻¹² Utsi niantē machobudabi icquid: —Adquid icta —cainda. —Esusuidtsēqui tantiaquin abi tantiaquido nashunembi —queboedēmbi dada bunquin ambi chuiboedi niacbidansho isun utsibon: —Icsambo icquid nec —catsiashe. ¹³ Adquid shubu utsin shubu utsinquin isedben-isedbenec uspumbo yanash onqueteuidtsēqui buntsiash. Utsibo icsaidiuidi chuibenequidquo ictsiash. ¹⁴ —Adquid niantē machobudabi icquid dadan bedac bēdambo ictsiash —caimbi. Adoac bacuē tishoatsiash. Adshun codocaquinc sicaquinc daēdcaquinc catsiash. Adec bēdamboec tabadsho: —Icsambo icquid nec —Esus tantiesabon catiapimbo ictsiash. ¹⁵ Adquid niantē machobudabi icquidēn utsin-utsinquin Esus tantienquo yanshun Satanasēn tantiamiapadomboen nac caosh. ¹⁶ Niantebēd icquid utsi ¿ada Esus tantiaquid chido icpec? Aidēmbi niantē nashunac bēdambo ictsiash. —Ēmbi nēid nashumbanuc niantē utsi aton matses nibēdquidquo Esus tantiaquido utsibon nashuntsiash —qeshun abēd icquidēn nashunac bēdambo ictsiash.

Esus tantiaquido chuibanquid chiaid

¹⁷ Tanta, mado. Esus tantiaquidon abi chuibanquid nashuntetsen mibi chuinu. ¿Ada Esus chuibanquidēn bēdamboen naosh? Adquidēn Nuquin Papan chiaid bēdamboen tantiamequinc Esus bēdamboen chuibanquinc casho ambi chuibanaidon bēdamboen isquin nashunquid. —Ma penu —qeshun menequid. ¹⁸ Adembidi chuiquin Nuquin Papan ambi chiaid dada uamepampic. “‘Penuše,’ qeshun adosbitsecquid bitsi secamenuen manemiaid baca bēnē utsibon dēnēshquid. ‘Adec chonoadquidēn ma penu,’ qeshun isadaidbon dēnēshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “‘Naic cho. Mibi bēdamboen cuidquīn menenu,’ cac chonoadsho abi chonoa uaquidēn menequid,” quequin Nuquin Papan chuipampic. Adembidi Esus tantiaquidon abi chuibanquid nashunquid.

¹⁹ Padnuc Esus chuibanquid caic: —Nuquin Papan chiaid niac-niacsho isombi —quequin matses abentsēcshun chuisho: —Abimboen cachitec —cainda. Daēdshun chuisho: —Abimboen cachitec —cata. Adembidi abentsē chotsecquin chuisho tantiata. ²⁰ Esus chuibanquidēn Nuquin Papan chiaid niacacsho: —Mibi icsaoc. Padi icnuna —cata. Esus tantiaquido dadpenshun tantianubi adota. —Aden chuisho tantiashe dacuēdec: “Ēbitsen adembidi chushcapanundac,” qeshun ma utsibon Nuquin Papan chiaid niaquenquo icnu —qeshun chushcata. ²¹ Esuquidistubēdtan Nuquin Papan nuqui isec. Adembidi

Nuquin Papan abi yacnoshon uaido mayan bēdabon nuqui iseque. Ēmbi chuibocpadomboen nata. Min matsesēn mimbī tantiaidēnquiobi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. —Con matses ēmbi tantiaidquio neque. Chushcainquio iquembī —cainda.

²² Nuquin Papan chiaid chuibanquid icmenuen nuqui naondacpadomboen badedquio mamishenda. Ambi naid yuen isquioshon ambi chiaid yuen tantiaquioshon: —Bēdambo icquid nec —quequioshon nata. —Esus chuibanquid icta —mimbī badedquio caboedēn Nuquin Papan chiaid badedquio niacsho isash: —Ambi: “Adquid icta,” caidbēd Timoteyo icsamboshē iquec —utsibo quenushē. —Ēbēdtan chuibanquid icta —badedquio cainda. ²³ —Daicsabudteniaccosh. “Pucu paēmbo yan-yanebi,” quiosh —quiosh mibi caic, mado. Ac-teuīdi acashien mibi niaque. Actequid utsi paēmbo icquid pistšec ac ma pucu bēdanuequin. ²⁴ Tantia. Mibi padpiden chuīnu. —Ēbēdtan namembī —canuen matsesēn naid bēdamboen tantia. Utsi aton matses ismec icsasho: —Icsambo icquid nec —badedi catsiash aton matsesēn. Utsibic ismenquio yec icsasho: —Icsambo icquid nec —quequin badedquio tantienquio icquin yuecshun istuidshumbi adotsiash. ²⁵ Utsien ismequin bēdamboen nasho: —Bēdambo icquid nec —badedi catsiash aton matsesēn. Utsimbic ismenquio icquin bēdamboen nabansho: —Bēdambo icquid nec —quequin badedquio tantienquio icquin yuecshun istuidshun adembidi tantiašsiash. Ēbi adsho tantiašshun: —Nuquin Papan chiaid chuibanquid icta —badedquio cainda.

6

Matses yuaido chiaid

¹ Matses yuabo Esus tantiaquido icsho naden chuita. —Min icbo Esus tantiesa icsho bēdamboen isquin ambi chiacpadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuīnushe. Min icbon chiacpadomboen nata —quequin yuabo chuita. ² Utsibi chuīquin: —Min icbo Esus tantiaquidbidi icsho: “Ēbipadquidi nec. Ambi chiacpadomboen natiapimbo iquebi,” cainda. “Ēbipadquid icsho aid tantiaquin con icbon chiacpadomboen nanu,” quequin min icbo bēdamboen nashunta —quequin yuabo chuita. Ēmbi chuiboedtedi Esus tantiaquido chuiban. —Adota —quequin chuibanta, mado.

Piucquid bunquin utsibon ambembi chiaid

³ Mimbī: —Nuquin Papan chiaid niaquenquio yec bēdamboec tabadnuna —quequin Nuquin Icbon chiaidquio chuīsho: —Aden chuīsho tantiatipimbo iquebi —quequin ambembi chiaid chuīquid icsambo iquec. Adquidēn chuīsho tantienda, mado. ⁴ Aden icsamboen tantiaquidēn: —Ēmbi chiaiduidtsēqui bēdambo iquec —quequin icsamboen chuibanendac. —Mimbī icsamboen chuīnuc ēmbimbo bēdamboen chiec —quec chushcanantiaquido iquendac. Abembi onqueteuīdi bunendac. Adquid yuec onquesho tantiaš: —Utsi onqueti-apimbo icnuc abentsēqui onquebudec —quec utsibo nēishendac. Adquidbēd chushcananec mauuananec icsamboec tantiašhunanendac. ⁵ Pabiati shēcūē nibēdadbimboen Nuquin Papan chiaidquio bēdamboen tantienquio yec chushcananendac. Nuquin Papan chiaid chuibanquidēn piucquid dadpen bedte danec chuibanquidbidi ictiadquio iquendac.

⁶ Nuquien Nuquin Papa tantiaquie bēdamboec tabadec nuquin na dadpen bedte bunenquio yec bēdambo ictsiac. ⁷ Tishac chucactsēcnu nuquin na nibēdpanēdash. Adembidi unēsquin nuquin na nuqui buantiapimbo iquec. ⁸ Nuquin pete dashcutebēd icnuc utsi bunenquio yec bēdambo nuqui ictsiac. ⁹ Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaidquido bednuen mēmunenquio icquin icsamboen nabantsiash. Aden Nuquin Papan chiaid niac-niacquin icsamboen naic quenēnash adenuīdi naic unēsash icsambo icquido cuidacno nidendac. ¹⁰ Adec piucquid natiambo bunquido aid bednuec baded-badedquie icsadenendac. Adquido: —Esus tantiembi —queboedobi padenquio yanash: —Esus tantienquio yanchitombi —quec natiac tabadendac.

Bēdamboec tabad, quiaid

¹¹ Mibi Nuquin Papa tantiaquidquio neque. Piucquid bedteuīdi bunenquio yec bēdamboec tabadte bunquiota, mado. Nuquin Papan chiaid niaquenquio yec chieshtoenquio icquin Esus tantia. Matsesēn tantiec nēishēmēnenquio yec bēdamboec tabadta. ¹² Utsibon chieshēnaqui chieshtoenquio icquin Esus tantiaquie bēdambo icta. Unēsash Nuquin Papabēd tabadnuec adta. —Con Mado Esus tantiaquie unēsacsho ēbēdi tabadmendambi —queshun Nuquin Papan Esus tantiamiac mimbī Esus tantiabempondac. Adshumbic: —Nuquin Papan Mado Esus tantiaquiembi —quequin matses dadpen mimbī tantiamiondaque. Adembidi aid tantiaquie bēdamboec tabadta. ¹³ Abitedi uampidēn

Nuquin Papan nuqui iseque. —Adquid nebi —quequin ancanquid dapa Ponsio Pidato chiec dacuēdenquo icnēdaidēn Nuquin Icbo Esuquidistuntsen nuqui iseque. ¹⁴ Esus tantiaquin chieshtoenquo icquin aidēn naidquo chuibanta. Nuquin Icbo Esuquidistu choabi icnuc ěmbi chuiboed niaquenquo yec bēdamboec tabadta. —Esus tantiaquido icsambo iquec — utsibo quetiapimbo icnuc adta. ¹⁵ Nuquin Papan tantiacpadēnquo aid ushēmbi Esuquidistu nidaidēn padpidec choendac. ¿Esus chomequid mitsipadquo icpec? Icsaisambo yec bēdamboshē icquid nec. Aid abentsēcquiobi abitedishun Icbombo nec. Aidēmbi chuiquid utsibo abitedi namendac. Aidquo chuiquid utsin dēniactiapimbo iquendac. ¹⁶ Aid abentsēqui unēstiapimbo icquid nec. Bēchamauanquiecsho istiapimbo yec utsibo tabadec. Aidi matsesēn istiapimbo icquid nec. Adquid icsho: —Mibiuidtsēqui abitedishun Icbo yec mibi bēdamboshē iquec, Papa —quequin Nuquin Papa chianenuna ěnenquo icquin.

Aton na dadpen dayun uaquido chiaid

¹⁷ Aton na dadpen dayun uaquido naden chuita, mado. —“Con na dadpenquioshē icnuc ěbiuidtsēqui bēdambo iquebi,” quenda. Nibēdantiapimbo icquid danquin mimbi dayun uaiduidtsēqui tantienda. Nuquin Papambo tantiaquiota. Aidēmbi matses bēdambo icmenuen aton na bedmec —cata. ¹⁸ Adquidobidi chuiquin: —Bēdamboec tabadquin utsibo nashumbanquiota. Adembidi cudasenquo icquin mitsana utsibo menianeta. ¹⁹ “Mimbi bēdamboen naoque. Ēbēdi tabadmequin mibi bēdambo icmendambi,” Nuquin Papa camenuen adota. Adash unēsacsho Nuquin Papan abēdi mibi tabadmendac padpidec unēstiapimbo icnuc —quequin aton na dadpen dayun uaquido chuita.

Pabadon ěnquin chiaid

²⁰ Ěmbi chuiboedquiobidi adembidi bēdamboen chuibanta, mado. Nuquin Papan chiaid chienquo yec abembi onquesho tantienda. —Bēdamboen tantiaquin abimbo caimbi — quequidobi muasho tantienda. Adquidobēd chushcananenda. ²¹ Aden icsamboen chuisho tantiashun: —Abimbo caic —quequin utsin-utsinquien Esus tantienquo yanondashe. Adquido tantienda. Chieshtoenquo icquin Esusquo chuibanta. —Nuquin Papan con mado bēdamboen ispashun —quequin mibi tantiembi. Padi. Aidtedi chuiquin dada uaombi.

TIMOTEYON ISTE 2

Tauamboen Timoteyo chiaid

¹ Pabado nebi. Nuquin Papan tantiacpadomboen Esuquidistun: —Ëbi chuibeneta —caidquo nebi. —Ambi chiampicpadomboen aton Mado Esuquidistu tantiaquid unêsacsho Nuquin Papan abêdi tabadmendac —quequin Esus chuibenecuidquo nebi. ² Con mado icbobimboecquid mibi neque. Mibi chuiquin nêid dada uanu, Timoteyo. —Nuquin Papan aton Mado Nuquin Icho Esuquidistubêdtan bêdamboen isquin bêdambo icmepashun —quequin mibi tantiemi.

Chieshtoenquo icquin Esus chuiban, quiaid

³ Con tsusedpabon nacpadomboen Nuquin Papauidi tantiaquin ambi chiacpadomboen natiadquo iquebi. Adquid icquin Nuquin Papa mibi chianemi. —Mibi tantiaquid Timoteyo bêdambo iquec, Papa. Adquo icmec mibi bêdamboshê iquec. Adquiouidi icmeta, Papa —quequin Nuquin Papa chianemi. ⁴ —Ëbi nidnu —quesho tantiaquid mibi shubiondaid tantieq mibi iste bunquiebi, mado. Ambo nidash mibi isec cuishonquetsiabi. ⁵ Naden mibi tantiemi. —Aton chichi Doida caidên ani Eunisebêdtan aid daêdshumba Esus tantiabenguiacpadomboen Timoteyontsen nêbi Esus tantiaquieq —quequin mibi tantiemi. ⁶ Adquid icsho mimbi tantiondaid padpiden mibi chuinu. —Min Mayan nêidbêd tabadmecquin cuesambo icmequin Esus chuibame, Papa —quequin mibi mamishquin Nuquin Papa chiondami. Adoac aton Mayan mibêd tabadmiac. Adoaid icquin dacuêdenquo icquin Esus chuibanta, mado. ⁷ ¿Nuquin Papan aton Mayan nuquibêd icmiacta nuqui natia dacuêde? Padenquo. Comapenen tantiaquid yec nuquibêd icquin nuqui cuesambo icmec. Adembidi Nuquin Papan Mayanên tantiamiac nuqui matses bêdamboen tantieq. Adembidi nuqui icsate bunaid namenquo icquin mêmunquidquo icnuc nuqui bêdambo icmec.

⁸ —Adoaid nebi —queshun dacuêdenquo icquin Nuquin Icho Esus chuibanta. Adembidi dacuêdenquo icquin: —Pabado tantiaquiemi —cata. —Quênên nauedtsaid Pabado tantiatipi —quenda. Utsibon cuestiadquo icquin chieshênaqui Nuquin Papan namiacpadec chieshtoenquo icquin Esus chuibanuna. ⁹ Nuquin Papan: —Bêdamboec tabadquid icmequin con Mado Esus tantiamemi —caido icquin adonona. ¿Nuqui bêdamboecuidi tabadshoda Nuquin Papan nuqui bêdamboen isbempondash? Padenquo. Êndenquimboshê nidaidbêdta matses uabi Nuquin Papan: —Ëmbi chiaid niac-niaquec icsambo icboedêmbi con Mado Esus tantiaquo cuidenquo iquendambi —quequin ambi chuipampicpadomboen nuqui Esus tantiamiac. ¹⁰ Aden ambi chuipampid tantiamiabi icshumbic nêbi Esuquidistu matsesmeshun matses tantiamiac. Adoac: —Abi tantiaquid unêsacsho icsaido cuidacno nidmenquo icquin unêstiapimbo icquid icmequin Nuquin Papa yacno abêdi Esuquidistun tabadmendac —quequin nuqui tantieq. ¹¹ Aden tantiaquin Esus chuibenecuidquo nebi. —Ëbi chuibeneta —Esusên caondaaid yec Nuquin Papabêdta Esus tantiamequidquo nebi. ¹² Aden chuibeneshobini chieshênquin quênên nauedondash. Adoaiqui chieshtotiapimbo icquin Esus tantiemi. —Ëmbi tantiaidquo comapenen tantiaquin nabanquidquo Esus nec. Adquid icquin: “Ëbi tantienquo yanushe,” queshun abi tantiamequin êbi chieshtomenquo iquendac. Nidaidên choabi icquin Esusên êbi chieshtoenquo icquid icmendac —quec dacuêdenquo iquebi. ¹³ Tanti, mado. Mibi chuinu. Ëmbi abimbo chiondaidquo chuiban: —Nuquin Papan chiaidquo nec —queshun. Esuquidistu tantiaquinc matses tantiaquinc caquin adenuidi chuibanta, mado. ¹⁴ Nuquin Papan Mayan nuquibêd iqueque. Aidên namiac êmbi chiondacpadomboen Nuquin Papan chiaidquo chuiquin Esus chuibanta, mado.

Onesipodo chiaid

¹⁵ Ëmbi: —Cho —cac choenquo icboed mimbi tantiac, mado. Nidaid utsi Asia caid yacnocquido dadpen adec choenquo iccosh. Edemoquenes caid choenquo iccosh. Adecbidi Piquedo caid chedo. ¹⁶ Onesipodo caidên nêbi bêdamboen isposhi. Ëbi quênên nauedacsho dacuêdenquo icquin isuan-isuanquin bêdambo icmioshi. Adsho isun: —Aton shubun icquidobêdta aid bêdamboen ista, Papa —quequin Nuquin Papa chianemi. ¹⁷ Aidêmbi nêmbi shubu dadpen icquid Doma caid yacno choboshon: —¿Mitsimbo Pabado icpec? —quequin yuen nibêmbenequin istuidpondashi. ¹⁸ Mimbi isnubi Epeso yacnoshon aidêmbidi baded-badedquien nashundeniondashi. Adsho tantiaquinc: —Nidaidên padpidec choshon Nuquin Ichon Onesipodo bêdamboen isdashun —caimbi.

2

Chieshtoenquo icquin chuiban, quiaid

¹ Chieshtoenquo icquin Esus chuibanta, mado. —Esuquidistun ëbi bédamboen isec. Aidën bédambo icmiac dayacquio icquin naimbi —qeshun chieshtoenquo icquin Esus chuibanta. ² Matses dadpeshun tantianuc ëmbi chuibansho mimbi tantiondac. Ëmbi aden chiondaid utsibotsen chuiban. Adshun mimbi chuiboedo abentse-abentsen chuita. —Nëidën chieshtoenquo icquin Esus chuibantsiash —qeshun: —Mimbitsen chuiban —cata, mado. ³ Sondado bédambo icquidën nachimboen chieshtoenquo icquin bédamboen nabanuna. Matsesën chieshënuubi Esuquidistun chiapadomboenuidi nanuna chieshtoenquo icquin. ⁴ Sondadon: —Mibi bédambo iquec —camenuen aton chuiquid dapan chiapadomboenuidi naquid. Ambi tantiaid nainquo icquinc utsibon chiapadomboen nainquo icquinc caquin aton chuiquid dapan chiapadomboenuidi naquidquio sondado nec. Adomboembidi Nuquin Icbon chiapadomboenuidi nanuna, mado. ⁵ Ma nuquin matses titinquequidquio. ¿Mitsipadquio icpec? Aton uidën tanec aton matsesën chiaction abia titinquec chosho: —Bédamboec titinquiosh —qeshun mauete menequid. Ambi chiaction titinquibi icsho mauete menenquo icquid. Adembidi: —Mimbi bédamboen nao —Nuquin Icho camenuen ambi chiapadomboen chieshtoenquo icquin nabanuna, mado. ⁶ Ma nuquin matses tied uaquidquio. ¿Mitsipadquio icpec? Choadquidënquo dayacquio icquin aton tied uashun ambi nitsinaid pequid. Adembidi Esus chuibanquid icquin dayacquio icquin Esus chuiban-chuibanuna ënenquo icquin. Adoac utsibon Esus tantiabentsiash. ⁷ Aden ëmbi chuiboed tantiata. Adsho Nuquin Icbon mibi bédamboen tantiametsiash.

Esuquidistu tantiata, quiaid

⁸ Utsibon chieshënuubi Esus tantiata, mado. Aidi matsesash isadaidbo tsusedpa Dabidën tsyuecquid nepanëdash. Nuquin Papan uincumenëdaidquio yec abn iquec. Aidquo tantiaquota. Aid chuibenëquidquio nebi. ⁹ Aden chuisho chieshënuubin bedshun icsambo icquid uidën uacimboen shocosh nacnenaidën mëtanac mëyadebi. ¿Ëbi aden uidën uacimboenda Nuquin Papan chiaid uidën uapadic? Padenquo. Ëmbi chuibenetiapimbo icnuc Nuquin Papan chiaid chuibanquido utsibon adembidi chuibenendac. ¹⁰ Adnubi: —Aden Nuquin Papan ambi tantiatedi Esuquidistu tantiamendac. Aid tantiaquido unësacsho cuidenquo icquin abëdi tabadmendac —quec chieshtoenquo iccobi quënën nauedonda yequi. ¹¹ Naden abimbo chiaidquido tantiash chieshtoenquo iccobi. —Abi bunaid ënshun Nuquin Icbon chiapadomboen naquid chieshëmënuquidën unës uacsho Nuquin Icbon abi yacno abëdi tabadmendac. ¹² Utsibon chieshënaqui chieshtoenquo icquin Esus tantiec unësash abi yacno nidendac. Nidacsho chuiquid icmiac utsibo namendac. “Esus tantiatiapimbo iquebi,” quequidobic: “Ëmbi tantiacmaido neque. Nëid nuquibëdi tabadmenquien ictiad, Papa,” quequin Esusën Nuquin Papa chiendac. ¹³ Aden abi tantiesabon ambi chiaid niac-niacsho isun Nuquin Icho Esusën ambi chiapadomboen naquidquio icquin icsaido cuidendac. Adembidi ambi chiapadomboen abi tantiaquido bédambo icmendac —quequin chiaid tantiashun ambi chiapadomboen naquin Esusën naid chuibanuna chieshtoenquo icquin.

Nuquin Papan chiaid isbanta, quiaid

¹⁴ Ëmbi dada uaquin chuiboed mibëd icquido naden chuibanta, mado. —Nuquin Icbon nuqui isnubi Esusquo chienquo yec ambembi chiaid chiec mibi chushcananqueque. Adenda. Adec chushcanansho tantiash matses icsambo yaneeque. Padi —cata, mado. ¹⁵ —Mibi bédambo iquec —Nuquin Papa camenuen bédamboen nata. —Dacuëdtiapimbo iquebique. Ëmbi naid ma Nuquin Papan isnu —qeshun adota. Ambi chiaid bédamboen isbanshun chieshtoenquo icquin Nuquin Papan chiaidquido chuibanta, mado. ¹⁶ Ambembi chiaid chuiquidobëd onquec tabadenda. Adec onquequido icsambo icboedi buëdanquec Nuquin Papan chiaid niac-niaquec icsamboshë yaneeque. ¹⁷ Tosho bedacimboec adquidën chiaid tantiaquido dadpen yaneeque. Adquidën chuisho tantienda. Aden chuiquid Imeneyo caid nec. Adquidbidi Pideto caid nec. ¹⁸ Aidon Nuquin Papan chiaidquido chienquo icquin muaquin chiec. —Esus tantiaquido unësabi icquido nëbimbobi uincuenacimboec icpec. Unësacsho aton dada chuca uaquin uincumenquo iquendac —quequin muaquin chuisho tantiashun utsibon Nuquin Icbon chiaid tantienquo yanac. ¹⁹ Aidon Esus tantiabien icchitash. Nuquin Papan Esus tantiamiac ënenquo icquin Esus tantiatsempanëdash. Padnuc Esus tantiaquidombo dadpen iquec. Adquido chuiquid

ambi dada uamepampicpadomboen: “ ‘Ēbi tantiaquidombo nec,’ quequin Nuquin Icbon tantiec.” Adnuc Esus tantiaquidēn: —Con Icho Esus nec —queshun ambi icsamboen naid ēnendac.

²⁰ Esus tantiaquido nadquio iquec. Shubu dapan tsitsan tabēcaid tabadac bimboecquid nec. Tsitsan abentse-abentsec icsactsēcquio icnubi utsi-utsiec bēdambo iquec. Icsactsēcquidēn icsa secanun sandoquid yendac. Bēdambo icquidēn di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquio yec Esus tantiaquidquio icnubi utsi-utsiec abi icsaid ēnabi: —Esus tantianu —quetsēcquid iquec. ²¹ Esus tantiaquidquio ictiadquio yec: —Muaid chuisho tantiatipimbo icquin nēbi Nuquin Icbon chiapadomboen natiadquio iquebi —quiash Nuquin Icbon yuambo yantsiash. Adsho Nuquin Icbon bēdamboen nametsiash.

²² Caniabon mēmunenquio icquin abi bunacpadomboen naquid tanenda, mado. Adenquio yec bēdamboec tabadte bunquiota. Nuquin Papan chiaid niacte bunenquio yec: —Nuquin Icho Esus nec —quequidobēdan chieshtoenuio icquin Esus tantia. Matsesentantiec bēdamboec isanec bēdamboec tabadta. ²³ Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiape? —cac chienda. Adquidēn chuisho tantias matses chushcananondashe. Aidēn chiac chienda. ²⁴ Nuquin Papan chiaid chuibanquid chushcananenuio icquid nendac. Chieshēmēnenquio icquin aton matses bēdamboen isquid nendac. Adembidi nēshēnenquio icquin Nuquin Papan chiaid tantiamequid nendac. Utsibon chieshēnaqui chieshēnanenuio icquid nendac. ²⁵ Esus tantiesabon: —Mimbi Nuquin Papan chiaid chuisho tantiatipimbo iquebi —cac adembi nēshenquio icquin Nuquin Papan chiaidquio chuibanendac. —Nuquin Papan ambi chiaidquio tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac. ²⁶ —Aden Nuquin Papan ambi chiaidquio tantiamiac Esus tantienquio icboedēmbi Esus tantiabenshun abi yuaquidēn Satanasēn namiaid ēnendac. Aden Nuquin Papan chiapadomboen naindac —queshun chieshtoenuio icquin Nuquin Papan chiaidquio chuibanendac abi chuibanquidēn.

3

Icsambo icquido iquendac, quiaid

¹ Tantia, mado. Mibi chuinu. Esus padpidec choabi icnuc matses dadpenquioshē icsamboshē iquendac. ² Nadquido iquendac. Nēdic utsi tantiatipimbo yec abiuidsēqui datantiadquido. Nēdic piucquid bedte comapenec bunquidombo. Nēdic: —Is. Ēmbimbo naiduidi bēdambo iqueque —quequido. Nēdic utsibo chieshēnec icsamboec onquequido. Nēdic amēn chiaid niac-niacquido. Nēdic anin chiaid niac-niacquido. Nēdic aton na nashunaqui nashumēnenquio icquido. Nēdic Nuquin Papan chiaid niac-niacquidombo. ³ Nēdic aton matses tantiesabo. Nēdic chiesh bēdanesabo. Nēdic muuanquido. Nēdic abi icsate bunaid ēnenquio icquido. Nēdic cuesanquido. Nēdic bēdambo icquid chieshēnquido. ⁴ Nēdic bēdambo icquid damianquiashic cuesunianquido. Nēdic bēdamboen tantienquio yec badedi icsa uanquido. Nēdic: —Ēbiuidtsēqui bēdambo iquec —quec abibi tantiadquido. Nēdic ambi naiduidi bunquin Nuquin Papa tantiesabo. ⁵ Nēdic: —Nuquin Papa tantiaquid nebi —quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadenda —caimbi.

⁶ Adquidon mibi yacnoshon shubu utsin shubu utsinquien isben-isbenac caosh. Adash chidoidquio icnubi shubun pudedshun ambembi chiaid chuibanac caosh. Aden chuisho tantiashun: —Padi —catiadquidi chidon: —Mimbi chiaid tantianu —quequin badedquio tantiac caosh. Nuquin Papan chiaid niacash adecbidi icsate bunquieq tabadac caosh aid chidobo. ⁷ Aden icsambo icquidēn ambembi chuidenesho tantianeshun Nuquin Papan chiaidquio tantiatipimbo icpac caosh aid chidobo. ⁸⁻⁹ Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquio chuisho tantiashun aidon: —Mue nec. Ēmbimbo comapenen tantiaquin ismenu —queboedombi bēdiactsēc tantiaquin sacnenuidpampic. Adsho isun: —Abimbo cainquio iccosh. Muachitosh —capampic matsēsēn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo iquec. Adembidi aidon muaquin chuisho tantiashun matses dadpenshun: —Muequi nec —capendac.

Nuquin Papan chiaid isbanec bēdamboec tabadte

¹⁰ Ēbien muaquidpenquio nec. Ēmbi naid ma mimbi tantieyoc. —Ma Esus tantianu —quequin Esusēn naid chuibanec bēdamboec tabadondabi. Esus tantiaquidquio icquin matses tantiaquin Esusēn naid chuibeniondambi. Chieshēnaqui chieshtoenuio icquin adembi

chuiবেনiondambi. ¹¹ Ęmbi aden chuibansho isun chieshēnondashi. Shubu dadpen icquid Antioquiya caid yacnoshon ēbi: —Cuesnu —casha Nuquin Icbon nac padenquio icpondash. Adshumbic shubu dadpen icquid utsi Iconio caid yacnoshontsen adembiđi. Adshobini shubu dadpen icquid utsi Disteda caid yacnoshonquio bedshun cuēnoten se-sequin unēs uatsempondash. Adsho Nuquin Icbon nac unēsenuo iccondabi. ¹² Ębipadquido Esus tantiaquidotedi bēdamboec tabadtiadquio icsho adembiđi utsibon comapenen chieshēnendac. ¹³ Padnuen chieshēmēnquidobēđ bēdambo icquid damianquieć muaquido bēđiactśēć ic-sambo icboedi mauuananquieć buēđanquieć icśamboshē yanendac.

¹⁴ Mibi adquidpenquio nec, mado. —Ęmbi isondaidon bēdambo icquidon abimbo chuibanonđashi —queć Nuquin Papan chiaid niaquenquio yec bēdamboec tabadta, mado. ¹⁵ Ęnden bacuēmpi icquin Nuquin Papan chiaidquio min matsesēn chuibansho mimbi tantianēđac. Adshun: —Aton Mado Esus tantiaquid unēsacsho abēđi Nuquin Papan tabadmendac —quequin mimbi tantiabēđac. Aden Nuquin Papan bēdamboen iste tantiametemo Nuquin Papan chiaid nendac. ¹⁶ Nuquin Papan chiaid aton Mayanēn tantiamiac matsesēn dada uapampic. Aidēn chiaid abitedimbo bēđamboshē iqueć. Aid isec onquequin: —Nuquin Papan chiacpadec bēdamboec tabadnuna. Esus tantiaquido yec icśainquien ictiad —quequin abi chuibanquidēn chuibanec. Adembiđi: —Esus tantiaquido adesa. Padi. Bēdamboembien natiad —quequin chuibanec. ¹⁷ Nuquin Papan: —Ęmbi chiaidquio tantiaşhun Esus tantiaquinc matses nashunquinc caic Esus tantiaquido ma bēdamboec tabadnu —quequin ambi chiaidquio dada uamepampic.

4

Nuquin Papan chiaid chuisho tantienquio yaid

¹ Nuquin Papabēđtan Esuquidistun mibi isequē. Bēdamboen nata. Esusēn nidaidēn padpice choshon abitedishun Icbombo icquin unēsaido uincuemiaido unēsabi icquidobēđta chiendac. —Nēid ēbi tantiaquid ebēđi tabadmembī. Nēid ēbi tantiesā cuidembī —quequin chiendac. ² Aidēn chiacpadomboen naquin Nuquin Papan chiaidquio chuibanta, mado. Matsesēn tantiatiadquio icnuc adota. Tantiatiapimbo icnubi adembi chuibanta. Esus tantiaquido icśasho isun: —Esus tantiaquido adesambo neque. Bēdamboembien natiad —quequin nēishēmēnenquio icquin chuita, mado. Utsibo bēdamboec tabadsho: —Mibi bēdamboec tabadoc. Aduidequi tabadta —quequin chieshtoenuo icquin chuita. Bēđiactśēć tantiatśēćquido: —Esus tantiaquidon nadoquid —quequin chuibanta, mado. ³ —Yuecshun Nuquin Papan chiaidquio matses dāpeshun tantiatiapimbo iquendac —qeshun nata, mado. Aden tantiatiapimbo icquidēn Nuquin Papan chiaidpenquio chuisho tantiaş: —Mimbi ēbi bunaidquio chuisho tantianu. Ębi chieć cho —quequin muaquid utsi-utsien abi yacno puduedmendac. ⁴ Pamumēđacimbocquin Nuquin Papan chiaid tantienquio icquin tsusedpabon ambembi chīampiduidi tantienđac. ⁵ Aidēn nacpadomboen nainda, mado. Nuquin Papan chiaidquio bēdamboen tantiaquid yec bēdamboec tabadta. Adsho utsibon chieshēnaqui chieshtoenuo icquin Esusquio tantiata, mado. Adembiđi Nuquin Papan bēdamboen iste Esus tantiesabo chuibanta. —Esus chuibanquidēn nadoquid —caidtedi nabanta, mado.

⁶ —Ębi unēs uan ēmbi nacpadomboen: “Adota,” mibi caquid nibēđtsiaş —qeshun mibi aden chieć nebi. Nēbi Nuquin Papan tantiacpadēn chieshēmēnquidon ēbi unēs uaic. ⁷ Utsibon chieshēnubi ēnenquio icquin Esusēn naid chuibeniombi. —Ębi bunaid bednu —queć comapeneć titinguicimbocquin nuquin Nuquin Papan chiaidtedi naombi. Chieshtoenuo icquin Esus tantiaquidquio nebi. Adshobini nēbi unēs uaic. ⁸ Unēs uacshobini matsesēn naid abitedimbo tantiaquidēn Nuquin Icbon: —Ębi tantiaquin ēmbi chiacpadomboenuidi naic mibi bēdambo iccoque. Nuquin Papa yacno ebēđi tabadmequin mibi bēđamboshē icmendambi —cainđac. Abi chote ushēn choshon aden Nuquin Icbon ēbi chiendac. Adembiđi abi choshō iste bunquidotedi abi tantiaquido Nuquin Icbon abēđi tabadmendac.

Timoteyo: Cho, caid

⁹ Nēbimbobi ēbi isec cho, mado. ¹⁰ Utsibo nidanebon ebēntśēqui tsadebique. Demas caid aton na bedteuidi bunec ēbi nianec shubu dadpen icquid Tesadonica caid yacno nidosh. Quedesente caidic naidai utsi Cadasia caid yacno nidosh. Titobic naidai utsi Damasia caid yacno nidosh. Aidtedi nidanebon ¹¹ Ducas abēntśēqui ebēđ iqueć. Madcos bedbēntśēneć cho, mado. Ębēđtan aidēmbi nēshunquio Esus chuibantsiashe. ¹² Tiquico caid Epeso yacno mibi yacno nidmiombi. ¹³ Shubu dadpen icquid Todoas caid yacno Cadpo cuēmēđquidēn shubun con na niamēđacđonđashe. Con dashcute ēmbi dada uaidbēđta bedbēntśēneć cho, mado. —Abitedi buantiapimbo iquebi —qeshun nēish yua bitsi nacnenaiddada uaiduiditśēqui bēta.

¹⁴ Shocosh nacnenquidën Adecandedo caidën comapenen chieshëndashi. Aid Nuquin Papan cuidendac, mado. ¹⁵ Nuquin Papan chiaid ëmbi chuisho tantiatipimbo icquin icsamboen chuishunondashibique. Choquin aid isenda: –Ëbitsen icsamboen chuishunushe –qeshun. ¹⁶ Ënden tauamboen bedshun: –Quënën nauednu –cac cuidte chuiquid dapa ëmbentsëqui chuibampondambi. –¿Mitsipadosho isun ëbi bedo? Icsamboen nambo iccombi –capondambi. –Ëbëd icboedon dadpeshun: “Bëdambo icquid nec,” quequin ëmbi naid chuibanac ëbi quënën nauedquidon ëbi nidmetsiash –qeshun ëbëd icboedo: –Chie cho –caqui choenquio iccondash. Aden ëbi cacuidondaïdo tantiaquin: –Nuquin Papan aïdo cuidenquio icpashun –caimbi. ¹⁷ Nuquin Icbombini nianenquio iccondash. –Isadaïdpembo matses utsibo ma ëmbi naid chuibenenu –quequin cuesambo icmepondashi. Adondaïd icshobini chieshëmënquidon: –Cuesnu –cabededpondash. Nuquin Icbon nac aïd matsesën unës uainquio icpondashi. ¹⁸ Padpiden chieshëmënquidon ëbi caic: –Ma mëyanac chieshtoshon Esus tantienquio yanu –casha Nuquin Icbon nac chieshtoenquio ictsiabi. –Nuquin Icbombidi abi yacno ambi matses dadpen namiacno abëdi ëbi tabadmendac –qeshun: –“Nuquin Icho bëdamboshë iquec,” canuna ënenquio icquin –caimbi. ¹⁹ Mibi yacnocquido: –Mibi caic: “Unësquio iquec,” quiosh Pabado –quequin chuiban, mado. Nëidic Aquida caid. Nëidic aton chido Pidisida caid. Nëidic Onesipodo caid chedo. Aïtedi aden chuiban. ²⁰ Mimbi isondaïd Edasto caid shubu dadpen icquid Codinto yacno tëshëdondash ëbi chonoc. Utsibic Tëdopimo caid aton dada icsabudacsho shubu dadpen icquid Mideto caid yacno nianondambi. ²¹ Ue tsasi iquenuanquid taënushe. Baded cho, mado. Doma yacnocquido nëmbo icquidon: –“Timoteyo unësquio iquec,” quequin dada ua –caphi. Nëidic Eyobudo caid. Nëidic Pudente caid. Nëidic Dino caid. Nëidic Quëdaudia caid. Nëidic Esus tantiaquido nëmbo icquido utsibotedi. Aïtedi adosh. ²² –Nuquin Icho Esusën abëd icquin con mado bëdamboen ispashun –quequin mibi tantiembi. Padi. Aïtedi chuiquin dada uaombi, mado.

TITON ISTE

¹ Pabado nebi. Nuquin Papan chiacpaden chuibenequid nebi. Adembidi Esuquidistun, Èbi chuibeneta, caidbidi nebi. Aden chuibanac Nuquin Papan cuënaido Esuquidistu tantiadonequidquo ma icpanuna. Adquid iquec ma bédamboec tabadpanuna. ² Muesa Nuquin Papa nec. Adquid icquin, Èmbi ènden chiampicpadomboen ènenquiocquin Esuquidistu tantiaquido èbèdi tabadendac, quequin ma aidon tantiapnueshun adomboen chiaid chuiquidquo Esuquidistun icmiondashi. ³ Ambi tantiapicpadèn ambi chuiampid Esuquidistu tantiamenequin aidèn chuibeneta caid nebi.

⁴ Èmbi chuibanac Esuquidistu tantiaquid mibi yampondac, Tito. Adquid yanshun Esuquidistubèd icquid nebi, quequin èmbi tantiapaden mimbi tantiec. Aden tantiaquid con madobimboecquid mibi icsho ismenuequin dada uaimbique. Isec onqueta.

Esuquidistu tantiaquid icsho isash èbi icsaid cuidenquo yec Nuquin Papa bèpiscudac, quequin ma ènenquiocquin mimbi tantiapana. Adecbidi Nuquin Papabèd tabadendabi, quequin tantiapana, Tito.

Quideta yacno nidshun Titon natequid

⁵ Èmbi naudboed mimbi naimenu, quequin mibi Quideta yacno nianombi ma mimbi ambi tantiaid icsa chiac ma Quideta yacnocquidon èmpanuna. Adembidi, shubu dadpen icquid uano-uanoecquid yacno nidshun èmbi chiacpadomboen Esuquidistu tantiadonequid istuidshun Esuquidistu tantiaquid utsibo isbanquin bédamboen tabadmenuequin chuiquid icta, quequin adquiduidquo chuita, Tito. ⁶ Mimbi Esuquidistu tantiaquid utsibo isbanquin bédamboen tabadmequin chuiquid icta caid nadquo ictiad, Tito. Bédamboec tabadquid ictiad. Adecbidi chido abentsèc inquid ictiad. Aton bacuèbotedi Esuquidistu tantiaquidobidi ictiad. Adquidèn bacuèbo icquin bédamboec tabadquin aton papan chiaidbèdta aton titan chiaid chieshenquiocquin nabantiaid. ⁷ Aidi utsibèd bédamboec tabadquin, Nuquibi nanuna, qeshun utsibèd onquenquiocquin ambibi tantiapadomboenuidi nabanesa ictiad. Adecbidi badedquo nèishesa ictiad. Adecbidi paèmbocquid nua aquesa ictiad. Adecbidi cuesnante bunesa ictiad. Adecbidi muaquin bedesa ictiad. ⁸ Adecbidi Esuquidistu tantiaquid utsibo yuedquid ictiad. Adecbidi utsibobèd bédamboec tabadte bunquid ictiad. Adecbidi utsi bédamboec tabadsho tantias, Cuishon, quec tabadquid ictiad. Adecbidi bédamboen tantiaquin, Naden naic icsatsiabi, qeshun naisa ictiad. Adecbidi, Naden naic bédambocquid yantsiabi, qeshun adomboen naquidquo ictiad. Adecbidi abimbo chuiquidquo ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiacpadomboen nabanquid ictiad. Adquid nec, quequin utsibon chuisho tantiashun adquid Esuquidistu tantiaquid utsibo isbanquin bédamboen tabadmequin chuiquidquo icta, quequin chuita, Tito. ⁹ Aden utsibo isbanquin bédamboen tabadmenuequin chuiquid icta, cashun nèid aido chuita. Nuquin Papan chiaid chuca uainquiocquin bédamboen chuiban. Aden mimbi chuisho tantias ma utsibo bédamboec tabadpanuna. Adembidi Nuquin Papan chiaid chuca uaquidèn chuibansho Nuquin Papan chiacpadomboen abimbo chuiban. Aden mimbi chiac, Icsamboen chiombi, quetsias, quequin mimbi utsibo chuiquid icta caido chuoata, Tito.

¹⁰ Quidetabo nad iqueque. Chuinu. Tantia. Abi chuiquidèn chiacpaden naisa Quidetabo dadpen iquec. Abimbo chiosh, camenuequin abimbo chiacbimboec aido onquec. Dadpeshun isadaidbon nacpadomboen nanuequin, Shui dèbid dètemeta, quequin Quidetabon chiec. ¹¹ Adquidon shubu utsin-utsinquec puduedshun ambi tantiaid icsa chuibanac utsin-utsinquent tantias cuèshèdec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bédamboen chuibanquin ambi muaquin chiaid èmeta, Tito. ¹² Quidetabon matses ènden icnèdaid abentsècshun naden aton matses chuipanèdash. “Quidetabo muaic chuinanquidommo nec. Aben icquid yuatemaibimboec uimanèmènkuido nec. Chonoadenquiocquin nua peshun nua actenequido neoaic,” quequin Quidetabo ènden icnèdaidèn chuipanèdash. ¹³ Abimbo chuiquidènquo aden chuipanèdash. Aden chuipanèdash, quequin muaquin chuiquid ambi icsamboen tantiaid tantiamequin comapenen chuiban ma Esuquidistu abimbo tantiaquid adquid yampanueshun. ¹⁴ Aden mimbi chuibanac Esuquidistu tantiaquid yanash isadaidbon Nuquin Papan chiaid utsi uain chiampicpaden chuisho tantiasa ma icpanuna. Aden mimbi chuibanac abimbo chuiquidèn chiacbimboen niacquidon chuisho ma tantiasa icpanuna. ¹⁵ Nuquin Papan Esuquidistu tantiamiaidèn icbon chiaid bédamboen isoaic. Adomboembidi ambi uabanaid isec. Adash abitedi bédambo iquec, quec tsadec. Ambi tantiaid icsambocquid icnuc Esuquidistu tantienquiocquin, Nèid mishtemaid nec.

Nëid utsi petemaid nec. Nëid utsi actemaid nec, quequin chuibanquidën chiaid tantiec. Aden tantiec aton tantiate icsabudec, Icsaobi, quequin tantienquio iquec. ¹⁶ Nuquin Papa tantiembi, qeshumbic Nuquin Papan chiacpadomboen niacquin tantiesa nebi, quiachimboec tabadsho utsibon adquid isec. Nuquin Papan chiaid niacquid adquid nec. Nuquin Papan icsamboen isaidquio adquid neoaic. Naid bëda natiapimbo icquid neoaic, Tito.

2

Esuquidistu tantiec iccuededquido tantiametequid

¹ Icsateuidi bunquid icnubi mimbi Esuquidistu tantiaquido abi tantiadonequidquio icmenuequin chuibanquin tantieme. ² Mimbi paëmbocquid nua aquenquio icteniaccpadomboen Esuquidistu tantiaquid tsusiobo chuibanquin tantieme. Adembidi, Mibi bëdambocquid nec, utsibo camenu, quec bëdamboec tabadtenequin tsusiobo ismequin tantiemeoa. Adembidi, Naden naic icsatsiabi, qeshun mimbi nainquio yacpadomboen mimbi bëdamboen tantiaid aido chuibanquin tantiemeoa. Adembidi, Naden naic bëdambocquid yantsiabi, qeshun adomboembidi naquid nebi, quequin tsusiobo chuibanquin tantiemeoa. Adembidi mimbia Esuquidistu tantiadoniaccpadomboen pausunaid icquin ma adquiobidi tsusiobotsen yampanueshun tantiemequin chuibanta. Adembidi, Esuquidistu tantiec utsibobëd tantiananec mibi tabadteniaccpadomboen chuibanquin tantieme. Adecbidi, natiatequid iquendac, quequin Esuquidistu tantiesa uainquioquin abi choate mimbi caimbudaccpadomboen chuiquin tantiemeoata, Tito.

³ Adembidi, Esuquidistu tantiaquid ënden machoaido tantiamenuequin chuiban. Nuquin Papan bëdambocquid icmiaid nebi, quec bëdamboec mibi tabadteniaccpadomboen tantiemequin chuihoa. Adembidi, utsi icsamboen chuiquid iquenda, quequin chuibanquin tantiemeoa. Adembidi, mimbi paëmbocquid nua aquenquio yacpadomboen chuiquin tantiemeoa. Mimbi bëdamboen nabanaid nëbi machocuenaido ismequin tantieme, quequin ënden machoaido chui, Tito. ⁴ Aden chiac ënden machoaidon aton bënë aton bacuëbo chedobëd abi tabadaid tantiamenuequin nëbi machocuenaido bëdamboen ismepec. ⁵ Adembidi aidën bëdamboen tantiaquin, Naden naic icsatsiabi, qeshun nainquio iquec. Naden naic bëdambo ictsiabi, quequin naquid, quequin ënden machoaidon nëbi machocuenaido chuibanquin tantiemeoapec. Adembidi, Mibi inesa chudmenquio yec tabadta, quequin ënden machoaidon nëbi machocuenaido chuiquin tantiemeoapec. Adembidi, aton shubun tabadquin ambi nabanaccpadomboen ismequin aidon nëbi machocuenaido tantiemeoapec. Adembidi, utsibo bëdamboen tantiaquin ambi nashunaccpadomboen ismequin ënden machoaidon nëbi machocuenaido tantiemeoaic. Adembidi, aton bënë chiacpadomboen nabanquin nëbi machocuenaido ismequin tantiemeoaic. Aden ënden machoaidon abi ismiaccpadomboen nëbi machocuenaidon naic tabadsho isash, Nuquin Papan chiacpadomboen naic tabadec chidobo, quequin utsibon ispec.

⁶ Adembidi, caniabo chuibanquin tantieme, Tito. Naden naic icsatsiabi, quequin nainquio iquemi, quequin mimbi bëdamboen tantiaaccpadomboen caniabo tantiemequin chuihoa. Adembidi, Naden naic bëdambo mibi icpec, quequin mimbi bëdamboen tantiaaccpadomboen aido tantiemequin chuihoa. ⁷ Bëdamboec tabadaid tantiemequin ismenu, quec mibibi bëdamboec tabadteneta. Mibibi icsainquioquin ismequin tantieme. Adembidi mamënenquioquin bëdamboen chuiquin tantieme. ⁸ Adec mibibi bëdamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesa mibi chieshënuquid mibi icsamboen chuitiapimbo yec tabadendac.

⁹ Adembidi yuabo chuiquin, Bëdambo iquebi, min icbo camenuequin ambi chiaidtedi chieshenquioquin nabanta, quequin tantiameta, Tito. ¹⁰ Adembidi, min icbon na ampenquioquin bëdamboen dayun uaquin nashunquin min icbo ismeta, quequin yuabo tantieme. Aden Esuquidistu tanquin nabansho isun min icbo: Con yua Esuquidistu tantiaquid yec bëdamboshë yanac. Con yua bëdambo icmequidën chiaid tantianu, quendac icbo.

¹¹ Nuquin Papan matses abëd icmenuequin matses icsaid bedshuntequid Esuquidistu icmenuequin chomepanëdash. ¹² Aden chomiaccnidaidën tabadquin utsibo tantiaquin Nuquin Papan chiacpadomboen naquin ismiacc adomboembidi naic bëdamboec tabadquid. Nuquin Papan bëdamboen tantiamiac bëdamboen tantiasho, Aidën bëdambo icmiaid icquin naden naic bëdambo icpec, quequin naquid. Adembidi, Naden naic icsatsiabi, quequin nainquio icquin Nuquin Papan tantiamiacpadomboen naic nuqui tabadtenec. Adomboembidi Quidetabo Esuquidistu tantiaquido chuiquin tantieme, Tito. ¹³ Nuquin Papapadquid con Icbo Esuquidistu choaic, quequin caimbudec bëdamboec tabadebi, quequin chuiquin tantiemeoa. ¹⁴ Nuqui cainaid: Èmbi con utsibo caid ëbipadquid iquendac,

quiash nuqui icsaid bedshunash abided cuidadec unēspanēdash. Adacsho aid tanti-
 aoidquio yec bēdamboec tabadquid nec, quequin chuiquin tantiaime, Tito. ¹⁵ Ĕm̄bi chui-
 boedtedi chuibanquin tantiaime. Mimb̄ia tantiaquid icquin, Ĕm̄bi chiacpadomboen na-
 banec tabadteneta, quequin Quidetabo chuioata. Mimb̄i chiacpadomboen nainquiocsho
 isun cuembo chuioata. Adecbidi, utsibon mibi icsamboen chuitiapimbocnoc bēdamboec
 tabadteneta.

3

Utsi tantiaquin nabantequid

¹ Esuquidistu tantiaquidtedi bēpiscudmenquiocnuequin naden chuibanta, Tito. Min tsu-
 sibon bēdamboen chiaid naquimbi adembidi mibi chuiquid utsibon bēdamboen chiaid
 chieshenquiocquin naban. Adembidi, utsibo tantiaquin nashunta, quequin Quideta
 yacnoccquido chui. ² Adembidi, Utsi muaquin chienda, quequin chuioata. Adecbidi,
 Utsibobēd tantiananec bēdamboec tabad, quequin chuioa. Adembidi, Mimb̄i naiduidi
 tantienquiocquin nabanta, quequin chuioa.

³ Ĕnden Esuquidistu tantiesa nuqui iccondac. Adquid icquin Nuquin Papan chiacpadom-
 boen nainquio nuqui iccondac. Adquid icquin nuqui bunacpaden nabanec nuqui icsaded-
 icsadedondac. Utsibobēd icsamboec nuqui cuidnampnodac. Adembidi, utsin bēdamboen
 isaid icsho isash nuqui nēishpondnac. Adecbidi utsibobēd nēishash nuqui chushcanpnodac.
⁴ Adquid nuqui icncucs matses tantiec abēd icquid icmnuecn nuqui icsaid bedshunash
 abided cuidadec Esuquidistu chopanēdash. ⁵⁻⁶ Adecs choash cuidadsho isun Nuquin Papan
 Esuquidistu nuqui tantiamiac. Adoac abi tantiaquid icsho isun adquidtedi Esuquidistun
 aton Mayan meniac. Adoac, Bēdamboen nasho abi yacno tabadmendac, quenquio yec
 nuqui tabadec. Aidēncuio nuqui icsate bunaid tantiamequioquin nuqui ĕmecc. ⁷ Adecs
 aton Mayan nuquibēd icsho isun, Bēdamboccquid nec. Aidtedi ĕbēdi tabadendac, quequin
 Nuquin Papan tantiec. ⁸ Ĕm̄bi chuita, quequin chiaidtedi abimbo iquecc, Tito. Aden
 tantiaquin Quideta yacnoccquido chuiban Esuquidistu tantiaquid icquin ma adomboen
 nabanec bēdamboec tabadpanuna. Ĕm̄bi chiacpadomboen Esuquidistu tantiaquidtedishun
 nadenec utsibobēd bēdamboec tabadquid nec, quequin chuita.

⁹ Adecs tabadec min tsusedpabo chiecs utsibēd nēishnanash icsamboec onquenda, quequin
 Quidetabo chuita, Tito. Adembidi, aton tsusedpabon naden nata quequin chuinēdaid
 chuiquin chushcanu qesho adembidi adenda, cata. Aden chiaid Nuquin Papa yacno
 mibi puduedmetemaid nec, quequin chuita. ¹⁰ Adecs onquequin Esuquidistu tantiaquido
 cuēshēdmenuequin chuibanquid icsho bēdamboen tantiamenuequin chuiban. Aden chiaqui
 niacbidanquin adombobidi aidēn chuioasho tantiashun aidi comapenen chuibanquin
 tantiameoa. Aden chiaqui padpiden niacbidanquin adombobidi chuioasho tantiashun
 cacumeta, Tito. ¹¹ Adquid ambi icsamboen tantiacpadecuidi tabadquid neque. Adota.
 Mimb̄i chiaqui adecuidi tabadquid Nuquin Papa yacno nditapimbo yec abibi cuidadte-
 quid nendac.

Utsibo chuiquin chiaid

¹² Nēbi utsibo chuinu. Tantia. Adtemas Tiquico chedo ĕbēdi iquecc. Abentsēqui Quideta
 yacno nidmembi. Aid mibi yacno choambien mimb̄i tantiamedonequin chuibanquin
 naimbudnu quiash Nicopodis yacno nidoata, Tito. Ue dapa sequenuc Nicopodis yacno
 tabadnu, quianec nidendabi. ¹³ Matses icsasho cuidte chuiquid, Senas mibi isbidanec
 Apodosbēd udi nidecs. Aid daēdi mibi yacno chosho yued. Nidnu, qesho aton na nibēdsho
 isun menequin bēdamboen nidme. ¹⁴ Peshun acnu, quequin Esuquidistu tantiaquidēn
 chonoadquin nabanquid. Utsi nashunquin adombobidi nabanec tabadquid. Aden
 nabanec tabadsho isash utsibo Esuquidistu tantiaquidquibodi yanendac.

¹⁵ Mibi tantiec tabadebi, quequin Tito chuita, ĕbēd icquidon cacpadomboen dada uaimbi.
 Adembidi mibēd icquido Esuquidistu tantiaquido tantiec ĕbēd icquido tabadoaic.

Esuquidistun, Bēdambo iqueebi, camiaido ma mibitedi icpanuna. Padi. Aidted chiombi,
 Tito.

PIDEMONËN ISTE

¹ Pabado nebi. Esuquidistun ëbi chuibeneta cac chuibansho quënën nauedaid nebi. Ëbëdi Timoteyo iquec. Aidi Esuquidistu tantiaquid icsho nuqui con utsi caid nec.

Ëbi yuedquid Esuquidistu chuibanquidquio mibi neque. Ëmbi dada uaid isec onqueta, Pidemon. ² Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondadon matses icsambocsho cacumiacobimboen Esuquidistu tantiaquid icsamenuequiv cacumequid Adquipo nec. Aido min shubun Esuquidistu tantieci iccuededquido iqueque. Ëmbi dada uaid bedash isec onquequin aido chuiota, Pidemon. ³ Esuquidistu tantiaquido icsho Nuquin Papan ëbi icsaid cuidenquiocquin ambi bëdambo icmebanaid nebi, quequin mibitedishun ma tantiapanuna. Adecbidi, Nuquin Papabëd icquido nebi, quequin ambi tantiamiaidquio ma icanuna.

Nuquin Papa chiec onquiaid

⁴⁻⁵ Pidemon Nuquin Icho tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantias, Pidemon tantieci bëdambo iquebi, Papa, quequin Nuquin Papa chiec onquebudebi, Pidemon. ⁶ Aden mibi tantiaquin Pidemon ambi tantiaid Esuquidistu chuibanquid icme. Aden aidën chuibansho mibi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiapanuna, Papa, quequin Nuquin Papa chiec onquebudebi.

⁷ Aden ëmbi Nuquin Papa chuibudacpadomboen mibi naic. Pidemonën Esuquidistu tantiaquid utsibo tantiaquin nashunec, qesho tantias bëdambo iquebi, Pidemon.

Onesimo tantiaquin chuidoniaid

⁸ Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mibi nashunacpadomboen ëmbi nidmiaidtsen bëdamboen tantiaquin nashunta, quequin mibi chuitiadquio icquimbi padenquio iquembi. ⁹ Tantaranquid nuquibi icquin aden chienquio iquembi. Tsusio budobi. Adquid icquin Esuquidistu chuibansho padpiden quënën nauedoshi. ¹⁰ Quënën nauedaid icquin ëmbi Esuquidistu chuibanac abi tantiaquidbidi Onesimo yanosh. Adquid yansho ëmbi con mado caid nec. Adquid yanash ¿Onesimo mibi yacno nidacsho ada ëbi bëdamboen tantiaquin mibi nashunondacpaden aidi bëdamboen tantiaquin nashunoatsia? Pidemon. ¹¹ Ënden min yua icquin mibi chiacpadomboen mibi nashunenquio iccondaidëmbi nebi Esuquidistu tantiaquid yanshumbini nëshunquio bëdamboen nashunec. Mibi yacno nidshun adomboembidi Onesimon mibi nashunoaindac.

¹² Aidi mibi yacno nidmeoaimbi. Con dayunquio icquid nidmenu, quiash aid tantieci unësqiuo tsadebi, Pidemon. ¹³ Esuquidistu chuibansho quënën nauedshun tataniac caputiapimbocsho mibi ëbi nashuntiapimbo iquec. Adec mibi nashumëntiapimbocnobi Onesimombini nashunosh, qeshun nidmetiapimbocquimbi mibi yacno nidmembini. ¹⁴ Onesimo ëbëdi tabadmenuequin chuita, mibi catiapimbo iquebi. Mimbibi aden chiac bëdambo ictsiash. ¹⁵ Yuecash cuëshëdenquio yec Pidemombëd Onesimo tabadoaindac, quequin Nuquin Papan tantiondacadquid mibi yacnoësh cuenëdaid mibi yacno nidash Onesimo tabadtsiash. ¹⁶ Onesimo min yua iccondaid Esuquidistu tantiaquid yansho mibi con utsi caid aidi nendac. Ëbëd icquin natiapimbocsho aidën nashunec. Mibi yacno nidshun mibi chuisho Esuquidistu tantiaquid icquin chieshenquiocquin bëdamboen mibi nashunendac.

¹⁷ Pabado ëbëd isedanquid nec, qeshun mibi ëbi yuedondacpaden Onesimo yuedta, Pidemon. ¹⁸ Con na utsibëdtabi con na bedtequid Onesimon bedaccondash, quequin mibi chiacnedi mibi meneoaimbi. ¹⁹ Aidtedi meneoaimbi, quequin ëmbibi dada uaimbique. Isec onquequin tantiaquiota. Ëmbi Esuquidistu chuibanac abi tantiaquid yanshun Onesimon bedaidtedi daëd uaquin ëbi nashunquin cuidtiadquidi mibi nec, Pidemon. ²⁰ ¿Aden ëbi nashunuequinda mibi Onesimo ëbibimboecsho bëdamboen tantiaquin nashumpatsia? Aden mibi aid nashunuc bëdambo ictsiabi. ²¹ Ëmbi chiacnedi daëd uaquin mibi natsiac, quequin tantieci tsadebi, Pidemon.

²² Nëidtsen chinu. Tantia. Ëmbi tantienquiocnoc Pabado chonoshe qeshun abi ushondaid nacneneshun nacnenta, Pidemon. Mibi ëbi tantieci Nuquin Papa chiec onquiacpadomboen badedquio Nuquin Papan mibëd icmepashuni.

Utsibo chinu quiaid

²³ Esuquidistu tantiaquid utsibo ëbëdi iquec. Aidon chiaid chuinu. Tantia. Epapadas, abembi ëbëd icnuec quënën nauedadondaidën: Mibëd icquidotedi tantiec tsadebi, quequin Pidemon chuita, cac adomboen dada uaimbi, Pidemon. ²⁴ Madcos yec Adistadico yec Demas yec Ducas yec quec ëbëd icquido iquec. Aidombidi: Mibëd icquido tantiec tabadebi, quequin Pidemon chuita, cac dada uaoaimbi. Aidedishun ëmbi Esuquidistu chuibanacpadomboen chuibanoaquido nec.

²⁵ Nuquin Icbo Esuquidistun mibitedi bëdambocquid icmebanacpadquiec ma tabadoapana, Pidemon.

Padi. Aidedtada uombique. Isec onqueta.

EBEYON ISADAIDBON ISTE

Abi yacnoshon ambi uaidon Icbombo Esuquidistu nendac

¹ Ĕndenquimboshē Nuquin Papan ěmbi chiacpadomboen chuibanta cac adomboembidi abēd icquido tsusedpabon chuibanoapampic. Abentsēc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuecquiocshon ambi chiaid utsitsen tsusedpa utsitsen chuimeoapampic. Adembidi ambi abi yacnoshon uaid mayan bēda budmiac aidēn chiacpadomboen tsusedpabon chuioapampic. Adembidi nadatiambocquin uabanquin ismequin chiac adomboembidi chuioapampic. ² Nēbi tsyuecquio Nuquin Papan chiacpadomboen abipadquiocquidēmbi aton Madon chuibanec. Aidi Nuquin Papan ambi uaido con icbo camiaidquio nec. Nidaid abubēda uashun aidēnquiocquidtedi aton Papabēdan uabanampidquio aton Madombo nec. ³ Aidi, aton Papa bēdaidquio yampidpadquidquioibidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubēd aidēnquiocquidtedi adquiuoidi iquec. Aidi aton Papan chiaid niaquesambo yec matses icsaid bedshunash abided cuidadec unēsash, Ĕmbi bēdamboquid icmebanaid matses nendac, quequin tantiashic abuc nidoash Nuquin Papabēd tabadoapanēdash aidquioibi. ⁴ Ad icnuc ambi abi yacnoshon uaido abipadquid nibēdec. Aidon con Icbombo caidquio nec. ⁵ ĴAmbi abi yacnoshon uaid mayan bēda isec:

“Con mado mibi nec.

Ĕbi min papa nendac, quepecta Nuquin Papa iquec? Padenquio.

Adecbidi:

ĴNēidēn Papa nebi.

Adecbidi: Con mado nec, quepecta Nuquin Papa iquec aido caic? Padenquio.”

⁶ Abēd Abiambo Yampidi nidaidēn tabdash choasho isun Nuquin Papan ismequin:

“Nēid con Madombo Abentsēqui nec. Aidquio tantiec con Icho nec, quec cuishon quec, ambi naid chiec cuēdēn, cac aden ambi abi yacnoshon uaido mayan bēdabo chuibanec cuēdēncuededendac.”

⁷ Ambi abi yacnoshon uaido mayan bēdabo naden Nuquin Papan chiec:

“Ĕmbi chiacpadequi cunquequid yanec.

Adecbidi, ěmbi chiacpadequi cuēte nēdēnquedote iquendac.”

⁸ Padnuen ambi uacmaid abipadquid aton Madombo utsi uatiapimbo iquec. Adquidquio icsho Nuquin Papan naden chiec:

“Ĕnenquiocquin ěbēdan Chuiquid Abentsēcquio mibi iquendac.

Adecbidi namequid bēdaidquio mibi iquendac.

⁹ Ĕbipadquid iquec bēdamboec tabadquin nabante bunquidquio mibi nec. Adquid yec icsamboec tabadquin nabante bunesambobidi mibi nec.

Adquid yec ěbi yacpadquidquio Icho Abentsēcquioibi mibi nec. Mibēd icquido adquid nibēdec.

Mibi abentsēqui adquidquio iquec. Adquid iquec, Bēdambo iquebi, quec mibi cuishon quendac.”

¹⁰ Adembidi Nuquin Papan naden aton Mado chuioaic,

“Tauamboen nidaid abubēda uashun aidēnquiocquidtedi mimbi uabampampic.

Aidtedishun icbombo mibi nec.

¹¹⁻¹² Aidtedi ěnēdendac.

Mibien nibēdantiapimbo yec abi tabadendac.

Aidtedi dashcute shēnibudaid niacbimboen chuca uaindac.

Mibien Abiambo Yampid yec abi ěnēdesa mibi iquendac.

¹³ Nēbi cainec ěbēdquio tabadec cho.

Mibi chieshēnquidtedi nibēdquio icmenun nabono. Chiata,”

quequin Nuquin Papan chiampic. ĴAmbi abi yacnoshon uaido mayan bēda aden chuipampidta nepadic? Padenquio. Esuquidistu aden chuipampic. ¹⁴ Ambi abi yacnoshon uaido mayan bēdabo Nuquin Papan, Ĕbēd tabadtequidombo nashunta, caido nec.

2

Ambi chiaid tantiesa icchitomane, queshun tantiadonequiota caid

¹ Adec abitedishun Icbombo aton Mado icnuc ambi chiaid chieshēnchitomane queshun tantiadonequieq tabadnuna. ² Ĕndenquimboshē ambi, Naden nata, quequin chiaid ambi abi

yacnoshon uaido mayan bédabo chuimiapadomboenuidi naisa icsho isun Nuquin Papan cuidpampic. ¿Aden éndenquimboshê ambi chiaid chieshênquid ambi cuidpampicpaden ³ nêbi icquidtsen ambi chiaid chieshênsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded cuidpanêdash. Adoac, Êbi yacno Yuedanquid nebi, quequin aton Madonquio Esusêmba chiambic adomboembidi abi tantiaquidontsen chuiopondashi. Aden Esusên chiaid tantiaquidon chuibanubien, ⁴ Êmbi chiaidquio chuibanoapec, quequin ismenuequin aton Mayanên Nuquin Papabêd icquidên tantiamebanacpadomboen nadatiambocquin utsi-utsien bédamebanquinc, mayan icsa dapudued-mequinc, unêsaid uincuemquinc caquin adquidên-adquidênquien nabededpanêdash.

Matses icnu quiash Esuquidistu matsespanêdash

⁵ Adembidi chuinu. Tantiata. Abi yacno Esuquidistu tantiaquido choash tabadsho isun, Nêido êbi yacnoshon êmbi uaido mayan bédabo mibi chuiquid nec, quenquio Nuquin Papa iquendac. ⁶ Éndenquimbo aden tantiaquin dada uaquin naden Nuquin Papa chiec Dabid pado onquepampic:

“Tantiaquiono. Êbi chui, Papa. ¿Atotsieshun matses mimbi uaid pistêcquio icsho mimbi comapenen tantiatequid aido icpec? Papa.

Adembidi, ¿Atotsieshun Adanên tsyuecquido mimbi nashumpe? Papa.

⁷ Nêbi chuitan mimbi cac mibi yacnoshon uaid mayan bédan adomboembidi chuioc matsesên nabanec.

Yuecquiocshon mibipadquid matses mimbi icmendac.

⁸ Adquid icmeshun mimbi uaidtedishun icbombobidi aid mimbi icmendac,”

quequin abimbo chiampid nec. Nêbi abitedishun icho matses mimbi icmiambo iquec.

⁹ Utsien Nuquin Papapadquidquio yequi matsesun Nuquin Papan tantiamiapaden ambi abi yacnoshon uaido mayan bédabon chiac nabamboedi nêbi aton Papabêd tsadec abitedishun Icbombo yanac. Aidi Nuquin Papan chiapadomboen nanuec nidaidênshun tishac matsesash matses tantiec matses icsaid bedshunash abided cuidadec unêsash abitedishun Icbombo yampanêdash.

¹⁰ Nuquin Papa abitedi uaquidquio icnuc ambi tantiapadec iquec. Adquid icquin ambi, Matses icsaisa icmeshun con bacuê icmembali, quequin tantiapaden êbi yacno abi tantiaquid yuedquid con Madombo iquendac, quequin ambi chiampicpadquiequi aton Mado matsespanêdash. Aidi matses yec natiamianquiequi icsaisa yec unêsash uincuenash bêtucanec abi yacno dectatonepanêdash ma Nuquin Papan, Matses con bacuê icmembali, quequin tantiaido êbi tsibanec dectatonepanu quiash. ¹¹ Matses bédambo icmequid Esuquidistun Papa ambi bédambo icmebantequidon Papabidi nendac. Aton Papa Abentsêqui icnuc Esuquidistu Nuquin Papa yacno choash, Con utsibo nec, quependac ¹² aton Papa chiec:

“Mibi chuiquin con utsibo tantiamenu, Papa.

Aidobêd tabadquimbi mibi chuinu. Tanti, Papa, quependac.”

¹³ Adembidi chuioc:

“Mibi tantiaquin mimbi chiampicpadomboen nabanash choaobi, Papa.

Êbi tsibantequid mimbi bédaidquio icmiaidquio bêec choaobi, quequin mibi chiendambi, Papa,”

quequin matsesabi yec abuc tabadquin Esuquidistun chuiampic.

¹⁴ Matses namibêd intacchoquid yec unêstequid icsho mênchicquid icnu quiash Esuquidistu matsesash unêstequid yampanêdash. Ma matses mayan icsan dacuêdmequin dêcatemêntiapimbo yampanu quiash matsesash unêstequid yampanêdash ¹⁵ ma mayan icsan ambi dacuêdmiaido ambi yuaido icboedi matses êmbi mênchictequid ma icpanuna. ¹⁶ Êmbi uaido mayan bédabo unêstequid icsho mênchicnu, quenquio yec matsesash Esuquidistu unêspanêdash. Abadauanên tsyuecquido mênchicnu, quiash matsespanêdash. ¹⁷ Aden ambi chiapaden nanuec matsespadquid yampanêdash. Adec matsesash matses nênacpadquieq nêmpanêdash. Abi bundoacpadquieq bundopanêdash. Abi natiacpadquieq natiatequid icpanêdash. Mayan icsan icsamenuequin tanaidbidi icpanêdash. Matses yanash icsaisa yec matses icsaid bedshunash abided cuidadec unêspanêdash matses Nuquin Papan bédamboen istequid icmenuec. Adecbidi, Matses icsaisa yanabi yec chuibanec Nuquin Papabêd onquetiapimbo iquec, quec matses chuibanec Nuquin Papabêd aidi onquec. ¹⁸ Matsesacsho mayan icsan: Nuquin Papan chiaid niacmenu, quequin tanac niaquesa Esus icpanêdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe êbi dayacquio icmec cho, cac badedquio choquin chieshesa nuqui icmendac.

3

Abi yacno yuedanquidquo icquin Moises dēniacquid Esuquidistu

¹ Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ēbi chuibeneta, cashumbic adembidi ambi matses chuibanec ēbēd onquequid dapa icoata caid Esuquidistu nec, quequin aidquio tantiaquionona. ² Nuquin Papan chiacpadomboen chieshenquioicquin naquido Nuquin Papan shubun icquido abi tantiaquido iquendac, quequin Moisesēn chuided-chuidedampicpaden Esuquidistun adomboembidi chuibampanēdash. ³ Aidi Abiambo Yampid yec, Ēbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic. ⁴ Nēitded con shubun ēbēdi tabadendac, quequid shubu icho nec. Aden Nuquin Papan chiacpadomboen aton shubun icquido bēdamboquid icmequid Esuquidistu nec. ⁵ Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuīta, cacpadomboen chuiquid Moises icpampic. ⁶ Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepanēdash. Aidēn shubun icquid nebi, qeshun chieshenquioicquin cainquidquio aton shubun icquidquio nuqui nendac.

Chieshenda

⁷ Aton shubun tabadnuequid naden Nuquin Papan Mayanēn ambi chiaid mibi bēdamboen tantiamenuen chieque. Tantiata:

“Nēbimbobi Nuquin Papan chiaid chieshēnenquio yec tabadta.

⁸ Equipito yacnoēsh cuēte nibēdacno capuquin tsusedpabon, ¿Nuquibēdida Nuquin Papa iqueque? Tantiabono, qeshun ambi chiaid chieshēmpampicpaden chieshēnenda.

⁹ Cuēte nibēdacno seta 40ted matamec capucuenquin tsusedpabon Nuquin Papan nadati-ambocquin naded-nadedsho isquimbi

¿Ambi chiaid niacshoda Nuquin Papan ēbi cuidpeba?

Isbono, quiacpadquieic tsusedpabo icsamboec tabadpampic.

¹⁰ Adec tabadsho isash nēishpondabi.

Ēmbi chiaid chieshēnec ambibi tantiacpadequi icsadenepampic.

¹¹ Adquid icsho isun chushcain: Ēmbi abitedi uabanquin nainash

ēbi tabadacno aidtedi puduedmenquio iquembi, quequin chiacpadomboen naindambi. Abimbo caimbi,”

quequin Nuquin Papan isadaidbo chiampid nec.

¹² Abiambo Yampid Nuquin Papa abi iquec, quequin tantiash cuēshēdchitomane qeshun tantiadonequiota. ¹³ Nuquin Papan chiacpadquieic tabadnuna, quec badiadquidēn-badiadquidēnquieic chuinanec onqueta ma adoac icsamianquidēn chiac Nuquin Papan chiaid chieshēnenquioapanuna. ¹⁴ Esusbēd icquid nebi, quiondacpaden tantiadenequin caimbudec aton matses yec Esus yacno nidanetequidquio mibi nendac. ¹⁵ Nuquin Papan chiampid utsitsen chuīnu. Tantiata:

“Nēbimbobi Nuquin Papan chiaid tantesa uampicpaden tantesa uainda.”

¹⁶ ¿Tsuntsin Nuquin Papan chiaid tantiashun chieshēmpampic? ¿Equipito yacnoshon bēyucanquin Moisesēn buanaido Nuquin Papan chiaid tantiash chieshquido yanenuquioda icpampic? ¹⁷ ¿Tsutsibidi seta 40ted matamec chiesho isash Nuquin Papa aidtedbidi seta matamec nēishted-nēishtedpampic? Adoac ¿Cuēte nibēdacnoēsh icsaquidtedi unēshbudnenuquioda icpampic? ¹⁸ ¿Abitedi uabanquin nainash ēbi tabadacno puduedmenquio iquembi, quequin tsutsi Nuquin Papan chuipampic? ¿Ambi chiaid chieshēnquid Nuquin Papan chienquioda icpampic? ¹⁹ Ai, tsusedpabon Nuquin Papan chiaid tantiash, Bēdambo iqueque. Adonona, queboedombi, Nuqui nabocpadomboen nanuna, quequin ambi chiaid chieshēnsho Nuquin Papan abi yacno puduedmetiapimbo icpampic.

4

Ēbi yacno puduedash ēbēd tabadtequid quiaid

¹ Ēbi yacno puduedash ēbēd tabadtequid iquendac, quequin Nuquin Papan chiampicpadomboen nēbimbobi chuioaique. Ēbi yacno abēdi ictiapimbo icchitomane quequin Esuquidistu tantiadonequionona. ² Ēbi yacno puduedash tabadtequid iquendac, quequin ēndenquimboshē Nuquin Papan nuquin tsusedpabo chiampicpadomboen nēbi nuqui chuioaic. Aden ēndenquimbo chuīsho tantiash, Nuquin Papan chiaid abimbo iquec, quīash tantienquio yanash, Aid cainu, quetiapimbo tsusedpabo utsi-utsiec yampampic. ³ Ambī chiaid tantiaquidomboen nēbi aidbēdi tabadec.

“Ënden yampidon tantienquiocsho isash, Abitedi uabanquin nainash ëbi tabadacno choti-
apimbo aido iquendac,”

quequin chushcaquin Nuquin Papan aden chuipampic. Tauamboec ambi tantiacpadom-
boen abitedi uabanquin nainash Nuquin Papa quenenash tabadpampic. ⁴ Abi tabadaid
chuiquin Nuquin Papan naden dada uamiampique. Tantia: “Seistedec ushquin abitedi
uabanash nuquid utsin ënash tabadpobi.” ⁵ Ashumbic nadentsen dada uamiampic:

“Ëbi ënash tabadacno ëmbi chiaid chieshënquido chotiapimbo iquendac,”
quequin chuipampic.

⁶ Aden chuimiatic ëndenquimboshë ambi chiaid tantiesa icquin niac-niacquec Nuquin
Papabëd tabadtiapimbo icpampid icnubi ambi chiacpadomboen naquin cainpampidobëd
nëbi nidaid utsi-utsiec icquido Nuquin Papabëd tabadtequid nendac. ⁷ Ambi tantiacpadën
Nuquin Papan chuimiapaden Dabid padon:

“Icsachitomane qeshun Nuquin Papan chiaid tantiaquiota,”

quequin dada uapampic. ⁸ Chuiquid dapa Dabid tishambocnoc Equipito yacnoësh nidaid
Canan yacno abi chuiquid dapa Osuebëd isadaidbo cho-chopampic. Capuec ënëdash nidaid
Canan yacno cho-choash isadaidbo ënëdenquio yec tabadte icnuc, Ëbi yacno ënëdenquio
yec tabadte iquendac, quequin Canan yacno choash tabadquidon tsyuecquid Dabid pado
Nuquin Papan chuimenquio ictsenampic. ⁹ Aden Dabid pado chuimiatic tantias
abi tantiadonequidombo Nuquin Papabëd tabadquido nendac. ¹⁰ Aden uabanquin nainash
Nuquin Papa tabadacpadec ambi bëdambo icmenuequin tantiactedi nabanquin nainash
aidbëdi tabadendac. ¹¹ Nuquin Papabëd tabadnuequin ambi tantiacpadec icnuen nainu,
qeshun Esuquidistu tantiaquionona. Nuquin Papan chiaid tantiesa yanash tsusedpabo
puduedenquiocpampicpadec icmane qeshun adonona.

¹² Nuquin Papan chiaid ambia chuipampidquido abi iquec. Nadatiambocquin tantiamete
ambi chiaid nec. Shocosh siante abiuc daëdi cuënumbocquidën siaid uguëduc sënquin
nami icsaid isendac. Adomboembidi Nuquin Papan chiaid chiac papuedequin matsesën
tantiaidtedi uguëduc sënaid isacimbocnoc abi icsaid tantiamendac. Ambi, Naden na-
nuna, quequin chiabi yaidtedi abi bunquin ambi chiabi yaidtedibidi matses tantiamequin
naden: Mimbidi tantiaid icsa nëid icnubi mimbidi tantiaid utsi bëdambo iquec. Adecbidi,
mibi bunaid icsa nëid icnubi mibi bunaid utsi bëdambo iquec, quequin tantiamebanshun
mimbidi tantiaid icsa mibi bunaid icsabëdtabi ënta, quequin Nuquin Papan chiaidënuquio
mibi tantiamendac. ¹³ Abitedi isquidquido Nuquin Papa nec. Adquid icquin matses
ompodtiapimbo noc isendac. Adembidi, Ëmbi chiacpadomboenda matsesën nabanoshe.
Tantianu, qeshun, abi yacno tabadnuequin cainquido bëisquiquin ambi nabanaidtedi
chuimendac.

Matses chuibanec Nuquin Papabëd onquequid dapa Esuquidistu

¹⁴ Adec Nuquin Papa abitedi isquidquido icnubi icsambocquid icquin ambembi matsesën
aid chuitiapimbochsho isun abi tantiaquido chuibanec Nuquin Papabëd onquequid dapa
ënden abi yacno dectatonëdaid Esuquidistu nec. Aidi Nuquin Papan Madombo nec,
quequin tantiesa yanchitomane qeshun aidquido tantiaquionona. ¹⁵ Matses chuibanec
Nuquin Papabëd onquequid dapa matses yequi natiamacmaidbimboec tsadpondash,
quetiapimbo nuqui iquec. Matsesacsho mayan icsan, Nuquin Papan chiaid niacmenu,
cac niaquenquio Esuquidistun icpanëdash. ¹⁶ Adquid nuqui chuibanec Nuquin Papabëd
onquequid dapa iquec, quequin tantiec dacuëdenquio yec abi yacno ënden Esuquidistubëd
puduedquidëmbimboen Nuquin Papa ëmbitsen chuinuna. Icsashun Nuquin Papa chiac,
Con mado Esus mibi icsaid bedshunash abided cuidadpanëdash, quequin tantiec mibi
icsaid bëpiscudobi, quequin mibi tantiamec. Adembidi mibi natiamiaid abi chuisho Nuquin
Papan Mayanën mibi chieshmenquiocquid dayacquio icmendac.

5

¹ Ëndenquimbo Nuquin Papan, Min matses chuibanec ëbëd onquequid dapa icta, caid
isadaidbo utsi-utsiec icpampic. Adquid Nuquin Papan icmiac, Con matses icsapash icnu,
qeshun nidaidën capuquid yua cuesunedenequin taudienepampic. Adembidi, Mibi
bëdambo iquec, Papa, quequin ismequin, Nëid menenu, cac Nuquin Papan naden nata
cain chiacpadomboen naquin aton matsesën bëaïdo cuesuneshun taudienepampic. ² Aton
matses chuibanec Nuquin Papabëd onquequid dapan aton matses icsasho isun, Con mat-
sesbëdi icsaquid nebi, quequin ³ nidaidën capuquid yua utsi-utsien cuesunedenepampic.

⁴ Aidi, Con matses chuibanec Nuquin Papabëd onquequid dapa icnu, quenquio icpampic.
Nuquin Papambi, Min matses chuibanec ëbëd onquequid dapa icta, caid nepampic. Min
matses chuibanec ëbëd onquequid dapa icta, Nuquin Papan abia caid Adon cuëmëquid
icpampic. Aidi unësan abi tsibanquid-abi tsibanquidquien Nuquin Papan, Min matses

chuiбанec ëbëd onquequid dapa icta, caid icpampic. ⁵ Adembidi Nuquin Papan, Matses chuiбанec ëbëd onquequid dapa icta, caid Esuquidistu iquec. Èbibi adquid icnu, quenquico Esuquidistu icpanëdash. Aton Papambien:

“Mibi con Madombo neque.

Con shubun icquido mimbi icmiaido chuiбанec ëbëd onquequid dapa icta,”

capampic aton Papan Esuquidistu chuiquin. Adembidi Esuquidistu chuiquin aton Papan:

“Matsesash icsaisa yec min utsibo icsaid bedshunash cuidadec unësash uincuenash matses chuiбанec ëbëd onquequid dapa icta,”

capampic. ⁶ Ambi chiaid utsi nad icpampic:

“Matses chuiбанec ëbëd onquequid dapa Medquisedec yampidpadquid mibi nendac.

Adquid yec ënëdenquicoquidquid mibi nendac.”

⁷ Adec, Con Pan chiampicpadquid icnu, quish matsesacsho unës uaquin mëyante nendabi, quequin tantiec shubiec nadpanëdash. Matses icsaid bedshunash cuidadquid ëbi icmenda, quetiapimbo iquebi, Papa. Matses icsaid bedshunash cuidadquid iquendabi. Mimbi chiapadomboen natiadquico iquebi, Papa, quequin yuen chuidonepanëdash Esuquidistu. Aden abi chuisho aton Papan adquidquico icmepanëdash. ⁸ Nuquin Papan Madombo iquequi matsesacsho mëyanac Nuquin Papan chiapadomboen tantiabempanëdash. ⁹ Aden tantiabenash matses icsaid bedshunash abided cuidadash Nuquin Papa yacno Yuedanquid yanquopanëdash. ¹⁰ Adoacsho isun, Nëbi matses chuiбанec ëbëd onquequid dapa Medquisedecpadquid icta, cain Nuquin Papan Esus chuiпampic.

Nuquin Papan chiaid ënden tantiaboedi tantiesa yanenda

¹¹ Ambia matses chuiбанec Nuquin Papabëd onquequid dapa Medquisedec nepampic. Aid chuiquin tantiamete dadpen iquec. Aidedi chuitiadquicoquin mibi eme uacsho ¿mit-sipadomboentsimbi chuiбанquin mibi tantiamete? ¹² Mibia utsin tantiamiaid icquin ënden tantiabempatecnëdan mibedishun. Adembidi mimbi abia tantiaid utsibo tantiamepatecnëdan. Bacuën shuma chishquin tantiapaden tantiaquid icquin Nuquin Papan chiaid tantiatipimbo mimbi icpec. ¹³ Shuma chishquid bacuëmpi, Bëdamboen nata, quequin chiaid tantiesa nec. ¹⁴ Pete pequidëmbien, Nadomboen nata, quequin ismiac adomboembidi isbanec mëquiadquidën icsa uainquicoquin nabanec. Adomboembidi Nuquin Papan chiaid tantiamiac tantiabenquidquico yanshun adomboen nabanenec. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, qeshun nainquicoquid.

6

¹ Aden Esus chuiquin abia tantiamiaid bëdamboen tantiashun abipadquid icnequin abi chuiquin tantiamiaid utsi tantiaquionona. Abia tantiamiaid nad iqueque. Tanta. Chuinu. Esus tantiaquid icta. Adquid icquin icsaid ënta. Adembidi, Nuquin Papan chiaid tantiaquidquico icta. ² Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menenuequin mëdanten mamishaid icta. Adembidi, Abi tantiaquid unësash uincuenta iquec, quequin tantiaquidquico icta. Adembidi, Abi tantiesa cuidtequid iquendac, quequin tantiec bëdamboec tabadteneta. ³ Aidedi mimbi tantiec. Aidedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. ⁴ Aden Esuquidistu tantiasho isun aton Mayan Nuquin Papan meniaid icboedi ⁵ Nuquin Papan chiapadomboen nadatiambocquin nabamboed, ⁶ Esus matsesquico yec icsamboquid nepanëdash, quish, Esus cuستن dectan, quequidbimboecquid icsho Nuquin Papan aid isendac. Aidën oncain Esus mamëshunec. Aden Esus tantienquico yanacsho bëdamboen tantiamenuen chuiquin, Icsaobique. Èbi icsaid ënu, cametiapimbo Nuquin Papan iquendac.

⁷ Baded-badedquic ue sequequin nidaid pachi uaidën tiedën caniquid caniacsho taneshcaquidën petequid nendac. Adecbidi Esuquidistu chuiбанec abi tantiaquiosho Icbon yuedaido iquendac. ⁸ Echobëd cana shëta chedo ëshë idash dadpen yanushë qeshun nëdëncatequid nendac. Adecbidi icsamboen chiaid tantiaquid uquë nësiatequid nendac.

⁹ Aden mibi chuiquimbï, Nuquin Papan nësiatemaïd mibi nec, quequin tantiembï. Esuquidistu tantiaquid yec abi tantiaquid utsibobëd tantiananec bëdamboec tabadquin ismequid nec, quequin mibi chuiquin utsibon chioshi. ¹⁰ Adoac abi tantiaquid utsibo tantiaquin mimbi nashundeniaid Nuquin Papan bëpiscudenquicoquin tantiec. ¹¹ Adecbidi utsibobëd tantiananec mibi bëdamboec tabadpashun. Adec tabadash abi yacno puduedsho, Bëdamboen mimbi nabanoc, Nuquin Papan mibi caïdac. ¹² Aden nabanec chieshenquicoquin Nuquin Papan chiaid tantiaquicoquin tsusedpabomba caïmbudec unësash Nuquin

Papa yacno puduedampicpadec Esuquidistu tantiaquioquin ënenquiocquin caimbudequima Nuquin Papa yacno puduedpanuna.

Naden nanu quec Nuquin Papa muatiapimbo iquec

¹³ Ëndenquimboshë Abadauan bëdamboec tabadsho isun ambia tantiaquidquio abi yampidquibidi icquin, Ëmbibi tantiacpadomboen nanuna. Abimbo caimbi, quequin Nuquin Papan naden chuipampic: ¹⁴ “Mimbi tishmiaidën tsyuecquido dadpen iquendac, queshun ëmbi chiacpadomboen nabanquin mibi, Bëdambo iquebi, camembi,” quequin Nuquin Papan Abadauan chuipampic. ¹⁵ Aden chuisho tantiaashun caimbudquin tishtiapimbocquidëmbi Abadauanën chidon aton mado tishpampic.

¹⁶ Abimbo caimbi, quequin abitedi tantiaquidënuquo Nuquin Papan chiac utsi, Muenec, quetiapimbo iquendac. ¹⁷ Adembidi, Ëbi yacno tabadte iquendac, quequin ënden yampidën Nuquin Papan chiaid chuca uatiapimbo iquebi, quequin Esuquidistu tantiaquido tantiamenuen abimbo caimbi, quequin chuipanëdash. ¹⁸ Adec Nuquin Papa muatiapimbo icquin ambi chiacpadomboen naquidquio Nuquin Papa nec. Adembidi, Ëbi yacno tabadte iquec, quequin chiaid chuca uatiapimbo iquec. Adquid Nuquin Papa icnuc abi yacno ëbi puduedmequid Esus iquec, quequin caimbudquid nuqui nendac. ¹⁹ Aden caimbudquin, Ënden Nuquin Papa yacno puduedshun ëbi yuedquid iquec, quequin nuqui tantiec. ²⁰ Nuqui caintequid Esuquidistu ënden Nuquin Papa yacno bëyucanec abi tantiaquido chuibanec Nuquin Papabëd onquenuc puduedash Medquisedecpadquid yampanëdash.

7

Medquisedec matses chuibanec Nuquin Papabëd onquequid dapa

¹ Medquisedec nad icpampic, Saden yacnocquido chuiquid dapa nepampic. Ambi Saden cain cuënaidi yuecshun Edusaden cain cuënoapampic. Aiddidi Nuquin Papan, Matses chuibanec ëbëd onquequid dapa icta, caid nepampic. Adquid icquin aton mado bedboedo tsibanshun cuesuniash Abadauan chosho bëquedshun, Nuquin Papan bëdamboen isaidquio mibi nec, quequin Medquisedequën Abadauan chuipampic. ² Adsho tantiaash, Nuquin Papan con mado bedmiaid nebi, quequin ambi cuesuneboedën na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanën menepampic. Bëdamboen tabadmequid icsho Medquisedec cuëmpampic. Adembidi, Saden yacnocquido chuiquid dapa icquin bëdamboen tabadmequid icsho Medquisedec cuëmpampic. ³ Aidi aton papabëd aton tita nibëdquid nec. Nëid ushën tishaid nebi, quetiapimbo aid iquec. Abi unëste ushë adquibidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabëd onquequid dapa yanash adquiduidquio iquec. Utsi yantiapimbo iquec.

⁴ Aidi ëbi chuibanec Nuquin Papabëd onquequid dapa nec, quequin ismequin ambi bedaid aton na musuctanquin Abadauanën Medquisedec menepampic. ⁵ Yuecquioschon Nuquin Papan: Min matses chuibanec ëbëd onquequid dapa icta, caid mibi icquin min utsibon aton na musucaid bedshunta, quequin Debi chuipampic. Adoac adquid Debi icash unësan aton tsyuecquid abentse-abentsec icpampic. Debi Abadauanën tsyuecquid yec aton utsibonquio aton na musucaid bedquid icpampic. ⁶ Medquisedequëmbien tsyuecquidpenquio icquimbi Debin tsusedpa Abadauanën na musucaid bedshun, Nuquin Papan bëdamboen isaidquio mibi nec, quequin Abadauan chuipampic. ⁷ Bëdambo mibi icmenu, quequin Nuquin Papan chiaid ambia chuiquid Medquisedec icpampic. ⁸ Yuecshun ambia chuibanec Nuquin Papabëd onquequid dapapadquiocquin aton matsesën na musucaid bedquid Debi unëspampic. Adembidi aton tsyuecquido unëspampic. Padnuen Abadauanën na musucaid bedquid Medquisedec unësesa yampampic. ⁹ Adquid icsho Debin buchisio Abadauan caidën, Con tsyuecquid dadpen iquendac, quequin tantiaquin, Con na musucshun menenu, queshun Medquisedec menepampic. ¹⁰ Aton tsyuecquid tishambocnobi Debin buchisio Abadauan caidën Medquisedec bëqueduidshun menepampic.

Medquisedec yampidpadquid Esuquidistu

¹¹ Abadauanën tsyuecquido Debipadquidon Nuquin Papan nadomboen nata quequin chiaid nadenequin aton matses bëdamboquid icmian Medquisedecpadquid choenquio ictsempampic. ¹² Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabëd onquequid dapa yampanëdash. Debipadquidën Nuquin Papan nadomboen nata cain ëndenquimbo chiaid nadenepampic. Nëbi Nuquin Papan chiaid utsi naquid Medquisedecpadquid Esuquidistu nec. ¹³ Aidpadquid icquin Nuquin Papa nidaidën tabadte shubu uashunaidën puduedshun nambocpanëdash. ¹⁴ Aton tita Uda cuëmëdquidën tsyuecquid icnuc matsesash Udan

tsyuecquid Nuquin Icho Esuquidistu nec. Adquid icquin Debipadquidēn nadeniampic-paden natiapimbo Esuquidistu icpanēdash. Adembidi ambi tantiaiduidi chiec Moises, Udan tsyuecquid Debipadquid nec, quenquo icpampic. ¹⁵ Medquisedecpadquid matses chuibanec Nuquin Papabēd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec. ¹⁶ Aton matses chuibanec Nuquin Papabēd onquequid Debi unēsān Debin tsyuecquid aton matses chuibanec Nuquin Papabēd onquequid icpampic. Adquidpenquo Esuquidistu yampanēdash. Matsesash icsaisa yec unēsash uincuepanēdash. Adec uincuenquid yec unēstiapimbo iquec matses chuibanec Nuquin Papabēd onquequid dapa yanquiopanēdash. ¹⁷ Aid chuiquin Nuquin Papan nadopampic: “Ēnenquiocquin matses chuibanec Nuquin Papabēd onquequid dapa Medquisedecpadquid mibi nendac,” quequin chuiampic.

¹⁸ Aden chiambien matses chuibanec Nuquin Papabēd onquequid dapa Debipadquidon Nuquin Papa nidaidēn tabadte shubu uashunaidēn puduedshun ėnden nadomboen nata cain chiacpadomboen nadenequin aton matses icsaisa icmetiapimbo icpampic. ¹⁹ Adoaid Nuquin Papa yacno puduedtemaid matses icpampic. Nēbien bēyucanec puduedash Nuquin Papa yacno abi tantiaquido chuibanec Nuquin Papabēd onquec tabadec, quequin abi yacno yuedte caimbudec nidaidēn Nuquin Papabēd tabadachimboec nuqui tabadec.

²⁰ Abimbo caimbi. ¿Matses chuibanec Nuquin Papabēd onquenu quec puduedquid ėnēdenquiocnoc mibi icmendambi, Mado, quenquioda Nuquin Papa icpampic? Ai, aden chuiampic. Aden Debi chienquiocquin aton madouidsēqui chuiampic. Debi unēsān aton tsyuecquid aton matses chuibanec Nuquin Papabēd onquequid dapa icpampic. ²¹ Nēbi Nuquin Papan aton Madombo caic:

“Icho icquin matses chuibanec ėbi chiec puduedoata, mado, quequin abimbo chiemi. Aden chuiquin chuca uainquo iquemi.

Ēndenquo yampid yec ėbi yacno utsi puduedmenush ėbi chiec puduedash ėnēdenquo yec tabadquid mibi nec, quequin abimbo chiemi,”

quequin chiampicpadec aton Madombo adquid yanquiopanēdash. ²² Adquid yec matses icsaid bedshunash abided cuidadash abi tantiaquido yuedec bēyucanquid Esuquidistu nec. Debibēd aton tsyuecquid adecbidi adquid ictiapimbo iquec.

²³ Debi adecbidi aton tsyuecquido unēstequidquo iquec yuen chuibanec Nuquin Papabēd onquequid dapa ictiapimbo iquec. ²⁴ Esusien abi yacno chuibanec bēyucanec puduedash ėnēdenquo yec Nuquin Papabēd onquequid dapa nendac. Adquid utsi nibēdendac. ²⁵ Adec Nuquin Papa yacno ėnēdenquo yec tabadquin abi tantiaquido chuibanec aton Papabēd onquedenenec abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

²⁶ Adec aidi abi yacno yuedanquid, icsa nibēdquid, icsa uatiapimbocquid, icsa nibēdquiec yacno tabadquid yec abi tantiaquido chuibanec Nuquin Papabēd onquequid dapa yampanēdash. ²⁷ Debipadquidpenquo yec, Matses icsaquid neque. Nuquin Papa chiampicpaden baded-badedquien nidaidēn capuquid yua cuesunenu, quenquo icpanēdash Esuquidistu. Matses icsaid bedshunash abided unēsapanēdash padpidec unēsenuquo icnush. ²⁸ Debibēdi abipadquid icsaquid icsho, Min matses chuibanec Nuquin Papabēd onquequid dapa aid icmeta, Nuquin Papan cac Moisesēn Debi adquid icmepampic. Nēbi Medquisedecpadquidien Bēdamboquid icpampid ėbēd onquec ėbi yacno Puduedquid Abentsēcquiobi mibi iquendac. Abimbo caimbi, quequin Nuquin Papan chiampidquo Esuquidistu nendac.

8

Matses chuibanec Nuquin Papabēd onquec abi yacno puduedquid

¹⁻² Adec Esuquidistu abi tantiaquido chuibanec Nuquin Papabēd onquequid dapa Nuquin Papa tabadacnombobi puduedoash aton Papa Abiambo Yampidbēdquid onquec tabadec. Debipadquidono aton matses chuibanec nidaidēnshun Nuquin Papa tabadte shubu uashunaidēn puduedash auēshquid Nuquin Papabēd onquepanēdash.

³ Con matsesbēdi icsaposh icmanendac, qeshun aid shubun puduednu qeshun umanuchshun nidaidēn capuquid yua aidon cuesunepampic. Adembidi Nuquin Papa tantiaquin menenequin aton matsesēn bē-bēaid bedshun nadenepampic. Esusien Nuquin Papa yacno puduedoanush, Ēbi icsaid ėbibi cuidadnu, quenquo yec matses icsaid bedshunash abided cuidadpanēdash. ⁴ Aidi unēsabi yec nidaidēn tabadnuc Moisesēn chiacpadec Debipadquid matses chuibanec Nuquin Papa chiec onquequid icpanēdash. Adquid icnuc nidaidēnuēsh matses chuibanec Nuquin Papabēd onquequid dapa ictiapimbo Esuquidistu icpanēdash. ⁵ Nidaidēn tabadquin Nuquin Papa tabadte shubu

uashunaidën puduedshun Debipadquidën nashumpampic. Ëndenquimbo Nuquin Papan shubu naden icchitec, quequin abi tabadte shubu uanu, qesho tantiaashun: “Macuësh yacnoshon chuibocpadomboen shubu uame,” Nuquin Papan cac Moisesën chuiopampic. Aden chiac Nuquin Papa tabadte shubu uashumpampic. ⁶ Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabêd onquec puduedpanêdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabêd onquec abi yacnombo yuedanquid ictiapimbo icpampic. Esuquidistuen Nuquin Papabêd abia yampid bëyucanec abi yacnombo nidoash abi tantiaquido chuibanec Nuquin Papabêd onquequid yec yuedanquidquo nec.

⁷ Ëndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquio ictsempañêdash. ⁸ Nadomboen nata caqui ambi chiacpadomboen nadenequi matses icsaisa yantiapimbo icsho isash:

“Yuecash ëmbi chiaid utsi iquendac.

Aid isadaidbo chiendambi. Aidbidi Udán tsyuecquido chiendambi.

⁹ Aidën tsusedpabo Equipito yacnoshon bëyucamequin

ëmbi chiacpadpenquiocnoc chiaid utsi iquendac.

Ëmbi abia naden nata cain chiaid Isadaidbon chieshënsho

utsibon natiacquin mëyansho isun isadaidbo mënchicamboccondambi.

¹⁰ Ënden chiaid adquio icnuc:

Nëbi ëbêd tabadmetequid chiaid nendac, quequin isadaidbo chiembi.

Ëmbi nadomboen nata cain chiaid isadaidbo pausunendambi tantiate bunquionoc.

Aden tantiamash aton Papa iquendabi.

Adecbidi adquidquio con matses iquendac.

¹¹ Adoaid Nuquin Papa tantiaquid icta, qesa iquendac.

Abitedi ëbi tantiaquidquio iquendac.

Nëitdedishun ëbi tantiendac:

Nëdic, bacuëbo; nëdic, caniabo; nëdic, tsusiobo aitededshun.

¹² Aido icsaidtedi padpiden tantienquio yec bëpiscudendabi,”

quequin Nuquin Papan chiaid utsi nendac. ¹³ Chiaid utsi nec, quequin ënden abia nadomboen nata cain chiaid ënêdendac.

9

Nuquin Papa tabadte shubu uashunaidën puduedshun naid

¹ Nuquin Papan ambi, Ëbi ismequin nadomboen nata cain chiaid dadpen dada uameshun isadaidbo menepampic. Nuquin Papan naden ëbi tabadte shubu uashun cacpadomboen abi nidaidën tabadte shubu uashumpampic. ² Nuquin Papa tabadte shubu uashunaid nitsinaid anquënë uaid daëd icpampic. Baded-badedquiec puduedte anquënë uaidën tabote dectantebêd pan sante cueste nacnenaic icpampic. Icsaisa anquënë uaid nec caid niosh. ³ Aid nuntambidi bitsipamocquid daëdcashun dectanêdaid shëcuë anquënë uaid dayun uequid Isaisa Bêdaidquio cain chianiaidquio niosh. ⁴ Aid nuntan bêdambo noadquid sandoshon tauite shocosh icpampic. Ambobidi cueste dabitacaid shocosh icpampic. Aid cuesten sauedaid mana caid isadaidbon piampid dayun uaid icpampic. Aid sauedaid utsi Adonën cueste tiaid dëyucanec icpampic. Aid sauedaid utsi cuënote pada uashun Nuquin Papan nadomboen nata quequin dada uaid icpampic. ⁵ Aid sauedte matincash tabadquid ambi abi yacnoshon uaid mayan bêdamocquidbimboecnuc nacnenaic daëd icpampic. Aid daëd Nuquin Papa icsaisambo bëchomauanquiec nac-nacquio ismiantequid icpampic. Nidaidën capuquid cuesuniaidën intac daseccaid isun Nuquin Papan matses cuidenquioctsiash, quequin aidën podon dëcatequin dectanaid diadpampic. Aid Icsaisa Bêdaidquio anquënë uaid sanaidtedi chiombi.

⁶ Aden shubu uashun aidën icquidtedi nambanash icsaisa anquënë uaidën baded-badedquiec puduedquidon Nuquin Papan Moises chiacpadomboen uesquin nabampampic. ⁷ Padnuen Isaisa Bêdaidquio anquënë uaidën setan-setanquiec matses chuibanec Nuquin Papabêd onquequid dapa puduedpampic. Baded-badedquiec puduedtemaid aid nec. Ëmbi con matsesbêdtañ Nuquin Papan chiaid niacposh icmanendac, quequin nidaidën capuquid yua cuesuneshun intac bedshun buanec nuntan bitsipamocnoc daëdcashun dectanêdaid shëcuë anquënë uaid dayun uequid Icsaisa Bêdaidquio caidën puduedquid abentsëqui nepanêdash. Unësaidën intac buanenquio yec puduedtemaid aid anquënë uaid nec. ⁸ Adec aid anquënë uaidën puduedquid isadaidbo abentsëqui icnubi Nuquin Papa yacno aton matses puduedte nibêdec, quequin Nuquin Papan Mayanën tantiamete nendac. ⁹ Adembidi, baded-badedquien nidaidën capuquid yua cuesunedenec, Ëbibi bêdamocquid

nec, quetiapimbo icpampic. Adembidi aton matses icsaisa icmetiapimbo icoapampic. ¹⁰ Adecbidi, Nēidic petequid nec. Nēidic actequid nec. Nēid nanush mēpamēdtequid nec, quequin chiacpadomboen nabanquin icsaisa icmeternaibidi nendac. quequin Nuquin Papan Mayanēn nuqui tantiamec.

Esuquidistu abided unēsac intac chiuidaid

¹¹ Ambi chiaid utsi tantiamenuec ambi uacmaid yec abipadquid Esuquidistu Nuquin Papabēd tabadboedi nidaidēn budash matsesash icsaisa yec matses icsaid bedshunash abided cuidadec unēsash Nuquin Papa yacno matses chuibanec aton Papabēd onquequin chuiquid dapa iquec abi yacno Yuedanquid yampanēdash. ¹² Nidaidēn capuquid yua cuesuneshun intac bedshun buanec Nuquin Papa yacno puduedenquo Esuquidistu icpanēdash. Aidi abia yampidi icsaisa matses icsaid bedshunash abided cuidadec unēsasho cudan siac aton intac chiuidash Nuquin Papa yacnombo puduedoapanēdash. ¹³ Aidi matses icsaid bedshunash abided cuidadabincuc nidaidēnshun natemaid nasho matses cušhēdmepanēdash. Adoac utsibēd ictiapimbochso yua nidaidēn capuquid yua cuesuneshun aidēn intacbēdta sisapuc daēd uashun daseccac icsaisa icmiabi yequi aton shubun puduedoapanēdash. ¹⁴ Abia abēd yampid unēsasa aton Mayambēd iquec Esuquidistu icsaisambo yec, Matses icsaid bedshunash ēbided cuidadebi, Papa, quianec unēsasho siac aton intac chiuidacsho isun uincuemaidēn nuqui pauquec ma Nuquin Papan chiacpadomboen nate bunquidquo nuqui icpaneshun. ¹⁵ Adoaidi Nuquin Papan chiaid utsi chuiquin tantiamequid Esuquidistu icpanēdash. Ēnden matses yampid icsaidbēdtabi nēbi matses icsaid bedshunash abided cuidadec unēsapanēdash ēbi tantiaquido ēbēdi tabadmenu quiaish.

¹⁶ Adnubien abi unēste tantiec, Ēbi unēsān ēmbi chiacpadomboen con na abitedi menebanta, matses quepec. Aden chuiquid unēsō isun ambi chiacpadomboen menebanec.

¹⁷ Aden chuiquid unēsabi icnuc ambi chiacpadomboen utsibon menetiapimbo iquec. Icbon na abi iquec. Aid unēsān aidēn na icboedi utsin na yanec. ¹⁸ Adembidi ambi nadomboen nata cain chiaid Moises menequin, Ēmbi chiaidtedi nadenesho isun ēmbi chiacnombo mibi buanembi, quequin Nuquin Papan chuipampic. Aden menequin chiac Moisesēn nadopampic. ¹⁹ Nuquin Papan chuibocpaden chuishun nidaidēn capuquid yua cuesuneshun intac bedshun actebēdta daēd uain cacushun cuēte shubi madquēnaid podo mēsequiabicquid bedshun sedquid piu uaid potaneshun daēd uaboed nēnanshun Nuquin Papan chiaid dada uaidbēdta matses daseccabampic: ²⁰ “Nēid Nuquin Papan chuibocpaden mimbi natequidquo nec,” quequin ismequin Moisesēmba abitedi daseccabampic. ²¹ Adoshombic Nuquin Papa tabadte shubu uashunaidbēdta aidēn tabēcaidtedi daseccabampic. ²² Cuesuniaidēn intac daseccatequid nec. Shubu chedo cuesuniaidēn intaquēn daseccabquid mishtemaid nec. Adecbidi cuesuniaidēn intac chiuidenquiocnoc matses icsaid Nuquin Papa bēpiscudenquo iquendac.

²³ Nuquin Papa yacnombo puduednush icsaisa unēsēndac, quequin ismenuen matses chuibanec Nuquin Papabēd onquec nidaidēn capuquid yua cuesuneshun intac bedshun buanec Nuquin Papa nidaidēn tabadte shubu uashunaidēn puduedpampic. ²⁴ Esuquidistu matses icsaid bedshunash abided cuidadec unēsash nidaidēnshun Nuquin Papa tabadte-bimboecnuc shubu uashunaid yacno puduedenquo icpanēdash. Abi tabadacnombo abi tantiaquido chuibanec aton Papabēd onquec puduedash abi tabadec. ²⁵ Ambo puduedash, Matses icsaid bedshunash ēbided padpidec cuidadnu, quenquo yec tabadec. Nidaidēnshun setan-setanquien Nuquin Papa tabadte shubu uashunaidēn puduedquin aton intapenquo bedshun daseccadene. ²⁶ Matses icsaid bedshunash abided cuidadec unēsambo yec Nuquin Papa yacno puduedoash padpidec nidaid yacno choash unēsash abuc Esuquidistu puduedoatsiandac. Adenquo iquec matsesash abi unēste ushēnquibi matses icsaid bedshunash abided cuidadpanēdash nēid nidaid naimēdbudte anoentsēqui icnuc. ²⁷ Nidaidēn icquid unēste ushē abentsēc iquec. Unēsasho ambi naid Nuquin Papan chuitequid ushē choendac. ²⁸ Adecbidi matses icsaid bedshunash abided cuidadec Esus unēste ushē abentsēc icpanēdash. Matses icsaid bedshunash cuidadoanu, quenquo yec aidquo padpidemboec choendac. Abi cainquido abi yacno puduedmenuec choaindac.

10

Abided cuidadec unēste abentsēquēnquibi

¹ Setan-setanquien nidaidēn capuquid yua cuesuneshun intac bedshun buanec puduedsho isun matses icsaid bedshunash abided unēsash abi tantiaquido chuinec bēyucanec Nuquin Papa yacnoēsh yuedanquidquo choec, quequin nuquin tsusedpabon tantiabempampic. Nidaidēn capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abēd onquetiapimbo icpanēdash. ² Aidēnquo

daseccaquin matses icsaisa icmiac nidaidën capuquid yua padpiden cuesunenquoio ict-sempampic. Adecbidi, Icsambocquid nebi, quenquoio matses ictsiandac. ³ Aton matses isaisa icmetiapimbocquin setan-setanquien nidaidën capuquid yuaded cuesunepanëdash. ⁴ Adshun yuan intac bedshun daseccaidën matses icsaisa icmetiapimbo iquec.

⁵ Adoquien Esuquidistu nidaidënshun tishac caniasn onquec:

“Nidaidën capuquid yua cuesunenubi ëmbi chiacpadomboen matsesën natiapimbo iquec queshun yua cuesunete bunenquoio mibi iquec, Papa.

Matsesën tishtequid mimbi icmiaidquoio nebi, Papa.

⁶ Adecbidi nidaidën capuquid abichobi taudeniatic matses abi icsambo iquec, quiash, Padi. Adoenda, mibi quec, Papa.

⁷ Adsho isun mimbi chuiquin dada uamiampicpadomboen naimbi, Papa.”

⁸ Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquiocsho isash, Padi. Aid nainquiocquin ënta, quequin mimbi matses chuinuc ⁹ mimbi ënden nadomboen nata cain chiaid naimbi, Papa, quiash matses icsaid bedshunash abided cuidadec unësun Nuquin Papan ënden chiaid ëmepanëdash. Aden ëmian nëbi Nuquin Papan chiaid utsi iquec. ¹⁰ Aden Nuquin Papa bunacpadomboen nash unëstiapimbo yanshun abi unëste ushënquoio abi tantiaquid paucpanëdash.

¹¹ Aden matses icsaid paucpec, quetiapimbocon badiadquidën-badiadquidënquien nidaidën capuquid yua cuesuneshun intac bedshun daseccaquin icbo icsaidbëdta utsibo icsaid pauctiapimbo iquendac. ¹² Esuquidistuen abided unësash abi tantiaquido icsaid pauctequid abentsëquiobi iquec aton Papabëdi ënëdtiapimbo yec abitedishun icbombo iquec. ¹³ Ambobi tabadquimbi abi chieshënquido ambi chiacpadomboen naquidquoio icmete ushë cainec. ¹⁴ Abided unëste ushënquoio abi tantiaquid ambi icsaisa icmiaid abëd cuëshëdesambo yampanëdash.

¹⁵ Adembidi Nuquin Papan Mayanën Nuquin Papan chiaid utsi naden chiech:

¹⁶ “Nëbi ëbëd tabadmenun chiaid utsi nendac, quequin chiendambi.

Aidi aton pabiaten puduedmendambi paucudenquiocnoc.

Adembidi ëmbi chiacpadomboen nate bunquidquoio icmendambi, quec Icbo.”

¹⁷ Adshumbic Nuquin Papan chiaid utsi abi chiech aton Mayan:

“Abi icsaidtedi padpiden tantianu quenquoio yec bëpiscudendabi, queoac Icbo,”

quequin chuipanëdash aton Mayanën. ¹⁸ Adecc abi icsaid bëpiscudash nidaidën capuquid yua cuesuneta quenquoio Nuquin Papa iquec.

Nuquin Papa yacno puduedte cainta

¹⁹ Adoaidi Esuquidistu unësacsho isun cudan siac aton intac chiuidun, Ambi paucaid nebi, quec dacuëdenquoio yec Nuquin Papan shubu icsaisa caid yacnombo puduedte ushë nuqui cainendac. ²⁰ Matsesash abided cuidadec unësash Nuquin Papa yacno pudueddash tabadquid Esuquidistu nec. ²¹ Ambo nidash Nuquin Papabëd onquequin aton shubun icquido nuqui Esuquidistun chuibanubi, ²² Ambi paucaid ambi dapanacimbocquidbidi nebi, quequin tantiaquin abi yacno choacimbocno nidaidënshun Nuquin Papa chiech onquec tabadnuna. ²³ Nuquin Papa ambi chiacpadomboen naquidquoio nec, quequin abi tantiaquid yec abi yacno puduedebi, quequin caimbudnuna. ²⁴ Aden tantiaquin abi tantiaquid utsibobëd tantiananec bëdamboec tabadquin nashununa. ²⁵ Aden nabanec abi tantiaquid utsibobëd iccuededtiapimbo iquebi, utsi-utsiec quiacpadec adenquoio icnuna. Adecc iccuedec, Nuquin Papan chiapadquiecc bëdamboec tabadnuna, quec chuinanta. Niacquid dadpen icsho isash, Matsesën naid chuibanquin cuidte ushë badedquoio choec, quiash baded-badedquiecc chuinanta bëdamboec tabadte bunec.

²⁶ Ebi icsaid bedshunash abided cuidadec Esuquidistu unësapanëdash, quequin tantias icsaded-icsadedquid iquec, Adquidquoio Esus nec, quetiapimbo iquec. ²⁷ Aid cuidte ushë chonoc nëishun comapenen chushcaindac Nuquin Papan abi chieshënquido nibëdamequin. ²⁸ Nadomboen nata cain Moisesën chiaid niacsho isun daëdshun chiac niacquid unësmiampic. ²⁹ Nuquin Papan abia naden nata cain chiaid niactenequid adomboen cuidnushe quiash ëbi icsaid bedshunash abided cuidadec Esuquidistu unësapanëdash, queboedi, Ebi tantiaquid Nuquin Papan Madopenquoio matsesquoio ëbipadquid icsacsho cuesuniatic, quequin chieshënsho ¿comapenen Nuquin Papan cuidenquioda icpadic? Adquid Nuquin Papan Mayanën bëdamboecquid icmenu quequin chiaid chieshënquid nec. ³⁰ Nuquin Papan: “Ebmimbo ëmbi chiaid chieshënquid cuidendambi,” quequin chiaid nec, quequin nuqui tantiec. Adembidi: “Abi tantiaquid icboedëmbi tantienquoio yansho cuidquidquoio Nuquin Icbo iquendac. ³¹ Abi cuidantequid dacuëdampambo iquec,” quequin Nuquin Papan chiaid nec.

³² Esuquidistu tantiaquid yanash mibi bëdamboec tabadondacpaden tantiamec chuinan-deneta. Esuquidistu tantiabencacchuca icsho chieshëmënnquidon mëyanaqui, Esuquidistu

tantiaquid nebi, quec dayacquio yec bēdamboec mibi tabadteniondac. ³³ Dadpen tabadnubi, ěmbi tantiaid Esus nec, qesho mibi utsibon mamēnshunondash. Adembidi aidon natiambocquin mēyanac. Adomboembidi Esuquidistu tantiaquid utsi mēyanasho isun, Aidbēd icquid nebi, quequin ismequin mimbi nashundenepondac. ³⁴ Esuquidistu tantiaquid utsi quēnēn nauedaid icsho isash abēdi tabadacimboec natiamianqueic unēsquo yec mibi tabadpondac. Adecbidi mibi chieshēnquidēn mitsana bedacsho isash Nuquin Papan ěbi menetequid ampetiapimbo iquec, quequin tantiec, Bēdambo iquebi, quec mibi tabadpondac.

³⁵ Adoaidi Nuquin Papan bacuē yec bēdambo iquebi, quiash dacuēdenquo yec bēdamboen nabanec mibi ěnden dayacquio iccondacpadqueic adqueiebidi tabadteneta. Adquid Nuquin Papa yacno puduedquid nendac. ³⁶ Utsin mēyanaqui Nuquin Papan chiaid chieshenquiocquin tantiaadeneta. Adec tabadquin Nuquin Papa bunacpadomboen nabanash abi yacno tabadendac. ³⁷ Nuquin Papan chiaid nadquo iquec:

“Chiata. Nēbien mimbi cainaid mibi mēnchictequid choendac.

³⁸ Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa. ³⁹ Aid cainuidash utsi tabadnubi abi choate nuqui cainec. Abi cainesabi yacno puduedmenquiocquin Nuquin Papan chian anēdēnquequid nēsiatequid nendac. Nuquien abi cainquid yec Nuquin Papa yacno puduedtequid nec.

11

Nad iquendac, quequin tantiaquin cainquid

¹ Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abēd icte ushē nuqui cainendac. Aden cainquin, Con icbo ěmbi isacmaid nec, quequin aid isbenacimboen ěmbi tantiaid nec, quec tabadquidquo nebi. ² Adembidi tantiec tsusedpabo tabadsho isun, Bēdamboen mimbi tantiec, capampic Nuquin Papan aido chuiquin.

³ Adembidi Nuquin Papan: “Abubēdi nidaid yanquiota,” cashumbic: “Aidēnquiocquidtedi yanquiota,” cac ambi tantiacpadqueiqui yampampic, quequin nuqui tantiec. Aden tantiec ěmbi nēbi isaidtedi nibēdnuc ěmitsipadomboentsi aidtedi icmebampampiba? quenquo nuqui iquec. Nuquin Papan: “Yanquiota,” quequin tantiacpadqueiqui abitedimbo yampampic.

⁴ Adembidi, Mibi tantiaquin mibi bunacpadomboen nidaidēn capuquid con yua cuesuneshun tauinu, quequin chuishun Abedēn naid Nuquin Papan bēdamboen isaidquo icpampic. Aton utsin Cain caidēn aden tantienquiocsho Nuquin Papan icsamboen isaid icpampic. Adosho isun Cainēn aton utsimbo cuesuniambien Abedēn Nuquin Papa tantiaquin naid chianetequidquo abi iquec.

⁵ Adnubien adecbidi abi tantiaquidquo Enoc icsho isun Nuquin Papan buanac unēsasa icpampic. Bēdamboquid nec, quequin Nuquin Papan buanacsho nibēnquin Enoc istuidambocpampic. ⁶ Abi tantiesa icsho isashien, ěmbi bēdamboen isaidquo nec, quetiapimbo Nuquin Papa iquec, quequin tantiaid aid tantiaquid icsho, Abi yacno puduedmetequid nebi, quequin tantiaquid ambi bēdamboen isaidquo nec.

⁷ Adnubien adembidi Nuquin Papa tantiaquin Noe caidēn, Nuquin Papan chiacpadomboen nanuna, qeshun, ěbēd icquid unēs uanushe qeshun, Con utsibo Nuquin Papan chiaid tantiesa yec unēstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bēdamboen isaidquo aidquo icpampic.

⁸ Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. ⁹ Adembidi Nuquin Papa tantiec abi capuacmanombo choash, Con nidaid iquendac, quiash yuedacmaidbimboec quenenenquo yec daēdcaid shubumpi buan-buanequi aid nidaidēn tabadpampic. Adecbidi aton mado Isactsen aid shububidi buanash tabadoapampic. Adecbidi Isaquēn mado Acoboten tabadoapampic. ¹⁰ Nuquin Papa yacno ambi tantiampicpadomboen shubu uaidēn tabadendabi, quequin cainec quenenenquo yec nidaidēn Abadauan tabadtenepampic.

¹¹ Adembidi Abadauanēn Nuquin Papa tantiaquin aton chido Sada machobudash bacuē tishtiapimbocquid icnubi, Nuquin Papan chiacpadqueic con mado iquendac, quequin tantiacpadomboen Abadauanēn chidon machobudquioshon aton mado tishpampic. ¹² Adoac Abadauan tsuiobudaidēnquo tsyuecquid dadpen uispatedi yampampic. Masitedbidi yanoapampic.

¹³ Aden Nuquin Papan aid nidaid ěbi menendac, quequin tantiec chieshenquo yec Abadauan ambi isacmanombo choash, Con nidaid nendac, quequi Nuquin Papan meniabicnuc quenenash tabadenquo yec nidequi unēsampic. Adomboembidi tantiequid

aton madobo unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecquido unësbudnepampic. ¹⁴ Nuquin Papa tantiaquid yec Nuquin Papabëd tabadendabi, quish nidaidën quenenenquo yec aidtedi tabadpampic. ¹⁵ Èbi tishondacnombo tantiec unësquo iquebique. Ambo nidoaibi, quish nidtsempampic. ¹⁶ Adenquo yec, Nuquin Papa yacno tabadendabi, qesho tantias, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

¹⁷⁻¹⁸ Mimbi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiasho isun, Èmbi chiaid tantiaquidquoda Abadauan neque. Isnu, qeshun, Min mado abentsëc Isac caid cuesuneshun èbi tantiaquin tauita, Nuquin Papan cac Nuquin Papan chiaid niacmane qeshun Abadauanën tauinuequin aton mado setsempampic. ¹⁹ Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnuc.

²⁰ Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuiopampic.

²¹ Adnubien adembidi Nuquin Papa tantiaquin tsusio budash unësbudquimbi aton cuate bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuiopampic.

²² Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësebiq. Mibitedi: Aid nidaid yacno nidnu, qeshun con canite buanta, quequin chuiopampic Osen.

²³ Adnubien adembidi Nuquin Papan bëdambo icmiaid con mado nec, quequin tantiaquin aton mado Moises tishun aton titan aton papabëdtambi ompopampic. Equipito yacnocquid ancanquidën: Isadaidbon chidon dada bacuë tisho cuesuneta, quequin chiaid niacquin dacuëdenquiocquin aton mado adopampic.

²⁴ Adnubien adembidi Nuquin Papa tantiec Moises caniacsho, Ancanquidën champin mado mibi nec, caqui chieshë nec, Aidën madopenquo nebi, queopampic. ²⁵ Ancanquid Nuquin Papa tanties nec. Con matses isadaidboen Nuquin Papa tantiaquido nec. Adquid icsho aidobëdtabi ancanquidën mëyanaid iquendabi, quianec Moises cuëshëdpampic. ²⁶ Yuecshun Nuquin Papa yacno yuedac bëdambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quish tabadquin Moisesën caimpampic. ²⁷ Adembidi tantiaquin, Equipito yacnoësh èbi nidsho isash nëishun ancanquidën con matses nidmenquo icpec, quenquo yec Nuquin Papa isachimboec Moises tabatenepampic. ²⁸ Yuecash Equipito yacno choashun adembidi tantiaquin, Bëyuec tishaid unësmetequid èmbi èbi yacnoshon uaid mayan bëda èmbi budmiaid min shubu datamenuen èmbi chiacpadomboen nabanta, Nuquin Papan cac ambi chiacpadomboen naquidquo Moisesba icpampic. Ambi chiacpadomboen nabanquin nidaidën capuquid yua cuesuneshun shëcuë cuëmano abiuc daëdi abucbëdta intaquën ècnoshcashun nami shuishun pan bidisquesabëdta pepampic. Adoacsho isun Nuquin Papan budmiaidën datampampic.

²⁹ Adnubien adembidi Nuquin Papa tantiec Equipito yacnoësh puduanec nidquin Acte Piu potec nidquid podqued nibëdboedi tanunquiocquidën uesadmiadën isadaidbon potepampic. Aden isadaidbon potenubi abëdtambi potenuc abi chieshënquido Equipito yacnocquido acte chomiaidën mentoadbudnepampic.

³⁰ Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuëscaïn tambanec dacuenadtanec shubu dadpen daquënë uain tsasi uaid sec uebudpampic.

³¹ Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido èmbi yuedac èbëd icquido cuesunenquiocpec, qeshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquo yec chiesho Daban matses utsibo cuesuneguimbi.

³² Adecbidi Nuquin Papa tantiaquid dadpen icpampic. Nëidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpen-shun Nuquin Papan chiacpadomboen naindac, quequin cainquido icpampic. Abitedi

chuitiapimbo iquebi. ³³ Aido utsin-utsinquier: Abi ancaidobëdtabi ancanquid Nuquin Papa tantiesha nec, qeshun cuesunepampic. Adembidi, Mibi bëdambo icmenu, quequin Nuquin Papan chiaid tantiaquin cainec adquidquio icpampic. Adquid icsho isun, Pemenu, qeshun bëdi nibëdquid deon caid tabadacno buanshun nebudpampic. Adosho isun piantiapimbo noc Nuquin Papan quiuëccac deonën penquiocpampic. ³⁴ Utsin-utsinquier adembidi Nuquin Papa tantiaquid icsho, Nëdëncashun tauinu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquiocpampic boedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic. ³⁵ Adembidi utsin Nuquin Papa tantiaquin nianten bacuë unësboed uincumetanquin ani menepampic. Adembidi tantiec tsadsho isun Nuquin Papa tantiesha nebi, camenuequin shoyombededsëcquien cuesuniaqui, Nuquin Papan chiaid tantiesha uainquio yec Nuquin Papa yacno nidebi, quiash unëspampic. ³⁶ Utsi-utsien shocosh bucin mëtaneshun quënën nauedacsho isun mamëshunquimbi cueshanten cuesaqui Nuquin Papabëd tabadte tantiec dacuëdenquio yec tsadpampic. ³⁷ Adembidi utsitsen cuënnoten seshunepampic. Adembidi utsitsen sënten nacsëshunepampic. Adembidi utsitsen nidaidën capuquid bitsi nacnenaïd dasiuidpampic. Aton na nibëdnubi mëyanaqui Nuquin Papa tantiaquidquio yec aidtedi tabadpampic. ³⁸ Nuquin Papa chieshënquid ëbëd tabadtemaïdo nec, quequin tantiec adpampic. Adoac quenentiapimbo yec uano tabadnubien nidaïd shëcuë uaidën utsi tabadpampic.

³⁹ Aidtedishun, Èbi yacno mibi chuibanec ëbëd onquequid bëyucanec yuedanquid iquendac, quequin Nuquin Papan chiaid tantiaquin cainec aidtedi unësbudnepampic. ⁴⁰ Aidtedi icnubi abi icsaid bedshunash abided cuidadec unësash uincuenash abi yacno nidoash Yuedanquid Abentsëcquiobi Esuquidistu yanabi icpampic adboedëmbi ma nuqui nëbi icquidobëdta yuedpanuna.

12

Aton bacuë Nuquin Papan dayacmenuequin namiaïd

¹ Aden Nuquin Papa tantiec chieshesa dadpen icpampic, quequin dada uasho isun ëbi chieshtometequid utsi ëbi icsaidbëdtabi nainquiocquin ënuna. Adembidi dayacquiocquin Nuquin Papan chiacpadomboen nabanec tabadnuna. ² Esuquidistu, abitedishun icombo abia yampidquio ëbi chuibanec Nuquin Papabëd onquec bëyucanec abi yacno puduedash yuedanquid nec, quequin tantiaquin aid isachimboen adonona. Aidi, Èbi yacno matses yuednu, quiash aton Papabëd tabadteneboedi matsesash icsamboquidimbimeocnec cuesten dectanac chieshenquio yec unësacsho uincuen uaid yanash aton Papabëdi Icbombo iquec. Aidquio tantiec isachimboec nidaïdën nuquibi tabadnuna. ³ Abi chieshënquidën natiacquin mëyanaqui chieshenquiocquid Esuquidistu icpanëdash, quequin aid tantiec ma chieshtoenquio icpanuna.

⁴ Èbi icsaid padpiden nainquio icnu, qeshumbi natiatequid icnuc mimbi ënambo iccoc. ⁵ ¿Con bacuë cain Nuquin Papan mibi dayacquio icmenuequin chiaïd bëpiscudecta icco? Nad iqueque. Tantia:

“Abuido, min Icbon dayacquio icmenuequin chiaïd cacuidenda.

Adecbidi ambi natiamianquiopec camiaïd icash chieshenda.

⁶ Ambi natiamianquiopec camiaïd dayacquio icmenuequin nametequid con bacuëbo nec,”

quequin Nuquin Papan chiampid nec.

⁷ Natiatequid mibi dayacquio icmetequid nendac. ¿Èbi cudasaidquio con mado dayacquio icmenuequin namebanesa nebi, quecta aton papa icpadic? Padenquio. Ambi: Con bacuë nec, caïd natiatequid icnuc, Dayacquio icmenu, quequin ancaquin chono uaic. ⁸ Natiatequid icnuc ambi dayacquio icmenu quequin namiaïdpenquio yec, ambi, Con bacuë nec, caïdpenquio mibi nec. ⁹ Ènden dayacquio icmenu quequin mibi ancaquidën mibi tishmequidën chiacpadomboen natiatequid icnuc naquidquio mibi icpondac. Nëbi Nuquin Papan dayacquio icmenu quequin chiacpadomboen natiatequid icnuc naquidquio icnuna abëdi tabadnuen. ¹⁰ Abi tishmequidën ambibi tantiapaden dayacquio icmenu quequin aton bacuë yuen nametiapimbo iquec unësendac. Padnuen Nuquin Papan abipadquid icsaisa icmenu quequin natiaquionoc nuqui namendac. ¹¹ Adoac nuqui natiaquiec tabadec. Adoaidi yuecash nuqui bëdamboec tabadendac. Adecbidi natiatequid icnuc dacuëdënesa nuqui yanec. Adecbidi Nuquin Papabëd icquid nebi, quequin tantiaquidquio yec natiatequid dacuëdënesa nuqui yanec.

¹² Aden tantiec dayacquio ictiapimbochoedi: Abipadquid iquendabi, quiash dayacquio yec tabadta. ¹³ Adenuidi naic tabadquin utsibo isme ma dayacquio ictiapimbochoquin niaquec cuëshēdte bumboedi bēdambo yampanuna.

¹⁴ Aden naic tabadec utsibobēd bēdamboec tabadnu, quiash adec tabadta. Adecbidi Nuquin Papa icsaisa yacpadquiec nuquibi icnuna, quiash aid tantiec tabadec isnanec chuinanec adquid yanta. Adoesa Icbobēd tabadtiaimbochoquid nendac. ¹⁵ Nuquin Papan bēdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe. Bēdamboec tabad, quequin chuiban. ¹⁶ ¿Ada aton chidopenquoio chudquid icpec? Adecbidi, ¿Ada adembidi aton bēnēpenquoio chudmequid icpec? quequin isnuequin adquid istuidshun Nuquin Papan chiaid chuiquin bēdamboen tabadmeta. Adembidi, Esaupadquid icnushe queshun ¿ada Nuquin Papan bēdamboen tantiaid chieshēnquin isuidquid icpec? queshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unēsnn tusio icquin con pan bēdamboen tantiaid chuisho mimbi tantiaata, quequin aton papan bēdambo icmenu quequin chiaid chieshquin Esaun tantienquiocpampic. ¹⁷ Yuecshun, Aton utsi Acobo aton papan chuibanosh, quesho tantiaish shubiquin, Mimbi bēdamboen tantiaid ēbitsen chui, papa, cac chuitiapimbochoquidēmbi, Ēnden nibēdquiocnoc uesquin min utsi chiombi, quequin Esau chuipampic aton papan.

¹⁸ Adembidi, Nuquin Papan nadatiambocquin uabanaid tsusedpabon isampicpadomboen mimbi isabicoc. Macuësh Sinai caid yacno choshon aidon isbenampid nēid iquec: natia nēdēnquedote; utsibic, inchēshacimboc isadquid; utsibic, cunquequid dapabimboec isadquid; ¹⁹ utsibic, shocosh shoncaten shoncacimboc onquenec pabiante paēmbohē icpampic. Adec onquesho tantiaishun, Papa, mibi onquesho tantiac dacuēdampambo iqueque. Mibi chuitequid Moises icme, capampic. ²⁰ Adec macuësh yacnombo icquin: “Ēmbi nadatiambocquin uabanaid ismenubi macuësh yacno anoentsēqui choenda. Adecbidi matses adecbidi nidaidēn capuquid. Anoentsēqui choquid cuēnoten setequid nendac,” quequin chuipampic Nuquin Papan. ²¹ Aden Nuquin Papan nadatiambocquin uabansho isash: “Dacuēdampambo iquec, quiash, Dacuēdebi,” queoapampic Moisessten uēdēquec.

²² Mibien dacuēdenquoio yec Macuësh Sion cashumbic Edusaden Chuca Bēdambochoquid caid Nuquin Papa ēnēdesambo tabadacno choachimboec mibi tabadec caimbi. Aid nuntan Nuquin Papan abi yacnoshon ambi uaid mayan bēdabo tambantiapimbo yec dadpenquioshē tabadec. Aido, ěmbi nashunaidtedi, Esus tantiaquid chotequid iquec, quiash bēdambo iquebi, quec cuēdēndonec tabadendac. ²³ Abi tantiaquidtedi Nuquin Papan bacuē icbo yacpadquiec aton shubu abentsēquēnuēshi Icbobēd onquec ěnden mibi taēpoc. Aidi mimbi naid cuidquid ambi chiapadomboen nadenequid mibi nēsesa icsaisabidi icmequid Nuquin Papa nec. Aidbēd ěnden tabadacimboc abēdi onquec mibi taēpoc. ²⁴ Abēd icquin Nuquin Papan ambi ěnden chiaid ěmeshun ambi nēbi chuioaid, mibi chuibanec aton Papabēd onquec bēyucanec yuedanquid Esuquidistubēd ěnden mibi onquepoc. Mibi icsaid bedshunash abided cuidadec unēsō isun cudan siac intac chiuidnēdaid tantiec aidbēdi mibi onquepoc. Abedēn nidaidēn capuquid yua cuesuniampicpadquidēn intac chiuidec unēsaid tantiec Icbobēd mibi onquetiapimbo iquec.

²⁵ Nuquin Papan chiaid niacchitomane quequin isquiota. Macuësh Sinai yacno choquid Nuquin Papan ěnden chiaid chuiquid tantiate bunesa cuidpampic. ¿Adembidi ambi nēbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic? ²⁶ Ēnden Macuësh Sinai yacno Nuquin Papan chiacnoshonquoio nidaid ishcumpampic. Nēbien: “Padpidemboen nidaidbēdta abu ěnēdmenuen ishcunoaindambi,” quec Nuquin Papa. ²⁷ Aden chuiquin ambi uaidtedi ěnēdmenuen padpidemboen ishcunoaindac abi yacno choaidtedi icsaisa icmiaido yec ěnēdtiapimbo iccuedednuc.

²⁸ Adoaidi Nuquin Papabēd abi tantiaquido ambi bēdambo icmiaido yec abēd tabadte ěntiapimbochoquin Nuquin Papan nadatiambocquin nabanaid tantiec cuēdēndonec tabadta. ²⁹ Nadatiambocquid Icsaisabidi icquin aidēmbi, Esuquidistu tantiaata, quequin nēbi chiaid tantiesa chian anēdēnquequid nēsacaindac.

13

Nadomboen nata cain chiaid

¹ Esuquidistu tantiaquid yec aid tantiaquidtedi con utsibo nec, quiash tantiananec nashunanta. ² Adembidi Nuquin Papa yacnoësh choquid abi tantiaquido nashuntequid ambi uaido mayan bēdabo chosho yuedampicpaden mimbi isacmaidquoio Esus tantiaquid chosho yuedta. ³ Adembidi quēnēn nauedaid iquec utsi iste buntsiabi, queshun quēnēn nauedaid istan-istanta. Adecbidi buntsiabi, queshun menetan-menetanta. Adembidi utsin mēyanaid tantiec shubioata.

⁴ Adec tabadec con chidopenquoio chudnu quesa iquec chido utsi isuidquid icta. Adesa icsho Nuquin Papan mibi cuidendac. ⁵ Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bēdambo iquebi, quec tabadta. Adec tabadquid Nuquin Papan ēnden dada uamiampid naden chiec: “Mibēdi iquebi.

Nianenquiocquin mibi dayun uanuna.”

⁶ Adsho tantiaash:

“Con Icbombo ēbēdi iquendac.

Aidēmbi ēbi cudasquin dēcatiac chieshēmēnquid dacuēdēnenquoio iquembi,”

nuqui quendac. ⁷ Adembidi nidaidēn icquid mibi chuiquid dapabo Nuquin Papan chiaid mibi tantiamenuequin chuiquido bēshunenda. Aido Esus tantesa uainquoio yec bēdamboec tabadpanēdash. Aido tanec bēdamboec tabadoata. ⁸ Con Icbombo Esuquidistu nec. Abia Yampidquoio yec nēbi adquiobidi iquec. Aidi ēnēdtiapimbo yec abi tabadec.

⁹ Adquid Esus icnuc Nuquin Papa chieshēnquidēn chuisho tantiesia icta. Aidēn naden chiec, Nēid petequid icnubi nēid utsi petemaid nec, quequin chiec. Mimbi piaidēn mibi bēdambo icmetiapimbo iquec. Padnuen matses icsaid bedshunash abided cuidadquidēn, Nuquin Papan madonquoio paucaid iquebi, quequin tantiaquidquoio icsho isun Icbobēd tabadmequin ambi bēdambo icmiaidquoio nendac. ¹⁰ Matses icsaid bedshunash abided cuidadash uincuenash abi tantiaquidbēd ēnēdenquoio yec tabadquid Esuquidistu nec. Adec tabadquid Esuquidistu icnubi, Matses icsapash, qeshun nidaidēn capuquid yua cuesuneshun nibēdquiocnoc tauaiidēnquoio matses Nuquin Papabēd tabadmetiapimbo iquec. Adembidi aidēnquoio nuqui icsaisa icmetiapimbo iquec.

¹¹ Isadaidbo icsapash, qeshun nidaidēn capuquid yua cuesuneshun aidēn intac bedshun, Nēid intac Icsaisa Bēdaidquoio anquēnē uaid nuntan buanshun daseccacsho isun abi yacno puduedacimbocesho Nuquin Papan isadaidbo isec, qeshun nuntan buanshun daseccapampic. Adnubien matses nibēdacno nami buanshun uesquin tauipampic. ¹² Adembidi matses tabadenquoio yacno Esus buanshun dectanac unēsacsho siac aton intac chididiepanēdash nuqui icsaisa icmenuc. ¹³ Adoaidi abi tantiaquid yec abēd icquid nebi, quequin ēnden chiampicpaden nainquiocsho isun isadaidbo Esuquidistu tantiesan cacumiaqui chieshenquoio yec tabadta. ¹⁴ Adquid iquec nidaidēn yuec tabadesa icquimbien Edusaden Chuca caid Nuquin Papa ēnēdtiapimbocquidbēd tabadaid cainquidquoio nuqui nendac.

¹⁵ Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bēdambo iquec, quequin Nuquin Papa chuidenenuna. ¹⁶ Adodonequin utsibobēd tantiananquin nashunquin aton na nibēdquid menequid icta. Adsho isash, Con mado yec con champi yec quec bēdamboec tabadquid nec, quiaash bēdambo iquebi, quepadac Nuquin Papa.

¹⁷ Ambia Esus tantiaashun chuiquidon chiapaden nabanta. Nuquin Papan, Ēbi tantiaquid utsibo isbanta caid icquin aido Nuquin Papan, Icsambo iquec, canushe qeshun isted-istedec. Aidon chiapadomboen naquin ma aido bēdambo iquebi camepanuna. ĸChieshecta mibi bēdambo icpe? Padenquoio.

¹⁸ Chieshenquiocquin ēbēd icquid Nuquin Papa chui. Bēdamboen nabanec tabadteniobi. Adequi tabadebi utsibo: Icsambocquid nec, quetiapimbocnoc. ¹⁹ Adembidi ēbi tantiaquin Nuquin Papa chuidoneta. Mimbi adonoc badedquoio mibēd iquendabi.

²⁰ Adembidi utsibēd bēdamboen tabadmequid Nuquin Papan aton Mado matsesacsho utsibon unēs uashun siacsho isun uincuemiac bēyucanec abuc puduedoash abitedishun Icbombo nec. Abi tantiaquido chuinuen yuedquid aidi Nuquin Papan icmepanēdash. ²¹ Adquid Esus icmeshun ambi tantiapadomboen ma Nuquin Papan mibi icmepanuna. Adoac, Ēbi puduedmuenen Nuquin Papan naid nec, quequin ēnenquiocquin chuiquid ma icpanuna.

²² Mibi tantiamenuen ēmbi dada uaquin chiaid daēdpactsēcquoio icsho bēdamboen isec onquequin tantiadoneta.

²³ Nēbi utsi chiembique. Tantia. Timoteyo quēnēn nauedboedi nēbi puduemiac aid badedquoio nēmo choan aidbēdi mibi yacno nidendabi.

²⁴ Mibēd icquid Esus tantiaquid utsibobēda mibi chuiquidtedi tantiec tsadebi quequin Pabadon dada uaosh, quequin chuita. Adecbidi ēbitsen tsadebi quequin chuiolata, queoapec nēuēsh Itadia yacno tabadquido.

²⁵ Nuquin Papan bēdambo icmiaid ma mibitedi icpanuna. Padi. Aidtedi dada uaombi.

SANTIACON DADA UAID

¹ Santiacono nebi. Nuquin Papan namiaidquio, Nuquin Icho Esuquidistun namiaidquio-bidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

Natiametequid

² Utsibo, mibi u tabadnuc mibi nënaid, mibi bundoaid, utsin mibi mëyanaid, mibi natiametequid utsi-utsiec iquendac. Adaid icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata. ³ Adaid icnuc, ¿Èbi tantiaquidquioda neque? Isnu, quequin, Nuquin Papan èbi dayacquio icmec, quequin tantiec adecbidi tabadoata. ⁴ Aden tantiec tabadsho isun bédamboec tabadte uesquin tantiabenquidquio mibi icmendac ma Esuquidistupadquid yampanueshun.

⁵ Mimbi tantienquio yaid Nuquin Papa chuita. Aden chiaquien, Ma tantianu, qeshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec. ⁶ Èbi tantieme, queboedi, èbi tantiamenquiocpec quequin tantienda. Èbi tantiemepec queboedi padenquio yanec cuëshèdec capuidequi yampec. ⁷ Adquid Nuquin Icbon pausuntiapimbo icpec. ⁸ Adquid, Nuquin Papan èbi tantieme, queboedi capuidequi icquidbimboec icpec.

⁹ Shubu abentsëquën tabadacpadquiec tabadquid icta. Adec tabadec mitsana daëdpactsëc icquid yec, Con na daëdpactsëc iquec, quequin mitsanauidi tantienquiocquin naden tantiatata. Nuquin Papan bacuë nebi. Abèdi cuëshèdenquio yec tabadebi, quequin aiduidtsëqui tantiec tabadteneta. ¹⁰ Aton na dadpen icquidombien aton na bédiactsec tantiaquin naden tantierendac: Con na nëidic chodquec; utsibic chiuidec. Adecbidi con nami shënibudequi Nuquin Papan bacuë nebi. Abèdi cuëshèdenquio yec tabadebi quequin tantiec tabadta. ¹¹ Tanunquiocquidën tiedën caniquid unësec podo tididiquec. Bédamboeboedi nibèdquiec. Adquiecbidi icho aton nabi bedbanequi aton nami shënibudequi unësec. Icho ichoedi icho ictiapimbo yanec. Adec icho ictiapimbo yanebi, quequin mitsana comapenen tantienda.

¹² Adecbidi natiaic shubitequid icnuc Nuquin Papan chiaid niaequio yec dayacquio yec tabadquid Nuquin Papan bédambo icmiaid nendac. Adquiecbidi, Èmbi chiaid niaequio yec mibi tabadsho isembi. Èbèd icquid mibi neque. Pudued. Nèuëshquio mibi unëstiapimbo iquec, quendac Nuquin Papa. ¹³ Mibibi icsash, Nuquin Papan namiac nebi, quenda. Nuquin Papa Icsapenquiocquid nec. Aidi icsa uantiapimbo iquec. Icsa uanesa nec. ¹⁴ Nidaidën tabadquidien icsate bunec abibi icsaic. Adecbidi ambibi tantiacpadec icsaoaic. ¹⁵ Icsamane quequin tantienquio yec unësacsho abi yacno puduedmenquiocquin Nuquin Papan uquë nèsecaindac adquid.

¹⁶ Utsibo, Nuquin Papan chiaid chieshënese nebi, quec mibibi mua uadenda. ¹⁷ Nuquin Papan pausunaid bédambouidi iquec. Utsi uaquin namiantiapimbo iquec. Adenuidi namec. Adquioidi Nuquin Papa iquec. ¹⁸ Èmbi chiaid tantiaquidquio icsho con bacuë nec, caimbi, quequin Nuquin Papan tantiampampic. Aden tantiaquin Nuquin Papan abi chuidonequidquio aton Mado Esus nidaidën budmepadene. Adec budash nidaidën capusho isash abèd ichoedo abi tantiaquido nuquitedi nec. Adquid icsho ambi bëyuc bacuë icmiaido, con nabo cain, Nuquin Papan cuëmbanoshi. Aden ambi bëyuc bacuë uaido icquin chuibanac ma tantiaquidquio dadpen yampanuna.

Nuquin Papan chiaid tantiaquin nabanta quiaid

¹⁹ Nèid bédamboen tantiatata. Chuinu. Nuquin Papan chiaid bédamboen tantiaquid icta. Ambi chiaid bédamboen tantienquiocquin aid badedquio chienda. Adecbidi badedquio nëishenda. ²⁰ Badedquio nëishquidën Nuquin Papan chiapadquiec bédamboec tabadaid ismesa nec. Adquid, Bédamboen mimbi naoç, Nuquin Papan catiapimbo iquec. ²¹ Bédamboec tabadesa icquïn mimbi icsamboen tantiacpaden naid ënquiota. Aden ënu quiaish, Icsaobique. Mimbi chiaid tantiaquiono. Èbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquec aton Mado Esuspadquio yec cuëshèdenquio yec abèdi mibi iquendac.

²² Nuquin Papan chiaid tantiaquin nainquio yequi Nuquin Papan chiaid bédambo iquec, quec mibibi mua uadenda. Nuquin Papan chiaid tantiabocpadomboen nabanta. ²³ Nuquin Papan chiaid tantiaquin nana isnanten ²⁴ bëisadash bëpiscudacimboec bëpiscudendac. ²⁵ Padnuen Nuquin Papan nëbi chuiboed utsin comapenen tantiaded-tantiadedec. Aden tantiaquin, Con Mado Esuquidistu tantiaquid con bacuë caimbi, quequin Nuquin Icbon

chiacpadomboen nabanec tantesa uainquiocquid adquid nendac. Aden tantiaquin nabanquid Nuquin Papan bédambo icmendac. ²⁶ Padnuen, Nuquin Papan chiaid tantiaquid nebi, queboedi ana bédamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquio chuiquid nec. Adquid-bidi bédamboec tabadaid ismesa nec. ²⁷ Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsécquid chonoadsho isun nashuntiad. Nati-aic camiaid icsho isun adembidi nashunoatiad. Adembidi shiadimpi machoabictsécquido tantiaquin nashunoatiad. Adembidi niante machobo utsin bedabi samédquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Ēmbi chiaid tantiaquin naquidquio nec. Con Madopadquidquio icsaisa nec, quendac Nuquin Papa.

2

Nëid bédambo iquec. Nëidien icsambo iquec, quesa icta quiaid

¹ Utsibo, Nuquin Icho Esuquidistu Bédaidquio nec. Aid tantiaquid mibi nec. Adquid icquin, Nëid bédambo iquec. Nëidien icsambo iquec, quenquiocquin icsamboen nainquiocta. ² Mibi iccuededacno Esus tantiaquid mimi isacmaid choec. Abentséc bédaidquio dasiuidash nac-nacquiocquid mësiuidquid puduednubien utsi icsactsécquiocquid dasiuidt-sash puduedec. Aid daéd chosho isun ¿mitsipadentsi mimi tantiapatsia? ³ Bédaidquio dasiuidquid isun naden mimi tantiatsiac: Bédambocquid nec. Aton na dadpen icquid nec, quiacimboen, Tsusion dayunquio tsadec cho, quequin mimi aidi tsadumpec. Adshumbic, icsactsécquiocquid dasiuidquid isun, Aton nain nibédchitec, quiacimboen uano tsad mimi caoapec. ⁴ ¿Nëid icsambocquid nec. Nëidien bédambocquid nec, quiacimboen Esus tantiaquid utsibo mimi tsadunenquioda ictio? ¿Aton na tantiaquin adoenuioda ictio? Aden naquin bédamboen tantiaquin naisa mibi neyoc.

⁵ Nuquin Papan chiaid tantiesabimboecquin mimi naid nec. Mimi, Icsambocquid nec, quequin tantiaquin uano tsad caid tsadbudash nadpec: Icsambocquid nec, quequin ëbi isec, quequin tantiec aidi tsadpec. Aidbidi Nuquin Papan tantiaid nec. Aidi Esus tantiaquid yec abi yacno puduedtequid iguendac. ⁶ Aidi bacuëbimboecnuc mimi uano tsadumpec. ¿Utsibic tsusio dapabimboecnuc mimi dayunquio tsadumbocpadquidën utsin-utsinquien chono uashun mibi daédpactséc menenquioda ictiosh? ¿Adquidon mua uain chuiquin mibi utsi-utsien quënën nauedmenquioda ictiosh? ⁷ ¿Adoanquidën baded-badedquien Esus quec onquequin mamënshunenquioda ictiosh?

⁸ Nuquin Papan chiaid nad iquec: “Utsin naden ëbi nashuntiadquio iquec quequin, mimi tantiacpadomboen nashunta.” Nuquin Papan chiacpadomboen tantiaquin nashunquidquio iquec mibi bédambo icpec. ⁹ Nëid bédambo iquec. Nëidien icsambo iquec, quiacimboen naquid icnuc Nuquin Papan chiaid niacquid mibi iquec. ¹⁰ Nuquin Papan chiaid utsi-utsien nabanquid icquimbi ambi chiaid utsi niacquid mibi icoapec. ¹¹ “Mimi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidouidi chudquid icquimbi utsi cuesunequid mibi iquec Nuquin Papan chiaid niacquid mibi nepec.

¹² Mibi tantiaquin mibi icsaid pauquec Esuquidistuded icsambocquidbimboec yec unëspaneðdash. Aid tantiaquid icsho Esusën paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bédamboec tabada. ¹³ Esuquidistu tantiaquid utsi icsambocquid nec quesa icta. Ēbi icsaid Esuquidistun paucac. Adomboembidi abi tantiaquid utsi icsaidbidi paucac quequin bédamboen naban. Icsambocquid nec quiacimboen icsamboen nabansho isun Nuquin Papan adomboembidi mibi chuiquin cuidoaindac. Ēbëdta Esuquidistun paucaid nec quequin utsi tantiaquin nashumënquid icquin icsambocquid nec quiacimboen icsamboen nashuntiapimbocquid mibi nec.

Esus tantiaquid nebi quequin ambi tantiacpadomboen nabanquin isme quiaid

¹⁴ Utsibo, Nuquin Papan bacuë nebi, qeshun ¿Icbon chiaid nainquiocquinda utsi bédambo mimi icmepadi? Padenquio. ¹⁵ Esus tantiaquid abi dasiuidtebéd pete nibédquid, Bec cho, qesho ¹⁶ menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimi cacta bédambo icpadic? Padenquio. ¹⁷ Adembidi, Nuquin Papan bacuë nebi, qeshun Icbon chiacpadomboen naisa Icbon bédambo icmiaidpenquio nec. Nuquin Papan bacuë nebi, qeshun naisa Nuquin Papa yacno puduedtiapimbo icoaic.

¹⁸ Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquio iquec. ¿Mitsipaden aid daédshun tantiacpadomboen mimi tantieque? Chui. Tantanu, quequin mimi chuitsiac.

Adoqui, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid mimbi tantiamepe? quetsiabi adquid chiec. Mimbi ambi chiacpadomboen nainquiocquin ismetiapimbocnobi, Esus tantiaquid nebi, quequin chienquiocquimbi Esusèn chiacpadomboen naquin mibi ismemb, caimbi. ¹⁹ Nuquin Papa Abentsècquiobi iquec, quequin mimbi tantiec. Aden tantiaid bédambo iquec. Adembidi, Nuquin Papa Abentsècquiobi iquec, quequin mayan icsatedishun tantiaoaic. Aden tantiaquin niacquido yec uèdèquec.

²⁰ Icsamboen mimbi tantieque. Tantia. Chuinu. Nuquin Papa Abentsècquiobi iquec, qeshun Icbon chiacpadomboen naisa yec, Icho tantiaquid nebi, quetiapimbo iquec. ²¹ Nuquin Papa tantiembi, qeshun ambi chiacpadomboen naquidquio icpampid chuinu. Tantia. ¿Abadauan èbi tantiaquidquioda neque? Tantanu, qeshun, Min mado abentsèc mibi cudasaidquio èbi tantiaquin cuesuneshun tauita, cac Abadauanèn Nuquin Papan chiaid niacmane qeshun tauinuequin aton mado abentsèc setsempampic. Chèshtempti sanandosho isun, Padi. Chèn. Èmbi chiacpaden nanuesho mibi bédambo iquec, quequin mibi bédamboen isembi, ¿quequin chienquioda Nuquin Papan icpampic? ²² Abadauan Nuquin Papan chiaid cacuidenquio yec, Con Icho Nuquin Papa nec, quec abi onquiacpaden ismepampic. ²³ “Mimbi tishmiaidèn tishmiaid dadpenquioshè iquendac,” quequin chiondashumbic Nuquin Papan yuechshun adembidi: “Min mado abentsèc cuesuneshun tauita,” quequin chuloaqui, Nuquin Papa abimbo chuiquidquio nec, qeshun ambi chiaid niacchitomane quequin, Abadauanèn aton mado abentsèc setsempampic. Adosho isashien Nuquin Papa, “Èbi tantiaquin naquidquio Abadauan nec. Adquid con matsesquio aidi nec. Aden aidi tantiaquin èmbi yuecquiocshon nanuequin tantiaid Abadauan chiembi,” quepampic Nuquin Papa.

²⁴ Nuquin Papan bacuè nebi, qeshun ambi chiaid naquidquio Nuquin Papa tantiaquidquio nec. Nuquin Papan bacuè nebi, qeshun ambi chiaid naisa niacquid nec. ²⁵ Adashic, Nuquin Papan chiaid tantiashun naquid utsi icpampic. Aidi isadaidbon chidopenquio, Daba cuèmèdquid, dada dadpen chudmequid icpampic. Isadaidbon Icho nadatiambocquid nec, qesho tantiashien, Adquid abu nidaidbèdta aidènquiocquid Icbobidi nec, quequin Daban tantiapampic. Aden tantiaquin Daban matses cuesunenuequido isadaidbo abia puduedquin isquid chosho, Nadatiambocquidèn matses nec, qeshun abi yacnouidsèqui Daban puduedmepampic aton matses ismenquiocquin. Aden puduedmequin nadomboen tantiapampic. Abi puduedmequidbèd icquido cuesunenquiocpec, quequin Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaiho dadpen cho-chonobi abia choamboedèn chuibocpadquobi Dababèd icquido cuesunianenquio yec isadaidbobèd icquidobimboec isec tabadpampic. ²⁶ Nuquin Papa tantiaquid Daba yanshun bédamboen nasho isun mènchicaid Nuquin Papan con matses caidbèd tabadpampic. Padnuen, Esus tantiaquid nebi, qeshun Icbon chiacpadomboen naisa cuèshèdabimboc tabadec.

3

Anan icsamboen chiec onquiaid icsa ènta quiaid

¹ Utsibo, Nuquin Papan chiaid chuibanquid dadpen iquenquioctiad. Nuquin Papan chiaid tantiamenu, quequin ambi chiaidpenquiocnoc chuibanquid abi yacno chosho isun Nuquin Papan comapenen cuidendac. ² Chuibanquidtedishun chua-chuatsèquin chuibantsec. Nuquin Papan chiaid cuembo chuibanquid yec icsaisa yanec adquid. Bédamboec tabadaid uesquin tantiaquin ismequidquio adquid nendac.

³ Cabayo anèshquin dèchèdèdcash uidèn uash tsadquin nidmec. Aden uidèn uaquin bidiacmec. ⁴ Adembidi uncaten cano dapa tsibidiacoaic. Cunquequidèn comapenen bècunetiadquiocnobi adembidi icbon nidmec. ⁵ Cabayo canobidi nua icnuc abi bidiacmete aniactèsèc iquec. Adecbidi icbo nua icnuc aton ana aniactèsèc iquec. Aniactèsèquidi oncamequin icbon ambi naid dadpen comapenen chuibanec. Adembidi oncamequin onquiaid icsa chuibanec. Nèdènquiaid dètsisidash badedquio nidabimboc onquiaid icsa badedquio nidoaic. ⁶ Ana onquiaid icsa chuibanacpaden nabanec adecbidi icsabudquiec icbo. Adquid mayan icsan yua iquec adequi icsate bunec.

⁷ Nidaidèn capuquid podochoquidbidi matsesèn yuampicpaden abi yuaid iquec. Yua quenenash cuenenquiocquid. ⁸ Ad yenquio ana iquec. Quenenenquio yec ana onquebudec. Onquiaid icsa adecbidi ènèdiapimbo iquec. Ana onquiaid icsa tantiamenec adecbidi icsabudquiec tabadendac.

⁹ Nuquin Icho bédambo iquec, qeshumbic ana icbon, Nuquin Icbon uaid matses icsambo iquec, quequin chuibanoc. ¹⁰ Ana shècuèn utsi bédamboen chuishumbic utsi icsamboen chuioaic. Aden nuqui chienquio ictiad. ¹¹ ¿Acte batapenquiocquid choaidènueh

batambocquidta chopadic? Padenquo. ¹² Adecbidi ¿cuète bacuë batambocquidën ëshë bëchi chopecta dëyuctic? Padenquo. Adecbidi, ¿[sitodo dataniadaidën bacuë batambo yecta dëyucpadic? Padenquo. Aidi adesa yacpadquiec Esus tantiaquidën ana shëcuën utsi bédamboen chuishun utsi icsamboen chiesa ictiad.

¿Tsutsi Nuquin Papan chiaid tantiabenquidquo icpec? quiaid

¹³ ¿Tsutsi Nuquin Papan chiaid tantiabenquidquo icpec? Adquid yec comapenen Esus tantiaquid nebi, quenquiocquimbi bédamboec tabadquin ismequid utsi-utsien ma icmebampanuna. ¹⁴ Utsin tantiamenushe qeshun ëmbia chiacpadomboen ma napanu quesa icta. Nuquin Papan chiacpadomboen nabanquin ismequid icta. ¹⁵ Adembidi, utsin dëniacnushe qeshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec. ¹⁶ Aden aidën icsamboen tantiacpadomboen abédicquidon adomboembidi tantiec. Aden tantiec, Utsi dëniacnu, quiash utsi-utsiec dëniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquiec. Ad icnuc icsateuiddi bunquid yampec. ¹⁷ Nuquin Papan tantiacpadomboen pausunaid ad yenquo iquec. Ambi tantiacpadomboen pausunaid yec utsibéd bédamboec tabadquid iquendac. Adembidi utsi tantiaquin nashunquidquo icoaindac. Adembidi ëbédtan nabanec cho cac nabanendac. Adembidi, Icsamboquid nec, quenquiocquin bédamboen nabanquin ismendac. Adembidi, Esus tantiaquid nebi, abi quiacpadomboen bédamboen naic. Adecbidi utsibo chiec muaisa nendac. ¹⁸ Ambia tantiaquid utsibéd bédamboec tabadquin ismiac adecbidi utsibéd bédamboec tabadquid dadpen yanendac.

4

Ëbi nua pausun, quequin chiash Nuquin Papan dayunquo tsadta quiaid

¹ ¿Atotsi quiaish Esus tantiaquido cuiddianante buncuededpec? Mibi icsate bunacpadecuqi mibi cuiddianante bunec. Aiduidquo tantiabudequi mibi chushcanancedec.

² Nëid bunebi, queboedëmbi bedtiapimbo yanquin mimbi cuesunec. Adecbidi, Utsi dëniacnu, quiash chushcananec. Mimbi naiduidi naquin Nuquin Papan tantiacpaden naisa mibi nec. ³ Aden naisa icquin Nuquin Papan chiaid niacmane quenquiocquin aidi mimbi chiec. Adec icsanueshun chuisho Nuquin Papan mibi menetiapimbo iquec.

⁴ Mímibi inaiduidi chudenquo yacpadquiequi Nuquin Icbouidi tantienquo yec Esus tantiesan icsate bunquin nacpadomboen mimbi nadenec. Adquid yec Nuquin Papa chieshënquid nec. ⁵ Adenquiocquin Esus tantiasho isun aton Mayan Nuquin Papan Esus tantiaquidtedi meniic bédamboec tabadec. ¿Atotsieshun Esus tantiaquid aidi menezec quepecta mibi ique? Nad iqueque. Tantiata. Chuinu. Con bacuë nec, quequin aton Mayan Nuquin Papan Esus tantiaquido menec. Aden tantiaquin meniic, ¿Esuquidistu tantiaquido cudasquin dëcatenquioda aidën icpec? ⁶ Aidëmbi abi chieshenquo yacpaden tantiamebanac icsamane quiaish chieshenquo yec bédamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Ëmbibi bédamboen tantiatiapimbo iquebique. Ëbi tantiame, Papa, qesho Nuquin Papan nua pausunac aton icbo chieshënenquiocquid iquendac adquid.”

⁷ Aden Nuquin Papan chiaid icnuc, Icsaobique. Mibia Yampidën ëbi nua pausun, Papa, quequin chiash Nuquin Papan dayunquo tsadacimbocquid ambi chiaid tantiata. Nuquin Papa chieshënquid mayan icsan yuadenda. Adquidën yuatiapimbo iquebique. Nuquin Papan chiaidquo nabanu, qeshun nabanuc mayan icsa cuenendac. ⁸ Aton dayunquo tsadquidimbocquidbéd tabadquidquo Nuquin Papa nec. Icsash uano tsadquid icboedi bëchishash acten dapanudacimbocquid mimbi tantiata icsa ënta. Adash, Tantiataid bëda pausumenu, quiash Nuquin Papan dayunquo tsadacimbocquid chieshenquiocquin ambi chiaiduidi tantiateneta. ⁹ Aden tantiec tsadboedi, Ëmbibi tantiembi, quec Nuquin Papa chieshënuquid dayunquo uano tsadashic, Con Icbo tantiec unësqquo iquebi, quiaish shubiec mamënenquo yec tsadta. Mibibi uano tsadquid yash unëscimbocquid icboedi choec isadcuenacimbocquid Nuquin Papan dayunquo tsadacimbocquid yec chieshenquo yec bédamboec tsadoata. ¹⁰ Uano icboedi choash, Ëbibi icsaobi. Nëbi icsate bunenquo iquebi. Mimbi chiapadtiadquid iquebi, Papa, quequin chui. Aden mimbi chuisho tantias, Pudedash nëmbo ëbéd tsadacimbocquid mibi yanoaic, quependac Nuquin Papa.

¹¹ Utsibo, Esus tantiaquidtedi min utsibimbocquid nec. Mibéd icquid icsamboec chuinanenquo yacpadquiec Esus tantiaquid utsibéd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiacimbocquid nec. ¹² Nuquin Papa Chuiquid Dapa

Abentsëcquiobi iquec. Ambi chiacpaden naquidquo nec. Nuquin Papa abitedi Isquidquo Abentsëcquiobi nec. Aden isquin: Nèid icsambocquid nec. Nèidien bédamboquid nec, quequin Chuiquidquo abentsëcquiobi aidi neoaic. Adquid icquin ambi chiaid nabanquid abèdi tabadmec. Ambi chiaid niacquidien abèdi tabadmenquiocquin uquë nèsecaindac. Nuquin Papan ambi chiacpadomboen naquidbèdtabi ambi chiacpadomboen naisa isquidquo icquin ambi isacpaden cuidendac. ¿Adquidbidida mibi ne? Padenquo. Adquidpenquo icquin ¿atotsieshun, Icsambocquid nec, quequin mimbi chuipe?

Ma badiadshun nanun chiaid tantiesa neyoc, quequin chiaid

¹³ Tantiacquidquo nebi, quiash, Piacquid bednuec seta abentsëc matamec chonoadec nidebi, quequid chuinu. Tantia. ¹⁴ Ma adquid badiadshun nanun chiaid tantiesa mibi neyoc. ¿Tetsi seta matamec mibi tabadpe? Badiadbudnuc cuen-cuempambo yash badedquo nidachimboec matses nidaidèn tabadash adecbidi mibi nibédanendac. ¹⁵ Naden nanu quenquiocquin nadembien tantiatiad: Nuquin Papa bunaid icnuc badiadash isedec nidebi, quetiad. Adecbidi, Nuquin Papa bunaid icnuc badiadshun tied neshcambi, quetiad. ¹⁶ Aden chienquiocquimbi mibi utsi dèniaquec onquiaid mimbi chiec. Aden chiec icsaic. ¹⁷ Nuquin Papan chiaid tantiembi, qeshun adomboen natiadquidi naisa iquec icsaic.

5

Na dadpen bedbanquin dayun uaquido chiaid

¹ Nèbi aton na dadpen bedbanquin dayun uaquido chiembique. Tantiata. Mibi unèsun mimbi bedbanquin daèd uaid mimbi tantiaidquo buantiapimbo mibi iquendac. Aden mimbi bedbanquin daèd uaiduidtsèqui icscho isun Nuquin Papan mibi cuidendac. Adquid nebi, quequin tantiaish shubita. ² Unèsosh, quequin chiac mimbi dadpen dayun uaid nibènquin isac ènden chodquiac. Adembidi mimbi bédaidquo decanaid capishton ènden piac. ³ Min shocosh piucquid ènden chiuidac. Adecbidi min piucquid utsi ènden tiadac. Adenuidi tantiaquin bedbanquid unèsacsho abi yacno yuedquin, Bédamboen mimbi naoc, quetiapimbo Nuquin Papa iquendac. Tanunènquo shubu nédènquish nibédacpadquiec mimbi bedbanaid nibédquiendac. Adenuidi tantiaquin, Esus èbi bedec chonoshe qeshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc. ⁴ Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquiec. Aidi mimbi menenquo yaid Esuquidistu tantiaquido Nuquin Papan tantiaid nec. Adembidi, Con tiedèn caniquidtsen dayun uanu, quequin mimbi bedmiaido uèshquiec bunec sidquesho Nuquin Papan, Nadatiambocquid Abentsëcshun tantiec. ⁵ Aido bunec sidquenubi chonoadengquiocquin nua pec mibi tsadec. Adec tsadquin min nami bunaiduidi tantiaquin mimbi bedbanoaic. Nua pec cubudachimboen mibi bunaiduidi bedbanquin dadpen dayun uaquido mibi nec. Aden nabanquin bédamboec tabadaid ismesa mibi nec. Adec tabadec unèsash abi yacno mibentsèqui chosho Esuquidistu tantiamibocquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidèmbi mibi cuidendac. ⁶ Mimbi chiaid mimbi chono uaidon niaquenquiocquin nabanacshobi, Icsamboen mimbi naoc, quequin daèdpactsëc mimbi menebampoc. Aden nabanec mimbi cuesuniachimboec bunquiec chonoadequi unèsposh.

Ma Nuquin Icho chono quiash chieshesa icta quiaid

⁷ Nèbi utsibon chono uaido chuinu. Tantiata. Nuquin Icho choec quequin tantiec chieshenquo yec tabadta. Nitsinash ma caninu quianec pec nidash cainec icho tabadec. ⁸ Adembidi, Nuquin Icho èbi bednuec choec, quec bédamboec tabadquin caimbudta. ⁹ Adec tabadquin Esus choate cainec Esuquidistu tantiaquid utsibobéd chieshènanenda. Adec utsibobéd bédamboec tabadsho isun abitedi tantiaquidènquo Chuiquid Dapan mibi menequin bédamboen cuidendac. Adesain menenquiocquin cuidendac. Adembidi, Nèidèn bédamboen naosh. Nèidèmbien icsamboen naosh, quequin èbi Chuiquidènquo chiendac, quec chieshenquo yec bédamboec tabadta.

¹⁰ Utsibo, natiatèquid icnuc Nuquin Papan chiaid ambi chuimiaido chieshenquiocpampic. Aidquo chuibanu. Tantia. ¹¹ Natiad icnuc chieshenquiocsho isun Nuquin Papan bédambo icmendac, quequin nuqui tantiondaid nendac. Natiac cametèquid icnuc Nuquin Papa chieshènenquiocquid Obo icpampic. Aton na dadpen icboedi icsatèquid utsi-utsiectsëcquiecquidèn uesac nibédquiocsho isash, Con nabèd con nabo nibèdnuc Nuquin Papa bédambo iquec, quec chieshenquiocpampic Obo. Adquid icscho isun daèd uaquin Nuquin Papan meneopampic. Matses tantiaquin naquidquo Nuquin Papa nec, quequin ¹² abimbo chuiquidquo icta. Utsin: ¿Ada naden natsia? cac, Ai, quiacpadomboen nabanta.

Adembidi, Padenquo, quiacpaden nabanoata. Mua uanec onquequid Nuquin Papan cuidendac.

Nēdic bēdampec quequin abimbo tantianuc quiaid

¹³ ¿Natiambo icsatequid icnuc dayactiapimbo icquidta icpec? Adquidēnquo Nuquin Papa chuitiad. ¿Bēdambo iquebi, quec tsadquidta icpec? Adquid Nuquin Papan naid chiec cuēdēntiad. ¹⁴⁻¹⁵ ¿Aton dada icsabudquidta icpec? Adquidēn ambia Esus tantiaquido chuiquin, Nuquin Papa ēbi chiec cho, catiad. Adsho tantiash choshon icsabudquid tantiaquin anoshonuidi Nuquin Papa chuidoneta. Aden chuidoneshun cuēte bacuē ēnē chīnshun dashunquinqin, Mimbī utsibo bēdamenēdācpadomboen mimbī tantiacpaden nēidtsen bēdame, Icho, quequin chuita. Aden Nuquin Papa chuīnūn mibī icsaid icnuc, Icsaobi, quequin mimbī naid Nuquin Papa chui. Adembidi dada icsabudaīd chuiquin, Mibī icsaid icnuc Nuquin Papa chui ma mibī paucnu, quequin chuita. Aden ambi naid icsa chiacsho paucacpaden ma aton dada bēdamepanuna. ¹⁶ Abi icsaid uesquin Nuquin Papa chiash bēdamboec tabadendac. Adquidēn chiac dada icsambocquid Nuquin Papan bēdamendac.

¹⁷ Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasēn tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquo icpampic. ¹⁸ Adembidi, aidēmbi yuecshun, Ue secame, Papa, cac ue sequenuc tiedēn caniquid canipampic.

¹⁹ Esus tantiaquidēn Nuquin Papan chiācpadomboen nabamboedi adoesa utsi-utsiec yantsiash. Adsho isun Nuquin Papan chīaid tantīamequin ambi icsamboen tantīaid chuībanac Nuquin Papabēd yācbimboec icoāindac. ²⁰ Aden mimbī chiac chīeshenquo yec tabadsho isun Nuquin Papan uquē nēsīatiapimbo adquid iquendac. Adecbidi abi icsaid bēpiscudoaic Nuquin Papa.

Padi. Mibī tantiaquin aidted dada uaombi.

PETEDON DADA UAID 1

Petedon tauamboen chiaid

¹ Petedo nebi. Abëd icquid icsho Esuquidistun: —Ëbi chuibeneta —caidquio nebi. Esus tantiaquidtedishun mimbi iste dada uanu. Isadaidbo icsho nuquin nidaidënsun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidedi nidaid yacno tabadquidon iste nëd dada uai nebi. ²Ëndenquio Nuquin Papa: —Ëmbi tantiactedi matses ëbëdta Esus tantiamendambi —quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: —Icsambo icquid cuidmenquio icnuec abided cuidadaid Esus tantiasho Nuquin Papa ëbi bëdamboen isec. Aidën chiacpadomboen natiadquio iquebi —quequin Esus tantiec nuqui bëdamboec tabadec. Aden tantiaquin Nuquin Papa chianembi naden. —Ënenquio icquin aido bëdamboen ista, Papa. Adembidi dacuëdenquio icnuc bëdambo icmeta, Papa —quequin Nuquin Papa mibi chianembi.

Esus tantiaquid Nuquin Papa yacno tabadte chiaid

³ —Nuquin Icho Esuquidistun Papa Nuquin Papa bëdamboshë iquec —canuna naden tantiaquin. Icsaquido cuidte bunenquio icquin utsiachimboecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unëstiapimbo iquendac. Adembidi nuqui unësascho uincuemeshun Nuquin Papan abi yacno nuqui tabadmendac padpidec unëstiapimbo icnuc. ⁴Ambi chiampicpadomboen bëdamboshë yacno Esusbëdquio ëbi tabadmendac. Unëstequid nibëdec icsabudtequid nibëdec chodquetequid nibëdec quiacnombo Esusbëdquio nuqui tabadmendac —quequin nuqui tantiec. ⁵ Aden Esus tantiaquid icsho isash: —Con Mado Esus tantienquio yanushe —quiash nadatiambo icquin nabanquid yec Nuquin Papa nuqui cudasec. —Esus chote ushën ëbi yacno tabadmendambi —quec Nuquin Papa nuqui cudasec.

⁶ Ëmbi aden chuisho tantiashe mibi cuishonquendac. Esus tantiesabon chieshënac shubiantiadtsëcquio yec natiaboedi mibi bëdambo yanendac. —Nuquin Papabëd tabadec quenenendabi —quec yuec nuqui shubienquio iquendac. ⁷ Nuqui cudasquid yec ðatotsi quiash Nuquin Papa: —Padi. Chën. Esus tantiaquido natiamenda —queboedi adenquio icted-ictedpec? Matsu nacenquidën: —Ma tsasinu —quequin ambi nacenaid tauiec. Adembidi Esus tantiaquid chieshtoenquio icquid icmete Nuquin Papa comapenec bunec. Matsu nacenquidën: —ÿBëdambo icquidida neque? Isnu —quetanquin matsu tauiec. Adembidi: —ÿEsus tantiaquidquiboda neque? Isnu —quequin: —Natiamenda —cainquio iquec Nuquin Papan. Aden natiamiaqui chieshtoenquio icquid icsho Esuquidistun padpidec choshon: —Mibi bëdambo iquec. Èbëdi tabadec cho —quequin utsibo tantiamequin chuishun abi yacno buanendac.

⁸ Aden mimbi isacmaidi Esus mimbi tantiaquiec. —Nëbi isadenquio icquidi Nuquin Papan Madombo Esus ëbi bednuec choendac —quec mibi cuishonquianec. ⁹ —Abi tantiasho icsano nidmenquio icquin Esusën abi yacno ëbi yuedendac —quec Esus tantiec mibi cuishonquianec.

Esus chote tsusedpabon chiampid

¹⁰ Ëndenquimboshë Nuquin Papan tantiamiac isadaidbo tsusedpabon Nuquin Papan chiaid chuiquidon Esusën matses cuidmenquio icte dada uapampic. Esusën nate abitedi tantienquio icquin daëdpectsëc tantiaquin: —ÿMitsipadquid Nuquin Papan chomepeba? —queded-quededquin chuipampic nuquin tsusedpabo isadaidbon. ¹¹ Aidobëd icquin Esuquidistun Mayanën tantiamiac Esus chote abentse-abentsen chuipampic. —Matsesën chieshënuquin cuestas dectanac matses cuidmenquio icnuec abided cuidadec unësendac. Adec unësascho uincuemiac padpidec abitedishun Icho icoaindac —quequin Esus chote chuipampic. —ÿTsutsi chopec? ÿTeductsi yash chopec? —quequin abitedi tantiatiadquio icquimbi daëdpectsëc isadaidbo tsusedpabon tantiapampic. ¹² Naden Nuquin Papan tantiamepampic. —Mibi nibëdanan ëmbi chuiboed ëmbi matsesmiacsho utsibon isendac —quequin tantiamiac Esusën nate chuipampic. Aden chiampicpadomboen Esusën naondash. Nuquin Papan Mayanën tantiacpadomboen aid chuibenquidon aidën naid mibi chiac caondash. Aden Esusën naid Nuquin Papan abi yacnoshon uaido mayan bëdabontsen tantiatiadquio icquimbi abitedi tantienquio iquec.

Bêdamboec tabadte tantiamiaid

¹³ Ĕmbi chuiboeđ Esus tantiaquido icquin paposhquiacimboen Esusuidi tantianuna. Nuqui icsate bunacpadeć icsainquio yec bêdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ênenquio icquin. ¹⁴ Ĕmbi: —Con mado nec. Con champi nec —caido icquin Nuquin Papan chiacpadomboen nanuna. Ĕnden Nuquin Papan chiaid tantiabi mibi bunaid naic mibi icsanêđacpadeć icsainda. ¹⁵ Mibi Esus tantiamequid icsaisambo Nuquin Papa neque. Ĕmbi chiaid niaquengquio yec bêdamboec tabadnuna. ¹⁶ Nuquin Papan ambi chiaid naden dada uamepampic. “ ‘Nuquin Papa icsaisambo nec,’ quiaš icsaisa ictiadquio yec bêdamboec tabad,” quequin Nuquin Papan ambi chiaid dada uamepampicpadeć bêdamboec tabadnuna.

¹⁷ Papa quequin nuqui chianeboed Nuquin Papa matsesên naidtedi chuiquid nendac. —Nêid êbi tantiesa neque. Icsano nidmenu. Nêid êbi tantiaquid neque. Ĕbêdi tabadmenu —quequin matses abitedi chiendac. —Abêdi tabadmenquio icnushe —quiaš Nuquin Papabêđ icte bunec bêdamboec tabadnuna. ¹⁸ Nuquin tsusedpabon chiaiduidi naquin Nuquin Papa tantienquio nuqui icpondac. Aden Satanasên yuaido icšo Nuquin Papan nuqui bêdamboen istiapimbo icpanêdash. Adshun Satanas nuqui bedshunuen ėpiucquidida Nuquin Papan menepanêdash? Padenquio. Adquid icsabudtequid menenquio icquin ¹⁹ aton Mado Esus icsaisambo icšo matsesmepanêdash. Aden matsesmiacšo chieshêmênquidên cuesten dectanac Esus aton intac chididiquec abided cuidadec unêspondash. Nêbi aton Mado Esus tantiaquido bêdamboen isquin Nuquin Papan Satanas bedshunec. Aden Nuquin Papan bedshunaid yec bêdamboec tabadnuna. ²⁰ Ĕndenquimboshê abitedi uabi Nuquin Papa nadpampic. —Ĕmbi tantiapadên yuecash matsesash matses cuidmenquio icnuć mibided cuidadec unêsta, Mado —quepampic. Aden ambi chiampicpadomboen badedquio namenquio icboedêmbi nêbi nameshun Esus tantiasho mibi bêdamboen isec. ²¹ Ĕbi tantiasho Esusêmbi Nuquin Papatsen nuqui tantiamec. Adoac nuqui naden tantiec. —Esus unêsacšo uincuemeshun abêdi tabadmequin abitedishun Icbombo Nuquin Papan icmeoapanêdash. Ĕmbi chiacpadomboen naquidquio Nuquin Papa nec. Ĕbi unêsacšo uincuemeshun abi yacno êbi tabadmendac —quequin Nuquin Papatsen nuqui tantiec.

Esus tantiaquido tantiananquioe chiaid

²² Nuquin Papan chiacpadomboen naic bêdambo yanshun mibêđtan Esus tantiaquido utsibo mimbi tantiec. Adećbidi muenquio yec tantiananquionona. ²³ Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibêđantiapimbo icquid icnuc ambi chiaid bēnudtiapimbo iquec. Aidên chiaid tantiashun mimbi Esus tantiabempanêđac. ²⁴ Ĕmbi chiaid bēnudtiapimbo icte Nuquin Papan nuquin tsusedpa dada uamepampic naden chuiquin.

“Uasimbimboec unêsquid matses nec.

Cuête bacuêć bêdambošhê isadboedi badedquio chodquequid nec. Adećbidi matses: ‘Con nabêdi bêdambošhê iquebi,’ queboedi badedquio unêsquid nec.

²⁵ Nuquin Papain nibêđantiapimbo icquid nec. Adnuc ambi chiaid bēnudtiapimbo iquec,” quequin abimbo chuipampic. Aidên chiaidquio mibi chiac caondash.

2*Nuquin Papan chiaid iste bunquionona, quiaid*

¹ Aden Nuquin Papan chiaid tantiash chieshêmênec tabadenda. Utsi muauaina. —Esus tantiaquid nebi —quiaš icsamboec tabadenda. Utsin na isash: —Adquid con na nibêđec —quec chieshêmênec tabadenda. Utsibo chieshênec icsamboec onquenda. ² Adenquio yec Nuquin Papan chiaid iste bunquionona. Tishac चुचात्सॅच् bacuêmp̄i shuma chishte bunquiacimboec Nuquin Papan chiaid iste bunquionona. —Bêđiactšęc tantiaboedi aid isban-isbanquin Nuquin Papan chiacpadomboen natiadquio yantsiabi —qeshun Nuquin Papan chiaid isbanuna. ³ —Esus tantiec bêdambo iquebi —qeshun Nuquin Papan chiaid isbanuna.

Buintadbimboecquid Esus nec, quiaid

⁴ Nuqui tantiaid nadquio iquec. Shubu uanun buintadquio nacnitsinuen istuidshun: —Nêid bêdambo iqueque. Nêidquio naimbi —quiacimboen Nuquin Papan: —Ĕmbi tantiaidquio yec mibi bêdambo iqueque. Ĕmbi chiacpadomboen mibi namenu —capanêdash Esus. Adoaidi matses dadpenshunquio Esus chieshênondash. Padnuen nuqui: —Nuquin Papa yacno puduedmianquid bêdambo iquec —quequin nuqui Esus tantiabempondac. ⁵ Aden Esus tantiaquido icšo isun Nuquin Papan aton shubun icquidobimboecnuc nuqui icmec. Adoac: —Con matses Esus tantiamē, Papa —quequin Nuquin Papa chianequid nuqui yanec. —Nuquin Papa bêdambošhê iqueque. Ĕmbi chiacpadomboenuidi natiadquio iquebi

—quec bēdamboec tabadquidtsen nuqui yanec. Adsho isash: —Bēdambo iquec —quependac Nuquin Papa nuqui caic. ⁶ Aden aton Mado Esus tantiate chuiquin Nuquin Papan dada uamepampic naden.

“Buintad bēdambo icquid istuidash: ‘Nēidquio shubu uanun nitsinemi,’ quiacimboen Edusaden yacno ēbi bēdamboen ismequidquio isadaidbobēd tabadmendambi.

Aid caic: ‘Nēid tantiasho Nuquin Papan abi yacno nuqui tabadmendac,’ quequin abi tantiaquido unēsacsho ēbi yacno tabadmendambi,”

quequin Nuquin Papan ambi chiaid dada uamepampic. ⁷ Aid tantiec: —Bēdambohē iquec —quependac Esus tantiaquido. Utsibombien Esus chieshēnec. Ēndenquimbo Esus choabi icnuc aidēn nate chuiquin Nuquin Papan dada uamepampic naden.

“Buintad bēdambo icquid istuidashi: ‘Nēidquio shubu uanun nitsinemi,’ quetiadquidi isuidacimboen Nuquin Papan namiaid chieshēnac.

Aden buintad isuidaid utsin bedshun shubu uanun nitsinacimboen Nuquin Papan tantiamiacpadomboen utsibon ambi namiaid tantiosh,”

quequin Nuquin Papan dada uamepampic. ⁸ Adshumbic Esus chieshētetsen dada uamepampic naden chuiquin.

“Nuquin Papan abipadquidquio Edusaden yacno isadaidbobēd tabadmiacsho ambocquidon chieshēnendac.

Aid chieshēnquid nadquio iquendac. ‘Cuēte mabud iquec,’ quequin tantienquio yec nidec tocoshquetanec uebudacimboec

ēbi bēdamboen ismequid tantienquio yec unēsash icsano nidendac,”

quequin Nuquin Papan ambi chiaid dada uamepampic. Aden Nuquin Papan chiaid tantiatipimbo icquin Esussten tantiatipimbo iquec. —Adquid icsano nidmendambi —quequin Nuquin Papan tantiacpadec Esus tantiesabo yec unēsash icsano nidendac.

Nuquin Papan matses nuqui nec, quequin chiaid

⁹ Esus tantiesabo dadpen icnubi Nuquin Papan Esus tantiamiaido nuqui nec. Icsambo iccondaidi nuqui Esus tantiamiepondash paposhquiacimboecnuc. Adoac: —Nuquin Papa bēdambohē iquec. Ambi chiacpadomboenuidi niatidquio iquebi —quec bēdamboec tabadquid nuqui yanec. Adembidi: —Con matses Esus tantiameta, Papa —quequin Nuquin Papa chianequid nuqui nendac. Adecbidi: —Nuquin Papa bēdambo iquec —quequin utsibo chuibanquid nuqui nendac. ¹⁰ Ēnden abi tantiesabo icsho Nuquin Papan mibi bēdamboen istiapimbo icquin: —Con matses mibi nec —mibi catiapimbo icpanēdash. Nēbi Esus tantiasho Nuquin Papan mibi bēdamboen isquin: —Con matses mibi nec —mibi caindac.

Bēdamboec tabadte chiaid

¹¹ Ēmbi tantiaido mibi neque. Tantia. Mibi chuinu. —Nuquin Papa yacno tabadendabi —quiash Esus tantiesaba icsate bunacpadec icsainda. —Esus tantienquio yamane —quiash bēdamboec tabadta. ¹² Esus tantiesabobēdi bēdamboec tabadnuna. —Ma aidontsen Esus tantianu —quiash adnuna. Adece mibi bēdamboec tabadsho isun mibi chieshēnquin icsamboen chuishumboedombi Esus tantiabenshun Nuquin Papa naden chiendac. —Mimbi namiaido bēdamboec tabadsho isun Esus tantiabonombi. Mibi bēdambo iquec, Papa —quendac.

¹³ Bēdamboec tabadnuna. —Con Icho Esus matsesēn chieshēnushē —qeshun matses chuiquid dapeddishun chiacpadomboen nanuna. Nuquin nidaidēn tabadquido abitedi chuiquid dapa pedesidente caidēn chiacpadomboen nanuna. ¹⁴ Aidēn: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bēdamboec tabadsho isun: —Bēdambo icquid nec —caquid neque. Aidēn chiacpadomboen nanuna. ¹⁵ Aden Nuquin Papan chiacpadomboen naic bēdamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquio icquin icsamboen chuibodombi ambi icsamboen chiaid ēntsiash.

¹⁶ Satanasēn yuaido icsho Esusēn bedshunaid yec nēbi icsambo icquidēn yuapenquio yec bēdamboec tabadnuna. Icsanuec: —Utsin yuapenquio yec ēbi bunaidūni naimbi —quenda. Nuquin Papan yuambo yec bēdamboec tabadnuna. ¹⁷ Matses abitedi bēdamboen isnuna. Esus tantiaquido icquin nuquibēdtan Esus tantiaquido utsitedi tantiaquionona. Dacuēdampambo Nuquin Papa icsho tantiashe bēdamboec tabadnuna. Chuiquid dapambo pedesidente caid bēdamboen isquin aidēn chiacpadomboen nabanuna.

Yuabo chiaid

¹⁸ Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanquidquio icnubi adembidi nata. ¹⁹ Adece Nuquin Papa tantiaquid yec bēdambo icsho cuesaqui chieshēmēnenquio icsho: —Aid yua bēdambo iquec —quequin Nuquin Papan mibi bēdamboen istiashe. Min icbon chiacpadomboen nata. ²⁰ Ĵicsamboec tabadquid

cuesac chieshēmēnenquo icquidta Nuquin Papan: —Aid yua bēdambo iquec —capatsiash? Padenquo. Nuquin Papan chiacpadquiec bēdamboec tabadquidi cuesaqui chieshtoenquo icsho: —Aid yua bēdambo iquec —Nuquin Papan catsiashe. Bēdambo icta.

Chieshtoenquo yec Esus unēsaid

²¹ —Chieshēnaqui chieshtotiadquo iquebi —¿quecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenquo icnu —gueshun Nuquin Papan nuqui Esus tantiaquid icmepondash. Esus nadondash. Nuquin Papa nuqui cuidmenquo icnu abided cuidadec mēyadec unēspondash. ²² Nuquin Papan dada uamepampicpadquo “muesambo yec icsaisambo icpondash.” ²³ Adquid icsho abi chieshēnquidon mamēnshunaqui Esusēn chushcainquo icpondash. Aidon matonbudnetanquin buanshun cuesten dectanac: —Mibitsen cuidendambi —cainquo icpondash. Adenquo yec nadpondash. —Nuquin Papan matsesēn naidtedi tantiaquid icquin bēdambo icquid abēdi tabadmequin icsambo icquid cuidquin icsano nidmendac —quiash chieshēmēnenquo icpondash. ²⁴ Adash: —Ēbi tantiaquid ma icsaid ucudacimboec bēdamboec tabadnu —quiash nuqui icsaid bedshunec abided cuidadec unēspondash. Adec aton Madoded cuidadec unēsacsho isash nēish bēdānshun Nuquin Papan aton Mado tantiaquido bēdamboen isec. ²⁵ Yuan icho cuenēnacimboen Nuquin Ichō nuqui tantienquo icpondac. Adoboedi nēbi: —Con Icbon ēbi bēdamboen dayun uaquin ēbi bēdamboen namendac —gueshun nuqui Esus tantieque. Bēdamboen nanuna.

3

Bēnēbēdta chido chiaid

¹⁻² Tantia, chidobo. Bēnēchoquid icsho mibi chuinu. Esus tantiaquid icquin min bēnēn chiacpadomboen nata. —Esus tantiec ēbi bēdamboec tabadsho isun Nuquin Papan chiaid tantienquo icboedēmbi con bēnēn Esus tantiabentsiash. “Mimbitsen Esus tantiabenta,” quequin ēmbi chiambobi Esus tantiabentsiash —gueshun min bēnēn chiacpadomboen nata. ³ Bēdamboec tabadquid ictiadquo icquin casēdu payuteuidi tantienda. Adembidi dashcute bēdambo icquid dasiuidteuidi tantienda. —“Bēdambo isadec. Mibi bēdambo iquec,” mabi canu —quiash nacnemēdteuidi tantienda. ⁴ —Bēdambo mibi iquec —camenuc bēdamboec tabadta. Nēishēmēnenquo icquin bēdamboen nabanta. Chieshenquo icquin min bēnēn chiacpadomboen naquid icta. Mibi adquo icsho isash: —Mibi bēdambo iquec —quendac Nuquin Papa. ⁵ Ēndenquimbo isadaidbo tsusedpan chido Nuquin Papa tantiaquid yec adquo icpampic. Aton bēnēn chiacpadomboen naic bēdambo icpampic. ⁶ —Con bēnē con icbobimboec iquec —quequin aton bēnē Abadauan caidēn chiacpadomboen Sada caidēn napampic. Esus tantiaquid icsho mamēnshunaqui min bēnē dacuēdēnenquo icquin aidēn chiacpadomboen naic bēdamboec tabadec Sadapadquido mibi ictsiac. Adquid bēdambo iquec. ⁷ Tantia. Bēnētsen chuinu. Abia uimabudquid icsho min chido bēdamboen ista. Mibēdtan Esus tantiaquid yec Nuquin Papa yacno mibēdi tabadtequid neque. Min chido bēdamboen ista. —Ēbi bēdamboen ista, Papa —quequin mimbi chiaid Nuquin Papan tantienquo icnushe. Min chido bēdamboen ista.

Bēdamboec tabad, quequin chiaid

⁸ Nēbi Esus tantiaquido abitedi chuinu. Tantia. —Nuquin Papan chiacpadomboen nanuna —quiash bēdamboec isananuna. Cuishonquequidbēd cuishonquec shubiquidbēd shubinuna. Adec tantiananquionona. —Ēmbi naiduidi naimbi —quenquo icquin utsibon chiaidtsen nanuna. ⁹ Mibi chieshēnaqui cuidnanenda. Mibi chieshēnquin icsamboen chuishunaqui cuidnanc icsamboen chuishunanenda. Adenquo icquin Nuquin Papa chianeta. —Ēbi chieshēnquid bēdamboen isquin bēdamboen tabadme, Papa —quequin Nuquin Papa chianeta. —Ēmbi bēdamboen isaidon ma aton matses utsibo bēdamboen isnu —gueshun Nuquin Papan nuqui Esus tantiaquido icmiaye. Bēdamboec tabadnuna. ¹⁰ Adec bēdamboec tabadte chuiquin Nuquin Papan dada uamepampic naden.

“Bēdamboec tabadte bunquidēn nadoendac.

Adonante bunenquo icquidēmbi utsibo muauainquo iquendac.

Chieshēnquin utsibo icsamboen chienquo iquendac.

¹¹ Icsamboec tabadboedi bēdamboec tabadendac. Utsibo chieshēnansho isash:

‘Padi. Chieshēnanenda,’ quendac.

¹² Adec bēdamboec tabadsho Nuquin Papan bēdamboen isendac.

Aden bēdamboen isaidon: ‘Ēmbi chuisho tantia. Ēbi bēdamboen ista, Papa,’ quequin abi chuisho Nuquin Papan tantiendac.

Icsamboec tabadshoen bēdamboen istiapimbo iquendac,”

quequin Nuquin Papan dada uamepampic.

Cuesaqi dacuëndenda, quequin chiaid

¹³ ¿Bédamboec tabadshoda bédambo icquidën badedquo mibi cuespatsiash? Padenquo ictsiash. ¹⁴ Bédamboec tabadsho isun icsambo icquidën cuesacsho mibi Nuquin Papan bédamboen istsiashe. Mibi chieshënquido dacuëndënenda. ¹⁵ Dacuëndënenquo icquin: — Con Icho Esuquidistu nec —quequin ambi chiacpadomboen nanuna. Aden mimi Esus tantianuc utsibo: —¿Atotsieshun Esus tantie? —quesho: —“Abided cuidadec unēsaid Esus tantiasho Nuquin Papan ēbi bédamboen isquin unēsacsho abi yacno ēbi tabadmendac,” queshun Esus tantiambi —quequin Esus tantiesabo chuibanuna. ¹⁶ Aden nēishēmēnenquo icquin Esusēn naid chuibanuna. Aden bédamboen chuinuec Esus tantiaquieç bédamboec tabadnuna. —Ēbi bédamboec tabadsho isash ēbi chieshënquin muauaquid: “Bédambo icquidi muauachitombi. Icsachitobi,” ma quenu —quiash bédamboec tabadnuna. ¹⁷ —Ēbi tantiaquid utsibon chieshēnendac —quequin Nuquin Papan tantiacpadomboen Nuquin Papa tantiaquido utsi-utsien utsibon chieshēnendac. Bédamboec tabadquid icsho utsibon chieshēnaqui nuqui chieshtoenquo icsho isash: —Mibi bédambo iqueç —quetsiash Nuquin Papa nuqui caic. Icsambo icsho quēnēn nauedaiddi nēishenquo icsho: —Mibi bédambo iqueç —cainquo ictsiash Nuquin Papan.

Esus unēsaid tantia, quiaid

¹⁸ Chieshēnaqui Esusbimboec chieshtoenquo yec bédamboec tabadnuna. Aid icsaisambo yequi nuqui icsaid bedshunec abided cuidadec unēspondash. Aden Nuquin Papa abi tantiaquido bédamboen ismenuec abentsecquiobi unēspondash padpidec unēsenuquo icnuec. Aton dada unēsambi aton tantiate unēsabi icpanēdash. ¹⁹ Adec aton dada unēsambi aton tantiate icnuc ēndenquimboshē Noe caidēn matses abi tantiesabo icsho Nuquin Papan cuidquin unēs uampido uidēn uashun quēnēn sauedampicno Esus nidpanēdash. Ambo nidshun Nuquin Papan cuidpampido Esusēn ambi naboeç chuibampanēdash. ²⁰ Naden Nuquin Papan aido cuidquin unēs uampic. Ēndenquimboshē aton matsesbēd tabadec Noe bédambo icnubi aton matses icsamboshē icpampic. Adnubien Nuquin Papan: —Mates icsaquido abitedi uesquin unēs uanuen nidaiddi abitedi acte mabudadmembique. Baded cano dapa nacnen —quequin Nuquin Papan Noe caid chuiampic. Adoac badedquo cano dapa nacnemēdenquo yacpadembi Nuquin Papan badedi cuidenquo icpampic: —Ma abi icsaid ēnshun ēbi tantianu —queshun. Adnubien cano dapa nacnentanec Noe chedo Stedpactsēc cano dapa antabēdtopampic. Adnubien aido antabēdtoaid cano dapa acten bedtoac nuadtopampic. Utsiboen acte mabudadmiaiddi mēntoadbudnepampic. Noe abi tantiaquidquo icsho Nuquin Papan cuidenquo icpampic.

²¹ Adembidi Esus tantiasho nuqui cuidenquo iqueç. —“Esus tantiaquid nebi,” quequin utsibo ismequin acten mentomembi —queshun nuqui acten mentomec. ¿Bēchish ucquinda nuqui adodi? Padenquo. Nuquin Papa naden chuiquin: —Esus tantiaquin icsaid ucacimboen mimi chiacpadomboen natiadquido iquebi, Papa —quequin nuqui adoeç. Aden abi tantiasho Nuquin Papan uincuenēdaiddi Esuquidistun nuqui cuidmenquo iqueç. ²² Aidi uincuenash Nuquin Papa yacno nidash aiddi tsadoaic abitedishun Icbombo yanoac. Abitedimbo chuiquid dapa icquin ambi chiacpadomboen abitedi namendac. Nuquin Papan abi yacnoshon uaido mayan bédabo bédamboen namequimbic Satanas aton yuabo mayan icsabobēda Esusēn cuidendac.

4*Bédamboec tabadnuna, quiaid*

¹ Nuquin Papan tantiacpadomboen nasho utsibon chieshēnquin mēyanaqui Esus chieshtoenquo icpondash. Adembidi chieshēmēnquidēn chieshēnaqui adecbidi chieshtoenda. Abided cuidadec unēsaid Esus tantiaquin nuqui icsaid nuqui ēnendac. ² Aiden nuqui tantiacpadomboen nainquo icquin Nuquin Papan chiacpadomboen natiadquido nuqui iquendac. ³ Nuquin Papa tantiesabon nacpadomboen Nuquin Papan chiaid mimi yuen niac-niacpondac. Utsin chido chudquinc utsin bēnē chudmequinc tantienuen acte paēmo icquid acquin: —Nēid papa canu —quequin matsesbimboecnuc nacnenquinc mimi capondac. Adec icsateuidi bunec mēmuntiapimbo mibi icpondac. Adquid iccondaiddi nēbi bédamboec tabadta. ⁴ Adec bédamboec tabadsho isun mibēd icsaondaiddi: —¿Atotsieshun nuqui naondacpadomboen nainquo ique? Mimi Nuquin Papa caid nibēdec —quequin mibi icsamboen chuiquin mibi mamēnshunendac. ⁵ Aden mibi mamēnshunquid Nuquin Papan cuidendac. Cuidnumbi matsesēn naidtedi tantiaquid icquin Nuquin Papan: —¿Mitsipaden nao? ¿Ada bédamboec tabado? —cac ēnden unēsaidobēdtan unēsabi icquidote-dishun ambi naidtedi uesquin chiendac. ⁶ Aden abēdi tabadmete tantiaquin Nuquin Papan namiac Esus chuibenequidon chuibenepondash. Adoac Esus tantiaquido yanash Nuquin

Papan Adan cuidquin unēsquid icmiacpadec unēsquid yec unēsashic Nuquin Papabéd tabadendac padpidec unēsenuio yec.

Utsibo nashununa, quiaid

⁷ Tántia. Mibitedi chuinu. Nuquin Papan cuidte nēbi iqueque. Esus tantiec nuqui icsate bunaid ēnash mēmunc bēdamboec tabadnuna. —Ma ěmbi abi chianesho Nuquin Papan bēdamboen tantianu —quiash adta. ⁸ —Tántiananquido chieshēnanec cuidnante bunenquio iquec —quiash ēnēdenquio yec tantiananquionona. ⁹ Nuquibēdtan Esus tantiaquido isedec chosho bēdamboen isnuna. Shubu utsinquido ēnapenuēsh chosho adembidi chieshēnenquio icquin min shubun yued. ¹⁰ Nuquin Papan tantiamiacpadomboen nuquibēdtan Esus tantiaquido nashuntiad. Esus tantiaquidquio icmenuen chieshenquio icquin nanuna. ¹¹ ¿Ada Nuquin Papan Esusēn naid chuibanquid mibi icmiac? Adquid icquin Nuquin Papan chaidquio chuibanquiota. ¿Ada Nuquin Papan mibēdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ēbi nashunquid bēdamboen namequid Nuquin Papa bēdamboshē iquec,” ma ěmbi nashunaido quenu —qeshun utsibo nashununa. —Abitedishun icombo yec Nuquin Papa bēdamboshē iquec —canuna ēnenquio icquin.

Chieshēnaqui chieshtoenuio icte chiaid

¹² Ēmbi tantiaido mibi neque. Tántia. —¿Atotsieshun matsesēn ěbi chieshēmpēba? —¿quecta ique? ¿Mibentsēquida chieshēndic? Ma Esus tantiaquido dadpenquio chieshēmpayoc. ¹³ —Chieshēnquin Esuquidistu comapenen mēyanacimboen Esus tantiesabon ěbitsen mēyanosh. Esus tantiaquid icshoeni adochitosh —quiash Esus tantiec bēdambo icnuna. —Utsibon chieshēnaidi abi tantiaquid ambi namiacno buanuec Nuquin Icho Esus choec —quiash abi chote ushēn cuishonquenush adnuna. ¹⁴ —Esuquidistu tantiaquid nec —qeshun chieshēmēnquidon natiamiaid mibi bēdambo iquendac. Nuquin Papan Mayan mibēd tabadquin Nuquin Papan yacno tabadte mibi tantiamequin mibi bēdambo icmendac. ¹⁵ Utsibo icsasho abi chuiquidēn natiamequin cuidquid. Cuesunianquid yec ampequid yec chieshēmēnquin icsamboen chuishunquid yec quec icsasho chuiquidēn cuidsho isun: —Bēdambo iquec —catsiambi. Adec icsainda. ¹⁶ Esus tantiaquid icsho utsibon chieshēnac dachuēdenda. Adec dachuēdenquio icquin: —Nuquin Papa bēdamboshē iquec. Aton Mado Esus tantiaquid icmiac bēdambo iquebi —quequin ēnenquio icquin Esus tantianuna. ¹⁷ —Nuquin Papan cuidte ushē nēbi icnuc ambi con matses caido Esus tantiaquido chieshēmēnquidon natiamendac —quiacpaden nēbi tauaquin mibi natiamec. Adsho isun: —Chieshēmēnquidēn chieshēnac ěmbi tantiacpadomboen abi icsaid ēntsiash —qeshun Nuquin Papan: —Natiamenda —cainquio iquec. Aden abi tantiaquido icsaid ěmete bunquin nashun ¿bēdiactśēcta abi tantiesabo cuidpec? ¹⁸ Naden chuiquín Nuquin Papan dada uamepampic. “Aden chieshēndeniact natiambo yan-yanequi unēsash Nuquin Papabéd abi tantiaquido tabadendac. Nuqui adnuc ¿bēdiactśēcta ambi chiaid niac-niacquido Nuquin Papan cuidpec? Padenquio. Comapenen cuidendac,” quequin dada uamepampic. ¹⁹ Nuquin Papan tantiacpadec mēyadec Esus tantiaquid ma nadpanuna. —Ēbi uaquidēn Nuquin Papan ambi chiacpadomboen ěbi bēdamboen namec. Aid tantiec bēdambo iquebi —quiash ma bēdamboec tabadpanuna.

5

Esus tantiaquido chuibanquid Petedon chiaid

¹ Tántia. Esus tantiaquido chuibanquido icsho mibi chuinu. Mibipadquid Esus tantiaquido chuibanquid nebi. Paēmboshē icmequin Esuquidistu unēs uasho isondambi. Aidēn padpidec nidaidēn choshon abi yacno buanuen nuqui beduaneque. Tántia. ² Icho yua cudasacimboec mibēd icquido Esus tantiaquido cudasta. —Esus tantienquio yanushē —qeshun: —Nuquin Papan chiaid niaquenquio yec bēdamboec tabad —quequin chuibanta. —Esus tantiaquido chuibanquid icta —cac: —“Padi,” quetiadquio icquimbi naimbi —quenquio icquin: —Aden Esus tantiaquido nashumbantsiambi —quec Esus tantiaquido chuibanquidquio icta. —Piucquid dadpen bednun nanu —quenquio icquin Nuquin Papan chiacpadomboen natiadquio yec Esus tantiaquido chuibanquid icta. ³ —Nēidtedi Esus tantiaquido bēdamboen name —caidtedi bēdamboen isequi chushcanenda. Adenquio yec: —Ēbi yacpadec ma tabadnu —quec bēdamboec tabad. ⁴ Aden Esus tantiaquido chuibanquidēn bēdamboen namesho isun Nuquin Icbon nidaidēn padpidec choshon utsibo ismequin: —Nēid bēdambo icquid nec —qeshun chuibanquid ambi namiaidobēdta abi yacno buanendac.

Esus tantiaquidon nate utsi chiaid

⁵ Tantia, caniabo. Mibitsen chuinu. Mibi chuiquid dapabon chiaid niaquenquo icquin aidèn chiapadomboen nata. Aidtedtsèqui caniabo chuishumbic mibi yacnocquidotedi chuinu. —Èbiuidtsèqui bédambo iquebi. Èmbimbo naiduidi naimbi —quenquo icquin utsin nacpadomboentsen nata. Aden chuiquin Nuquin Papan ambi chiaid naden dada uamepampic.

“Nuquin Papa tantienquo icquin aton matses utsibo tantienquo icquin ambi naiduidtsèqui nasho: ‘Adquid icsambo iquec,’ catsiash Nuquin Papan.

Utsimbien Nuquin Papa tantiaquin utsibon naidtsen nasho Nuquin Papan bédamboen isquin bédambo icmec,”

quequin Nuquin Papan ambi chiaid dada uamepampic. ⁶ Aden Nuquin Papan chi-acpadomboen nabanuna. Nadatiambo icquid yec abitedishun Icbombo Nuquin Papa neque. Utsibon chieshènaqui chieshtoenquo icnuna. Adec chieshtoenquo icsho ambi tantiapadèn utsibo ismequin: —Èbi tantiaquidquo mibi neque. Èbèdi tabadec cho —nuqui caindac Nuquin Papan. ⁷ Aidèn nuqui tantieque. —¿Atotsimbi pepeba? ¿Èbida cuespeba? ¿Con matsesta unèspeba? —quequin nuqui dacuèdaidtedi Nuquin Papa chuinuna.

⁸ Nuqui icsate bunacpadec icsainquo icquin Esusuidi tantianuna. Esus tantiaquido icsho Satanasèn nuqui chieshènquie. Esus bedshunuen nuqui icsametiadquo icquin bédin nèish nibènacimboen ambi icsametequid Satanasèn ènenquo icquin nibèbeneque. ⁹ Ista. Icsamenda. Chieshtomenda. —Satanasèn icsamechitoshe —qeshun Nuquin Papan chiaid niac-niaquenquo icquin Esus tantiaquionona. —Èbi chieshènacpadomboen Esus tantiaquid utsibo nidaid utsi-utsiec yacno tabadquido utsibon chieshènac caosh —qeshun chieshtoenquo icquin Esus tantianuna. ¹⁰ Aden utsibon chieshènaido yec yuec-yuecpactsèc nuqui tabadec. Adshobien abi yacno buanquin nuqui bédambo icmequidèn Nuquin Papan Satanas nuqui icsa uamenquo iguendac. Adembidi Nuquin Papan nuqui bédamboen isquid icquin dayacquio yacimboecnuc chieshtoenquo icquid nuqui icmendac. ¹¹ Èmbi aden chuisho tantiashun: —Mibi bédamboshè iquec, Papa. Mimbi tantiapadomboen abitedi mimbi namendac. Abitedishun Icbombo mibi nec, Papa —Nuquin Papa canuna ènenquo icquin.

Petedon ènquimbi chiaid.

¹² Esus tantiaquidquo Sidac caid nèidtedtsèqui èmbi dada uaboed mibi yacno buamembi. —Esusquo isondambi. Aid tantiasho Nuquin Papan matses bédamboen isbenendac —quequin abimbo mibi chiombique. Chieshtoenquo icquin Esus tantianuna. ¹³ Nuquin Papan tantiamiac nuquibèdtan Esus tantiaquido èmbi Babidonia caid yacnocquidon: —Aido unèsquo iquec —mibi caosh. Babidonia caidbidi Doma caic. Con madobimboecquid Madcosèn —Aido unèsquo iquec —mibi caosh. ¹⁴ —Èbèdtan Esus tantiaquido nec —quiash: —Mibi unèsquo iquec —cananuna. —Ma Nuquin Papan mibi Esus tantiaquidotedi bédambo icmepanu —quequin Nuquin Papa chianembi. Padi. Aidtedi chuiquin dada uaombi.

PETEDON DADA UAID 2

Tauamboen chiaid

¹ Petedo Simon caid nebi. Abëd icquid yec aton yuambo icsho Esuquidistun: —Ëmbi naid chuibeneta —caidquio nebi. Ëbëdtan Esus tantiaquido mibi neque. Mimi iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bëdamboen isaido nuqui nec. ² Ëbëdtan Esus tantiaquido icsho mibi tantiaquin Nuquin Papa chianembi naden. —Aidon Esus tantiatšecsho mibëdta Esus tantiamequin bëdambo icme, Papa. Aido bëdamboen isquiota, Papa —quequin Nuquin Papa chianembi.

Nuquin Papan bëdambo icmete chiaid

³ Comapenen tantiaquid icquin Nuquin Papan namiac aidën chiaid niac-niacte bunenquio yec Esus tantiaquido bëdamboec tabadec unëšash Nuquin Papa yacno tabadendac. Abipadquid utsi nibëdnuc bëdambošë icquid icquin Nuquin Papan Esus tantiamiaido nuqui nec. ⁴ Abipadquidquio Esusën chiondacadomboen abi tantiaquidobëdta Nuquin Papan aton Mayan tabadmequin bëdambo icmec. Aden abipadquio icnuc bëdambo icmiac icsate bunenquio yanec nuqui bëdamboec tabadec. Utsibo icsateuidi bunec icsaquionobi nuqui bëdamboec tabadendac.

⁵ Aden Nuquin Papan Esus tantiamiaido yec dayacquio yacimboec ënëdenquio yec bëdamboec tabadnuna. Adecbidi Nuquin Papan chiaidquio tantiec tabadnuna. ⁶ Aden Nuquin Papan chiaidquio tantiec nuqui icsate bunacpadec icsainquio icquin mëmununa. Aden mëmunquid yec nuqui chieshëncquidbëdi chieshënanenquio yec chieshtoenquio icquin Esus tantianuna. Nuquin Papatsen tantiec bëdamboec tabadnuna. ⁷ Aden Nuquin Papabëdta Esus tantiaquido yec nashunanquionona. Adece nashunanquioquin Esus tantiesabo tantianuna. ⁸ Ëmbi chuiboedtedi nabanquin chieshtoenquio icquin adenuidi nanuna. Aden naquin Esus bëdiactšec tantiatšecboedëmbi chieshtoenquio icquin nuqui Esus tantiaquiotšiac. ⁹ Ëmbi chuibocpadomboen naisa pacumëdacimboec iquec. Adquidon: —Aton Mado Esus tantiasho icsaid ucudacimboecnu Nuquin Papan nuqui bëdamboen isec —queboedombi bëpiscudquin tantienquio yanec.

¹⁰ Ëbëdtan Esus tantiaquido mibi neque. Tantia. Mibitedi chuinu. Ëmbi aden chuisho tantias chieshtoenquio icquin Esus tantiec bëdamboec tabadnuna. Adece tabadquin naden nuqui tantierendac. —Ëndenquimboshë ëbi tishabi icnuc ëbi caic: “Esus tantiamendambi,” quequin ambi chiampicpadomboen Nuquin Papan nëbi tantiamiac Esus tantiabonembi —quequin nuqui tantierendac. Aden tantiec Esus tantienquio icquid nuqui yanenquio ictsiac. ¹¹ Adece bëdamboec tabadash unëšacsho: —Ëbi tantiaquid mibi neque. Ëbëdi tabadec cho —qeshun ambi namiacno abëdi tabadmequin Nuquin Icho Esuquidistun nuqui bëdambo icmendac padpidec unësenquio icnuc. ¹² Ëmbi aden chuiboedtedi mimi tantiondac. Aden tantiabosh Esus tantiec mibi bëdamboec tabadcuendac. Aden mimi tantiondaidi mibi chuided-chuidedendambi. ¹³ —Nëbi unësendabi —queboedi ëbi unëšabi yapadambi mibi chuided-chuidedendambi. ¹⁴ —Adënquio mibi unësendac —quequin Nuquin Icho Esuquidistun chiacpadën nëbi unëšebi. ¹⁵ —Ëbi unëšan ëmbi chiondaid ma bëpiscudenquio icnu —qeshun mibi chuiquin dada uanu.

Nuquin Papan Esus chiaid

¹⁶ ¿Muaquindambi mibi Esus chuidionda? Padenquio. —Nadatiambo icquin nabanquin Esusën ismedenepondash. Adquid yec abuc nidnush: “Padpidec nidaidën choaindabi,” quepondash Esus —¿quectabi muadionda? Padenquio. Ëmbimbo isondaidquio mambi mibi chiondac. —Nëid con Madombo nec —quequin Nuquin Papan ismiac Esus isondambi. ¹⁷⁻¹⁸ Nadquio iccondash. Macuësh dapan dectatoash Esus bëchamauanquic iccondash. Adnubien Nuquin Papan: —Con Madombo nec. Ëmbi tantiaidquio yec bëdambošë iquec. Nëid isec bëdambo iquebi —quequin abucshun dacuëdampamboecnu chuipondash.

¹⁹ ¿Ëmbentsëquidambi Esus chuibanquin nape? Padenquio. Ëndenquimboshë Esus chote tantiamequin Nuquin Papan isadaidbo tsusedpabo dada uamepampic. Pacuënedacimboen utsibon tantienquio icnubi paposhquiacimboecnu Esus chote tantiamenuen dada uamepampic. Aden Nuquin Papan chiaid isec onquequin bëdamboen tantianuna: —Muaquidon chuisho tantiamane —qeshun. —Abitedishun Icbombo nebi —quequin ismenuec padpidec Esus choabi yapadambi Nuquin Papan chiaid bëdamboen tantianuna. ²⁰ —Nuquin Papan nadoendac —quequin ¿ambembi chiaidta nuquin tsusedpabon dada uapampic? Padenquio. ²¹ Ambembi chiaid dada uainquio

icquin Nuquin Papan chiaidquio dada uapampic. Nuquin Papan Mayanën tantiamiac abimbo chuiampic.

2

Muaquido iquendac, quequin chiaid

¹ Nuquin Papan chiaidquio isadaidbo tsusedpabon chuinubien utsibo: —Nuquin Papan nadoendac —quec muapampic. Nēbi adquidbidi iquendac. Mibi yacno puduedash ambembi chiaid chiec muasho tantiaashun: —Mibi muequi nec —badedquio cainquio mimbi iquendac. —Abided cuidadec unēsaid Esus tantiaquid nebi —queboedi: —Esusēn chiacpadamboen natiapimbo iquebi. Adshobi Nuquin Papan ēbi cuidenquio ictsiash —quequin muaquin chiendac. Adquid Nuquin Papan icsambo icquido cuidacno nidmequin cuidendac. ² Aden muaquidēn chuisho tantiaashun Esus tantiauidtsēchoedombi dadpen-shun aidēn chiaid tantiendac. Adashic Nuquin Papan chiaid niac-niaquec muaquido tabadacimboc padpidec icsamboec tabadoaindac. Adsho isun: —Esus tantiaquidobi icsambo iqueque. Is —caindac utsibon. ³ Muaquido tantienda. Aidon piucquid comapenec bunquin ambembi chiaidquio mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantiaashun aido cuidendac. —Adquid icsano nidmequin cuidendambi —quequin ambi ēndenquimboshē tantiapampicpadamboen comapenen Nuquin Papan cuidendac.

⁴ Ambi chiaid niac-niacsho icsano nidmequin cuidquid Nuquin Papa nendac. Ēndenquimboshē nidaid uabi icnuc ambi abi yacnoshon uaido mayan utsin-utsinquien: —Ēmbiquen abitedi namenu —quequin ambi chiaid niac-niacsho isun Nuquin Papan icsamboshē yacno nidmequin cuidpampic. —Chian anēdēnquiacno nēsecanumbi nabono —qeshun aden tauamboen Satanas chedo cuidpampic. ⁵ Adshumbic yuecquio ictanquin matses abitedishun ambi chiaid niac-niacsho isun nidaid abichobi mabudadmequin Nuquin Papan matses uesquin unēs uapampic. Noeuidtsēqui padambo icpampic. —Bēdamboec tabadnuna —quequin Nuquin Papan chiaid chuibanquid icsho Noe chedo Stedpactsēc Nuquin Papan cuidenquio icpampic. ⁶ Adshumbic yuecquio ictanquin matses utsibon Nuquin Papan chiaid niac-niacsho cuidquin nēdēncapampic. Shubu dadpen icquid nēid daēd icpampic. Nēidic Sodoma caid. Nēidic Comoda caid. Ambo tabadquido aton shububēdi abucūesh taboadampamboec paēdquidēn pichiquepampic matses nibēdquio yec. —Aden icsambo icquido cuidquid nebi —quequin Nuquin Papan adopampic. ⁷⁻⁸ Sodoma caid yacnocquid abentsēqui Dod caid pichiquenquio icnuc Nuquin Papan cuemepampic. Bēdambo icquid yec: —Nuquin Papan chiaid niac-niaquec nēmo icquido icsamboecuidi tabadec —quec shubiec tsadsho cuemetsaidi pichiquiambo ictsampic. ⁹ Aden abi tantiaquido daēd Noebēdta Dod Nuquin Papan cuidambo icpampic. Adembidi nēbi abi tantiaquido cuidenquio icquid Nuquin Papa nendac. Utsibon chieshēnāidi abi tantiaquido bēdambo icmequid nendac. Icsambo icquido cuidquid icquimbi matses cuidte ushē choabi icnuc nēbi tauaquin icsambo icquido Nuquin Papan cuidendac.

¹⁰ Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiate shēcuē nibēdacimbocn abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidtsēqui bunebi —qeshun ambi naiduidtsēqui naic. Dacuēdtiadquidi dacuēdenquio icquin Esus tantiaquido chuiquid dapa caic: —¿Bēdamboen namequidta nedic? —quequin icsamboen chuishunec. ¹¹ Padnuen Nuquin Papan abi yacnoshon uaido mayan bēdabon adec muaquido chuishuntiapimbo iquec. Muaquido bēdiactsēc tantiaquido icnubi comapenen tantiaquido icquin mayan bēdabon Nuquin Papa naden chienquio iquec. —Aido baded quid, Papa —cainquio iquec. —Ambi cuidte ambentsēqui tantiaquid Nuquin Papa nec —qeshun adoenuo iquec. ¹² Padnuen ēmbi chuiboedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bēdi cuidnushe quepadic? Padenquio. Adembidi abi cuidte tantienquio icsho Nuquin Papan cuidendac.

¹³ Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquiec inchēshēn icsash badiadēntsen icsaic: —Bēdambo iquebi —quec adquido cuishonquec. Esus tantiaquin penuec mibi cho-choacno mibēd tabadec muaquidotsen chopac caosh. —Esus tantiaquidbidi nebi —quiash mibēd tabadec aid icsasho isash: —Esus tantiaquid abitedi icsaic —quependac utsibo. ¹⁴ Muaquido utsin chido mēismec tabadec. Nuquin Papan chiaid niac-niaquec icsaic ēndenquio iquec. Adquid icquin Esus tantiaquidquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. ¹⁵ Nuquin Papan chiaid niac-niaquec icsateuidi

bunquieq. Ĕndenquimboshē matses utsi Beyod caidēn mado Badan caid Nuquin Papan chiaid chuiquid yequi piucquid dadpen bunec Nuquin Papan chiaid niactiadquio icpampic. ¹⁶ Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan oncamiac: —¿Atotsieshun icsamboen nai? — cac aton icbo icsanuec niduidboedi: —Auchbidi nidnu —quepampic. Adquio muaquido iquec. Piucquid comapenec bunec Nuquin Papan chiaid niactiadquio iquec.

¹⁷ —Mibi bēdambo icmete chuinu —quequin muaquidon chuisho tantiash: —Ai, mibi chiacpadte bunebi —queuidtsiash matses. Uispa dadpen icboedi badiadnuc abu chēshēn bētinacsho isash: —Tanunquien badiadec —queuidacimboc: —Ambi chiacpadquio bēdambo icnu —queuidtsiash matses. Adec muasho tantiash: —Adquid chian anēdēnquiacno nēsecaindambi —quendac Nuquin Papa. ¹⁸ Adec muaquido abembi onqueuidequi onquec. Utsin chiaid tantienquio icquin ambi tantiaiduidi chiec naden. —Mibi bunacpadeq mibitsen icsata —cac Esus tantiatsēcquin Nuquin Papan chiaid nauidsēcquimbi abi icsaid ēnuidboedi padpidemboec icsaquieq. ¹⁹ Muaquidon: —Nuqui bunaiduidi nanuna. Adec nuqui bēdambo ictsiac —quequin chuibanec. Adboedi abi icsaid ambembi ēntiapimbo yec icsamboshē iquec. Adec icsamianquidēn chiacpadomboen naic matses icsaquid nendac. Adecbidi ambi naiduidi naic icsaquid matses nendac. ²⁰ Nuqui cuidmenquio icquid Esuquidistu tantiatsēcquin abi icsaid ēnuidboedi padpiden Nuquin Papan chiaid niac-niaquec icsamboshē muaquido yanec. ²¹ Ĕnden Esus chiondac: —Ai, aid tantiembi —quetsēcondaidi aden Esus tantienquio yanec icsamboshē yansho isun: —“Esus tantiembi,” quenquio icpatecnēdan —caimbi. ²² Adquid chuipanēdash naden. —Ambi ucubadai opan chequid. Opa nesmiaqui nidaidēn nocoshquec padpidec bēchishoquid —quepanēdash. Adecbidi Esus tantiauidtsēcquido icsaid ēnuidboedi muaquid padpidemboec icsadenechitequien iquec.

3

—Esus chote chiaid

¹ Tantia. Ĕmbi tantiaido mibi neque. —Pabiate cuembo icquin Nuquin Papan chiaid tantiaquieq bēdamboec tabad —quequin mibi chuiquin dada uaondambi. Adomboembidi mibi chuiquin nēid dada uanu. ² Esus chote chuiquin Nuquin Papan isadaidbo tsusedpabo dada uamepampid ¿ada tantie? Adomboembidi nuqui cuidmenquio icquidēn Nuquin Icho Esusēn chuibanondash. Aidēn chiondaid abēd ictened utsin mibi chuinēdash. Aden chiaid tantiaata. Aidbidi chuinu. ³ Esus nidaidēn padpidec choabi icnuc Esus tantiesabon abi icsate bunaiduidi naquin Esus mamēnshunendac. ⁴ —“Utsi uanuec padpidec nidaidēn choaindabi,” ¿quenēdaida chopec? Ma choenquio icpayoc. “Nēbi Esus choec,” quedenedi con mēdimbo abitedi unēsbudniac. Esus choambobi —quependac Esus tantiesabo. Nadembidi chiendac. —Taēec nidaid yanubi matses nidaidēn tabadpampic. Adecbidi aton tsyuecquido tabadpampic. Nēbi adecbidi matses nidaidēn tabadec. Ĕbi nibēdnuc adiquendac. Utsi uanuec Esus choenquio iquec —quependac Esus tantiesabo. ⁵ ¿Abimboda capec? Aden chuiquin Nuquin Papan chiaid tantienquio iquec. Ĕndenquimboshē ambi uaidtedi nibēdnuc: —Ad icta —quequin Nuquin Papan chiac abu yec nidaid yec quiampampic. Acteuidpambo icboedi nidaid nēnantan yampampic. Aden Nuquin Papan abitedi uapampic. ⁶ Aden abitedi uambic yuecquio ictaniash matses icsambo icsho isun ambi chiacpadomboen ue dapa chomeshun nidaid mabadadmequin aid matses Nuquin Papan uesquin unēs uapampic. ⁷ Aden ambi chiacpadomboen Nuquin Papan naindac. Ambi icsambo icquido cuidte ushēn abu nidaidbēdta nēdēncaindac. Adembidi matses Esus tantiesabo cuidendac.

⁸ Ĕmbi aden chiac: —¿Tedectsiash Esus chopeba? —¿quecta ique? Tantia. Mibi chuinu. Ambi tantiacpadēmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsēcbimboecquid nec. Adecbidi seta abentsēqui icquidquio iquequi dadpen seta icquidbimboecquid nec —quequin Nuquin Papan tantiec. ⁹ —Ĕndenquio: “Padpidec choendabi,” quenēdaidi Nuquin Icho Esus choenquien icchitec —quenubien Nuquin Papan: —Chiata. Cuidte bunenquio iquebique. Utsibontsen Esus tantiashun Ĕmbi chiaid niac-niachoedi ēnushe. Isbono. Ĕnacsho icsamboshē yacno nidmenquio ictsiambi —queshun Nuquin Papan Esus chomiabi iquec.

¹⁰ Adnubien matses: —Nēbi choec —quenquio icnuc Esus badedquio choendac. —¿Nēid ushēmbi ampequidēn con na ampec —quequinda tantiapec? Padenquio. Adembidi: —Nēbi choec —quequin tantienquio icnubi Esus choendac. Choshon acquimboen toncac abitedi nibēdanendac. Uispa yec inchēshēn ushē yec badiadēn ushē yec queboedi nibēdquiecnuc nēdēncaindac. Nidaid abichobimbo nēdēnquenuc aidēn icquidtedi nēdēnquendac nibēdquio yec. ¹¹ —Nuquin Icbon nac adquidtedi nēdēnquendac —quiash Esus tantiec bēdamboequien tabadtiad. ¹²⁻¹³ Esus chobon Nuquin Papan cuidquien ambi uaidtedi nēdēncaindac. Abu

yec uispa yec inchëshën ushë yec badiadën ushë yec queboedi nêdëncaindac nibêdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidën bêdambo icquidoudiquio nuqui tabadmendac. Êmbi aden chuisho tantiash: —Ma Nuquin Papan Esus chomenu —quequin utsibo tantiamequin Esusên naid chuibanec bêdamboec tabadnuna.

¹⁴ Êmbi tantiaido mibi neque. Tantia. —Choshon abi yacno Esusên nuqui tabadmendac —quec chieshtoenquio yec bêdamboec tabadnuna. Choshon Esusên: —Mibi icsambo iquec —cainquio icnuc Nuquin Papan chiaid niaquenquio yec bêdamboec tabadnuna. ¹⁵ Adec tabadquimbi êmbi chuiboad tantiashun naden tantia. —“Utsitsen ma Esus tantiaquid yanu. Aden Esus tantiasho aid cuidenquio ictsiambi,” qeshun Nuquin Papan Nuquin Icho cho-miabi iquec —quequin tantiec tabadta. Adembidi mibi chuiquin nuquin buchibimboec-quidên Pabadon dada uapaccondash. Nuquin Papan tantiamiac bêdamboen chiaccondash. ¹⁶ Êmbi chuiboadbidi chuiquin dada uadenepaccondash. —Pabadon dada uaid abentse-abentsec badedquio tantiadenuio iquec —qeshun utsibon aidên chiacpadomboen chien-quien icchitosh. Nuquin Papan chiaid niac-niactiadquio icquidon Pabadon chiaidquio tantienquio icquin icsamboen chiosh cashnad-cashnadacbitsêcquiecnuc. Nuquin Papan chiaidquio nuquin tsusedpabon dada uapampidtsen isbanshun adembidi tantienquio icquin icsamboen chiec. Adquido Nuquin Papan cuidendac.

¹⁷ Êmbi tantiaido mibi neque. Tantia. Chuinu. —Abimbo tantienquio icquin Nuquin Papan chiaid niac-niacquidon muauaic —êbi qesho tantiashun: —Esus tantienquio yamane. Muasho tantiatipimbo iquebi —quequin ênenquio icquin Esus tantianuna. ¹⁸ —Abi tantiaquid cuidmenquio icnuec abided cuidadec Esus unêspondash. Aid tantiasho Nuquin Papan nuqui bêdamboen isec —quequin Esus bêdiactscêc tantiatsêcshun comapenen Esus tantiaquionona. Adshumbic: —Nuquin Icho Esuquidistu bêdamboshê iquec —canuna ênenquio icquin. Padi. Aidedi chuiquin dada uaombi.

UANËN DADA UAIDËMPI 1

Nuquin Papabéd ënëdenquoio yec tabadte chianiaidquoio

¹ Abia Yampidënenquoio matsesun Esuquidistun chuibansho ëbéd icquidobédtan tantiapadenembi. Aidi ëbéd icquidobédtan ispadenembi. Aidi ëbéd icquidobédtan mishpadenembi. Aidi Nuquin Papabéd ënëdenquoio yec tabadte chianiaidquoio nec. Aidquoio chuiquin dada uaid nëid nendac. Aidquoio tantiaquido icquin bédamboen ista. ² Aid, abuc Nuquin Papabéd ënëdenquoio yec tabadboedi nidaidënuësh matses icnuec chopanëdash. Choshon abipadquoio yec Nuquin Papabéd ënëdenquoio yec tabadte ismequin chianiaidquoio ëbéd icquidobédtan isteneshun chuibanec nebi. ³ Aidi ëbéd icquidobédtan ispadened adembidi ëbéd icquidobédtan tantiapadenec chuibanec nebi ma mibitedishun tantiaish shubu abentsëquën tabadac bimboec ma tabadpanu queshun. Nuquin Papa tantiaquid icquin aton Madombo Esuquidistu tantiec Nuquin Icbobéd shubu abentsëquën tabadac padec nuqui bédamboec tabadendac. ⁴ Esuquidistu tantiaquidtedi shubu abentsëquën tabadac bimboecquido nec, quequin chuiquin dada uaimbi ma aid tantiaish, Cuishon. Bédambo iqebi, quiacpadec ma mibitedi tabadpanueshun.

Nuquin Papa Bédambocquid Abentsëcquiobi nec quiaid

⁵ Esuquidistun Nuquin Papa chuibansho nuqui tantiondacadomboen chuoaimbique. Tantiata. Nuquin Papa Bédambocquid Abentsëcquiobi nec. Icsapenquiocquid aidi nec. ⁶ Adquid icnuc, Nuquin Papan shubun icquid nebi, queboedi ambi chiaid niacquin abipenquoio chuiquid nuqui nendac. ⁷ Nuquin Papan chiacpadomboen nabanquidquoio iquec abi tantiaquid utsibobéd shubu abentsëquën tabadac bimboecquid nuqui nendac. Adquid nuqui icmenuec nuqui icsaid bedshunash abided cuidadec Nuquin Papan Mado Esuquidistu unëspondash. Aid unësnëdaidënenquoio nuqui icsaidtedi paucbantequid nendac.

⁸ Icsaisa nebi, quequi mua uadquin abipenquoio chuiquid nendac. ⁹ Icsaobique. Ëbi pauc, Papa, qesho tantiaishun, Con mado unëso isun abi tantiaquid icsaid bëpiscudnu, quequin ambi chiacpadomboen niaquenquiocquin Nuquin Papan nuqui paucoaindac. Naden Nuquin Papan naindac: Matses icsaid ëmbi paucaid padpiden tantiamenu, quenquiocquin icsaisa nuqui icmendac. ¹⁰ "Matses icsaisa nibédquiec", quequin Nuquin Papan dada uamiampid icnubi, Icsaisa nebi, quequin chiec, Muaquid Nuquin Papa nec, quiac bimboec adquid onquepec. Aden chuiquid Nuquin Papan pausuntemaid nendac. Adquid Esuquidistu tantiesha nec.

2

¹ Ma icsainquoio icnu queshun con nabo quequin adembi mimbi iste dada uaimbique. Isec onqueta. Icsaobi, quiaish cuenenda. Abi tantiaquid icsasho isun Esuquidistun Nuquin Papa chiendac. Ëbi tantiaquid paucoata, quequin Nuquin Papan chiaid niaquesa icquin aton Madonquoio Esuquidistun nuqui icsasho aden chiendac. ² Aidi matsestedi icsaid bedshunash abided cuidadec unëspondash.

³ Ambi chiacpadomboen nabanquin Esuquidistu tantiaquid nebi, qeshun nuqui tantiendac. ⁴ Esuquidistu tantiaquid nebi, qeshun Icbon chiacpadomboen nainquiocquin abipenquoio chiendac adquidë. ⁵ Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aidbéd icquid nebi, quequin nuqui tantiendac. ⁶ Aden pausunac Nuquin Papan Madonquoio bédamboec tabadquin nabanacpadomboen naimbi, quec nidaidën bédamboec tabad.

⁷ Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi. ⁸ Mimbi tauamboen tantiondaid Esuquidistun, Naden nata, quequin chiaid chuca nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesha icboedi nëbi abipadquiocquin utsi tantiaquin nabante mimbitsen ismiac Esuquidistu tantiaquid utsi dadpen yanendac. Aidobidi aidën pausunac tantiananec tabadquin nabanec nec. Chieshëmënenquid icboedi aidën pausunac tantianquidquoio yanec.

⁹ Esuquidistu tantiaquid nebi, qeshun abi tantiaquid utsi chieshënec Nuquin Papan tantiacpadomboen pausunacmaid adquid nec. ¹⁰ Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquoio yec bédamboec tabadquin ismequid nendac. ¹¹ Esuquidistu tantiaquid utsi chieshënquid Nuquin Icbon pausunacmaid nec. Inchëshquoio icnuc capuac bimboecquid adquid nec. Mayan icsan yua icquin ambi natiadquoio yaid tantiesha nec.

12-14 Esuquidistu tantiaquid icsho Nuquin Papan cuidenquocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ĕmbi con nabo caidtedi chuiquin dada uaid nĕid nec. Abia Yampidĕnquio Esuquidistun chiac abi tantiaquido utsi-utsiec dadpen yanondash. Adquido chuiquin tsusiobo quequin ĕmbi dada uaid nĕid nec. Ėmbi tsusiobo caid ambia tantiaquidĕn ismiac caniabobimboecquin comapenen tantiaquin tantesa uainquocquido utsi-utsiec iquec. Aden comapenen tantiec mayan icsan yua icboedi nĕbi Nuquin Papan chiaid tantiabentsĕcquido yanash nĕbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ĕmbi caniabo caidtedi ĕmbi chuiquin dada uaid nĕid nec. Ėmbi dada uaid mibitedishun tantiatequidquio neque. Isec onqueta.

Icsate bunesa icta, quequin chiaid

15 Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec. 16 Abia Yampidquio Nuquin Papa nec. Adquidpenquio mayan icsa nec. Aid Nuquin Papa chieshĕnquid nec. Adquid icquin Nuquin Papan chiaid mua uaquin chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ĕmbitsen nanu quequin adoata. Dadpen bednu quequin utsi dĕniacnueshun adota. Adec icsamane quenquiocnoc mayan icsan Nuquin Papan chiaid mates chieshĕmec. 17 Mayan icsan tantiaid ĕnĕdendac. Aidĕn tantiacpadomboen tantiaquid icbobĕd Nuquin Papa yacno tabadtiapimbo iquec. Nuquin Papan chiacpadomboen naquidien ĕnĕdenquio yec Icbobĕd tabadendac.

Esuquidistu chieshĕnquid dadpen choendac, quequin chiaid

18 Adembi chiembique. Ėmbi con nabo caidon tantiaata. Nĕbi nĕid nidaid naimbudec. Adecbidi Esuquidistu chieshĕnquid dadpen choendac, quequin chiondacadpadquiec ĕnden cho-choac. Dadpen cho-choacsho isun, Nĕbi nĕid nidaid naimbudendac, quequin nuqui tantiendac. 19 Esuquidistu chieshĕnquid nuquibĕd iccuededboedi ĕnden nidanepac. Nuquin Papan shubu abentsĕquĕn tabadacpadpenquiocquid Esuquidistu chieshĕnquid iquec nidaniac. Nidaniacsho isun, Esuquidistu tantiesa iquec nuquibĕd shubu abentsĕquĕn tabadacpadpenquio icquido niosh, quequin nuqui tantiendac.

20 Esuquidistu chieshĕnesa mibi nendac. Nuquin Papan aton Mayan meniac abimbo chiaid tantiaquid mibi nendac. 21 Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesa mibi icsho chuiquin dada uainquio ictsiambi. Abimbo chuiquid muatiapimbocquid nec, quequin mimbi tantiendac. 22 ¿Tsutsi muaquid nepec? ¿quepecta mibi ique? Nuquin Papan Madombo nidaidĕnshun chidon tishac masesash aton Papan chuimaidquio nec, quesa muaquid nendac. Adquid Esuquidistu chieshĕnquid nendac. Abentsĕcquidquiobi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. 23 Nuquin Papan Madombo Esuquidistu nec, quesa Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

24 Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquio yec Nuquin Papan Mado Esuquidistubĕd shubu abentsĕquĕn tabadacimbocquido mibi iquendac. 25 Ėbĕd shubu abentsĕquĕn nidaidĕn tabadacimbocquido ĕbĕd abuc ĕnĕdenquio yec tabadte iquendac, quequin Esuquidistun chiaid nendac.

26 Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata. 27 Nuquin Icho Esuquidistun tantiamiaid icquin utsi uain chuisho tantiesa icta. Esuquidistun ambi tantiaid pausunac ambi chiaid tantiaquidquio mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquio nebi. Esuquidistun abimbo chiaid tantiaish bĕdambo iquebĭ, mibi quendac. Aden Esuquidistun tantiamiaidquio yec abĕd cuĕshĕdesa icnuec adequi tabadta.

Nuquin Papan chiaid tantiaquid ambi bacuĕ icmiaid

28 Adembidi con nabo quequin mibi chuioaimbique. Adembi tantia. Esuquidistun chiaid tantiadonequiec tabadteneta. Adec tabadquin Esuquidistu choasho isash cuenenquio yec, Ėbi, ambi paucaid, bednuec choec, quependac mibi. Abĕdi nidebi, quequin caindonec tabadta. 29 Nuquin Papa bĕdamboquid nec, quequin tantiaquin nuqui Nuquin Papan chiacpadomboen aquin, Ambi con bacuĕ caidquio nebi, quequin nuqui tantiendac.

3

¹ Matses tantiaquin naquidquo Nuquin Papa nec. Ma ëmbi unësquiocquin comapenen tantiaido ëbëdi tabadpanueshun con bacuëbo caimbi, quequin Nuquin Papan icsaisanquo tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquo Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. ² Nuquin Papan comapenen tantiaido mibi nec. Adquid icsho adembi mibi chuinu. Tantiata. Nëbi Nuquin Papan con bacuë caido nuqui nec. Aden ambi con bacuë caid icsho, Nadquidquo mibi icmendambi, ¿ada Nuquin Papa capec? Padenquo. Esuquidistupadquiocquin nabanquid Nuquin Papan nuqui icmec, quequin nuqui tantiadonetequidquo nendac. Esuquidistu nuqui bedec chosho isash, Nëbi aidpadquidquo Nuquin Papan nuqui icmendac, quequin tantiembi, nuqui quendac. ³ Aid choabicnuc, Abipadquid iquendabi, quequin caindonequido nëbi Esuquidistu icsainquo yec tabadacpadquiecc tabadte bunquid nuqui nendac.

⁴ Nuquin Papan nadec bëdamboec tabadta, quequin chiaid niacquid abibi icsaquid nendac. ⁵ Adnubien, Esuquidistu abuc tabadboedi nidaidëshun chidon tishac matsesun nuqui icsaid bedshunash abided cuidadec unëspanëdash, quequin nuqui tantiendac. Icsapenquiocquid Esuquidistu nec. ⁶ Icbopadquidquo icnu quiash Esuquidistubëd tabadac bimboecquid icsadenesa nec. Icsadenequid, Nuquin Papan Esuquidistu tantiamioshi, queti-apimbo iquec. Esuquidistu tantiesa adquo iquec.

⁷ Con nabo, tantesa uamane queshun muaquin chuibanaid tantiesa icta. Esuquidistu bëdamboec tabadacpadquiecc tabadquid icsaisa nec. ⁸ Abia icsadenequid mayan icsa nec. Aidën yua adquiecbidi icsadenendac. Mayan icsan yua matses icsho isash Nuquin Papan chiaid tantiaquidquid iquec Esuquidistu nidaidën choash matses icsaid bedshunash abided cuidadec unëspanëdash ma abi tantiaquid yec mayan icsan yua icboedi aidën yuadtiapimbo yampanuna. ⁹ Nuquin Papan con bacuë caido icsadenesa nec. Ambi con bacuë caido Nuquin Papapadquidquo yec icsadenetiapimbocquid nendac. ¹⁰ Mayan icsan yua Nuquin Papan chiacpadomboen naisa nec. Utsi tantiesa adquid nec. Nuquin Papan chiacpadomboen naquid Icbon bacuë nec. Icbon bacuë yec utsi tantiaquidquo nendac.

Esuquidistu tantiaquido tantiananaid

¹¹ Esuquidistu tantiaquid utsibo tantiaquiota, quequin chiaid nuqui abia tantiondaid nendac. ¹² Aton utsimbo chieshënnquid Cain icpampidpadquid iquenda. Mayan icsan yua icquin aton utsi cuesunepampic. Aden cuesuniaidën aton utsi Abedën abi tantiaquin nadenesho Nuquin Papan aid bëdamboen isnubi Cainën abimbi tantiacpaden nadenesho Nuquin Papan bëdamboen istiapimbo icpampic. Aden icsa Cainën aton utsimbo Abed chieshënnquin cuesunepampic. ¹³ Cainën aton utsimbo chieshënnacpadomboen Nuquin Papa tantiesan Nuquin Papan con bacuë caidtedi chieshënoaic. Nuquin Papa tantiesan mibi chieshënnsho isash, ¿Adquidshenda mibi nepec? quenda. Nuquin Papan chiaid tantiesabimboec adenda. ¹⁴ Esuquidistu tantiaquid tantienquiochoedi Esuquidistu tantiaquid yanash abi tantiaquid utsibo tantiaquidquo nuqui nendac. Aden abi tantiaquid utsibo tantiaquid icquin, Nuquin Papabëd tabadquid bimboecquid nebi, quequin nuqui tantiendac. Aton utsibo tantiesa cuëshëd ac bimboecquid nec. ¹⁵ Aton utsibo chieshënnquid, Con utsi cuesunenu, quiac bimboecquid nec. Adquid Nuquin Papabëd tabadtemaid nendac, quequin nuqui tantiendac.

¹⁶ Matses tantiaquin nashunquidquo Esuquidistu icpondash. Nuqui tantiec, ma ëbëd ënëdenquo yec tabadpanu quiash unësmanc, quenquo yec nuqui icsaquido icsho cuid-nushe quiash abided cuidadec unëspondash. Abi tantiaquid icquin abi tantiaquid utsibo tantiaquin nashunec unësmanc quenquo yec nuqui tabadendac. ¹⁷ ¿Aton nachoquid icnuc Esuquidistu tantiaquid utsin na nibëdquiocsho isec, Con utsi menenquo iquemb, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec. ¹⁸ Ëmbi con nabo caid, Utsi tantiec bëdamboec tabadquidquo nebi, quec onquequinuidi tantiec tabadenda. Utsi tantiembi, quequin mimbi chiacpadomboen nabanquin ismeta. ¹⁹ Aden mimbi chiacpadomboen nabansho isun Nuquin Papan tantiamiac dacuëdenquo yec Nuquin Papa chuinu quiash abi yacno puduedquid bimboecquin nuqui chuided-chuidedec. ²⁰ Utsien Nuquin Papan chiacpadomboen abentse-abentsen naquid, Nuquin Papa dacuëdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ëmbi paucaid, ëmbi con bacuë caid mibi nec. Mimbi chuisho tantianuna. Muesa nebique. Dacuëdenquiocquin ëbi chuita, quependac Nuquin Papa adquid caic.

²¹ Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidĕnquo Nuquin Papa bĕisquidĕmbimboen, Ēbi menepec, quequin dacuĕdenquiocquin chianendac. ²² Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bĕdamboen isquin menendac. ²³ Naden tantiata, quequin Nuquin Papan chiaid nad iquec: Abĕd Abia Yampidquo, Esuquidistu, nidaidĕnshun chidon tishac matsesaid Nuquin Papan chomiaid aton Madombo nec quequin nuqui tantiaidquo nendac. Adembidi Esuquidistun chiacpadec abi tantiaquid utsibobĕd tantiananendac. ²⁴ Aden ambi chiacpadomboen naquidbĕd Nuquin Papa iquec. Adquiduidquo Nuquin Papabĕd ictequid nec. Abibimboecquid Nuquin Papan aton Mayan meniac ĕbĕd tabadquin tantiamiac, Nuquin Papabĕd icquid nebi, quequin nuqui tantiendac.

4

¿Nuquin Papan chiaidquiobida chuibanoshe? Isnu, qeshun Nuquin Papan chiaidquo isteneta quiaid

¹ Utsibo, Nuquin Papa chieshĕnquidĕn chuimiado dadpen iqueque. Aidĕn chuimiadĕn chuisho tantiashun, ¿Nuquin Papan chiaidquiobida chuibanoshe? Isnu qeshun Nuquin Papan chuiquin dada uamiadquo isteneta. ¿Adquiobida iqueque? Isnu, qeshun isteneta. ² Nuquin Papan pausunaidĕn naden chiendac: Nidaidĕnshun chidon tishac matsesaid Nuquin Papan chomiaid aton Madombo nec, quequin chuibanendac. ³ Nuquin Papa chieshĕnquidĕn chuimiadĕn naden chiendac: Nuquin Papan chomiaid Esus niondash. Aid aton madopenquo nec, quequin chiendac. Aden chuiquid Esuquidistu chieshĕnquid nec. “Ēmbi chomiaid chieshĕnquid choec,” quequin Nuquin Papan chiampid mimbi tantiec. Aden chuiquid ĕnden dadpen cho-choac.

⁴ Con nabo quequin Nuquin Papan aton Mayan meniac aidĕnquo tantiamiac Esuquidistu chieshĕnquidon chuisho, Tantanu, quesa mibi nendac. Nuquin Papan meniadĕn tantiamiac Nuquin Papan chiaid chiac dĕniacacpadquiec mibi chieshĕnquid cuenendac. ⁵ Esuquidistu chieshĕnquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec. ⁶ Aidĕn chuisho tantiesa nuqui nec. Nuquin Papan con bacuĕ caid nuqui nec. Adoac ambi tantiamiacpaden nuqui chuibanosho Nuquin Papa tantiabenquid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuibanosho, Tantanu, quesa iquendac. Adsho isun, Abipenquo chuiquidĕn yua nec, quequin nuqui tantiendac.

Nuquin Papan ismiac adecbidi tantiananquidquo ma nuquitedi icoapanuna quiaid

⁷ Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobĕd tantiananquin ma nabanoapanuna. Utsi tantiaquidquo Nuquin Papan bacuĕ nendac. Adquid Nuquin Papa tantiaquidquo nec. ⁸ Utsi tantiaquidquo Nuquin Papa nec. Adquid icnuc utsi tantiesa yec, Nuquin Papa tantiembi, quetiapimbo iquec. ⁹ Matses tantiaquin Nuquin Papan aton Mado Abentsĕcquiobi Esuquidistu matsesmiac matses icsaid bedshunash abided cuidadec unĕspondash. Adoac abi tantiaquido abĕdi ĕnĕdenquo yec tabadendac. ¹⁰ Aden Nuquin Papan matses tantiaquin naid dĕniactiapimbo nuqui iquendac. Aidĕmbien nuqui tantiabudquin aton Mado Abentsĕcquiobi nidaidĕn chomiaid nuqui icsaquido icsho cuidmenquiocnoec abided cuidadec unĕspondash. ¹¹ Nuquin Papa compapen tantiaquidquo icquin Nuquin Icbopadquiocquin Esuquidistu tantiaquid utsi tantiaquiotiad. ¹² Nuquin Papa matsesĕn istiapimbocquid iquec. Abi tantiaquid utsi tantiaquiocsho isash Nuquin Papa nuquibĕd tabadec. Aden aton Mayan meniac aidĕn tantiamiac Nuquin Papapadquiocquin nuqui tantiaquidendac.

¹³ Aton Mayan meniac ambi tantiamiaidquo yec Nuquin Papa ĕbĕd iquec, nuqui quendac. ¹⁴ Nuquin Papan Madomboen nuqui isaidquo icpadenec. Aden isboshon uquĕ nĕsiatiadquido nuqui icsho mĕnchicquid Nuquin Papan chomiaid chosh, quequin nuqui chian-chianec.

¹⁵ Esuquidistu Nuquin Papan Madombo nec, quequin tantiaquidquo Nuquin Papan pausunquin aton Mayan meniad nec. ¹⁶ Aden aid meniad icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobĕd icquidquo nendac. Adecbidi Icho abĕd icquidquo nendac. ¹⁷ Nĕid uquĕ nĕsecatequid nec; nĕid ĕbĕd icquid nec, quequin Nuquin Papan chuibante ushĕ chonoc, Abĕd icquid nebi, quec dacuĕdenquo yec Nuquin Papa tantiaquid aton Madopadquiocquid Nuquin Papa yacno puuedendac.

¹⁸ Nuquin Papan tantiaid dacuëdenquo iquendac. Ambi tantiamiaid dacuëdesa nec. Abi tantiesa, Èbi icsaquid icsho cuidtsiash, quec dacuëdendac. Aidi utsi tantiesa yec dacuëdec.

¹⁹ Nuquin Papa Ambia Tantiacid icquin ismiac tantiananquidombo nuqui nendac.

²⁰ Èmbi isacmaidquo Nuquin Papa icsho, Aid tantiaquid nebi, quequin Esuquidistu tantiaquid utsi ambi isteniaid chieshënquid iquec muaquid nendac. Ambi isteniaid chieshënquid iquec ambi isacmaidquo Nuquin Papa chieshënquid nendac. ²¹ Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiatad.

5

Nuquin Papan Madombo abimbo tantiaquid

¹ Nuquin Papan Madombo aton Papabëd abuc icboedi nidaidën chomiac matsesaid Esuquidistu nec, quequin tantiaquid Nuquin Papan con bacuë caid nendac. Ambi con bacuë caidënquo Nuquin Papa tantiendac. Adembidi Nuquin Papan con bacuë caid utsibo nuqui tantiendac. ² Ambi con bacuë caidën Nuquin Papa tantiaquin ambi chiacpadomboen naquidquo icquin ambi con bacuë caido nuqui tantiendac. ³ Aden tantiaquin Nuquin Papan, Naden nata, cac nabanendac. Ambi, Naden nata, quequin chiaid natiamientemaid nec. ⁴ Aden Nuquin Papan con bacuë caid icquin ambi chiacpadomboen nabanec tabadquin dëniacacimboen icsamenuequid nuqui cuemendac. Adembidi Abia Yampid nidaidënshun chidon tishac matsesash tabadec aton Papabëd cuëshëdesa Esuquidistu nec, quequin tantiaquid nuqui icnuc icsamenuequid cuenendac. ⁵ Esuquidistu Nuquin Papan Madombo Yampid nec, quequin tantiaquidënquo ismiac icsamenuequid cuenendac. Ai, icsamenuequidën yuadesa Esuquidistu tantiaquidquo nendac.

⁶ Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidënshun chidon tishac matsesash capusho acten mentoacsho: “Èmbi bëdamboen tantiaidquo mibi nec. Mibi isash bëdambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unësec aton Papa chiec: “Èbi yuedta, Papa,” quiaish Esuquidistu unëscasho naciac aton intac chididiquepondash. Adashic, Nuquin Papa abimbo chuiquidpadquidquo icquin aton Mayanën tantiamiac, Esuquidistu Nuquin Papan Madombo nec, quequin tantiaquin chiendac nuqui. ⁷ Nuquin Papa yec aton Mado yec aton Mayan yec quequin abuchshun aidtedishun abentsëc yacimbocquin Esuquidistu Nuquin Papan nidmiac chosho nidaidënshun tishac matsesaid nec, quequin chuided-chuidedec. ⁸ Adembidi nidaidënuësh Esuquidistu matsesacsho isun, Nuquin Papan Madombo nec, quequin ismenuec aton Mayan abucuësh budash aidbëd icpondash. Adembidi yuecshun ambi chiacpadomboen acten mentomiacsho, Con madombo nec, quequin chuiopondash. Adembidi yuecshun ambi chiacpadec unëso isun, Con madombo nec, quequin inçhëshacimbocnuc icmequin Nuquin Papan nadatiambocquin ismebampondash. ⁹ Aden ismiac isondaidën naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unëso isombi, quequin isondaidën chiec. Aden chuinubi Nuquin Papanquo, Con madombo nec, quequin ambia Esuquidistu chuiquidquo icsho tantiadonetequidquo nuqui nendac. ¹⁰ Adembidi Nuquin Papan Mayanën tantiamiac, Esuquidistu Nuquin Papan Madombo nec, quequin tantiaquin adomboembidi chuiopac nuqui. Esuquidistu Nuquin Papan madopenquo nec, quequid, Nuquin Papa muaquid nec, quiacimboen chuiquid nendac. ¹¹ Con Madombo, Esuquidistu nec, quequin Nuquin Papan chiaid tantiaquidquo abi yacno nidash abëdi ënëdenquo yec tabadendac. Matses icsaid bedshunash abided ciudadec aton Mado unëspanëdash, quequin tantiaquid Nuquin Papa yacno tabadtequid nuqui nendac. ¹² Esuquidistu tantiaquid ënëdenquo yec Nuquin Papa yacno tabadendac. Aid tantiesa aidbëd tabadtiapimbo iquendac.

Ma tantiaquidquo mibi icpanuequin chiaid

¹³ Nuquin Papan Madombo Esuquidistu nec, quequin tantiaquid, Icbobëd ënëdenquo yec tabadtequid nendac, quequin ma tantiaquidquo mibi icpanuequin mibi chuiquin dada uaimbi. ¹⁴ Adec abëd ictequid icquin ambi tantiamiacpaden chuisho, Nuquin Papan tantiec, quequin nuqui tantiendac. ¹⁵ Abitedi tantiaquidquo icquin ambi tantiacpadomboen tantiamiac nuqui chuisho Nuquin Papan menendac.

¹⁶ Esuquidistu tantiaquid nebi, queboedi icsasho isun, Cuëshëdnushe queshun aid bëdamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiacpadec tabadsho isun, Cuëshëdnushe queshun aid bëdamboen tabadme, Papa, cainda. Nuquin Papan chiaid tantiate bunesa aid nec. ¹⁷ Nuquin Papan chiaid niaquec icsaic. Padnuen, Nuquin Papan

bacuë nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiashun Nuquin Papan padpiden paucoaindac. Aid cuëshëdenquoio yec Nuquin Papabëd tabadendac.

¹⁸ Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niacmane quiash icsate bunesa nebi, quiacpaden nanuesho tantiamequin pausunendac. Adoac Nuquin Papa chieshënquidën adquido yuadtiapimbo iqendac. ¹⁹ Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshënquidën yua nec, quequin nuqui tantiec. ²⁰ Nuquin Papan Madombo abuc abëd icboedëmbi nidaidënsun Nuquin Papa chuibanquin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui tantiendac. Aidbëdquiocquid nuqui nendac. Aton Madombo aton Papabimboecquid nec. Aid tantiec aidbëd ënëdenquoio yec nuqui tabadendac, quequin nuqui tantiendac.

²¹ Con nabo, Nuquin Papabëdtactsëqui aton Madombo Esuquidistu tantiaquid icta. Utsin nacnenaid ismequin, Nuquin Papa neque. Nëid tantiaquiota, cac tantienda. Esuquidistu nebi, qesho adembidi tantienda.

Nëbi padi. Aideded chiombi.

UANËN DADA UAIÐËMPI 2

Nuquin Papan chiaid abimbo iquec, quequid tantiaid

¹ Ëmbia Esuquidistu tantiondaidquio Uan nebi. Nëid chido Esuquidistu tantiaquid nendac, quequin Nuquin Papan tantiacpadquieic icquin mibëd Nuquin Papan chiaid tantiec iccuededquidobëdta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantias mibitedi tantiec tsadebi. ¿Ëbentsëquidabi mibitedi tantiec tsadpe? Padenquio. Aden chuisho tantias utsibotsen adecbidi mibi tantiec tabadoaic. ² Nuquin Papan chiaid abimbo iquec, quequin ënenquiocquin nuqui tantiendac.

³ Uquë nësiatiadquido nuqui icsho isash abëdi ënëdenquio yec nuqui tabadmenuec nuqui icsaid bedshunash abided cuidadec Esuquidistu unëspondash. Adembidi ambi chiaid tantiaquido utsibobëdta bëdamboen tabadmiaido nuqui nendac. Nuquin Papabëdttan aton Mado Esuquidistun adquid icmiac, Ambi chiaid abimbo iquec, quequin tantiec utsibobëd tantiananquidquio nuqui nendac.

⁴ Mimbi chiac utsi-utsiec Nuquin Papan chiacpadomboen nabanec tabadsho isash bëdambo iquebi. ⁵ Naden nata, quequin chiaid utsipenquio nëid dada uaid nendac. Esuquidistu tantiaquidtedi nuquibi tantiananuna. ⁶ Esuquidistu tantiaquid utsibëd tantiananquin Nuquin Papan chiacpadomboen nabanquido nendac. “Ëbi tantiaquidtedi tantiananta,” quequin Nuquin Papan chiampid mimbi tauamboen tantiondaid nendac. Mimbi tantiacpadquieic ma tabadpanuna.

Muaquin chuiquid

⁷ Muaquin chuiquid dadpen capueque. Adquidën chiaid tantiesa icta. Esus Nuquin Papan chomiacmaid matsesquio niosh, quequin adquidën chiendac. Adquid muaquin chuibanec Esuquidistu chieshënuquid nec. ⁸ Adquidën chuisho tantiamane qeshun chieshenquiocquin Esuquidistu tantiaquiota. Nuquin Papa yacno nidshun ambi meniaidtedi bedembi, qeshun Icbon chiacpadomboen nadeneta. ⁹ Esuquidistu Nuquin Papan Madombo nec, quequin tantiembi, queboedëmbi, Ambi chiaid tantianu, quenquiocquin tantesa uatsëcquid nendac. Adquid Nuquin Papabëd tabadac bimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobëd tabadac bimboec tabadendac. ¹⁰ Esuquidistu Nuquin Papan Madombo nec, quequin chiesa chosho isun yuedenda. Adembidi, Bëdambo icta, quequin adquid chienda. ¹¹ Adquid yuedquid ambi yuedaidbëdttan muaquin chuiquin ismequid nendac.

Ënquin chiaid

¹² Dadpen dada uatiadquio icquimbi mibi yacno nidiadquio icquin daëdpactsëc dada uaombi. Mibi yacno nidash mibëdi onquebi.

¹³ Mibitedi tantiec tsadebi, quequin chuita quiosh ëbëd Nuquin Papan chiaid tantiec iccuededquido. Adembidi dada uaimbi.

Padi. Aidtedi dada uaombi.

UANËN DADA UAIDËMPI 3

Cayon naid chuiquin utsibon chiaid

¹ Ëmbia Esuquidistun tantiondaidquo Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

² Mimbì Nuquin Papan chiaid tantiacpadquiec min nami bëdambo icpashun. Adem-bidi Nuquin Papan chiacpadec tabadquin ismiac ma utsibobëd bëdamboec tabadpanuna.

³ Mibëd icquidon nëmbo choshon naden chioshi. Esuquidistun chiacpadomboen nabanec tabadquid Cayo nec, quequin chuibanoshi. Aden chiaid tantiabosh, Bëdambo iquebi, quec tsadebi. ⁴ Mimbì chuibanac Esuquidistu tantiaquin muainquocquin utsibon chuoiaic, quequin chuisho tantiash bëdambo iquebi, quec tsadebi. Ëmbi con mado caidën bëdamboen naid chuisho tantiash bëdambo iquebi.

⁵ Mimbì yuedaidon naden chioshi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chioshi. ⁶ Mimbì yuedshun nashunaid utsi-utsiec nëmbo choshon mimbì abi tantiaquin nashunaid nëmbocquido Esuquidistu tantiec iccuededquidobëdta chuibanoshi. Bëdamboen mimbì naic. Adembidi nabanquin adquid mibëdi tabadash, Nidnu, qesho meneta ma buanueshun. Aido Nuquin Papan con bacuë caido ambi chuimiaidquo nec. ⁷ Aido isadaidpëmbo chuinnec nidshun adquid yacno choshon Esuquidistu tantiesha nec quec ëbi yued quetiapimbo iquebi quec Esuquidistu tantiaquid mibi icsho isash, Ëbipadquid nec, quiaish mibi yacno puduedendac. ⁸ Esuquidistun chiaid tantiaquid icquin Esuquidistu tantiaquid ambi chuimiaido yuedtiad. Adoquin aidobëdtambi Esuquidistun nacpadomboen ismendac.

Diotedepesën icsamboen naid

⁹ Mibëd iccuededquido aden chuiquin dada uaondambi. Aden ëmbi dada uaid bedash: “Ëmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec. ¹⁰ Mibi yacno choshon Diotedepesën muaquin chiaid mibëd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiash: “Padi. Yuedenda,” quec yuedmianesa Diotedepes nec. Adembidi, Yuedmenu, quequido cuëshëdmequid aidi nec.

Demetedio caid bëdamboquid nec, quequin chiaid

¹¹ Aidën nacpadec icsainda, caimbi mibi. Nuquin Papan Icsaisanquo chiacpadomboen naquid aidën con bacuë caid nec. Icsaquidën nacpadomboen naquid Nuquin Papan chiaid tantienquo yec tabadquid nendac. ¹² Utsien Demetedio caid bëdamboquid nec, quequin utsibon chiec. Abimbo chiec. Aidi Nuquin Papan chiacpadomboen nabanec tabadquidquo nec, quequin ëbëd icquidobëdtan chuoaimbi. Uanën chiaid abimbo iquec, quequin mibitedishun tantiendac.

Ënquin chiaid

¹³ Dadpen dada uatiadquocquimbi daëdpectsëc dada uaombi. ¹⁴ Daëdec ushtanquin mimbì ispashuni. Mibi yacno nidash mibëdi onquendabi.

¹⁵ Esuquidistun chiaid tantiaquid utsibëd bëdamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nëmbocquidon chiac adembidi chuoiaquin dada uaimbi. Esuquidistun chiaid tantiaquid anocquido adembidi chuibanooata.

Padi. Aited dada uaombi.

UDASËN DADA UAID

Tauamboen chiaid

¹ Santiacon utsi Udas nebi. Esuquidistun yuambo nebi. Esus tantiaquidon mimbi iste dada uanu. Mibi tantiaquioquin Nuquin Papan mibi Esus tantiamiac. Adoac aid tantiasho isash: —Ëbi tantienquoio yanushe —quiash Esus mibi cudasec. ² —Aido bédamboen isquin bédambo icme, Papa —quequin Nuquin Papa chianembi mibi tantiaquin.

Muaquido iquendac, quequin chiaid

³ Ëmbi tantiaido mibi neque. Tantia. Nuqui cuidmenquoio icnuec Esus abided cuidadec unésaid tantiateuidi mibi chuitiadquoio iccobi. Adnuc: —Esus tantiaquido iccuededacno muaquido puduedosh —quesho tantiaboshon aid mibi chuinu. Mibi yacnoshon ambenquiobi chuisho: —Mua. Esusën chiaidpenquoio mimbi chieci. Aid tantiatipimbo iquebi —cata. Nuquin Papan tantiacpadomboen Esusën abéd icquido chuibanédaid nuqui tantiaid neque. Utsi tantienda. ⁴ Esus tantiaquido mimbi danubi mibi icsamenuec mibi yacno muaquido puduedac caosh. Ambi ëndenquoio tantiacpadomboen Nuquin Papan icsano nidmetequido aido neque. Muasho tantienda. —Nuquin Papan bédamboen isaido icsauidequi icsho nuqui cuidtiapimbo iquec. Chido chishpidambo yec dada cuididimbo yec quec icsashobi nuqui bédamboen isec —quec comapenec muaique. Muasho tantienda. Esuquidistu Nuquin Icho abentsëcshun chiaid niac-niaquec icsaique.

⁵ Adquid Nuquin Papan comapenen cuidendac. Tantia. Nuquin Papan cuidampid mimbi tantianédaid mibi chuinu. Equipito yacnoshon unësmenuen ancanquidën icsamboen chonoa uasho isun ashunquoio Nuquin Papan con mases isadaidbo tsusedpabo puduamepampic. Adoac yuetcanquin puduamiaiombi ambi chiaid niac-niacsho isun Nuquin Papan uesquin unës uapampic. ⁶ Adembidi utsibotsen cuidpampic. Abéd icpampido ambi abi yacnoshon uaido mayan chedo abédtan namequido icboedobi Nuquin Papan chiaid niac-niacne buncuenash Nuquin Papabéd icte bunenquoio yampampic. Adec Satanas chedo abéd icte bunenquoio icsho isun puduentiapimbo yacno icsamboshë yacno Nuquin Papan nidepampic. —¿Ada mibi bédambo icti? Mibi icsamboshë iqueque. Mibi cuidnu —quetequid ushën padpiden uesquin cuidnumbi adopampic. ⁷ Adembidi shubu dadpen yacnocquido cuidpampic. Shubu dadpen icquid Sodoma caid yacnoshon dadan aton chidopenquoio chudnubi adembidi chidon aton bënëpenquoio chudmepampic. Dada aton dada utsibëdi chichudnanquidquoio icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nédëncapampic nibédquiecnuc. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anédënquiacono nësecaindac —quequin nuqui tantiec.

Muaquido icsaid

⁸ Cuidte tantienquoio yec adecbidi muaquido icsamboecuidi tabadec. Aton dada utsibëdi chichudnanquido nec. Abi chuiquid dapabon chiaid niac-niacquinc Nuquin Papan chiaid niac-niacquinc caindac. Adembidi Nuquin Papan abi yacnoshon uaido mayan bédabo caic: —¿Nadatiambo icquidta nedic? —quequin muauaic. ⁹ Mayan bédabo chuiquid dapa Miqued caidën adotiapimbo icpampic. Aidi Moises unésacsho isash: —Chococanu —quesho podobitsi icsabon icbon Satanasën: —Ëmbiquen bednu —catuidpampic. Adoac: —Icsano nidta —cainquoio icpampic Miquedën. Adenquoio icquin: —Nuquin Papambien mibi cuidec —capampic Miqued caidën mayan bédabo namequid dapa icquin. ¹⁰ Muaquidombien ambi tantienquoio yaid icsamboen chuishunec. ¿Ada bëdi cuidnushe quepadic? Adembidi abi cuidte tantienquoio icquin ambi tantiaiduidi naic tabadsho Nuquin Papan cuidendac.

¹¹ Cain caidbimboecquid muaquido nec. Nuquin Papan chiaid niac-niacquin abi bunaid naiqui icsaic. Badan caidën piucquid bednuen Nuquin Papan chiaid niactiadquoio yampampic. Adembidi piucquid bednuen muaquidon ambenquiobi chieci. Code caidën abi chuiquid dapan chiaid niac-niacpampic. Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidendac. ¹² Muaquido icsambo iquec. Mibi icsametiadquien icchitec. Esus tantiaquidon pebededacno puduedshun mibëdtambi muaquidon piac caosh. —Esus tantiaquidquoio nebi —quiash puduedash dacuëdenquoio yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquoio. Ambi naiduidi naquin ambembi chiaid chiac mases nadquoio iquec. Uispa dadpen icboedi badiadnuc abu chëshën bëtinaçsho isash: —Tanunquien badiadec —queuidacimboec mases iquec. Pete ambi nitsinaid unésacsho

istuidash: –Pete nitsinuidombi –quiachimboec muaquidon chuisho tantiaquido: – Bëdamboen chiaid tantianu –queuidendac. ¹³ Acte tēccuasquequidēn cuēmano nushan uaquin icsa uacimboen icsaquin muaquidon mibitsen icsamec. Abi capuaid tantienquo yequi: –Ēbi capuaid tantiaquidquo nebique. Isec cho –queboedi bēnudtaniacimboen: – Nuquin Papan chiaid tantiamequidquo nebi –queboedēmbi tantiamenquo iquec. Adec muasho cuidquin Nuquin Papan puentiapimbo yacno icsamboshē yacno nidmendac.

¹⁴ Adquido con tsusedpa Enoc caidēn chuipampic. Abia matses uaid Adanēn madon baban tishmiaidēn baba Enoc nepampic. Naden chuipampic. “Nuquin Papan abi yacnoshon uaid mayan bēdabo dadpenquioshē Nuquin Icbobēd choendac. ¹⁵ ‘ĶAda mibi bēdambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuec Nuquin Icho choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus matses cuidnuec chote chiec. ¹⁶ Aidēn cuidtequido muaquido abi chuiquid dapabon chiaid cacuidec: –Icsambo iquec. Adtiapibi –quec chieshēmēnec tabadec. Abi bunacpadecuidi icsaquiec. –Ēmbentsēqui bēdamboen naic –queuidequi iquec. –Ēmbi tantiacpadomboen mananu –quiash matses chiec: –Ēmbi tantiaidquo mibi nec –quec muaic.

Esus tantiaquionona, quiaid

¹⁷ Ēmbi tantiaido mibi neque. Tantia. Esusbēd iccondaidon chiaid mibi chuinu. ¹⁸ Nadpondash. “Esus padpidec choabi icnuc Nuquin Papan chiapadec bēdamboec tabadsho Esus tantiesabon mamēnshunendac. Nuquin Papan chiaid niac-niaquec abi bunacpadec icsaquiendac,” quepondash. ¹⁹ Adquido muaquido iquec. Aton padi yec icsaqui chieshēmēnquin mibi cuēsh-cuēshēdmecc. Nuquin Papan aton Mayan aidobēd tabadmenquo iquec.

²⁰ Adquid icsapadec icsainquo icquin Esus tantiatsēcboedēmbi Nuquin Papan chiaid isban-isbanquin ēnenquo icquin Esusbēdta Nuquin Papa tantianuna. Nuquin Papan Mayanēn tantiamiacpadomboen Nuquin Papa chianenuna. ²¹ –Abi tantiaisho bēdamboen isquin abi yacno Esusēn nuqui tabadmendac –qeshun Esus chosho isnuen cainquin aibēdta Nuquin Papa tantianuna. –Nuquin Papan ēbi tantiec –quequin ambi chiapadomboen utsibo tantianuna. ²² Adshumbic Nuquin Papan chiaid tantiatsēcquido bēdamboen isnuna. Adquidon muaquidon chuisho tantiaish: –ĶAbimbobida capeba? –qesho tantiaishun nēishenquo icquin Nuquin Papan chiaidquo tantiamenuna. ²³ Bacuēmpi cuēten pichiquetsensho: –Baded bed. Taidnushe –quiachimboen –Icsano nidmequin Nuquin Papan cuidnushe –qeshun utsibo Esus tantiamenuna. Icsaquidotsen bēdamboen isnuna. Esus tantiamenuen aido bēdamboen isec: –Ēbitsen icsamane –quiash aido icsapadec icsainda. ²⁴ Nuquin Papa bēdamboshē iquec. Aid tantiaisho nuqui icsamenquo iquendac. Adshumbic: –Icsambo mibi iquec –utsibo quetiapimbo icnuc bēdambo icmeshun bēdamboshē yacno abēdi nuqui tabadmendac. Adoac nuqui cuishonquendac. ²⁵ Aden tantiaquin nadonona. –Abipadquid utsi nibēdnuc abentsēcquiobi Nuquin Papa iquec. Nuquin Icho Esusded cuidshun abi tantiaquido cuidenquo icquid nec. Abitedishun Icbombo Nuquin Papa nec. Nadatiambo icquin nabanquidquo nec. Abitedi chuiquid dapambo yec abitedi namequidquo nec. Bēdamboshē iquec –canuna ēnenquo icquin. Esus tantiaquido icquin adonona. Padi. Aidedi chuiquin dada uaombi.

ESUSËN UAN ISMIAID

Nëidba chuiquin Uanën dada uaid

¹ Nuquin Papan tantiamiac Esuquidistun ismeboedquoio chuibanquin dada uaic nebi. Esusbëd ictenedquoio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. ² Adoac Nuquin Papan chiaidbëdta Esuquidistun ismeboedquoio chuibanquin dada uaic nebi. Abimbo caimbique. Tantia. ³ Nëid dada uaid tantiash chuibanquido ambi chiaidobëdi: —Ambi chiapadomboen nëbi Esusën nanushe. Chieshtoenquoio icquin abi tantiec bëdamboec tabadnuna —quish bëdamboec tabadsho Nuquin Papan bëdambo icmendac.

Esus tantiaquidon iste dada uaid

⁴ Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdta bëdamboen isquin bëdambo icmepashun. Adembbidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. ⁵ Aton Mado Esuquidistu Nuquin Papan bëdamboen iste tantiamequidquoio nec. Abia aton dada unëstiapimbo icquid icmequin uincuemiaidquoio nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquoio nuqui tantiaquidquoio yec nuqui icsaid bedshunuec abided cuidadec unëspodash. ⁶ Abi tantiasho Esusën aton Papan yuabo nuqui icmec. Aden Nuquin Papan chiapadomboen naquin: —Con matses bëdamboen ista —quequin Nuquin Papa chianequidquoio nuqui nec. Adquido icquin: —Esus bëdamboeshë iquec. Abitedishun Icbombo nec. Ambi chiapadomboen abitedishun napashun —canuna ënenquoio icquin. ⁷ Aidquoio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquoio isendac. Con matses ambi unë uaondaidquoio chosho istanec: —Padtemboshë. Ashibi cuidpec —quetanec cuidte tantiec dacuëdec natiac shubiendac. Esus tantiesabo utsibotsen adecbidi abi cuidte tantiec natiac shubiendac.

⁸ Adnubien Nuquin Papan chioishi. —Ëmbi tantiacmaid nibëdec. Abitedi comapenen tantiaquidquoio nebi. Nidaid uabi yec ictenedi nebi. Nëbi adquid yec nibëdantiapimbo icquidquoio nebi. Adquid yec abitedishun Icbombo nebi —queposh Nuquin Papa. Aidquoio tantianuna.

Dacuëdampamboecnuc Esusën ismiaid

⁹ Esusbëd ictenedi Uan nebi. Mibëdta Esus tantiaquid yec min utsibimboecquid nebi. Mibi yacpadembidi Esus tantiasho Esus tantiesabon chieshëmpondashi. Adoac Esusën namiacpadec chieshtoenquoio iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedacimboen cuemenquoio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. ¹⁰ Dominco ushën Esus tantiec tsadshobini Nuquin Papan Mayanën tantiameposh. Adoac cachocush shoncate shoncacimboec comapenec onqesho tantiapombi. Ushenquoio icquimbi ushquin isacimboen tantiombi. ¹¹ Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aidtedishun iste dada uashun buame —quequin comapenec onquequin chuiposhi.

¹² Comapenec onqesho tantiatanec bidadquin isquien tabote manitsinaid 7tedi icposh. Shocosh piu nacnenaidquoio neposh. ¹³ Aid nënantanquoio Esusquio icposh. Con matses isadaidbo chuiquid dapabimboec dasiuidaccosh. Dashcute ënapen icquid abitiombi datonquiacosh. Abi shictonquete bëshpiu-bëshpiuctsëcquid nuacquid dapambo icposh. ¹⁴ —Icsaisambo nec —camenuc aton mapi aton manëdaidbëdi abu ushubimboec ushumboshë icposh. —Matsesën naidtedi tantiaquidquoio nec —camenuc cuëte isquidbimboec aton

ëshë isquid-isquidquid icposh. ¹⁵—Utsin: “Ëmbiquen abitedi namenu,” catiapimbo icnuc abitedimbo namequid nec —camenuec shocosh piu nacnenaiddimboec nac-nacquo aton taë icposh. —Nuquin Papapadquidquid nec —camenuec acte chododoquiabimboec comapenec onqueposh. ¹⁶Abiucshun uispa 7tedi sanamposh. Chështe cuënumbo icquid ana shëcuënuësh cueshqueposh. —Matses icsaid cuidquidquid nec —camenuec adposh. Aton bëtantete ushëbimboec bëchamauanquiecposh. —Bëdambo icquidquid nec —camenuec ad icposh.

¹⁷Dacuëdampamboecsho istanequini Esusèn dayumbi uebudpaccoc unësaniciabimboec padishec. Adshobini Esusèn camishquin bëdameposh. —Dacuëdenda. Nuquin Papapadquidquid nebi. Nidaid uabi yec ictenedi nëbi adquid yec nibëdantiapimbo icquidquid nebi. Adquid yec abitedishun Icbombo nebi. ¹⁸Adquid yequi matsesèn unës uaid yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac —queposh Esus.

¹⁹Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta. ²⁰Tantia. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuedquid quibnanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibancho tantiec iccuedquidobëd iquebi,” quequin tantiaquin tabote manitsinaid 7tedi tabëcacno aid nënantanquio ëbibi iquebi —quequin aden ismeposhi Esusèn.

2

Epeso yacnocquido Esusèn chiaid

¹Aden Esusèn uispa 7tedi sananquin ismioshi. Tabote 7tedbidi manitsinaid tabëcacno aid nënantanquio abibi icquin ismioshi. —Ëbi tantiaquido chuibanquidën Icho yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido. Mibitedi chuinu. ²Mimbi naidtedi tantiaquid nebi. Dayacquo icquin ëmbi chiapadomboen mimbi dadpen nabanoc. Utsibo chieshtonobi chieshtoenquio icquin mimbi ëbi tantioc. Ëbi tantiaquido icsamenuen chiec: ‘Esusèn namiaidquio yec mibi chuinuec chopobi,’ quequin muaquidon chuisho: ‘Mua. Nuquin Papan chiaidpenquio mimbi chuibanque. Utsibo chienda,’ quequin mimbi aidon chiaid tantienquio iccoc. Aden mimbi bëdamboen naoc. ³Adembidi utsibon chieshënaqui chieshtoenquio icquin Nuquin Papan chiaidbëdta ëmbi naid mimbi chuibanoc.

⁴Aden bëdamboen nasho isun mibi icsaid abentsëc chuitsëcnu. Tauamboen mimbi ëbi tantiaquiopadene. Aden ëbi tantiaquidquid icquin mimbi utsibotsen tantiaquiopadene. Adodenedëmbi pacuënedacimboen ëbi bëdiactsëc tantiatsëcquin utsibotsen mimbi bëdiactsëcbidi tantiatsec. Adec mibi icsacuedec. ⁵Ëmbi chuiboed tantiash: ‘Ai, abimbo caic. Tauamboen Esus tantiaquiondaidi nëbimbi bëdiactsëc tantiachitec. Adchitequini icsaoc,’ qeshun tauamboen mimbi naondacpadomboen ëbi tantiaquiota. Adembidi utsibotsen tantiaquiota. Adoenquio icshoembi mibi yacnoshon ëmbi chiaid mibi chuibanquid nibëdmendac. Adnuc ëbi tantiec cuëdënuec mibi pudued-puduedenquio ictsiandac. ⁶Mibi icsaid ënquin chiombi. Nëbi mimbi naid utsitsen isash bëdambo iccobi. Mibi cuëdënacno puduedshun nicodaitabon mibi icsamenuen icsamboen chuisho tantiashun: ‘Aido icsamboshë iquec,’ mimbi caoc. Adembidi aido bëdamboen istiapimbo icoaibi. ⁷Nëbi ëbi tantiaquido utsibo chuinu. Ëmbi Epeso yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Satanasën: ‘Icsamenu,’ caqui chieshtoenquio icquin ëbi tantiasho Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëdamboshë yacno tied nënantan icquid cuëte matses unëstiapimbo icquid icmete icmepampic. Aid cuëte bacuë meniabimboecnuc mibi padpidec unësenquio icnuc ëbëdi tabadmendambi,” quequin ëmbi chuiboed dada uata —quequin Esusèn chuiposhi.

Esmidina yacnocquido Esusèn chiaid

⁸Adshumbic Esusèn padpiden chuoaposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Icbombo icshobi chieshëmëquidon unës uacsho chococaqui uincuempaccondash. Adondaid yec unësaid uincuemequidquid nec. Aidën naden chuiposhi. —Esmidina yacnocquidon ëbi tantiaquidon iste ëmbi naden chuiboed dada uata. “Tantia, Esmidina yacnocquido. Mibitedi

chuiu. ⁹ Èbi tantiaquido icsho utsibon chieshènac mimbi dayun uaid nibèdquendac. Nèbi mitsana nibèdquid yequi con Pa yacnuèsh dadpen dayun uaquidbimboec mibi bédamboshè iquendac. Chieshèmènquidon mibi icsamboen chuishumboedtsen tantiembi. Mibi yacnoshon Satanasèn namiac: 'Isadaidbo nebi,' quequidon mibi icsamboen chuishunosh. Nuquin Papan con matses caido yequi Nuquin Papan yuapenquo yec Satanasèn yuaboen nec. ¹⁰ Aido tantiash: 'Ashibi mèyampatsiash,' quec dacuèdenda. Satanasèn: '¿Ada Esus tantiaquido chieshtoenquo ictsiashe? Tanu,' quequin namiacpadomboen chieshèmènquidon mibi utsi-utsien quènèn nauedbanendac. Adoac daèdpectsèc ushec mibi mèyadendac. Pduenabi yec chieshtoenda. Chieshèmènquidon: 'Esus tantiaquido icsho mibi cuesunenu,' caqui chieshtoenda. Aidon cuesuniacsho mibi Nuquin Papa yacno puduedmeshun èbèdi tabadmendambi. ¹¹ Nèbi èbi tantiaquido utsibotsen chuiu. Èmbi Esmidina yacnocquido chuibocpadomboen con Mayanèn mibitsen tantiametsiashe. Pabiate cuembo icquin èmbi chiaid tantiata. Chieshtoenquo icquin èbi tantiasho isun icsaïdo cuidquiaco nèsecainquo iquendambi," quequin èmbi chuiboed dada uata –quequin chuiposhi Esusèn.

Pedcamo yacnocquido Esusèn chiaid

¹² Adoshombic ana shècuènuèsh chèshte cuènumboshè icquid cueshqueboedèn Esusèn naden chuioposhi. –Pedcamo yacnocquidon èbi tantiaquidon iste èmbi naden chuiboed dada uata. "Tantia, Pedcamo yacnocquido. Mibitedi chuiu. ¹³ Mibi yacno Satanasèn yuabo dadpen icnuc èbi tantiec mibi chieshtoenquo iquec. Ènden Satanasèn namiac mibi yacnoshon chieshèmènquidon con yua Antipas caid cuesunepondash. Aidèn chieshtoenquo icquin èmbi naid chuibansho cuesuniacsho isumbic adembidi chieshtoenquo icquin mimbi èbi tantiaquiopondac. Aden mimbi bédamboen naid tantiembi.

¹⁴ Adondaid tantiaquin mibi icsaidtsen chuiu. Mibi cuèdèncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Èndenquimboshè matses utsibo chuiquid dapa Badac caidèn: 'Isadaidbo aquec cho,' cac comapen tanti-aquidèn Badan caidèn isadaidbo Nuquin Papan chiaid niacmenuequin chuitampampic. Aidèn chiacpadomboen Badac caidèn matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquo tantiamenuen ambi papa quequin dasamboed nèish pichicaid pebededacno buampampic. Aden Nuquin Papan chiaid niac-niacmec icsamianquido mibèd iquec. Aido cuemepatecnèdan mimbi. ¹⁵ Adec nicadaitabo caido èbi tantiata shubun puduedash mibèdi cuèdèncuededec icsamiantebumpec. ¹⁶ Aidon chiaid tantienda. Èmbi chiaid mibi niac-niacmenushe. Aidobèd tabadenda. Mibi cuèdèncuededacno chomenda. Èmbi chuiboed niacbidansho isun con ana shècuènuèsh cueshqueboedèn chèshten cuesacimboben mibi cuidtsiambique. ¹⁷ Nèbi èbi tantiaquido utsibotsen chuiu. Èmbi Pedcamo yacnocquido chuibocpadomboembidi con Mayanèn mibitsen tantiametsiashe. Pabiate cuembo icquin èmbi chuiboed tantiata. Chieshtoenquo icquin èbi tantiasho bédambo icmendambi. Nuquin Papan isadaidbo mana caid pemedenequin dayun uacpadomboen mibi bédamboen tabadmendambi. Adshumbic: 'Èmbi tantiaquido yec èbi yacno puduedtequid nec,' qeshun cuènote ushu menendambi. Abi cuèmedquid icnubi utsi uain cuèquin aid cuènoten dada uatanquin menendambi. 'Èmbi meneboedènuidsèqui ma isnu,' quequin adoendambi," quequin èmbi Pedcamo yacnocquido chuiboed dada uata –quequin chuiposhi Esusèn.

Tiatida yacnocquido Esusèn chiaid

¹⁸ Adoshombic aidèmbidi padpiden chuioposhi. Cuète isquidbimboec aton èshè isquid-iquidquido yequi aton taè shocsh piubimboec nac-nacpambo icposh. –Icsasambo yec Nuquin Papan Madombs nec. Adquid yec abitedishun naid tantiaquidquido icquin matses cuidquidquido nec –camenuc adquo isadquidèn naden chuiposhi. –Tiatida yacnocquidon èbi tantiaquidon iste èmbi naden chuiboed dada uata. ¹⁹ "Tantia, Tiatida yacnocquido. Mibitedi chuiu. Mimbi naid abitedi tantiembi. Èbi tantiaquin mimbi utsibotsen bédambo tantiec. 'Aton Papabèdtan Esusèn bédamboenshè natsiash,' quequin chieshtoenquo icquin mimbi èbi tantiec. Adquid icquin èbi tantiamenuen utsibo nashunquido mibi nec. Èbi tantiesabon: 'Padi. Esus tantienda,' caqui mimbi chieshtoenquo icquin èbi tantiapac. Tauamboen èbi tantiaquin daèdpectsèc naondaidi nèbi èbi tantiaquishon èmbi chiacpadomboen mimbi dadpen naic.

²⁰ Adec utsi-utsiec bédambo icnubi icsamianquid chido abi iquec. Aid mimbi cuemepatecnèdan. Aid cuemenquo yec mibitedi icsaic. Mimbi cacumiabi mibi iccuededacno isadaidbo tsusedpan chido Èsabad caidbimboecquid chido icsamboshè icquid muanuec puduedposh. Puduedshumbic: 'Nuquin Papan chiaid chuiquid nebique. Tantia. Chuiu,' quequin abi bunaidquidquo chuibanosh. Adoac èbi bèdiactsèc tantiauidtsècboedi aidèn

chiacpadec icsacuededposh. Nuquin Papanquoio utsibon papa caid tantiabededacno puduedposh. Adshumbid aidon papa quequin dasamboed nëish pichicaid pec tabadcued-edquimbi aton chidopenquoio chudbededposh. ²¹ Adsho isun aid chido: 'Ma abi icsaid ènu,' queshun badedquoio cuidenquoio iccombi. Adoboqui abi icsaid ènte bunenquoio iccosh. ²² Adec abi icsaid èntiapimbo icsho isumbimbi nëbi cuidendac. Èmbi nac daicsabudash mëyadquiec aton ueten uendac. Ambi chiacpadomboen naquido adembidi mëyadquionoc cuidendambi. Aidon ambi naid ènshoembi cuidenquoio ictsiac. ²³ Aid chido cuidquoiquimbi aton bacuèbobimboecquido aidèn chiacpadomboen naquin èntiapimbo icquido adembidi cuidquindambi. Èmbi adosho isun èbi tantiaquidtedishun: 'Matsesèn otacquoio tantiaid tantiaquidquoio Esus nec. Adquid icquin abi icsaid ènenquoio icquido cuidquin abi tantiaquido bédambo icmendac,' quequin tantiasiash.

²⁴ Tantia. Ambocquido èbi tantiaquidombotsen chuinu. Aden Satanasèn chuimaidèn chuisho: 'Aden chuisho tantiatiapimbo iquebi,' mimbi capoc. Aden bédamboen nasho isun utsi chienquoio iquembi. ²⁵ Nèiduidtsèqui chuinu. Mimbi bédamboen nabocpadomboen chieshtoenquoio icquin èbi tantia. Èbi choabi yacpadembi adota. ²⁶ Choshombimbi chieshtoenquoio icquin èmbi chiacpadomboen naquidombo èbèdtan chuiquid dapabo icmendac. Adoac èbèdtan matses utsibo abitedi namendac. ²⁷ Aden Nuquin Papan aido èbèdta chuiquid dapa icmiacsho utsibon: 'Dèniacquin èmbiquen nanu,' catiapimbo iquendac. Èbi chieshènquido: 'Esus dèniacquin èmbiquen matses namenu,' quesho tantiaashun matsu nacnenquidèn ambi nacnenaid icsambo icsho isun pos-posacimboen cuidquindambi. ²⁸ Badiadte anoentsèc uispa dapa choded-chodedbocpadquiec ènèdenquoio yec èbi tantiaquidobèd iquendabi. ²⁹ Èbi tantiaquido utsibotsen chuinu. Èmbi Tiatida yacnocquido chuibocpadomboen Nuquin Papan Mayanèn mibitsen pausuntsiashe. Pabiate cuembo icquin tantia. Chieshtoenquoio icquin èbi tantiasho adembidi bédambo icmendambi,' quequin èmbi chuiboed dada uata –quequin chuiposhi Esusèn.

3

Sadis yacnocquido Esusèn chiaid

¹ Adoshombic Nuquin Papan Mayan abi tantiaquidobèd tabadmequidquoio icquin Esusèn padpiden chuiposhi. –Abi tantiaquido chuibanquid namequid nec –camenuen uispa 7tedi sananquin ismeboedèn naden chuiposhi. –Sadis yacnocquidon èbi tantiaquidon iste èmbi naden chuiboed dada uata. "Tantia, Sadis yacnocquido. Mibitedi chuinu. Mimbi naidtedi tantiembi. Bédamboec tabadquido danquin utsibon: 'Bédambo icquido nec,' mibi canubi èmbien adotiapimbo iquec. Mibi bédapenquoio iquec. Unèsacimboen mimbi èbi bédamboen tantienquoio iquec. ² Isucunacimboen èbi padpiden tantiaquiota. Nuquin Papan chiacpadomboen mimbi nauidtsèccoque. Mimbi èbi tantienquoio iqueque. 'Nuquin Papan chiacpadquiec bédamboec tabadnuna. Esus tantiaquionona,' cananta. ³ Mimbi èbi tantiabenondacpadomboen èbi tantiaquiota. Bèpiscudenda. Nèbi mibi icsaid ènshun èmbi chiacpadomboen naoata. Isucunenquoio yachimboen èbi tantienquoio icshoembi mibi cuidendac. 'Ampequid choec,' quequin tantienquoio yachimboen èmbi cuidte tantienquoio icsho mibi cuidtsiambioc. Èbi tantiaquiota.

⁴ Mibi yacno icsaquido dadpen tabadnubi utsi-utsiec daèdpactsèc ambi naid icsa ucudachimboec icsainquoio yec bédamboec tabadec. Adec bèchish ucudachimboec abi icsaid ènash bédamboec tabadsho isun èbèdi tabadmequin icsaisa icmendambi. ⁵ Èbi tantiaquido utsibotsen chuinu. Èmbi chuibocpadquidèn chieshtoenquoio icquin èbi tantiasho adembidi bédamboen isun Nuquin Papa yacno èbèdi tabadmequin icsaisa icmendambi. Aido cuëmèdquid cuëmèdquidquien Nuquin Papa chuibanendambi. 'Aido èbi tantiaquidotedi neque. Nuquibèd tabadmenuna,' quequin adoendambi Nuquin Papan abi yacnoshon uaido mayan bédabotsen tantianuc. Aden dada uaid ucudenquoio yachimboen bëshunenquoio icquin èbèdi tabadtequido abitedi tantiembi. ⁶ Èmbi Sadis yacnocquido chuiboed Nuquin Papan Mayanèn mibitsen tantiametsiashe. Pabiate cuembo icquin bédamboen tantia. Chieshtoenquoio icquin èbi tantiasho adembidi bédambo icmendambi,' quequin èmbi chuiboed dada uata –quequin Esusèn chuiposhi.

Pidadepia yacnocquido Esusèn chiaid

⁷ Adoshombic icsaisambo icquin ambi chiacpadomboen naquidènquoio Esusèn padpiden chuiposhi. Con tsusedpa Dabid yampicpadquid matses namequidquoio yec ambentsèqui Nuquin Papa yacno puduedmequid nec utsibon: –Padi –catiapimbo icnuc. Abi tantiesabo cacumequid Esus nec. Aidèn naden chuiposhi. –Pidadepia yacnocquidon èbi tantiaquidon iste èmbi naden chuiboed dada uata. ⁸ "Tantia, Pidadepia yacnocquido. Mibitedi chuinu. Mimbi naid tantiembi. Mibi yacno èbi tantiaquido daèdpactsèc iquec. Adquid yec:

‘¿Ada nuquitedictsèqui chieshtoenquo icpatsiaba?’ queded-quededsècquien mimbi èbi tantiaquioc. Chieshènaqui: ‘Esus tantiatipimbo iquebi,’ quenquo mibi iccoc. Adec chieshtoenquo icsho isun èmbi namiac èmbi naid mimbi chuiban-chuibanendac utsibon èmetiapimbo icquin. ⁹ Aden isadaidbon mibi èmetiadquo iquec. Aido: ‘Con matses isadaid-bouidsèqui Nuquin Papan bédamboen isendac,’ quec muaboedo Satanasèn yuabo niosh. Èmbimbo namiac mibi yacno cho-chosho mimbi chuibanendac. Adoac: ‘Ai, abimboen mimbi caoc. Nuquin Papan Madon Esusèn tantiaidombo mibi nec,’ aidon mibi caindac. ¹⁰ Èmbi chiacpadec chieshtoenquo icquin èbi tantiasho isash mibi cudasendabi. ‘¿Ada Esus tantienquo yantsiashe? Tanu,’ qeshun nidaid utsi-utsiec yacno tabadquido abitedi Satanasèn natiambo icmendac. Adosho mibi chieshtoenquo icquid icmendambi.

¹¹ Tantia. Nèbi choendabi. Utsibon chieshènaqui mibi icbocpadquic chieshtoenquo yec bédamboec tabadta. ‘Èbi adenquo icsho isun Esusèn abi yacno puduednenquo ictsiashi,’ quiash bédamboec tabadta. ¹² Aden chieshtoenquo icquin èbi tantiaquido utsibo abitedi Nuquin Papa yacno yuedendambi. Buintad nitsinaid chiquiddiapimbo yacimbocnuc con shubun icquido mibi icmendambi auèshquo cuentiapimbo icnuc. ¿Mitsipaden icbon: ‘Con na nec,’ quequin abi cuèmèdquid dada uaqun ismepec? Adembidi abitedi ismequin: ‘Con Pabèdtan con matses nec,’ mibi caindami. ‘Nuquin Papa yacno èbi tabadaid Edusaden chuca caid abucuèsh budtequid yacno tabadtequidombo nec,’ mibi caindami. Nuquin Papan abitedishun Icbombo icmiac èbèdtambi chuiquid mibi icmendambi. ¹³ Èmbi Pidadepia yacnoquido chuibocpadamboen Nuquin Papan Mayanèn mibitsen pausuntsiashe. Pabiate cuembo icquin bédamboen tantiaata. Chieshtoenquo icquin èbi tantiasho adembidi bédambo icmendambi,” quequin èmbi chuiboed dada uata –quequin Esusèn chuiposhi.

Daudiseya yacnoquido Esusèn chiaid

¹⁴ Adoshombic abitedishun naid tantiaquin abimbo chuiquidènquo Esusèn padpiden chuioposhi. Nidaidbèdta abitedi uaquidènquo abitedishun Icbon chuiposhi naden. – Daudiseya yacnoquidon èbi tantiaquidon iste naden èmbi chuiboed dada uata. “Tantia, Daudiseya yacnoquido. Mibitedi chuinu. ¹⁵ Mimbi naid tantiembi. Chieshtoenquo icquin èbi tantiaquid ictiadquidi adquidpenquo mibi nec. ¿Èbi bédamboen tantiaquidon adopendactic? Padenquo. ‘Esus tantiaquid nebi,’ quiondaidèmbi mimbi naiduidi naquin mimbi èbi bèdiactsèc tantiatsèccoc. Adsho tantiasun: ‘Dayacquo yacimboben èbi tantiaquiopashun,’ caimbi mibi. ¹⁶ Mibi adec chieshtonoc èbitsen chieshtotiadquo iquebi. ‘Cacumiacimboben Nuquin Papa yacno èbèdi mibi tabadmenquo iquendambi,’ mibi catiadquo icchitebi. ¹⁷ ‘Nuquin Papan chiaid niac-niaquec icsapobi,’ quetiadquidi: ‘Èmbembi con na dadpen bedshun dayun uaic utsi bunenquo yec bédambo iquebi,’ mibi quepoc. ‘Esus tantienquo yec Nuquin Papabèd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantienquo icsho isun mibi shubi-uatiadquo iquebi. Bèchish ucabi yacimboben mibi icsaid ènabi icsho mibi bédamboen istiapiimbo iquebi. Pacuènèdacimboben èbi tantienquo mimbi iquec. ¹⁸ Adboedèmbi Nuquin Papabèd tabadte bunquin èbi tantiaquiota. Èbi tantiaquin bèchish ucacimboben mibi icsaid ènta. Adsho icsaisabimboecnuc mibi bédamboen isquin èbèdi tabadtequid icnetsiambique. Pacuènèdaid paposhquiabimboecnuc èmbi naid mibi bédamboen tantiametsiambique. Èbi tantiaata.

¹⁹ Èmbi tantiaido bédamboen tantiamembi. Aton papan: ‘Padi, mibi icsambo iquec,’ quequin bacuè èmiacimboben èbi tantiaquido icsasho isun ambi naid èmenuequin natiambo icmendambi. Èbi tantiaquin mimbi icsamboen naid ènash bédamboec tabadta. ²⁰ Mibi tantiaquiambique. ‘Èbi tantiaata,’ èmbi cac mibi: ‘Ai,’ qesho tantiashe mibèd iquendabi. Pec tabadec bèisnaniacimboc mibèd iquendabi. ²¹ Tantia. Èbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aibèdi tabadquid nebi. Adquid yec aibèdi abitedishun Icbombo nebi. Adembidi èmbi con Pan chiaid nacpadec chieshtoenquo yec èbi tantiec tabadsho èbèdi tabadmequin èbèdtan chuiquid icmendambi. ²² Èmbi Daudiseya yacnoquido chuibocpadomboen Nuquin Papan Mayanèn mibitsen pausuntsiashe. Pabiate cuembo icquin bédamboen tantiaata. Chieshtoenquo icquin èbi tantiasho adembidi bédambo icmendambi,” quequin èmbi chuiboed dada uata –quequin Esusèn.

¹ Asia yacnocquido Esusèn ëmbudquin chuipon abuc ispombi. Adshun isquien shëcuë shëcniacimboec isadpec. Adnubien chuibocpadquiec shoncacimboec comapenec on-queoposh. —Nëmbo cho. “Nadquid iquendac. Nadotsiandac,” quequin mibi dadpen ismenu —caposhi.

² Adoac Nuquin Papan Mayanën tantiamiac ambo nidacimboen ispombi. Ushquin isacimboembimbi caindac. Adshun isquien Nuquin Papambo chuiquid dapan tsadte dapanquo tsadpec. ³—Chuiquid dapa abentsëcquiobi nec. Bëdamboshë iquec —camenuc matses bunaidquio casëdubimboec nac-nacquio yec piumbo yec bëdamboshë isadposh. Abi tsadaid nënantanquo uenquebudpamboec uen podquedbipamboec umu-umupambo icposh. —Bëdamboshë icquidquio nec —camenuc adquio icposh. ⁴Nuquin Papa nënantan icnuc abi dacuenadec matses tsusiobo Esus tantiaquido chuiquid 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquido dasiuidcuededposh. Chuiquid dapan mauetemo shocosh nacnenaidquio maueducuedposh. ⁵ Adnubien Nuquin Papa yacnuësh abubimboec bed-bedquetanubien abu tesquianiabimboec cuëdtoposh. —Abitedishun Icbombo nec —camenuc adec cuëdposh. Nuquin Papan bëntsiaucquio tabote taboaid 7tedi icnuc tabëcaid icposh. —Aton Mayan abentsëcshun Nuquin Papa bëisquiquimbi abi tantiaquido chianequid yequi Esus tantiaquidobëdtsen icoaic —camenuc aden ismeposhi. ⁶ Bëntsiaucbidi actepenquio chian dapa acte-actectëcquio isadposh.

Nuquin Papa tsadaid anoen daëdtsëcquio abi dacuenadec aben icquidbimboecquid 4tedi icposh. Dadano chedobi ëshë ictsëcquiec icposh. Utsi tanenquio. Abimboudquio istequidquio icposh. Cachoc icnubi tacbiduc adquiobidi icposh. ⁷ Abentsëc bëdi dapambo tëbuchoquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Utsibic chiqui dapabimboec isadposh. ⁸ Icbo-icboec aton podo uicchunën podobimboec 6tedi icposh. Podonotsen adquiobidi ëshëuidquio isadposh. Podo ananquio adquiobidi icposh. Aidonquiobi ënenquio icquin Nuquin Papa chuiposh nadec cuëdënquin.

—Icsaisambo yec bëdamboshë icquidquio mibi nec.

Abitedishun Icbombo mibi icnuc mibipadquid utsi nibëdec.

Abitedimbo tantiaquidquio mibi icnuc mimbi tantiamaid nibëdec.

Matses uabi yec icpampidi mibi nec. Nëbi adquid yec mibi nibëdantiapimbo icquidquio nec —quec badiadquidën badiadquidënquiec cuëdënashic inchëshëntsen cuëdëdeneposh.

⁹ Aden dadanobi ëshëcquidon: —Mimbi nac bëdambo iquebi. Mibi bëdamboshë iquec, Papa. Abitedishun adembi: “Bëdambo iquec,” mibi cac bëdambo ictsias, Papa —Nuquin Papa cadonenubi ¹⁰ tsusiobo 24ted icquido ambo tabadquido danëshën ünquebudcuededposh. Adtanquimbi mauete chicbededtanquin Nuquin Papan tayun sambededposh: —Abitedishun Icbombo mibiuidtsëqui nec —quequin. Adotanquimbi aidontsen Nuquin Papa chuiposh nadec cuëdënquin.

¹¹ —Mibi bëdamboshë iquec, Papa. Adembi abitedishun mibi: “Bëdambo iquec,” capashun. Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibëdec.

Nadatiambo icquidquio mibi nec.

Comapen tantiaquidquio icquin mimbi abitedimbo uapampic.

Mimbi tantiacpadomboen mibiuidtsëcquiobi abitedi uapampic.

Adoac mimbi tantiacpadequi mimbi uaido nibëdanabi yec abi iquec.

—quec tsusiobo cuëdëncuedposh.

5

Nuquin Papan chiacpadomboen namequid Esus isadaid

¹ Adshun isquien Nuquin Papan abiucshun ambi chiaid dada uaid sanampec. Abiuc daëdi dada uaid bidicabanquin: —Istemaidën isnushe —qeshun 7ted icnuc bitaccatempin bitaccabanaid neposh. ² Adnubien Nuquin Papan abi yacnoshon uaid mayan bëda chuiquid dapa comapenec onqueposh. —¿Tsuntsin nëid dada uaid bedshun bitaccaid chicbanquin chuibampatsias? —quedo-quedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsias? —quequin tantiec adposh. ³ Adoquien ëchedanenquio icposh abitedimbo. Nëdic Nuquin Papabëd tabadquidotedi. Nëdic nidaidën tabadquidotedi. Nëdic unësaidotedi. Aidedi dada uaid bedshun bitaccaid chicbanquin istequid nibëdposh. ⁴ Adsho isashini unësquio icnuc shubipoc: —Aid dada uaid

bedshun chicbanquin chuibanquid nibëdec –quias. ⁵ Adshobini anocquid tsunion. – Otac. Shubienda. Ènëd. Is. Dada uaid bedshun chicbanquin chuibanquid abi iqueque. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacadiapimbo icquid nec. Aidëmbi chieshtoenquio icquin Nuquin Papan chiacpadomboenuidi naquidquio icquin aid dada uaid bedshun namendac –caposhi.

⁶ Adoac isquien isadaidbon Nuquin Papa cuidmenquio icnuc abided unës uaid obeca bacuëbimboecquid Nuquin Papabëd abi tsadacnombo isadtsec. –Matses icsaid bedshunuec abided cuidadec unësaid Esusquio nec –camenuc adec isadpash. Utsibo dacuenadec tabadnuc nënantanquio Nuquin Papabëdquio icpash. Anoenstëqui dadanobi èshëcquido dacuenadec tabadnuc abi uquëctëc tsusiobouidquio dacuenadec tabadpash. Padnuc obecabimboecquid yec aton pais 7tedi icnuc aton èshëmbi aidtedquibidi icpash. – Abitedishun Icbombo yec utsin dëniacadiapimbo icquid Esusquio nec –camenuc aden pais ismeposhi. Adembidi: –Aton Mayambidi Nuquin Papan Mayan yec nidaid utsi-utsiec yacno matses abitedi yacno nidmiaid icnuc ompodëmëdtiapimbo icquid Esus nec –camenuc èshë 7tedi ismeposhi ushquin isacimbocnuc. ⁷ Adshumbic obecabimboec isadboedën Esusën Nuquin Papan abiuçshunquio sananaid dada uaid bedpash. ⁸ Bedsho istanëquien dadanobi èshëcquidobëd tsusiobo 24ted icquido Esus ismec danëshën tinquëbudcuededpash. –Bëdamboshë icquidquio mibi nec –quias adcuededpash. Tsusiobon icbo-icboen ten-tencate sananquimbi utsiuçshun shocoshëmpi bëdambo nuadnuc tautempi sanampash. –Èmbi ten-tencamequin Nuquin Papa cuishoncamiacimboc Esus tantiaquido cuëdënaid iquec –quequin aden ten-tencate sananquin ismeposhi. Adembidi: –Nëshun tauiac nëid pushudquid Nuquin Papa yacno nidacimboc Esus tantiaquidon chianiaid iquec –quequin bëdambo nuadnuc tautempi sananquin ismeposhi. ⁹ Adashic cuëdënte chucan Esus chiec cuëdëncuededpash tsusiobo.

–Mibi bëdamboshë iquec.

Nuquin Papan chiacpadec matses cuidmenquio icnuc mibided cuidadec unësondaidquio mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquio mibiuidtsëqui nec.

Mimbiuidtsëqui Nuquin Papan sanamboe dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquio.

Nëidic matses utsibo.

Nëidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bëdamboen isendac.

¹⁰ Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” caded-cadedendac.

Mimbi tantiacpadën nidaidënuësh mibëdtan chuiquid iquendac

–quec cuëdëncuededpash tsusiobo.

¹¹ Adnubien abi yacnoshon Nuquin Papan uaido mayan bëdabotsen cuëdëncuededpash dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededpash. Nuquin Papa Esusbëdi nënantanquio icnuc anoentsëqui dadanobi èshëcquidoidquio dacuenadec tabadpash. Abi uquëctëc dacuenadec tsusiobouidquio tabadpash. Aid uquëctëc dacuenadequic mayan bëdabouidquio tabadpash. ¹² Adec tabadec mayan bëdabo abitedimbo cuëdëncuededpash naden chiec.

–Isadaidbon obeca bacuëded cuidacimboc matses icsaid bedshunuec abided cuidadec Esus unëspondash.

Esusquio bëdamboshë icquidquio nec.

Adquid icsho: “Abitedishun Icho icquin Nuquin Papan chiacpadomboen namequidquio mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun capashun.

Adembidi: “Mibi bëdamboshë iquec. Mibi tantiaquiembi,” abitedishun capashun

–quec cuëdëncuededpash mayan bëdabo Esus tantiec.

¹³ Adnubien Nuquin Papan uaido abitedimbo cuëdëndocuededpash. Abi yacnocquidotedi yec nidaidën icquidotedi yec unësaid uincuemaiadotedi yec acten icquidotedi yec quec cuëdëncuededpash naden chiec.

–“Abitedishun Icbombo yec tsadte dapan tsadquidquio Nuquin Papa bëdamboshë iquec.

Obeca bacuëbimboecquid abided ciudadec unësaid Esustsen bédamboshë iquec,” canuna, ènenquo icquin.

“Abiuidtsëqui Nuquin Icbo nec. Utsi adquid ictiapimbo iquec.

Aidèn nac nuqui bédamboshë iquec.

Abipadquid utsi nibèdec,” canuna ènenquo icquin

—quec cuèdëncuededpòsh abitedimbo.

¹⁴ Adsho tantiash dadanobi èshècquido: —Ai, abimbo caic —quenubi tsusiobo 24ted icquido: —Nuquin Icbo bédamboshë iqueque. Ismenu —quetanec Nuquin Papabèda Esus ismec danèshèn tinquebudcuededpòsh.

6

Bitaccaid chicaid chiaid

¹ Adnubien Esusèn Nuquin Papan: —Nadoendambi —quequin chiaid dada uaid 7tedi bitaccaid tauamboen abentsèc chicpòsh chicabi icquid 6tedi icnuc. Aid chicnubien Nuquin Papabèd icquid dadanobi èshècquidèn abentsècshun abu cuèdabimboec comapenec cuèdquin: —Cho —capòsh. ² Adoac cabayo ushumbo icquid catsadec dada canti sanampamboec chosho ispombi. Adec chosho isun: —Mibi chieshènquido uesquin cuesun secaquidquo mibi nec —quetanquin chuiquid dapan mauetempo mauemepòsh. Adoac adecbidi abi chieshènquido cuesun secanuec nidpòsh.

³ Adnubien Esusèn dada uaid bitaccaid utsi udictsècquid chicpòsh chicabi icquid 5tedi icnuc. Aid chicnubien dadanobi èshècquid utsin: —Cho —cac ⁴ cabayo piumbo icquid catsadec dada chopòsh. —Matses cuesun secananenquo icsho Nuquin Papan tantiacpadomboen aidèn nac matses abitedimbo matses utsibobèd cuesun secananendac —qeshun chèshte dapa matses siantè dapa menepòsh. Adomboen Nuquin Papan matses cuidte tantiamepòshi.

⁵ Adnubien Esusèn dada uaid bitaccaid udictsècquid chicpòsh chicabi icquid 4tedi icnuc. Aid chicnubien dadanobi èshècquid utsintsen: —Cho —cac cabayo chèshèmbò icquid catsadec dada chopòsh. —Pete daèdpactsèc icmete chiec —camenuen pete yuè tante sanampòsh. ⁶ Adnubien dadanobi èshècquido dacuenadec tabadnuc nènantanshunquo Nuquin Papan cabayo chèshèmbò icquid catsadquid chuipòsh. —Piucquid dadpenquo meniac aton yuè daèdpactsècnuc tambanshun pete utsi-utsien daèdpactsèc menianquid iquendac —quequin pete utsi-utsièc nibèdte chuipòsh. Adshumbic: —Pete utsi-utsien nibèdmetanquin tiedèn icquid pete utsi-utsien nibèdmenquo icquin nata —quequin chuipòsh. —Nuquin Papan cuidac adec pete nibèdnuc matses pete bunquiendac —quequin cuidte utsi aden ismepòshi.

⁷ Adnubien Esusèn dada uaid bitaccaid udictsècquid chicpòsh chicabi icquid 3tedi icnuc. Aid chicnubien dadanobi èshècquid utsintsen ènquimbi chuiquin: —Cho —cac ⁸ cabayo bèdiactsèc ushu-ushupactsècquid catsadec dada chopòsh. —Aid matses unès uaquid nec —quequin cuènsho tantiombi. Abipadquid utsin chinumòsh. —Aidombi Nuquin Papan tantiacpadomboen matses cuidquin matses dadpenquioshè unès uabudnendac. Aidon naniac cuesun secananeac dadpen naimèdbudnendac. Bunambi aitedbidi unèsbudnendac. Daicsaidèmbic aitedebidi. Aben icquid uinsadpambo icquidèn aitedebidi acshun secaindac —quequin Nuquin Papan cuidte utsi ismepòshi.

⁹ Adnubien Esusèn dada uaid bitaccaid utsi chicpòsh chicabi icquid 2tedtsèqui icnuc. Aid chicnubien Nuquin Papa yacno isombi. Abi tantiate nèish pichicate dapa dayun chieshènquidon cuesun secaido Esus tantiaquido tabadsho ispombi. Aido chieshtoenquo icquin Nuquin Papan chiaidbèda Esusèn naid chuibanec bédamboec tabadsho aden cuesun secaido niosh. ¹⁰ Adoaido icquin comapenec cuèdquin Nuquin Papa chuidonèpòsh. —Abitedishun Icbombo icquin mimbi tantiacpadomboen namequidquo mibi nec. Ic-saisambo yec muesambo mibi neque. En chui, Papa. Nidaidèn tabadquido èbi chieshènquin cuesun secaboedo ;tedecticsishun mimbi cuidpe? —caquin chuidonèpòsh. ¹¹ Adoaiquin: —Chiata. Yuec-yuepactsècshun naindambi. Min utsibobimboecquido èbi tantiaquido utsibo èmbi tantiactedi chieshènquidon ma cuesun secabono. Adoacsho isun cuesun secanquido cuidendambi —quepòsh. Adshumbic Nuquin Papan: —Èbèdi tabadmequin icsaisa mibi icmembi —qeshun abitiombi dasiuidbudte ushumbo icquid dasiimbampòsh.

¹² Adshumbic Esusèn dada uaid bitaccaid utsi chicpòsh chicabi icquid abentsèc icnuc. Adnubien nidaid abichobi shèc-shècquemboec comapenec uèdèquepòsh. Nidaid uèdèquenubi abucuèsh chènquequidtedi dacuèdampambo yampòsh. Ushè dashcute chèshèn bèpucacimboec inchèshquo icpòsh. Inchèshèn ushèbic intacimboec piumboshè isadpòsh. ¹³ Uispabic natiambo cunquenec cuète bacuè tididiquiacimboec nidaidèn tididiepòsh. ¹⁴ Abubic dashcute bidiquiacimboec isadpòsh. Macuèsh dapabic abitedi

manëdcuededposh. Acte nënantan nidaid icquidic abitedi manëdcuededposh. ¹⁵ Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nèidic chuiquid dapabo dadpenquo. Nèidic aidobëdtan chuiquid utsibo. Nèidic sondado chuiquid dapabo. Nèidic aton na dadpen dayun uaquido. Nèidic cuesambo icquido. Nèidic matses yuabo. Nèidic matsesën yuacmaido. Aidedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. ¹⁶ Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided cuidadec unësaid Esusëntsen cuidnushe. ¹⁷ Aidon ambi tantiacpadëñquiobini nëbimbobi cuidchitec. Padtembo. ¿Tsutsi cuidenquo icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

7

Isadaidbo Nuquin Papa tantiaquidombo bësiaid

¹ Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidën uquin cuncamenquo icposh. —Nuquin Papa: “Ma cunquequidën icsa uabanu,” quiabi icnuc abembi cunquequidën nidaid yec acte yec cuëte yec quenuc icsa uanushe —qeshun adoposh. ² Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaqin bësete sanamposh. Aidën cunquequid uidën uaquido comapenec onquequin chuituidposh. ³ —Chiata. “Nidaid yec acte yec cuëte yec quenuc icsa uanushe,” qeshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidën.

⁴ Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidedi tambanac 144,000tedi icpoch dadpenquioshë. ⁵ Nèidic Acobo caidën mado Uda caidën matses tsyuecquido 12,000tedi. Nèidic Acobon madobidi Duben caidën matses tsyuecquido 12,000tedbidi. Nèidic Acobon madobidi Cad caidën matses tsyuecquido 12,000tedbidi. ⁶ Nèidic Acobon madobidi Ased caidën matses tsyuecquido aidtedquiobidi. Nèidic Acobon madobidi Netadi caidën matses tsyuecquido aidtedquiobidi. Nèidic Acobon madobidi Manases caidën matses tsyuecquido aidtedquiobidi. ⁷ Nèidic Acobon madobidi Simeyon caidën matses tsyuecquido aidtedquiobidi. Nèidic Acobon madobidi Debi caidën matses tsyuecquido aidtedquiobidi. Nèidic Acobon madobidi Isacad caidën matses tsyuecquido aidtedquiobidi. ⁸ Nèidic Acobon madobidi Sabadon caidën matses tsyuecquido aidtedquiobidi. Nèidic Acobon madobidi Ose caidën matses tsyuecquido aidtedquiobidi. Nèidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icpoch —quequin chuiposhi mayan bëdan. Aden Nuquin Papabëdta Esus tantiaquido dadpenquioshë ismeposhi. —Adquido iqendac —quequin adoposhi.

Esus tantiaquido Nuquin Papa yacno tabadaid

⁹ Aden Nuquin Papa tantiaquido bëseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yactedi iquec. Nèidic nidaid utsi-utsiec yacno tabadquido. Nèidic matses utsibo. Nèidic matsesquo. Aidedi Esus tantiaquido neposh. Nuquin Papa Esusbëd tabadacnombo tabadpoch. Abëdi tabadmequin Nuquin Papan icsaisa icmiaido yec ushumbo icquid dasiuidcuededpoch. Con matsesën chuiquid dapa ismiacimboen: —Nuquin Papa bëdamboshë iqueque. Ismenu —quequin niste podobiecquid sananquin uic-uiccaposh. ¹⁰ Aido comapenec cuëdëncuededpoch.

—Abitedishun Icbo icquin Nuquin Papan ambi tantiacpadomboen isadaidbon obeca bacuëded cuidacimboen aton Mado Esused cuidpanëdash.

Adoac nuqui icsaid bedshunec abided cuidadec unëspodash Esus.

Aid tantiasho icsaido cuidacno nidmenquo icquin nuqui abëdi tabadmec.

Aton Papabëd bëdamboshë iquec

—quec cuëdëncuededpoch.

¹¹ Adsho tantias ambo tabadquido mayan bëdabotedi danëshën tinquebudcuededpoch. —Nuquin Papabëd Esus abided cuidadaid bëdamboshë iqueque. Ismenuna —quiash adpoch. Nënantanquo Nuquin Papabëd Esus tabadnuc abi uquëtsëc dacuenadec dadanobi

èshècquido 4tedi icquiduidquido tabadpòsh. Abi uquèctèsèc dacuenadec tsusiobo 24tedi icquiduidquido tabadnuc abi uquèctèsèc dacuenadequic mayan bédabouidquido tabadpòsh.

¹² Aid mayan bédabotedi danèshèhèn tinquebudcuededequi comapenec cuèdèncuededpòsh.

—Aden abi tantiaquido abèdi tabadmequid bédamboshè iquec.

Esusbèdi Nuquin Papa bédamboshè iquec.

Adembidi abitedishun: “Mibi bédambo iquec, Papa,” quequin chuipashun.

Esusbèdi Nuquin Papa bédamboshè iquec.

Abipadquid utsi nibèdec.

Comapenen tantiaquidquido icnuc ambi tantiacmaid utsi nibèdec.

Aiduidtsèqui bédamboen tantiaquidquido nec.

Aidèn nashunac bédamboshè iquebi.

Nadatiambo icquid nec. Abitedishun Icbombo nec.

“Esusbèd Nuquin Papa bédamboshè iquec,” canuna

—quecuededpòsh mayan bédabotedi.

¹³ Adshumbic èmbi 24ted icquid ishoed abentsècshun tsusion chuiposhi. —Ma ushumbo icquid abitiombi dasiuidquido ¿tsutsi nepec? ¿Mitsiùeshquido aido chosh? —cac: ¹⁴ —Tsaudi, tsusio. Mimbibien tantiec —capombi. Adsho tantias: —Tantia. Mibi chuinu. Satanasèn: “¿Ada chieshtoenquo ictsiashe? Tanu,” qeshun natiamboshè icmiac Esus tantiec chieshtoenquo itenedo nec. Adec chieshtoenquo icsho isun Satanasèn tantiacpadomboen chieshèmènkuidon unès uapondash. Abided cuidadec unèsaid Esus tantiaquido icsho icsaisa icmiado yec dashcute ushumbo icquid dasiuidcuededpòsh. ¹⁵ Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ènenquo icquin tantiendac. Adembidi Nuquin Papan: “Con mado mibi nec. Con champi mibi nec. Nuquibi icnu. Cho,” qeshun abèdi tabadmequin bédamboen dayun uaic. ¹⁶⁻¹⁷ Isadaidbo matsesèn nèish yua obeca dadpen dayun uacpaden abided cuidadec unèsaidèn Esusèn abi tantiaquido bédamboenshè dayun uaindac padpidec unèstiapimbo icnuc. Adoac pete bunenquo iquendac. Actetsen bundoenquo iquendac. Abi yacnuèsh ushèn pichiquenquo iquendac. Chun mèyadenquo iquendac. Nidaidènuèsh shubidenedi Nuquin Papa yacnuèsh shubitiapimbo iquendac. Natiamante nibèdquiec iquendac. Unèsquo icmiente nibèdquiec iquendac. Bacuè shubisho anin bèucquin bédambo icmiacimboen abi yacnoshon Nuquin Papan Esus tantiaquido bédambouidquido icmendac —quequin chuibamposhi tsusion.

8

Dada uaid bitaccaid nainquin chicaid

¹ Nuquin Papa yacnoshon tsusion chuibombien obecabimboec isadquin Esusèn nainquin dada uaid bitaccaid chicpòsh. Aden chicnubien Nuquin Papa yacnuèsh nadimbo icpòsh. —Dacuèdampambo iquec —quec media oda yec yuec-yuecpectsèc otacquo tantiec tabadpòsh. ² Adnubien Nuquin Papan abi yacnoshon uaido mayan bédabo sietetedi: —Nuquin Papan chiacpadomboen nanu —quec tabadpòsh. Adsho isun icho-icboen shoncate sietetedi menèbampòsh. ³ Adnubien mayan bèda utsi ambobidi chopòsh. Choash bédambo nuadquid tauinuequin shocosh nacnenaïd tauite dapa dayun nidtuidpòsh. Shocoshèmpin bédamboshè nuadnuc tauitempi utsi sanampòsh. Adsho isun bédambo nuadquid nua menepòsh. Adoac: —Nèid tauiac pushudquid Nuquin Papa yacno nidacimboec Esus tantiaquidon chianiaïd iquec —quequin bédambo nuadquid sanshun tauite nacnenaïd dapan tauipòsh bédambo nuadnuc. ⁴ Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaïd abi yacnoshon tantiasun Nuquin Papan abi tantiaquido chieshènquido cuidendac —quequin aden ismepòsh. ⁵ Adshumbic aid mayan bédan tauite dapan samèdquid cuète dètsisadaïd isquidquido icquid bedshun shocoshèmpin sandopòsh. Aden sandotanquimbic shocoshèmpichobi matses tabadacno masiabudpòsh. Nuquin Papa tabadacnoshon adopòsh. Adnubien bed-bedquetanepamboec abu tesquianiacimboec cuèdtopòsh. Adnubien nidaïd abichobi saca-sacaquemboec uèdèquepòsh. —“Nuquin Papan èbi chieshènquido cuidpashun,” quequin Esus tantiaquidon chianesho tantiasun aden Nuquin Papan comapenen cuidendac —quequin aden ismepòsh.

Shoncate shoncaquin ismiaid

⁶ Matses tabadacno cuète dètsisadaïd isquidquido icquid masiabudnubien shoncate bedboedon mayan bédabon shoncanuen sanampòsh. ⁷ Adshumbic abentsècshumba shoncadopòsh. Adnubien Nuquin Papan matses yacno uebimboecquid chomepòsh. Nadquo icpòsh. Ue tsasi yec cuète dètsisadaïd isquidquido icquid yec intac yec quenuc chomepòsh ue dapa choacimboecnuc. Aden chomiaïdèn nidaïd nuamboshè taidpòsh. Cuète dadpenquioshè taidpòsh. Uasin dadpenquioshè pichiquepòsh.

⁸ Adnubien mayan bëda utsin shoncaposh 5tedishun shoncabi icnuc. Shoncanubien macuësh dapatemi icquid nëdënquepamboec abucuësh paëdec chian dapa mad caid nëpaëdposh. Adnuc chian nuamboshë intac yamposh. ⁹ Adec intac yanaidën acten icquid dadpenquioshë unësbudneposh. Adecbidi cano dapa antabëdquidotedi abi canochobi mentoadbudneposh.

¹⁰ Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotëbimboec nëdën-nëdënquepamboec abucuësh budec acte nëpaëdposh. Aid acte nëpaëdboedën acte utsi-utsiec dadpenquioshë actiapimbo yamposh. ¹¹ Aid uispa acte muca uaquid niosh. Aid nëpaëdquin muca uaid acte acash matses dadpenquioshë unësbudneposh.

¹² Adnubien mayan bëda utsin shoncaposh 3tedshun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoaquien bëdambo chënqueboedi bëdiactscquo chënquiantsëccosh.

¹³ —Aden Nuquin Papan matses cuidquiendac —quequin ëbi ismenubien chiqui dapa cuenequi matsesbimboec cuëdec comapenec cuëdcuemposh. —Esus tantiesabo Nuquin Papan cuidtequido tantiac unësquioshë iquec. Shoncabi icboedon mayan bëda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac —quec cuëdcuemposh abuc cuenequi.

9

Mayan bëda utsin shoncanuc isaid

¹ Adnubien chiqui dapan chiacpadomboen mayan bëda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bëda badedquio budash matses yacno choposh. Adsho isun Nuquin Papan chiacpadomboen bëtashte chictepi meneposh. Podobitsi icsabo uidën uacno nidaid shëcuë quëducdquo icquid bëtashte chichte neposh. ² Aid chictepin chicaquien uquëducuësh tied nëdënquedoacpamboec pushudtoposh. Abuc inchëshquio pushudquid icnuc ushë isadenquo icposh. ³ Adsho isaquien pushudacnuëshquio tsectsebiecquid dadpenquioshë cho-choposh. Chichumbimboec sianquidquo niosh. ⁴ Adsho isun aido chuiposh. Aton petembo caic: —Nuquin Papan tantiacpadomboen tiedën caniquidbëdta cuëte podo penda. Usaintsen penda. Ademibidi Nuquin Papan cudasquin bësemiaido abi tantiaquido sebudneta. Aido senquo icquin Esus tantiesabo bësiadabi icquidoidquo sebudneta —quequin chuiposh. ⁵ Adshumbic: —Unësnuc seshun secainda. Inchëshën ushë 5tedi nidmequin chichunën siacbimboecnuc sebudneta —cac tsectsebiecquidën sebudnequin ismeposhi. ⁶ Aid tsectsebiecquidën siac natiamboshë yec matses unëste bunquiendac. Unëste bunquidi badedi unësenquo iquendac.

⁷ Aden tsectsebiecquid ismeposhi. ¿Mitsipadquo nidaid cudasquid sondado catsadaid cabayo icpec? Adquo cabayobimboec tsectsebiecquid isadpish. Shocosh mauetëbimboecquid mauëcuededpish. Matsesën bëtantetembobi bëisadpish. ⁸ Chidon tëbucshumbimboec isadpish. Bëdin shëtäbimboec aton shëta icposh. ⁹ Bëntsiauc shicdiadquid cudaste shocosh nacnenaïdbimboec sictsasimbo icposh. Aid abi maisi cuensho tantiac tied nëdënquiacbimboec comapenec cuëdpish. ¹⁰ Aid tsectsebiecquid chishpichoquid yec chichumbimboec sianquidquo neposh. Inchëshën ushë 5tedi nidmequin adquidën dadpeshun natiamboshë icnuc matses sebudneposh. ¹¹ Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquo nec —quequin isadaidbon onqueten abadon caposh. Quidieco matsesën onqueten apoyon caposh.

¹² —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

Chiqui dapan chuiboed utsi

¹³ Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien taute dapa Nuquin Papan bëntsiauc tsadunaid yacnuëshquio onquedosho tantiombi. ¹⁴ Adec onquequidën nëbi shoncaboed chuiposh. —Acte dapa Eupëdates caid yacnoshon matses cuidquido mayan bëdabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh. ¹⁵ Aden chuitanac aid mayan bëdabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënquiobi adoendac —quequin tantiacpadomboen adoposh. ¹⁶ Adoaquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaitedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

¹⁷ Ēmbi isboedquio nadquio icposh. Abi catsadaid cabayobēdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bēshpiu-bēshpiu icquid yec queposh. Cabayon mapi bēdi dapan mapibimboec isadposh. Ana shēcuēnuēsh nēdēnquepamboec pushud-pushudpambo yec choposh. Cachinan bacuē pisenaid nuadacimboec asupede caid icsamboshē nuadposh. ¹⁸ Adshumbien ana shēcuēnuēsh choaidēn matses dadpenquioshē cuesun secabudneposh. ¹⁹ Aid cabayo chedon ana shēcuēnuēsh matses cuesun secate icnubi aton incuentembi mapi utsi iccondash. Nisin mapibimboecquid pianquidquio niosh. Aidēntsen matses dadpenquioshē unēs uabudnequin ismeposhi.

²⁰ Adnubien aden Nuquin Papan cuidaidēn unēs uamiabi yaidon matsesēn abi icsaid ėntiapimbo icposh. Ambi naiduidi nabamposh. Ēntiadquidi abi icsaquioposh. Nuquin Papa tantienquio icquin podobitsi icsabo tantiaquin ėntiapimbo icposh. Adembidi ambibi nacne-naid ambi papa caid ėnenquio icquin tantiaposh. Utsibon shocosh nacne-naid tantiaposh. Utsibombic cuēnote. Utsibombic cuēte. Adquid ambibi nacneshun tantiabededposh. Ambi nacne-naid anan onquetiapimbo icposh. Pabiaten tantiatiapimbo icposh. Taēn caputiapimbo icposh. Adquid papa quequin tantiabededposh. Aid tantienquio icquin Esusquio tantiatiadquidi ambi nacne-naiduidi tantiaposh. ²¹ Cuesanquidon abi cuesun secaposh. Nēnēchoquidombic abi unēs uabudneposh. Cuēte podo dauē icsa chodcaquidombic adembidi matses dadpen unēs uabudneposh. Aton chidopenquio chudquidombic adembi utsi chudshumbededposh. Adembidi aton bēnēpenquio chudmequidēn abi icsaid ėntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushē. Ēbi icsaid ėnu —quetiadquidobi adenquio icposh.

10

Mayan bēdan dada uaidēmpi pemiaid

¹ Cabayo uinsadpambo icquid ismeboshombic utsitsen ismeposhi. Adoac mayan bēda chuiquid dapa utsi dacuēdampambo icquidquio Nuquin Papa yacnuēshquio budsho is-pombi. Abu ushubimboec isadec abitiombi dasiuidbudpaccosh. Uen podqued uen-quebudacchipamboec mapino icposh. Ushēbimboec bētantete bēchamauanquiecposh. Buin-tad nitsinaid nēdēnquiachipamboec isquid-isquidpambo nidte icposh. ² Dada uaidēmpi bēcadotsaid sanamposh. Budash nidtuidposh. Tsiembudcuenshun taē abiucshun chian dapa mad caid nētincaquimbi taē opiocshon mananuc tincaposh. Ēnapenquioshē icquid niosh. ³ Adashien bēdi noshquiacimboec nuamboshē cuēdtoposh. Adec cuēdquin chiac abu 7tedec cuēdtonequin ėcbedtoneposh Nuquin Papan chiaid chuiquin. ⁴ Aden abu cuēdquin ėcbedtonesho tantiashun: —Abu cuēdquin chiaid dada uanu —qeshobi: —Padi —caposhi Nuquin Papa yacnoshon chuiquin. —Abu cuēdquin chiaidtedi dada uainda. Padi. Utsibo chuiquin dada uainda —caposhi. Adoac dada uainquio iccombi.

⁵ Adnubien mayan bēda tsiembudcuenshun chian dapa nētincaquin utsiucshun man-anuc tincaboedēn ambibi podo abiucquio cadoposh. —Nuquin Papan isnubi abimbo chuiquidquio nebi —quequin tantiamenuen aden ambibi podo abiucquio cadoposh. ⁶ Adotanquin chuiposhi. —Tantia. Mibi chuinu. ¿Tsutsi nidaid uabi yec ėndenquimboshē icpampic? Aidi Nuquin Papa nēbi adquid yec nibēdantiapimbo iquendac. Adquid icquin abitedi uapampic. Abu uashun aidēn icquidtedi uapampic. Nidaid uashun aidēn icquidtedi uapampic. Acte uashun aidēn icquidtedi uapampic. Aden abitedi uaquidēn chidaidquio chuinu. Nēbi Nuquin Papan ambi tantiacpadomboen icsambo icquido cuidquimbi abi tantiaquido abēdi tabadmendac. ⁷ Ēbi padquid mayan bēda utsin shoncate sanamboedēn: “Nēbi nainquin shoncanu,” cacpadēnquio Nuquin Papan ambi chiampicpadomboen adoendac —queposh mayan bēda chuiquid dapa dacuēdampambo icquid Nuquin Papan matses cuidquin naimpanuda.

⁸ Adnubini abucuēsh cuēdquidēn chuiposh. —Aid mayan bēdan sanamboed dada uaid bed —cac: ⁹ —Dada uaid becho —capombi. Adoquien: —Nē bed. Bedshun che. Batambo icboedi min ana mucambo yanendac —caposhi. —Nēid bedshun chiacimboen Nuquin Papan chiaid cuishonquequin isban-isbanash mucambo yanacimboec Nuquin Papan cuidte tantiash shubitiadquio mibi yanendac —quequin tantiamenuen aden chuiposhi.

¹⁰ Adoac aid bedshun chiash adquio yanobi. ¹¹ Adquio yansho isun mayan bēdabo chuiquid dapan chuiaposhi. —Nuquin Papan ambi chiaid tantiamiac matsesēn nabante dadpen mimbi chuibanendac. Nidaid utsi-utsiec yacno tabadquidon nabantebēdta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac —quequin chuiposhi mayan bēdabo chuiquid dapan.

11

Nuquin Papan namiaidon daëdshun naid

¹ —Nuquin Papan tantiacpadomboen mimbi chuibanendac —quequin chuishumbic mayan bêda chuiquid dapan piabimboecquid tambante meneposhi. Adotanquin naden chuioposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bédambo nuadnuc tauinuequin nacne- naid dapatsen tambanta. Adotanquimbic Nuquin Papa tantianuec aid shubun pudued- puduedquido tambanta. ² Shubu nuntanquio tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabud- nendac. Adash Nuquin Papa tabadte shubu uashunaid daquënë uaidën pudued- puduedendac,” qeshun aid shubu daquënë uaid tambanenda. Aden Edusaden icsa uaqin seta 3tedi matamendac —quequin chuiposhi. —“Muainquio icquin Esusbêda ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi. ³ Adnubini Nuquin Papan chuiposh. —Aden Edusaden icsa uanubi matses daëdquibî ëmbi chuiboedquio chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chot- secnuc matamequin ëmbi chiacpadomboen chuibanendac. Adquid yec: “Matses abitedi icsamboshë icsho isash shubitiadquio iquebi,” quequin icsambo icquid abi icsaid ëmenuec dashcute icsactsëcquidquio dasiuidendac —quequin Nuquin Papan chuiposhi.

⁴ Adshobini mayan bêdan chuioposh. —Aido Nuquin Papan oncamaid daëd isadaidbo matses tsusedpan chuipampid nendac. “Nuquin Papan bëntsiauc cuëte odibos caid nitsinaid daëd bédambo icquid iquendac. Ambobidi tabote daëd bédambo icquid iquen- dac,” quequin chuipampid nendac. “Nuquin Papan Mayanën tantiamiaidquio icquin ambi chiaidquio chuibanendac,” camenuen aden chuipampic. ⁵ Aden abi chuiban- sho abi chieshënquidën: “Mibi cuesunenu,” caqui cuesuniadenquio iquendac. Nuquin Pa- pan dayun uaid icquin ana shëcuënuësh choboedën nibëdquiecnuc pichicacimboben abi cuesunuequidotedi unës uaindac. Nuquin Papan cuidte tantiamenuen adoendac. ⁶ Adembidi Nuquin Papan cuidte tantiamenuen Nuquin Papan Mayanën namiaidquio icquin comapenen tantiaquin isebanendac. Aden ismequin nac abi nidabi yacpadequi ue choenquio iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuëdampamboecquin matses shubi- mendac Nuquin Papan cuidte tantiamenuen.

⁷ Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cuesun secain- dac. Satanasën namiacpadomboen adoendac. ⁸ Edusaden yacnoshon cuesun secashun chococainquio iquendac. “Ma cuesun secaid ischitono,” qeshun chococainquio icquin podqued ansanendac. Nuquin Icho Esus cuesten dectanacnoshonquio matsesën adoen- dac. Equipito yacno icpampido yec Sodoma yacno icpampido yec quequidimboc icsam- boshë icquin aden Nuquin Papan chiaid chuibanquido cuesun secaindac. ⁹⁻¹⁰ Aden cuesun secabosh: “Nuqui mëyanquid nëid daëd neque. Chococatiapimbo iquebi,” qeshun choco- cainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiaish cuishonquec abëd icquidobëd menen- cuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidtedi menenancuededendac. Abentsë chotsec ushquin aden ambi cuesun secaboed isbededec tabadendac —quequin chuiposhi mayan bêdan.

¹¹ Adashic abi onquec: —Abentsë chotsec ushquin isbededec tabadimbien Nuquin Papan cuesun secaboed daëd uincuemendac. Uincuemiacsho isash cuishonqueboedobi natia dacuëdec tabadendac. ¹² Adnubi Nuquin Papan abucshun cuënquin: “Nëmbô cho,” cac abu ushu datanec cuesun secaboed daëd abuctoendac. Abi chieshënquidon isnubi adendac. ¹³ Aid daëd abuctonco nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi ic- quido dacuëdcededendac. Dacuëdequi: “Nuquin Papa dacuëdampamboecquidëmbien nash. Aidquien tantiatad,” quecuedendac —quequin chuiposhi mayan bêdan. ¹⁴ Aden chiqui dapan chuibocpadomboen mayan bêdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

Nainquin shoncaquin Uan ismiaid

¹⁵ Nuquin Papan uincuemetequido daëd chuibombien mayan bêdan shoncate sanamboedën nainquin shoncaposh. Shoncanubien Nuquin Papa yacnuësh nua cuëdëncuededposh naden chiech.

—Nuquin Papabèdi aton Mado Esuquidistu abided cuidadec unèsaid bédamboshè iquec.
Abi chieshènkuidon naid èmeshun aid abentsècshumbi matses abitedimbo namendac
ènenquo icquin.

Abitedishun Icho nec

—quec cuèdèncuededposh. ¹⁶ Adashic Nuquin Papa yacnombo icho-icboec tsadten tabad-
boedobi tsusiobo 24tedi icquido: —Mibi bédamboshè iquec —quequin ismec danèshèn
tingebudcuededposh. ¹⁷ Adtanequi naded cuèdèncuededposh.

—Nidaid uabi yec èndenquimboshè mibi icpampic, Papa.

Nèbi adquid yec nibèdantiapimbo icquid mibi nec.

Abitedishun Icbombo mibi icnuc:

“Èmbiquen dèniacquin namenu,” Satanasèn catiapimbo mibi iquec.

Nadatiambo icquid icquin mimbentsèqui matses abitedimbo mimbi namendac.

¹⁸ Nidaid utsi-utsiec yacno tabadquidon abi chuiquidobèdtan mibi chieshèndenec.

Mimbi uaidtedi icsa uadenec.

Adsho mimbi tantiacpadènquo nèbi mimbi cuidendac.

Matses abitedi uincuetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobèdta mibi tantiaquido abitedimbo mibi yacno
mibèdi mimbi tabadmendac.

Chuiquid dapambobèdta chuiquidpenquo mibi tantiaquidotedi bédambo icmequin mimbi
adoendac

—quequin tsusiobon Nuquin Papa chuisho tantiapombi ushquin isaczimboen.

¹⁹ Adshun isquien Nuquin Papa yacnombo con matses isadaidbon Nuquin Papa tabadte
shubu uashunampid shècniacchobi icposh. Aid shubu nuntan isaquien Moisesèn ambi
nacnenaid Nuquin Papan chiaid sandoampid icposh. —Èndenquimboshè ambi chiampic-
padomboen Nuquin Papan ambi tantiaidtedi nainquin naindac —camenuen aden isme-
poshi. Aden èbi ismenubien bed-bedquetanec abu teshquianiaczimboec nua cuèdtoneposh.
Nidaid saca-sacaquemboec uèdèqueposh. Ue dapa nuamboshè choaczimboec ue tsasi
choposh. —Nuquin Papambo abitedishun Icbombo nec —camenuen aden ismeposhi
Nuquin Papa yacnoshon.

12

Chidobèdta nisibimboecquid dapa ismiaid

¹ Adoshombic Nuquin Papa yacnoshombidi utsitsen dacuèdampamboecquidbidi ismeoa-
poshi. Adoac chido ushè dasiuidaczimboec bèchamauanquiecscho ispombi. Inchèshèn ushè
tincash tsadposh. Uispa 12tedi nacnenaid mauete maueposh. ² Bacuè nua usunec
tishiadtsècquio yec shubibud-shubibudposh. —Isadaidbon chido Esus tishquid nec —
camenuen aden ismeposhi. ³ Adnubien nisibimboecquid icquin Satanasèn abipadquido utsibo
mayan bédabo icboedo utsi-utsien yuapampic. Aden yuash aton yuabobèdi nidaidèn
choshon matsetsen icsamete bunquiec —camenuen aden ismeposhi. Adshumbic chidon
tishacsho bacuè penuen aiduidi bèisquin cainuidposh. ⁵ Adnubien chidon dada bacuè
tishposh. Bédambo icquid matses abitedishun Icho ictequidèmpi niosh. Adshobien Nuquin
Papan abi yacnombo buamposh nisibimboecquidèn petiapimbo icnuc. Buanshumbic
abipadquid abitedishun Icbombo icmiac. —Aden Satanasèn Esus nibèdametiapimbo iquec —
quequin ismeposhi. ⁶ Adnubien chido nèbi bacuè tishboed nisibimboecquid dapa cuenènc
matses nibèdacnombo Nuquin Papan tantiacnombo nidposh. Ambobi tabadsho isun
Nuquin Papan bédamboen dayun uaposh yuenquo seta abentsè chotsecnuc matamequin.
—Aden Esus tantiaquido Nuquin Papan dayun uaindac —camenuen aden ismeposhi.

⁷ Adshumbic Nuquin Papa yacnoshon padpiden ismiac nèidtedi isoapombi. Nèidic nis-
ibimboecquid dapa Satanasquiboi. Nèidic mayan bédabo icboedobi Nuquin Papan chiaid
niac-niaquec icsash podobitsi icsabo yanaido Satanasèn yuaido. Nèidic Nuquin Papabèd
icquidombo mayan bédabo dadpen. Nèidic aido chuiquid dapambo Miqed caid. Aidtedi
ispombi. Adnubien Satanas nadposh. —Aton yuabo mayan bédabo cuemiasch Nuquin
Papa dèniaquec èbimbo abitedishun icho yantsiabi —quiash nicantiadquio icposh. Satanas
chedo nidaidèn nidmiabi icnuc neposh. ⁸ Adshumbic: —Niunchitono —quequin bedbidan-
bedbidanaquien Nuquin Papan yuabo Miqed chedo uidènquo icquido yec niadenquo
icposh. Adshumbic Miqed chedon nisibimboecquid Satanas chedo nicaposh. Aton
yuabobèdta Nuquin Papa yacnoshon nicaposh. ⁹ Nicaquien matses tabadacno nidaidèn

choec Satanas chedo bud-budposh. Eba caid icsamepampid Satanas niosh. Nēbi matses dadpenquioshē icsamequin yuate bunquieec.

¹⁰ Adnubien Nuquin Papa tabadacnoshon anocquidēn comapenec onquequin chuibamposh naden chuiquin.

—Aden Nuquin Papan aton Mado Esusbēdtan abi dēniacnuequido dēniacmenquo icposh.

Nuquin Papa chieshēnquidquo icquin abi tantiaquido chieshēnquin icsamboen chuishunquid nec.

“¿Esus tantiaquido bēdambo icquidoda nedic? Ēmbi natiamiac aido chieshtotsiash,” quequin Nuquin Papa chuidenequid Satanas nec.

Satanas chedo cuemiash Nuquin Papa aton Mado Esus abided cuidadec unēsaidbēdi dēniacadiapimbo yec abitedishun Icbombo nec

—queposh Nuquin Papa yacnuēsh cuēdec. ¹¹ Adashic padpidec auēshbidi:

—Nēbi ěmbi isac Satanasēn Esus tantiaquido chieshtometiapimbo icposh.

Satanasēn: “Chieshtomenu,” caqui:

“Padi. Esusēn yuambo nebi,” quec chieshtoenquo icposh.

Cuidmenquo icnuec abided cuidadec unēsaid Esus tantiec chieshtoenquo icposh.

Adsho abi chieshēnquidon matsesēn: “Padi. Esus tantienda. Cueschitomane,” caqui

chieshtoenquo icquin adenuidi Esus tantiasho cuesun secameposh Satanasēn aton yua icmiambobi.

¹² Satanas cuemiaid tantiash cuishonquenuna.

Nuquin Papa yacno tabadquidotedi nuquiibi cuishonquenuna.

Ēbitedi cuishonquenuc nidaidēn tabadquido matses yec mibi cuishonquetiapimbo iquec.

Nēshun cuemiac mibi yacno budash Nuquin Papa chieshēnquieec Satanas chieshēmēnquieec tabadec.

Mibi icsamete bunquieec. “Nēbi Nuquin Papan ěbi cuidquieque.

Abi tantiaquido yuashunchitono,” quec mibi icsamete bunquin mibi natiambo icmendac.

Adoac natiaic mibi tabadendac

—queposh Nuquin Papa yacnuēsh cuēdec. Aden tantiameposhi.

¹³ Adshumbic ěmbi isadaidbon chido isboed padpiden ismeposhi. Adoac Esus tishquid isadaidbon chido unēs uanuen nadancasho ispombi. —Nuquin Papa yacnoshon nica-chitoshi —queshun chieshēnquin nisibimboecquid Satanasēn aid chido nadancaposh.

¹⁴ Adnubien Nuquin Papan chiqui dapan podobiecquid meniac bedanec aid podombi cuenec matses nibēdacnombo Nuquin Papan tantiacnombo chido cuemposh. Anoshombi nisibimboecquidēn icsa uatiapimbo icnuc Nuquin Papan aid chido dayun uaposh. Seta abentsē chotsecnuc matamequin dayun uaposh. ¹⁵ Adnubien nisibimboecquidēn: —Aid chido unēs uachitono —quequin ambibi ana shēcuēnshun chomequin acte dapa chido dayun uacno nua chomeposh. Aden Satanasēn Nuquin Papa tantiaquido isadaidbo matses nibēdametiadquio iquec. Ademibidi Esus tantiaquido nibēdametiadquio iquec. ¹⁶ Acte dapa chomiascho isun Nuquin Papan nidaid shēcuē uashun aid shēcuē acte nidmiosh chido yacno chiuidenquo icnuc. ¹⁷⁻¹⁸ Adsho isun nisibimboecquidēn Satanasēn nēishquioshon aid chidon bacuēbobimboecquido Esus tantiaquido chieshēnquioposh. Uesquin cuesun secatiadquio icposh. Nuquin Papan chiacpadomboen chieshtoenquo icquin bēdamboen naquido Esus tantiaquido caimbi.

13

Bēdibimboecquid dapa ismiaid

¹ Esus tantiaquido cuesun secate bunquid ismeboshombic Satanasēmbidi chian dapa mad caid cuēmanshun cainquin ismeoaposhi. Aden cainubien acte uquēducuēsh bēdi dapabimboecquid pudundoposh. Mapi 7tedi icposh. —Nuquin Papa caid nibēdquieec.

Ēbiuidtsēqui abitedishun icbombo icnu —quequin aton mapitedi bēdada uadaid neposh. Pais 10tedi icposh. Aid paistedi chuiquid dapan mauete paisēn dectambampaccosh.

² Aton dada bēdin dadabimboec isadposh. Aton taē uinsadpambo icquid utsi oso caidēn taēbimboec isadposh. Ana shēcuē bēdi utsi tēbuchoquidēn ana shēcuēbimboec icposh. Adsho isun Satanasēn ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanasēn matses icsamboshē icquid chuiquid dapa icmequin ismeposhi.

³ Adshumbic padpiden ismeposhi. Adoac aid bēdi dapabimboecquid acte uquēducuēsh choboedēn mapi abentsēc mēmuntiapimbo icnuc cuesuniaid uincuemiaid icsho ispombi. Aden uincuemiaid icsho isash: —Comapenen tantiaquidien nechitec —queshun matses abitedishun acte uquēducuēsh choboedēn chuiquid icsamboshē icquidēn chiacpadomboenuidi nabededposh. ⁴ Adshumbic: —Ēbi chuiquid dapa namequid mibi nec —quequin

Satanas papa caquin matsesèn tantiabededposh. —Aden Satanasèn namiac ëbi chuiquid dapapadquid utsi nibëdec. Comapenen tantiaquidquio icnuc utsibon nuqui cuesun secatiapimbo iquec —qeshun abi chuiquid dapa acte uquëducuësh choboedtsen tantiaquiosh. ⁵ Aden matsesèn tantiaid icquin Satanasèn tantiamiacpadomboen Nuquin Papa chieshënuëc: —Nuquin Papa caid nibëdquie. Ëmbiuidtsëqui namembi —quequin matses abitedimbo nameposh. Aden Nuquin Papan tantiacpadembi inchëshën ushë 42tedi nidmeposh seta abentsë chotsecnuc matamequin. ⁶ Aidën Nuquin Papa chieshënuëc naden muauaposh. —Nuquin Papa caid nibëdquie. Abi tabadaidtsen nibëdquie. Abi yacno tabadquido abitedi nibëdquie. Ambembi chiaid niosh —quec muaposh. ⁷ Adshumbic Satanasèn tantiamiacpadomboen Esus tantiaquido dadpen unës uabudneposh. Adembi matses nidaid utsi-utsiec yacno tabadquido abitedimbo ambi chiapadomboen nameposh. —Matses icsamboshë icquid matses abitedi chuiquid dapa iquendac —quequin ushquin isacimbocnuc ismeposhi. ⁸ Aid caic matses abitedishun: —Nadatiambo icquid nec —quequin tantiaquindac. Aid tantiaquido Esus tantiesabo nendac. Ëndenquimboshë matses uabi Nuquin Papan tantiampicpadec abided cuidadec unësaid Esusquio tantiesabo nec. —Adquido yec Nuquin Papan: “Ëbëdi tabadmendambi,” quequin chiacmaidombo nec —quequin aden ismeposhi.

⁹ Pabiate cuembo icquin bëdamboen tantia. Esus tantiaquido icsho mibi chuinu. ¹⁰ Nuquin Papan: —Ëbi tantiaquid chieshënuëc quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquindac. Ëbi adsho tantias mimbi nacpadequi chieshtoenquio icta. Chieshtoenquio icquin Esus tantiaquin ambi chiapadomboenuidi nabanta.

Nidaid shëcuënuësh choboedtsen ismiaid

¹¹ Adshumbic padpiden ismeposhi. Adoac aben icquidbimboecquid utsitsen nidaid shëcuënuësh puduësho ispombi. Obecan paisbimboec aton pais daëd icposh. Satanasèn ancanquidquio icmiacpadec dacuëdampamboec onqueposh. Bëdambo icquid damianquien muakin chuibanquidquio niosh. ¹² Adsho isun Satanasèn abia chuiquid dapa icmeboedën nidaid shëcuënuësh puduëmboed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiapadomboen matses abitedi nameposh naden chuiquin. —Seshuniaid uincuemiondaidën nuqui chuiquid dapan chiaiduidtsëqui natiad —caposh. ¹³ Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpenshun isnubi abucshun ambembi taboadaid budmequin ismeposh. ¹⁴ Aden Satanasèn namiacpadomboen comapenen tantiaquin ismiac matses dadpenshun: —Abimbo caic —quequin abi chuiquid dapa icsamboshë icquidën chiaid nabededposh Nuquin Papambo tantienquio icquin. Abi chuiquid tantiamequid nidaid shëcuënuësh choboedën: —Nuqui chuiquid dapa uincuemiaidquio icsho tantiaquin abibimboecnuc nuamboshë icnuc nacentia —cac matsesèn nacnemposh. ¹⁵ Nacnenacsho isun Satanasèn namiacpadomboen nidaid shëcuënuësh choboedën abi chuiquid dapabimboecnuc nacnemboedi tibocameshun oncameposh. Adoquien nacnemboedquobi chuiquid dapa icsabimboec onquequin: —Ëbi tantiesabo neque. Cuesun secatan —cac yuabon abi chuiquid dapa tantiesabo cuesun secatamposh. ¹⁶ Adnubien nidaid shëcuënuësh choboedën: —Nuqui chuiquid dapan yuabo nuqui nec —quequin ancabudquid matses dadpenquio dada uaqin bësiadmeposh nëidtedi. Nëidic chuiquid dapabo. Nëidic chuiquidpenquio. Nëidic dadpen dayun uaquido. Nëidic aton na nibëdquido. Nëidic matses yuabotedi. Nëidic yuapenquio. Aidtedi matses dadpenquioshë dada uaqin bësiadmeposh. Utsi-utsien bëtateteno bësiadmeposh. Utsi-utsien mëdante abiucquid mësiadmeposh. —Acte uquëducuësh choboedën ëbi chuiquid dapan yuabo nec —qeshun nameposh. ¹⁷ Adshumbic nidaid shëcuënuësh choboedën chuiposh. —Adec ëmbi chiapadec siadambo icquido piucquidbëdta mitsana utsi menenda. Ëmbi siadmiaiduidtsëqui mene —queposh. Utsi-utsiec abi chuiquid icsamboshë icquid cuëmëdquid dada uaqin bësiadmiaid neposh. Utsi-utsiec aid cuëmëdaidbimboecquid naden 666 dada uaqin bësiadmiaid neposh. ¹⁸ ¿Ada ëmbi chuiboed tantio? Bëdamboen tantiaquidën: —Abi cuëmëdquidquio chienquio icquin naden 666 chuiquin dada uapac —catsiash. —Adec matses icsamboshë icquidquio chuiquid dapa yansho isun bëdambo icquid danenda —quequin ushquin isacimbocnuc aden ismeposhi.

¹ Adoshombic padpiden ismiac abided ciudadec unësaid Esusquio macuësh dapa Sion caid mananënquio tabadsho ispombi. Abëdi abi tantiaquido dadpenquio 144,000tedi tabadposh. —Con na neque. Chën —quequin cudasquin Nuquin Papan abi cuëmédquidbëdta Esus cuëmédquid dada uaquin bësemiaido niosh. —Adec Esus tantiaquido abëdi tabadendac —quequin aden ismeposhi. ² Adnubien Nuquin Papa yacnuësh çmidapadpamboec cuëdtoposh? Acte nua chododoquiabipamboequien niabiposh. Abu tesquia-niacbipamboequien nechitosh. Ten-tencate dapa dadpen icho-ichoen sananquin tencacbipamboec comapenec cuëdëncuededposh. ³ Adec Esusbëdi macuësh mananënquio tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobëdtan dadanobi ëshëcquido 4tedi icquidën ambobidi tabadquin tantianuc ad-cuededposh. Abi icsaid bedshunuec abided ciudadec unësaid Esus tantiaquidon mat-sesënuidsëqui aid cuëdënte chuca tantiec cuëdënosh. ⁴ Aido Nuquin Papa yacno nidabi yec nidaidën tabadnuc matses utsibo abitedimbo icsamboeshë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatiapimbo icnubi aidombien tanti-aquioipanëdash. Abided ciudadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh. ⁵ Chieshtoenuio icquin Esus tantiec muesabo icpanëdash. —Adquido iquendac —quequin ushqin isacbimboecnuc aden ismeposhi.

Mayan bëda utsi 3tedshun chiaid

⁶ Aido ismeboshombic utsitsen ismiac Nuquin Papan abi yacnoshon uaid mayan bëda uicchn cuenacimboec abuc cuensho ispombi. Bënudtiapimbo icquid Nuquin Papan chiaidquio matses chuinuec niosh nëidtedi. Nëdic matsesquio. Nëdic matses utsibo. Nëdic nidaid utsi-utsiec yacno tabadquido. Aidedi chuiquin Nuquin Papan matses icsaido cuidte chuinuec niosh. ⁷ Abuc cuenquimbi chuibemposh. —Nuquin Papauidsëqui tantiatia. “Abu uaquinc nidaid uaquinc acte uaquinc caquid bëdamboeshë iquec. Abipadquid utsi nibëdquio iquec,” quequin tantiatia. Nëbi ambi chiaid niac-niacquido cuidquieque. Aidquio tantiatia —quequin chuibemposh abuc cuenquimbi.

⁸ Adnubien mayan bëda utsi abuc cuenoaposh. Cuenquimbi naden chuibenaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcachimboen matses utsibo abitedi Nuquin Papa tantiamenquio icquin icsamequioposh. Aduidequi icsho ëndenquimboshë cuidampicpadomboen Nuquin Papan uesquin cuidquiendac —quequin chuibemposh mayan bëda utsin abuc cuenquimbi.

⁹ Adnubien mayan bëda utsitsen abuc cuenoaposh. Aidënsen chuibenaposh. —Tantia. Nuquin Papan cuidtequido chuinu. Chuiquid dapa icsamboshë icquid acte uquëducuësh choboed tantiaquin aidbimboecnuc nacnenaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiaish ambi tantiaidën chiacpadec utsi-utsiec bësiadcuëdednubi utsi-utsiec mësiadcuëdedposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquiendac. ¹⁰ Aidedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiagno chian anëdënquiacno nësecain adoendac. Abided ciudadec unësaid Esusënquio mayan bëdabobëdtan isnubi adoendac. ¹¹ Ènenquio icquin adoendac. Aden Nuquin Papa chieshënquidquio tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquio icquin adembi cuidquiendac ënenquio icquin —quequin chuibemposh mayan bëdan. Aden ismeposhi.

¹² Èmbi chuiboed tantiaishun mimbi nabocpadomboembi chieshtoenuio icquin Esus tantiaquin ambi chiacpadomboenuidi nabanta. Utsibon chieshënquin: —Padi. Esus tantienda. Cueschitomane —caqui adenuidi ënenquio icquin Nuquin Papabëdta Esus tantiaquiota.

¹³ Adnubi Nuquin Papa yacnuësh comapenec onquequin chuioaposhi. —Naden chuiquin dada uata. Chieshëmënquidon: “Esus tantiec,” qeshun cuesun secaido Esus tantiaquido cuishonquendac —quequin chuiposhi. Adnubien Nuquin Papan Mayanëntsen: —Ai, abimbo caosh. Esus tantiaquido natiac tabadtenedobi unësash bëdamboeshë iquendac shubitiapimbo yacno tabadec. Ambi chiacpadquiec bëdamboec tabadec unësacsho Nuquin Papan aden bëdamboeshë icmendac —quequin chuiposhi.

Intac nua icnuc Nuquin Papan cuidtequid chiaid

¹⁴ Adoshombic padpiden ismiac abu ushunquio Esus tsadsho ispombi. —Abitedishun Icbombo nëbi —quec chuiquid dapan mauetembo shocosh nacnenaid maeshun chëshëtibimboecquid sanamposh. ¹⁵ Adnubien mayan bëda utsin abi yacnuësh choquin comapenec onquequin Nuquin Papan chuiboed Esus chuituidposh. —Nëbi nidaidën

icquid sinaid butebanquin sando. Nuquin Papan tantiacpadën nëbimbobi nata ¹⁶ –caquien chështebimboecquidën sinaid butebanquin sandoposh. –Aden Nuquin Papan tantiacpadomboen abi tantiaquidotedi bedshun abi yacno Esusën buanendac –camenuen aden ismeposhi.

¹⁷ Adnubien mayan bêda utsi Nuquin Papa yacnuëshquibidi choposh chështebimboecquid sanampamboec. ¹⁸ Adec chështebimboecquid sanampamboec choshobien mayan bêda utsin matses tabadacno cuête dêtsisadaid isquidquio icquid nidaid masiabudboedën tauite dapa dayunuëshquio choshon comapenec cuêdquin chuiposh. –Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten sando ¹⁹⁻²⁰ –caquien uba caid mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë yec piumbo icposh. –Intac nuambo icnuc Nuquin Papan cuidendac –camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquio Nuquin Papan cuidac matsesën intac nuamboshë chididiquec nua mauanendac. Acte nua chëuêdadbipamboec cabayon mapi yaction intac chëuêdsho isombi. Ênapenquio quidometedos 300ted cactiombi cuêsquec nuamboshë matsesën intac chëuêdsho isombi ushqin isacbimboen. –Aden Nuquin Papan abi chieshênquido cuidendac –quequin ismeposhi.

15

Nuquin Papan cuidtequid 7tedbidi nabanaid

¹ Adshumbic Nuquin Papan cuidte tantiamenuen Nuquin Papa yacnoshon dacuêdampamboecnuc padpiden ismeposhi. Adoac matses natiamequin cuidquido dacuêdampambo icquido 7tedi icsho ispombi. Mayan bêdabo niosh. –Aidon ambi chiacpadomboen ênquimbi matses icsaido cuidsho isash Nuquin Papa nëish bêdanendac –quequin tantiaquin ispombi.

² Nuquin Papa yacnobidi chian dapa icposh. Actepenquio yec acte-actectesécquio isadposh. –Nuquin Papa icsaquido cuidquidquio nec –camenuec tied nêdênquiacbimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uquêducuësh choboedën chuiquid dapa icsamboshë icquidën: –Yuanu –cauidaido niosh. Chuiquid dapa icsamboshë icquidbimboecnuc nacenaid tantiatipimbo icquido aido niosh. Adecbidi icsamboshë icquidën ancabudacpaden nainquio yec aton yuabo ictiapimbo yec aid cuëmêdaidbimboecquid 666 dada uaquin siadmetiapimbo icquido niosh. Adec abi tantiaquido icsho Nuquin Papan meniaid ten-tencate cuêdêmec cuêdêncuededposh.

³ Nuquin Papan namiaid Moises: –Nuquin Papan nac ëbi chieshênquidon ëbi cuesun secainquio icposh –quec cuêdêmpampicpadec cuêdêncuededposh. Nuquin Papa bêdamboen ismenuec abided ciudadec unêsaidquio Esus aton Papabêda tantiec cuêdêncuededposh naden chiec.

–Nadatiambo icquin nabanquidquio mibi nec, Papa.

Abitedimbo uaquidquio yec abitedishun Icbombo mibi nec, Papa.

Matsesën naid abitedi tantiaquidquio abimbo chuiquidquio mibi nec, Papa.

Mimbi naid bêdambo icnuc dacuêdampambo mibi iquec, Papa.

Nidaid utsi-utsiec yacno tabadquidon Icho icpampidi adecbidi matses abitedishun Icbombo mibi nec.

⁴ Matses abitedishun: “Nuquin Icho dacuêdampambo icquid neque.

Ambi chiacpadomboen nanuna,” mibi capashun, Papa.

Mibiuidtsêqui icsaisambo nec, Papa.

Adquid icquin mimbi chiacpadomboen icsaquido cuidquimbi bêdambo icquido mimbi bêdamboen isendac.

Adsho isun nidaid utsi-utsiec yacno tabadquidon matses abitedishun: “Mibi bêdambo iquec. Con Icbombo mibi nec,” caindac

–quec cuêdêncuededposh Esus tantiaquido.

⁵ Adshun isquien isadaidbon: “Nuquin Papa tabadte nec,” quequin shubuampicpadquid shubu shêcniacchobi icposh. Nuquin Papa tabadacnombo tantiamenuen aden ismeposhi.

⁶ Auëshquio Nuquin Papan chiacpadec ëmbi isboedo mayan bêdabo 7tedi cho-choposh. Matses icsaquido cuidquido niosh aido. –Nuquin Papan yuabombo nec –camenuec dashcute nac-nacquo icquid dasiuidcuededash dashcute bëshpiu-bëshpiumbo icquid shic-tonquecuededposh. ⁷ Adsho isun Nuquin Papabêd icquid dadanobi êshêcquid abentsêcshun maspanêmpi shocosh piu nacenaid icho-icboen menebamposh. Unêstiapimbo icquidën Nuquin Papan nëishênquioshon cuidte cushtoaid maspanêmpi niosh. ⁸ Adnubien Nuquin Papa tabadaid nuntanuësh pushud-pushudpambo icposh. Adec dacuêdampamboecsho isash

Nuquin Papa chuinec puduedtiapimbo icposh. Ënquin cuidambi padpidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadiapimbo icquin — camenuen aden ismeposhi.

16

Maspanëmpin cushtoaid

¹ Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Matses yacno nidshun maspanëmpin cushtoaid chiuinquin matses uesquin cuidta —quequin chuiposh Nuquin Papan.

² Adoaquien abentsëcshun ambi bedboed maspanëmpin cushtoaid nidaidënsnun chuiimposh. Adnubien ëmbi isboed acte uquëducuësh chobero chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën nami-aidquio icsamboshë icquid tantiaquin abibimboecnuc nacnenaid tantiaquido yec aton icbo cuëmëdquid dada uaquin siadmiaido icsho aden cuidposh.

³ Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ënden unësaidën intacpamboecnuc intacuc. Intacuidpambo icnuc acten icquidtedi unësbudneposh.

⁴ Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. ⁵ Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

⁶ “Ëmbi chiaid chuibanquidobëdta ëbi tantiaquido nua intac icnuc chieshëmënquidon cuesun secabudnepondash,” qeshun

cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa

—queposh mayan bëda acte dayun uaquid.

⁷ Aden acte dayun uaquidën chuisho tantias Nuquin Papa tantiaquin nëish picchate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

⁸ Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadec matses baded-badedquieic ushën pichiebudneposh. ⁹ Adec pichiebudneshumbien Nuquin Papa chushcabededposh. —Icsauidequi icsho Nuquin Papan nuqui cuideque. Nuqui icsaid ënash ambi chiacpadec bëdamboec tabadnuna —quetiadquidëmbi chieshënuquin abi cuidquidquio Nuquin Papambo chushcabededposh.

¹⁰ Adnubien utsintsen ambi bedboed maspanëmpin cushtoaid chiuimbenequin acte uquëducuësh chobero chuiquid dapa icsamboshë icquid ambi namiadobëd tabadacno chiuimbenequin. Adoaquien inchëshposh inchëshquio yec. Badiadenquio icposh. Adsho isash matses abitedi natiambo dacuëdcuededposh. ¹¹ Adec dacuëdcuededec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadec tabadnuna —quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcabededposh.

¹² Adnubien utsintsen ambi bedboed maspanëmpin cushtoaid acte dapa Eupëdates caid nëchiuimposh. Adoaquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma poteneuquin aden acte uesadmeposh.

¹³ Adec aid matses cho-choabi icnuc ushë choacmishun cho-chometequidëmpi naden ismeposhi. Coqueshbimboecquid podobitsi icsa 3tedi ana shëcuënuësh cho-chosho ispombi. Nëdic nisi dapabimboecquid Satanasën ana shëcuënuësh choquid. Nëdic acte uquëducuësh chobero chuiquid dapa icsamboshë icquidën ana shëcuënuësh choquid. Nëdic nidaid shëcuënuësh choberoëden Satanasën muauamequin oncameboedën ana

shëcuënuësh choquid. Aidedi chosho isombi. ¹⁴ Satanasèn yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuc niosh. —Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënquin Esus chedo cuesun secanuec adec cho-choendac. Nuquin Papan tantiacpadënquiobi adendac —camenuen mayan bëdan aden ismeposhi.

¹⁵ Adnubien Esusquio cuëdposh. —Tantia. Chuinu. Mimbi: “Nëbimbobi aid choec,” cacmaidquieni choendac. Ushenquio yachimboen ëbi ënenquio icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiacimboec icta ëbi cainec —queposh Esus.

¹⁶ Adnubimbi coqueshimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

¹⁷ Adnubien maspanëmpi bedboed utsintsen ambembi chiuinquin Nuquin Papan cuidte ënquimbi ismeposh. Ambembi chiuinubien abi tabadacnuëshquio Nuquin Papa cuëdposh. —Padi. Nëbi ëmbi tantiacpadomboen ënquimbi cuidec —queposh. ¹⁸ Adnubien abu bed-bedquetanepamboec abu tesquianenuec natiamboshë shëc-shëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquedenedi acquimboec uëdëquiamposh. ¹⁹ Adnubien matses dadpen yacno Babidonia caid yacnuësh nidaid abichobi ichoedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquiosh. Adec nidaid uëdëquenubi nidaid utsi-utsien yacno shubu dadpen icquid yacno-yacnomboec shubu abitedi uesadec chimeshadbudneposh. ²⁰ Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. ²¹ Abucueëshquio ue dapa choachimboec ue tsasi nuacquid dapa quidos 50 icnuc yuë tanaid dadpenquio paëdbudnequimbi matses tish-tishbudneposh. Aden ue tsasi dapan mëyansho isun padenquio ictiadquidëmbi matsesën Nuquin Papa chushcabededposh. —Nuqui icsaid ënshun Esus tantianuna —quetiadquidëmbi chushcabededposh. —Adquido iquendac —quequin ushquin isacimboecnuc aden ismeposhi.

17

Chido chishpidabimboecquid ismiaid

¹ Adshumbic maspanëmpin icquid chiuimboedën abentsëcsun chuiuamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquio icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquendac,” quequin mibi ismenu. ² Aido icsamboshë iquec. Matses utsi-utsien abi chuiquid dapabobëdta uisma uanten danoshcacimboen Nuquin Papambo tantiamenquio icquin ambi chiaid niac-niacmequiosh. Aido cuidsho isec cho —queposh.

³ Adshumbic ushquin isacimboecnuc ismeposhi. Nuquin Papan Mayanën tantiamiac masiuidquio yacno shubu nibëdacnombo chido aben icquid dapa catsadsho ispombi. Aben icquid piumboshë icposh. Aidën dadan: —Nuquin Papa caid nibëdquio iquec —quequin uesquin dada uapaidquio icposh. Aton mapi sietetedi icnuc aton pais 10tedi icposh. —Mimbi isboed acte uquëducuësh choboed chuiquid icsamboshë icquidquio nec —quequin aden aben icquid ismeposhi. ⁴ Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaid chedo cuënotempi nac-nacquio icquid chedo payuec aïdbidi mësiuidposh. Dëshote bëdambo icquid sanamposh. Aden sanansho dëshote anisquien isaquien icsambo icquidquidquio icposh. —Chido chishpidabimboec Babidonia caid yacnocquido icsamboshë iquec. Uisma uanten danoshcacimboen: “Nuquin Papa caid nibëdquiec,” quequin tantiamequin matses utsibo dadpenquio icsamequendac —camenuen aden ismeposhi. ⁵ Adshun isquien aid chido abi tantiamete abi cuëmëdquid bëtanteteno bëdada uadac. —Babidonia yacnocquido bëdambo icquido damianquidi icsamboen tabadmequido nec —quequin dada uaid icposh. ⁶ Aid chido paëmbo icquid acacimboec Esus tantiaquidon intac acash tantiadenguio yamposh. —Babidonia caid yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuëdampamboecsho isash: —¿Mitsipadquiopequini ique? —quebudquioibi.

⁷ Abdudquioshobini aid mayan bêdan: —“Tantiadenquo iquec,” ¿quecta ique? Tantia. Chido chishpidabêda abi catsadaid aben icquid chuinu. ⁸ Mîmbi isboed aben icquid icsamboshê icquid ictenedi nêbi nibêdec. Yuecshun Satanasên abi tabadacnoshon padpiden chomendac. Adoacsho yuecshun Nuquin Papan chian anêdênquiacono nêsecaindac. Aden cuidabi Satanasên chomebocsho isun Nuquin Papa tantiesabon: “Comapenen tantiaquidien nechitec. Matses nibêdanêdaidi uincuenashien choachitosh. Aidi tantianu,” caindac. Matses uabi icquin Nuquin Papan: “Ëbi tantiaquido iquendac,” cacmaidonquo adoendac —queposh mayan bêda.

⁹ Adshumbic padpiden chuiposhi. —Tantia. Ëmbi chuiboed bêdamboen tantiamenuen chuinu. Naden tantiamenuen aben icquidên mapi 7tedi icquid mibi ismiombi. “Babidonia caid yacno matses icsa uaquido tabadacno macuêsh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. ¹⁰ Aid chuiquid dapabo 5tedi nibêdnubi utsi abi iquec. Nêbi aidên aton matses namec. Utsitsen choendac. Choshon aton matses nametantsequi badedquo nibêdanendac. ¹¹ Nibêdanêdaidi choashic Ëmbi ismeboed acte uquêducuêsh choboed chuiquid dapa icsamboshê icquidquo iquendac. Aidên Ëmbi chuiboedo chuiquid dapabo 7tedishun namiacimboen aton matses icsamboenshê namendac. Adoacsho isun Nuquin Papan icsaïdo cuidquiacono nêsecaindac —queposh mayan bêda.

¹² Adashic abi onquec: —Naden tantiamenuen aben icquidên pais 10tedi icquid mibi ismiombi. Chuiquid dapa utsibo 10tedi iquendac. Nêbi aton matses namiabi iquec. Padabi. Adquido yanendac. Satanasên acte yacnuêsh choboedbêda chuiquid dapabo icmiac matses icsamboenshê namiash yuec tabadabi badedquo nibêdanendac. ¹³ Nibêdanabi icquin aidon acte uquêducuêsh choboed abi chuiquid dapambo icmendac. “Aidên namiac abi tantiaquidobêda Esus nuquitedishun cuesun secatsiac nibêdquo icnuc,” qeshun aden icsamboshê icquid abi chuiquid dapa icmendac. ¹⁴ Aden Esus chieshênquidon: “Chieshtomenu,” cac Eusên yuaido abi tantiaquidotedi chieshtoenquo iquendac. Aton Icho Eusên abided ciudadec unêsaidên namiac chieshtoenquo iquendac. Aden abi tantiaquidobêda chieshênquin cuesun secanuec cho-choshu isun Esusêmbi cuesun secaindac. “Ëbien matsesên Ichombo nec,” quetanquin adoendac —queposh mayan bêda.

¹⁵ Adashic padpidec: —“Nidaid utsi-utsiec yacno tabadquido dadpenquo Babidonia caid yacnocquidon icsamendac,” quequin tantiamenuen chido chishpidabimboecquid acte dapa bêntse tsadsho mibi ismiombi. ¹⁶ Aden Babidonia caid yacnocquidon nasho isun mîmbi isboed chuiquid dapa icsamboshê icquidên abêdan chuiquid 10tedi icquidbêdan Babidonia caid yacnocquido chieshênendac. Aden chieshênquin cuesun secatanquin shububêdtabi nêdêncaindac nibêdquiecnuc. ¹⁷ “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquêducuêsh choboed chedo chuiquid dapabo icmendac. ¹⁸ “Matses utsi-utsien chuiquid dapabo aton matsesbêdtabi yuaquid abi iquec,” quequin mibi chido chishpidabimboecquid nêbi ismiombi —quequin mayan bêdan chuiposhi.

18

Nuquin Papan Babidonia caid yacnocquido cuidaid

¹ Aden Babidonia yacnocquido cuidte chuisho tantiaboshombic mayan bêda utsi Nuquin Papa yacnuêsh abucuésh budsho ispombi. Nuquin Papan icmiacpadquid mayan bêdabo chuiquid dapa yec bêchamauanquiecposh. ² Choshombic nua cuêdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibêdquiecnuc abi tabadtenecnombo podobitsiuidpambo tabadendac. Ambobidi edesteuidquo tabadendac. ³ Babidonia caid yacnocquidon matses utsibo abitedimbo abi chuiquid dapabobêda Nuquin Papa tantiamenquo icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquo icposh. Adsho Nuquin Papan cuidquiendac —quequin mayan bêdabon chuiposhi. ⁴ Adnubien Nuquin Papa abucuésh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobêdi icsasho êbitsen cuidquionoshe,” qeshun aidon namiacpadomboen nainda. Auêshquo niqueta —quesho tantiombi. ⁵ Nuquin Papa yacnoshombidi utsin chuiposh. —Ënêdenquo yec icsauidequi icsho isun ambi tantiacpadomboen Nuquin Papan cuidquiendac. ⁶ Babidonia caid yacnocquidon matses utsibo dadpenquo icsamequioposh. Aden icsamequido icsho Nuquin Papan nêbi nêishquioshon uesquin cuidquiopashun —queposh mayan bêda. ⁷ Adashic abi onquec: —Babidonia caid yacnocquido cuidtequido nec. Ambî naiduidi naquin aton na dadpenquo bedash: “Aidtedi dayun uaic bêdambo iquebi,” quepec Nuquin Papan cuidte tantienquo yequi. Adsho tantiashun: “Natiambo icnuc comapenen cuidquiopashun,” caimbi. Otacquo

tantie: “Nuquin matses yuabo dadpen icnuc nuqui bédamboec tabadec. Chido niantie bènè unèsaid mèyadacimboec mèyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatipimbo yec. ⁸ Adsho ambi: “Nèbi èbi cuidec,” cacmaidènquo cuidendac. Nuquin Papanquo abitedishun Icbombo icquin comapenen tantiaquin nacnenquidquo icquin badedquo cuidquiendac. Aden dadpenquo unès uabudniacs ho isash natiambo sedenquecuedendac. Aton pete nibèdquiecnuc natia bunendac. Aton shububèdi dadpenquo nédènquendac —queposh mayan bèda.

⁹ Adashic abi onquec: —Adec Babidonia yacnuèsh nédènquec pushudtonesho isash: “Aidon namiacpadomboen Nuquin Papa tantienquo icquin con na dadpen bedtenembi,” quequin chuiquid dapabon nadambocain sedencabededendac. ¹⁰ “Tantia. Nuqui tanti-aido sidquebudneque,” quec uinte paèdtampamboec dacuèdtanash uanoshon isec tabadendac. Adec tabadec: “Aido unèsquimboshè iquec. Aton matses aton yuabobèdi dadpenquo icpadenec. Ambi dayun uaid dadpenquo icpadenec. Matses utsibo dadpen namepadenec. Aido tantiac unèsquimboshè iquec. Badedquo uesquin cuidquiopac,” quec sedenquecuedendac Babidonia caid yacnocquido tantie —queposh mayan bèda.

¹¹ Adashic abi onquec: —Babidonia caid yacnocquido aden cuidacsho isash utsibotsen: “Èmbi meniaid bedshun piucquid dadpen menedenebi. Nèbi adquid nibèdquiecnuc. ¿Tsuntsimbini èmbi meniaid cuidquin piucquid menepatsiashba?” quec sedenquecuedendac. ¹² Aidobidi: “Nadquid Babidonia caid yacnocquido menequin piucquid dadpen bedtenembi. Nèdic shocosh piu. Nèdic shocoshquo. Nèdic casèdubimboecquid cuènote bédambo icquid. Nèdic dashcute bédambo icquid. Nèdic dashcute piumbo icquid. Nèdic dashcute umumbo icquid. Nèdic sèntebimboecquid nacnenaid. Nèdic aben icquid edepanten shèta nacnenaid. Nèdic cuète utsi bédaidquo nacnenaid. Nèdic shocosh utsi nacnenaid. Nèdic cuènote nac-nacquo icquid nacnenaid. Piucquid dadpen menequin adquidtedi Babidonia caid yacnocquidon bedpadenec. ¹³ Utsitsen dadpen bedpadenec. Nèdic batambo icquid sabimboecquid. Nèdic bédambo nuadte. Nèdic bédambo nuadec danoshquete. Nèdic acte paèmbo icquid. Nèdic bèchi. Nèdic pan nacnentequid. Nèdic nèish yua baca caid. Nèdic nèish yua utsi obeca caid. Nèdic nèish yua cabayo caid. Nèdic matses antsadsho cabayon nimbanquin buante. Nèdic ambi chonoo uatequido matses ambi ampequin bedaido dadpen. Babidonia caid yacnocquidon aidtedi dadpenquo bedtenesho aton piucquid dadpen bedpadenembi,” quependac nidaid utsi-utsiecnuc yacno tabadquido —queposh mayan bèda.

¹⁴ Adashic abi onquec: —Abi piucquid menedenedèn dayun uaid nibèdanesho isash: “Aid matses bunaidquo ambi dayun uaid pete nibèdquiecnuc. Ambi dayun uaid dashcute bédambo icquidbèd aton na utsi dadpen abitedi nibèdquiecnuc,” ¹⁵ quiash natiambo dacuèdec uanoshon isec tabadec sedenquecuedendac abi piucquid menedenedo tantie. ¹⁶ “Aid matses tantiac unèsquimboshè iquec. Matses dadpen yuaquin matses dadpen namepadenec. Aton matses dashcute bédambo icquid dasiuidcuededtenec. Utsi-utsiecnuc dashcute piumbo icquid dasiuidnubi utsi-utsiecnuc dashcute umumbo icquid dasiuidcuededtenec. Utsimbic casèdubimboecquid shocosh piu nacnenaid payudenec. Utsibic casèdubimboecquid utsi payuec mèsiuidtenec. Adec: ‘Con na dadpenquo icnuc bédamboec tabadebi,’ quepadenec Babidonia caid yacnocquido. ¹⁷ Adsho isun Nuquin Papan abi ushèmbi cuidquiac ambi dayun uaidbèd aid matses badedquo nibèdanac,” quec sedenquecuedendac abi piucquid menedenedo tantie. Adecbidi nidaid utsin icquidotsen sedenquecuedendac. Nèdic cano dapa dancha icbo. Nèdic dancha icbobèd nidquido aton yuabo. Nèdic icbo piucquid meniash dancha antabèdtoquido. Nèdic nuècquid bedshun piucquid bednuen menequido. Aidtedi uanoshon isec sedenquecuedendac. ¹⁸ Nédènquec pushudtonesho uanoshon isash: “Adquido utsi nibèdec,” ¹⁹ quiash natiaquiecnuc sedenquecuedendac. Adec shubiecnuc: “Èbipadquid dancha icbon bèaidtedi bedshun piucquid dadpen menedenedo tantiac unèsquimboshè iquec. Is. Cuidquiac badedquo nibèdanaque,” quec sedenquecuedendac —queposh mayan bèda.

²⁰ Adashic mayan bédabidi: —Èbien cuishonquendac. “Nuquin Papa yacno tabadquidotsen èbèdi cuishonque,” quequin chiendambi. Esus tantiaquido chuiquinc Esusbèd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnuna. Mibi chieshènquin natiamiacpadomboen mibi chieshènquido Nuquin Papan uesquin cuidquioshe,” quequin chiendambi —queposh mayan bèda.

²¹ Adnubien mayan bèda utsin uidènquo icquidènquo nidaid moco nuacquid dapa yuèmboshè icquid cadotanquin acquimboen acte nènebidaanquimbi chuiposh. —Èmbi acquimboen nènebocpadomboen Nuquin Papan Babidonia caid yacnocquido uesquin cuidquiendac nibèdquiecnuc. ²² Adoac aido ictenecnombo nadimbo iquendac. Tentenate ten-tencainquo iquendac. Utsibobic cuèdènquo iquendac. Utsibombic shoncate

shoncainquio iquendac. Cuëte chëshun nacnenenquio iquendac. Piacbo macuesenquio iquendac. Nadimboshë iquendac. ²³ Tabote taboadaid nibëdendac. Dada aton chido ambi nëbi bedaidbëdi mamënenquio iquendac. Nibëdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiaequin icsamepadenec,” quendac. ²⁴ Nuquin Papan cuidabi icnuc aden icsamequin Babidonia caid yacnocquidon Nuquin Papa chieshënuquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac –queposh mayan bëda.

19

Chieshënuquido cuidacsho isash cuishonquaid

¹ Aden mayan bëdan Nuquin Papan Babidonia caid yacnocquido cuidte chuisho tantimbi. Adshun tantiaquien Nuquin Papa yacnuëshquio Esus tantiaquido dadpenquioshë comapenec cuëdëncuededposh.

–Nuquin Papa bëdamboshë iquec.

Aiduidtsëqui matses abitedishun Icbombo nec.

Aton Mado abided cuidadec unësaid tantiaasho matses bëdamboen isec.

² Muesambo icquin ambi chiacpadomboen naquidquio nec.

Abi tantiesabo ënëdenquio yec icsauidequi icsho cuidquidquio nec.

Adquid icquin: “Icsamboshë iquec,” quequin matses utsibo icsamequido Babidonia caid yacnocquido cuidquioposh.

Nuquipadquid Esus tantiaquido cuesun secacsho isun cuidquioposh

–quec cuëdëncuededposh.

³ Adashic padpidemboec:

–Nuquin Papa bëdamboshë iquec.

Is. Pushud-pushudpambo icnuc nëdëncuquin Babidonia caid yacnocquido uesquin cuidquioshe

–quec cuëdëncuededposh Esus tantiaquido dadpenquioshë.

⁴ Adsho tantiaash Nuquin Papa chuiquid dapan tsadten tsadnuc abi dacuenadec tabadquido: –Nuquin Papa Nuquin Icbo nec –quequin ismenuec danëshën tinquebudcuededposh. Adec tinquebudcuededequi: –Abimbo caic. Nuquin Papa bëdambo iquec –quecuededposh dadanobi ëshëcquido 4tedi icquido tsusiobo 24tedi icquidobëdi. ⁵ Adashic auëshquibidi abentsëc cuëdposh.

–Nuquin Papa matses uaquidquio yec bëdamboshë iquec, canuna.

Nuquibi abi tantiaquidtedishun: “Nuquin Papa bëdamboshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bëdambo iquec,” canuna

–queposh.

Esusën abi tantiaquido beduante chiaid

⁶ Adsho tantiaash abu tesquianiabimboec acte nua chododoquiacimboec Nuquin Papa yacnocquido dadpenquio cuëdëncuededposh.

–Abi chieshënuquidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bëdamboshë iquec.

⁷ Nuquin Papa tantiec cuishonquenuna. Nuquin Papa bëdamboshë iquec.

Dadan aton chido buntacquo beduanachimboen abided cuidadec unësaid Esusën abi tantiaquido beduanshun abi yacno tabadmendac.

Bënen beduanabi yac chido: “Con bënënen nëbi beduanebi,” quiash nacnemëdquiacimboec: “Nëbien con Icbo chochitec,”

quiash Esus tantiaquido bëdamboec tabadec.

⁸ Abi tantiaasho Nuquin Papan bëdamboen isaido yec abi icsaid ënash:

“Nëen con Icbo chochitec,” quiash bëdamboec tabadec.

Aden abi tantiaasho Esusën dashcute chuca ushumbo icquid dasiunacimboen abitedi icsaisa icmendac

–quec comapenec cuëdëncuededposh.

⁹ Adnubi mayan bëdan chuioposhi. –Ëmbi chuibocpadomboen dada uata. “Isadaidbo aton chido bedquin aton matses cho-chomiash pemec bëdamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuishonquequiec tabadendac,”

quequin dada uata. Abimbo caimbi. Nuquin Papan chiaidquo chiec nebi –queposh mayan bèda.

¹⁰ Adsho tantiashini Nuquin Icho danec ismenuec danëshèn tinquebuduidpoc. Adshobini: –Èbi aden ismenda. Nuquin Papauidsèqui aden ismeta. Mibipadquid Nuquin Papan yuabidi nebique. Nuquin Papan Mayanèn Esus tantiamequin Nuquin Papan chiaid dada uamepampic. Aidëmbidi namiac mibipadquidobèd Esusèn yua nebique. Èbi aden ismenda –queposh mayan bèda.

Cabayo ushu catsadquid bèdamboshè icquid

¹¹ Adshumbic abuc isquin Nuquin Papa yacno shècnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: –Abi tantiaquidobèd cuëshèdtiapimbo icquid yec ambi chiacpadomboen naquidquo Esusquo nec –quequin tantiombi. Ambi chiacpadomboen icsaido cuidquidquo icquin icsaido cuesun secanuec niosh. ¹² –Matesèn ompodëmèdtiapimbo icquidquo nec –camenuc cuète isquidquo icquidbimboec èshè icposh. –Abitedimbo chuiquid dapambo nebi –quec mauete dadpen maueposh. Abi cuëmèdquid abi bèdada uadaid tantiadenquo icposh. Utsibon tantiatiapimbo icnuc ambentsèqui tantiate niosh. –Nuquin Papabèdtan Esusèn naidtedimbo matesèn tantiatiapimbo iquec –camenuc adec bèdada uadaid ismeposhi. ¹³ Abi cuëmèdquid utsiembi tantiatsèccoc. –Nuquin Papapadquidquo yec abi tantiamanquid nec –quequin cuènaid niosh. Aton dashcute bèntse icquid cuidaidèn intaquèn punacimboec piumboshè isadposh. –Abi tantiesabo cuidquidquo nec –camenuc aden ismeposhi. ¹⁴ Esus bëyuc nidnuc abi tsibanec abi tantiaquidobèd mayan bèdabo cabayo ushucquidquidquo catsadcuèdedec cho-choposh. Icsaisa icmiaido yec dashcute ushumbo icquid bèchish nibèdquidquo dasiuidcuèdedposh. ¹⁵ Abi bëyucquid ana shècuènuëshquio chèshte cuènumbo icquid cueshqueposh. –Ambi chiacpadomboen mates icsaido abitedi cuidquidquo Esus nec –camenuc aden ismeposhi. Adquid icquin nidaid utsi-utsiec yacno tabadquido icsauidequi icsho uesquin cuesun secaindac. Nuquin Papan chiacpadomboen naquin shancuinbimboecquid uba caid nua ènè icnuc tish-tishacbimboen nua intac icnuc cuesun secaindac. ¹⁶ Aton dashcute bèntse icquidèn abi cuëmèdquid utsi dada uaccosh. –Abipadquid utsi nibèdnuc abitedimbo chuiquid dapambo yec abitedishun Icbombo nec –quequin dada uaccosh. Aton bëusudquid yacnombo adembidi dada uaccosh.

¹⁷ Adnubien ushè mèducquio tabadquin mayan bèda utsin edeste chedo abuc cuencuencho comapenec cuèdquin chuiquid. –Nuquin Papan cuidquin cuesun secaidon nami chec cho-cho. ¹⁸ Èmbi chiacpadec cho-choshon matesèn nami mimi nua tèpuiquin chendac nèidtedi. Nèidic mates utsi-utsien chuiquid dapabo. Nèidic sondado chuiquid dapabo. Nèidic dada cuesabo. Nèidic cabayo chedo abi catsadquidobèdtabi. Nèidic mates utsibo abitedimbo. Nèidic mates yuabo. Nèidic mates yuapenquo. Nèidic bacuèbo. Nèidic caniaido abitedi. Adquidtedi uesquin chec cho –quequin edeste chedo chuiquid. –Ambi tantiacpadomboen Nuquin Papan mates uesquin cuidquiendac –quequin aden ismeposhi.

¹⁹ Adshumbic mayan bèdan ismeboedo Esus chedo cuesun secanuec cho-choshò ispombi. Acte uquèducuësh choboed chuiquid dapa icsamboshè icquid chedo nidaid utsi-utsiec yacno tabadquido abi chuiquid dapa chedobèdi tsidadash cho-choposh coqueshbimboecquid podobitsi icsabon namiacpadec. –Cabayo ushumbo icquid catsadquid Esusquo abi tsibanquidobèdta cuesun secanu –caqui ²⁰ cuesun secadenquo icposh. Adshobien Esusèn acte uquèducuësh choboed chuiquid dapa icsamboshè icquid bedposh. Adotanquimbic aid tantiamequid nidaid shècuènuësh choboed Satanasèn oncamiaidtsen bedposh. Aid comapenen tantiaquin ismequin muaquin abi chuiquid dapan icsamboshè icquidèn chiacpadomboen mates namequidquid niosh. Adec muaquin abi chuiquid dapabimboecnuc nacnemequidtsen niosh. Adecbidi: –Èbi chuiquidèn yuabo nec –quequin mates dadpen bèsiadmequid niosh. Adec icsamianquidquo icsho bedposh. Abi chuiquid dapabèdta bedshun unès uabi chian dapa ènèdenquo yec anèdènquequid icsamboshè nuadquidquo nèsecaposh. ²¹ Adshumbic Esusèn ana shècuènuësh chèshte cuènumbo icquid cueshquequidèn: –Èbi chieshènuquidotedi unèsta –caquien cho-choboed utsibo abitedi unèsbudneposh. Adsho isun caimboedon edeste chedon nua-nuaic tèpuiquin matesèn nami chebededposh. –Aden Esusèn abi chieshènuquido nibèdamendac –camenuc aden ismeposhi.

20

Satanas uidèn uaid

¹ Adshumbic padpiden ismeoaposhi. Adoac mayan bèda utsi Nuquin Papa tabadacnuësh budshò ispombi. Podobitsi icsabo Satanasèn yuabo shècuèn tabadacno bètashaid

chictëbëdta shocosh bucubimboecnuc nacnenaid dapa sanamposh. ² Adshumbic Eba icsamenuc nisipampid Satanasquio bedposh. Bedtanquimbic shocosh bucubimboecnuc nacnenaidën ambi sanamboedën uidën uaposh. ³ Uidën uatanquimbic aton yuabo uidën uacno shëcuë aneposh. Adotanquimbic shëcuë bêtashquioposh pduentiapimbo icnuc. Seta dadpenquo 1000tedi matameshun bêtashte chichsun Satanas cuemenuen adoposh. — Aden seta 1000tedi matamiabi icquin abi uidën uactedembi matses muauquin icsame-tiapimbo iquec —queshun chicten bidiacquin uidën uaquipoposh. Aden ismeposhi.

⁴ Adshumbic utsitsen ismeoposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbëdtambi matsesën naid abimbo chuibamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uquëducuësh choobed chuiquid dapabëdta abibimboecnuc nacnenaid tantiapimbo icquido neposh. Adecbidi: —Aidën yua nebi —quec aid chuiquid icsamboshë icquid cuëmëdquid dada uadec bësiadiapiambo icquido niosh. Utsibic mësiadiapiambo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiac tabadposh. ⁵ Unësaidotedi uincuemiambo icposh. Nuquin Papan ambi tantiatedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh. ⁶ Adnubien tauaquin uincuemiaido bëdambo yec cuishonqueposh: —Padpidec unëstiapimbo iquebi —quiash. —Adquid icquin Nuquin Papan yuabo yec: “ ‘Esusbëd Nuquin Papa bëdamboshë iquec,’ canuna,” quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

Satanasquio chian anëdënquequid nëniaid

⁷ Adshumbic aidtedquio seta 1000tedi matameshun uidën uaid chicquin Satanas cuemendac. ⁸ Adoquien matses icsamenuc muaquin chiec nidaid utsi-utsiec yacno niden-dac. Aden aidën muaquin namiaquien matses dadpenquo Esus chedo cuesun sianuec tsidadendac. Nëidic nidaid Coc caid yacnocquido. Nëidic nidaid utsi Macoc caid yacnocquido. Nëidic matses utsibo abitedi cuëtë podotedi dadpenquioshë.

⁹ Aidtedi tsidadash cho-choash Esus tantiaquido tabadacnombo Nuquin Papan tantiac-nobi Edusaden yacno daquiaidshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. ¹⁰ Adshumbic aidë icsa uamequidtsen Satanasquio bedshun acte uquëducuësh chonday chuiquid icsamboshë icquidbëdta nidaid shëcuënuësh chonday ënden nësecaondacnombo chian anëdënquequid Satanatsen nënendac. Adoac aidë ënëdenquo yec natiamboshë iquendac. Aden ismeposhi.

Icsambo icquido cuidte chiaid

¹¹ Adshumbic padpiden Nuquin Papan matses cuidte ismeposhi. Adoac tsadte nu-acquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuc adec tsadposh. Icsambo icquido cuidquidquo yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadiapiambo yec. ¹² Nuquin Papa yacno unësaido uincuemiaido abitedimbo tabadposh. Adnubien bëshunenquo icquin dada uaten dada uabanacimboen Nuquin Papan abitedi tantiaquid icquin matsesën naidtedi abimbo chuibamposh cuidnumbë. Abi tantiaquido abëdi tabadmequimbi abi tantiesabo comapenen cuidnun aden chuibamposh. ¹³ Unësaido abitedi icposh. Utsi-utsiec unësascho chian dapa mad caid nëniaido uincuemiaido niosh. Utsi-utsiec nidaidën chococaid uincuemiaido niosh. Adsho aidon naidtedi Nuquin Papan chuibamposh. ¹⁴⁻¹⁵ Adshumbic Esus tantiesabo icsho documento nibëdquidbimboecsho abi yacno tabadmenquo icquin chian dapa anëdënquequid uesquin nësecabamposh. Aden Esus tantiesabo nësecan unëstequido utsibo nibëdposh. Esus tantiesabo aton dada unësan abi tantiate tabadacno utsibo tabadenquo icposh. Adnubien Esus tantiaquido Nuquin Papa yacno tabadec unëstiapimbo icquiduidquido icposh. —Adquid iquendac —quequin aden ismeposhi.

21

Nuquin Papabëd tabadaidquio

¹ —Esus tantiesabo chian anëdënquequid nësecaindac —quequin ismëboshombic padpi-den ismeoposhi. Adoac abu chucambo icsho ispombi. Nidaidsen chucambo icposh. Abubëdi nidaid shëni nibëdnuc utsi chucambo icquiduidquido icposh. Ënden iccondaid chian dapa mad caidtsen nibëdposh. ² Adnubien Esusbëdi Nuquin Papa tabadaidquio abichobi Edusaden chuca caid abucuwësh budposh. Chido nëbi bedboedën aton bënë cuishoncamiacimboec cuishoncamianquid yec bëdamboshë icposh. ³ Adnubien Nuquin

Papa tsadacnuëshquio comapenec cuèdposh naden chiec. —“Con matses nec,” quiaish nèbi Nuquin Papa matsesbèdi tabadendac cuèshèdenquio yec. Adsho isun aton yuabo icquin matses abitedishun: “Nuquin Icbombo nuqui tantiaidquio nec,” caindac. ⁴ Ambo Nuquin Papan abitedi chuca uacnombo aibdèdi tabadec matses shubitiapimbo iquendac bèun ucacimboec. Nidaid shènin tabadec abitedi unèstequiduidquio ichoedi Nuquin Papa yacnuëshien matses unèstiapimbo iquendac. Adechbidi sedenquetiapimbo iquendac. Adechbidi paèmbo ictiapimbo iquendac —queposh Nuquin Papa yacnuësh onquec.

⁵ Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaquin chuca uaindami bèdamboshè icnuc —queposh Nuquin Papa Esusbèdi. Adshumbic èbi chuiposh. —Èmbi aden chuiboed dada uata. Èmbi muesambo icquin abimbo chiaid nec —queposh Nuquin Papa Esusbèdi.

⁶ Adashic Nuquin Papa padpidec onquec: —Èmbi chuiboctedimbo nainquin naindami utsibon: “Padi,” catiapimbo icnuc. Èndenquimboshè nidaid uabi ictenedi nebi. Nèbi adquid yec nibèdantiapimbo icquid nebi. Adquid yec abitedishun Icbombo icquin èmbi tauaidtedi nainendambi. Adquid icquin acte bunacimboec èbèd tabadte bunquidon con Mado Esus tantiaho èbèdi tabadmendambi. ⁷ Satanasèn: “Chieshtomenu,” cauidaio Esusbèda èbi chieshtoenquio icquin tantiaquido èbèdi tabadmendambi bèdamboshè yacnombo. Èbi papa casho: “Ai, con mado mibi nec. Con champi mibi nec,” caindambi. ⁸ Adshumbic utsibo chian dapa anèdènquequid icsamboshè nuadquid nèsecaindami. Nèidtedi icsamboshè icquido adoendambi. Nèidic èbi bèdiactès tantiauidtsèchoedobi chieshèmènquidon: “Cuesnu,” cac chieshtoash tantiesa yanoaido. Nèidic Esus tantiesabo abitedi. Nèidic icsamianquido. Nèidic chieshèmènc cuesunianquido. Nèidic dada aton dada utsibèdi chichudnanquido. Nèidic aton chidopenquio chudquido. Nèidic aton bènèpenquio chudmequido. Nèidic nènèchoquidobèdtabi cuète podon unès uante bunquido. Nèidic ambi nacnenaidi papa caquin tantiaquido. Nèidic muauanquido. Aidedi chian dapa anèdènquequid nèsecaindami —queposh Nuquin Papa.

Abi tantiaquido Esusbèd icte chiaid

⁹ Adnubien mayan bèdan Nuquin Papan matses cuidte cushtoaid chiuimboed abentsèc choshon chuioposhi. —Isec cho. Chido nèbi bedboedèn aton bènè cuishoncamiacimboen abided cuidadec unèsaid Esus cuishoncamequido tabadaid mibi ismenu. Cho —caposhi Esus tantiaquido ismenu. ¹⁰ Adshumbic Nuquin Papan Mayanèn tantiamiac ushquin isacimboen isombi. Mayan bèdan èbi buanquin ispombi. Aden buanshian macuèsh dapa mananènquio tsadumposhi. Adoac anoshon isquien abucuèsh Nuquin Papa abi tantiaquidobèd abi tabadaid abichobi shubu dadpen icquid budposh. Aid tabadaid Edusaden chuca caposh. ¹¹ Aid tabadaidquio aid shubutedi Nuquin Papa tabadaid yec abi yacpadquio abichobi bèchamauanquieposh. Casèdu bèdambo icquidbimboec isquid-isquidquio isadposh. ¹² Shubu abitedi nènantan icnuc abichobi daquènè uaid icposh. Abucquio icnuc daquènè uaid niosh. Daquènè uaid puduedte shècuè 12tedi icposh. Aid shècuè icbo-icboen isquid yec mayan bèdabo 12tedbidi icposh. Aid shècuè bètashte 12tedbidi icposh. Aid bètashten Acobon mado cuèmèdquid 12tedbidi dada uabampaccosh naden. Bètashten Acobon mado Ose cuèmèdquid dada uatanquin bètashte utsin Acobon mado utsi Uda cuèmèdquid dada uatanquimbic adenuidi bètashten bètashtenquien Acobon mado cuèmèdquid cuèmèdquidquien dada uabampaccosh. ¹³ Aid daquènè uaid puduedte shècuè ushè choauc 3tedi icposh. Ushè nibèdauc nodte yauc aitedbidi shècuè icoaposh. Ushè nibèdaucbidi sud yauc aitedbidi shècuè icposh. Ushè budauc aitedbidi shècuè icposh. ¹⁴ Ambo tauaquin daquènè uadoquin nidaid cuènote nuamboshè icquid dapa 12tedi bedshun Esusbèd icquido èbitedi cuèmèdquid 12tedi aid cuènote dapan abentse-abentsen dada uabampaccosh naden. Cuènoten èbi cuèmèdquid Uan dada uatanquin cuènote utsin Petedo cuèmèdquid dada uapaccosh. Adenuidi cuènoten cuènotenquien Esusbèd icquido cuèmèdquid cuèmèdquidquien dada uabampaccosh. Adoshombic nidaid uèdèshcabanshun tauaquin sandoshon cuènote utsi tsindoaid aid daquènè uaid niosh. —Esus tishabi icnuc Nuquin Papa tantiapampidobèdi Esus tantiaquido Nuquin Papa yacno Esusbèdi tabadendac —quequin tantiamenuen Acobon mado cuèmèdquidotedi dada uaidbèda Esusbèd icquido cuèmèdquid dada uaid aden ismeposhi.

¹⁵ Adshumbic èbi chuiboedèn mayan bèdan shocosh bèdaidquio nacnenaid tambante sanamposh. —Nuquin Papa tabadacno tambanquin daquènè uaidbèdtabi puduedte shècuètedi tambanten tambanu —queposh. ¹⁶ Adoshombic cuèma abitedi tambanac cuèma tiombi-tiombimboec icposh. Cuèma auc abentsèc tanac quidometedos 2,200ted cactiombi iccosh ènapenquioshè. Aidtionuidi iccosh cuèma abitedi. Adoshombic abuc yacmi cuembot-sen tanac aidtionquibidi icposh. ¹⁷ Nidaid cuènote nuamboshè icquid dapa tsindoquin

daquënë uaid bitsipambo icquidtsen tanac nuamboshë bitsi icposh. Matsesën nacnenaid tambantent tanac metedos 65ted cactiombi icposh nuamboshë bitsipambo.

¹⁸ Daquënë uaid abichobi isquid-isquidquo isadposh. Bëdamboshë icposh. Padnuen shubu abitedi shocosh bëshpiu-bëshpiuctsëcquid nacnenaiduidquo yec nac-nacquo icposh. ¹⁹ Aid daquënë uaqin tauaqin sandoaïd nidaïd cuënote dapa casëdubimboecquid bëdambo icquid matses comapene bunaidquo utsi-utsien dabitaccabanaid niosh. Abentsëc aspe caïd umu-umumboctsëcquid dabitaccabampaccosh. Utsibic sapido caïd umumbo icquid dabitaccabampaccosh. Utsibic acata caïd ushumbo icquid. Utsibic esmedada caïd umumbo icquid utsi. ²⁰ Utsibic onise caïd piumbo icquid. Utsibic conadina caïd piu-piupactsëcquid. Utsibic quidisodito caïd bëshpiu-bëshpiupactsëcquid. Utsibic bedido caïd umu-umupactsëcquid utsi. Utsibic topasio caïd piu-piupactsëcquid utsi. Utsibic quidisopadasa caïd nushan-nushanacbitsecquid. Utsibic asinto caïd umumbo icquid utsi. Utsibic amatista caïd umumbo icquidbidi. Aïdtedi dabitaccabanaccosh. —Nuqin Papa yacnombo bëdamboshë iquendac —camenuen aden ismeposhi. ²¹ Daquënë uaid puduedte shëcuë 12tedi icposh. Aid bëtashtetedi acte chiumbimboecquidën casëdu ushu uaid nuacquid dapambo abichobi-abichobien nacnenaid niosh. Ambo shubu dadpen icquid nënantanquo podqued icposh. Aid podqued shocosh bëshpiu-bëshpiuctsëcquid acteactetsëcquio icnuc mabiunaïd icposh. —Esusbëd Nuqin Papa tabadacnombo bëdambo icquiduidquo iquendac —camenuen aden ismeposhi.

²² Ambobi abi bëisec tabadacnombo Nuqin Papa tabadte shubu uashunaid nibëdposh. Ambo Nuqin Icho Esus abided cuidadec unësaidbëd Nuqin Papa icsho bëisiquioquin tantiec anocquido tabadendac. ²³ Ambobidi inchështanec badiadenquo iquendac. Badiadën ushë isadenquo iquendac. Inchëshën ushëtsen isadenquo iquendac. Nuqui icsaid bedshunuec abided cuidadec unësaid Esusbëd Nuqin Papa bëchamuanquieccquid icqin ambo ushëmbouidi icmendac. Inchëshaid tantiadenuio iquendac. —Nuqin Papa icsaisambo icnuc abi yacno icsaido nibëdquo iquendac —camenuen aden ismeposhi. ²⁴ Icsaisambo icqin Nuqin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuqin Papa yacnombo quenec tabad-cuenash: —Esusbëd Nuqin Papa abitedishun Icbombo nec. Abipadquid utsi nibëdec —quendac. ²⁵ Nuqin Papa matsesbëdi tabadacnombo inchëshenquo icnuc: —Icsambo icquido puduednushe. Bëtashnu —quetiapimbo icsho isun daquënë uaid shëcuë bëtashenquo iquendac. Shëcniacchobi iquendac. ²⁶ Padnuen nidaïd utsi-utsiec yacno tabadquido chuiquid dapabo Esus tantiaquido yanash Nuqin Papa yacnombo puduedash: —Daëdpacktsëc tantiaquin matses daëdpacktsëc namebampadenmbi. Nuqin Papa aton Mado Esusbëdi comapenen tantiaquidquo yec abitedishun Icbombo nec. Abipadquid utsi nibëdec —quendac abitedi. ²⁷ Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuqin Papan bëshunenuio icqin dada uacimboben: —Icsambo icboedi abided cuidadec unësaid con Mado Esus tantiaquido aïdo nec. Con bacuëbo nec —capendac. Aden ambi con bacuëbo caïdo abi yacno puduedendac. —Nuqin Papa yacno adquo bëdamboshëuidquo iquendac —quequin aden ismeposhi mayan bëdan.

22

Nuqin Papa yacno acte ismiaid

¹ Adshumbic aid mayan bëdan padpiden ismeoaposhi. Adoac Nuqin Papa abided cuidadec unësaid aton Madobëdquo tsadte dapan tabadacnuësh matses unëstiapimbo icmete-quid acte bëdambo icquid nushan nibëdquidquo chëuëdsho ispombi. ² Nuqin Papa yacnuëshquo choec chëuëdec ambo tabadquido Esus tantiaquido tabadaïd shubu nënantanquo chëuëdposh. Aid cuëmambi matses unëstiapimbo icmete-quid cuëtetsen icposh. Baded-badedquiecc bacuëquidquo niosh. Inchëshën ushë choan-choanquiecc badedquido bacuëquid niosh. Aid cuëte podo nidaïd utsi-utsiec yacno tabadquido bëdambo icmete-quid niosh. —Aton Mado abided cuidadec unësaid tantiaquido abëdi tabadmequin Nuqin Papan unëstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuqin Papan daicsabudtiapimbo icquid icmendac —camenuen cuëte aton podobëdta ismeposhi. ³ Aden abitedi bëdambo icmiac cuidtequido nibëdquo iquendac. Icsambo icquido nibëdnuc Nuqin Papa aton Mado Esusbëd tabadac-noshon aid daëdi tantiaquiecc Esus tantiaquido tabadendac. ⁴ Adec: —Con bacuëbo nec —quequin Nuqin Papan abi cuëmëdquid dada uaqin bësiaïdon Nuqin Papambo bëisiquiecc tabadendac. —Nidaïdën tabadec bëdamboec tabadquido Nuqin Papabëd tabadec abipadquido bëdamboshë yanendac —camenuen aden ismeposhi. ⁵ Ambo bëdambouidquo yec inchëshenquo iquendac. Nuqin Papa bëchamuanquieccquidëmbi ushëmbouidquo iquendac

inchëshaid tantiaidenquo yec. —Aden abi tantiaquido bēdamboen isquin ēnenquo icquin bēdamboshē icmendac. Chuiquid dapabo icmiac Esusbēdtambi ēnenquo icquin namendac —quequin ismeposhi.

⁶ Adshumbic mayan bēdan chuiuoaposhi. —Tantia. Mibi chuinu. Nuquin Papan Mayanēn tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanēn namiaid icquin abimbo chuiquin mibi dadpen ismebanombi. “Nēbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bēda.

Esus chote chiaid

⁷ Adnubini Esusēnquo naden chuiposh. —Chieshtoenquo icquin ēbi tantia. Nēbimbobi nidaidēn choec budebique. Nēid dada uaid isquin ēbi tantiaquiota. Adsho mibi bēdambo icmendambi —caposhi Esusēn.

⁸ Uan nebi. Abimbo chuiquin nēid dada uaombi. Aden mayan bēdan chuiabanquin ismeposhi. Aden ēnquimbi ismiaquini: —Nuquin Papapadquidien nechitec —quetanec danēshēn tinquebuduidpoc ēbi ismequid mayan bēda ismenuec. ⁹ Adshobini: —Padi. Aden ēbi ismenda. Mibipadquid Nuquin Papan yuabidi nebique. Ēndenquimboshē Nuquin Papan tantiamiac min tsusedpabo isadaidbon ambi chiaidquido dada uapampic. Nēbi ēmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidsēqui tantiaquin aden ismeta —caposhi mayan bēdan.

¹⁰ Adashic padpidec: —Ēmbi chuibamboedbēda ēmbi ismeboedtedi chuiquin dada uata. “Nēid dada uaid isec onquequin ma Esus tantiaquidon tantianu. Nēbi adquid yanushe. Chieshtoenquo icquin Esus tantiec ma tabadnu,” queshun dada uata. ¹¹ Nēbimbobi Esus chonoc Esus tantiesabo badedquido bēdamboec tabadcuentiapimbo iquendac. Abi icsaid badedquido ēntiapimbo iquendac. Esus tantiaquido abi bēdamboec tabadacpadquiecbidi bēdamboec tabadpashun —queposh mayan bēda.

¹² Adnubini Esusēn chuiuoaposh. —Chieshtoenquo icquin ēbi tantia. Nēbimbobini choendac. Choshon matsesēn naidtedi tantiaquin icsaido cuidquimbi ēbi tantiaquido ēbēdi tabadmendambi. ¹³ Nuquin Papapadquidquido nebi. Ēmbi tantiacmaid nibēdnuc abitedi comapenen tantiaquidquido nebi. Nidaid uabi yec ictenedi nēbi adquidquido yec nibēdantiapimbo icquid nebi. Adquid yec abitedishun Icbombo nebi.

¹⁴ Icsambo ichoedon ēbi tantiasho icsaisabimboecnuc Nuquin Papan bēdamboen isendac. Adshun ēbi yacnombo puduedmequin unēstiapimbo icquido icmendac unēstiapimbo icmiantequid cuēte bacuē chemiacimboen. ¹⁵ Padnuen ēbi tantiesabo bēdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nēidic nēnēchoquidobēdi cuēte podo chodcashun unēs uante bunquido. Nēidic dada cuididimbo. Nēidic chido chishpida. Nēidic aton chidopenquo chudquido. Nēidic aton bēnēpenquo chudmequido. Nēidic cuesanquido. Nēidic papa quequin ambi nacnenaidi tantiaquido. Nēidic abi bunaiduidquido naic muauanquido. Aidtedi Nuquin Papa yacno puduedtiapimbo iquendac.

¹⁶ Ēmbi chiacpadomboen mayan bēdan mibi ismebamposh. “Ma ēbi tantiaquidon iste dada uanu,” quequin ēmbi chiacpadomboen mibi ismebamposh. Nuquin Papan dada uamiac matsesēn: “Dabidēn tsyuecquid yec abitedimbo chuiquid dapa iquendac,” quequin chuipampid nebi. Isadaidbon cainaidquido nebi. Utsin: “Dēniacnu,” cadtiapimbo icquid nebi. Adquid icquin matses abitedimbo namendambi —quequin chuiposhi Esusēn.

¹⁷ Adsho tantiasahun Nuquin Papan Mayanēn tantiamiacpadomboen chuiquin: —Nēbimbobi Esus chonoshe. Aidquido tantiabenta —caindac Esus tantiaquidon Esus tantiesabo chuiquin. Ēmbi chuiboed tantiaquidtedishun: —Nēbimbobi chonoshe. Aidquido tantianuna —cac bēdambo ictsiash. Adsho tantiashe Esus tantiesabo acte bunacimboec Esus tantiate bunsho Nuquin Papan bēdamboen isendac. Nuquin Papa bēdamboen ismenuen menete nibēdnuc Esusuidi tantiasho Nuquin Papan bēdamboen isquin abēdi tabadmendac.

¹⁸ Tantia. Ēmbi chuiboed tantiaquido chuinu. Nuquin Papan: —Nadquid iquendac. Yuecash utsi iquendac —quequin ēbi ismeboedtedi dada uaombi. Ēmbi dada uaboed tsitēnquin ambembi chiaid dada uainda. Ēmbi chuiobcpadomboen Nuquin Papan mibi cuidtsiashe. ¹⁹ Adembidi ēmbi dada uaboed utsi uainquo icquin abimbo chuita. Ēmbi chuiobcpadomboen Nuquin Papan mibi unēstiapimbo icquid icmenquo ictsiash. Adembidi bēdamboshē yacno abēdi mibi tabadmenquo ictsiash.

²⁰ —Ma aitedi tantianu —quequin Esusën chiacpadomboen mayan bēdan aitedi is-meposhi. Ēmbi chuibocpadomboen Esusën: —Nēbimbobini choendac —caposhi. Adsho tantiashun: —Ai, nēbimbobi chota —capombi.

²¹ Mibitedi Esus tantiaquidotedi tantiaquin: —Ambi nabocpadomboen Nuquin Icho Esusën bēdamboen isquin bēdambo icmepashun —caimbi. Padi. Aitedi chuiquin dada uaombi.